

Holy Bible

Aionian Edition®

**La Botshelo Kgolagano e Ntsha
Open Tswana Living New Testament**

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ©
La Botshelo Kgolagano e Ntsha
Open Tswana Living New Testament

CC Attribution ShareAlike 4.0, 2018-2024

Source text: eBible.org

Source version: 2/21/2024

Source copyright: CC Attribution ShareAlike 4.0, International
Biblica, Inc., 1993

Original work available for free at www.biblica.com and open.bible

Formatted by Speedata Publisher 4.19.2 (Pro) on 5/6/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

Setswana at AionianBible.org/Preface

The *Holy Bible Aionian Edition* © is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

Table of Contents

NEW TESTAMENT

| | |
|-----------------------|-----|
| Mathaio | 11 |
| Mareko | 33 |
| Luke | 48 |
| Johane | 72 |
| Ditiro | 90 |
| Baroma | 113 |
| Bakorintha I | 126 |
| Bakorintha II | 138 |
| Bagalatia | 146 |
| Baefesia | 151 |
| Bafilipi | 156 |
| Bakolosa | 159 |
| Bathesalonia I | 162 |
| Bathesalonia II | 165 |
| Timotheo I | 167 |
| Timotheo II | 170 |
| Tito | 173 |
| Filimone | 175 |
| Bahebera | 176 |
| Jakobe | 185 |
| Petere I | 188 |
| Petere II | 191 |
| Johane I | 193 |
| Johane II | 196 |
| Johane III | 197 |
| Juda | 198 |
| Tshenolo | 199 |

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



Mme Jesu a re, "Rara, itshwarele batho ba, gonne ga ba itse se ba se dirang."

Mme masole a kgaogana diaparo tsa gagwe ba di laola ka bola.

Luke 23:34

Mathaio

1 Ba ke bagolwagolwane ba ga Jesu Keresete wa lotso lwa ga Kgosi Dafide le Aberahame: **2** Aberahame e ne e le rraagwe Isake; Isake e ne e le rraagwe Jakobe; Jak obe e ne e le rraagwe Juda le bomonnawe ba basimane. **3** Juda e ne e le rraagwe Perese le Sera (Tamare e ne e le mmaabo); Perese e ne e le rraagwe Heserone; Heserone e ne e le rraagwe Arame; **4** Arame e ne e le rraagwe Aminadabe; Aminadabe e ne e le rraagwe Nashone; Nashone e ne e le rraagwe Salemone; **5** Salemone e ne e le rraagwe Boase (Rahabe e ne e le mmaagwe); Boase e ne e le rraagwe Obede (Ruthe e ne e le mmaagwe); Obede e ne e le rraagwe Jese; **6** Jese e ne e le rraagwe Kgosi Dafide. Dafide e ne e le rraagwe Solomone (mmaagwe o ne a kile a ne a le mogatsa Uria); **7** Solomone e ne e le rraagwe Rehoboame; Rehoboame e ne e le rraagwe Abija; Abija e ne e le rraagwe Asa; **8** Asa e ne e le rraagwe Jehoshafate; Jehoshafate e ne e le rraagwe Jerame; Jerame e ne e le rraagwe Usia; **9** Usia e ne e le rraagwe Jothame; Jothame e ne e le rraagwe Ahase; Ahase e ne e le rraagwe Heseikia; **10** Heseikia e ne e le rraagwe Manase; Manase e ne e le rraagwe Amone; Amone e ne e le rraagwe Josaea; **11** Josaea e ne e le rraagwe Jokonia le bomonnawe ba basimane (ba tsetse ka nako ya go gapelwa kwa Babelona). **12** Morago go ga gapelwa kwa Babelona: Jokonia o ne a tsala Salathiele; Salathiele e ne e le rraagwe Serubabele; **13** Serubabele e ne e le rraagwe Abiude; Abiude e ne e le rraagwe Eliakime; Eliakime e ne e le rraagwe Asore; **14** Asore e ne e le rraagwe Sadoke; Sadoke e ne e le rraagwe Akime; Akime e ne e le rraagwe Eliude; **15** Eliude e ne e le rraagwe Eleasare; Eleasare e ne e le rraagwe Mathame; Mathame e ne e le rraagwe Jakobe; **16** Jakobe e ne e le rraagwe Josefa yo e neng e le monna wa ga Marea Mma-Jesu Keresete Mesia. **17** Tse ke ditshika di le lesome le metso e le mene mo ditshikeng tse di simololang ka Aberahame go tla go fitlha mo go Kgosi Dafide; le tse di lesome le bone go simolola ka nako ya ga Kgosi Dafide go ya nakong ya go gapelwa kwa Babelona; le tse di lesome le bone go simolola ka nako eo go tla go fitlha mo go Keresete. **18** A ke mabaka a boammaaruri a a amanang le botsalo jwa ga Jesu Keresete: Marea mmaagwe, o ne a beeletswe go nyalwa ke Josefa. Mme ya re a sa ntse a le kgarebana, a ithwala ga Mowa o o boitshepo. **19** Mme Josefa mmeeledi wa gagwe ka a le mosiami, a ikaelela go senya tsholofetso ka tidimalo ka a ne a sa rate go mmaa mo mpepeneneng go mo tlhabisa ditlhong. **20** Mme ya re a sa ntse a thantse a akanya ka ga selo se, a thulamela, a lora, mme a bona moengele a eme fa go ene a mo raya a re, "Josefa, morwa Dafide, se etsaetsege go tsaya Marea jaaka mosadi wa gago ka gore ngwana yo o mo rweleng o mo ithwele ka Mowa o o Boitshepo." **21** Mme o tlaa tshola ngwana wa mosimane, mme o tlaa mo raya leina o re Jesu (Ke gore "Mmoloki"). Ka gore o tlaa golola batho ba gagwe mo dibeng tsa bone. **22** Mo go tlaa diragatsa molaetsa wa Modimo o o kileng wa anamisiwa ke baporofiti ba one, ba re, **23** "Reetsang! Kgarebana e tlaa ithwala ngwana! E tlaa tshola ngwana wa

mosimane, mme o tlaa bidiwa 'Imanuele'." (Ke gore "Modimo o na le rona") fa go tlhalosiwa. **24** Erile Josefa a tsoga, a dira jaaka moengele a mo laetse, a isa Maria gae go nna mosadi wa gagwe. **25** Mme a nna a ntse a le kgarebana go fitlhelela morwawe a tsholwa mme Josefa a mo raya leina a re "Jesu."

2 Jesu o na a tsalelwa mo motseng wa Bethelhehema, mo Judea metheng ya puso ya ga Kgosi Herode. E rile ka yone nako eo balepi ba dinaledi bangwe ba goroga mo Jerusalemaba tswa mafatshing a bothabatsatsi, mme ba botsa ba re, **2** "E fa kae Kgosi e ncha e e tsetsweng ya Bajuda? Ka gore re bonye naledi ya gagwe mo mafatshing a a kgakala a bothabatsatsi, mme re tsile go mo obamela." **3** Kgosi Herode o ne a tshwenyega thata ka potso ya bone, le batho botlthe ba motse wa Jerusalemaba ba ne ba tlaa khuduego. **4** A bitsa phuthego ya baetedipele ba tumelo ya Sejuda, a ba botsa a re, "A baporofiti ba kile ba re bolelela kwa Mesia o tsalelwang teng?" **5** Mme ba mo araba ba re, "Ee, mo Bethelhehema, ka gore mo ke mo moporofiti Mika o go kwadileng a re, **6** 'Wena motsana wa Bethelhehema, ga o legae la Juda le le nyatsegang, gonne mo go wena go tlaa tswa molaodi yo o busang batho ba me ba Iseraele.'" **7** Hong Herode a romela molaetsa ka sephiri kwa baleping ba dinaledi, a ba kopa gore ba tle go mmona, e rile mo phuthegong e, a ba tlhothomisa go mmolelela nako tota e ba simolotleng go bona naledi ka yone. Mme a ba raya a re **8** "Tsamayang lo yeng kwa Bethelhehema lo fete lo senke ngwana. E re lo sena go mmona lo boele kwano go nkitsise gore le nna ke tle ke ye go mo obamela." **9** E rile morago ga puisanyo e, balepi ba dinaledi ba simolola go tsamaya gape. Mme bonang! Naledi ya iponatsa gape mo go bone, e eme fa godimo ga Bethelhehema. **10** Boitumelo jwa bone jwa nna bogolo thata! **11** Ya re ba tsena mo tlung e ngwana le Marea mmaagwe ba mo go yone, ba wela ka mangole fa pele ga gagwe ba mo obamela. Ba bula dimpho tsa bone mme ba mo fa gauta, leswalo le le nkngang monate (la kobamelo) le setlolo se sengwe se se bidiwang mera. **12** Mme e rile fa ba boela kwa ga bone, ba se ka ba ralala Jerusalemaba go itsise Herode, ka gore Modimo o ne o ba tlhagisitse mo torong go boela gae ka tsela e sele. **13** E rile ba sena go tsamaya, moengele wa Modimo a bonala ka toro mo go Josefa. Mme a mo raya a re, "Tsoga o tshabele le ngwana le mmaagwe kwa Egepeto, o nne teng go fitlhelela ke go raya ke re o boe, ka gore Kgosi Herode o tsile go leka go bolaya ngwana." **14** E rile mo bosigung joo a ya Egepeto le Marea le Iosea, **15** mme a nna teng koo go fitlhelela Kgosi Herode aa swa. Mo ga diragatsa polelelopele ya moporofiti e e reng, "ke biditse morwaae go tswa mo Egepeto." **16** Herode o na a tlaa bogale fa a lemoga gore balepi ba dinaledi ga ba a dira ka fa a ba laetseng ka teng. Mme a roma masole kwa Bethelhehema go bolaya ngwana mongwe le mongwe wa mosimane go simolola ka wa dingwaga tse pedi go ya kwa tlase mo motsing le mo tikologong yotlhe ka gore balepi ba dinaledi ba ne ba mmoleletse gore naledi e sale e bonala mo dingwageng tse pedi tse di fetileng. **17** Tiragalo e e setlhogo e ya ga Herode, ya diragatsa polelelopele ya ga Jeremia e e reng, **18** "Selelo sa khutsafalo sa utlwala se tswa Rama, selelo sa khutsafalo e kgolo; ragele a lelela bana ba gagwe; a gana

go gomodiwa ka gobo ba sule.” 19 E rile Herode a sena go swa, moengele wa Modimo a bonala ka toro kwa go Josefa mo Egepeto, mme a mo raya a re, 20 “Tloga o tseye ngwana le mmaagwe o boele nabo kwa Iseraele, ka gore ba ba neng ba leka go bolaya ngwana ba sule.” 21 Mme ka bofelo a boela kwa Iseraele le Jesu le mmaagwe. 22 Mme e rile mo tseleng a boifa fa a utlwa gore Kgosi e ncha ke Arekelao morwa Herode. Mme ya re ka toro e nngwe a tlhagisiwa gore a seka a ya Judea, jalo a ya Galalea; 23 ba nna mo Nasaretha. Mo, ga diragatsa seporofeso sa baporofiti kaga Mesia se se reng, “O tlaa bidiwa Monasara”.

3 E rile fa ba sa ntse ba le mo Nasaretha, Johane wa Mokolobetsi a simolola go rera mo sekakeng sa Judea. Thero ya gagwe gangwe le gape e ne e re, 2 “Sokologang mo dibeng tsa lona, boelang mo Modimong, gonne Bogosi jwa Legodimo bo atametse.” 3 Isaia moporofiti mo makgolong a dingwaga a a fetileng, o boletse ka ga thuto ya ga Johane. O ne a kwadile a re, “Ke utlwa lentsewe le le goang mo sekakeng, ‘Baakanyang tsela ya Morena, tlhamalatsang tsela e a tlaa tsamayang mo go yone.’” 4 Diaparo tsa ga Johane di ne di dirilwe ka boboa jwa kamele, o ne a itlama ka moitlamo wa letlalo; dijo tsa gagwe e ne e le tsie le dinotsho tsa naga. 5 Batho ba ba tswang Jerusalem le ba ba tswang mo tikologong yotlhe kwa moseja ga mogogoro wa Jorodane, le ba ba tswang mo kgaolong nngwe le nngwe ya Judea ba tswela kwa sekakeng go mo reetsa a rera, 6 mme fa ba sena go ipolela dibe tsa bone, a ba kolobetsa mo nokeng ya Jorodane. 7 Mme e rile a bona Bafarasai le Basadukai ba le bantsi ba tla go kolobediwa, a ba nyatsa a re, “Losika lwa dinoga ke lona! Yo o lo reileng a re lo ne lo ka falola mo bogaleng jwa Modimo jo bo tlang ke mang? 8 Pele ga lo kolobediwa supang gore lo sokologile mo dibeng ka go dira ditiro tse di tshwanetseng. 9 Lo seka lwa ikaketsa lwa re, ‘Re falotse ka re le Bajuda, losika lwa ga Aberahame.’ Moo ga go reye sepe. Modimo o ka fetola maje a a fano a, go nna Bajuda! 10 “Mme le jaanong selepe sa katholo ya Modimo se tsepame go kgaola setlhare sengwe le sengwe se se sa ungweng. Di tlaa rengwa di tshubiwa. 11 “Nna ke kolobetsa mo metsing ba ba sokologileng mo dibeng tsa bone; mme mongwe o e tla; yo mogolo go mpheta thata, o bogolo jo e leng gore ga ke a lekana go tshola dithako tsa gagwe. Ene o tlaa lo kolobetsa ka Mowa o o Boitshepo le ka molelo. 12 O tlaa tlhopa mmoko mo mabeleng, a fisa mmoko ka molelo o o sa khutleng, a ba a boloka mabele mo polokelong.” 13 Mme a tswa mo ga gabo mo Galalea a ya kwa nokeng ya Jorodane go kolobediwa teng ke Johane. 14 Johane o ne a sa batle go mo kolobetsa a re, “Mo ga go a tshwanela, ke nna ke tlhokang go kolobediwa ke wena.” 15 Mme Jesu a fetola a re, “Tswee-tswée dira jalo ka gore ke tshwanetse go dira tshiamo yotlhe.” Jalo he, Johane a mo kolobetsa. 16 Morago ga kolobetso, fela fa Jesu a tswa mo metsing, magodimo a mmulegela mme a bona Mowa wa Modimo o fologa o le mo setshwanong sa lephoi. 17 Mme lentsewe la tswa kwa legodimong le re, “Yo ke morwaake yo o ratengang, ke itumela thata ka ene”.

4 Mme Jesu a gogelwa ke Mowa o o Boitshepo kwa sekakeng, go ya go lekwa ke Satane. 2 Ka malatsi a le masome a mane le masigo a le masome mane o na a sa je sepe, mme a tshwarwa ke tlaa. 3 Mme Satane a mo leka gore a fetole maje senkgwe. Mme a re, go tlaa supa fa o le Morwa Modimo. 4 Mme Jesu a mo raya a re, “Nnyaa! gonne dikwalo tsa re senkgwe ga se ka ke sa otlwa mewa ya batho: se re se tlhokang ke go reetsa lefoko lengwe le lengwe la Modimo.” 5 Mme Satane a mo tsaya a mo isa setlhoeng sa Tempele mo Jerusalem. 6 A mo raya a re, “Itige o itshupe fa o le Morwa Modimo; ka dikwalo tsa re, ‘Modimo o tlaa roma baengele ba One go go agelela gore o seka wa golafala,’ ba tlaa go agelela mo go sugakaneng mo matlapeng a a kwa tlase.” 7 Jesu a mo araba ka kgakalo a re, “Gape gatwe ‘o se ka wa leka Morena Modimo ka teko ya boeleele.” 8 Mme Satane a mo tsaya a mo isa setlhoeng sa thaba e e goletseng kwa godimo thata mme a mo kaela dichaba tsa lefatshe le kgalalelo yotlhe ya tsona. 9 A mo raya a re, “Ke tlaa go fa mo gotlhe fa o ka khubama wa nkobamela.” 10 Mme Jesu a mo raya a re, “Tloga fa Satane. Dikwalo tsa re, ‘obamela Morena Modimo a le nosi. Reetsa ene fela.’” 11 Mme Satane a mo tlogela mme baengele ba tla go mo direla. 12 Mme e rile fa Jesu a utlwa gore Johane o tshwerwe, a tswa mo Judea a boela gae kwa Nasaretha mo Galalea; Mme ka bofelo a fetela kwa Kaperanama fa thoko ga Lecha la Galalea gautshwane le Sebulona le Nafetali. 14 Mo ga diragatsa seporofeso sa ga Isaia se se reng 15 “Lefatshe la Sebulona le lefatshe la ga Nafetali fa thoko ga Lecha, le moseja ga noka ya Jorodane, le kwa godimo ga Galalea kwa go tletseng Badichaba, 16 teng koo batho ba ba neng ba le mo leffing, ba bonye lesedi le legolo; ba ne ba ntse mo lefatshing la loso, mme lesedi la ba tlhabela.” 17 Go simolola foo, Jesu a simolola go ruta a re, “Sokologang mo sebing lo sokologele mo Modimong gonne Bogosi jwa Legodimo bo, atametse.” 18 Mme ya re ka letsatsi lengwe a tsamaya mo mothabeng wa lotshitshi lwa Lecha la Galalea, a bona banna ba le babedi, bana ba motho, ebong Simone yo o bidiwang Petere le Anderea, ba le mo mokorong ba tshwara diithapi ka lotloa ka e ne e le batshwari le barekisi ba diithapi. 19 Mme Jesu a ba bitsa a re, “Ntshalang morago mme ke tlaa lo ruta ka fa lo ka tshwarang ka teng mewa ya batho.” 20 Mme ba akofa ba tlogela matloa a bone ba tsamaya nae. 21 Ya re kgakalanyana mo mothabeng wa lotshitshi, a bona bana ba motho ba bangwe gape ba le babedi, ebong Jakobe le Johane ba ntse mo mokorong le Sebede rraabo, ba roka matloa a bone; mme le bone a ba bitsa. 22 Mme ba akofa ba emisa tiro ya bone ba tsamaya nae, ba tlogela rraabo. 23 Jesu a tsamaya mo tikologong yotlhe ya Galalea a ruta mo dikerekeng tsa Bajuta a rera Mafoka a a Molemo kaga Bogosi jwa Legodimo. A fodisa mofuta mongwe le mongwe wa khidiego le malwetse. 24 Pego ya dikgakgamatso tsa gagwe ya anama go feta melaelwane ya Galalea mo e leng gore batho ba ba neng ba lwalela kgakala kwa Siria, ba ne ba tla kwa go ene go fodisiwa. A e ka ne e ne e le bolwetse bofe le setlhabi, kgotsa ba tsenywe ke badimo, kgotsa botsenwa, kgotsa teteselo, o ne a ba fodisa. 25 Bontsintsi jo bogolo jwa batho jwa mo sala morago gongwe le gongwe kwa a yang gone. Batho ba ne ba

tswa Galalea le mo metseng e e some le Jerusalema, le gongwe le gongwe mo Judea le kwa moseja ga Noka ya Jorodane.

5 Mme ya re ka letsatsi lengwe fa bontsintsi jwa batho bo kokoana, a tlhatlogela le barutwa ba gagwe mo mphaheng wa thaba, mme a nna fa fatshe le bone a ba ruta. **3** A ba raya a re, "Go sego ba ba ingotlang gonne Bogosi jwa Legodimo ke jwa bone. **4** Go sego ba ba lelang gonne ba tlaa gomodiwa. **5** "Go sego ba ba bonolo gonne lefatshe lotlhe ke la bone. **6** "Go sego ba ba nyoretsweng tshiamo gonne ba tlaa e bona. **7** "Go sego ba ba pelontle le kutlwelobothoko gonne ba tlaa utwelwa bothoko. **8** "Go sego ba ba pelo di itsekileng gonne ba tlaa bona Modimo. **9** Go sego ba ba huhulelang kagiso, gonne ba tlaa bidiwa barwa Modimo. **10** "Go sego ba ba bogisediawang tshiamo, gonne Bogosi jwa Legodimo ke jwa bone. **11** "Fa lo kgobiwa lo bogisiwa, lo akelwa ka nthla ya gore lo barutwa ba me, lo sego jang! **12** Itumeleng ka ga gone! Ipelelang thata! Gonne tuelo ya lona e kgolo e lo letile kwa legodimong. Mme gakologelwang gore, Baporofiti ba bogologolo le bone ba ne ba bogisiwa. **13** "Ke lona letswai la lefatshe, mme fa lona lo latlhegelwa ke melodi go tlaa nna jang ka lefatshe? Le lona lo tlaa latlhelwa kwa ntle lo gatakwa ka dinao lo sena molemo. **14** Lo lesedi la lefatshe, motse o o mo thabeng, o o phatsimang bosigo gore botlhe ba o bone. **15** Se fitlheng lesedi la lona! A le phatsimele botlhe; a ditiro tsa lona tse di molemo di phatsimele botlhe go di bona, gore ba tle ba galalese Rra lona wa Legodimo. **17** "Se tlhokeng go tthaloganya se ke se tletseng. Ga se go senya melao ya ga Moshe le ditlhagiso tsa baporofiti. Nnyaa ke tletse go di tlhomamisa le gore di diragale jaaka go boletswe. **18** "Ka tlhomamiso yotlhe e ke nang nayo ka re: molao mongwe le mongwe o o mo Lokwalong o tlaa tswelela pele go fitlhelela maikaelelo a one a diragala. **19** Jalo he, fa mongwe a tloa molao o mmatlanyana, a ba a ruta ba bangwe go dira jalo, o tlaa nna mmatlana mo Bogosing jwa Legodimo. Mme ba ba rutang melao ya Modimo ba e reetsa ba tlaa nna batona mo Bogosing jwa Legodimo. **20** "Mme ke a lo thagisa ga lo ka ke lwa tsena mo Bogosing jwa Legodimo fa e se tshiamo ya lona e feta ya Bafarasai le baeteledipele ba bangwe ba Bajuda. **21** "Mo melaong ya ga Moshe e ne e le gore, 'Fa o bolaya motho, o tshwanetse wa swa le wena.' **22** Mme ke okeditse molao oo, e bile ke lo bolelela gore fa o shakgetse fela, le fa e le mo motseng wa gago, o lebaganywe ke katlholo! Fa o bitsa tsala ya gago seelele, o ka nna wa tseelwa kwa kgotleng ya tsheloke o mo hutsa, o mo dipahatseng tsa molete wa molelo. (Geenna g1067) **23** "Mme ke gone fa o eme fa pele ga sebeso (aletara) mo Tempeleng, o ntshetsa Modimo sethabelo, mme ka tshoganetso o bo o gakologelwa gore wa ga eno o na le sekgopi nao, **24** Tlogela sethabelo sa gago gone foo fa pele ga sebeso (aletara) go ikopa maitshwarelo o bo o letlane nae. **25** Akofa outlwaneng le mmaba wa gago nako e ise e tsamaye thata e se re kgotsa a go gogele kwa tshokong, o bo o latlhelwa mo tlung ya kgolegelo. **26** Gonne o tlaa nna moo go fitlhelela o bo o duela ledinyana la bofelo. **27** "Melao ya ga Moshe e ne e re, 'O seka wa dira boaka'. **28** Mme ka re: Le fa e le mang yo o lebang mosadi ka go mo eletsa, o setse a dirile boaka nae mo

pelong. **29** "Mme fa leitlho la gago, le fa e ka ne e le leitlho le le itekanetseng le tsoolosa keletso, le gonye o le latlhe. Go botoka gore tokololo e e go leofisang e senngwe go na le gore mmele otlhe wa gago o latlhelwe mo moleting wa molelo. (Geenna g1067) **30** Mme fa seatla sa gago le fa e le sa moja se go leofisa, se kgaole o se latlhe. Gonne go botoka go se kgaola go na le go iphitlhela o le mo moleting ka nthla ya sone. (Geenna g1067) **31** "Molao wa ga Moshe wa re, 'Fa mongwe a batla go kgaogana le mosadi wa gagwe, o ka mo tlhala fela ka go mo neela lokwalo lwa tlhalo'. **32** Mme nna ka re monna yo o tthalang mosadi wa gagwe fa e se ka nthla ya boaka, o mo dirisa boaka. Mme yo o mo nyalang le ene o dira boaka. **33** "Gape molao wa ga Moshe wa re, 'Ga o a tshwanela go dirolola maikano a gago le Modimo, o tshwanetse go a diragatsa otlhe.' **34** "Mme ka re: o se ka wa dira maikano ape! Lefa e le go ikana ka 'Magodimo!' Ke seikano se se boitshepo mo Modimong, ka magodimo ke setulo sa Bogosi jwa Modimo. **35** Gape fa o ikana ka 'Lefatshe' ke seikano se se boitshepo mo Modimong, ka gore lefatshe ke sebeo sa dinao tsa one. Gape o se ka wa ikana ka Jerusalema ka gore Jerusalema ke motse-mogolo wa Kgosi e kgolo. **36** "Gape o se ka wa ikana ka 'phogwana!' Ka gore ga o kake wa fetola thiri nngwe go nna tshweu kgotsa ntsho. **37** Mme go bua ga lona e nne Ee, ke tlaa, kgotsa Nnyaa ga nkake, lefoko la lona le lekanye. Tiisa tsholofetso ya gago ka go ikana, go supa gore sengwe ga se a siama. **38** "Molao wa ga Moshe wa re, 'Fa motho a gonya leitlho la yo mongwe, le ene o tshwanetse go gongwa leitlho. Fa mongwe a go itaya a go kgola leino, a leino la motho yoo le ene le kgolwe.' **39** Mme nna ka re: Se emelelaneng le bosula! Fa o phannngwa mo lerameng, retolola le lengwe. **40** Fa o isiwana tshokong, o bo o tseelwa hempe, ntsha le baki ya gago. **41** Fa masole a batla gore o rwale dithoto tsa bone sekgala sa mmaele e le nngwe di rwale di mmaele tse pedi. **42** Naya ba ba kopang, o se ka wa hularela yo o batlang go adima mo go wena. **43** "Go na le puo e e reng, 'Rata ditsala tsa gago mme o ile baba ba gago.' **44** Mme nna ka re: 'Rata baba ba gago! Rapelela ba ba go bogisang!' **45** "Ka tsala eo lo tlaa bo lo dira jaaka bana ba boammaaruri ba Rraeno yo o kwa legodimong. Gonne o tlhabisetsa basiami le ba ba sa siamang letsatsi, a nesetse basiami le ba ba sa siamang pula ka go tshwana. **46** "Fa o rata ba ba go ratang fela, go thusang?, le ba ba bosula ba dira jalo. **47** Fa o siametse ditsala tsa gago fela, o farologanye jang le batho ba bangwe? Le baheitanane tota ba dira fela jalo. **48** Mme lo tshwanetse lwa nna boikanyego, fela jaaka Rraeno yo o kwa legodimong a le boikanyego.

6 "Mme elang tlhoko! Se direng tshiamo ya lona fa pele ga batho gore ba lo tlotle, fa lo dira jalo ga lona go bona tuelo e e tswang kwa go Rraeno yo o kwa legodimong. **2** Fa o naya mokopi mpho, se bue kaga yone mo mpepeneneng jaaka baitimokanyi ba dira: ba letsa ditrompete mo dikerekeng le mo mebileng ya motse gore ditiro tsa bone tsa lorato di tle di bonwe! Ke a lo bolelela ka pelo yotlhe, ba setse ba amogetse tuelo yotlhe, e ba neng ba tlaa e bona. **3** Mme fa o direla mongwe tshiamo, ka sephiri, se bolelele lebogo la gago la molema se se dirwang ke lebogo la moja. **4** Mme Rraeno yo o itseng

diphiri tsothe o tla go duela. 5 "Mme jaanong kaga thapelo. Fa lo rapela, lo se ka lwa nna jaaka baitimokanyi ba ba ipaang jaaka o ka re ke ba ba obamelang Modimo ka go rapela mo ponong ya mongwe le mongwe mo makopanelong a mebila le mo dikerekeng mo ba ka bonwang ke mongwe le mongwe teng. Ammaaruri ke yone tuelo yotlhe e ba tlaa lalang ba e bonye. 6 Mme fa o rapela, tsamaya o le nosi, o itswalele mo tlung mme o rapele Rraeno ka sephiri, mme Rraeno yo o itseng diphiri tsa gago, o tlaa go duela. 7 "Se, boaboele thapelo ya gago jaaka baheitane ba dira, ba ba gopolang gore dithapelo di arabiwa fela ka go boaboelwa. Gakogelwa gore Rrago o itse se tota o se thokang pele ga o mo kopa! 9 Rapelang jaana: 'Rraetsho yo o kwa legodimong re tlotla leina la gago le le itshephileng. 10 Re kopa gore bogosi jwa gago bo tle ka bofefo. A go rata ga gago go dirwe mono lefatshing jaaka go dirwa kwa legodimong. 11 Re neele dijo tsa rona gape gompieno jaaka malatsi otlhe. 12 Mme o re itshwarele dibe tsa rona, jaaka re itshwaretse ba ba re leofetseng. 13 Se re ise mo thaelong, mme o re golole mo go yo o bosula. Amen.' 14 Rraeno wa Legodimo o tlaa go itshwarela, fa o itshwarela ba ba go leofelang, mme fa o gana go ba itshwarela ga a kitla a go itshwarela. 16 "Jaanong ka ga go ikitsa dijo; fa o ikitsa dijo, o tlogela dijo ka maikaelelo a semowa, se dire jalo mo mpepeneng, jaaka baitimokanyi ba dira ba leka go ithontsha difatlhogo le go tlhoka go apara sentle gore batho ba ba utlwele bothoko. Ammaaruri, ke yone tuelo e ba tlaa lalang ba e bonye. 17 "Mme fa o ikitsa dijo, apara sentle, 18 Gore le fa e le ope a seka a belaela gore o bolailwe ke tlaa, fa e se Rraeno fela yo o itseng sephiri sengwe le sengwe. Mme o tlaa go duela. 19 "Se boloke dikhumo tsa gago fano mo lefatshing mo di ka senyegang kgotsa tsa utswiwa. 20 Di boloke kwa legodimong kwa di se kitlang di lathegelwa ke tlhathlwa teng, di bolokesebile mo magodung! 21 "Fa dikhumo tsa gago di le kwa legodimong le pelo ya gago e tlaa nna teng. 22 "Fa leitho la gago le itshekile go tlaa nna lesedi mo pelong ya gago. 23 Mme fa leitho la gago le sirilwe ke dikgopolo tse di bosula le dikeletso, o mo botenye jwa lefifi la semowa. Ao, kana lefifi leo le ka nna legolo thata jang! 24 "Ga o ka ke wa direla barena ba le babedi: Modimo le madi. Ka o tla ila yo mongwe o rate yo mongwe, kgotsa go nne ka tsela e sele. 25 "Jalo he, thlagiso ya me ke e: se tshwenyegeng ka ga dilo-ebong dijo, dino, madi le diapar. Ka gore o setse o na le botshelo le mmele-mme di bothokwa go na le se se tshwanetseng go jewa le se se tshwanetseng go aparwa. 26 Bonang dinonyane! Ga di tshwenyege kaga se se jewang ga di thoke go jala kgotsa go roba kgotsa go boloka dijo ka gore Rraalona wa Legodimo o a di ota. Mme lona lo tlhathlwa kgolo mo go ene go na le tsone. 27 A dithobaelo tsa lona tsothe di ka oketsa botshelo jwa lona ka motsotso o le mongwe? 28 "Mme ke eng fa o thobaela kaga diapar tsa gago. Lebang dithunya tsa naga! Ga di thobaele kaga diapar tsa tsone. 29 Le fa go ntse jalo, Kgosi Solomone mo kgalalelong ya gagwe o na a sa apesiwa bontle jaaka di ntse. 30 Mme fa Modimo o thokomela dithunya tse di fano gompieno ka thokomelo e kgolo, mme ka moso di be di seyo, a tota ga o na go lo thokomela, lona batho ba tumelo e potlana? 31 "Jalo he, se thobaeleng gothelele kaga go nna le dijo tse di

lekanyeng le diapar. Ke eng fa lo nna jaaka baheitane ka gore ba nna le boikgantsho mo dilong tse tsothe, gape ba amega thata kaga tsone, mme Rraeno wa legodimo o setse a itse sentle gore lo a di tlhoka. 33 "Mme ka boitumelo o tlaa di lo naya fa lo mo naya tlotlo e kgolo mo botshelong jwa lona. 34 "Jalo he, se thobaelele bokamoso, Modimo o tlaa thokomela bokamoso jwa lona. Lebogelang tlhoba ya letsatsi e lo e boneng.

7 "Se sekiseng mme ga lo na go sekisiwa! 2 Gonne ba bangwe le bone ba tlaa lo tsaya fela jaaka lo ba tsaya. 3 "Mme o tshwenyegelang kaga selabe se se mo leithong la mongwe ka wena fa o na le sehidikwe mo go la gago? 4 A o tlaa re, 'Tsala, mma ke go thuse ke ntshe selabe seo mo leithong la gago; fa tota o sa bone ka nthla ya sehidikwe se se mo go la gago.' 5 Moitimokanyi! Pele ntsha sehidikwe se se mo leithong la gago. Ke gone o ka bonang go thusa mongwe ka wena. 6 "Se neeleng dikolobe dilo tsa lona tsa bothokwa (diperela)! Di tlaa di gataka di be di retologela kwa go lona di lo thasela. 7 "Kopang, mme lo tlaa newa se lo se kopang. Batlang, mme lo tlaa bona. Kokonyang, mme lo tlaa bulelwa. 8 "Gonne mongwe le mongwe yo o kopang, o a amogela. Le fa e le mang yo o batlang, o a bona; fela fa o kokonya, o tlaa bulelwa. 9 Fa ngwana a kopa rraagwe dijo, a o tlaa neelwa lentswe mo boemong jwa tsone? 10 Fa a kopa tlhapi, a o tlaa neelwa noga e e nang le bothole? Nnyaa! 11 Mme fa lona ba ba dipelo di thata, badira-dibe lo itse go fa bana ba lona dimpho tse di siameng, a Rraa-lona yo o kwa legodimong ga a na go naya ba ba mo kopang dimpho tse di siameng fela jalo? 12 "Direlang ba bangwe se lo batlang ba se lo direla. Se ke thuto ya melao ya ga Moshe ka mafoko a makhutshwane. 13 "Legodimo le ka tsenwa fela ka kgoro e tshesane. Tsela e kgolo e e yang kwa moleting e athame, kgoro ya one e athametse bontsintsi jo bo thophang tsela ya one e e mothofo. 14 Mme boatlhamo jwa kgoro e e isang botshelong bo bonnye, le tsela e tshesane, mme basekae fela ba a e bona. 15 "Itiseng mo baruting ba e seng bone ba ba tlang ba apere jaaka dinku tse di senang molato, mme e le diphiri tse di lo gagoganyang. 16 Lo ka ba lemoga ka tsela e ba dirang ka yone, fela jaaka lo ka lemoga setlhare ka loungo lwa sone ga lo kake lwa tshwantshanya mofine le dithare tse di mitwa! Kgotsa difeige le masitlwana! 17 Mefuta ya dithare tsa loungo e ka lemogwa ka bofefo ka go thathoba loungo lwa tsone. 18 Mofuta o o ungwang loungo lo lo monate ga o ke o ungwang mofuta o o sa jeweng! 19 Jalo he dithare tse di nang le loungo lo lo sa jeweng di a rengwa di bo di lathelwa mo molelong. 20 Ee, tsela yo go lemoga setlhare kgotsa motho ke ka mofuta wa loungo lo o lo ungwang. 21 "Ga se botlhe ba ba buang boModimo ba ba ntseng jalo. Ba ka mpitsa 'Morena' mme ga ba kitla ba ya legodimong. Gonne potso ya bothokwa ke gore a ba reetsa Rre yo o kwa legodimong. 22 "Ka letsatsi la katlholo ba le bantsi ba tlaa nthaya ba re, Morena Morena, re boleletse ba bangwe ka ga gago ra ba ra dirisa leina la gago go lelelela badimo ntle le go dira dikgagamatso tse dingwe tse dintsi. 23 Mme ke tlaa fetola ke re, 'Ga lo ise lo ke lo bo lo nne ba me. Tsamayang, gonne ditiro tsa lona di bosula', 24 "Bothe ba ba reetsang ditaelo tsa me ba di sala morago, ba bothale, jaaka monna yo o agang

ntlo ya gagwe mo lefikeng le le kwenneng. 25 Le fa pula e tla ka bontsi morwalela o bo o thatloga mme go tsubutla ditsuatsue ka fa ntle ga ntlo ya gagwe ga e kitla e wa, gonne e agilwe mo lefikeng. 26 "Mme ba ba utlwang ditaello tsa me, mme ba sa di tlhokomele ba dielele, jaaka monna yo o agang ntlo ya gagwe mo motlhabeng. 27 Gonne fa dipula le merwalela di tla, mme diphefo di foka di itaaka ntlo ya gagwe, e tlaa gosomana mo go golo." 28 Bontsintsi jwa batho bo ne jwa gakgamadiwa ke thuto ya ga Jesu. 29 Gonne o ne a ruta jaaka mongwe yo o nang le nonofo e kgolo, eseng jaaka baeteledipele ba bone ba Sejuda.

8 Bontsintsi jwa batho jwa sala Jesu mora-go fa a fologa mo mhapheng wa lentswe. 2 Mme bonang! Molepero a atamela. A-khubama fa pele ga gagwe a obama a mo rapela a re, "Rra, fa o rata o ka mphodisa." 3 Mme Jesu a mo tshwara a mo raya a re "Ke a rata, fola." Mme gone fela foo lepero la nnye. 4 Mme Jesu a mo raya a re, "O se ka wa bolelela ope; tlhamalalela kwa moperesiting go ya go thathojwa; mme o tlaa ntsha mpho e e batlwang ka molao wa ga Moshe wa balepero ba ba fodisitsweng, ebong bosupi jwa phatthalatsa jwa gore o fodisitswe." 5 Erile Jesu a goroga mo Kaperanama, mogolwane wa sesole sa Roma a tla kwa go ene mme a mo rapela go ya kwa lwapeng lwa gagwe go fodisa motlhanka wa gagwe wa mosimane yo o neng a le mo bolaong a bolawa ke bolwetse jwa tetesole a lhoafaditswe ke sethlabi. 7 Mme Jesu a mo fetola a re, "Ke tlaa tla go mo fodisa." 8 Mme mogolwane a re, "Rra ga ke a lekana go go tseela kwa lwapeng lwa me gape ga go tlhokafale gore o tle. Fa o ka nna fela fa mme wa re, 'Fola', motlhanka wa me o tlaa fola! 9 Ke a itse, ka gore ke ka fa tlase ga taolo ya baeteledipele ba me ba bagolo mme ke na le taolo mo masoleng a me, mme ke raya lengwe ke re, 'Tsamaya' mme le tsamaye, mme ke reye le lengwe ke re, 'Tla' mme le tle, mme ke reye motlhanka wa me wa mosimane ke re, 'Dira se kgotsa sele' mme a se dire. Mme ke itse gore o na le thata yo go raya bolwetse jwa gagwe o re bo tsamaye mme bo tlaa tsamaya." 10 Jesu a nna foo a akabetse! Mme a retologela kwa bontsintsi jwa batho a re, "Ga ke ise ke ke ke bone tumelo e e tshwanang le e mo Iseraele! 11 Mme ke lo bolelela se, Badichaba ba le bantsi jaaka mogolwane yo wa Roma, ba tlaa tswa mo tikologong yotlhe ya lefatsho ba nna fa fatshe mo Bogosing jwa Legodimo le Aberahame, Isake le Jakobe. 12 Baiseraele ba le bantsi ba ba neng ba baakanyeditswe Bogosi, ba tlaa lelekelwa mo leffing le le kwa ntle, mo felong ga selele le tlhokafatso." 13 Hong Jesu a raya mogolwane wa Roma a re, "Tsamaya o ye lwapeng. Se o se dumetseng se diragetse!" Mme mosimane a fola ka yone nako eo. 14 Erile Jesu a goroga kwa tlong ya ga Petere, mogwagwadia Petere wa mosadi o ne a le mo bolaong a tshwere ke letshoroma. 15 Mme erile fa Jesu a tshwara lebogo la gagwe, letshoroma la mo tlogela; mme a ema a ba baakanyetsa dijo. 16 Mo maitseboeng ao batho ba le bantsi ba ba neng ba tsenywe ke mewa e e maswe ba leriwe kwa go Jesu; mme ya re a bua lefoko le le lengwe; mewa e e maswe yotlhe ya sia; mme botlhe ba ba neng ba lwa ba fola. 17 Mo ga diragatsa seporofeso sa ga Isaia se se reng, "O na a tsaya malwetse a rona, a rwaala dipobolo tsa rona." 18 Fa

Jesu a lemoga ka fa bontsintsi jwa batho bo neng bo gola ka teng, o na a laela barutwa ba gagwe gore ba ipaakanyetse go kgabaganyetsa ntheng e nngwe ya lecha. 19 Ka yone nako eo mongwe wa baruti ba tumelo ya Sejuda a mo raya a re, "Moruti, ke tlaa go sala morago, ga gore sepe gore o ya kae!" 20 Mme Jesu a re, "Bophokoje ba na le mesima le dinonyane di na le dintlhaga, mme nna Morwa Motho, ga ke na legae le e leng la me, ga go na fa nka latsang tlhogo gone." 21 Mongwe wa barutwa ba gagwe a re, "Morena, mma ke tsamaye pele ke yo go fitlha rre." 22 Mme Jesu a mo raya a re, "Ntshala morago! Lesa ba ba suleng mo moweng ba tlhokomele baswi ba bone." 23 Mme a tsena mo mokorong a simolola go kgabaganya lecha le barutwa ba gagwe. 24 Ka tshoganyetso ga tsoga setsuatsue se segolo, makhubu a goletsegile go feta mokoro. Mme Jesu o ne a robetse. 25 Barutwa ba ya kwa go ene ba feta ba mo tsosa, ba gowa ba re, "Morena, re boloke! Re a nwela!" 26 Mme Jesu a ba raya a re, "Ao batho ba tumelo e potlana! Ke eng fa lo tshogile jaana?" Hong a ema a kgalemela phefo le makhubu, mme ga nna tuulale e kgolo. 27 Barutwa ba nna fela foo ba reregile! ba botsanya ba re, "Motho yo ke mang, yo le e leng diphefo tota le lewatle di mo reetsang?" 28 Erile ba goroga ka fa ntheng e nngwe ya lecha mo lefatshing la Bagadara, banna ba le babedi ba ba tsenyweng ke mewa e e maswe ba mo kgatlhantsha. Ba ne ba nna mo diphupung ba le diphatsa thata mo motho ope o neng a ka se ka a ralala golo foo. 29 Mme ba simolola go goela kwa go ene ba re, "O batlang mo go rona, wena Morwa Modimo? Ga o ise o nne le tshwanelo ya go re tlhokofatsa." 30 Serapa sa dikolobe se ne se fula kgakalanyana. 31 Jalo mewa e e maswe ya kopa ya re fa o re "kgoromeletsa ntle re, lelekele mo serapeng sele sa dikolobe." 32 Jesu a e raya a re, "Go siame, tsamayang" mme ya tswa mo banneng ya tsena mo dikolobeng, mme serapa sotlhe sa kgokologa mo thoteng ka bofefo sa wela mo metsing kwa tlase. 33 Mme badisa ba tsone ba sianela kwa motseng o o gaufi go ya go bolela kaga se se diragetse. 34 Mme batho botlhe ba motse ba sianela go tla go bona Jesu, ba mo kopa gore a tsamaye a ba tlogele ba le boswi.

9 Mme Jesu a palama mokoro a kgabaganya lecha a ya Kaperanama, motse wa ga gabo. 2 Ka bofefo banna bangwe ba lere kwa go ene mosimane yo o teteselang a le mo phateng. Erile fa Jesu a bona tumelo ya bone a raya mosimane yo o teteselang a re, "Nametsega ngwana, gonne ke go itshwaretse dibe!" 3 Mme bangwe ba baeteledipele ba tumelo ba gowa ba re, "O a tlhapatsha, Monna yo a re ke Modimo!" 4 Jesu o ne a itse se ba neng ba se akanya mme a re, "Ke eng fa lo akanya megopolo e e maswe jaana? 5 A go thata go itshwarela dibe tsa gagwe go na le go mo fodisa? 6 Mme jalo he, go supa gore ke na le thata fano mo lefatshing go itshwarela dibe." Jalo a retologela kwa mosimaneng yo o teteselang a mo raya a re, "Tsoga o phuthe phate ya gago o ye lwapeng." 7 Mme mosimane a nanoga a tsamaya! 8 Poifo e kgolo ya wela bontsintsi jwa batho fa ba bona se se diragala fa pele ga matlho a bone. Ba galaletsa Modimo thata ka go naya motho thata e e ntseng jalo. 9 Fa Jesu a tsamaya mo phologelong ya tsela, a bona mokgethisi Mathaio, a ntse fa go kgethisediwang teng,

mme Jesu a mo raya a re, "Tla o nne morutwa wa me." 10 Morago, fa Jesu le barutwa ba gagwe ba a ja dijo kwa tlung ya ga Mathaio, ga bo go le batsietsi ba le bantsi e le balalediwa ba ba itsegeng ka mekgwa e e maswe. 11 Mme Bafarasai ba kgotswa ba re, "Ke eng fa moruti wa lona a dirisanya le batho ba ba ntseng jaana." 12 Mme Jesu a ba raya a re, "Ka gore ba ba itekanetseng ga ba tlhoke ngaka, ba ke ba ba e tlhokang!" 13 Mme a oketsa a re, "Tsamayang lo ithute tlhaloso ya temana ya Lokwalo, 'Ga se ditlhabelo tsa lona le dimpho tsa lona tse ke tshwenyegang ka tsone, ke batla gore lo nne le kutlwelobothoko'. Tiro ya me fano mo lefatshing ke go busetsa badiradibe mo Modimong e seng go tshwenyega ka batho ba ba siameng." 14 Letsatsi lengwe barutwa ba ga Johane wa Mokolobetsi ba tla kwa go Jesu ba mmotsa ba re, "Ke eng fa barutwa ba gago ba sa ikitse go ja dijo jaaka rona le Bafarasai re dira?" 15 Mme Jesu a botsa a re, "A ditsala tsa monyadi di tshwanetse go hutsafala, di ikitsa dijo fa a sa ntse a na le tsone? Mme nako e tlaa tla fa ke tlaa tloswang mo go tsone. Mme ke gone ba tlaa nnang le nako e ntsi go ikitsa dijo. 16 "Mme ke mang yo o ka bitiyang seaparo se segologolo ka letsela le lesaha? Ka gore sebata se ka gagola sa dira leroba le legolo go gaisa pele. 17 "Mme emang yo o ka dirisang makuka a magologolo a mofine go tshela mofine o mosha? Gonne a magologolo a ka phanngwa ke go hupela, mme mofine, o tshologe, makuka a senyege. Ke makuka a masha fela a a dirisiwang go tshela mofine o mosha." 18 Ya re a sa ntse a bua jaana, moruti wa ntlo ya thuto a tla a mo obamela a re, "Morwadiake yo mmotlana o sule, mme o ka mo rudisa fa o ka tla wa mo ama." 19 Ya re Jesu le barutwa ba gagwe ba sa ntse ba ya kwa lwapeng lwa moruti 20 mosadi yo o sa bolong go lwala bolwetse jwa tshologo ya madi mo teng ka dingwaga di le lesome le metso e le mebedi a tla a mo setse morago mme a ama momeno wa seaparo sa gagwe. 21 Gonne o na a akantse gore, "Fela fa nka mo ama ke tlaa fola." 22 Jesu a retologa a bua nae a re, "Morweetsana, gothe go siame! Tumelo ya gago e go fodisitse." Mme mosadi a fola ka yone nako eo. 23 Erile fa Jesu a goroga kwa lwapeng lwa ga Moruti, a bona bontsintsi jwa batho bo tsoisitse modumo mme a utlwa le moopelo wa phitlho, 24 A re, "Ba ntshetseng kwa ntle, gonne morweetsana ga a swa; o robetse fela!" Mme ba ne ba mo tshaga ka tshotlo le ka go mo nyatsa! 25 Ya re fa bontsi jwa batho bo sena go tswela kwa ntle, Jesu a tsena mo teng kwa go neng go namaletse morweetsana mme a mo tshwara ka seatla, mme a nanoga a itekanetse sentle gape. 26 Mme pego ya kgakgamatso e e gagamatsang e ya tlala mo lefatshing lothe. 27 Ya re fa Jesu a tswa mo lwapeng lwa morweetsana, banna ba le babedi ba difofu ba mo sala morago ba goa ba re, "Ao Morwa Kgosi Dafide, re utlwele bothoko." 28 Ba tsena mo tlung kwa a neng a nna teng, Mme Jesu a ba botsa a re, "A lo dumela fa ke nonofile go lo fofolola?" Ba re, "Morena, re a dumela." 29 Hong a ama matlho a bone mme a re "Ka nthla ya tumelo ya lona go tlaa diragala!" 30 Mme ka tshoganetso ba fofologa! Jesu a ba laya gore ba seka ba itsise ope kaga selo seo, 31 mme mo boemong jwa go dira jalo ba anamisa tumo ya gagwe gongwe le gongwe mo motsing. 32 Erile Jesu a tswa mo lefelong leo, a rakana le

monna wa semumu yo o neng a sa kgone go bua ka nthla ya mowa o o maswe o o neng o le mo go ene. 33 Hong Jesu a kgoromeletsa mowa o o maswe kwa ntle, mme gone fela foo monna a simolola go bua. Bontsi jwa batho jwa gagamala thata ba re, "Ga go ise nke go diragale mo matshelong a rona go bona se se tshwanang le se." 34 Mme Bafarasai ba re, lebaka le a nonofileng go kgoromeletsa ntle mewa e e maswe ke gore ene ka bo ene o tsenywe ke mewa e e maswe. O tsenywe ke Satane Kgosi ya mewa e e maswe. 35 Jesu o na a tsamaya mo tikologong yotlhe mo magaeng a lefatse leo, a ruta mo matlung a thuto ya Sejuda a anamisa Mafokoa a a Molemole kaga Bogosi. Mme gongwe le gongwe kwa a neng a ya teng o na a fodisa batho mofuta mongwe le mongwe wa bolwetse. 36 Mme o na a na le kutlwelo bothoko thata mo bontsintsing jwa batho jo bo neng bo tla; ka gore matshwenyego a bone a ne a le matona thata mme ba sa itse se ba ka se dirang kgotsa kwa ba neng ba ka ya teng go bona thuso. Ba ne ba tshwana le dinku tse di senang modisa. 37 Mme a raya barutwa ba gagwe a re "Thobo e kgolo thata mme barobi ba ba botlana thata. 38 Jalo he, rapelang yo a leng motlhokomedi wa thobo, lo mo kope go thapa barobi ba bangwe ba masimo a gagwe."

10 Jesu a ipiletsa barutwa ba ba lesome le bobedi, mme a ba naya taolo go kgoromeletsa mewa e e maswe ntle le go fodisa malwetse mangwe le mangwe le dipobolo. 2 Maina a barutwa ba gagwe ba ba lesome le bobedi ke a; Simone yo o bidiwang Petere, Anderea monnaa Petere; Jakobe morwa Sebede, Johane monnaa Jakobe, 3 Filipino, Baretholomica, Thomase, Mathaio wa mokgethisi, Jakobe morwa Alefaio, Thadaeo, 4 Simone (leloko la "diganka" tsa mokgatlho wa dipolotiki o o neng o batla go diga puso), Judase Isekariota yo o neng a mo oka. 5 Jesu o ne a ba roma ka ditaelo tse; "Se yeng kwa go Badichaba kgotsa Basamaria, 6 mme yang fela kwa bathung ba Iseraela; dinku tsa Modimo tse di latlhelileng. 7 Tsamayang lo anamisa mo go bone gore Bogosi jwa legodimo bo atametse. 8 "Fodisang ba ba lwalang, tsosang baswi, fodisang balepero, lo bo lo kgoromeletse mewa e e maswe kwa ntle. Nayang fela jaaka lo amogetse fela. 9 "Se tseyeng madi mo dipateng fa lo tsamaya; 10 lo se ka lwa tsaya le fa e le kgetsi ya diaparo e na le diaparo tse dingwe le ditlhako, le fa e le seikokotlelo, gonne ba lo ba thusang ba tshwanetse go lo otlala le go lo tlhokomela. 11 Nako le nako fa lo tsena mo motseng le mo metsaneng, senkang motho yo o boifang Modimo lo nne mo legaeng la gagwe go fitlhelela lo tswela kwa motseng o mongwe. 12 Fa lo kopa tetelelo ya go nna, nnang botalano le batho. 13 Mme fa le itshupa e le legae la SeModimo, le segofatseng, fa go sa nna jalo, nnang ka tshogofatso ya lona. 14 Motse mongwe le mongwe kgotsa legac le le sa lo amogeleng sentle, lo ithothore lorole lwa lefelo leo mo dinaong tsa lona fa lo tsamaya. 15 Ammaaruri, metse e e maswe ya Sodoma le Gomora e tlaa nna botoka bogolo go metse eo ka Letsatsi la Katlholo. 16 "Ke lo roma jaaka dinku mo gare ga diphiri. Nnang bothale jaaka dinoga le bori jaaka maphoi. 17 Mme ithokomeleng! Gonne lo tlaa tshwarwa, lo sekiwa lo kgwathisiwa mo matlung a thuto. 18 "Ee, lo tshwanetse go emela tshetso fa pele ga balaodi le dikgosi ka nthla ya me. Mo go tlaa lo neela lobaka lwa go

ba bolelela ka ga me, ee, go supegets lefatshe. 19 "Fa lo tshwarwa, se tshwenyegeng gore lo tlaa reng mo tshokong, gonne lo tlaa newa mafoko a a tshwanetseng ka nako e e tshwanetseng. 20 Gonne e tlaa bo e se lona ba lo buang; e tlaa bo e le Mowa wa ga Rraeno wa legodimo o bua ka lona. 21 "Motho o tlaa okela morwa rraagwe losung, mme borabana ba tlaa oka bana ba bone. Mme bana ba tlaa tsogologela batsadi ba bone ba ba neela losung. 22 Mongwe le mongwe o tlaa lo ila ka ntlha ya gore lo ba me. Mme lothe ba lo itshokang go ya bokhutlong lo tlaa bolokwa. 23 "Fa lo bogisiwa mo motseng mongwe, tshabelang kwa go o mongwe! Ke tlaa boa pele ga lo tseno mo go yone yotlhe! 24 Morutwana ga a mogolo go feta moruti wa gagwe. Motlhanka ga a mogolo go mong wa gagwe. 25 Morutwana o tshwanetse go gata mo dikgatong tsa yo o mo rutang, motlhanka a latele mong wa gagwe. Mme fa ba reile nna mong wa ntlona jaanong go tlaa nna jang! 26 "Mme lo se ka lwa boifa ba ba lo bopelang. Gonne nako e e tla e boammaaruri bo tlaa senolwang ka yone: merero ya bone ya sephiri e tlaa itsiwe ke batho bothle. 27 Se ke se lo bolelelang mo leffing jaanong jaana, se phatlalatseng kgakala fa bosigo bo o sa! Se ke se sebelang mo ditsebeng tsa lona, se phatlalatseng lo le mo dithoeng tsa matlo! 28 "Se boifeng ba ba ka bolayang mebele ya lona fela; mme ba ka seka ba ama mewa ya lona! Boifang Modimo fela o o nonofileng go ka nyeletsa mowa le mmele mo moleting. (Geenna g1067) 29 Ga go thaga (kana di ja bokae? A di ja thebe di le pedi?) e e welang fa fatshe Rraeno wa Legodimo a sa itse. 30 Mme le e leng meriri ya dithogo tsa lona tota e badilwe yotlhe. 31 Ke gone se tshwenyegeng! Lona lo bothokwa thata mo Modimong go feta dithaga tse dintsi. 32 "Fa mongwe fela a mpoletla mo mpepeneng e le tsala yame ke tlaa mmolelele ele tsala yame fa pele ga ga Rre yo o kwa legodimong. 33 Mme fa mongwe a intatola mo mpepeneng, ke tlaa mo itatola mo mpepeneng fa pele ga ga Rre yo o kwa legodimong. 34 "Se gopoleng gore ke tletse go lere kagiso mo lefatshe! Nyaa fa e se chaka. 35 Ke tletse go lothanya motho le rraagwe, mosetsana le mmaagwe, ngwetsi le matsalaa yone. 36 "Bana ba motho ba ba maswe go fetisa selekanyo ba tlaa bo ba le mo ntlung ya gagwe tota. 37 Fa o rata rrago le mmago go gaisa jaaka o nthata, ga o a tshwanela go nna wa me; kgotsa fa o rata morwa kgotsa morwadio go mpheta, ga o a tshwanela go nna wa me. 38 Fa o gana go itshikarela mokgoro o ntshala morago, ga o a tshwanela go nna wa me. 39 Fa o ngaparella botshelo jwa gago, bo tlaa go latlhegela, mme yo o latlhegelwang ke botshelo jwa gagwe ka ntlha ya me, o tlaa bo boloka. 40 "Ba ba lo tsholang 'sentle ba tshola nna. Mme fa ba ntshola ba tshola Modimo oo nthomileng'. 41 Fa lo tshola moporofiti ka ntlha ya gore ke monna wa Modimo, lo tlaa newa tuelo e moporofiti o e bonang. Mme fa lo amogela batho ba ba siameng, ba ba boifang Modimo ka ntlha ya boModimo jwa bone, lo tlaa newa tuelo e tshwanang le ya bone. 42 Mme fa lo siela ngwanyana kopi ya metse a a tsididi lo le baemedi ba me, ruri lo tlaa duelwa."

11 Mme e rile fa Jesu a sena go fetsa go nee-la barutwa ba gagwe ba ba lesome le metso e le mebedi ditaello tse, a

tsamaya mo metseng e ba neng ba tshwanetse go rera mo go yone. 2 Johane wa Mokolobetsi yo o neng jaanong a le mo kgolegelong, a utlwa kaga dikgakgamatso tsothle tse Mesia o neng a di dira, jalo a roma barutwa ba gagwe go botsa Jesu gore, 3 "A o ene tota yo re mo lebeletseng, kgotsa re nne re lebeletse?" 4 Jesu a ba raya a re, "Boelang kwa go Johane lo mmolelele kaga dikgakgamatso tse lo mponyeng ke di dira 5 difofu tse ke di fofolotseng, le digole tse jaanong di tsamayang kwa ntle ga thuso le balepero ba ba rudisitsweng, le bosusu ba ba utlwang, le baswi ba ba rudisitsweng; lo bo lo mmolelele gore ke rerela bahumanegi mafoko a a molemo. 6 Jaanong lo bo lo mo neela molaetsa o, 'Go sego ba ba sa mpelaeng.'" 7 Erile barutwa ba ga Johane ba sena go tsamaya, Jesu a simolola go bua le bontsintsi jwa batho ka ga gagwe a re, "Erile lo tswela mo sekakeng se se senang sepe go bona Johane, lo no lo solofetse gore lo tlaa mmona a ntse jang? A tshwana le tlhaga e e fokang mo phelong? 8 Kgotsa a lo no lo solofetse go bona monna yo o apereng jaaka kgosana mo maphatsipatsing a bogosi? 9 Kgotsa moporofiti wa Modimo? Ee, mme o mogolo go na le moporofiti fela. 10 Gonne Johane ke ene yo o umakilweng mo dikwalong; morongwa yo o neng a tshwanetse go tla pele game, go anamisana go tla game, le go baakanya batho go nkamogela. 11 Ammaaruri, mo go bothle ba ba kileng ba tsalwa, ga go na yo o galalalang thata go gaisa Johane wa Mokolobetsi. Mme le fa go ntse jalo, le masedi a mabotiana mo Bogosing jwa legodimo a tlaa nna a magolo go na nae! 12 "Mme go simolola nako e Johane wa Mokolobetsi o neng a simolola go rera ka yone a kolobetsa go fitlhelela jaanong jaana, matshwitshwiti a a mathlagathaga a ntse a kgobokanela Bogosi jwa Legodimo, 13 Gonne melao yotlhe le baporofiti ba ne ba solofetse Mesia. Mme Johane a bonala, 14 mme fa lo batla go tlhaloganya se ke se rayang, ke Elija; ene yo baporofiti ba rileng o tlaa tla ka nako e Bogosi bo simololang ka yone. 15 "Fa e le gore lo kile lwa rata go reetsa, reetsang jaanong. 16 "Ke tlaa reng ka ga chaba e? Batho ba, ba tshwana le bana ba tshameka, ba ba rayang balekane ba bone ba re, 17 'Re tshamekile lenyalo mme lwa seka lwa itumela, ra tshameka phitlho mme lwa seka lwa utlwa bothoko'. 18 Gonne Johane wa Mokolobetsi ga a nwe le fa e le mofine, gape o itima dijo gantsi, mme lwa re, 'O a tsenwa'. 19 Mme nna, Morwa Motho, ke a ja e bile ke a nwa, mme lo ngongoregela gore ke 'sejabobe, ke senwi, e bile ke dirisanya le mofuta o o maswe wa baleofii! Mme batho ba ba bothhale jaaka lona ba ka bona seipato mo go sengwe le sengwe se ba se dirang!" 20 Mme a simolola go kgoba metse e a neng a dirile bogolo jwa dikgakgamatso dingwe tsa gagwe mo go yone ka gore e ne e sa boela mo Modimong. 21 A re, "A bo go latlhega wena Korasina, a bo go latlhega wena Bethesaida! Gonne fa dikgakgamatso tse ke di dirileng mo mebileng ya lona di ne di dirilwe mo Ture le Sidona ba ba kgopo, batho ba teng ba ka bo ba sa bolo go sokologa ka dithlong le boingotlo. 22 "Ammaaruri Ture le Sidona ba tlaa bo ba le botoka go na le lona ka Letsatsi la Katlholo! 23 Mme Kaperanama, lefa a tlotlwa thata, o tlaa fologela mo dihelong! Gonne fa dikgakgamatso tse dintle tse di dirilweng mo go wena di ka bo di dirilwe mo Sodoma, o ka bo a sa ntse a le teng le gompiano. (Hadēs g86) 24

Ammaaruri, Sodoma, o tlaa bo a le botoka go na le wena ka Letsatsi la Katlholo." 25 Mme Jesu a rapela thapelo e, "Rara, Morena wa legodimo le lefatshe, ke lebogela gore o fitlhetse ba ba ikgopolang ba le bothale boammaaruri, mme wa bo senolela banyana! 26 Ee, Rara, gonne go go kgathlile go go dira ka tsela e!" 27 "Boammaaruri jothle ke bo neetswe ke Rre. Rara fela ke ene a itseng Morwa, le Rara o itsiwe ke Morwa fela le ba Morwa o ba mo senolelang. 28 Tlang kwano go nna mme ke tla lo lapolosa, lotlhe ba lo dirang thata ka fa tlase ga jokwe e e bokete. 29 Sikarang jokwe ya me, gonne e lo lekana sentle mmang ke lo rute; gonne ke bonolo le boingotlo, jalo lo tlaa bonela mewa ya lona tapologo, gonne ke lo naya merwalo e e motlhofo fela."

12 Mme erile ka lobaka loo, ka letsatsi le-ngwe Jesu a tsamaya a raleitse masimo a mabele le barutwa ba gagwe. Go ne go le letsatsi la Sabata, letsatsi la Sejuta la kobamelo-Modimo, barutwa ba gagwe ba ne ba tshwerwe ke tlala, jalo ba simolola go roba diako tsa mabele ba a ja. 2 Mme Bafarasai bangwe ba ba bona ba dira jalo mme ba go tlhabantsha ba re, "Barutwa ba gago ba tloa molao. Ba roba go le Sabata." 3 Mme Jesu a ba raya a re, "A ga lo ise nke lo bo lo bale se Kgosi Dafide o neng a se dira fa a bolailwe ke tlala le diatsala tsa gagwe? 4 O na a tsena mo Tempeleng mme ba a ja senkgwe se se faphegileng se se letleletsweng baperesiti fela. Moo le gone e ne e le go tloa molao! 5 Gape a ga lo ise nke lo bo lo bale mo molaong wa ga Moshe ka fa baperesiti ba ba mo tironng mo Tempeleng, ba ka dirang ka teng go le Sabata? 6 Mme ammaaruri, mongwe o fano yo o mogolo go Tempele! 7 Mme fa lo ka bo lo itsile tlhaloso ya temana ya lokwalo lo lo reng, 'Ke batla gore lo nne kutlwelobotlhoko go feta jaaka ke batla dimpho tsa lona,' lo ka bo lo sa sekisa ba ba senang molato. 8 Gonne Morwa Motho, ke Morena le wa Sabata tota." 9 Mme ka nako eo a ya kwa ntlung ya thuto, 10 Mme teng koo a bona monna yo o golafetseng seatla. Bafarasai ba botsa Jesu ba re, "A go letleletswe go fodisa ka letsatsi la Sabata?" (Tota ba ne ba solofetse gore o tlaa re, "Ee", gore ba tle ba mo tshware). 11 Hong Jesu a fetola a re; "Fa o ne o na le nku e le yosi fela, ya be e wela mo sedibeng go le Sabata, a o no o ka dira gore o e falotse ka letsatsi leo? Ee tota o no o ka dira jalo. 12 Mme motho o tlhathwathwa-kgolo thata jang go feta nku! Ee go siame go dira tshiamo ka Sabata!" 13 Mme a raya monna yoo a re, "Otlolola lebogo la gago." Mme ya re a le otlolola, seatla sa gagwe sa itekanela, fela jaaka se sengwe! 14 Mme, Bafarasai ba bitsa phuthego go loga maano a ka fa ba ka tshwarang le go bolaya Jesu ka teng. 15 Mme a itse leano le ba neng ba le loga, mme a tswa mo ntlung ya thuto a setswe morago ke bontsi. A fodisa bothle ba ba lwalang mo go bone, 16 mme a ba tlhagisa gore ba seka ba anamisa mafoko kaga dikgakamatso tsa gagwe. 17 Se se diragaditse seporofeso sa ga Isaia se se buang ka ga Jesu se re. 18 "Bonang motlhanka wa me. Bonang yo ke mo itshenketseng. Ke moratwi wa me, yo mowa wa me o itumelang mo go ene, ke tlaa tsenya mowa wa me mo go ene o tlaa athola dichaba. 19 Ga a lwe e bile ga a goe; ga a tlhatlose lentswe la gagwe! 20 Ga a repitletse ba ba bokoa, kgotsa go timola tsholofelo e potlana; o tlaa wetsa ntw

ya gagwe yotlhe ka phenyfo, 21 mme leina la gagwe le tlaa nna tsholofelo ya lefatshe lotlhe." 22 Mme ga leruwe kwa go Jesu monna yo o tsenyweng ke badimo, a le sefofu a bile a le semumu, mme Jesu a mo fodisa gore a bue a ba a bone. 23 Bontsintsi jwa batho ba gakgamala ba re, "Kgotsa Jesu ke Mesia." 24 Mme e rile fa Bafarasai ba utlwa kaga kgakamatso e ba re, "O ka kgoromeletsa mewa e e maswe ntle ka gore ke Satane, kgosi ya mewa e e maswe." 25 Jesu a itse megopolo ya bone mme a fetola a re, "Bogosi jo bo kgaoganyeng bo felela ka go pheretlhana. Motse kgotsa lolwapa lo lo ikgaoganyang ga lo ka ke lwa ema. 26 Mme fa Satane a kgoromeletsa Satane ntle, o a itwantsha o bile o senya bogosi jwa gagwe. 27 Mme fa e le gore lwa re, ke goromeletsa mewa e e maswe ntle, ka go dirisa dinonofo tsa ga Satane, jaanong batho ba lona ba dirisa nonofo efe go e kgoromeletsa ntle? A ba arabele ka fa lo mpegang molato ka teng. 28 Mme fa ke kgoromeletsa mewa e e maswe ntle ka Mowa wa Modimo, hong bogosi jwa Modimo bo tsile mo go lona. 29 Motho ga a ka ke a thopa bogosi jwa ga Satane kwa ntleng ga gore a golege Satane pele. Ke gone fela mewa ya gagwe e e maswe e ka kgoromelediwang ntle a sena go golegwa. 30 Le fa e le mang yo o sa nthuseng o nkutlwisa bothoko. 31 "Mme le fa e le mang yo o nthapatsang kgotsa a bua sebe sengwe fela, o tlaa itshwarelwa tsothle, fa e se se sengwe fela: go bua bosula kgathlanong le Mowa o o Boitshepo ga go na go itshwarelwa mo lefatshing leno, le fa e le mo lefatshing le le tlang. (aiōn 1:15) 33 "Setlhare se lemogwa ka loungo lwa sone. Setlhare se se tlhophilweng mo mofuteng o o faphegileng se ungwala loungo lo lo siameng; mefuta e e seng yone ga e ungwala loungo lo lo siameng. 34 Losika lwa dinoga ke lona! Batho ba ba bosula jaaka lona ba ka bua se se molemo le tshiamo jang? Gonne pelo ya motho e laola puo ya gagwe. 35 Puo e e molemo ya motho e senola mahumo a a mo go ene. Motho yo o pelo e bosula o tletse bothole le puo ya gagwe e a bo supa. 36 Mme ke lo bolelela se, gore lo tlamega go arabela lefoko lengwe le lengwe le lo le buang la bothamako ka letsatsi la katlholo. 37 "Mafoko a lona a supa se se tlaa lo diragalelang ka nako eo: lo ka nna lwa siamisiwa kgotsa lwa sekisiwa ka one." 38 Letsatsi lengwe baeteledipele ba Sejuta le Bafarasai bangwe, ba tla kwa go Jesu ba mo kopa go bona kgakamatso go supa gore a ke ene Mesia tota. 39 Mme Jesu a fetola a re, "Sechaba se se bosula se se senang tumelo ke sone fela se ne se ka kopa bosupi bongwe gape; mme bope ga bo kitla bo dirwa fa e se fela se se neng sa diragalela moporofiti Jona! Gonne fela jaaka Jona a ne a le mo mpeng ya leraua malatsi a le mararo le masigo a le mararo, jalo he, nna Morwa Motho, ke tlaa nna mo mpeng ya lefatshe malatsi a le mararo le masigo a le mararo. 41 Banna ba Ninefe ba tlaa ema kgathlanong le chaba e kwa tshekong ba lo bona molato. Gonne e rile fa Jona a ba rerela ba ne ba sokologa mo ditsele tsa bone tsothle tse di bosula ba boela mo Modimong. Mme jaanong yo mogolo go feta Jona o fano mme lo gana go mo dumela. 42 "Kgosigadi ya Sheba e tlaa emelana le chaba e, e e bona molato; gonne o dule kwa lefatshing le le kgakala go tla go utlwa bothale jwa ga Solomone, mme jaanong yo mogolo go feta Solomone o fano; mme lo gana go mo dumela. 43 "Chaba e e bosula e,

e tshwana le metho a tsenywe ke mowa o o maswe. Gonne fa mowa o o maswe o tswa mo go ene, o ya mo dikakeng ka lobakanyana, o senka boikhutso mme o seke o bo bone. Mme o re, 'Ke tlaa boela kwa mothong yo ke neng ke tswa mo go ene' o boe o fitlhele pelo ya motho yoo e le phepa e bile e sena sepe mo teng! Mme mowa o o maswe o bone mewa e mengwe e supa e e bosula go o gaisa, mme yotlhe e tsene motho yoo e nne mo go ene. Mme a bife go gaisa pele." 46 Ka Jesu a na a bua mo ntlung e e tletseng batho, mmaagwe le bomonname ba ne, ba le kwa ntle kwa, ba batla go bua nae. Mme erile mongwe a mmolelela gore ba foo, 48 a fetola a re, "Mme ke Mang? Bonnake ke bomang?" 49 A supa barutwa ba gagwe a re, "Bonang! Mme le bonnake ke ba." 50 Mme a oketsa ka gore, "Le fa ele mang yo o reetsang Rre kwa Legodimong ke nna, kgaitadiake le mme."

13 Mme ya re morago ga lone letsatsi leo, Jesu a tswa mo tlung a fologela kwa lotshitshing lwa lewatle, 2 kwa boidiidi jwa batho bo neng jwa tloga jwa kokoanela teng. O na a tsena mo mokorong mme a ruta a le mo go one fa batho ba reeditse ba le mo lotshitshing. O na a bolela dipolelo di le dintsi ka ditshwantsho jaaka e e reng, "Mojadi o ne a jala mabele mo masimong a gagwe. 4 Erile fa a ntse a gasa peo, e nngwe ya wela mo tseleng mme dinonyane tsa tla tsa e e ja. 5 "Mme e nngwe ya wela mo mmung o o maje, mo go neng go na le mmunyanana o o motlhofo; dijalo tsa tlhoga ka bofofo sentle mo mmunyaneng oo, 6 mme letsatsi le le molelo la tloga la di fisa mme tsa swaba tsa a swa, ka gore di ne di na le medinyana fela. 7 Dipeo tse dingwe tsa wela mo mitlweng, mme mitlwa ya di hupetsa di sena go tlhoga. 8 Mme tse dingwe tsa wela mo mmung o o siameng, mme tsa unywa ga masome a mararo, masome a marataro, le lekgolo go le go tona go feta jaaka a ne a jetse. 9 Fa lo na le ditsebe utlwang!" 10 Barutwa ba gagwe ba tla ba mmotsa ba re, "Ke eng fa o aga o dirisa ditshwantsho tse di thata go tlhalogangwa?" 11 Hong a ba a tlhalosetsa gore ke bone fela ba ba letleletsweng go tlhaloganya ka ga Bogosi jwa Legodimo, mme ba bangwe bone ga ba a letlelelwa. 12 A ba a ba tlhalosetsa a re, "Ka gore yo o nang le sengwe o tlaa okelediwa, o tlaa nna le go le go tona; mme yo o senang sepe o tlaa tselwa le bonnyenyane jo a nang najo. Ke sone se ke dirisang ditshwantsho tse ka sone, jalo he batho ba tlaa utlwa, ba bo ba bona, mme ga ba kitla ba tlhaloganya." 14 "Mo go diragatsa seporofeso sa ga Isaia se se reng, 'Ba a utlwa, mme ga ba tlhaloganye; ba a leba mme ga ba bone. 15 Gonne dipelo tsa bone di thata, ditsebe tsa bone di kabetswe, mme ba ipuduladitse mo borokong. 16 Jalo ga ba kitla ba bona le go utlwa le go tlhaloganya le go boela kwa Modimong gape, le go ntetla go ba fodisa.' Mme go sego matlho a lona gonne lo a bona; le ditsebe tsa lona gonne di a utlwa. 17 Baporofiti ba le bantsi le batho ba ba boifang Modimo ba thhologeletswe go bona dilo tse lo di bonyeng, le go utlwa dilo tse lo di utlwileng, mme ga ba a ka ba di utlwa le fa e le go di bona. 18 "Jaamong tlhaloso ya polelo e ke e lo boleletseng kaga molemi a jala ke e: 19 tselo e e kwakwaletseng e peo e nngwe e neng ya wela mo go yone e raya pelo ya motho yo o utlwang mafoko a a molemo

kaga Bogosi mme a ba a sa a tlhaloganye; mme Satane a ba a tla a phamola peo mo pelong ya gagwe. 20 Mmu o o maje o o motlhofo o raya pelo ya motho yo o utlwang molaetsa a ba a o amogela ka boitumelo, 21 mme a se na modi mo botshelong jwa gagwe, le peo ga e tlhogele kwa teng, mme e re moragonyana fa matshwenyego a tla, kgotsa pogiso e simologa ka nthla ya tumelo ya gagwe, tlhoafalo ya gagwe e swe, a ba a we mo tumelong. 22 Mmu o o tlhogileng o o khurumeditsweng ke mitlwa o raya motho yo o utlwang molaetsa, mme dithobaelo tsa botshelo le keletso ya gagwe ya madi di hupetse Lefoko la Modimo, mme a direle Modimo ka boutsana. (aiōn g165) 23 Mmu o o siameng o raya pelo ya motho yo o reetsang molaetsa a ba a o tlhaloganya a tswela kwa ntle a ya go lere ba bangwe ba le masome mararo, masome marataro kgotsa lekgolo mo Bogosing." 24 Setshwantsho se sengwe ke se, se Jesu o neng a se dirisa: "Bogosi jwa Legodimo bo tshwana le molemi a jala peo e e siameng mo tshimong ya gagwe. 25 Mme ya re bosigo bongwe a robetse, mmaba wa gagwe a tla a jala mhero mo gare ga mabele. 26 Erile dijalo di simolola go tlhoga, mhero le one wa tlhoga. 27 "Batlhanka ba mong wa tshimo ba tla ba mmolelela ba re, 28 "Mmaba ke ene a dirileng jalo, mme ba mo raya ba re, 'A re ka kumula mhero?' 29 "Mme a fetola a re, 'Nyaa lo tlaa utlwa mabele botlhoko fa lo dira jalo. 30 Lesang gotlhe go gole mmogo go fithelela motlha wa thobo, mme ke tlaa raya barobi ba kokoanya mhero ba o tshuba, ba baya mabele mo ntlung ya polokelo.'" 31 Sengwe sa ditshwantsho tsa gagwe ke se: "Bogosi jwa Legodimo bo tshwana le peo e nnyenyane ya mosetara e e lemilweng mo tshimong. Ke peo e potlana mo dipeung tsothle, mme e nna setlhare se se tona mo ditlhareng tsothle, se be se gole go nna setlhare se dinonyane di ka tiang tsa aga mo go sone." 33 Gape o dirisa sekai se: "Bogosi jwa Legodimo bo ka tshwantshiwa le mosadi a dira senkgwe. O tsaya selekanyo sa bopi a se tlhakanye mo sebidisong go fithelela se tlhakatlhakana le bopi." 34 Jesu o na a dirisa ditshwantsho tse gangwe le gape ka tlhaloso fa a bua le bontsintsi jwa batho. Tota le gone ka gore baporofiti ba ne ba boletse gore o tlaa dirisa di le dintsi, o na a seke a bua le bone kwa ntlung go go dirisa setshwantsho. Gonne go no ga porofitwa gatwe, "Ke tlaa bua ka ditshwanatsho, ke tlaa tlhalosa dikgagamato tse di saleng di lojwa go tswa kwa tshimologong." 36 Mme erile a tlogela matshwitshwitwi kwa ntle a tsena mo tlung. Barutwa ba gagwe ba mo kopa gore a ba tlhalosetse polelo ya mhero le mabele. 37 A re, "Go siame". Ke nna molemi yo o jalang peo e siameng. 38 "Tshimo e emetse lefatshe ka bophara, mme peo e emetse batho ba Bogosi jwa Legodimo mme mhero ke batho ba ga Satane. 39 Mmaba yo o jalang mhero mo mabeleng ke Diabole; thobo ke bokhutlo jwa lefatshe mme barobi ke baengele. (aiōn g165) 40 "Fela jaaka ere mo polelong e, mhero o bo o tloswa mo mabeleng o ba o tshujwa, go tlaa nna fela jalo ka bokhutlo jwa lefatshe. (aiōn g165) 41 Ke tlaa romela baengele bame mme ba tlaa tlosa mo Bogosing jwa Legodimo, thaelo nngwe le nngwe le botlhe ba ba bolelo, 42 mme ba ba lathele mo moubeng ba ba tshube. Go tlaa nna selelo le khuranyo ya meno. 43 Jalo ba ba itshepileng ba tlaa phatsima jaaka letsatsi mo Bogosing jwa ga Rraabo. A

ba ba nang le tsebe ba utlwe! **44** “Bogosi jwa Legodimo bo tshwana le letlotlo le monna mongwe a neng a le bona mo tshimong. Monna yo, erile ka go tsenekega, a rekisa ditsagagwe tsothe gore a tle a reke tshimo a bo a rue letlotlo leo. **45** “Gape, Bogosi jwa Legodimo bo tshwana le morekisi wa mekgabisa (diperela) mme a tsoma tsa marata-go-lejwa. **46** O ne a bona ya bothokwa, e e tlhothwa kgolo—mme a rekisa gothe mo a neng a na nago gore a tle a e reke. **47** “Gape, Bogosi jwa legodimo bo ka tshwantshannngwa le motshwara-dithlapi, yo o latlhelang letloa la gagwe mo metsing a ba a tshwara methaethale ya dithlapi, dingwe di le tlhothwa kgolo tse dingwe di sena tiro. Fa letloa le tletse, o le gogela ga lotshitsing, a nna fatshe a tlhophla tse di ka nnang monate a bo a di paka mo matloleng mme tse dingwe a di latlhela koo. **49** Go tlaa nna fela jalo ka bokhutlo jwa lefatshebaengele ba tlaa tla go tlhophla baikapei mo baitsheping, (aiōn g165) **50** ba latlhela ba ba bosula mo moleting. Go tlaa nna selemo le khuranyo ya meno. **51** A lo a utlwisisa?” Mme ba araba ba re, “Ee re a utlwisisa!” **52** Mme o ne a tswela a re, “Baitseanape ba molao wa Sejuda wa jaanong e leng barutwa ba me ba humile ntheng tsothe-ebong mo kitsong ya Testamente E Kgologolo le mo go ya e Ntsha.” **53** Erile Jesu a sena go boela dipolelo tse, a boela kwa ga gabo kwa Nasaretha mo Galalea mme a ruta mo ntlung ya thuto mo a gakgamaditseng batho ka bothale jwa gagwe le dikgakgamatso. **55** Batho ba ne ba ipotsa ba re, “A ke gone? Ke ngwana fela wa mmetli, le Marea mmaagwe re a mo itse le bomorwarraagwe bo Jakoba, Josefa, Simone le Jutase. **56** Le bokgaisadie, bothe ba nna mono. O ka tuma jang mo go kanakana?” **57** Mme ba mo shakgalela. Mme Jesu a ba raya a re, “Moporofiti o tlotlwa gongwe le gongwe, fa ese kwa ga gabo a bile a nyadiwana ke ba ga gabo.” **58** Jalo o ne a dira dikgakgamatso di se kaenyana fela, ka ntata ya go tlhoka tumelo ga bone.

14 Mme erile fa Kgosi Herode a utlwa kaga Jesu, **2** A raya banna ba gagwe a re, “Yo e tshwanetse ya bo e le Johane wa Mokolobetsi a rudile. Ke gone ka mo a kgonang go dira dikgakgamatso.” **3** Gonne Herode o na a tshwere Johane a mo golegile ka dikeetane mo kgolegelong ka topo ya mosadi wa gagwe Herodiase mosadi yo o kileng a bo a le wa ga Filipino morwarraagwe, **4** gonne Johane o ne a mo reile a re, ga go a siana gore a mo nyale. **5** O ka bo a ne a bolaya Johane mme o ne a boifa mokuibukubu o batho ba ka o tsosang, ka gore batho bothle ba ne ba dumela gore Johane ke moporofiti. **6** Mme ya re ka mokete wa botalo jwa ga Herode, morwadia Herodiase a bina mo go neng ga kgaltha Herode thata, **7** hong a mo solofetsa ka ikano gore o tlaa mo naya le fa e le eng se o tlaa se lopang. **8** Jalo he, ka go tlhothlelediwa ke mmaagwe, ngwanyana a kopa thogo ya ga Johane wa Mokolobetsi e le mo mogotswaneng. **9** Kgosi e ne ya utlwa bothoko, mme ka nthla ya ikano ya yone, gape ka gore e ne e sa batle go boela lefoko la yone ka morago fa pele ga balalediwa, ya ntsha taolo ya gore go dirwe jalo. **10** Jalo, Johane a kgaolwa tlhogo a le mo kgolegelong, **11** thogo ya gagwe ya leribe ka mogotswana, ya neelwa morweetsana yo o neng a e isa kwa go mmaagwe. **12** Hong barutwa ba ga Johane ba tla go tsaya setopo sa gagwe go ya go se boloka mme ba ya go bolelela Jesu se se

diragetseng. **13** Mme erile fela fa Jesu a utlwa mafoko a, a tsamaya ka boene ka mokoro go ya kwa thoko go nna a le nosi. Mme bontsinti jwa bona kwa o neng a ya teng, mme ba mo sala morago ka dinao ba tswa mo magaeng a mantshi. **14** Hong ya re Jesu a tswa mo nageng, bontsinti jo bogolo jwa batho jwa bo bo mo letile mme a ba thomogela pelo a ba a fodisa balwetse. **15** Maitseboeng ao barutwa ba gagwe ba tla kwa go ene ba re, “Lobaka lwa dijo lo setse lo fetile, mme ga gona sepe se se ka jewang fano mo sekakeng; phatlalatsa bontsinti jwa batho gore ba ye go magaeng ba reke dijo!” **16** Mme Jesu a fetola a re, “Mo ga go thokafale, ba feng dijo!” **17** Mme ba mo raya ba re, “Ga tweng! Re na le dinkgwe di le tlhano tse di nnye le dithlapi di le pedi!” **18** Jesu a ba raya a re, “Di lereng kwano.” **19** Hong a raya batho a re ba nne fa fatshe mo bojanyeng mme a tsaya dinkgwe tse tlhano le dithlapi tse pedi, a leba kwa godimo mo loaping a kopela dijo tshogafatso ya Modimo, hong a ngathoganya dinkgwe a di neela barutwa ba gagwe go di abela batho. **20** Mme mongwe le mongwe a ja go fitlhelela a kgora! Mme erile ba sela masalela kwa morago, ga sala diroto di le lesome le bobedi tse di tletseng. **21** E ne e ka nna banna ba le dikete tse tlhano mo bontsintsing jwa batho tsatsing leo, kwa ntle ga basadi le bana. **22** Ka bofofo morago ga moo, Jesu a raya barutwa ba gagwe a re ba tsene mo mokorong go kgabaganyetsa ntheng e nngwe ya lecha fa a sa ntse a phatlalaletsa batho kwa gae. **23** Morago ga moo a thalogga dithaba go ya go rapela. Bosigo jwa tla, mme kwa lecheng barutwa ba ne ba le mo matshwenyegong. Gonne phefo e ne e tsogile ba tshwere bothata mo mawatleng a a sa sisibalang. **25** Erile e ka nna nako ya bone mo mosong, Jesu a tla kwa go bone a tsamaya mo godimo ga metse. **26** Ba gowa ka letshogo gonne ba ne ba gopola gore ke sepoko. **27** Mme Jesu ka bofofo a bua nabo a ba nametsa. A re, “Ke nna se boifeng!” **28** Hong Petoro a mo fetola a re, “Rra, fa o le ene tota, nthaya ke tle kwa go wena ke tsamaya mo godimo ga metse.” **29** Mme Morena a re, “Go siame, tla kwano.” Hong Petoro a fologa mokoro a tsamaya fa godimo ga metsi a ya kwa go Jesu. **30** Mme erile fa a leba kwa godimo, a tshoga mme a simolola go nwela. A gowa a re, “Mpoloka Morena!” **31** Gona fela foo Jesu a otlolola lebogo a mmoloka. Jesu a re, “A motho wa tumelo e potlana, ke eng fa o no o belaela. **32** Mme fa ba sena go palama mo mokorong, phefo ya didimala?” **33** Ba bangwe ba nna ba tseanye, ba goa ba re, “O Morwa Modimo tota!” **34** Mme ba fitlha kwa Genesareta. **35** Dikgang tsa go goroga ga bone tsa anama ka bofofo mo tikologong yotho ya motse, mme ka bofofo batho bothle ba tswa mo motseng ba ya go bolelela batho gore ba lere balwetse ba bone go tla go fodisiwa. **36** Balwetse ba mo kopa gore a ba letlelele go ama momeno wa seaparo sa gagwe, mme bothle ba ba neng ba ama momeno wa seaparo sa gagwe ga fodisiwa.

15 Bafarasai bangwe le baeteledi-pele ba Sejuda ba goroga ba tswa Jerusalem go tla go buisanya le Jesu. **2** Mme ba mmotsa ba re, “Ke eng fa barutwa ba gago ba tlola ngwao ya Sejuda ya bogologolo? Ka gore ba thokomologa mokgwa wa setho sa rona wa go thlapha diatla pele ga ba a ja.” **3** A fetola a

re, "Mme ke go reng fa ngwao ya lona e le kgatthanong le melao e le thamaletsengya Modimo? 4 Sekai ke se, molao wa Modimo wa re, 'Tlotla rrago le mmago; yo o buang bosula ka batsadi ba gagwe o tshwanetse go swa.' 5 Mme lwa re, 'Le fa batsadi ba lona ba tlhoka, go na le gore lo ba neye madi a dilo tse ba di tlhokang, bogolo lo ka a isa kwa kerekeng.' Mme jalo ka molao wa lona o o itiretsweng ke motho, lo nyeletsa molao o o thamaletseng wa Modimo wa go tlotla le go tlhokomela batsadi ba lona. 7 "Baitimokanyi ke lona! Isaia o porofitile sentle ka ga lona a re, 8 'Batho ba ba re baa ntlotla, mme dipelo tsa bone di kgakala. 9 Kobamelo ya bone ga e na molemo, ka gore ba ruta melao ya bone e ba e itiretsweng mo boemong jwa ya Modimo". 10 Hong Jesu a bitsa bontsintsi jwa batho a re, "Reetsang se ke se buang, lo bo lo leke go se thaloganya: 11 ga lo itshekololwe ke go ja dijo tse di idiwang ka molao wa Sejuda! Ke se lo se buang lo bile lo se akanya se se lo leswafatsang." 12 Hong barutwa ba tla ba mo raya ba re, "O kgopisitse Bafarasai ka lefoko lele." 13 Jesu a fetola a re, "Setlhatshana sengwe le sengwe se se sa jalwang ke Rre se tlaa kumulwa ka medi, jalo he, ba ithlo komolosing. Ke bagodi ba ba fofetseng ba goga difofu, mme di tlaa wela mmogo mo khuting." 15 Hong Petoro a kopa Jesu go thalosa se a neng a se raya fa a re batho ga ba leswafadiwe ke dijo tse di idiwang ka molao wa Sejuda. 16 Mme Jesu a mmotsa a re, "A ga o thaloganye? 17 Ga o bone gore sengwe fela se o se jang, se tsena mo mpeng se be se tswela kwa ntle. 18 Mme mafoko a a bosula a tswa mo pelong e e bosula, a ba a leswafatsa motho yo o a buang. 19 Gonne mo pelong go tswa dikakanyo tse di bosula, polao, kgokafalo, boaka, bogodu, maaka le pateletse. 20 Tse ke tsone dilo tse di leswafatsang; mme ga go na teswafatsang ya semowa ka go ja pele ga o tlotla ngwao ya go tlhapa diatia." 21 Jesu a tloga foo, a tsamaya dimaele di le masome matlhano go ya Ture le Sidona. 22 Mosadi yo o tswang Kanana yo a neng a nna teng, a tla kwa go ene a kopa a re, "Nkutlwela bothoko, Ao Morena, Morwa Kgosi Dafide! Gonne morwadiake o tsenywe ke mowa o o maswe o mo tlhokofatsa gangwe le gape." 23 Mme Jesu a seka a mo fetola le fa e le go bua lefoko lepe! Barutwa ba gagwe ba mo kopa ba re, "Mo reye a tsamaye, ka o re tshwenya ka go kopa ga gagwe." 24 Mme a raya mosadi a re, "Ke rometswe go thusa Bajuda e seng Badichaba." 25 Mme a tla a mo obamela a mo rapela gape a re, "Nthusa!" 26 Jesu a mo raya a re, "Ga go bonale go siame go tsaya dijo mo baneng o di lathelela dintsa." 27 Mme mosadi a re, "Ee, mme go siame ka gore le dintpanyana ka fa tlase ga lomati lwa bojelo di letlelelwa go ja mahohora a a wang." 28 Mme Jesu a mo raya a re, "Mosadi, tumelo ya gago e kgolo, mme kopo ya gago e letleletswe." Mme Morwadi a fodisiwa gone fela foo! 29 Erile morago ga moo a boela kwa leswateng la Galalea, a palama thaba a nna gone. 30 Mme bontsintsi jwa batho jwa lere kwa go ene ba ba tlhatsang, difofu, digole, le dimumu le ba bangwe ba bantsi, ba ba baya fa pele ga ga Jesu, mme a ba fodisa bothle. 31 E ne ya nna kgakgamalo jang! Ba pele ba neng ba ntse ba sa kgone go bua ba ne ba bua ka boitumelo, digole di ne di tsamaya di tloaka, le ba ba neng ba le difofu ba ne ba bona! Bontsintsi jwa batho jwa gagamala fela, mme ba galaletsa

Modimo wa Iseraele. 32 Mme Jesu a bitsa barutwa ba gagwe a re, "Ke tlhomogela batho ba pelo, ba ntse ba le fano le nna malatsi a le mararo jaanong, mme ga baa saelwa ke sepe go se ja; ga ke batle go ba phatlalatsa ba bolailwe ke tlaa, kgotsa e ka re gongwe ba idibala mo tseleng." 33 Barutwa ba fetola ba re, "Mme re tlaa bona dijo tse di lekanyeng kae fano mo sekakeng gore batho ba bothle ba je?" 34 Jesu a ba botsa a re, "Lo na le dijo di le kae?" ba fetola ba re, "Re na le dinkgwe di supa le ditlhatswana di se kae." 35 Hong Jesu a raya batho bothle a re ba nne fa fatshe 36 mme Jesu a tsaya dinkgwe tse di supang le ditlhapu, a di lebogela, a di ngathoganya, a di neela barutwa ba gagwe gore ba di neele batho. 37 Mme bothle ba a ja ba kgora, e le dikete di le nne tsa banna kwa ntle ga basadi le bana! moragonyana, fa masalela a kokoangwa, go ne ga tladiwa diroto di supa! 39 Mme Jesu a phatlalatsa batho go ya kwa gae, a tsena mo mokorong a kgabaganyetsa kwa Magadana.

16 Mme ka letsatsi lengwe Bafarasai le Basadukai ba tla go leka Jesu mabapi le polelo ya gagwe ya gore ke Mesia ka go mo kopa go ba supegetsa ditshupo dingwe tse di tona mo magodimong. 2 A fetola a re, "Lo siame mo go baleng ditshupo tsa seemo sa mawapi; lo a tle lo re bohobidu jwa loapi maitseboeng bo raya seemo se sentle sa mawapi; lo a tle lo re bohobidu jwa loapi maitseboeng ano bo raya seemo se sentle sa loapi ka moso; lo bo lo re loapi lo lo hibidu mo mosong lo raya seemo se se bosula sa loapi motshagare otthe, mme ga lo kgone go bala ditshupo tse di itlhalosang ka botsone tsa metlha! 4 Sechaba se se bosula se, se se sa dumeleng se batla tshupo nngwe e e sa tlwaelesegang mo magodimong, mme ga go na sesupo sepe se se tlaa diwang fa e se mofuta o o neetsweng Jona." Hong Jesu a tswela kwa ntle a ba tlogela. 5 Erile ba sena go kgabaganya lecha, barutwa ba lemoga gore ba lebetse go tla le dijo. 6 Mme Jesu a ba thagisa a re, "Itlhokomeleng! Itiseng mo sebidisong sa Bafarasai le Basadukai." 7 Ba gopola gore o na a bua jaana ka gore ba ne ba lebetse go tla le senkgwe. 8 Jesu a ba a itse se ba se akanyang mme a ba raya a re, batho ba tumelo potlana! Ke eng fa lo tshwenyegile jaana ka go tlhoka senkgwe? 9 A ga lo kitla lo thaloganya? A ga lo gakologelwe bontsi jwa batho bo le dikete tse ke di hephileng ka dinkgwe di le thano, le diroto tse di neng tsa tlogelwa di tletse masalela? A ga lo gakologelwe dikete tse nne tse ke di hephileng le gotlhe mo go neng ga sala? 11 Lo ka akanya jang gore ke ne ke bua ka dijo? Mme gape ka re, "Itiseng mo sebidisong sa Bafarasai le Basadukai." 12 Hong kwa bofelong ba thaloganya gore ka 'sebidiso' o na a raya thuto e e sa siamang ya Bafarasai le Basadukai. 13 Erile a goroga kwa Kaesarea Filipu, a botsa barutwa ba gagwe a re, "Batho ba re ke mang?" 14 Ba fetola ba re, "Bangwe ba re Johane wa Mokolobetsi; bangwe ba re Elija, bangwe ba re Jeremia kgotsa mongwe wa baporofiti ba bangwe." 15 Hong a ba botsa a re, "Lona lo akanya gore ke mang?" 16 Simone Petere a fetola a re, "Keresete Mesia Morwa Modimo o o tshedileng". 17 Jesu a mo raya a re, "Modimo o go segofaditse, Simone, morwa Jona. Gonne Rara yo o kwa legodimong ke ene yo o go senoletseng dilo tse ka boene, ga go a tswa mo go ope. 18 O Petere, lefika, mme ke aga phuthego ya me mo lefikeng le, mme dinonofu tsothe tsa molete ga di

kitla di e fenyha. (Hadēs g86) 19 Mme ke tlaa go neela dilotlolo tsa bogosi jwa legodimo, dikgoro dingwe le dingwe tse o di lotlelang mo lefatshing, di tla lotlelwa kwa legodimong; mme dikgoro dingwe le dingwe tse o di lotlololang mo lefatsheng, di tlaa lotlololwa kwa legodimong!” 20 Hong a laya barutwa gore ba se ka ba bolelela bape fa e le Mesia. 21 Go tswa foo Jesu a simolola go thalosetsa barutwa ba gagwe kaga go ya kwa Jerusalem, le se se tlaa mo diragalelang teng, gore o tlaa boga mo diatleng tsa baeteledipele ba Sejuta, le gore o tla bolawa le gore e tlaa re morago ga malatsi a le mararo a tsosiwe gape. 22 Mme Petere a mo tseela fa thoko go mo kgalemela a mo raya a re, “A mogopolo oo o nnyelete Morena. Mo ga go kitla go go diragalela!” 23 Jesu a retologela kwa go Petere a re, “Tloga fa go nna, Satane ke wena! O lemena le le diphatsa mo go nna. O akanya ka fa batho ba bonang ka teng, e seng ka fa Modimo o akanyang ka teng.” 24 Hong Jesu a raya barutwa a re, “Fa motho le fa e le mang a rata go nna molatedi wa me, a a itatole a tseye mokgoro wa gagwe a ntshale morago. 25 Gonne le fa e le mang yo o ipolokelang botshelo jwa gagwe bo tlaa mo latlhegela; mme le fa e le mang yo o lathegelwang ke botshelo jwa gagwe ka ntsha ya me o tlaa bo bona gape. 26 Go na le poelo ya eng fa motho a rua lefatsho lotlhe, mme a lathegelwa ke botshelo jo bo sa khutleng? Se se ka tshwantshiwang le letlotlo la botshelo jo bo sa khutleng ke eng? 27 Gonne Nna, Morwa Motho, ke tlaa tla le baengele ba me mo kgalalelong ya ga Rre go athlola mongwe le mongwe ka fa ditrong tsa gagwe. 28 Mme bangwe ba lona ba ba emeng fano jaanong jaana ba tshelela go mpona ke tla mo Bogosing jwa me.”

17 Mme erile morago ga malatsi a le marataro Jesu a tsaya Petere, Jakobe le Johane monnawe go tlhatlogela kwa sethoweng sa thaba e e godileng e e kwa thoko. 2 Mme erile ba etse tlhoko, ponalo ya gagwe ya fetoga mo e leng gore sefathago sa gagwe se ne sa phatshima jaaka letsatsi, le diaparo tsa gagwe tsa nna bosweu jo bo fathlang. 3 Ka tshoganetso ga bonala Moshe le Elija ba bua nae. 4 Petere a bua ka tshoganetso a re, “Morena, go molemo gore re be re le fano. Fa o rata, ke tlaa aga metlaagana e le meraro o mongwe e le wa gago, o mongwe e nne wa ga Moshe, o mongwe e nne wa ga Elija.” 5 Mme erile a sa bua jalo, leru le le sedifetseng la tla fa godimo ga bone, mme lentse le le tswang mo lerung la re, “Yo ke morwaake yo o rategang, mme ke itumela thata mo go ene. Mo utlweng.” 6 Mo tiragalong e, barutwa ba wela fa fatshe ka difathago ba tsenywe ke letshogo le legolo. 7 Jesu a tla kwa go bone a ba ama a ba raya a re, “Tsoyang, se boifeng.” 8 Mme ya re ba leba, ya bo e le Jesu fela yo o nang nabo. 9 Mme ya re ba fologa thaba, a ba laya gore ba se ka ba itsise ope se ba se boneng go fithelela a tsoga mo baswing. 10 Barutwa ba gagwe ba mmotsa ba re, “Ke eng fa baeteledipele ba Sejuda ba gatelela gore Elija o tshwanetse go boa pele ga Mesia a tla?” 11 Jesu a fetola a re, “Ba bua sentle. Elija o tshwanetse go tla go baya sengwe le sengwe ka fa thulaganyong. 12 Mme legale o setse a tsile, mme ga a ka a lemogwa, o na a sotlwa ke batho thata. Mme le Nna Morwa Motho ke tlaa sotlega mo diatleng tsa bone.” 13 Hong barutwa ba lemoga fa a bua kaga Johane wa

Mokolobetsi. 14 Erile ba goroga kwa tlase ga thaba, bontsintsi jo bogolo jwa bo bo ba letile. Monna mongwe a tla a khubamela Jesu a re, 15 “Morena, utlwela morwaake bothoko, ka gore o thakathakanye tlhologanyo, re mo bothatengjo bogolo, ka gore o a tle a wele mo molelong kgotsa mo metsing. 16 Jalo ke ne ka mo lere mo barutweng ba gago, mme ba retelelwa ke go mo fodisa.” 17 Jesu a fetola a re, “Ao batho ke lona ba ba dithogo di thata ba ba senang tumelo! Ke tlaa nna le lona bolelele bo le kae? Mo lereng kwano go nna.” 18 Hong Jesu a kgalemela mowa o o maswe o o mo mosimaneng mme wa tswa mo go ene, mme go simolola ka lobaka loo mosimane a fola. 19 Moragonyana barutwa ba botsa Jesu mo sephiring ba re, “Ke ka ntsha yang fa re ne re sa kgone go kgoromeletsa mowa o o maswe kwa ntle?” 20 Mme Jesu a ba raya a re, “Ke ka ntsha ya tumelo ya lona e potlana. Gonne fa lo no lo na le tumelo le fa e le e nnyenyane jaaka peo e tshesane ya mosetara lo no lo ka raya thaba e lwa re ‘Suta!’ mme e ne e tlaa sutela kgakala. Ga go na se se neng se ka retela. 21 Mme mofuta o wa mowa o o maswe ga o ka ke wa tsamaya fa e se fela lo rapetse lo ikiditse dijo.” 22 Letsatsi lengwe fa ba sale mo Galalea Jesu a ba raya a re, “Ke ya go okelwa mo nonofong ya ba ba tlaa mpolayang, mme e tla re ka letsatsi la boraro ke tlaa tsoga mo baswing.” Mme dipelo tsa barutwa tsa tlaa khutsafalo le poifo. 24 Mo kgorogong ya bone kwa Kaperanama, baphuthi ba lekgetho la tempele ba tla mo go Petere ba mmotsa ba re, “A mong wa lona ga a duele lekgetho?” 25 Petere a araba a re, “Ee, o a le duela.” Hong a tsena mo ntlung go bolelela Jesu ka potso ya makgetho, mme e rile pele ga a ka bua, Jesu a mmotsa a re, “O akanyang Petere? A dikgosi di phutha makgetho mo bathung ba tsone, kgotsa mo go batswakwa ba ba fentsweng?” 26 Mme Petere a fetola a re, “Mo go batswakwa.” Jalo he, Jesu a re, “Go siame.” “Beng-ba legae ba gololesegile! Le fa go ntse jalo, ga re batle go ba kgopisa, jalo fologela kwa lotshitshing o konopele sekgoge (huku e e tshwarang dithapi), o athlamolole molomo wa thapi ya ntsha e o e tshwarang. O tlaa bona ledi le le tlaa lekanang makgetho a rona rotlhe; le tseye mme o ba duele!”

18 Mme erile ka nako eo barutwa ba tla kwa go Jesu go mmotsa gore ke ofe wa bone yo o tlaa nnang mogolo mo Bogosing jwa Legodimo. 2 Jesu a bitsa ngwana yo monnyenyane a mmaya fa fatshe fa gare ga bone, 3 mme a re, “Fa e se fela lo boela Modimong lo latsha dibe tsa lona lo bo lo nna jaaka bana ba bannyenyane, ga lo kitla lo tsena mo Bogosing jwa Legodimo. 4 Jalo he, le fa e le mang yo o ingotlang jaaka ngwananyana yo monnyenyane yo, o mogolo bogolo mo Bogosing jwa Legodimo. 5 Mme le fa e le mang mo go lona yo o tsholang ngwananyana yo monnyenyane jaaka yo, ka ntsha ya gore lo ba me, o tshola nna ebile o a nthokomela. 6 Mme le fa e le mang yo o dirang gore mongwe wa ba ba botlana ba, ba ba dumelang mo go nna a lathegelwe ke tumelo ya gagwe, go ka nna botoka mo go ene go golegelelwa lefika mo thamung a ba a lathelwa mo lewatlang. 7 “A bo go lathega lefatsho ka ntsha ya masula otlhe a jone. Gonne thaelo e na le go tla fela, mme a bo go lathega motho yo thaelo e tlang ka ene. 8 Jalo fa seatla sa gago kgotsa lonao lo go leofisa,

lo kgaole o lo latlhe. Go botoka go tsena mo legodimong o golafetse go na le go tsena mo moleting ka mabogo le maoto a le mmogo. (aiōnios g166) 9 Mme fa leitlho la gago le go leofisa, le gonye o le latlhe. Go botoka go tsena mo legodimong ka leitlho le le lengwe go na le go tsena mo moleting ka a le mabedi. (Geenna g1067) 10 "Itiseng gore lo seka lwa lebelo ope wa bananyana ba ba nnyenyane ba kwa tlase. Gonne ke lo bolelela gore kwa legodimong baengele ba bone ba fa pele ga ga Rre ka metlha yotlhe. 11 Mme nna, Morwa Motho, ke tletse go boloka ba ba latlhegileng. 12 "Fa motho a na le dinku di le leggolo, mme e nngwe e tsamaye e bo e timela, o tlaa dira eng? A ga a na go tlogela tse di masome a fera bongwe le metso e fera bongwe a ba a ya kwa dithabeng go ya go batla e e latlhegileng? 13 Mme fa a e bona, o tlaa e itumelela go gaisa tse di masome a fera bongwe le metso e fera bongwe tse di babalesegileng kwa gae! 14 Fela jalo, ga se go rata ga ga Rre gore le fa e le mang wa ba bannye ba a nyelele. 15 "Fa wa gaeno a go leofela, ya kwa go ene ka sephiri go mo kaela molato o. Fa a reetsa a ba a ipona phoso, o gapile wa gaeno. 16 Fa a gana, ke gone tsaya mongwe kgotsa ba le babedi lo boele go ene gape, go tthomamisa sengwe le sengwe se o se buang ka bone basupi ba. 17 Mme fa a sa ntse a gana go reetsa, isa ngongorego ya gago kwa phuthengong, mme fa katlholo ya phuthego e dumalana nao mo kgannyeng e, mme ene a sa dumalane, phuthego e tshwanetse go mo kgaola. 18 Mme ke lo bolelela se, le fa e le eng se lo se bofang mo lefatsheng se bofiwa kwa legodimong, mme le fa e le eng se lo se bofololang mo lefatsheng, se tlaa bofololwa kwa legodimong. 19 "Gape ke lo bolelela se, fa ba le babedi ba lona fano mo lefatsheng ba dumalana kaga sengwe se lo se kopang, Rara yo o kwa legodimong o tlaa se lo direla. 20 "Gonne kwa bobedi kgotsa kwa boraro bo phuthegelang teng ka nthla ya gore ke ba me, ke tlaa bo ke le gone tota fa gare ga bone." 21 Mme ga tla Petere a mmotsa a re, "Morena, ke tshwanetse go itshwarela wa gaetsho ga kae fa a nteofela? Ga supa?" 22 Mme Jesu a fetola a re, "Nnyaa, masome a supa a ntsifaditshwe ga supa! 23 "Bogosi jwa Legodimo bo ka tshwantshiwa le Kgosi e e neng e ikaeletse go gakolola batho go mo duela melato ya bone. 24 Fa go ntse go tseletswe, mongwe wa ba ba nang le molato nae yo e neng a mo kolota didikadike di le lesome tsa dipula! a tisiswa kwa go ene. 25 A se ka a kgona go duela, jalo Kgosi ya laola gore a rekisiwe ka nthla ya sekoloto le mosadi wa gagwe le banna le sengwe le sengwe se a neng a na naso. 26 "Mme monna a wela fa fatshe fa pele ga kgosi ka sefathlogo a re, 'Ao Morena, nna pelotelele mo go nna mme ke tlaa duela sekoloto sotlhe'. 27 "Mme kgosi ya mo utlwela bothoko mme ya mo golola ya mo itshwarela molato. 28 "Mme erile fa monna a tlogela kgosi a ya kwa monngeng yo o mo kolotang dipula di le dikete tse pedi, a mo tshwara ka mometo sa batla tuelo ya gagwe ka nako eo. 29 "Monna a wela fa fatshe fa pele ga gagwe mme a mo kopa go mo fa lobakanyana. A mo rapela a re nna pelotelele mme 'ke tlaa duela'. 30 Mme yo o kolotwang a se ka a dumela go mo letela. A laola gore a tshwarwe a ba a thathelwe mo tlung ya kgolegelo go fithelela molato o duelwa othe. 31 "Mme ditsala tsa monna yo o mo tlung ya kgolegelo tsa ya kgosing o

e bolelela se se diragetse. 32 Mme kgosi ya bitsa monna yo e neng e mo itshwaretse sekoloto se se gakgamatsang ya re, 'Molotsana ke wena yo o pelo e maswe! Ke go itshwaretse sekoloto se se gakgamatsang, fela ka nthla ya gore o nkopile, 33 a ga o a tshwanela go nna le kutlwelobothoko mo go ba bangwe, fela jaaka ke ne ka nna le kutlwelobothoko mo go wena?' 34 Mme kgosi e e kgopegieng ya romela monna yo kwa tlung ya kgolegelo go fithelela a duela thebe ya bofelo ya madi a a a kolotang. 35 Mme Rara wa legodimo o tlaa lo direla fela jalo fa lo gana go itshwarela bangwe ka-lona ka boammaaruri."

19 Mme e rile Jesu a sena go fetsa mafoko a, a tswa mo Galalea a boela kwa morago kwa Judea go kgabaganya Noka ya Jerodane. 2 Boidiidi jwa batho jwa mo sala morago, mme a fodisa malwetse a bone. 3 Bafarasai bangwe ba tla go buisanya nae, gape ba leka go mmeela seru gore a bue sengwe se se tlaa mo senyang. Ba mmotsa ba re, "A o letlelela tlhalo?" 4 Jesu a ba fetola a re, "A ga lo bale dikwalo? Mo go tsone go kwadilwe gore mo tshimologong Modimo o tlhodile monna le mosadi, 5 gore monna o tlaa tlogela rraagwe le mmaagwe mme a ngaparele mosadi wa gagwe. Mme bobedi jo bo tlaa nna bongwe fela, e sa tlhoke e le bobedi, mme ele bongwe fela! a go se nne ope yo o kgaoganyang se Modimo o se kopantseng". 7 Ba botsa ba re, "Jaanong Moshe o ne a raya jang fa a re monna o ka tlhala mosadi wa gagwe ka go mo kwalela lokwalo lwa tlhalo fela?" 8 Jesu a fetola a re, "Moshe o dirile jalo ka nthla ya go bona dipelo tsa lona tse di thata tse di bosula, mme tota e ne e se se Modimo o simolotseng o se ikaeletse. 9 Mme ke lo bolelela se, ka re, le fa e le mang yo o tlhalang mosadi wa gagwe, fa e se fela ka kgokafalo, a bo a nyala yo mongwe, o dira kgoka falo." 10 Barutwa ba ga Jesu ba mo raya ba re, "Fa e le gore go ntse jalo go botoka go sa nyaleng." 11 Jesu a fetola a re, "Ga se mongwe le mongwe yo o ka amogelang mafoko a, fa e se fela ka thuso ya Modimo. 12 Banna bangwe ba tsetswe e le baopa, ba bangwe ba opafaditshwe ke batho, gore ba seka ba nyala, ba bangwe ba ikgapa mo nyalong ka nthla ya Bogosi jwa Legodimo. A yo o kgonag, a amogele mafoko a me." 13 Mme ga tisiwa bana ba bannye kwa go Jesu gore a ba beye diatla a ba rapelele. Mme barutwa ba kgalemela ba ba neng ba tisitse bana. Ba ba raya ba re, "Se mo tshwenyeng." 14 Jesu a re, "Lesang banyana ba tle kwa go nna, se ba kganeleng. Gonne bogosi jwa Legodimo ke jwa ba ba ntseng jalo." 15 Foo a ba baya diatla a ba segofatsa pele ga a tsamaya. 16 Mme mongwe a tla kwa go Jesu ka potso e e reng. "Morena yo o Molemo ke ka dira eng se se siameng go nna le botshelo jo bo sa khutleng?" (aiōnios g166) 17 Jesu a mo raya a re fa o re, "Ke molemo o raya Modimo. Mme go araba potso ya gago ka re, o ka tsena kwa legodimong fa o tshegetsa ditaolo." 18 Mme monna a mmotsa a re, "Ditaolo dife?" Mme Jesu a fetola a re "O seka wa bolaya motho, o seka wa dira boaka, o seka wa utswa, o seka wa bua maaka, 19 tlotla rrago le mmago, gape o rate mongwe ka wena jaaka o ithatala!" 20 Mme lekawana la fetola la re, "Ke sa le ke e tshegetsa yotlhe fela, ke tshwanetse go dirang gape?" 21 Jesu a mo raya a re, "Fa o batla go itekanela, ya o rekise sengwe le sengwe se o nang naso o neele bahumanagi

madi, mme o tlaa nna le khumo kwa legodimong; mme o tle o ntshale morago.” 22 Mme e rile fa lekau le utlwa jaana, la tsamaya le nyemile moko ka bohutsana, ka gore le ne le humile thata. 23 Hong a raya barutwa ba gagwe a re, “Ruri go thata mo mohuming go tsena mo Bogosing jwa Legodimo. 24 Mme ke ipoeletsa gape ke re, go motlhofo mo kammeleng go tsena ka leroba la nna le go na le gore mohumi a tsene mo Bogosing jwa Modimo.” 25 Polelo e ya gakgamatsa barutwa. Mme ba botsa ba re, “Mme fa go ntse jalo, ke mang yo o ka bolokwang mo lefatshing?” 26 Hong Jesu a ba leba ka kelothoko a re, “Ka fa senameng ga go na ope.” 27 Hong Petere a mo raya a re, “Re tlogetse sengwe le sengwe gore re go sale morago. Re tlaa boelwa ke eng ka go dira jalo?” 28 Jesu a fetola a re, “E tlaa re nna, Morwa Motho, fa ke nna mo setilong se se galalelang sa Bogosi, lona barutwa ba me lo tlaa nna mo ditlong di le lesome le bobedi tsa puso go athlola merafe e le lesome le bobedi ya Iseraele. 29 Mme le fa e le mang yo a tlogelang motse wa gagwe, bomonnawe, bokgaisadie, rraagwe, mmaagwe, mosadi wa gagwe, bana kgotsa dilwana go ntshala morago, o tlaa amogela galekgolo go menaganye, ebile o tlaa nna le botshelo jo bo sa khutleng. (aiōnios g166) 30 Mme ba le bantsi ba e leng ba ntlha jaanong e tlaa nna ba morago ka nako eo: le bangwe ba e leng ba bofelu jaanong e tlaa nna ba ntlha.”

20 Setshwantsho sengwe ke se se se tshwantshang Bogosi jwa Legodimo. “Mong wa tshimo o kile a phakela go ya go thapela tshimo ya gagwe ya thobo badiri. 2 A dumalana go ba duela madi a tuelo ya letsatsi, hong a ba laela go ya go dira. 3 “Morago ga dioura di se kae, o na a feta fa ntlong e go thapelwang batho teng mme a bona banna bangwe ba eme foo ba batla tiro, 4 jalo le bone a ba romela mo masimong a gagwe, a ba bolelela gore o tlaa ba duela fela se se ba tshwanetseng fa letsatsi le phirima. 5 Mo motshegareng wa sethoboloko, le mo tshokologong e ka nna nako ya boraro a nna a tswelela ka go thapa badiri. 6 “Ka nako ya bothano mo go one maitseboa ao, a ya kwa motseng gape, mme a bona banna ba bangwe gape ba eme teng foo mme a ba botsa a re, ‘Ke eng fa lo ntse fela lo sa dire sepe letsatsi lotlhe?’ 7 Ba araba ba re, ‘Ke ka gore ga go ope yo o re thapileng’. Hong a ba raya a re, ‘tsamayang lo ye go tlatsa ba bangwe mo masimong a me.’ 8 “Mo maitseboeng ao a raya radituelo wa gagwe a re a bitse banna bao a ba duele, a simolola pele ka banna ba bofelu. 9 E rile fa banna ba ba thapilweng ka nako ya bothano ba duelwa mongwe le mongwe wa bone o na a amogela madi a tuelo ya letsatsi. 10 E rile fa banna ba ba thapilweng pele ba tla go tsaya a bone, ba ne ba ithaya ba re ba tlaa amogela go feta foo thata. Le bone ba ne ba duelwa madi a lekanang le a ba bangwe. 11 “Ba ngongorega ba re, ‘Batho bale ba dirile lobaka lwa oura fela, le fa go ntse jalo a oba duetse jaaka rona ba re dirileng letsatsi lotlhe mo mogoteng o o fisang’. 13 “Mme a araba mongwe wa bone aa re ‘Tsala, ga ke a go fosetsa ka gope! A o ne o sa dumalana go dira o duelwa tuelo ya letsatsi? 14 A tseye o tsamaye. Ke keletso ya me go lo duela ka go lekana; 15 a go kgatlhanong le molao go ntsha madi a me fa ke batla go dira jalo? A o tshwanetse go kgotswa ka go bo ke le kutlwelobothoko?’ 16

Mme fela jalo, ba morago e tlaa nna ba ntlha, ba ntlha e tlaa nna ba morago.” 17 Mme ya re Jesu a le mo tseleng a ya Jerusalem, a tseela barutwa ba ba lesome le bobedi kwa thoko, 18 mme a bua nabo ka ga se se tlaa mo diragalelang fa ba goroga. “Ke tlaa neelwa baperesiti ba bagolo le baeteledipele ba Sejuda ba bangwe, mme ba tlaa nkatlholela loso. 19 Me ba tlaa ntsenya mo diatleng tsa mmuso wa Roma, ke tlaa sotlwa ke bapolwa, mme e tlaa re mo letsatsing la boraro ke rule.” 20 Hong mmaagwe Jakobe le Johane bomorwa Sebede, a ba lere kwa go Jesu, a obama, a kopa thuso. 21 Jesu a mmtosa a re “O batla ke go direlang?” Mme a fetola a re, “Mo Bogosing jwa gago, a o tlaa letla bomorwaake ba babedi go nna mo ditlong tse pedi go bapa le sa gago, yo mongwe ka fa letsogong la gago le legolo yo mongwe ka fa go la molema?” 22 Mme Jesu a mo fetola a re, “Ga o itse se o se lopang!” Mme a retologela kwa go Jakobe le Johane a ba botsa a re, “A lo nonofile go nwa mo senwelong se se boitshegang se ke tlaa tlogang kee nwa mo go sone?” Jalo ba fetola ba re, “Ee, re nonofile.” 23 Mme a ba fetola a re, “Lo tlaa nwa mo go sone ruri. Mme ga ke na thata go bua gore ke mang yo o tlaa nnang mo ditlong go bapa le same. Maemo ao a beetswe batho ba Rre a ba tlhophang”. 24 Barutwa ba bangwe ba ba lesome ba ne ba gakala fa ba utlwa ka go se Jakobe le Johane ba se lopileng. 25 Mme Jesu a ba bitsa botlhe a ba raya a re, “Mo baheitaneng, dikgosi ke batho ba ba bogoma, mme le bagolwane ba ba ka fa tlase ga tstone, ba dipisa ba ba ka fa tlase ga bone. 26 Mme mo go lona go pharologanyo. Le fa e le mang mo go lona yo o batlang nna moeteledipele, o tshwanetse go nna motlhanka wa lona. 27 Mme fa o batla go nna kwa godimodimo, o tshwanetse go dira jaaka lekgoba. 28 Mmogwa wa lona o tshwanetse go nna jaaka wa me, gonne nna Morwa Motho, ga ke a tlela go direlwa, fa e se go direla, le go ntshetsa ba le bantsi botshelo jwa me go nna thekololo.” 29 E rile Jesu le barutwa ba tswa mo motseng wa Jeriko, bontsinti jwa batho jo bogolo jwa ba sala morago. 30 Banna ba le babedi ba difofu ba ne ba ntse fa thoko ga tsela mme e rile fa ba utlwa gore Jesu o e tla ba simolola go goa ba re, “Morena, Morwa Dafide, re utlwele bothoko!” 31 Bontsinti jwa batho jwa ba raya jwa re ba didimale, mme ba goela godimo go gaisa pele. 32 E rile a tla fa difofu di neng di le teng a ema mo tseleng a botsa a re, “Lo batla ke lo direlang?” Mme ba fetola ba re, “Morena re batla go bona!” 34 Jesu a ba utlwela bothoko a ama matho a bone. Mme ya re gone fela foo ba fufologo, ba mo sala morago.

21 Mme ya re Jesu le barutwa ba atamela Jerusalem, ba le gaufi le motse wa Bethefage mo Thoteng ya Lotlhware, Jesu a roma bangwe ba barutwa ba gagwe ba le bebedi mo motsaneng o o fa pele. 2 A ba raya a re, “E tlaa re fela fa lo tsena teng lo tlaa bona tonki e golegilwe le tonkana ya yone e le fa thoko ga yone. Lo bo lo di golola lo di lere kwano. 3 Fa mongwe a lo botsa gore lo dirang, lo re, ‘Morena o a di batla’, mme ga go na go nna matshwenyego ape.” 4 Se se ne se dirwa go diragatsa seporofeso sa bogologolo se se reng, 5 “Bolelela Jerusalem gore Kgosi ya gagwe e tla kwa go ene, ka bonolo e palame tonkana.” 6 Barutwa ba babedi ba dira

ka fa Jesu a neng a ba boleletse, ka teng, 7 ba lere tonki le tonkana kwa go ene, ba pega diaparo tsa bone mo godimo ga tonkana gore a nne mo godimo ga tsone. 8 Mme ba bangwe mo bontsintsing jwa batho ba ala diaparo tsa bone mo tseleng kwa pele ga gagwe, ba bangwe ba kgetla dikala tsa diithare ba di ala fa pele ga gagwe. 9 Hong bontsi jwa batho ba ba mo eteletse pele le ba ba kwa morago ba goa ba re, "Modimo segofatsa Morwa Kgosi Dafide! Mo galaletse mo segofatse, Morena A go bakwe Modimo mogodimodimo!" 10 Motse othe wa Jerusalema o ne wa huduega fa a tsena. Ba botsa ba re, ke mang yo? 11 Mme bontsintsi jwa batho jwa fetola jwa re, "Jesu Moporofiti yo o tswang Nasarethwa wa Galalea." 12 Jesu a tsena mo Tempeleng, a lelekelake barekisi kwa ntle, a pitokolola mabati a go ananyediwang madi mo go one le ditilo tsa ba ba rekisang maphoi. 13 A ba raya a re, "Dikwalo tsa re tempele ya me ke lefelo la thapelo, mme lona lo e fetotse borakanelo jwa magodu." 14 Hong difofu le digole tsa tla kwa go ene mme a di fodisa teng mo tempeleng. 15 Mme ya re baperesiti ba bagolo le baeteledipele ba bangwe ba Sejuda ba bona dikgagamatsotse tse di ntle tse ba bile ba utlwa le bananyana ba goa mo tempeleng ba re, "Modimo segofatsa Morwa Dafide," ba ne ba se ka ba itumela ba gakala ba mmotsa ba re, "A o utlwa se bana ba ba se buang?" 16 Jesu a fetola a re, "Ee, a ga lo ise lo ke lo bale dikwalo? Gonnetse re, 'Le bananyana tota ba tlaa mo galaletsa!'" 17 Hong a boela kwa Bethania, kwa a letseng teng. 18 Mo mosong fa a boela Jerusalema, a tshwarwa ke tlaa, 19 Yare a bona setlhare sa mofeige fa thoko ga tsela, a tsamaela kwa go sone go bona gore a se na le maungo, mme ga bo go le matlhare fela. Hong a se hutsa a re, "O se ka wa tlhola o unywa gape!" Mme ka bofelo setlhare sa mofeige sa omelela. (aiōn g165) 20 Barutwa ba gagkamala thata ba bo ba mmotsa ba re, "Setlhare sa mofeige se omeletse ka bofelo jang?" 21 Mme Jesu a ba raya a re, "Ammaaruri, fa lo na le tumelo lo sa belaele, lo ka dira dilo tse di ntseng jaana le go feta. Lo ka ba lwa raya thaba e ya Lotlhare lwa re, 'Thabuela mo lewatleng,' mme go ka diragala. 22 Lo ka amogela sengwe le sengwe, se lo se kopang ka thapelo fa lo dumela." 23 Mme e rile a sena go boela kwa Tempeleng a sa ntse a ruta, baperesiti ba bagolo le bangwe ba bagolwane ba Sejuda ba tla kwa go ene ba batla go itse gore e ne e le ka tsetlelelo ya ga mang gore a lelekele baananyi kwa ntle maabane. 24 Jesu a ba fetola a re "Ke tlaa lo bolelela fa lo ka araba potso e le nngwe pele. 25 A Johane wa Mokolobetsi o ne a romilwe ke Modimo, kgotsa nnyaa?" Ba ne ba gakololana ka fa ba ka arabang ka teng potso e, ba re, "Fa re re, 'o ne a romilwe ke Modimo,' hong o tlaa re botsa gore ke eng re ne re sa dumele se Johane o neng a se bua. 26 Mme fa re ganela gore Modimo o mo romile, re tlaa thaselwa ke bontsi jwa batho, gonnetse bontsi jotlhe bo dumela gore e ne e le moporofiti." 27 Hong lwa bofelo ba fetola ba re, "Ga re itse!" Mme Jesu a re, "Jalo le nna ga ke na go araba potso ya lona ka tsela epe." 28 "Mme lo akanya jang ka ga se? Monna yo o neng a na le bomorwawe ba le babedi o na a raya yo motona a re, 'Morwaaka, tsamaya o ye go dira mo tshimong ya me gompieno.' 29 Morwawe a fetola a re, 'Ga ke na go dira jalo,' mme kwa morago a fetola maikutlo a gagwe

a tsamaya. 30 Hong rraagwe a raya yo monnyennyane a re, 'Wena tsamaya!' Mme a re, 'Ee, rra, ke tlaa tsamaya.' Mme a seka a dira jalo. 31 Ke ofe mo go ba babedi yo o neng a dira go rata ga ga rraagwe?" Ba fetola ba re, "Ke wa ntlha." Hong Jesu a tlhalosa se a se rayang a re: "Ammaaruri batho ba ba bosula le basadi ba diaka ba tlaa lo raka mo Bogosing. 32 Gonnetse Johane wa Mokolobetsi o lo reile a re lo sokologe lo lathe ditiro tsa lona tse di maswe lo boele mo Modimong, mme ga lo a dira jalo, fa batho ba ba bosula le diaka ba sokologa ba boela mo Modimong. Mme le fa tota lo ne lwa bona ba sokologa lona lo ne lwa gana go sokologa, ga lo aka lwa dumela. 33 "Jaanong reetsang polelo e: Mong wa setsha mongwe o kile a thoma tshimo ya mofine e e ageletsweng, mme a direla mothokomedi wa yone lefelo la boletelo, hong a hirisetse balemi bangwe tshimo ya gagwe ka tumalano ya go kgaogana thobo, mme a huduga go nna mo lefatsheng le lengwe. 34 "E rile ka nako ya thobo ya maungo a mofine a roma baemedi ba gagwe kwa baleming go ya go tsaya seabe sa gagwe. 35 Mme balemi ba tlhasela batlhanka ba gagwe, ba itaya yo mongwe, ba bolaya yo mongwe, ba kgobotletsa yo mongwe ka matlapa. 36 "Hong a roma setlhopa se segolwane sa batlhanka ba gagwe go ya go mo tseela seabe, mme ba diragalelwa ke se se diragaletsweng batlhanka ba ntlha. 37 Lwa bofelo mong wa tshimo a roma morwawe a gopola gore ba tlaa mo tshoga seemo ba mo tlotle. 38 "Mme e rile fa balemi ba bona morwawe a tla, ba buisanya ba re 'Moja boswa ke yoo o e tla; tlaang, re mmolayeng re bo itsele!' 39 Jalo ba mo swaswaila ka kwa ntle ga tshimo ya mafine ba mmolaya. 40 "Fa mong wa tshimo a boa, lo akanya gore o tlaa feta a dirang ka balemi bao?" 41 Baeteledipele ba Sejuda ba fetola ba re, "O tlaa bolaya batho bao ba ba bosula ka polao e e setlhogo, mme a hirisetse ba bangwe tshimo ya gagwe ba ba tlaa mo duelang ka fa tshwanelong." 42 Hong Jesu a ba botsa a re, "A ga lo ise lo ke lo bale mo dikwalong gore: 'Lentswe le le gannweng ke baagi le dirilwe lentswe la kgokgotso le le tlotlegang. Ana go gontle jang! Morena o dirile selo se se gagamatsang jang mo matlhong a rona?' 43 "Se ke se rayang ke gore Bogosi jwa Modimo bo tlaa tsewa mo go lona bo neelwe chaba e e tlaa neelang Modimo seabe sa one sa thobo ya maungo. 44 Bothe ba ba kgotswang mo lefikeng le la boamaruri, ba tlaa robega, mme ba ba welang godimo ba tlaa phatlalala jaaka lorole." 45 E rile baperesiti ba bagolo le baeteledipele ba bangwe ba Sejuda ba lemoga gore Jesu o ne a bua ka ga bone, gore e ne e le balemi mo polelong ya gagwe, 46 ba ne ba batla go mmolaya, mme ba boifa go lekeletsa ka ntlha ya bontsintsi jwa batho, gonnetse bo ne bo kaya Jesu e le moporofiti.

22 Jesu a bolela dipolelo tse dingwe tse dintsi go supa gore Bogosi jwa Legodimo bo tshwana le eng. Sekai, bo ka tshwantshiwa ka polelo ya Kgosi e e kileng ya baakanyetsa morwaa yone mokete o mogolo wa lenyalo. 3 Baeng ba le bantsi ba lalediwa, mme e rile fa dijo di setse di siame a roma batho go itsise mongwe le mongwe gore ke nako ya gore ba tle. Mme batho ba ba laleditsweng ba gana! 4 Jalo a roma batlhanka ba bangwe go ba bolelela gore, "Sengwe le sengwe

se siame le dinama tse di besiwang di setse di le mo isong. Ithaganeleng!" 5 Mme baeng ba a neng a ba laleditse ba tshaga fela ba tswelela pele le ditiro tsa bone, mongwe kwa morakeng wa gagwe yo mongwe kwa madirelong a gagwe; 6 ba bangwe ba itaya bathanka ba gagwe ba ba tshwara sethogo mo go tshabisang dithong, ba bo ba bolaya bangwe ba bone. 7 Hong Kgosi e e galefileng ya bolotsa ntwala yone ya bolaya babolai ya tshuba motse wa bone. 8 Mme ya raya bathanka ba yone ya re, "Modiro wa lenyalo o siame, mme baeng ba ke ba laleditseng ga ba a tshwanelwa ke tlotlo. 9 Jaanong tsamayang mo mabileng ya motse lo laletse mongwe le mongwe yo lo mmonang." 10 Mme bathanka ba dira fela jalo, ba lere batho botlhe, basiami le baleofi ka go tshwana; mme ntlo ya tlala balalediwa. 11 Mme e rile fa Kgosi e tla go rakana le balalediwa, ya bona monna yo a neng a sa apara seaparo sa lenyalo (se a neng a se neetswe). 12 Kgosi ya botsa ya re, "Tšala, go diragetse jang gore o bo o le fano o sena seaparo sa lenyalo?" Mme monna a tlhoka karabo. 13 Hong Kgosi ya raya bathusi ba yone ya re, "Mo golegeng mabogo le maoto lo mo lathele kwa ntle mo leffing kwa go nang le selemo le khuranyo ya meno gone." 14 Gonne ba le bantsi ba biditswe, mme ba se kae ba itshenketswe! 15 Bafarasai ba kopana go leka go akanya tsela e ba ka mo tshwarang mo puong ka yone. 16 Ba ikaelela go roma bangwe ba banna ba bone le Baheroda go mmotsa potso e: "Rra, re itse gore o ikanyega thata le gore o ruta boammaaruri kwa ntšeng ga go tlhokomela tse di ka go diragalelang, e bile o sa boife bomang-mang jwa ga ope. 17 Jaanong re bolelele, a go siame go ntshetsa mmuso wa Roma lekgetho kgotsa nnyaa?" 18 Mme Jesu a bona se ba neng ba se ikaelitse. A re, "Baitimokanyi ke lona! Lo leka go tsietsa mang ka dipotso tsa lona tsa bolotsana? 19 Ntshupegetsang ledi," Mme ba le mo naya. 20 A ba botsa a re, "Le tshwantshitswe mang? Gape leina le le ka fa tlase ga setshwantsho se ke la ga mang?" 21 Ba mo fetola ba re, "la ga Kaisara." Mme a ba raya a re, "Go siame le neyeng Kaisara fa e le la gagwe, mme lo neele Modimo sengwe le sengwe se e leng sa one." 22 Mme phetolo ya gagwe e ne ya ba gakgamatsa ya ba ya ba palela ba mo tlogela ba tsamaya. 23 Mme ka letsatsi leo bangwe ba Basadukai, ba ba reng ga go na tsogo ya baswi morago ga loso, ba tla kwa go ene mme ba mmotsa ba re 24 "Morena, Moshe o rile fa motho a a swa a sena bana, monnawe a nyale motlholagadi yoo, mme bana ba bone ba tlaa ja boswa. 25 Go kile ga bo go na le monna mongwe mo motseng wa rona a na le bana ba basimane ba supa. Mme wa ntšha a nyala mme a swa a sena bana, jalo motlholagadi wa gagwe a nna mosadi wa ga monnawe yo o mo tlhomaganelang. 26 Mme le ene monnawe yo, a swa a sena bana, mme mosadi a nyalwa ke monnawe yo mongwe. Ga direga fela jalo go fitlhelela a nna mosadi wa mongwe le mongwe wa bone ka bosupa! 27 Mme mosadi le ene a swa. 28 Jalo o tlaa nna mosadi wa ga mang mo tsogong ya baswi? Gonne e ne e le mosadi wa bone ka bosupa." 29 Mme Jesu a re, "Phoso ya lona e dirwa ke bosenakitso jwa lona jwa go tlhoka go itse dikwalo le nonofo ya Modimo. 30 Gonne mo tsogong ya baswi ga go na lenyalo; mongwe le mongwe o tshwana le baengele mo legodimong. 31 Mme jaanong, fa e le

gore go na le tsogo ya baswi, a ga lo ke lo bala dikwalo? A ga lo lemoge gore Modimo o ne o bua le lona fa o re, 32 'Ke Modimo wa ga Aberahame, Isake le Jakobe!' Jalo Modimo ga se Modimo wa baswi, mme ke wa batshedi." 33 Bontsintsi jwa batho jwa itumedišwa thata ke dikarabo tsa gagwe. 34 Mme e seng Bafarasai! E rile ba utlwa gore o didimaditse Basadukai ka phetolo ya gagwe, ba akanya sesha potso e bone ba ka e mmotsang. Mongwe wa bone yo e neng e le mmueledi (Agente), a bua a re: 36 "Morena, taolo ya bothokwa mo melaong ya ga Moshe ke efe?" 37 Jesu a fetola a re, "'Rata Morena Modimo wa gago ka pelo yotlhe ya lona, ka mowa le tlhaloganyo.' 38 E ke taolo ya ntšha ebile e le e kgolo. Ya bobedi ya bothokwa thata e e tshwanang le yone ke e e reng: 'Rata mongwe ka wena jaaka o ithata.' 40 Ditaolo tse dingwe tsothle le se se batlwang ke baporofiti di tswa mo melaong e mebedi e, mme e diragadiwa fa e tshagediwa. Tshageditsa yone e mebedi e fela, mme o tlaa bona gore o tshageditse e mengwe yotlhe." 41 Mme ya re a farafarilwe ke Bafarasai, a ba botsa potso a re: 42 "Lo gopolang ka ga Mesia? Ke Morwa mang?" Ba araba ba re "Ke Morwa Dafide." 43 Mme Jesu a botsa a re, "Mme ke eng fa Dafide, a bua ka thotholetso ya Mowa o o Boitšhepo, a mmitsa a re 'Morena' Ka gore Dafide o rile, 44 'Modimo o reile Morena wa me wa re, nna ka fa letsogong la me le legolo go fitlhelela ke baya baba ba gago ka fa tlase ga dinao tsa gago!' 45 Mme fa Dafide a mmitsa 'Morena', e ka nna morwawe jang?" 46 Ba tlhoka karabo. Mme morago ga moo ba tshaba go tlhola ba mmotsa dipotso tse dingwe.

23 Mme Jesu a raya bontsintsi le barutwa ba gagwe a re, 2 "Lo ne lo ka gopola gore baetelediyele ba ba Sejuda le Bafarasai ba, ke BoMoshe, ka tsela e ba e tshageditseng go dira melao e mentsi! 3 Mme go ntse fela jalo lo tshwanetse go reetsa sengwe le sengwe se ba se buang! Go ka ne go siame go dira se ba se buang, mme mo godimo ga tsothle fela, se nneng jaaka bone. Gonne ga ba dire se ba lo rayang ba re lo se dire. 4 Ba lo imetsa ka dilo tse di sa kgonegeng tse bone ba sa lekung le fa e le go di tshageditsa. 5 "Sengwe le sengwe se ba se dirang ba se direla go bona. Ba dira boitšhepo ka go apara diaparo tse di maburabura di kwadiilwe ditemana tsa dikwalo tsa Modimo ka fa teng, le ka go lelefatsa makgabe a diaparo tsa bone tsa segopotso. 6 Gape ba rata thata jang go nna kwa pele fa lomating lwa bojelo lwa tlotlo e kgolo mo medirong, le mo ditlong tse di faphegileng tsa phuthego mo tlong ya thuto! 7 Ba itumelela jang tlotlo e ba e newang mo mabileng, le go bidiwa 'Rabi' le 'Morena'. 8 Lo se ka lwa ba lwa letla le fa e le mang go lo bitsa jalo. Gonne ke Modimo o o leng Rabi wa lona, mme lotlhe lo mo selekanyong se se tshwanang, jaaka bakaulengwe. 9 Mme lo seka lwa bitsa ope fano mo lefatshing 'Rara,' ka gore Modimo fela, kwa legodimong ke one o tshwanetseng go bidiwa jalo. 10 Le gone lo seka lwa bidiwa 'Morena', ka gore a le nosi fela ke Morena wa lona, ebong Mesia. 11 "Fela ka go direla ba bangwe ka boingotlo ga lona, lo tlaa nna bagolo. Gore o nne yo mogolo thata, nna modiredi wa ba bangwe. 12 Mme ba ba ikgopolang ba le bagolo ba tlaa tlhabišwa dithong ba bo ba ngotlafadiwa; mme ba ba ingotlafatsang ba tlaa godišwa. 13

"A bo go latlhega lona Bafarasai le baeteledipele ba tumelo. Baitimokanyi! Gonne ga lo letle ba bangwe gore ba tsene mo Bogosing jwa Legodimo, gonne lona ka bolona ga lo tsene. Mme lo ipaya jaaka ekete lo boitshepo ka dithapelo tsa lona tse di telele tsa go itshupa fa pele ga batho mo mebileng, etswa lo leleka bathologadi mo matlong a bone. Baitimokanyi ke lona! 15 Ee, a bo go latlhega baitimokanyi. Gonne lo tsamaya sekgala se se telele gore lo sokolole motho a le mongwe, mme lo bo lo mo fetola gore a nne ngwana wa molete go menaganye go lo gaisa. (Geenna g1067) 16 A bo go latlhega lona! Bagogi ba lo fofutseng! Molao wa lona wa re go ikana ka 'Tempele,' ga go reye gore, lo ka roba ikano eo, mme go ikana ka 'Gouta e e mo Tempeleng' go a golega. 17 Dielele ke lona tsa difofu! Go go golo eng, gouta kgotsa Tempele e e itshepising gouta?! 18 Gape lwa re go ikana 'Ka Sebeso' go ka dirololwa, mme go ikana 'Ka dimpho mo sebesong,' go a golega. 19 Difofu ke lona! Go go golo eng, mpho mo sebesong, kgotsa sebeso ka bosone se se itshepising? 20 Fa o ikana 'Ka sebeso,' o ikana ka sone le sengwe le sengwe se se mo go sone, 21 gape fa o ikana 'Ka Tempele' o ikana ka yone, le ka Modimo o o nngang mo go yone. 22 Gape fa o ikana 'Ka magodimo' o ikana ka Setilo sa Modimo le Modimo ka sebele. 23 "Ee, a bo go latlhega lona Bafarasai, le lona bangwe ba baeteledipele ba tumelo, baitimokanyi ke lona! Gonne lo ntsha ditsabolesome mo lo e tleng lo bo lo ntshe lethlare la bofelo la menta mo tshimong ya lona, mme lo tlhokomologe dilo tsa bothokwa ebong, tshiamo le kuthwelobothoko le tumelo. Ee, lo tshwanetse go ntsha ditsabolesome, mme lo seka lwa tlogela dilo tsa bothokwa di sa dirwa. 24 "Bagogi ba lo fofutseng! Lo ntshetsa montsana kwa ntle mme lo metsa kammela. 25 "A bo go latlhega Bafarasai le lona baeteledipele ba tumelo, baitimokanyi! Lo kelothoko mo go ntlafatseng bokafantle jwa senwelo, mme bokafateng jwa sone bo le leswe la patiko le bohula! 26 Bafarasai ke lona ba difofu! Pele thatswang bo kafa-teng jwa senwelo, hong ke gone senwelo sotlhe se nngang phepa. 27 "A bo go latlhega lona Bafarasai le baeteledipele ba tumelo! Lo tshwana le mabitla a mantle a a tletseng marapo a baswi le boitshekologo le makgapha. 28 Lo leka go nna jaaka ba ba itshepiling mme ka fa teng ga diaparotse tsa lona tsa kobamelo Modimo, go dipelo tse di marilweng ka mofuta mongwe le mongwe wa boitimokanyi le dibe. 29 "Ee, a bo go latlhega lona baeteledipele ba tumelo le baitimokanyi! Gonne lo agela baporofiti ba ba bolailweng ke borraeno dihikantswe, lo bo lo baya dithunya mo mabileng a batho ba ba boifang Modimo ba ba bolailweng, mme lo re 'Ruri re ka bo re sa dira jaaka bo rraetsho ba dirile.' 31 "Ka go bua jalo, lo ipaya molato wa go nna bomorwa batho ba ba maswe. 32 Mme lo tsamaya mo dikgatong tsa bone lo tlatsa dikgato tse di tletseng bosula jwa bone. 33 Dinoga ke lona! Bomorwa shaushawane! Lo tlaa falola jang katholo ya molete? (Geenna g1067) 34 Ke tlaa lo romelela baporofiti, le banna ba ba bothlale, le batho ba ba tletseng mowa, le bakwadi ba ba tlhothleleditsweng ka mowa o o galalelang, mme lo tlaa bolaya bangwe ka go ba bapola lo tlaa ba fatola mekwata ka go ba kgwathisa mo matlong a thuto a lona, lo bo lo ba leleka mo motsing mongwe le mongwe.

35 Gore lo tle lo nne molato wa go tsholola madi a batho ba ba boifang Modimo ba ba bolailweng go simologa ka mosiami Abele go fithelela ka Sakaria (morwa Barakia), yo o bolailweng ke lona mo Tempeleng fa gare ga sebeso le felo ga boitshepo Ee, Katholo yotlhe e e kgobokantsweng mo makgolong a dingwaga e tlaa wela mo dithogong tsa losika. 36 Jerusalem wee Jerusalem wee! Motse o o bolayang baporofiti, e bile o kgobotletsa ka maje ba Modimo o ba romang kwa go wena! Ga ke bolo go rata jang go phutha bana ba gago jaaka koko e phuthela bana ba yone ka fa tlase ga diphuka tsa yone, mme o ganne. 37 Mme jaanong ntlo ya gago o e tlogeletswe e sena le fa e le sepe. 38 Gonne ke go boleletse se gore, ga o kitla o tlhola o mpona go fithelela o ipaakanyetsa go amogela yo o romilweng kwa go wena a tswa kwa Modimong." 39 "Gonne ke go boleletse se gore ga o kitla o tlhola o mpona go fithelela o ipaakanyetsa go amogela yo o romilweng kwa go wena a tsa Modimong."

24 Mme ya re fela fa Jesu a tswa mo pateleng ya Tempele, barutwa ba gagwe ba mo sala morago ba tla go mo tsamaisa ba mo kaetsa dikago tse di farologanyeng tsa Tempele. 2 Mme a ba raya a re, "Dikago tse tsotlhe di tlaa digelwa fa fatshe, lentswe lepe le sa togelwe le thlataganye le le lengwe!" 3 Mme ya re morago fa barutwa ba gagwe ba ntse fa fatshe mo thoteng ya Thaba ya Lotlhwane, ba mmosa ba re, "mo go diragala leng? Ditshupo tse di tlaa supang go boa ga gago le bokhutlo jwa lefatshe ke dife?" (aiōn g165) 4 Jesu a fetola a re, "Se letleng ope go lo timetsa. 5 Gonne ba le bantsi ba tlaa tla ba ipitsa gore ke bone BoMesia, mme ba timetsa ba le bantsi. 6 Fa lo utlwa ka go simologa ga dintwa, mo go tlaa bo go sa supe go boa ga me; mo go tshwanetse go diragala, mme bokhutlo bo tlaa bo bo ise bo tle. 7 Dichaba le Mabusu ya lefatshe di tlaa tsogologelana, go tlaa nna mauba le dithoromo tsa lefatshe mo mafelong a le mantsi. 8 Mme gotlhe mo e tlaa bo e le tshimologo ya ditlalelo tse di tlang fela." 9 "Hong lo tlaa tlhokofadiwa, lo bolawe, lo bo lo ilwe ke lefatshe lotlhe ka ntsha ya gore lo ba me. 10 Mme ba le bantsi ba lona ba tlaa boela mo sebeng, ba okane ba bo ba ilane." 11 Mme go tlaa nna le baporofiti ba le bantsi ba eseng bone mme ba tlaa timetsa bantsi. 12 Sebe se tla ntsifala thata gongwe le gongwe, se tsidifatsa lorato lwa ba le bantsi. 13 Mme ba ba itshokang go ya bokhutlong ba tlaa bolokwa. 14 "Mme mafoko a a molemo a Bogosi a tlaa rerwa mo lefatshing lotlhe gore dichaba tsotlhe di utlwe, mme hong lwa bofelo bokhutlo bo tlaa tla. 15 Jalo, fa lo bona selo se se makgapha, (se se boletsweng ke Moporofeti Daniele, a mmadi a thaloganye se se buiwang!) 16 hong ba ba mo Judea ba patelesega go tshabela kwa dithabeng tsa Judea. 17 "Ba ba mo maribelong a matlo a bone ba seka ba tsena mo teng go phutha dilwana pele ga ba tshaba. 18 Ba ba kwa masimo ba seka ba boela kwa magae ga bone go tsaya diaparotse. 19 "Mme a bo go tlaa bo go latlhega basadi ba baimana le ba ba nang le masea mo malatsing ao. 20 Mme lo rapele gore go sia ga lona go seka ga nna mariga, kgotsa go le Sabata 21 Gonne go tlaa nna pogisego e lefatshe le iseng le ke le e bone pele mo tshimologong ya lone go fitlha nako

eno, mme ga e kitla e tlhola e bonwa gape.” 22 “Mme tota fa malatsi ao a sa khutshwafadiwe, batho botlhe ba tlaa nyelela, mme a tlaa khutshwafadiwa ka ntla ya batho ba Modimo o ba itsheketseng.” 23 “Hong fa mongwe a lo raya a re ‘Mesia o gorogile kwa lefelong lengwe, kgotsa o bonetse fano kgotsa fale, kgotsa mo motseng o kgotsa ole,’ se dumeleng. 24 Gonne go tlaa nna teng Bo-Kereste ba le bantsi ba eseng bone, le baporofiti ba eseng bone, ba tlaa dira dikgakgamatso, gore e re fa go no go ka kgonega, le e leng ba ba ithlophetsweng ke Modimo tota ba tsiediwe. 25 Bonang, ke lo tlhagitsitse. 26 “Mme ke gone fa mongwe a lo raya a re Mesia o boile mme o ile kwa sekakeng, lo se ka lwa eletsa go tsamaya lo ya go bona, kgotsa, gore o iphitlhile golo gongwe, se dumeleng! 27 Gonne jaaka logadima lo tle lo gadime go kgabaganya loapi go tsweng bothabatsatsi go ya bophirima, go tla ga me go tlaa nna jalo, fa nna Morwa Motho ke boa. 28 Mme gongwe le gongwe kwa go nang le setoto, manong a phuthegela gone. 29 “E tlaa re ka bofefo morago ga pogiso ya malatsi letsatsi le tlaa fifadiwa, le ngwedi o tlaa ntshofala, le dinaled di bonala o ka re di wa mo magodimong, le dinonofu tse di khurumeditseng lefatshe di tlaa reketisiwa. 30 “Mme kwa bofelong sesupo sa go tla ga me se tlaa bonala mo magodimong, mme go tlaa nna khutsafalo e kgolo mo tikologong ya lefatshe lotlhe, mme dichaba tsa lefatshe di tlaa mpona ke goroga ka maru a legodimo, ka nonofu le kgalalele e kgolo. 31 Mme ke tlaa roma baengele ba me ka tumo ya torompeta e kgolo, mme ba tlaa phutha baitshenedwi ba me go tsweng diqhutlong tsa lefatshe le legodimo. 32 “Jaanong ithuteng thuto ka setlhare sa mofeige. Fa kala ya sone e le nana matlhare a simolola go kukunya, lo itse gore selemo se setse se gorogile. 33 Fela jalo, fa lo bona dilo tse tsotlhe di simolola go diragala, lo ka itse gore go boa ga me go gaufi, go fela fa mojakong. 34 Hong kwa bofelong lobaka lo lo tlaa tla mo bokhutlong jwa lone. 35 “Legodimo le lefatshe di tlaa nyelela, mme mafoko a me a tla nna ka bosenabokhutlo.” 36 “Mme ga go ope yo o itseng letsatsi le fa e le nako e bokhutlo bo tlaa tlang ka yone, le fa e le baengele. Nnyaa, le fa e le Morwa Modimo tota. Ke Rara fela a le esi yo o itseng. 37 “Lefatshe le tlaa bo le iketile, le le mo thapeding ya meletlo batho ba a ja ba a nwa, ba nyala ba nyadisa, jaaka go ne go ntse ka nako ya ga Noa pele ga go tla ga tshoganetso ga morwalela. 38 Batho ba ne ba sa dumele se se neng se ya go diragala go fithelela morwalela o tla o ba phaila botlhe. Jalo go tla ga me go tlaa nna fela jalo. 40 “Banna ba le babedi ba tlaa bo ba dira mo masimong, mongwe o tlaa tsewa, yo mongwe a tlogelwa. 41 Basadi ba le babedi ba tlaa bo ba dira tiro ya bone ya lolwapa, mongwe o tlaa tsewa, yo mongwe a tlogelwe. 42 Ke gone ipaakanyeng, gonne ga lo itse letsatsi le Morena wa lona o tlang ka lone. 43 Fela jaaka motha o ka kganela matshwenyego a a leriweng ke magodu ka go nna a ithokometse mo go one. 44 Jalo lo ka kganela matshwenyego ka go nna malatsi otlhe lo ipaakanyeditse go boa ga me mo go se kitlang go anamisiwa. 45 “A o mothanka yo o bothale yo o ikanyegang wa Morena? a ke go neetse tironyana ya go laola ba ntlo ya me, go fepa bongwanake letsatsi le letsatsi? 46 O sego fa e ka re ke boa ka fitlhela o dira tiro ya gago ka go ikanyega. 47 Ke tlaa dira ba

ba ikanyegang jalo balaodi ba sengwe le sengwe se ke nang naso. 48 Mme fa o le bosula o bo o ithaya o re, ‘Morena wa me ga a na go tla ka bofefo,’ 49 o bo o simolola go gatelela bathanka ka wena, o o ja o nwa o tagwa. 50 Morena wa gago o tlaa goroga a sa anamisiwa e bile a sa solofelwa, 51 “Mme a ba a go kgwathisa thata a go lelelela katlholong ya baitimokanyi; kwa go tlaa nngang selelo le khuranyo ya meno teng.”

25 “Bogosi jwa Legodimo bo ka tshwants-hiwa ka polelo ya makgarebana a a some a a neng a tsaya dipone tsa one a ya go kgathantsha monyadi. 2 Mme ba le bathano fela ba bone ba ne ba nna bothale go tiatsa dipone tsa bone lookwane, fa ba bangwe ba bathano ba ne ba dira boeleele ba lebala go dira jalo. 5 “Mme ya re monyadi a diega, ba nna fa fatshe go itapologa go fithelela bosigogare fa ba thantshiwa ke mokgosi o o reng, ‘Monyadi o e tla! Tswelang kwa ntle lo mo amogeleng.’ 7 “Basetsana botlhe ba phaphama ba baakanya dipone tsa bone. Mme, ba bathano ba ba neng ba sena lookwane ba kopa ba bangwe go ba thelela lookwane gonne dipone tsa bone di ne di tima. 9 “Mme ba bangwe ba fetola ba re, ‘ga re na lookwane lo lo lekanyeng. Tsamayang lo ye kwa mabenteleng lo ye go ithekela.’ 10 “Mme ya re ba sa ntse ba tsamaile monyadi a goroga mme ba ba neng ba ipaakantse ba tsena nae mo modirong wa lenyalo, mme kgoro ya tswalwa. 11 Morago fa ba bangwe ba bathano ba boa, ba nna kwa ntle ba bitsa ba re, ‘Morena Morena, re bulele!’ 12 “Mme a fetola a re ‘Tsamayang! nako e setse e fetile!’ 13 “Jalo nngang lo ititsitse lo ipaakantse, gonne ga lo itse letsatsi kgotsa lobaka lwa go boa ga me.” 14 “Gape, Bogosi jwa Legodimo bo ka tshwantshiwa ka polelo ya monna yo o kileng a ya kwa lefatshing lengwe, yo o neng a bitsa bathanka ba gagwe mme a ba neela madi go a mo atisetsa a sa ntse a seyo. 15 A neela wa ntla madi a selekanyo sa ditalenta di le tlhano, yo mongwe a mo neela ditalenta di le pedi, mme wa bofelo a mo neela talenta e le nngwe fela, a a kgaoganya ka fa nonofong ya bone, mme hong a simolola loeto lwa gagwe. 16 “Monna yo o amogetseng ditalenta di le tlhano a simolola go reka a rekisa mme a dira lesome. 17 Monna yo o tshotseng ditalenta tse pedi a tlhamalalela kwa tirong, le ene a dira ditalenta tse pedi tse dingwe. 18 “Mme monna yo o amogetseng talenta e le nngwe a e epela mosima a e fiitha mo teng gore e bolokesege. 19 Morago ga nako e telele monnga-bone a boa mo loetong lwa gagwe, mme a ba biletsa kwa go ene go arabela madi a gagwe. 20 Monna yo o neng a mo neetse ditalenta di le tlhano a mo neela ditalenta di le some. 21 Monngagwe a mo akgoletse tiro e ntle eo. A mo raya a re o ikanyegile mo go bolokeng bonnyennyane jo, jalo he ke tlaa go naya thata mo dilong di le dintsi. Tla o tlhakanele le nna boitumelo jwa me.” 22 “Lwa bobedi ga tla monna yo a neng a amogetse ditalenta di le pedi ka polelo e e reng, ‘Morena, o nneetse ditalenta di le pedi go di dirisa, mme ke menagantse gabedi.’ 23 “Monngagwe a mo raya a re, ‘O dirile tiro e ntle, O mothanka yo o siameng yo o ikanyegang. O ntse o ikanyega mo go bolokeng bonnyennyane jo, mme jaanong ke go neela go le gontsi.’ 24 Hong monna yo o tshotseng talenta e le nngwe a tla mme a re, ‘Morena ke go itse o le motho yo o pelo e thata, mme

ke ne ka tshaba gore o tlaa ntsele se ke se boneng ka go atisa madi, jalo ka fitlha madi a gago mo mmung, mme ke al' 26 Mme monngagwe a fetola a re, 'Motlhanka yo o bosula! Lekgoba le le setshwakga! Ka o no o itse ke tlaa batla ga mofufutso wa phatla ya gago, 27 O ka bo bogolo o ne wa baya madi a me mo polokelong gore ke tle ke bone morokotso wa one 28 Tsayang madi a mo monneng yo lo a neele monna yo o nang le ditalanta di le some. 29 Gonne motho yo o dirisang se a se neetsweng sentle o tlaa neelwa go le go tona, mme o tlaa nna le letlotlo, mme motho yo o sa ikanyegeng, le e leng tshwanelo e potlana e a nang nayo e tlaa tsewa mo go ene. 30 Mme fa e le motlhanka yo o senang molemo yo o tlaa lathelwa kwa ntle mo leffing kwa go tlaa nnang selelo le khuranyo ya meno.' 31 "Mme fa nna Morwa Motho ke tla mo kgalalelong ya me, le baengele bothe ba na le nna, ke tlaa nna mo setulong sa me sa kgalalelo. 32 Mme dichaba tsothe di tlaa phuthelwa fa pele ga me. Mme ke tlaa kgaoganya batho jaaka modisa a kgaoganya dinku le dipudi; 33 Ke baya dinku ka fa le bogong le legolo, dipudi ka fa go la molema. 34 "Hong nna Kgosi ke tlaa raya ba ba ka fa le bogong la me le legolo ke re, 'Tlang, basegofadiwa ba ga Rre mo Bogosing jo lo bo baakanyeditsweng go tsweng kwa tlhologong ya lefatsho. 35 Gonne ke ne ka bolawa ke tlaa mme lwa mpha dijo; ke ne ka nyorwa mme lwa nnosa; ke ne ka nna moeng mme lwa ntaletsa mo malwapeng a lona; 36 "Ke ne ke sa apara mme lwa nkapesa; ke ne ke lwala ka ba ka nna mo kgolegelong, mme lwa tla go nthola.' 37 "Hong basiami ba tlaa fetola ba re, 'Morena re kile ra go bona leng o bolailwe ke tlaa mme ra go fa dijo? Kgotsa o nyorilwe mme ra go nosa? 38 Kgotsa o le moeng mme ra go thusa? Kgotsa o sa apara mme ra go apesa? 39 Re kile ra go bona leng o lwala kgotsa o le mo kgolegelong mme ra go etela?' 40 "Mme nna Kgosi, ke tlaa lo raya ke re, 'E rile fa lo go direla' bakaulengwe ba, lwa bo lo go ntirela! 41 Hong ke tlaa gadimela ka fa go ba ba fa molemeng wa me ke re, 'Tlong, lona ba lo hutsegileng, lo yeng kwa molelong o o sa khutleng, o o baakanyeditsweng diabololo le mewa e e maswe. (aiōnios g166) 42 Gonne ke ne ka bolawa ke tlaa mme lwa seka lwa mpha dijo; ka nyorwa mme lwa seka lwa nneela le fa e le sepe go se nwa. 43 Ka nna moeng mme lwa seka lwa ntshola; ke ne ke sa apara mme ga lo a ka lwa nkapesa; ka lwala, ka ba ka nna mo kgolegelong ga lo a ka lwa tla go nthola.' 44 "Hong ba tlaa fetola ba re 'Morena, re kile ra go bona leng o bolailwe ke tlaa kgotsa o tshwerwe ke lenyora kgotsa o le moeng kgotsa o sa apara kgotsa o lwala kgotsa o le mo kgolegelong mme ra se ka ra go thusa?' 45 "Mme ke tlaa araba ke re, 'E rile fa lo gana go direla bakaulengwe ba ba botlana ba, lo no lo gana go direla nna.' 46 "Mme ba tlaa ya kwa kwathang e e sa khutleng; mme basiami ba tla a ya mo botshelong jo bo sa khutleng." (aiōnios g166)

26 Mme e rile Jesu a sena go fetsa puo e le barutwa ba gagwe a ba raya a re, 2 "Jaaka lo itse, gore modiro wa Tlolaganyo o simologa mo malatsing a mabedi a a tlang, ke tlaa okwa ke be ke bapolwa." 3 Ka lone lobaka loo ditlhogo tsa baperesiti le bagolwane ba bangwe ba Sejuda ba phuthegela kwa kgotleng ya ga Kaiafase moperesiti yo mogolo, 4 go

gakololana ka maano a go tshwara Jesu ka bokukuntshwane go mmolaya. 5 Mme ba dumalana ba re, "Eseng ka modiro wa Tlolaganyo, gonne go ka tsoga pheretlhego." 6 Foo Jesu a tswela kwa Bethania, kwa legaeng la ga Simone wa molepero. 7 Mme ya re Jesu a sa ntse a a ja ga tla mosadi mongwe a tshotse lebotlolo la setlolo se se tlhathlwa kgolo, mme a se tshela mo tlhologong ya gagwe. 8 Barutwa ba ne ba gakatsega ba re, "A tshenyoy ya madi a magolo! O ka bo a se rekisitse madi a mantsi mme a a abela bahumanegi." 10 Jesu a itse se ba se akanyang, mme a re, "Ke eng fa lo mo tshwara phoso? Gonne o ntiretse tiro e ntle thata. 11 Lo tlaa aga lo na le bahumanegi, mme ga lo na go nna le nna ka malatsi otlhe. 12 O tshetse setlolo se mo go nna go baakanyetsa mmele wa me go fitlha. 13 Mme o tlaa aga a gopolwa ka tiro e. Polelo ya se a se dirileng e tlaa bolelwa mo lefatshing lotlhe, gongwe le gongwe kwa Mafoko a a Molemo a rewang teng." 14 Judase Isekariota, mongwe wa baaposetoloi ba ba some le bobedi a ya kwa ditlhologong tsa baperesiti, 15 mme a botsa a re, "Lo tlaa ntuela bokae go tsenya Jesu mo diatleng tsa lona?" Mme ba mo naya dipapetlana tsa selefera di le masome mararo. 16 Mme go simologa ka lobaka loo, Judase a batla lebaka le le siameng la go ba okela Jesu. 17 Mo letsatsing la nthla la mediro ya Tlolaganyo, fa senkgwe se se sa bidisi wang se se, tswang mo malapeng a a farologaneng a Sejuda se jewa, barutwa ba tla kwa go Jesu ba mmotsa ba re, "Re baakanyetsa go jela Moletlo wa Tlolaganyo kae?" 18 A fetola a re, "Tsenang mo motseng lo fete lo bone rre semangmang, mme lo mo reye lo re, 'Monnga rona a re, nako yame e gorogile mme ke tlaa jela dijo tsa Moletlo wa Tlolaganyo le barutwa ba me kwa tlong ya gago.'" 19 Jalo barutwa ba dira jaaka a ba boleletse, mme ba baakanya dijo teng. 20 Mme ya re mo maabanyaneng ao fa a sa ntse a a ja le ba ba some le bobedi, a bua a re "Mongwe wa lona o tlaa nkoka." 22 Mme ba futsafala thata, mme mongwe le mongwe wa bone a botsa a re, "A ke nna?" 23 A fetola a re, "Ke yo ke mo fileng sejo pele. 24 Gonne ke tshwanetse go swa fela jaaka go porofitilwe, mme a bo go lathega monna yo o nkokang. Go ka bo go le molemo thata fa yoo a ka bo a na a seka a tsalwa." 25 Judase le ene, o ne a mmotsa a re, "Moruti, a ke nna?" Mme Jesu a mo raya a re, "Ke wena." 26 Ya re ba sa ja, Jesu a tsaya senkgwe a se segofatsa, a se ngathoganya a se neela barutwa a re, "Tsaying lo je gonne se ke mmele wa me." 27 Gape a tsaya senwelo sa mofine a se segofatsa, a se ba neela a re, "Mongwe le mongwe a nwe, 28 gonne se ke madi ame, a a kanelang Kgolagano e Ncha. A tshololelwa go itshwara dibe tsa bontsintsi jwa batho. 29 Tlhokomelang mafoko a me: Ga ke na go tlhola ke nwa mofine o gape go fitlhelela letsatsi le ke tlaa o nangwe le lona o le moshana mo Bogosing jwa ga Rre." 30 Mme ya re ba sena go opela sefela, ba ya kwa Thabeng ya Lotlhwane. 31 Mme Jesu a ba raya a re, "Bosigong jono, lotlhe lo tlaa mphatlalalela. Gonne go kwadilwe mo Dikwalong gore Modimo o tlaa itaya modisa, mme letsomane la dinku le tlaa phatlalala. 32 Mme morago ga ke tsoisiwa ke tlaa ya Galalea, go lo rakantsa teng." 33 Petera a mo fetola a re, "Fa bothe ba ka go tlogela, nna ga ke na go go tlogela." 34 Jesu a mo raya a re, "Boammaaruri ke gore mo bosigongjono, pele ga mokoko o lela

ka nako ya mahube maphakela, o tlaa bo o intatotse gararo!" 35 Petere a fetola a re, "Go ka swa nna pele." Mme le barutwa ba bangwe botlhe ba bua fela jalo. 36 Hong Jesu a ba lere fa moseleng wa tshimo ya Gethesemane, mme a ba raya a re ba nne fa fatshe mme ba lete foo a sa ntse a tsamaela fa pele go ya go rapela. 37 A tsaya Petere le bomorwa Sebede ba babedi Jakobe le Johane, mme a simolola go hutsafala le go huduega. 38 Mme a ba raya a re, "Mowa wa me o hutsafatse thata o bile o utlwile bothoko mo go isang losung: Lo lebelele le Nna." 39 A ya fa pelenyana, a wela ka sefathogo fa fatshe, a rapela a re, "Rara! Fa go kgonega, a senwelo se se tsoiwe fa go nna. Mme ke batla thato ya gago, eseng ya me." 40 Mme a boela morago kwa barutweng ba bararo mme a ba fitlhela ba thulametse. Mme a bitsa Petere a re, "a lo no lo ka seka lwa lebelele le nna ka lobaka lwa selekanyo sa oura fela? 41 Lebelelang lo rapele. Esengjalo thaelo e tlaa lo fenya. Gonne mowa tota o a rata, mme mmele o bokoa thata!" 42 Gape a ba tlogela a ya go rapela, a re, "Rara! Fa senwelo se se sa kake sa feta fela fa ke sa se nwe sotlhe, a go rata ga gago go diragale." 43 A boela kwa go bone mme a fitlhela ba robetse, gonne ba ne ba otsela thata, 44 mme a boela gape mo thapelong lwa boraro, a boelela mafoko a o neng a ntse a a bua. 45 Hong a tla kwa barutweng a re, "Robalang lo itapoloseng, bonang! Nako e gorigile, ke okelwa mo diatleng tsa batho ba ba busula! 46 Tsogang; a re tsamayeng! Bonang, motho yo o nkokang ke yoo o e tla!" 47 Mme ya re ka lona lobaka loo a ntse a bua, Judase, mongwe wa ba ba lesome le bobedi, a goroga le bontsi jo bogolo jwa batho ba tshotse dichaka le melamu ba romilwe ke Baeteledipele ba Sejuda. 48 Judase o na a ba reile a re ba tshware yo o tlaa mo dumedisang gonne e tlaa bo e le ene yo ba mmatlang. 49 Hong Judase a tla a tlhamaletse kwa go Jesu a re, "Dumela Morena!" Mme a mo tlamparela ka tsela ya go atla ka lorato lo lo feteletseng lwa thologelelo. 50 Jesu a re, "Tsala ya me, tswelela pele o dire se o se tletseng." Hong ba bangwe ba mo tshwara. 51 Mongwe wa banna ba ba patileng Jesu a somola chaka a kgaola tsebe ya motlhanka wa Moperesiti yo mogolo. 52 Mme Jesu a mo raya a re, "Baya chaka ya gago, ba ba dirisang dichaka ba tlaa bolawa. 53 A ga o lemoge gore ke ne ke ka kopa Rre dikete tsa baengele go re sireletsa, mme o na a ka ba roma gone fela ka nako eo. 54 Mme fa nkabo ke dirile jalo; Dikwalo di ne di ka diragadiwa jang tse di tlhalosang se se diragalang jaanong jaana?" 55 Hong Jesu a bua le bontsintsi jwa batho a re, "A ke serukuthi se se diphatsa, mo lo neng lwa tshwanelwa ke go tsaya dichaka le melamu pele ga lo ntshwara? Ke ntse le lona ka malatsi othe ke ruta mo Tempeleng mme ga lo ise lo ke lo nkganele. 56 Mme mo gotlhe ga diragala go diragatsa mafoko a baporofithi jaaka a kwadilwe mo Dikwalong." 57 Hong bontsi jwa batho jwa mo isa kwa legaeng la ga Kaiafase Moperesiti yo mogolo, kwa baeteledipele botlhe ba Sejuda ba neng ba phuthegetse teng. 58 Mme e rile ka yone nako eo Petere a bo a le kgakala a mo setse morago, mme a tla mo kgotleng ya moperesiti yo mogolo a tsena mo teng a nna le masole, mme a emela go bona se se neng se tsile go diragalela Jesu. 59 Dithlogo tsa baperesiti le leggotla lotlhe le le tona la Sejuda tsa phuthaganela teng

mme tsa senka basupi ba ba ka buang maaka ka ga Jesu, go mo direla kgang e e ka felelang ka katlholo ya loso. 60 Mme le fa ba ne ba bona bontsi jo bo neng jwa dumalana go nna basupi ba eseng ba boammaaruri, bone bao ba ne ba aga ba ganetsanya. Lwa bofelo ga bonwa banna ba le babedi ba ba neng ba supa ba re, "Monna yo o rile, 'Ke kgona go senya Tempele ya Modimo ke bo ke e age mo malatsing a mararo' 62 Hong Mo peresiti yo Mogolo a ema ka dinao a raya Jesu a re, wa reng ka ga gone? A o buile jalo kgotsa nnyaa?" 63 Mme Jesu a didimala fela. Jalo Moperesiti yo Mogolo a mo raya a re, "Ke go ikanisa mo leineng la Modimo o o tshedileng gore o re bolelele gore a o ipitsa Mesia Morwa Modimo." 64 Mme Jesu a re, "Ee, ke ene. Mme e tlaa re mo malatsing a a tlang lo tlaa mpona, Nna Morwa Motho, ke ntse ka fa lebogong le legolo la Modimo ke tla ka maru a legodimo." 65 Hong moperesiti yo Mogolo a ikgagola diaparao goa a re, "O a thapatsa! Re sa ntse re tlhokelang basupi ba bangwe? Lo mo utlwile lotlhe a buajalo! Katlholo ya lona ke efe?" Ba gowa ba re, "A a bolawe! A a bolawe! A a bolawe!" 67 Hong ba mo kgwela mathe mo sefathogong, ba mo itaya mme ba bangwe ba mo phanya. 68 Ba re, "Re porofesetse, wena Mesia ke mang yo o nang a go itaya ka nako ele?" 69 Mme e rile ka lobaka loo, fa Petere a ntse mo kgotleng, mosetsana a tla kwa go ene a mo raya a re, "O ne o na le Jesu, gonne lotlhe lo tswa Galalea." 70 Mme Petere a itatolela kwa godimo a gaketse a re, "Ga ke itse se o buang ka sone." 71 Mme ya re a sena go tswa ka kgoro, mosetsana yo mongwe a mo lemoga, mme a raya ba ba neng ba eme foo a re, "Monna yo o ne a na le Jesu wa Nasaretha." 72 Gape Petere a itatola, ka ikano a re "Ga ke itse monna yo." 73 Mme morago ga lobakanyana banna ba ba neng ba eme foo ba tla kwa go ene ba re, "Re itse gore o mongwe wa barutwa ba gagwe, gonne re utlwile loleme lwa gago lwa Segalalea." 74 Petere a simolola go rogakana le go ikana a re, "Ga ke itse monna yo." Mme ka bofelo mokoko wa lela. 75 Hong Petere a gakologelwa se Jesu a se mo reileng fa a re, "Pele ga mokoko o lela o tlaa bo o intatotse gararo." Mme a tswela kwa ntle a lela mo go bothoko.

27 Mme e rile mo mosong, dithlogo tsa pa-peresiti le baeteledipele ba Sejuda ba rakana gape go gakololana ka fa ba ka thotholetsang ka teng mmuso wa Se-Roma go atholela Jesu loso. 2 Mme ba mo romela kwa go Pilatwe molaodi wa Roma a golegilwe ka dikeetane. 3 E rile ka nako eo, fa Judase yo o mo okileng a bona gore Jesu o atholetswe loso, a ikwatlhaya a utlwa bothoko thata ka se a se dirileng, a busetsa madi kwa dithlogong tsa baperesiti le baeteledipele ba bangwe ba Sejuda. 4 A re, "Ke leofile, gonne ke okile motho yo o senang molato." Ba mo fetola ba re, "Ke dibonwa ke wena." 5 Hong a latlhela madi mo bodilong jwa Tempele, a tswa a ya go ikaletsa. 6 Dithlogo tsa baperesiti tsa sela madi ao. Tsa re, "Ga re kake ra a tsenya mo letloleng, gonne go kgathanong le melao ya rona go amogela madi a a dueletseng polao ya motho." 7 Ba go rerisanya mme kwa bofelong ba dumalana go reka setsha sa lefatshe se letsopa la sone le neng le dirisiwa go bopa dinkgwana le gore se dirisiwe go fitlha baeng ba ba swelang mo Jerusalema. 8 Ke sone se e leng gore setsha se,

se sa ntse se bidiwa “Lefatshe la Madi” 9 Se se dirafaditse seporofeso sa ga Jeremia se se reng, “Ba tsaya dipapetlana tsa selefera di le masome mararo, tlhathlwa e a neng a e beetswe ke batho ba Iseraele, 10 mme ba reka setsha mo baboping ba dinkgwana jaaka Morena Modimo a nkaetse.” 11 Mme ya re Jesu a eme fa pele ga ga Pilatwe, molaodi wa Roma, a mmotsa a re, “A o Mesia wa Bajuda?” Jesu a mo araba a re, “Ee go ntse jalo.” 12 Mme e rile diithogo tsa baperesiti le baeteledipele ba bangwe ba Sejuda ba mmaya melato e mentsinti, Jesu a dimalala fela. 13 Pilatwe a mo raya a re, “A ga o utlwe se ba se buang?” 14 Mme Jesu a seka a bua sepe mme mo ga gakgamatsa moladi thata. 15 Mme ka fa mokgweng wa molaodi e ne e le gore ngwaga le ngwaga a golole legolegwa lengwe la Sejuda ka moletlo wa Tloaganyo. Mongwe fela yo ba mo ratang. 16 Mo ngwageng eo ga bo go le mo kgolegelong Barabase serukutlhi se se itsegeng thata, 17 mme ya re bontsinti bo phuthegela fa pele ga ntlo ya ga Pilatwe mo mosong oo, a ba botsa a re, “Lo batla ke lo gololela mang, Barabase kgotsa Jesu Mesia wa lona?” 18 Gonno o na a itse sentle gore baeteledipele ba Sejuda ba golegile Jesu ka kilo ka nthla ya go tuma ga gagwe. 19 Mme ya re a ntse a sekisa, mosadi wa gagwe a mo romelela molaetsa o: “Tlogela monna yo o siameng yoo; gonno ke letse ke tshwenyegile thata mo torong ka nthla ya gagwe.” 20 Ka nako eo diithogo tsa baperesiti le bagolwane ba Sejuda ba tlhotlheletsa bontsinti jwa batho go kopa gore Barabase a gololwe, Jesu ene a bolawe. 21 Hong ya re fa molaodi a botsa gape a re, “Ke ofe mo go ba babedi ba, yo lo batlang ke lo mo gololela?” Bontsi jwa batho ba goa ba re, “Barabase!” 22 Hong Pilatwe a botsa a re, “Jaanong ke tlaa reng ka Jesu, Mesia wa lona?” Mme ba goa, ba re, “A a bapolwe!” 23 Pilatwe a re, “Ka nthla yang? O dirile bosula jwa eng?” Mme ba tswelela ba goa ba re, “A a bapolwe! A a bapolwe!” 24 E rile fa Pilatwe a bona gore ga a kgone, le gore pherethogo e a tsoga, a kopa mogopo wa metsi a tlhapa diatla tsa gagwe fa pele ga bontsi jwa batho a re, “Ga ke na molato mo mading a monna yo o siameng yo.” 25 Mme bontsi jwa goa jwa re “Madi a gagwe a a nne mo diithogong tsa rona le bana ba rona!” 26 Hong Pilatwe a ba gololela Barabase. Mme e rile a sena go kgwathisa Jesu, a mo neela masole a Roma go ya go mmapola. 27 Mme masole a mo tseela kwa tlung ya diithabano, mephato yotlhe ya mo phuthaganela. 28 Hong ba mo apola, ba mo apesa kobo e khibidu, 29 mme ba mo logela serwalo ka mitlwa e melelele ba se mo rwesa, ba mo naya thobane mo lebogong le legole e e emetseng thobane ya Segosi mme ba khubama fa pele ga gagwe ka tshotlo ba goa ba re, “Dumela Kgosi ya Bajuda.” 30 Mme ba mo kgwela mathe, ba tsaya thobane ba mo itaya ka yone mo tlholog. 31 Morago ga tshotlo, ba mo apola kobo ba mo apesa seaparo sa gagwe gape, ba mo isa kwa ntle go ya go mmapola. 32 Ya re ba le mo tseleng e e yang kwa go bolaelwang teng, ba bona monna yo o tswang Sirene mo Aferika, yo o neng a bidiwa Simone, ba mo pateletsa go tsaya mokgoro wa ga Jesu. 33 Hong ba ya felong fa go bidiwang Gologotha, ke gore “Felo ga Logata,” 34 kwa masole a neng a mo neela mofine o o tlhakantsweng le santlhokwe, mme ya re a sena go o lekeletsa ka legano a o

gana. 35 Morago ga papolo, masole a kgaogana diaparo tsa gagwe ka go di thelela bola (mataise). 36 Hong ba nna ba mo lebeletse mo mokgorong. 37 Mme ba baya sesupo fa godimo ga tlhogo ya gagwe se balega se re, “Yo ke Jesu Kgosi ya Bajuda.” 38 Dinokwane di le pedi le tsone di ne tsa bapolwa mo mosong oo di mo tsentse fa gare. 39 Mme bafeti ka tsela ba mo kgala, ba tshikinya diithogo tsa bone ba re, “O ka senya Tempele wa e aga gape mo malatsing a mararo, a o ka kgona. Go siame ipholose mo mokgorong fa o le Morwa Modimo!” 41 Mme baperesiti ba bagole ba baeteledipele ba Sejuda le bone ba mo kgala ka tshotlo ba re, “O bolokile ba bangwe, mme ga a kgone go ipoloka! Ga ke re o Kgosi ya Baiseraele, a ga go jalo? Jalo he, fologa mo mokgorong ke gone re tlaa go dumelang! O ikantse Modimo, a Modimo o supe gore o eme le ene o mo golole! A ga a are, ‘Ke Morwa Modimo?’” 44 Mme dinokwane le tsone tse di neng di bapotswe nae tsa latlhela tshotlo tsa mo gobolola ka mokgwa o o tshwanang. 45 Ya re mo go yone tshokologo ya letsatsi leo, lefatshe lotlhe la welwa ke lefifi dioura di le tharo, go simologa motshegare go fithelela ka nako ya boraro. 46 E rile ka nako ya boraro, Jesu a goa a re, “Eli, Eli Lama Sabakathani” ke gore, “Modimo wa me, Modimo wa me, ontatlhatseng?” fa go thalosiwa. 47 Bangwe ba batho ba ba neng ba le gaufi ba se ka ba mo thalogan ya mme ba gopola gore o bitsa Elija. 48 Mongwe wa bone a siana a tlatsa ngami mofine o o botsarara, a e tlhomela mo thobaneng a e isa kwa molomong wa gagwe go mo nosa. 49 Mme bangwe ba re, “Mo leseng re bone gore a Elija o tlaa tla go mmoloka.” 50 Hong Jesu a goa ka lentse le legole gape, a golola mowa wa gagwe, a swa. 51 Jalo Sesiro se se farologanyang Felo ga Boitshepo mo Tempeleng sa fatogana go simologa kwa godimo go ya kwa tlase; le lefatshe la tshikinyega, mafika a phatloga, 52 le mabilla a bulega, mme banna ba ba boifang Modimo ba le bantsi le basadi ba ba neng ba sule ba rula. 53 Morago ga tsogo ya ga Jesu, ba tlogela diphuphu ba ya Jerusalem, mme ba bonala mo bathong ba le bantsi teng. 54 Masole kwa papolong le bagolwane ba one a tshosiwa thata ke thoromo ya lefatshe le gotlhe mo go neng go diragala. Ba bua ba re, “Ammaaruri e ne e le Morwa Modimo.” 55 Mme basadi ba le bantsi ba ba neng ba tswa Galalea le Jesu go mo tlhokomela ba ne ba lebeletse ba le kgakala. 56 Mo go bone ga bo go le Marea Magatalena le Marea mmaagwe Jakobe le Josefe, le mmaagwe Jakobe le Johane (bomorwa Sebede). 57 E rile mo maitseboeng, monna mongwe yo o humileng a tswa Arimathea yo o bidiwang Josefe, mongwe wa balatedi ba ga Jesu, 58 a ya go kopa setopo sa ga Jesu kwa go Pilatwe. Mme Pilatwe a laola gore a se neelwe. 59 Josefe a tsaya setopo a se phutha ka letsela la leloba le le phepa, 60 mme a se baya mo phuphung ya gagwe e e gabilweng mo lefikeng, mme e rile a tsamaya a pitikololela lentse le le tona fa godimo ga yone go e khurumela. 61 Marea Magatalena le Marea yo mongwe ba bo ba ntse gautshwane ba lebeletse. 62 Mme e rile ka letsatsi le le latelang, e le letsatsi la bofelo la mediro ya Iketeletso, diithogo tsa baperesiti le Bafarasai ba ya kwa go Pilatwe, 63 mme ba mo raya ba re, “Morena, moaki yole o kile a re ‘E tlaa re morago ga malatsi a le mararo ke bo ke rula gape’.” 64 Jalo re kopa taolo

mo go wena go kana phuphu go fitlhelela letsatsi la boraro, go itsa barutwa ba gagwe go tla go utswa mmele wa gagwe ba tloga ba raya batho ba re! O tsogile. Fa mo go ka diragala re tlaa nna mo matshwenyegong go gaisa pele.” 65 Mme Pilatwe a ba raya a re, “Dirisang mapodisi a lona a Tempele, ba ka e tlhokomela sentle thata.” 66 Jalo ba kanela lentswe le le khurumetseng phuphu ba bo ba ntsha masole go e disa.

28 Mme ya re phakela mo mosong wa Tshipi, fa bosigo jwa tshipi boo sa, Marea Magatalena le Maria yo mongwe ba ya kwa phupung. 2 Ka tshoganetso ga nna thoromo ya lefatshe e kgolo; gonne moengele wa Morena o na a fologa kwa legodimong mme a pitikololela lentswe fa thoko ga phupu mme a nna mo godimo ga lone. 3 Sefathhogo sa gagwe sa bo se phatsima jaaka logadima, le diaparo tsa gagwe tsa bo di le bosweu jo bo fathang. 4 Balebeledi ba roromisiwa ke letshogo fa ba mmona, mme ba idibala mo o neng o ka re ba sule. 5 Mme moengele a bua le basadi a re, “Se boifeng!” Ke itse gore lo batla Jesu yo o neng a bapotswe, 6 mme ga a yo fano! Gonne o rudile fela jaaka a boletse. Tsenang lo bone fa mmele wa gagwe o neng o namaletse gone. 7 Mme jaanong, ithaganeleng lo ye go itsise barutwa ba gagwe gore o tsogile mo baswing le gore o ya kwa Galalea go rakana nabo teng. Ke one molaetsa wa me o ke o lo nayang. 8 Basadi ba akofa ba tloga fa phupung ba tshogile gape ba itumetse thata, mme ba ithaganelele go batla barutwa go ba bolelela molaetsa wa moengele. 9 Mme ya re ba santse ba siane, ka tshoganetso Jesu a ba kgathantsha! A re, “Dumelang!”. Ba wela fa fatshe fa pele ga gagwe ba mo tshwara dinao ba mo obamela. 10 Mme Jesu a ba raya a re, “Se boifeng! Yang go raya bana ba ga Rre lo re ba ithaganelele kwa Galalea go nkgathantsha teng.” 11 Ya re basadi ba santse ba le mo tseleng e e yang motseng, bangwe ba mapodisi a Tempele ba ba neng ba disitse phupu ba ya kwa baperesiting ba bagolo go ba bolelela se se diragetseng. 12 Phuthego ya baeteledipele botlhe ba Sejuda ya kuiwa, ga dumalanwa gore mapodisi a rekwe ka madi gore ba re erile ba robetse barutwa ba ga Jesu ba tla bosigo mme ba utswa mmele wa gagwe. 14 Mme phuthego ya ba solofetsa ya re, “Fa molaodi a ka utlwa ka ga kgang e, re tlaa lo sireletsa mme sengwe le sengwe se tlaa siama.” 15 Jalo mapodisi a dumalana go rekwa ka madi, mme ba bua se ba neng ba se rutilwe. Polelo ya bone ya anama mo Bajudeng, le gompiono e sa ntse e dumelwa. 16 Mme barutwa ba ba lesome le motso ba ya Galalea, ba ya thabeng e Jesu a neng a rile ba tlaa mo fitlhela teng. 17 Mme koo ba feta ba rakana nae mme ba mo obamela; mme bangwe ba bone ba bo ba sa tlhomamisa gore a ke ene Jesu tota! 18 A raya barutwa ba gagwe a re, “Ke neilwe taolo yotlhe kwa Legodimong le mo lefatshing. 19 Ke gone tsamayang mme lo dire barutwa mo merafeng yotlhe, lo ba kolobetse mo ineng la ga Rara le la Morwa le la Mowa o o Boitshepo. 20 Mme ke gone lo rute barutwa ba basha ba go tshhegetsa ditaolo tsothe tse ke di lo neileng; mme lo tlhomamisa Gore ke na le lona ka malatsi otlhe le go ya bokhutlong jwa lefatshe.” (aiōn g165)

Mareko

1 E ke tshimologo ya polelo e ntle ya ga Jesu Mesia, Morwa Modimo. **2** Mo bukeng e e kwadilweng ke moporofiti Isaia, Modimo o ile wa anamisa gore o tla romela morwaa one, mo lefatsheng, pele ga moo go tlaa tla morongwa yo o faphegileng go tla go baakanyetsa lefatsheng go tla ga gagwe. **3** "Mme morongwa yo o tlaa nna kwa ntle mo sekakeng se se senang sepe," Isaia o bua jaana a re, "O tlaa anamisa gore mongwe le mongwe o tshwanetse go ipaakanyetsa go tla ga Morena." **4** Morongwa yo e ne e le Johane wa Mokolobetsi. O ne a nna mo sekakeng a ruta botlhe gore ba tshwanetse go kolobediwa e le molaetsa mo go botlhe gore ba sokologe mo dibeng tsa bone, gore Modimo o tle o ba itshwarele. **5** Batho botlhe ba kwa Jerusalema le botlhe ba Judea ba ne ba tswela mo mafatsheng a Judea go tla go bona le go utlwa Johane, mme e re fa ba sena go ipolela dibe a ba kolobetse mo nokeng ya Jorodane. **6** Diaparo tsa gagwe di ne di logilwe ka boboa jwa kamela mme o ne a itlamilile ka moitlamo wa letlalo mo lothekeng; tsie le dinotshe tsa naga e ne e le dijo tsa gagwe. **7** Sekai sa thero ya gagwe ke se; "Mongwe o etla ka bonako yo o leng mogolo mo go nna, yo o leng mogolo thata go mpheta yo ruri ke sa tshwanelang go ka nna motlhanka wa gagwe. **8** Nna ke lo kolobetsa ka metsi mme ene o tla lo kolobetsa ka Mowa o o Boitshepo!" **9** Erile letsatsi lengwe Jesu a tswa kwa Nasaretha wa Galalea, a kolobediwa ke Johane teng mo nokeng ya Jorodane. **10** Mme erile ka bonako fa Jesu a tswa mo metsing, a bona magodimo a bulega le Mowa o o Boitshepo o le mo setshwanong sa lephoi o fologela mo go ene. **11** Mme lentswe la tswa kwa legodimong la re, "O Morwaake yo o rategang; o boitumelo jwa me." **12** Ka bofefo Mowa o o Boitshepo wa gogela Jesu kwa nageng. A nna malatsi a le masome a mane, a nna teng mmogo le dipologolo tsa naga. O ne a tsentswe mo ditekong tsa ga Satane gore a leofe. Mme morago ga moo baengele ba tla ba mo direla. **14** Morago ga moo Johane a sena go tshwarwa ke Kgosi Herode, Jesu a ya Galalea a ya go rera Mafoko a a Molemo a Modimo. **15** Mme la bofefo a ba bolelela a re, "Nako e tsile. Bogosi jwa Modimo bo atametse! Sokologang lo tswa mo dibeng, mme lo dire ka fa mafokong a a molemo a." **16** Letsatsi lengwe fa Jesu a tsamaya fa lotshitshing lwa lewatle la Galalea, a bona Simone le Anterea monnawe ba tshwara dithapi ka matloa, gone e ne e le batshwari ba dithapi ba di rekisang. **17** Jesu a ba bitsa a re, "Tlang lo ntshale morago! Mme ke tla lo dira batshwari ba mewa ya batho!" **18** Ka bofefo ba tlogela matloa a bone ba tsamaya nae. **19** Mme kgakajana fa lotshitshing lwa lewatle, a bona bomorwa Sebede, Jakobe le Johane, ba le mo mokorong ba baakanya matloa a bone. **20** Le bone a ba bitsa, ka bofefo ba tlogela rraabo Sebede le badiri ba bangwe mo mokorong ba mo sala morago. **21** Mme Jesu le bapati ba gagwe ba fitlha mo motseng wa Kaperanama ka letsatsi la Sabata mo mosong mme ba tsena fa felong ga kobamelo ya Sejuta fa go bidiwang Senagoge (Tempele) kwa o neng a ruta gone. **22** Hong phuthego ya gakgamala thata go utlwa thero ya gagwe gone o ne a ruta se se builweng ke ba bangwe gona le kafa

ba tiwaetseng go utlwa ka teng. **23** Mme ga bo go le monna mongwe yo o tsenweng ke mewa e e maswe, mme a simolola go goa; a re, **24** "Ke ka ntsha yang fa o re tshwenya, Jesu wa Nasaretha a o tsile go re nyeletsana rona Mewa e e maswe? Ke a itse fa o le Morwa Modimo o o Boitshepo." **25** Jesu a laola moya o o maswe gore o didimale o tswa mo go ene. **26** Mme mowa o o maswe wa goa wa mo kgarathisa wa tswa mo go ene. **27** Batho ba gakgamala mme ba simolola go bua ka ga se se diragetseng. Ba bantsya ka kakabalo ba re, "Ke mofuta ofe wa tumelo e ncha e? Ke ka ntsha yang, fa le mewa e e maswe e utlwa ditaalo tsa gagwe!" **28** Mme dikgang ka ga se o se dirileng tsa akofa tsa utlwala mo lefatsheng lotlhe la Galalea. **29** Mme e rile fa a tswa mo tempeleng, ene le barutwa ba gagwe ba tsena kwa ga bo Simone le Anterea, kwa ba fitlhetseng mogwagwadia Simone wa mosadi a namaletse mo bolaong a lwala bolwetse jwa letshoroma. Mme ya re fela ka bofefo ba bolelela Jesu ka gagwe. **31** A ya fa thoko ga bolao jwa gagwe, mme a mo kakatlolola gore a nne sentle, ka bofefo letshoroma la mo tlogela, mme a ema a ba baakanyetsa dijo! **32** Mme e rile letsatsi le phirima lolwapa lwa bo lo tletse balwetse le ba ba neng ba tsenwe ke mewa e e maswe, ba lerilwe kwa go ene go fodisiwa; bontsi jwa batho ba ba tswang kwa metseng ya Kaperanama ba kgobokanela kwa ntle ga kgoro go lebelela. **34** Mme Jesu a fodisa ba le bantsi ba ba neng ba lwala mo maitseboeng ao, a ba a laola mewa e e maswe go tswa mo go ba e neng e ba tsenye. (Mme a gana go leta mewa e e maswe go bua gone e ne e itse gore ke mang). **35** Erile mo mosong o o latelang a phakela thata a tsamaya a le esi go ya go rapela mo nageng. **36** Mme morago ga moo Simone le ba bangwe ba ya go mmatla, ba mo raya ba re, "Mongwe le mongwe o a go batla." **38** Mme a araba a re, "Re tshwanetse go ya le kwa metseng e mengwe, gore le bone ke ba neele molaetsa wame, gone ke lone lebaka le ke le tietseng." **39** Mme a tsamaya le lefatsheng lotlhe la Galalea, a rera mo ditempeleng ebile a golola ba le bantsi mo thateng ya Mewa e e maswe. **40** Mme ka bofefo ga tla moleperwa a khubama fa pele ga gagwe a kopa gore a fodisiwe. A mo rapela a re, "Fa o rata o ka mphodisa." **41** Mme Jesu a mo utlwelelwa bothoko a mo ama a re, "Ke a rata! fola!" **42** Ka bofefo leperwa la tloga, monna a fola! **43** Mme Jesu a mo laya thata a re, "Tsamaya o ye go tlhatlhoobiwa ka bonako ke moperesiti wa Sejuta. O seka wa ema go bolelela ope mo tseleng. Tsaya neo ya gago ka fa molaong wa ga Moshe wa moleperwa yo o fodisitsweng, gore mongwe le mongwe a tle a nne le bosupi jwa gore o fodile." **45** Erile fa moleperwa a ntse a tsamaya mo tseleng a simolola go goeletsana mafoko a a molemo a gore o fodile. Mme yare ka ntsha ya moo, bontsi jwa batho jwa dikaganyetsa Jesu gore a ba a retelwe ke go tsena mo motseng, mme a tshwanetse ke go nna kwa ntle mo sekakeng. Mme batho ba tswa gongwe le gongwe ba tla kwa go ene.

2 Mme erile morago ga malatsi a le mantsi a boela gape kwa Kaperanama, mme kutlwedi ya go tla ga gagwe ya tuma ka bofefo mo motseng othe. **2** Ka bonako ntle e o neng a le mo go yone e ne ya tla baeng thata mo go neng go sena bonno le fa e le jwa motho a le esi, le fa e le kwa kgorong tota. Mme a

ba rerela lefoko. 3 Mme ya re a sa ntse a rera, banna ba le bane, ba goroga ba tshotse monna yo o suleng mhama a le mo lepareng. 4 Mme ba palelwa ke go tsena kwa go Jesu ka nthla ya bontsi jwa batho, hong ba rutlolola ntlo go lebagana le tlhogo ya gagwe, mme ba folosa molwetsi ka lepara, go lebagana sentle le fa pele ga ga Jesu. 5 Mme erile Jesu a bona kafa ba dumelang thata ka teng gore o tlaa thusa, Jesu a raya monna yo o lwalang a re, "Morwaaka, dibe tsa gago di itshwaretse!" 6 Mme bangwe ba baeteledipele ba Sejuta ba ba neng ba ntse foo ba raana ba re, 7 "Gatweng? Se ke tlhapatso! A o gopola gore ke Modimo? Gonne ke Modimo fela o o ka itshwarelang dibe." 8 Mme Jesu ka a ne a itsile diithaloganyo tsa bone a ba raya a re, "Ke eng fa se se lo tshwenya? 9 A go thata go itshwarela dibe tsa gagwe go na le go mo fodisa? 10 Mme jalo ke tlaa lo supegetsa, gore Nna, motho yo o tswang legodimong, ke itshwaretse monna yo dibe." Hong a retologela kwa monneng yo o suleng mhama a re, "O fodisitse. Tsaya lepara la gago o ye gae!" 12 Mme monna a nanoga, a tsaya lepara a ralala batho ba ba neng ba mo lebeletse! 13 Hong Jesu a ya gape kwa lotshitshing lwa lewatle mme a rerela boidiidi jwa batho jo bo neng bo mo dikaganyeditse. 14 Erile fa Jesu a ntse a tsamaya fa lotshitshing a bona Lefi, morwa Alefo, a ntse fa go kgethisediwang teng. A mo raya a re, "Ntshala morago. O nne morutwa wa me." Mme Lefi a nanoga a tsamaya nae. 15 Mo bosigongjoo, Lefi a laletsa badiri-ka ene ba bakgethisi le baleofi ba bangwe ba ba tumileng go nna balalediwa ba gagwe ka nako ya dijo tsa maitseboa gore ba tie ba kopane le Jesu le barutwa ba gagwe, (go ne go na le batho ba le bantsi ba mofuta o, mo boidiiding jwa batho jo bo neng bo mo setse morago). 16 Mme erile fa baeteledipele bangwe ba tumelo ya Sejuta ba mmona a a ja le batho ba ba mekgwa e e maswe, ba raya barutwa ba gagwe ba re, "Ke eng fa a ja le batho ba ba ntseng jaana?" 17 Erile fa Jesu a utlwa se ba neng ba se bua, a ba raya a re, "Batho ba ba lwalang ke bone ba ba batlang ngaka, e seng ba ba itekanetseng! Ga ke a tla go sokolola basiami fa e se baleofi." 18 Mme barutwa ba ga Johane le baeteledipele ba Sejuta e ne e tle e re ka nako tse dingwe ba ikitse dijo, ke gore, ba tlhoke go ja e le nthla nngwe ya tumelo ya bone; ya re letsatsi lengwe ba tla kwa go Jesu ba mmotsa gore ke ka nthla yang fa barutwa ba gagwe le bone ba sa ikitse dijo? 19 Mme Jesu a ba araba a re, "A ditsala tsa monyadi di ka gana go ja mo moletlong wa nyalo, A di ka hutsafala fa a sa ntse a na le tsone? 20 Mme letsatsi lengwe o tlaa tloswa mo go bone, mme ba tla hutsafala. 21 "Mo godimo ga moo, go ikitsa dijo ke mongwe mokgwa wa bogologolo wa go dira dilo. Go tshwana le go bitia seaparo se segologolo ka letsela le lesahl! Go ka diragala eng? Sedibo se ka garola mme sa dira gore leroba le nne maswe go gaisa pele. 22 Lo itse botoka gore go tshela mofine o moshla mo dinkwaneng tse dikgologolo, di ka thubega. Mofine o ka tshologela kwa ntle mme dinkgwana di senyega. Mofine o moshla o tlhoka dinkgwana tse dintsha." 23 Ka nako nngwe go le Sabata Jesu le barutwa ba gagwe ba tsamaya mo masimong, barutwa ba ne ba roba diako tsa mabele ba a ja. 24 Bangwe ba baeteledipele ba tumelo ya Sejuta ba raya Jesu ba re, "Ga ba a tshwanela ba ka bo ba

dira jalo! Go kgatthanong le melao ya rona go roba mabele ka letsatsi la Sabata." 25 Jesu a araba a re, "A ga lo ise lo ke lo utlwalele kaga Kgosi Dafide le bapati ba gagwe, ba ba neng ba tshwerwe ke tlaa, mme a tsena mo tlung ya Modimo Abiathare e ne e le Moperesiti yo Mogolo ka nako eo--mme ba a ja senkgwe se se faphegileng se se neng se jewa ke baperesiti fela? Seo le sone se ne se le kgatthanong le molao. 27 Mme Sabata e ne e diretswa go solegela motho molemo, e seng motho go solegela Sabata molemo. 28 Mme Nna, Mesia, ke na le nonofo ya go dira tshwetso ya se batho ba ka se dirang ka malatsi a Sabata!"

3 Erile Jesu a sa ntse a le mo Kaperanama a ya kwa Tempeleng gape, mme a bona teng monna yo o neng a omeletse letsogo. 2 Ka e ne e le letsatsi la Sabata, baba ba ga Jesu ba mo tlhoma matlho thata gore a o tlaa fodisa letsogo la monna yo? Fa a ne a ka dira jalo, ba ne ba ikaeletse go mo tshwara! 3 Hong Jesu a raya monna a re a tle go ema fa pele ga phuthego. 4 Mme a retologela kwa babeng ba gagwe a ba botsa a re, "A go siame go dira ditiro tse di molemo ka malatsi a Sabata? Kgotsa a ke letsatsi la go utlwa bothoko? A ke letsatsi la go boloka matshelo kgotsa go a senya?" Mme ga ba ise ba ke ba mo arabe. 5 Erile a ba leba ka kgalefo gonne o ne a tshwentswe ke go tlhoka kelothoko ga bone mo diithokong tsa batho, a raya monna a re, "Otlolola letsogo la gago." A le otlolola mme ka bofofo letsogo la gagwe la fola. 6 Mme e rile fela ka yone nako eo Bafarasai ba tsamaya ba ya go kopana le Baherodia ba loga maano a go mmolaya. 7 Erile ka lobakanyana, Jesu, le barutwa ba gagwe ba ya kwa lotshitshing lwa lewatle, ba setswe morago ke bontsintsi jwa batho go tswa mo tikologong yotho ya Galalea, Judea Jerusalem, Idumea le kwa moseja ga Noka ya Jorodane, le go tswa bokgakala jo bo kanang ka Ture le Sidona. Gonne dikgang ka ga dikgakgamatso tsa gagwe di ne di utlwetse kwa kgakala le ka bophara mme batho ba le bantsi ba tla go iponela ka matlho. 9 Mme a laela barutwa ba gagwe go tliša mokoro le go o baakanyetsa gore o tle o mo namole fa a ka pitlaganyediwa ke batho mo lotshitshing. 10 Gonne go ne ga diragala diphodiso di le dintsi ka letsatsi leo, mme ya re ka nthla ya moo balwetse ba le bantsi ba mo dikaganyetsa, ba leka go mo ama. 11 E ne e tle e re ka dinako tsothe fa ba ba tsenweng ke mewa e e maswe ba mmona ba wele fa fatshe fa pele ga gagwe ba goele kwa godimo ba re, "O Morwa Modimo!" 12 Mme a ba laya thata gore ba seka ba mo utlwatsa. 13 Erile morago ga moo a tlhatlogela kwa godimo ga dithaba mme a bitsa bangwe ba ene o ba tlhophileng, a ba laletsa go tsamaya nae; mme ba dira jalo. 14 Hong a tlhophla ba le lesome le bobedi mo go bone go nna bapati ba gagwe ba malatsi otlhe le go tswela kwa ntle nae go ya go rera le go kgoromeletsa mewa e e maswe kwa ntle. 16 A ke maina a ba ba lesome le bobedi ba o ba tlhophileng: Simone (yo o neng a mmita Petere) Jakobe le Johane (bomorwa Sebede, Jesu a ba bitsa barwa Tumo ya Maru). Anterea, Filipino, Baretholomea, Mathaio, Thomase, Jakobe, (Morwa Alefaio) Thadaeo, Simone (yo o neng e le wa lelolo la legkotta la dipolotiki le le neng le ikemiseditse go menola puso ya Roma.) Judase Isekariota, (yo e leng ene yo o mo okileng). 20 Mme e rile a boela kwa ntlung e

o neng a nna mo go yone, boidiidi jwa batho jwa simolola go phuthega gape, mme ya re ka bofelo ntlwa ya tlaa baeng ba le bantsi mo o neng a tlhoka le yone nako ya go ja. 21 Erile fa diatsala tsa gagwe di utlwa se se neng se diragala tsa tla go leka go mo tsaya tsa mo isa kwa di nnang teng. "Tsa re, O tlhakanye tlhogo." 22 Mme baruti ba tumelo ya Sejuta ba ba neng ba tsile ba tsawa Jerusalem ba re, "Moloto wa gagwe ke gore o tsenwe ke Satane kgosi ya Mewa e e maswe. Ke ka moo mewa e e maswe e mo reetsang." 23 Hong Jesu a bitsa banna ba, mme a ba botsa (A dirisa diane tse bothe ba neng ba di tlhaloganya), a re, "Satane o ka kgoromeletsa Satane ntle jang? 24 Bogosi jo bo ikgaogantseng ka bo jone bo tlaa swa. 25 Lolwapa lo lo tletseng dikgogakgogano le dikgaogano lo inyeletska ka bo lone. 26 Mme fa Satane a itwantsha, o ka dira eng? Ga a kitla a ema. 27 [Satane o tshwanetse go golegwa pele ga mewa e e maswe e kgoromelediwa ntle]. Fela jaaka monna yo o nonofileng a tshwanetse go golegwa pele ga ntlwa ya gagwe e ka thujwa a ba a gapelwa dilwana. 28 "Mme ke lo thomamisetsa gore boleo bongwe le bongwe jwa motho bo ka itshwarelwa, le e leng go ntlhapatsa tota. 29 Mme go tlhapatsa Mowa o o Boitshepo ga go kake ga itshwarelwa, ke sebe sa bosakhutleng." (aiōn g165, aiōnios g166) 30 O ne a ba raya jalo ka ntlha ya gore ba ne ba re o dira dikgakgamatso ka nonofo ya ga Satane. (Mo boemong jwa gore ba dumele gore e ne e le ka nonofo ya Mowa o o Boitshepo). 31 Hong mmaagwe le bomonnawe ba tla mo ntlung e bontsi jwa batho bo neng bo kgobokanetse mo go yone, fa a neng a rutela teng, ba romela mongwe gore a ba mmiletse. Ba mo raya ba re, "Mmago le bomonnao ba kwa ntle ba batla go go bona." 33 Hong Jesu a araba a re, "Mme ke mang? Bonnake ke bo mang?" 34 A leba ba ba mo dikogileng a re, "Mme le bonnake ke ba! 35 Mongwe le mongwe yo o dirang go rata ga Modimo ke nnake, ke kgaisadiake, ke mme."

4 Mme boidiidi jwa batho jo bo senang palo jwa mo dikaganyetsa mo lotshitshing fa a ntse a ruta, hong a tsena mo mokorong a nna fa fatshe a bua a le mo teng ga one. 2 Mokgwa wa gagwe wa gale wa go ruta e ne e le go bolelela batho dipolelo. Nngwe ya tsone e tsamaila jaana: 3 "Reetsang! Molemi o kile a ikaelela go jala peo. Mme ya re a e gasa mo tshimong ya gagwe, 4 nngwe ya yone ya wela mo tseleng, mme dinonyane tsa tla tsa e sela tsa e e ja. 5 Nngwe ya yone ya wela mo mmung o mosesane fa go neng go ikadile lefika teng. Ya gola ka bonako, mme ya akofa ya swabiswa ke mogote wa letsatsi ya a swa, ka ntlha ya gore medi ya yone e ne e sa otlega sentle mo mmung o o seng boteng. 7 Tse dingwe dipeo tsa wela mo mitlweng, mme mitlwa ya gola ya hupetsa dijalo tse di potlana, jalo tsa se ka tsa unywa, 8 "Mme tse dingwe tsa wela mo mmung o o molemo, tsa unywa ga masome a mararo tsa ata go fetisa jaaka a ne a jetse, dingwe tsa tsone tsa unywa ga masome a marataro kgotsa lekgolo. 9 Fa lo na le ditsebe, reetsang!" 10 Mme morago ga moo fa a le esi le ba ba lesome le bobedi le bangwe ba barutwa ba gagwe, ba mmotsa ba re, "Polelo ya gago e raya eng?" 11 Mme a ba araba a re, "Lo letleletswe go itse boammaaruri ka ga Bogosi jwa Modimo jo bo fitlhetsweng ba ba kwa ntle ga Bogosi: jaaka Moporofiti Isaia a bolela a re, 'Le fa ba bona ebile ba utlwa ga ba kitla ba tlhaloganya, kgotsa

ba sokologela mo Modimong kgotsa ba itshwarelwa dibe tsa bone.' 13 "Mme fa lo se ka ke lwa tlhaloganya setshwantsho se se motlhofo se, lo tlaa dira jang kaga tse dingwe tse ke yang go di bolelela. 14 Molemi yo ke neng ke bua ka ga gagwe ke mongwe yo o lereditseng batho molaetsa wa Modimo, a leka go jala peo e e siameng mo matshelong a bone. 15 Tsele e e thata, fa go wetseng peo nngwe teng e tshwantshiwa le bopolele-thata jwa batho bangwe ba ba utlwang lefoko la Modimo; mme e re ka bofelo Satane a tle a leke go ba lebatsa lefoko. 16 Mme mmu o o lokgwarapana o tshwantshiwa le dipelo tsa batho ba ba utlwang molaetsa ka boitumelo, 17 mme jaaka dithatshana tse di mo mmung o o ntseng jalo, medi ya tsone ga e tsenelele mo teng, le fa, lwa ntlha di gola sentle, ere ka bonako fa matshwenyego a simologa di korobe. 18 "Mmu o o mitlwa ke sesupo sa dipelo tsa batho ba ba reetsang Mafoko a a Molemo ba bo ba a amogela, 19 mme ka bofelo dithato tsa lefatshe le menate ya mahumo le go batla go tsewelela pele le go eletska dilo tse dintle go tsene ka bofelo mme go kgoreletse molaetsa wa Modimo mo dipelong tsa bone mme go seke go nne loungo lope. (aiōn g165) 20 "Mme mmu o o molemo o tshwantshiwa le dipelo tsa batho ba ba amogelang molaetsa wa Modimo ka boammaaruri, mme ba ungwele Modimo thobo e ntsi thata, ba ungwe ga masome a mararo le ga masome a le marataro le ga lekgolo tota go gaisa jaaka go jetswe mo dipelong tsa bone." 21 Hong a ba botsa a re, "Fa mongwe a tshuba lobone, a o lo baya ka fa tlase ga tafole gore lo fitlhe lesedi? Go ka se nne jalo! Lesedi ga le ka ke la bonwa kgotsa la dirisiwa. Lobone lo siametse go bewa mo setlhomong go bonesa le go nna le mosola. 22 Gonne sengwe le sengwe se se fitlheleng letsatsi lengwe se tlaa nna mo leseding. 23 Fa lo na le ditsebe, reetsang! 24 Mme gape tlhomamisang lo dirise se lo se utlwang. Gantsi fa lo dira jalo, lo tlaa kgona go tlhaloganya thata se ke se lo bolelelang. 25 Mme yo o nang le sengwe o tlaa nwa; mme yo o senang sepe o tlaa tseelwa le se o nang le sone tota. 26 Setshwantsho sengwe ke se, se se supang gore bogosi jwa Modimo bo ntse jang: Molemi o kile a jala peo mo tshimong ya gagwe, 27 mme a tsamaya, ya re malatsi a ntse a feta, dijalo tsa gola kwa ntle ga tlhokomelo ya gagwe. 28 Gonne mmu o ne o godisa dijalo. La ntlha mogwang wa tswa, diako tsa tlhoga, mme morago mabele a butswa. 29 Hong molemi a tla ka thipa ya gagwe a akofa a roba." 30 Mme Jesu a ba botsa a re, "Ke ka tshwantsha Bogosi jwa Modimo jang? Ke ka dirisa polelo efe go bo tshwantsha? 31 Bo tshwana le peo ya mosetara! Le ntswa e le nngwe ya dipeo tse di potlana, e gola e nna nngwe ya dithare tse di tona thata, e nne le dikala tse di telele mo dinonyane di ka agang dintlhaga tsa tsone teng mme tsa sireletsega." 33 O ne a dirisa ditshwantsho di le dintsi tse di ntseng jalo go ruta batho ka fa ba ka kgonang go tlhaloganya ka teng. 34 Legale, o ne a ruta fela ka ditshwantsho fa a ruta mo pepeneneng, mme e re morago ga moo, fa a le esi le barutwa ba gagwe a simolole go ba di tlhalosetsa. 35 Mme ya re mo maitseboeng, Jesu a raya barutwa ba gagwe a re, "A re tsheleng ka kwa ntlheng e nngwe ya lecha." 36 Hong ba mo tsaya, ba tsewelela, ba tlogela bontsi jwa batho (le fa mekoro e mengwe e ne ya ba sala morago). 37 Mme ya re ka bonako

matsubutsubu a magolo a phefo a tsoga. Makhubu a metse a simolola go tlolela mo mokorong go fithelela metse a tlala mo mokorong ebile o tloga o nwela. **38** Jesu o ne a robetse kwa motsheo ga mokoro a samile mosamo. Mme ka bonako ba mo tsosa ka letshogo le legolo ba re, "Moruti, a ga o tshwenyega le fa re tloga re nwela rotlhe?" **39** Hong a kgalemela phefo a raya lewatle a re, "Didimala!" Mme phefo ya didimala, ga ba ga nna tuulalo e kgolo! **40** Mme a ba botsa a re, "Lo ne lo tshositse ke eng? A le jaana ga lo ise lo bo lo inkanye?" **41** Mme ba tlala poifo thata ba ipotsa ba re, "Monna yo ke mang, yo diphefo le mawatle di mo utlwang?"

5 Mme erile fa ba goroga ka kwa ntheng e nngwe ya lecha monna mongwe yo o tsenyeng ke mewa e e maswe a betsega mo diphupung, fa Jesu a fologa mo mokorong. **3** Monna yo o ne a nna mo diphupung, a nonofile mo e leng gore le fa a ne a golegilwe jaaka a ne a tle a dirwe o ne a tle a kgaole dikeetane mo mabogong a gagwe a tsamae. Go ne go se ope yo o mo kgonang. **5** Motshegare otlhe le mo bosigong o ne a lala a tsamaya mo diphupung le mo dithabeng, a goa a itshegaka ka maje a a bogale. **6** Mme e rile Jesu a sa le kgakala kwa ntle mo metsing, monna yo a bo a setse a mmone, a taboga a mo kqatlhantsha, a ba a wela fa pele ga gagwe. **7** Hong Jesu a bua le mowa o o maswe o o neng o le mo monneng yo, a re, "Tswa, wena mowa o o maswe." Mme wa goela kwa godimo wa re, "O ya go dirang ka nna, Jesu Morwa Modimo Mogodimodimo? Ke go ikanisa ka Modimo, o se ka wa nthokofatsa." **9** Mme Jesu a botsa moya o o maswe a re, "Leina la gago ke mang?" moya o o maswe wa re, "Mophato, gonne re bantsi thata mo mothong yo." **10** Hong mewa e e maswe ya mo rapela gangwe le gape gore a se ka a e romela kwa lefatshing le le kgakala. **11** Mme ga bo go le serapa sa dikolobe se hula fa mhapheng wa thaba ntheng ya lecha. **12** "Mewa e e maswe ya mo rapela ya re, re romele mo serapeng sele sa dikolobe." **13** Mme Jesu a e letla. Hong mewa e e maswe ya tswa mo monneng ya tsena mo dikolobeng, mme serapa sothe sa kgokologa mo mhapheng wa thaba sa thabuela mo lecheng sa betwa ke metse. **14** Mme badisa ba siela mo metseng e e gauifi le mo tikologong ya lefatsho leo ba anamisa dikgang fa ba ntse ba taboga mme mongwe le mongwe a ya go iponela. **15** Mme batho ba le bantsi ba tloga ba kokoanela fa Jesu a neng a le teng. Ya re ba bona monna yoo a ntse fa fatshe, a apere e bile a ikutlwa sentle, ba tshoga thata. **16** Bao bothe ba ba neng ba bona se se diragetseng ba bolelela mongwe le mongwe ka ga sone. **17** Mme bontsi jwa batho jwa simolola go rapela Jesu gore a tsamae a ba tlogele! **18** Jalo a boela mo mokorong. Mme monna yo o neng a tsenwe ke mewa e e maswe a kopa Jesu gore a mo letle a tsamae nae. **19** Mme Jesu a gana a mo raya a re, "Ya gae kwa diatseng tsa gago, o ba bolelele dilo tse dintle tse Modimo o di go diretseng; le ka fa o ileng wa nna le kutlwelo bothoko ka teng." **20** Hong monna a simolola go etela metse e le some mo tikologong eo a bolelela mongwe le mongwe ka ga dilo tse dikgolo tse Jesu o di mo diretseng; mme ba gagamadiwa thata ke se o neng a se bolelela. **21** Mme e rile fa Jesu a sena go kgabaganyetsa ka kwa nthenge nngwe ya

lecha ka mokoro, batho ba le bantsi ba phuthaganela kwa go ene fa lotshitshing. **22** Mme moeteledipele wa tempele, yo o neng a bidiwa Jairo, a tla a wela fa pele ga gagwe, **23** a mo rapela gore a fodise morwadi. A bua ka tlhwaafalo e kgolo a re, "O gauifi le go swa. Tswee-tswee tla o mmee diatla gore a tshole." **24** Hong Jesu a tsamaya nae, mme bontsi jwa batho jwa mo sala morago. **25** Mo bontsintsing joo go ne go na le mosadi yo o saleng a lwala tshologo ya madi dingwaga di le lesome le bobedi. **26** Mme o ne a sa bolo go tshwenyega thata mo dingakeng di di dintsi ka dingwaga e bile a humanegisitse ke go di duela, mme go ne go sa tokafale ka gope, go ntse go tswelala pele. **27** Mme o ne a setse a utlwile dikgakgamatso tse Jesu o di dirileng, ke gone ka moo o ileng a tla kafa morago ga gagwe mo bontsintsing jwa batho a ama diaparo tsa gagwe. **28** Gonno o ne a gopotse ka boene gore, "Fa ke ka ama diaparo tsa gagwe, ke tlaa fola." **29** Mme ka boammaaruri, erile fela fa a sena go mo ama, go tshologa ga madi ga khutla, mme a itse gore o fodile. **30** Hong Jesu a lemoga ka bonako gore nonofo ya phodiso e dule mo go ene, a retologela kwa bontsintsing jwa batho a ba botsa a re, "Ke mang yo o amileng diaparo tsa me?" **31** Barutwa ba mo raya ba re, "Bontsintsi jwa batho bo go pitlaganyeditse, mme o botsa gore ke mang yo o go amileng." **32** Mme a bo a ntse a batlisisa go bona gore ke mang yo o dirileng selo seo. **33** Hong mosadi yo o tshogileng, a romisiwa ke letshogo ka se se mo diragaletseng, a tla a wela fa dinaung tsa gagwe a mmolelela se a se dirileng. **34** Mme Jesu a mo raya a re, "Morwadiaka, tumelo ya gago e go fodisitse; tsamaya ka kagiso, o fodile mo bolwetsing jwa gago." **35** Erile fa a sa ntse a bua le ene, barongwa ba goroga ba tswa kwa legaeng la ga Jairo, ka mafoko a a reng morwadio o sule, jalo ga go tlhole go tlhokega gore Jesu a tle. **36** Mme Jesu a tlhokomologa puo ya bone a raya Jairo a re, "Se boife! Ikanye nna." **37** Hong Jesu a kganela bontsintsi jwa batho, mme a se ka a letla ope go tsena nae mo legaeng la ga Jairo, fa e se Petera le Jakobe le Johane. **38** Mme erile fa ba goroga, Jesu a bona gore dilo tsothle di tlhakatlhakanye, go le selelo se segolo le kuruetso. **39** A tsena mo teng a bua le batho, a ba botsa gore, "Ke ka nthla yang fa go le selelo se se kanakana? Ngwana ga a swa o robetse fela!" **40** Ba mo tshega ka tshotlo, mme a ba ntshetsa kwa ntle bothle, a tsaya rraa-ngwana le mma-ngwana le barutwa ba gagwe ba le bararo, a tsena mo ntlung e ngwana o neng a beilwe mo go yone. **41** A mo tshwara ka seatla a mo raya a re, "Tsoga mosetsana!" (O ne a na le dingwaga di le lesome le bobedi). Mme a nanoga a tsamaya! Batsadi ba gagwe ba gagkamala thata. **43** Jesu a ba laela ka tloafalo gore ba se ka ba bolelela ope se se diragetseng, mme a ba raya a re ba nee ngwana sengwe a je.

6 Mme ka bofefo morago ga moo a tloga mo kgaolong eo a boela le barutwa ba gagwe ba ya Nasaretha, motse wa ga gabo. **2** Mme ka Sabata se se latelang a ya kwa Tempeleng go ya go ruta, mme batho ba gagkamalela bothle jwa gagwe le dikgakgamatso tsa gagwe ka nthla ya gore e ne e le motho fela yo o tshwanang le bone. Mme ba bua ba tenegile ba re, "Ga a botoka go na le rona. Ke mmetli fela, morwa Marea, mogolola

Jakobe le Josefe, Judase le Simone. Le bokgaisadie re agile nabo." 4 Hong Jesu a ba raya a re, "Moporofiti o tlhlova gongwe le gongwe fela fa e se mo ga gabo le mo losikeng lwa gagwe le mo go ba ntlo ya gagwe." 5 Mme ka ntsha ya go tlhoka go dumela ga bone a se ka a kgona go dira dikgakgamatso tse di tona mo go bone, fa e se fela go baya diatla mo baboboding ba se kae, a ba fodisa. 6 Mme a gakgama le go tlhoka tumelo ga bone. Hong a tswa a tsamaya mo metseng, a ruta. 7 A bitsa barutwa ba gagwe ba ba lesome le bobedi a ba roma ka bobedi le bobedi, a ba neetse nonofo ya go kgoromeletsa ntle mewa e e maswe. 8 A ba raya a re, ba se ka ba tsaya sepe fa e se dithobane tse ba tsamayang ka tsone (diikokotlelo) le fa e le dijo, le fa e le kgetsana le fa e le madi, le fa e le ditlhako kgotsa diaparotse dingwe. 10 A ba raya a re, "Fa lo tsena mo motsing nnang mo lwapeng lo le longwe, se suteng fa lo leng teng go tsena ntlo le ntswana fa lo sa ntse lo le mo motsing oo. 11 Fa e le gore ba motse ga ba lo amogele kgotsa ga ba lo reetse ithlathoreng lorole mo dinaung tsa lona lo tsamaye; ke sesupo sa gore lo tlogetse motse oo tshetso." 12 Barutwa ba tsamaya, ba bolelela mongwe le mongwe yo ba kopanang nae gore a sokologe mo dibeng. 13 Mme ba kgoromeletsa ntle mewa e e maswe e le menti ba fodisa babobedi ba le bantsi ba ba tlotsa ka lookwane. 14 Mme ka bofefo Kgosi Herode a utlwa kaga Jesu, gonne dikgakgamatso tsa gagwe di ne di buiwa gongwe le gongwe. Kgosi e ne e akanya gore Jesu ke Johane wa Mokolobetsi a boetse mo botshelong. Hong batho ba ne ba re, "Ga go gakgamatse fa a ka dira dikgakgamatso tse di kalo." 15 Mme ba bangwe ba ne ba gopola gore Jesu ke Elija Moporofiti wa bogologolo o ka ne a boetse gape mo botshelong; ba bangwe ba gopola gore ke moporofiti yo moshala yo o tshwanang le bangwe ba ba tona ba bogologolo. 16 Herode a re, "Nnyaa, ke Johane, monna yo ke mo kgaotseng tlhogo. O tsogile mo baswing." 17 Gonne Herode o ne a rometse masole go tshwara Johane go mo isa kgolegelong ka ntsha ya gore o ne a tswela a ntse a re, ke phoso fa kgosi e nyala Herodiase, mogatsa Filiponawane kgosi. 19 Herodiase o ne a batla gore Johane a bolawe a ipusulotse, le fa go ntse jalo, kwa ntle ga tumalano ya ga Herode, Herodiase a palelwa. 20 Herode o ne a tlhola Johane, a itse fa e le motho yo o molemo a bile a le boitshupo, foo a mmaya ka fa tlase ga tshireletso ya gagwe. Herode o ne a tshwenyega nako tsotlhe fa a bua le Johane, le fa go ntse jalo o ne a rata go mo reetsa. 21 Mme ya re la bofele lobaka lwa ga Herodiase la tla. Ya re letsatsi la botsalo jwa ga Herode, Herode a direla bagolwane ba bogosi jwa gagwe mokete le bagolwane ba sesole, le baetedipele ba baagedi ba motse wa Galilea. 22 Hong ngwana wa mosetsana wa ga Herodiase a tla a bina fa pele ga bone ka botswerere a ba itumetse fela botlhe. Kgosi ya mo raya ya re, "Nkopa sengwe se o se ratang." "Le fa e le bontha jwa bogosi jwa me, mme ke tla bo go naya!" 24 Mme a tsamaya a ya go itsise mmaagwe, yo o neng a mo raya a re, "Lopa tlhogo ya ga Johane wa Mokolobetsi!" 25 Hong a boela kwa morago kwa kgosing a ya go e bolelela, a re, "Ke batla tlhogo ya ga Johane wa Mokolobetsi e le mo mogopong." 26 Mme kgosi ya hutsahala thata, ya tlhaja ke ditlhong go roba maikano a yone fa pele ga baeng ba

yone. 27 Hong a roma mongwe wa bathokomedi ba gagwe kwa kgolegelong go ya go kgaola tlhogo ya ga Johane le go e lere kwa go ene. Mme lesole la ya go bolaya Johane mo kgolegelong, 28 a tla ka tlhogo ya ga Johane e le mo mogopong, a e naya mosetsana, mosetsana ene a ya go e naya mmaagwe. 29 Erile barutwa ba ga Johane ba utlwa se se diragetse, ba tla ba tsaya mmele wa gagwe ba ya go o boloka mo lebitleng. 30 Mme baaposetoloi ba boela kwa go Jesu ba tswa loetong lwa bone ba mmolelela gotlhe mo ba go dirileng le mo ba go buileng le batho ba ba neng ba ba etela. 31 Hong Jesu a ba raya a re, "A re tsweng mo bontsing jwa batho ka lobakanyane re yeng go itapolosa." Gonne go ne go na le batho ba le bantsi ba ba tlang le ba ba tsamayang ba sena nako le ya go ja tota. 32 Mme ba tsamaya ka mokoro ba ya fa lefelong le le tuuletse. 33 Mme batho ba le bantsi ba ba bona ba tsamaya mme ba tabogela kwa pele ba le mo lotshitsing ba ba kgathantsha fa ba tswa mo mokorong. 34 Fela jaaka gale, bontsi jwa batho jwa bo bo le teng fa a tswa mo mokorong; mme a ba tlhomogela pelo ka ntsha ya gore ba ne ba tshwana le dinku tse di senang modisa a ba ruta dilo di di dintsu tse ba tshwanetseng go di itse. 35 Mme morago ga tshokologo ya letsatsi barutwa ba gagwe ba tla kwa go ene ba re, "Bolelela batho gore ba tsamaye ba ye kwa metsing e e gaufi le masimo ba ye go itshenkela dijo, gonne ga go na sepe se se ka jewang mo thoteng e, gape go nna bosigo." 37 Hong Jesu a re, "Ba fepeng." Mme ba botsa ba re, "Ka eng? Go tlaa lopa madi a le mantsi go reka dijo tsa bontsi jo bo kana!" 38 Mme a ba botsa a re, "Re na le dijo di le kana kang? Tsamayang lo yeng go bona." Mme ba tla gape go tla go mmolelela gore go na le dinkwe di le tlhano le ditlhapi di le pedi. 39 Hong Jesu a bolelela bontsi jwa batho gore ba nne fa fatshe, mme ka bonako ba kgaogangwa ka ditlhopho tsa masome a matlhano kgotsa lekgolo mme botlhe ba bo ba ntse mo bojannyeng jo botala. 41 Hong a tsaya dinkwe tse tlhano le ditlhapi tse pedi a leba kwa legodimong, a lebogela dijo tseo. A nathoganya dinkwe go nna dikapetlana, a neela barutwa ba gagwe bontha bongwe jwa dinkwe le ditlhapi go di fa batho. 42 Mme batho baa ja botlhe ba kgora! 43 Go ne go le banna ba ka nna dikete di le tlhano ka nako ya dijo, morago ga moo ditlatlana di le lesome le bobedi tsa tlala masalela a a neng a selwa fa fatshe mo bojannyeng! 45 Mme ka bonako morago ga moo Jesu a laola barutwa ba gagwe gore ba boele mo mokorong ba kgabaganye lecha ba ye Bethesaida, kwa o neng a tlaa kopana le bone teng morago. Fa Ene a ne a sa ntse a saletse go sadisa batho sentle gore ba boele gae. 46 Morago ga moo a tsamaya a ya kwa ditlabeng go rapela. 47 Mme ya re bosigo, fa barutwa ba gagwe ba le mo mokorong mo gare ga lecha, ene a bo a le nosi ka kwa ntle ga lecha. 48 Mme a bona fa ba le mo matshwenyengong a magolo, ba hudua ka bothata le go kgaratha kgatlanong le phefo e e tsbutlang le makhubu a lewatle. Erile e ka ne e le nako ya boraro mo mosong a tsamaela kwa go bone mo godimo ga metsi. Mme ya re ekete o a ba feta, 49 ba bona sengwe se tsamaya tsamaya fa thoko ga bone ba goa ka letshogo, ba gopola fa e le sepoko, 50 gonne ba ne ba mmona botlhe. Mme a bua le bone a re, "Go siame, se boifeng! Ke nna." 51 Hong a palama mo mokorong, phefo ya

didimala! Ba nna fela foo ba gkgametsa. 52 Gonno ba ne ba ise ba lemoga gore ke mang le fa e le morago ga kkgamatso ya maabane maitsiboa! Gonno ba ne ba sa batle go dumela. 53 Mme ya re ba fitlha kwa Geneseretha ka fa nthleng e nngwe ya lecha ba bohelela mokoro, 54 ba fologa. Mme batho ba ba neng ba eme mo tikologong eo ba mo lemoga fela ka nako eo, 55 mme ba taboga le tikologo yotlhe ba anamisa dikgang kaga kgorogo ya gagwe, ba simolola go rwalela balwetse kwa go ene ka mapara le ka meseme. 56 Gongwe le gongwe mo a neng a tsamaya teng, mo metsaneng le mo metseng e megolo, le kwa ntle kwa masimo, ba baya balwetse mo dipatlelong tsa marekete le mo ditselelong ba mo rapela gore a ba letle ba ame makantsa a diaparo tsa gagwe; mme botlhe ba ba mo amileng ba fodisiwa.

7 Ka letsatsi lengwe baeteledipele bangwe ba tumelo ya Sejuta ba tla kwa go ene ba tswa kwa Jerusalema go tla go mo tlhothomisa, 2 ba lemoga gore bangwe ba barutwa ba gagwe ga ba diragatsa mekgwa ya bone e e tlwaelesegileng ya Sejuta pele ga ba a ja. 3 Gonno Bajuta, segolo jang Bafarasai, ga ba ka ke ba a ja pele ga ba tlhapa diatla tsa bone go fitlha mo dikgonong, jaaka go thokafala ka dingwao tsa bone tsa bogologolo. 4 Jalo fa ba tla gae ba tswa marekelong ba tshwanetse go tlhapa ka mokgwa oo pele ga ba ka ama dijo. Se ke sengwe sa dikai tse dintsi tsa melao e e tlwaelesegileng e ba saleng ba e ngaparela ka dingwaga di le dintsi e sa ntse e tswaletse e dirisiwa, fela jaaka tlwaelo ya bone ya go thatswa dipitsa le senwelo le dijana tse di jelang. 5 Hong baeteledipele ba tumelo ba mmotsa ba re, "Ke ka nthlha yang fa barutwa ba gago ba sa latele ngwao ya rona ya bogologolo? Gonno ba ja pele ga ba tlhapa." 6 Mme Jesu a araba a re, "Baitemokanyi ke lona! Isaia moporofiti o lo bonye sentle fa a re, 'Batho ba ba bua sentle ka ga Morena mme ba sa mo rate ka boammaaruri. Kobamelo ya bone ke ya dinyana, gonno ba re Modimo o laola batho go obamela melao ya bone! Ruri Isaia o ne a lo boammaaruri jang!' 8 Gonno lo ithokomolosa melao ya Modimo e e tlhomameng mme mo boemong jwa moo lo tshgeditse ngwao ya lona fela. 9 Ga re lo a tle lo gane melao ya Modimo fela lo bo lo e gataka ka dinao gore lo tle lo tshgetse ngwao ya lona. 10 Fela jaaka Moshe a lo neile molao o o tswang kwa Modimong; o o reng, 'Tlotla rrago le mmago!' Mme a re le fa e le mang yo o buang bosula ka ga rraagwe kgotsa mmaagwe o tshwanetse go swa. 11 Mme lwa re go siame fa motho a ithokomolosa batsadi ba gagwe ba ba tlhokang, a ba raya a re, 'Lo intshwarele, ba nkake ka lo thusa! Gonno se ke neng ke tlaa se lo naya ke se ntsheditse Modimo.' 12 Jalo lo roba molao wa Modimo go diragatsa ngwao ya lona e e dirilweng ke batho. Mme se ke sekai se le sengwe fela. Go na le tse dingwe di le dintsi thata." 14 Hong Jesu a bitsa bontsintsi jwa batho go tla go reetsa: A re, "A mongwe le mongwe wa lona a reetse, lo bo lo leke go tlhologanya. 15 Mewa ya lona ga e senngwe ke se lo se jang, mme e senngwa ke se lo se akanyang le se lo se buang!" 17 Hong a tsena mo tlung go tswa fa bontsing jwa batho, mme barutwa ba gagwe ba mmotsa gore o rayang ka se a neng a se bolela. 18 Mme a ba botsa a re, "A le lona ga lo tlhologanye? A ga lo bone gore se lo se jang ga se kake sa senya mewa ya lona? 19 Gonno dijo ga di amane ka gope le pelo ya gago, mme di feta fela ka mometso di ye kwa

di silwang teng," (go bua se o ne a supa fa mofuta mongwe le mongwe o na le go ka jewa.) 20 Mme a nna a tswelela a re, "Ke dikakanyo fela tse di bosula tse di itshekololang. 21 Gonno go tswa mo dipeleng tsa batho, go tswa dikakanyo tse di bosula, tsa dikeletso, bogodu, go bolaya, boaka, 22 go batla tse e leng tsa ba bangwe, boikepo, tsietso, maaka, diithato, bopelompe, mabela le dilo tsoitlhe tsa boelelele. 23 Mme dilo tse tsoitlhe tse di bosula di tswa mo teng; ke tsone tse di go itshekololang gore o seka wa itekanela mo Modimong." 24 Mme a tswa a tloga mo Galalea a tsamaya a ya kwa kgaolong ya Ture le Sidona, mme a leka go go dira sephiri sa gore o ne a le teng koo, mme ga seka ga diragala. Gonno jaaka gale, dikgang tsa kgorogo ya gagwe di ne tsa anama ka bofefo. 25 Ka bonako ga tla mosadi kwa go ene yo ngwana wa gagwe o neng a na le mowa o o maswe, a utlwaletse kaga Jesu mme a tla a wela fa dinaong tsa gagwe, 26 mme a mo rapela gore a golole ngwana wa gagwe mo thateng ya taolo ya mowa o o maswe. (Mme a bo a le modichaba wa Se-Siria le Se-Fonishia yo o nyaditsweng!) 27 Mme Jesu a mo raya a re, "Pele ke tshwanetse go thusa bagaetsho Bajuta. Ga go a siama go tsaya dijo tsa bana o di latlhelela dintsa." 28 Hong mosadi a araba a re, "Go boammaaruri, Morena, le tsone dintwanyana kafa tlase ga lomati lwa bojelo di newa mafofora a a wang mo dijaneng tsa bana." 29 Mme a mo raya a re, "Go siame! O arabile sentle mo eleng gore ke fodisitse ngwana wa gago wa mosetsana. Tsamaya o ye gae, gonno mowa o o maswe o dule mo go ene!" 30 Mme e rile fa a tsena kwa gae, ngwana wa gagwe a bo a robetse ka tidimalo e kgolo mo bolaong, mme mowa o o maswe wa bo o tsamaile. 31 Mme go tswa kwa Ture a tsamaya a ya Sidona, a boela kwa lewatlong la Galalea ka tsela ya metse e le lesome. 32 Ga tsiiswa kwa go ene monna yo o neng a sa utlwe e le susu a bile a kwakwaetsa, mme botlhe ba kopa Jesu gore a beye diatla tsa gagwe mo monneng yoo go mo fodisa. 33 Jesu a mo ntsha mo bontsing jwa batho a tsenya menwana ya gagwe mo ditsebeng tsa gagwe, a kgwa mathe a ama loleme lwa monna yoo. 34 Hong a leba kwa legodimong, a fegelwa mme a laola gore a "Kabologe!" 35 Ka bonako monna a simolola go utlwa sentle le go bua sentle ka tlhamalalo! 36 Mme Jesu a raya bontsi jwa batho a re ba seka ba bolelela ope, mme le fa a na a ba iditse jalo, bone ba ya ba bolela bogolo segolo. 37 Gonno ba ne ba gkgametsa ka se se diragatseng. Gangwe le gape ba re, "Sengwe le sengwe se o se dirang ke se se gkgamatsang; o kgona gore ba ba susu ba utlwe le ba ba kwakwaetsang ba bue!"

8 Ka letsatsi lengwe jaaka bontsi bo phuthega, batho ba felelwa ke dijo gape, Jesu a bitsa barutwa ba gagwe go tla go bua ka seemo seo. A re, "Ke utlwela batho ba bothoko, gonno ga ba bolo go nna fano malatsi a le mararo, mme ga ba a salelwa ke sepe go se ja. 3 Mme fa ke ba phatlalaletsa kwa magaeng a bone ke sa ba fa dijo ba tlaa idibalela mo tseleng! Gonno bangwe ba bone ba tswa kgakala." 4 Mme ba mo fetola ka tshotlo ba re, "A re tshwanetse go ba senkela dijo fano mo sekakeng?" 5 A botsa a re, "Lo na le dingwe di le kae?" Mme bone ba re, "Di supa". 6 Hong a raya bontsi jwa batho a re bo

nne fa fatshe. Mme a tsaya dinkgwe di supa, a di lebogela, a di ngathoganya dikapetlana a di fetisetsa kwa barutweng, mme barutwa ba di abela batho. 7 Mme ba bo ba na le ditlhatswana di se kae, hong Jesu a di segofatsa a raya barutwa a re ba fe batho. 8 Hong bontsi jwa batho jwa a ja jotlhe go fithelela bo kgora, mme morago ga moo a ba phatlalaletsa kwa magaeng a bone. Go ne go na le batho ba ka nna dikete tse nne ka letsatsi leo. Mme ya re masalela a sena go kokoanngwa morago ga dijo ga sala diroto di supa tse di tona di tletse! 10 Ka bonako morago ga moo a tsena mo mokorong le barutwa ba gagwe a ya kwa kgaolong ya Dalemanutha. 11 E rile baeteledipele ba Sejuta ba kgaolo eo ba utlwa gore o gorigile ba tla go tatalalana nae ba re, "Re direle kgakgamatso, dira gore sengwe se diragale mo loaping. Ke gone re tlaa dumelang mo go wena." 12 Mme a utlwa bothoko fa a utlwa kafa ba buang ka teng mme a re, "Nnyaa bathong. Lo ntse lo batla dikgakgamatso dife?" 13 Hong a boela mo mokorong a ba tlogela, a tshelela ka kwa ntheng e nngwe ya lecha. 14 Mme barutwa ba bo ba lebetse go tsaya dijo pele ga ba tsamaya, mme ba ne ba na le senkgwe se le sengwe fela mo mokorong. 15 Ya re ba kgabaganya, Jesu a ba thagisa ka lhoafalo a re, "Tlhokomeleng mo sebidisong sa ga Kgosi Herode le mo sebidisong sa Bafarasai." 16 Mme barutwa ba botsanya ba re, "O rayang?" Ya re kwa bofelong ba akanya gore o tshwanetse a ba a bua ka go lebalala ga bone go tla le senkgwe. 17 Jesu a lemoga se ba neng ba se bua mme a re, "Nnyaa, ga go a nna jalo gothelele! A ga lo tlhologanye? A dipelo tsa lona di thata go ka lemoga? 18 Fela jaaka Isaia a boletse, 'Matlho a lona ke a go re lo bone ka one--ke ka nthla yang fa lo sa lebe? Ke ka nthla yang fa lo sa bule ditsebe tsa lona mme lwa reetsa' A ga lo gakologelwe sepe gothelele? 19 "Lwa reng ka batho ba ba dikete tse tlhano ba ke neng ka ba fepha ka dinkgwe tse tlhano? Go ne go na le diroto di le kae tse di neng di tletse masalela ba sena go ja?" Ba re, "Lesome le bobedi." 20 "Mme e rile fa ke abela batho ba le dikete di le nne dinkgwe di supa, go ne ga sala di le kae?" Ba re, "Go ne ga sala diroto tse di tletseng di supa." 21 "Mme a lo gopola gore ke a tshwenyega fa go sena senkgwe?" 22 Ya re ba fitlha mo Bethesaida, batho bangwe ba tlisa kwa go ene monna yo o fofutseng mme ba mo kopa gore a mo ame gore a fole. 23 Jesu a tshwara monna yo o fofutseng ka letsogo a mo gogela kwa ntle ga motse, a mo kgwela mathe mo matlhong a bo a mmaya diatla. Jesu a mmotsa a re, "A o bona sengwe jaanong?" 24 Mme monna a leba mo tikologong a re, "Ee, ke bona batho. Mme ga ke ba bone sentle; ba lebege e ka re ke dithito tsa dithhare di a tsamaya?" 25 Hong Jesu a mmaya gape diatla mo matlhong mme ya re a leba, a boelwa ke pono ya gagwe gothelele, mme a bona sengwe le sengwe sentle, se se neng se le mo tikologong ya gagwe. 26 Jesu a mo romela kwa gae kwa go ba ntlo ya gagwe. A mo raya a re, "O seka wa ya mo motseng pele." 27 Jesu le barutwa ba gagwe ba tswa mo Galalea ba tswela kwa ntle kwa metseng ya Kaesarea Filipino. Mme ya re ba ntse ba tsamaya a ba botsa a re, "Ana batho ba re ke mang? Ba reng ka ga me?" 28 Barutwa ba araba ba re, "Bangwe ba bone ba gopola gore o Johane wa Mokolobetsi, mme bangwe ba re o Elija kgotsa o mongwe wa baporofiti ba

bogologolo o rudile." 29 Hong a ba botsa a re, "Mme lona lo gopola gore ke mang?" Peterere a araba a re, "O Mesia." 30 Hong Jesu a ba laya gore ba se bolelele ope! 31 A simolola go ba bolelela ka matshwenyego a a boitshegang a o tlaa a bogang le gore o tlaa ganwa ke baeteledipele le bagolwane ba baperesiti le bangwe baeteledipele ba Sejuta, le gore o tlaa bolawa, mme morago ga malatsi a le mararo o tlaa tsoga gape. 32 Mme o ne a bua le bone ka tlhamalalo, hong Peterere a mo tseela kwa thoko a ya go mo kgalemela a re, "O seka wa bua dilo tse di ntseng jalo." 33 Hong Jesu a retologa a leba barutwa ba gagwe a gakalela Peterere a re, "Satane, tloga fa morago ga me! O leba dilo tse ka tebo ya senama fela, e seng kafa ntheng ya bo-Modimo." 34 Hong a bitsa barutwa ba gagwe le bontsi jwa batho go tla go mo reetsa, a ba raya a re, "Fa mongwe wa lona a rata go nna molatedi wa me, o tshwanetse go beela mahumo a gagwe fa thoko a itshikarele mokgoro, mme a ntshale morago. 35 Fa lo tswelsetse go boloka botshelo jwa lona, bo tlaa lo latlhegela. Fela ba ba latlhegelwang ke matshelo a bone ka nthla ya me le ka nthla ya Mafoko a a Molemo, ba tlaa itse gore tota botshelo bo rayang. 36 "Mme motho o boelwa ke eng fa a fenyela lefatsheng lotlhe mme a lathegelwa ke botshelo jwa gagwe? 37 Gonne a go na le sengwe sa bothokwa go gaisa mowa wa gagwe? 38 Le, fa e le mang yo o nthabelwang ke dithlong le molaetsa wa me mo malatsing ano a go tlhoka go dumela le a boleo, Nna Mesia, ke tlaa mo thabelwa ke dithlong fa ke boa ke le mo kgalalelong ya ga Rre, le baengele ba ba boitshepo."

9 Jesu a tswelela a raya barutwa ba gagwe a re, "Bangwe ba lona ba ba emeng fa, gompieno ba tlaa tshela go bona Bogosi jwa Modimo bo tla ka nonofo e kgolo!" 2 Malatsi a le marataro a sena go feta Jesu a tsaya Peterere, Jakobe le Johane, a tlathlogela kwa godimo ga thaba. Go ne go sena ope teng. Ka bofefo sefatlhogo sa gagwe sa simolola go phatshima ka kgalalelo, 3 mme diaparo tsa gagwe tsa tsabakela, tsa nna ditshweu thata, di galalela thata go gaisa jaaka motho ope mo lefatshing a ka di sweufatsa. 4 Hong Elija le Moshe ba bonala mme ba simolola go bua le Jesu! 5 Mme Peterere a bua a re, "Moruti, go go ntle jang!" Re tlaa aga metlaagana e le meraro fa, mongwe le mongwe wa lona a na le wa gagwe. 6 O ne a bua se fela, gonne o ne a sa itse se a ka se buang ka bothe ba ne ba tshogile. 7 Mme erile fa a sa ntse a tswelsetse ka go bua mafoko a, leru la ba khurumetsa, la sira letsatsi, mme lentswe la tswa mo lerung la re, "Yo ke morwaake. Reetsang ene." 8 Mme ka tshoganyetso fa ba leba kafa le kafa, Moshe le Elija ba bo ba seyo, mme ya bo e le Jesu fela yo o nang nabo. 9 Ya re ba fologa mo thabeng a ba raya are ba seka ba bolelelele ope kaga se ba se boneng go fithelele a sena go tsoga mo baswing. 10 Mme ba ipolokela kgang e, ba nna ba bua ka ga yone, gore o kane a raya eng "Ka go tsoga mo baswing." 11 Hong ba simolola go mmotsa kaga sengwe se baeteledipele ba tumelo ya Sejuta ba tlaaetseng go se bua, ba re Elija o tshwanetse go tla (pele ga Mesia a ka tla). 12 Mme Jesu a dumela gore Elija o tshwanetse go tla pele go baakanya tsela, le fa go ntse jalo go setse go diragetse, o setse a tsile! Le gore o kopane le matshwenyego a a boitshegang, fela jaaka Baporofiti ba ne ba boletse. Hong Jesu a ba botsa gore baporofiti ba ka

ne ba ne ba raya eng fa ba re, Mesia o tlaa boga a ba a tswa ka lonyatso. **14** Mme ya re ba goroga kwa tlase ga thaba, ba fitlhela bontsi jo bogolo jwa batho bo dikaganyeditse barutwa ba bangwe ba ba ferang bongwe, fa bangwe ba baeteledipele ba Sejuta ba ntse ba ganetsanya nabo. **15** Mme bontsi jwa batho ba leba Jesu ka poifo fa a atamela kwa go bone, hong ba tabogela kwa go ene go mo dumedisa. **16** Mme a ba botsa a re, "Lo ganetsanya kaga eng?" **17** Monna mongwe mo bontsing joo a bua a re, "Moruti, ke lerile morwaake mo go wena gore o mo fodise--ga a kgone go bua ka nthla ya gore o tswenwe ke mowa o o maswe. **18** Mme fa mowa o o maswe o mo laola o mo digela fa fatshe o mo dira gore a phoke mafulo ka molomo a phuranye meno a kwatlalale. Mme ka kopa barutwa ba gago gore ba kgoromeletse ntle mowa o o maswe mme ba retelelwa." **19** Jesu a raya barutwa ba gagwe a re, "Ao, a batho ba ba tumelo e potlana, ke tshwanetse go nna le lona lobaka lo lo kae mme lo sa dumele? Ke lobaka lo lo kae lo ke tshwanetseng go lo itshokela? Lereng mosimane kwa go nna." **20** Hong ba lere mosimane, mme erile fa a bona Jesu, mowa o o maswe wa mo kgothakgotha mo go bothoko, mme a wela fa fatshe a bidikama a phoka mafulo ka molomo. **21** Jesu a botsa rraagwe a re, "Go lobaka lo lo kae a ntse jaana?" Rraagwe a araba a re, "a le mmotlana, **22** mme gantsi mowa o o maswe o dira gore a wele mo molelong kgotsa mo teng ga metsi go mmolaya. Ao, re utiwele bothoko, o dire sengwe fa go kgonega." **23** Jesu a botsa a re, "A wa re fa ke kgona? Sengwe le sengwe se a kgonega fa o na le tumelo." **24** Ka bofefo rraagwe a araba a re, "Ke na le tumelo; Nthusa o e nkokeletse." **25** Erile fa Jesu a bona gore bontsi jwa batho bo a gola, a kgalemela mowa o o maswe. A raya mowa o o maswe o o semumu le bosusu, a re, "Ke a go laola gore o tswa mo ngwaneng yo, o seka wa tlhola o tsena mo go ene gape!" **26** Hong mowa o o maswe wa goa mo go boitshegang wa kgothakgotha mosimanyana gape mme wa mo tlogela; a robala a sa tshikinyege a bonala jaaka moswi. Modumonyana wa utlwala mo bathung o re, "O sule." **27** Jesu a mo tshwara ka seatla a mo thusa gore a eme ka maoto, mme a ema a itekanetse! **28** Ya re morago ga moo Jesu a le esi mo tlung le barutwa ba gagwe, ba mmoetsa ba re, "Ke ka nthla yang fa re ne re sa kgone go kgoromeletsa ntle mowa o o maswe?" **29** Jesu a araba a re, "Mofuta o o ntseng jaana o kgonwa ke thapelo fela." **30** Ya re ba tloga mo kgaolong eo ba tsamaya ba ralala Galalea mo a neng a leka go tla batho gore a tle a nne le nako ya go nna le barutwa ba gagwe, go ba ruta. O ne a ba raya a re, "Nna, Mesia ke tla okiwa, ke bolawe mme morago ga malatsi a le mararo ke tlaa rula." **32** Lefa go ntse jalo, ba bo ba sa tlhologanye, mme ba tshaba go mmoetsa gore o rayang. **33** Mme ba goroga kwa Kaperanama. Ya re ba sena go nna fa fatshe mo tlung e ba neng ba tshwanetse go nna mo go yone a ba botsa a re, "Lo ne lo bua ka ga eng mo tseleng." **34** Mme ba tlhajwa ke diithong go araba, gonne ba ne ba ganetsanya ka gore e mang mo go bone yo mogolo! **35** A nna fa fatshe a ba bitsa a ba raya a re, "Mongwe yo o batlang go nna yo mogolo o tshwanetse go nna wa bofelo, mothanka wa bothle!" **36** Hong a baya ngwana mo gare ga bone; mme e rile a tsaya ngwana ka mabogo a gagwe a ba raya a re, **37** "Le fa e le

mang yo o amogelang ngwana yo monnye jaana mo leineng la me o amogela nna, mme le fa e le mang yo o mo amogelang o amogela Rre yo o nthomileng!" **38** Mme mongwe wa barutwa ba gagwe, ebong Johane, ya re ka letsatsi lengwe a mo raya a re, "Moruti, re bone monna mongwe a dirisa leina la gago go kgoromeletsa mewa e e maswe kwa ntle; mme ra mo raya ra re a se ka a dira jalo, gonne ga se mongwe wa sethopho sa rona." **39** Jesu a ba raya a re, "Se mo itseng! gonne ga go ope yo o dirang dikgakgamatso ka leina la me yo o tla reng ka bofefo a nne kgatthanong le nna. **40** Lefa e le mang yo o seng kgatthanong le rona ke wa rona. **41** Fa mongwe a ka lo siela metse ka nthla ya gore lo ba ga Keresete ka re ammaaruri ga a kitla a latlhegelwa ke tuelo ya gagwe. **42** Mme fa mongwe a ka dira gore mongwe wa ba ba botlana ba yo o dumelang mo go nna a latlhegelwe ke tumelo--go ka nna botoka fa motho yoo a ka hunelelwa lolwala lo lo golo mo thamong a ya go thabuediwa mo lewatlang. **43** "Fa seatla sa gago se leofa, se kgaole. Go botoka go tshelela ruri ka seatla se le sengwe go na le go latlhelwa mo molelong wa molete o o sa timeng ka diatla tse pedi! (Geenna g1067) **45** Fa lonao lwa gago lo go isa bosuleng lo kgaole! Go botoka go nna setlhotsa lobaka lo loleele, go na le go nna le dinao tse pedi tse di go isang moleting. (Geenna g1067) **47** "Mme fa leitlho la gago le go leofisa, le gonye. Go botoka go tsena mo Bogosingjwa Modimo o le mogapa, go na le go tsena ka matlho a mabedi mo moleting wa molelo, (Geenna g1067) **48** kwa seboko se sa sweng, le kwa molelo o sa timeng, **49** kwa tsothe di lokwang ka molelo. **50** "Letswai le le molemo, ga le na thuso fa le latlhegelwa ke molodi, ga le ka ke la loka sepe. Se latlhegelweng ke molodi wa lona! Nnang kagiso mo go ba bangwe."

10 Erile a tloga mo Kaperanama a ya ntheng ya Borwa kwa meletwaneng ya Judea le mo kgaolong ya bothhabatsatsi jwa Noka ya Jorodane. Fela jaaka gale ga bo go le matshuitshuti a batho mme a ba ruta. **2** Bangwe ba Bafarasai ba tla kwa go ene ba mmoetsa ba re, "A o letlelela tlhalo?" le fa go ntse jalo ba ne ba leka go mo lalela. **3** Jesu a ba botsa a re, "Moshe o ne a reng ka ga tlhalo?" **4** Ba araba ba re, "O rile e siame." O rile, "Se se tlhokafalang ke gore monna a kwalele mosadi lokwalo lwa tlhalo." **5** Jesu a ba botsa a re, "Mme o ne a buelang jalo? Ke tla lo bolelela gore ke ka nthla yang fa a ne a bua jalo. Ke ka nthla ya boikepo jwa bopeloethata jwa lona. **6** Mme tota ga se ka fa tseleng ya Modimo, gonne e rile mo tshimologong O dirile monna le mosadi go ba kopanya go nnela ruri mo nyalong; ke gone ka moo monna o tlaa tlogelang rraagwe le mmaagwe, **8** mme ene le mosadi wa gagwe ba kopane gore ba se nne bobedi, fa e se bongwe fela. **9** Mme ke gone go seng ope yo o tshwanetseng go kgaoganya se Modimo o se kopantseng." **10** Ya re morago, a le nosi le barutwa ba gagwe mo tlung, ba lere ngang eo. **11** Mme a ba raya a re, "Fa monna a tlhala mosadi wa gagwe a nyala o sele, o a mo akafalela. **12** Mme fa mosadi a tlhala monna wa gagwe a nyalwa gape, le ene o dira boaka." **13** E rile ka nako nngwe fa bomma-bana ba lere bana ba bone kwa go Jesu gore a ba segofatse, barutwa ba ba leleka, ba ba raya ba re ba seka ba mo tshwenya. **14** Mme e rile

Jesu a bona se se diragalang o ne a seka a itumediwa ke barutwa ba gagwe mme a ba raya a re, "Lesang bana ba tle kwa go nna, gonne Bogosi jwa Modimo ke jwa ba ba ntseng jalo. Se ba lelekeng! 15 Ke lo bolelela ka tlhoafalo jaaka ke itse gore fa mongwe a gana go tla mo Modimong jaaka ngwana yo monnye ga a kitla a letlelelwa go tsena mo Bogosing jwa One." 16 Hong a tsaya bana ka mabogo a gagwe a ba baya diatla a ba segofatsa. 17 E rile fa a simolola go tsaya loeto, monna mongwe a tla a tabogela kwa go ene a khubama ka mangole a re, "Moruti yo o molemo, ke tshwanetse gore ke direng go tsena kwa legodimong?" (aiōnios g166) 18 Jesu a mmotsa a re, "Ke ka ntlha yang fa o mpitsa mosiami? 19 Mme mo karabong ya potso ya gago o itse ditaolo tse di reng, o seka wa bolaya, o seka wa dira boaka, o seka wa utswa, o seka wa bua maaka, o seka wa tsietsa, tlotla rrango le mmago." 20 Monna a araba a re, "Moruti, ga ke ise ke ko ke tlole le fa e le o le mongwe fela wa melao eo." 21 Mme Jesu a ikutlwa a rata monna yo fa a mo leba, a mo raya a re, "O tlhoka selo se le sengwe fela, tsamaya o ye go rekisa dilo tsothe tse o nang natso mme o tseye madi o a abele bahumanegi mme o tlaa nna le khumo kwa legodimong, mme o tle o ntshale morago." 22 Mme sefathogo sa monna sa sulafala, a tsamaya ka kutlobothoko, gonne o ne a humile thata. 23 Jesu a mo lebelela a tsamaya, hong a retologa a raya barutwa ba gagwe a re, "Ga go motlhofo gore mohumi a tsene mo Bogosing jwa Modimo!" 24 Mme mafoko a, a ba gakgamatsa. Hong Jesu a boelela mafoko a gape a re, "Bana ba ba rategang, go thata jang mo go ba ba ikantseng dikhumo go tsena mo Bogosing jwa Modimo. 25 Go mothofo mo kammelang go tsena ka leroba la nna! go na le mohumi go tsena mo Bogosing jwa Modimo." 26 Mme go ne ga nna thata, gore barutwa ba dumele mafoko ao. Hong ba botsa ba re, "Mme he, e be e le mang mo lefatsheng yo o ka bolokwang fa mohumi a sa bolokwe?" 27 Jesu a ba tsepega matlho a re, "Kwa ntle ga Modimo go retetse. Mme mo Modimong sengwe le sengwe se a direga." 28 Hong Petera a simolola go bolela kaga tsothe tse ene le barutwa ba bangwe ba di tlogetseng a re, "Re tlogetse sengwe le sengwe go go sala morago." 29 Mme Jesu a araba a re, "Mma ke go thomamisetse gore ga go na ope yo o tlogetseng sepe, ebong legae, bokgaisadie, bomorwa rraagwe, mmaagwe, rraagwe, bana kgotsa dithoto tsa gagwe, ka ntlha ya go nthata le go bolelela ba bangwe kaga mafoko a me a a Molemo, 30 yo o se kitlang a newa ga legolo go menagane, ebong magae, bomorwa rraagwe, bokgaisadie, le bo mmaagwe, bana le masimo di na le dipogisego! Tse tsothe e tlaa nna tsa gagwe mo lefatsheng leno le mo go le le tlang o tlaa bona botshelo jo bo sa khutleng. (aiōn g165, aiōnios g166) 31 Bontsi jwa batho ba ba bonalang e ka re ba tlhokwa jaanong jaana ba tlaa nna ba ba botlana ka nako eo, mme ba bantsi ba ba bonalang ba le ba botlana fano ba tlaa nna bagolo ka nako eo." 32 Mme ya re ba le mo tseleng ba ya Jerusalema, Jesu a ba eteletse pele barutwa ba gagwe ba mo setse morago ba tlelwa ke poifo. Hong Jesu a ba tseela kwa thoko, a simolola gape go ba tlhalosetsa gotlhe mo go tlaa mo diragalelang fa ba goroga kwa Jerusalema. 33 A ba raya a re, "E tlaa re re tsena teng. Nna, Mesia ke tlaa tshwarwa ke iswi fa pele ga baperesiti

ba bagolo le bagolwane ba Bajuta ba ba tlaa nkatlholelang loso ba bo ba neele Baroma go mpolaya. 34 Ba tlaa ntshotla, ba nkgwele mathe ba mpetse ka dithupa tsa bone; mme morago ga malatsi a mararo ke tlaa rula." 35 Hong Jakobe le Johane, bomorwa Sebede, ba tla ba bua le ene ka lentswe le le kwa tlase ba re, "Morena, re batla gore o re direle ka fa re batlang ka teng." 36 Mme a ba botsa a re, "Lo batla ke lo direla eng?" 37 Ba mo raya ba re, "Re batla go nna mo ditlong tsa bogosi re bapa nao mo bogosing jwa gago, yo mongwe ka fa letsogong la gago le legolo yo mongwe ka fa letsogong la gago la molema!" 38 Mme Jesu a araba a re, "Ga lo itse se lo se lopang! A lo nonofile go nwa mo senwelong se se bothoko sa khutsafalo se ke tshwanetseng go nwa mo go sone? Kgotsa go kolobediwa ka kolobetso ya pogisego e ke tshwanetseng go kolobediwa ka yone?" 39 Ba mo raya ba re, "Ee, re nonofile!" Mme Jesu a re, "Lo tlaa nwa mo senwelong se ke nwang mo go sone lo bo lo kolobediwa ka kolobetso ya me e ke kolobeditsweng ka yone, 40 mme ga ke na thata ya go lo baya mo ditlong tsa bogosi go bapa le sa me. Ba ba tshwanetseng ba setse ba go baakanyeditse." 41 Fa ba bangwe ba barutwa ba tla go lemoga se Jakobe le Johane ba se lopieng, ba kgotsa thata. 42 Hong Jesu a ba biletsa kwa go ene mme a re, "Lo a itse fa dikgosi le banna ba bagolo ba lefatshe ba laola batho; 43 mme mo go lona go pharologanyo. Le fa e le mang yo o ratang go nna mogolo mo go lona o tshwanetse go nna motlhanaka wa lona. 44 Mme le fa e le mang yo o ratang go ka nna mogolo mo go botlhe o tshwanetse go nna motlhanaka wa botlhe. 45 Gonne le nna tota, Mesia, ga ke fano go tla go direlwa fa e se go thusa ba bangwe, le go ntsha botshelo jwa me gore e nne thekololo ya batho ba le bantsi." 46 Mme ba fitlha kwa Jeriko. Ya re morago fa ba tloga mo motseng bontsi jwa batho jo bogolo jwa ba sala morago. Hong ga diragala gore monna wa sefoku wa mokopi yo o bidiwang Baratimaio (morwa Timaiō) a ba a ntse fa thoko ga tsela fa Jesu a feta. 47 Mme e rile fa Baratimaio a utlwa gore Jesu wa Nasaretha o gauifi a simolola go goa, a re, "Jesu Morwa Dafide, nkuhlwela bothoko!" 48 Mme batho bangwe ba mo kgalemela ba re, "Didimala!" Mme a goa segolo bogolo gangwe le gape a re, "Ao! Morwa Dafide, nkuhlwela bothoko!" 49 Erile Jesu a mo utlwa a ema foo mo tseleng, mme a re, "Mo reyeng lo re a tle kwano." Mme ba bitsa monna wa sefoku. Ba re, "Heela wena yo o lethogonolo, tla Jesu o a go bitsa." 50 Hong Baratimaio a apola seaparo sa gagwe se segologolo a se latlhela kwa thoko, a tlola a tla kwa go Jesu. 51 Jesu a mmotsa a re, "O batla ke go direla eng?" Monna wa sefoku a araba a re, "Moruti, ke batla go bona." 52 Jesu a mo raya a re, "Gotlhe go siame, go diragetse. Tumelo ya gago e go fodisitse." E rile gone fela foo monna wa sefoku a bona, a sala Jesu morago mo tseleng!

11 Mme erile ba atamela Bethefage le Bethania ntheng ya Jerusalema ba tla mo thoteng ya Lotlhwane, Jesu a romela barutwa ba gagwe ba babedi kwa pele. 2 A ba raya a re, "Yang mo motsing ole, mme e tlaa re fela fa lo tsena lo tlaa bona tonkana e golegilwe e e iseng e ke e palangwe, e gololeng lo e lere kwano. 3 Mme e re fa mongwe a lo botsa gore lo dirang, lo

re, 'Morena wa rona o a e batla mme o tlaa e busa ka bonako.'" 4 Hong banna ba babedi bao ba tsamaya ba fitlhela tonkana eo?" 6 Hong ba bua se Jesu a se ba boleletseng mme batho ba ba letla. 7 Hong tonkana ya isiwa kwa go Jesu, barutwa ba baya diaparo mo mokwatlang wa yone gore Jesu a nne mo go tsone. 8 Hong ba le bantsi mo matshuitshuting ba ala diaparo tsa bone mo tseleng fa pele ga ga Jesu, fa ba bangwe ba latlhela dikala tsa dithare tse ba tswang go di rema kwa nageng. 9 O ne a le fa gare ga dipopelelo, go na le boidiidi kwa pele le kwa morago, ba goa ba re, "Tshela ka bolelele Kgosi! Go sego yoo tlang ka leina la Morena! 10 Go sego bogosi jo o bo lereng, Bogosi jwa ga Dafide rraetsho! Modimo boloka kgosi!" 11 Mme hong a tsena mo Jerusalema a ya mo Tempeleng. Mme ya re a sena go leba dilo tsothle, ka kelothoko, a tswa a tsamaya, gonne go ne go setse go le maitseboa, a ya Bethania le barutwa ba gagwe ba ba lesome le bobedi. 12 E rile moso o o latelang fa ba tloga mo Bethania, a tshwarwa ke tlaa. 13 Ya re kgakalanyana fa thoko ga tsela a bona setlhare sa mofeige se le mathlare a matala, hong a tsamaya a ya go bona gore a ga a kake a bona loungo mo go sone. Le fa go ntse jalo ga bo go se na sepe, e le mathlare fela, gonne e ne e ise e nne lobaka lwa maungo. 14 Hong Jesu a raya setlhare a re, "Ga o kitla o tihola o unywa gape!" Mme barutwa ba mo utlwa fa a bua jalo. (aiōn g165) 15 Mme e rile fa ba goroga mo Jerusalema a tsena mo Tempeleng a simolola go kgoromeletsa kwa ntle ba ba rekisang le ba ba rekang, a pitikolola ditafole tsa ba ba ananyang madi le maobo a ba ba rekisang maphoi, 16 a kganela botlhe ba ba neng ba lere dilwana tsa thekiso. 17 A ba raya a re, "Go kwadilwe mo dikwalong gore, 'Ntlo ya me ya thapelo e tshwanetse go nna bonno jo dichaba tsothle di rapelelang mo go jone;' mme lo setse lo e fetotse mongobo wa dinokwane." 18 Hong e rile baperesiti ba bagolo le baeteledipele ba Sejuta ba utlwa se o se dirileng ba simolola go loga maano a gore ba ka mmolaya jang. Mathata a bone e ne e le go boifa gore go tlaa tsoga mokubukubu gonne batho ba ne ba kgathegela thuto ya ga Jesu thata. 19 Mo maitseboeng ao jaaka gale ba ne ba tloga mo motsing. 20 Letsatsi le le latelang, fa barutwa ba feta fa setlharing sa mofeige se o se hutsitseng, ba bona gore se omeletse go simologa kwa meding! 21 Hong Petere a gakologelwa se Jesu a neng a se raya setlhare maabane, mme a re "Bona, Moruti! setlhare sa mofeige se o se hutsitseng se omeletse!" 22 Mo karabong ya gagwe, Jesu a raya barutwa a re, "Fa lo na le tumelo mo Modimong, boammaaruri jo e leng jone ke jo, lo ka raya thaba ya Lothware lwa re, 'Manologa o wele mo teng ga lewatle', mme taolo ya lona e tlaa diragala. Se se tlhokegang fela ke gore lo dumele lo sa belaele! 24 Ntheetsang! Lo ka rapelela le fa e le eng, mme fa lo dumela, lo tlaa se amogela! 25 Mme fa lo rapela, pele itshwarelang ba lo nang le melato le bone gore Rraeno yo o kwa legodimong a lo itshwarele dibe le lona." 26 Ka nako e ba bo ba gorogile mo Jerusalema gape, mme ya re a tsamaya mo felong ga Tempele, baperesiti ba bagolo le ba bangwe ba baeteledipele ba Sejuta ba tla kwa go ene ba mo raya ba re, "Go diragalang fano? Ke mang yo o go neileng nonofo ya go lelekela babapatsi kwa ntle?" 29 Mme Jesu a ba araba a re, "Ke tla lo bolelela

fa lo ka araba potso e le nngwe fela! 30 Lwa reng ka Johane wa Mokolobetsi? A o ne a romilwe ke Modimo kgotsa nnyaa? Nkarabang!" 31 Mme ba buisanya ka ga potso eo ba re, "Fa re araba re re o romilwe ke Modimo, o tlaa re, 'Go siame, ke ka nthla yang lo ne lo sa mo dumele' 32 Mme fa re re Modimo o ne o sa mo roma, hong batho ba tlaa tsosa mokubukubu," (Gonne batho botlhe ba dumela fa Johane e ne e le moporofiti). 33 Hong ba re, "Ga re ka ke ra araba. Ga re itse." Mme Jesu a fetola a re, "Le nna ga nkitle ke araba potso ya lona!"

12 Tse ke ditshwantsho dingwe tsa dipolelo tse Jesu o kileng a di bolelela batho ka nako eo. Monna o kile a jala tshimo, mme a e agelela ka logora a ba a epa lehuri la go gamolela matute a moretswa, a aga ntlo ya molebeledi. Hong a naya balemi tshimo go e thapa ka tuelo, mme a ya kwa lefatshing le le kgakala. 2 Ka motlha wa thobo a romela mongwe wa badiri ba gagwe go tla go tsaya seabe sa gagwe sa thobo. 3 Mme balemi ba itaya morongwa ba mmusetse morago a sa tsaya sepe. 4 Mme mong wa tshimo a romela mongwe gape wa badiri ba gagwe, yo le ene o neng a itewa fela jalo, ba mo itaya go gaisa wa pele, gonne o ne a ntshitswe dintho tse di boitshegang mo tlhogong. 5 Monna yo mongwe yo o neng a mo romile o ne a bolawa; mme morago, ba bangwe ba ne ba itewa kgotsa ba bolawa, 6 go fitlhela go sala a le mongwe fela, ebong morwawe yo o tsetsweng a le esi. La bofelo a romela ene, a gopola gore ba tlaa mo tlotla. 7 "Mme e rile fa balemi ba mmona a tla ba re, 'Ke ene yo o tlaa tsayang tshimo fa rraagwe a a swa. Tlang re mmolayeng. Hong tshimo e tlaa nna ya rona!' 8 Hong ba mo tshwara ba mmolaya ba latlhela setopo sa gagwe kwa ntle ga tshimo. 9 "O akanya gore mong wa tshimo o tlaa dirang fa a utlwa ka se se diragetseng? O tlaa tla a ba bolaya botlhe, mme a neela ba bangwe tshimo eo. 10 A ga lo ga kologelwe gore lo badile temana mo dikwalong? e e reng, 'Lentswe le baagi ba neng ba le latha le ne la nna lentswe la kgokgotsho, lentswe le le tlotlegang thata mo kagong! 11 Se ke tiro ya Modimo e bile ke selo se se gakgamatsang go bonwa.'" 12 Baeteledipele ba Bajuta ba ne ba batla go mo tshwara teng foo, ka nthla ya go dirisa setshwantsho se, gonne ba ne ba itse gore o raya bone, e ne e le balemi ba ba bosula mo polelong ya gagwe. 13 Mme ba romela bangwe ba baeteledipele ba tumelo le ba dipolotiki go bua le ene le go leka go mo lala gore a tle a bue sengwe se ba ka lehang go mo tshwara ka sone. 14 Mme dithola tse tsa re, "Moruti, re itse gore o bolela boammaaruri le fa go ntse jang! Ga o thotholeliwe ke dikakanyo le dikeletso tsa batho, mme o ruta ditsela tsa Modimo sentle. Jaanong re bole lele, a go siame go duela lekgetho la Roma, kgotsa nnyaa?" 15 Jesu a bona leano la bone mme a re, "Ntshupegetsang ledi mme ke tlaa lo bolelela." 16 E rile fa ba le mo naya a re, "Setshwantsho se le mokwalo ke tsa ga mang?" Ba mo raya ba re, "Ke tsa ga Kaesara." 17 Mme Jesu a ba raya a re, "Go siame, fa e le gore ke tsa gagwe, mo neyeng ditsa gagwe. Mme tse eleng tsa Modimo di tshwanetse go newa Modimo!" Mme ba simolola go ingwaya dithogo ka nthla ya go palelwa ke karabo ya gagwe. 18 Hong Basadukai ba tla kwa go ene, e le sethopho sengwe sa banna se se reng ga go na tsogo ya baswi. Potso ya bone ke e:

19 “Moruti, Moshe o re neile molao gore fa motho a a swa a sena bana, a monnawe a tseye mosadi wa gagwe mme a nne le bana le ene mo leineng la ga mogolowe. 20 Go kile ga bo go le bomorwa motho ba supa mme yo mo tona a nyala, a swa a sena bana. Jalo monnawe a nyala motholagadi yoo mme le ene a akofa a swa a sena bana. Mme yo mongwe a mo nyala le ene a swa a sena bana ga tswelela jalo go fithelela ba a swa bothle. Mme le gona go ne go sena bana; morago ga moo mosadi le ene a swa. 23 “Se re batlang go se itse ke se—Mo tsogong ya baswi, e tlaa nna mosadi wa ga mang gonne e ne e le mosadi wa bone bothle?” 24 Jesu a araba a re, “Molato wa lona ke gore ga lo itse dikwalo, le fa e le nonofo ya Modimo. 25 Gonnye e tlaa re fa batho ba ba supang ba, le mosadi ba tsoga mo baswing, ba tlaa bo ba sa nyala mme ba tlaa bo ba tshwana le baengele. 26 “Mme kaga tsogo ya baswi a ga lo ise lo ke lo bale mo lokwalong lwa ga Ekesodo ka ga Moshe le setlhare se se tukang? Modimo o ne wa raya Moshe wa re, ‘Ke Modimo wa ga Aberahame, Isake le Jakobe.’ 27 “Modimo o ne o bolelela Moshe gore batho ba, le fa ba sule mo dingwageng tse di makgolokgolo tse di fetileng, ba ne ba sa ntse ba tshela, gonnye o ka bo o se ka wa re, ‘Ke Modimo wa ba ba seong!’ Lo dirile phoso e tona.” 28 Mme mongwe wa baruti ba tumelo yo o neng a eme foo a reeditse puisanyo ya bone a lemoga gore Jesu o arabile sentle. Hong a botsa a re, “Mo melaong yotlhe, ke ofe wa bothokwa?” 29 Jesu a araba a re, “Ke o o reng, ‘Utlwa wena Iseraele! Morena Modimo wa rona ke ene Modimo a le nosi. 30 Mme o tshwanetse go mo rata ka pelo yotlhe ya gago le ka mowa le ka thaloganyo le ka thata yotlhe ya gago.’ 31 “Wa bobedi wa re, ‘O tshwanetse go rata ba bangwe fela jaaka o ithata,’ ga go na melao epe e e fetang e.” 32 Mme Moruti wa tumelo a araba a re, “Morena o buile boammaaruri fa o re go na le Modimo o le mongwe fela mme ga go na ope gape. 33 Mme ke itse gore go thokega thata go mo rata ka pelo yotlhe ya me le ka kitso, le go rata ba bangwe jaaka ke ithata, go na le go ntsha mehuta yotlhe ya dithabelo mo aletareng ya Tempele.” 34 Mme e rile Jesu a lemoga thaloganya ga monna yo a re, “Ga o kgakala le Bogosi jwa Modimo.” Mme morago ga moo ga seka ga thola ga nna le ope yo o pelokgale go mmotsa dipotso. 35 Ya re morago Jesu a ntse a ruta batho mo tikologong ya Tempele, a ba botsa potso e: “Ke eng fa baruti ba tumelo ya lona ba re, Mesia o tshwanetse a bo a le wa lotso lwa ga Kgosi Dafide? 36 Dafide ka esi o buile ka Mowa o o Boitshepo a re, ‘Modimo o reile Morena wa me wa re, nna ka fa letsogong ja me je legolo, ke be ke tle ke dire baba ba gago sebeo sa dinao tsa gago.’ 37 E re ka Dafide a ne a mmitsa Morena wa gagwe, o ka nna morwawe jang?” (Kakanyo e ya itumedisa bontsintsi jwa batho, mme ba mo reetsa ka kgathego e kgolo thata.) 38 Dilo dingwe tse a di ba rutileng ka nako e ke tse: “Itlhokomeleng mo baruting ba tumelo! Gonnye ba rata go apara diaparo tsa bahumi le tsa barutegi, le gore batho bothle ba ba ikobele fa ba tsamaya mo marekisetong. 39 Ba rata go nna mo ditilong tse di kwa pele mo ditempeleng le manno a tlotlo mo medirong, 40 mme ga ba thabiwe ke dithong go tsietsa batholagadi mo matlung a bone, tota ba fitlha gore ke batho ba mekgwa e e ntseng jang, ba dira jaaka o ka re ba

obamela Modimo ka go rapela dithapelo tse di telele mo ponong ya batho. Ka ntsha ya go dira jalo katholo ya bone e tlaa nna e kgolo.” 41 Hong a ya fa letleng la madi a Tempele a nna fa fatshe a lebelela fa bontsi jwa batho bo ntse bo lathela madi. Bangwe ba ba neng ba humile ba ne ba lathela a magolo. 42 Hong ga tla mosadi wa motholagadi wa mohumanegi a tla a lathela dithebe di le pedi. 43 A biletsa barutwa ba gagwe kwa go ene a re, “Mohumanegi yole wa motholagadi o ntshitse mo go golo go feta gotlhe ga bahumi go kopantswe! Gonnye bone ba ntshitse mo go botlana, ga dikhumo tsa bone, fa ene a ntshitse thebe ya gagwe ya bofelo.”

13 Mme ya re a tswa mo Tempeleng ka letsatsi leo, mongwe wa barutwa ba gagwe a re, “Moruti, dikago tse di dintle jang! Bona mekgabisa ya maje a a mo lokotswaneng jaaka e ntse.” 2 Jesu a araba a re, “Ee, bona! gonnye ga go na leje lepe le le tlaa tlogelwang le thlatlaganye le le lengwe, otlhe a tlaa fetoga matlota.” 3 Mme ya re a ntse mo dithoteng tsa thaba ya Lotlhware go kgabaganya molatswana o o tswang Jerusalema, Petere le Jakobe le Anterea le Johane ba bo ba na nae mme ba mmotsa ba re, “Dilo tse tsothe di tlaa diragalela Tempele leng? A go tlaa nna le thagiso pele ga nako?” 5 Hong Jesu a dirisa nako e ntsi ya go ba thalsetsa a re, “Lo se letle ope go lo timetsa, 6 gonnye ba le bantsi ba tlaa tla ba ikaya fa e le Mesia wa lona, mme ba tlaa timetsa ba le bantsi. 7 Mme go tlaa tsoga dintwa gongwe le gongwe mme mo ga se sesupo sa bokhutlo. 8 “Gonnye dichaba le mebuso di tlaa tsogogelana, mme go tlaa nna dithoromo tsa lefatshe mo mafelong a le mantsi le mauba. Mme dilo tse e tlaa bo e le dikai tsa ntsha tsa dipogisego tse di tlang. 9 Mme fa dilo tse di simolola go diragala, lo thokomele! Gonnye lo tlaa bo lo le mo diphatseng tse dikgolo. Lo tlaa gogelwa fa pele ga basekisi, mme lo tlaa itewa mo ditempeleng, lo tlaa ema fa pele ga balaodi le dikgosi ka ntsha ya go nna balatedi ba me. Se e tlaa bo e le nako ya lona ya go ba bolelela Mafoko a a Molemo. 10 Gonnye Mafoko a a Molemo a tshwanetse go itsiwe mo merafeng yotlhe pele ga bokhutlo bo tla. 11 Mme fa lo tshwarwa lo bo lo sekiwisa, lo se ka lwa tshwenyega kaga se lo tlaa se buang go iphemela. Buang se Modimo o lo bolelelang gore lo se bue. Gonnye e tlaa bo e se lona lo buang mme e le Mowa o o Boitshepo. 12 Mme morwa rraa motho o tlaa neela morwa rraagwe go bolawa, borrabana ba tlaa neela bana ba bone, le bana ba tlaa neela batsadi ba bone gore ba bolawe. 13 Mme lo tlaa ilwa ke mongwe le mongwe ka ntsha ya gore lo ba me. Mme bothle ba ba tlaa itshokang go bokhutlong ba sa intatole ba tlaa bolokwa. 14 “Mme fa lo bona selo se se makgapha se eme mo Tempeleng, mmadi, ela tlhoki! Tshaba, o tshabele kwa dithabeng tsa Judea fa go kgonega. 15 Akofa! Fa o le mo setlhoeng fa godimo ga ntlo, o se ka wa boela mo tlang. Fa o le kwa masimo, o se ka wa boela kwa gae go ya go tsaya madi kgotsa diaparo. 17 “A bo go lathlega basadi ba baimana mo malatsing ao, le basadi ba ba amusang. 18 Mme lo rapele gore go sia ga lona go se ka ga nna go le mariga. 19 Gonnye malatsi ao e tlaa bo e le metlha ya pitlagano e e iseng e ke e nne teng fa e sa le kwa thologong ya lefatshe, mme ga go kitla go nna gape jalo. 20 Kwa ntle ga

gore Morena a khutshwafatse nako eo ya kutlobothoko, ga go na le fa e le mowa ope mo lefatsheng o o tlaa bolokesehang, mme ka nthla ya ba o ba ikgethetseng o tlaa khutshwafatsa malatsi ao. **21** "Mme fa mongwe a lo raya a re, 'Yo ke Mesia', kgotsa 'ke yole', lo se ka lwa mo ela tlhoko. **22** Gonwe go tlaa nna bo-Mesia ba le bantsi ba tsietso le baporofiti ba tsietso ba ba tlaa dirang dikgagamatso tse dintsi tse di tlaa timetsang ba le bantsi, le e leng bone bana ba Modimo tota. **23** Elang tlhoko! Ke lo thagaisitse! **24** "Morago ga pitlagano eo, letsatsi le tlaa fifala mme ngwedi ga a kitla a phatsima. **25** Dinaledi le tlaa wa, magodimo a tlaa reketlisiwa. **26** "Hong batho botlhe ba tlaa mpona, Nna Morwa Motho ke tla ke le mo marung ka nonofo e kgolo le kgalalelo. **27** Mme ke tlaa romela baengele ba me go tla go phutha botlhe baitshenkedwi ba me go tswa mo tikologong yotlhe ya lefatsho le legodimo. **28** "Jaanong, thuto ke e ka sethare sa mofeige. Fa dikala tsa one di simolola go kukunya le makakaba a simolola go tlhoga, lo itse sentle fela gore selemo se setse se gorogile. **29** "Mme fa lo bona dilo tse di diragala tse ke setseng ke tswa go di thalosa, lo ka tlhomamisa gore go tla ga me go setse go le gaufi, le gore ke setse ke le mo kgorong. **30** "Ee, tse ke ditiragalo tse di kayang nako ya bokhutlo. **31** Legodimo le lefatsho di tlaa nyelela, mme Lefoko la me le emetse ruri. **32** "Le fa go ntse jalo, ga go na ope, le fa e le baengele mo legodimong, le fa e le nna, ga ke itse letsatsi le fa e le nako e dilo tse di tlaa diragalang ka yone; fa e se Rara fela yo o itseng. **33** Mme ere ka lo sa itse gore go tlaa diragala leng, nnang lo itisitse. Nnang ka kelothoko kaga go boa ga me. **34** "Go tla ga me go ka tshwantshiwa ka monna yo o neng a tsamaya a ya kwa lefatsheng le sele, yo o neng a baya tiro yotlhe ya gagwe mo batlhankeng ba gagwe go e dira fa a sa ntse a seyo a tsamaile, mme a raya motlhokomedi wa kgoro a re, a lebelele go boa ga gagwe. **35** "Nnang lo lebeletse thata! Gonwe ga lo itse gore a go tla ga me go tlaa bo go le maitseboa, bosigo, phakela kgotsa motshegare. Lo se ka lwa letla gore ke lo fithele lo robotse. Disang go bowa ga me! se ke molaetsa wa me mo go lona le mo go botlhe ba bangwe."

14 Mme Modiro wa Tlolaganyo wa simologa morago ga malatsi a le mabedi, e le letsatsi la boitapoloso la Bajuta la ngwaga le ngwaga le go neng go sa jewe senkgwe se se bedisitsweng, baperesiti ba bagolo le ba bangwe baeteledipele ba Sejuta ba bo ba sa ntse ba batla leano le ba ka tshwarang Jesu ka lone ka sephiri go mmolaya. **2** Mme ba re, "Ga re ka re ra dira jalo ka letsatsi la modiro wa Tlolaganyo, e ka re kgotsa ga nna pherethogo." **3** Ka lobaka loo Jesu o ne a le kwa Bethania, mo tlung ya ga Simone wa molepero; ka nako ya dijo tsa maitseboa, mosadi mongwe a tla a tshotse kurwana ya setlolo se se tlhathlwa kgolo se se nkgang monate. Hong a thuba kurwana, a tshela setlolo mo tlhogong ya gagwe. **4** Bangwe ba ba neng ba le fa lomating lwa bojelo ba galefa thata kaga "tshenyho" eo, ka fa ba neng ba bua ka teng. Ba re, "O ka bo a rekisitse setlolo seo ka tlhathlwa e e kwa godimo mme a naya bahumanegi madi ao!" **6** Mme Jesu a re, "Mo leseng, lo mo omanyetsang ka go dira selo se se molemo. **7** Gonwe lo na le bahumanegi malatsi otlhe mme ba tlhoka thuso mo go

lona thata, lo ka kgona go ba thusa nako nngwe le nngwe e lo batlang go ba thusa ka yone; mme ga ke na go nna le lona ka lobaka lo lo leele. **8** O dirile se a neng a ka se kgona, mmele wa me o o toleditse phitlho go sa le gale. **9** Mme ke lo bolelela ka tlhwaafalo ya boammaaruri gore gongwe le gongwe kwa Mafoko a a Molemo a rerwang gone mo lefatsheng lotlhe, tiro ya mosadi yo, e tlaa nna e gakologelwa, e bo e galediwa." **10** Mme Judase Isekariota, mongwe wa barutwa ba gagwe, a ya kwa ditlhogong tsa baperesiti go ya go rulaganya go ba okela Jesu. **11** Erile fa baperesiti ba bagolo ba utlwa gore o tletse eng ba itumela thata ba bo ba mo solofetsa tuelo. Hong a simolola go batla nako e e siameng le lefelo le o ka okelang Jesu mo go lone. **12** Ka letsatsi la nthla la modiro wa Tlolaganyo, letsatsi le go neng go ntshiwa ditlhabelo tsa dikonyana, barutwa ba gagwe ba mmotsa gore o rata go ya go jela modiro wa Tlolaganyo kae? **13** Mme a roma ba le babedi kwa Jerusalema go ya go dira ditlhaganyo a ba raya a re, "E tlaa re fa lo sa ntse lo tsamaya, lo tlaa bona monna a tla a lebaganye le lona a rwele nkgwana ya metse. Lo mo sale morago. **14** Mo tlung e o tsenang mo go yone, bolelelang mong-wa ntlo lo re, 'Morena wa rona o re rometse go tla go bona ntlwana e lo e re baakanyeditseng, e re tlaa jelang modiro wa Tlolaganyo mo go yone maitseboeng ano!' **15** O tlaa lo isa kwa ntlwaneng e e kwa godimo e kgolo e e baakantsweng. Baakanyang dijo tsa rona gone." **16** Mme barutwa ba babedi ba tswelela jalo ba tsena mo motsing ba fithele sengwe le sengwe se ntse jaaka Jesu a ba boleletse, mme ba baakanyetsa Tlolaganyo. **17** Mo maitseboeng Jesu a goroga le barutwa ba bangwe, **18** mme ya re ba ntse fa lomating lwa bojelo ba a ja, Jesu a re "Ammaaruri ke a lo raya mongwe wa lona o tlaa nkoka, mongwe wa lona yo o leng fano yo ke jang nae." **19** Mme ba tlaa khutsafalo e kgolo botlhe, mme mongwe le mongwe wa bone a mmotsa a re, "A ke nna?" **20** Mme a araba a re, "Ke mongwe wa lona ba ba lesome le bobedi yo ke jang nae fano gompeino. **21** Ke tshwanetse go swa, fela jaaka baporofiti ba boletse bogologolo; mme a bo go lathega monna yo o nkolang. Go ka bo go le molemo fa a ka bo a sa tsalwa." **22** Ya re ba ntse baa ja Jesu a tsaya senkgwe a se segofatsa a se ngathoganyana a se ba naya a re, "Jaang se, ke mmele wa me." **23** A tsaya senwelo sa mofine a leboga Modimo kaga sone a se ba naya, mme botlhe ba a nwa mo go sone. **24** Mme a ba raya a re, "Se ke madi a me, a a tsholeletsweng batho ba le bantsi, a a kanelang kgalagano e ncha ya Modimo le batho. **25** Ammaaruri ke a lo raya ga nke ke tlhola ke e nwa loungo lwa mofine go fithelela letsatsi le ke nwang mofuta o sele mo Bogosing jwa Modimo." **26** Hong ba opela sefela mme ba ya kwa Thabeng ya Lotlhwane. **27** Mme Jesu a ba raya a re, "Lothe lo tlaa ntlogela, gonwe Modimo o buile jaana ka baporofiti wa re, 'Ke tlaa ya kwa Galalea go ya go kopana le lona teng.'" **28** Petere a mo raya a re, "Nna ga nkake ka go tlogela le fa ba bangwe ba ka go tlogela!" **30** Jesu a re, "Petere, Pele ga koko e tonanyana e lela la bobedi ka moso mo mosong o tla bo o intatotse gararo." **31** Mme Petere a re, "Nnyaa! Le fa nkabo ke na le go swa nao ga nkake ka go itatola!" Mme ba ikana fela jalo botlhe. **32** Hong ba fitlha fa felong fa go bidiwang tshimo ya Gethesemane, a feta a raya

barutwa ba gagwe a re, "Nnang fa, ke sa ntse ke ya go rapela." 33 Mme a tsaya Petere, Jakobe le Johane a ya nabo, a simolola go fuduega thata le go tshwenyega. 34 A ba raya a re, "Mowa wa me o hutsafetse thata mo ruri go isang losong; nnang fano, lo lebelele le nna." 35 A tsamaela fa pelenyana a wela fa fatshe, a rapela gore fa go ne go kgonega nako e e boitshegang e e mo letetseng e seka ya mo diragalela. 36 Mme a re, "Rara, Rara, dilo tsothe di ka diragala mo go wena. Tlosa senwelo se mo go nna. Le fa go ntse jalo ke batla thato ya gago, eseng ya me." 37 Hong a boela kwa barutweng ba gagwe ba bararo a ya fa fithela ba robetse, a re, "Simone a o robetse? A o ne o sa ka ke wa leta le nna lobaka lwa oura e le nngwe fela?" 38 lebelelang le nna lo rapele gore moraedi a seka a lo fenyha. Gonne le fa mowa o le tlhaga mmele o bokoa." 39 Mme a boa gape a ya go rapela, a boeletsa kopo ya gagwe. 40 A boela gape kwa go bone a fithela ba robetse, gonne ba ne ba lapile thata. Ba bile ba sa itse ka fa ba ka mo fetolang ka teng. 41 La boraro fa a boela kwa go bone a ba raya a re, "Tswelolang lo robale; Lo itapolose! Nnyaa! Nako ya go robala e setse e fetile! Bonang! ke okelwa mo diatleng tsa batho ba ba bosula. 42 Tsogang! Re tshwanetse go tsamaya! yo o nkokang o gauifi!" 43 Mme erile ka bonako a sa ntse a bua, Judase mongwe wa barutwa ba gagwe a goroga le setlhopho sa batho ba ba ipapanneng ka dichaka le melamu ba ba romilweng ke baperesiti ba bagolo le baeteledipele ba bangwe ba Sejuta. 44 Judase o ne a ba boeletse gore, "Yo ke tlaa yang kwa go ene go mo dumedisa, lo itse gore ke ene mme lo mo tshware. Mme lo ka mo tsaya motlhofo." 45 Mme erile fela jaaka ba goroga, a tlhamalalela kwa go Jesu, a re, "Morena!" Mme a mo tlamparella ka tshupo ya botsalano jo bogolo. 46 Jalo setlhopho sa batho sa mo tshwara. 47 Gone fela foo, mongwe a somola chaka, a kgaola motlhanka wa moperesiti yo mogolo tsebe. 48 Jesu a ba botsa a re, "A ke serukhutlhi se se diphatsa, gore lo bo lo tla ka tsela e lo tlang ka yone, lo tla kwa go nna lo ipapanne ka ditlhabano?" 49 Ke eng lo ile lwa seka lwa ntshwara kwa Tempeleng? Ke ne ke le teng koo, ke ruta letsatsi le letsatsi. Mme le fa go ntse jalo, dilo tse di dirafala gore di tlatshe diprofeso tse di buang ka ga me." 50 Ka nakonyana, barutwa ba gagwe botlhe ba bo ba tshabile. 51 Mme le fa go ntse jalo ga bo go le lekawana lengwe le mo setse morago, le apere seaparo sa lelaba e le seaparo sa bosigo. Ya re setlhopho seo se leka go mo tshwara, a falola, le fa go ntse jalo diaparotse tsa gagwe tsa gagoga, a tshaba a sa ikatega. 53 Hong Jesu a isiwela kwa legang la Moperesiti yo Mogolo kwa bagolwane botlhe ba baperesiti le baeteledipele bangwe ba Sejuta ba neng ba phuthaganela teng. 54 Mme Petere a bo a mo setse morago a le kgakalanyana nae a ba a tla a tsena ka kgoro ya motse wa Moperesiti yo Mogolo a kotama fa molelong a nna fa gare ga bathlanka. 55 Mo teng baperesiti ba bagolo le ba Kgotla kgolo ya tshekelo ya Sejuta ba ne ba leka go bona sengwe se ba ka pegang Jesu molato ka sone gore ba tie ba mmolaye. Mme ga se ka ga kgonega. 56 Basupi ba le bantsi ba maaka ba ne ba ithaopa, mme bosupi jwa bone jwa ganetsanya. 57 Lwa bofelo ga ema banna ba bangwe ba bua maaka ka ga gagwe ba re, 58 "Re mo utlwile a re, 'Ke tlaa senya Tempele e e agilweng ka diatla tsa batho mme mo malatsing a le mararo ke

tlaa aga e nngwe e e sa dirwang ka diatla!" 59 Le fa go ntse jalo ga ba ise ba ke ba bo ba bue polelo e e tlhamaletseng! 60 Hong Moperesiti yo mogolo a ema fa pele ga Lekgotla a botsa Jesu a re, "A o gana go arabela molato o? O na le eng se o ka iphemelang ka sone?" 61 Mme Jesu a seka a araba. Hong Moperesiti yo mogolo a mmotsa a re, "A o Mesia, Morwa Modimo?" 62 Jesu a araba a re, "Ke ene, mme lo tlaa mpona ke ntse ka fa letsogong la Modimo le legolo, ke tla mo lefatsheng ka maru a legodimo." 63 Hong moperesiti yo Mogolo a ikgagola diaparotse a re, "Re sa ntse re tlhoka eng gape? Re sa ntse re tlhoka bosupi jwa eng? Lo setse lo utlwile tlhapatso ya gagwe. Katlhoho ya lona ya reng?" Mme ba dumalana ka bongwe fela jwa pelo gore a atholelwe loso. 65 Mme bangwe ba bone ba simolola go mo kgwela mathe, ba mmipa sefathogo ba mo itaya ka mabole. Ba mo sotla ba re, "Ke mang yo o go iteileng moporofiti?" Ba mo nyonyobetsa. Le masole tota a ne a mo itaya ka mabole fa a ntse a tsamaya nae. 66 Mme ka lobaka loo Petere o ne a le kwa tlase mo lolwapaneng. Mongwe wa basetsana ba ba neng ba direla Moperesiti yo Mogolo a lemoga Petere a ikomosa fa molelong. A tsepega Petere matlho a goa a re, "O ne o na le Jesu, wa Monasara." 68 Petere a itatola a re, "Ga ke itse se o buang ka ga sone!" A tswela kwa ntle kwa mathuding a lolwapa. Gone fela foo koko e tonanyana ya lela. 69 Mme morweetsana a mmona a eme foo a simolola go bolelela ba bangwe, a re, "Ke yole morutwa wa ga Jesu!" 70 Petere a itatola gape. Moragonyana bangwe ba ba neng ba dikaganyeditse molelo ba simolola go raya Petere ba re, "Le wena o mongwe wa bone, gonne o tswa Galalea!" 71 A simolola go tlhapatso a ikana a re, "Ga ke mo itse monna yo lo buang ka ga gagwe." 72 Ka bonako koko e tonanyana ya lela lwa bobedi. Mme Petere a gakologelwa mafoko a ga Jesu a a reng, "Pele ga koko e tonanyana e lela lwa bobedi o tla a bo o intatotse gararo." Mme a simolola go lela.

15 Mme ya re mo mosong dithogo tsa bapereesiti le bagolwane ba phuthego, baruti ba tumelo le botlhe ba Kgotla kgolo, ba kopana go buisana kaga se ba neng ba tshwanetse go se dira. Maikaelelo a bone e ne e le gore masole a ise Jesu kwa go Pilatwe mmusi wa Seroma. 2 Pilatwe a mmotsa a re, "A o Kgosi ya Bajuta?" Hong Jesu a fetola a re, "Ee, ke jaaka o bolela." 3 Hong baperesiti ba bagolo ba mmaya molato ka dilo di le dintsi, mme Pilatwe a mmotsa a re, "Ke ka ntlha yang fa o sa bue sepe? Wa reng ka ga melato e ba e go pegang." 5 Mme Jesu a seka a tshaba a bua sepe, mo go neng ga gakgamatsa Pilatwe tlhola. 6 Mme jaana, e ne e le tlwaelo ya ga Pilatwe go golola legolegwa le le lengwe la Mojuta ngwaga e nngwe le e nngwe ka nako ya Paseka, legolegwa lengwe fela le batho ba lopang gore le gololwe. 7 Mongwe wa magolegwa ka nako eo e ne e le Barabase yo o neng a athlotswe le ba bangwe ka molato wa polao ya motho, ka nako ya ba tsogologela mmuso. 8 Hong lesomo la simolola go kokoanela Pilatwe, la mo kopa gore a golole legolegwa jaaka gale. 9 Pilatwe a botsa a re, "Go ka nna jang gore ke lo gololele kgosi ya Bajuta? A ke ene yo lo batlang a gololwa?" 10 Gonne o ne a lemoga gore se ke segwenegwene, se se neng se

tlhotlhelediwa ke baperesiti ba bagolo gone ba ne ba fufegela go tuma ga ga Jesu. **11** Mme ka nako e, baperesiti ba bagolo ba tlhotlheletsa lesomo gore le batle gore go gololwe Barabase boemong jwa ga Jesu. **12** Mme Pilatwe a botsa a re, "Fa ke golola Barabase, Ke tlaa dirang ka monna yo lo mmitang kgosi ya lona yo?" **13** Mme ba goa ba re, "Mmapole!" **14** Pilatwe a ba galefela a re, "Ka ntlha yang? O dirileng sa bosula?" Ba tswelela ba goa thata ba re, "Mmapole!" **15** Mme Pilatwe ka ntlha ya go tshaba mokubukubu gape a rata go itumedisa batho, a ba gololela Barabase. A laola gore ba iteye Jesu ka kubu, a ba mo neela gore a bapolwe. **16** Mme, masole a Roma a mo tsaya a mo isa kwa teng ga lolwapa lwa bogosi, ba bitsa mapodise a kgotla otlhe, ba mo apesa kobo e e bohobidu jo bo mokgona, ba mo direla serwalo sa mitlwa e meelele ba se mo rwesa. **18** Ba simolola go mo dumedisa ba re, "Ahee! Kgosi ya Bajuta!" **19** Mme ba mo itaya mo tlhogong ka lolthaka ba mo kgwela mathe, ba khubama ka mangole ba mo "obamela". **20** Erile ba sena go lapiswiwa ke go mo sotla, ba mo apola seaparo sa gagwe se se bohobidu jo bo mokgona, mme ba mo apesa diaparo tsa gagwe gape, ba mo kgwakwaetsa go ya go bapolwa. **21** Simone wa Kurene yo o neng a tswa kwa ga bone ka nako eo, a patelediwa go sikara mokgoro wa ga Jesu. (Simone ke rraagwe Aleksantarea le Rufase). **22** Mme ba tsaya Jesu ba mo isa kwa felong fa go bidiwang Gologotha (Ke gore felo ga logata). **23** Ba mo naya mofine o o tlhakantsweng le dithare tse di babang mme a o gana. **24** Mme ba mmapola, ba tshelela diaparo tsa gagwe bola. **25** E ne e ka ne e le ka nako ya bofera-bongwe mo mosong fa papolo e diragala. **26** Lokwalo lo lo bolelang molato wa gagwe lo ne lo kokotetswe mo mokgorong fa godimo ga tlhogo ya gagwe lo balega jaana, "Kgosi ya Bajuta." **27** Mme ga bo go bapotswe nae magodu a le mabedi mo mosong oo, mekgoro ya bone e tsentswa gagwe fa gare. **28** Mme lokwalo lwa diragadiwa lo lo reng, "O baletswe le baleofi." **29** Batho ba ne ba mo kgala fa ba feta, ba tshikinya ditlhogo tsa bone ka tshotlo, ba goeletsa kwa go ene ba re, "Ahee! Ipone jaanong; Ammaauri o ka senya Tempele wa ba wa e aga mo malatsing a le mararo! Fa e le gore o nonofile go le kalo, ipoloke o fologe mo mokgorong." **31** Baperesiti ba bagolo le baeteledipele ba tumelo le bone ba bo ba eme foo ba tala Jesu. Ba re, "O bothhale thata go boloka ba bangwe, mme ene ga a kgone go ipoloka!" **32** Ba goa ba re, "Hee, wena Mesia!" "Wena Kgosi ya Iseraela! Fologa mo mokgorong mme re tlaa go dumela!" Le magodu a mabedi tota a a neng a swa nae a mo kgoba. **33** Erile e ka ne e le motshegare wa sethoboloko, lefatshe lotlhe la fifala go fitlhelela ka nako ya boraro mo tshokologong eo. **34** Hong Jesu a bitsa ka lentswe le legolo a re, "Eli, Eli Lamasabakatani?" ("Modimo wa me, Modimo wa me, o ntathetseng?") **35** Bangwe ba batho ba ba neng ba eme foo ba popola gore o ka ne a bitsa Elija moporofiti. **36** Hong mongwe a tla a taboga a ina ngami mo mofineng o o botha a e tlhomela ka lolthaka a re, "A re ke re bone gore a Elija o tlaa tla go mo folosa." **38** Mme sesiro mo Tempeleng sa gagoga ka bogare go simologa kwa godimo go ya kwa tlase. **39** E rile fa lesole la Se-Roma le le neng le eme gaufi le mokgoro wa gagwe le bona ka fa o neng a neela mowa wa gagwe ka gone la re, "Ruri e ne e le Morwa Modimo!" **40**

Basadi bangwe ba bo ba le foo ba lebeletse ba le kgakala, e le Marea Magatalena, Marea (mmaagwe Jakobe yo mmotlana le Josese), Salome le ba bangwe. **41** Bone le basadi ba bangwe ba bantsi ba Galalea ba e neng e le balatedi ba gagwe ba mo direla fa a le kwa Galalea, ba tsile nae mo Jerusalem. **42** Dilo tse tsotlhe di ne tsa diragala pele ga Sabata. Mme ya re tshokologong ya letsatsi leo Josefe wa Arimathea, yo o neng a le leloko le le tlotlegang la Kgotla Kgolo ya Sejuta (yo o neng a lebeletse go tla ga Bogosi jwa Modimo), a nna pelokgale go ya kwa go Pilatwe go lopa setopo sa ga Jesu. **44** Pilatwe o ne a sa dumele gore Jesu o ne a setse a sule, hongo a bitsa mogolwane wa Roma a mmotsa. **45** Mogolwane a tlhomamisafafoko ao, Pilatwe a raya Josefe a re, "O ka nna wa tsaya setopo." **46** Mme Josefe a ya go reka letsela le letelele la leloba a pagolola setopo sa ga Jesu mo mokgorong, a se phuthela ka letsela leo a se baya mo phupung e e neng e gabilwe mo lefikeng, a pitikela leje mo kgorong ya phupu. **47** Marea Magatalena le Marea MmaJosese ba ne ba le teng ba lebile Jesu fa a fitlha.

16 Mme mo maitseboeng a a latelang, fa Sabata e setse e fetile, Marea Magatalena le Salome le Marea mmaagwe Jakobe ba tsamaya ba ya go reka ditlolo go tlotsa setopo sa ga Jesu. Mo maphakeleng a magolo a letsatsi le le latelang fa letsatsi le tlhaba, ba tsaya ditlolo tseo ba ya natso kwa phupung. **3** Mo tseleng ba bo ba ntse ba buisanya ka gore ba tlaa feta ba tlosa jang letlala le legolo fa kgorong ya phupu. **4** Mme ya re ba goroga ba leba ba bona gore letlala le legolo le le bokete thata, le ne le setse le tlositswe mme kgoro ya lebitla ya bo e setse e bulegile! **5** Hong ba tsena mo phupung, mme mo letsogong le legolo ga bo go ntse lekau le apere diaparo tse di tshweu. Mme basadi ba gamarega. **6** Mme moengele a re, "Se boifeng. A ga lo batle Jesu wa Monasara yo o neng a bapotswe? Ga a yo fa! Bonang fa mmele wa gagwe o neng o robaditswe teng. **7** Jaanong tsamaying lo ise molaetsa o kwa barutweng ba gagwe le kwa go Petere lo re: Jesu o lo eteletse pele go ya Galalea; lo tlaa mmona gone, fela jaaka a lo boleletse pele ga aa swa!" **8** Basadi ba taboga ba tswa fa phupung, ba roroma ba tshogile thata mo ba neng ba palelwa ke go bua. **9** (note: **The most reliable and earliest manuscripts do not include Mark 16:9-20.**) E ne e le maphakela ka letsatsi la Tshipi mo mosong fa Jesu a tsoga mo baswing, mme motho wa ntlha go mmona e ne e le Marea Magatalena, mosadi yo Jesu o kileng a kgoromeletsa ntle mewa e e maswe e supa mo go ene. **10** Hong a fitlhela barutwa ba lela ka kutlobothoko mme a ba bolelela gore o bonye Jesu, le gore o tshedile. Mme ga ba a ka ba mo dumela! **12** Morago ga letsatsi leo a iponatsa mo go ba babedi ba ba neng ba tsamaya ba tswa Jerusalem ba ya kwa nageng, mme ga ba a ka ba mo lemoga lwa ntlha ka gore o ne a fetogile setshwano. **13** Mme ya re kwa bofelong fa ba lemoga gore ke mang, ba tabogela kwa Jerusalem go ya go bolelela ba bangwe, mme ga se ka ga nna le yo o ba dumelang. **14** Kwa moragonyana a iponatsha mo barutweng ba ba lesome le motsa ba sa ntse ba a ja. Mme a ba omanyetsa thata go tlhoka go dumela ga bone, ka bothlogoe-thata jwa bone le go gana go dumela ba ba mmoyeng a sena go tsoga. **15** Mme a ba raya a re, "Lo tshwanetse go ya mo lefatsheng lotlhe lwa rerela mongwe le mongwe Mafoko a

a Molemo, gongwe le gongwe. **16** Ba ba dumelang ba bo ba kolobediwa ba tlaa bolokwa. Mme ba ba ganang go dumela ba tlaa sekisiwa. **17** Mme ba ba dumelang ba tlaa dirisa thata ya me go kgoromeletsa ntle mewa e e maswe, ba tlaa bua dipuo tse di ncha. **18** Ba tlaa nna le thata ya go tshwara dinoga ba babalesegile, mme fa ba a nwa le fa e le eng se se bolayang ga se kitla se ba utlwiswa bothoko: Ba tlaa kgona go baya balwetse diatla ba ba fodisa.” **19** Erile Morena Jesu a sena go fetsa go bua le bone, a tsholelediwa kwa legodimong a ya go nna ka fa letsogong le legolo la Modimo. **20** Mme barutwa ba tswa ba ya gongwe le gongwe ba rera, mme Morena a bo a na le bone, a tihomamisa se ba se buang ka dikgakgamatso tse di diragalang morago ga melaetsa ya bone.

Luke

1 Go tsala e e ratang Modimo. Dipolelo tse dintsi kaga Keresete di setse di kwadilwe di dirisiwa ka maitshegeletso a tsone jaaka dipolelo mo go rona go tswa mo barutweng ba pele le ba bangwe ba ba di boneng ka matlho. **3** Le fa go ntse jalo, go ne ga diragala mo go nna gore go ka siama fa nka boelela dipolelo tse gape go simolola ka palo ya nthla go ya kwa go ya bofelo morago ga tlotlhomiso tota ke be ke lo bolelela polelo e. **4** Go lo tthomamisetsa boammaaruri kaga se lo se rutilweng. **5** Polelo ya me e simologa ka Moperesiti wa Sejuta, ebong Sakarea yo o tshedileng ka lobaka lwa Herode e le kgosi ya Judea. Sakarea e ne e le leloko la batsamaisi ba Tempele ya ga Abija, (mosadi wa gagwe Elisabetha le ene o ne a tshwana le ene e le leloko la baperesiti ba morafe wa Sejuta, wa losika lwa ga Arone.) **6** Sakarea le Elisabetha e ne e le batho ba ba boifang Modimo, ba tthokometse go utlwa melao yotlhe ya Modimo mo moweng le mo lokwalong. **7** Mme ba ne ba sena bana, gonne Elisabetha e ne e le moopa; mme ka bobedi jwa bone ba bo ba tsofetse thata. **8** Ka letsatsi lengwe ya re Sakarea a tsamaisa tiro ya gagwe mo Templeng, gonne lesomo la gagwe le ne le le mo tirong mo bekeng eo, tlotlego ya mo tlela ya go tsena mo felong ga Boitshepo go ya go fisa mashwalo fa Pele ga Modimo. **10** Ka lobakanyana, bontsi jwa kokoano ya batho jwa emela kwa ntle ga Tempele, ba rapela jaaka ba tle ba dire fa mashwalo a fisiwa. **11** Sakarea o ne a le mo felong ga boitshepo fa ka tshoganetso Moengele a iponatsa mo go ene, a eme ka fa letsogong le legolo la sebeso sa ma-shwalo! Sakarea o ne a tshogile ebile a gamaregile. **13** Mme moengele a mo raya a re, "Se boife, Sakarea! Gonne ke tletse go go bolelela gore Modimo o utlwile thapelo ya gago le mosadi wa gago Elisabetha o tlaa tshola ngwana wa mosimane! Mme o tlaa mo raya leina o re Johane. **14** Ka bobedi jwa lona lo tlaa nna le boipelo jo bogolo le boitumelo ka botalso jwa gagwe, mme ba le bantsi ba tla ipela le lona. **15** Gonne e tlaa nna mongwe wa batho ba bagolo ba Morena. A se ka a nwa mofine kgotsa seno se se tagisang-gonne o sa le a tladitswe ka Mowa o o Boitshepo, le e leng pele ga a tsalwa! **16** Mme o tlaa tthottheletsa Bajuta ba le bantsi go sokologela mo go Morena Modimo wa gagwe. **17** E tlaa nna motho yo o mowa o makgawekgawe a nonofile jaaka Elija, moporofiti yo mogolo; mme o tlaa etelela pele go tla ga ga Mesia, a baakanyetsa batho go goroga ga gagwe. O tlaa ba ruta go rata Morena fela jaaka bagolwane ba bone ba ne ba dira, le go tshela jaaka batho ba ba boifang Mo-dimo." **18** Hong Sakarea a raya moengele a re, "Mme mo ga go kgonege! Ke setse ke le monna mogolo jaanong, le mosadi wa me le ene o tsofetse." **19** Hong moengele a mo raya a re, "Ke Gabariele ke eme sentle fa pele ga Modimo. Ke one o o ntho-mileng kwa go wena ka mafoko a a molemo a! **20** Mme jaanong, ka gore ga o a ka wa ntumela, o tlaa dirwa semumu, o tlaa palelwa ke go bua go fithelela ngwana a tsholwa. Gonne mafoko a me a tlaa diragala ka nako e e leng yone." **21** Ka lobakanyana kokoano ya batho kwa ntle ba bo ba letlele Sakarea go boa, ebile ba gaggametse gore ke eng fa a diegile. **22** Ya re a tswa

a bo a palelwa, ke go bua nabo, jalo ba lemoga fa a bonye ponatshegelo mo tempeleng. Ene a nna a ba gwetlha fela a ntse. **23** Hong a nna mo Tempeleng selekanyo sa malatsi a a setseng a tiro ya gagwe ya Tempele mme morago a boela gae. **24** Ka bonako morago ga lobaka Elisabetha mosadi wa gagwe a ithwala a nna a le nosi selekanyo sa kgwedi tse tlhano. **25** "A goa" a re, "Morena o pelotlhomogi mo go kae, go ntsha tlotlologo ya me ya go tlhoka bana!" **26** Kgwedi e e latelang Modimo wa roma moengele Gabariele kwa Nasaretha, motse wa Galalea, **27** kwa kgarebaneng, Marea, yo o neng a beletswe go nyalwa ke monna yo o neng a bidiwa Josefe, wa lotso lwa ga Kgosi Dafide. **28** Gabariele a iponatsa mo go ene a re, "A go nne boitumelo kgarebane e e rategang! Morena o na le wena!" **29** Marea o ne a tshwenyegile thata fa a leka go akanya se moengele a ka neng a se raya. **30** Moengele a mo raya a re, "Se tshoge Marea, gonne Modimo o thata. **31** Ka bonako jaanong o tlaa ithwala mme o tlaa nna le ngwana wa mosimane, mme o tlaa mo raya leina o re 'Jesu' **32** O tlaa nna mogolo thata mme o tlaa bidiwa Morwa Modimo. Mme Morena Modimo o tlaa mo naya setilo sa bogosi sa mogolwagolwane wa gagwe Dafide. **33** O tlaa busa mo Iseraela ka bosakhutleng, Bogosi jwa gagwe ga bo kitla bo fela!" (aiōn g165) **34** Mme Marea a botsa moengele a re, "Ke ka nna jang le ngwana? ke le kgarebane." **35** Moengele a mo fetola a re, "Mowa o o Boitshepo o tlaa tla mo go wena, le nonofo ya Modimo e tlaa go apesa, jalo ngwana yo o tlaa mo tsholang o tlaa ba a le boitshepo e le Morwa Modimo. **36** Mo godimo ga moo, Elisabetha ntsalao wa 'moopa' jaaka a bidiwa-o setse a na le dikgwedi di le thataro a ithwele mo botsofeng ja gagwe! **37** Gonne tsholofetso nngwe le nngwe e e tswang mo Modimong e tlaa diragala." **38** Mme Marea a re, "Ke motlanka wa Morena e bile ke batla go dira sengwe le sengwe se o se batlang. A sengwe le sengwe se o se buileng se diragale." Hong moengele a nyelela. **39** Morago ga malatsi a se kae Marea a ithaganelela kwa makhubung a Judea kwa motseng o Sakarea o neng a nna mo go one, go etela Elisabetha. **41** Mme ya re Elisabetha a utlwa tumedisio ya ga Marea, ngwana a tloa mo sebopelelong sa gagwe mme Elisabetha a tlaa Mowa o o Boitshepo. **42** A tshaga ka boitumelo a raya Marea a re, "o ratilwe ke Modimo mo basading botlhe, le ngwana, wa gago, o tthologeleitse kgalalelo ya Modimo e kgolo. **43** Ana ke tlotlo e kgolo thata jang, e Mma-Morena wa me o nketetseng ka yone! **44** Erile fa ke utlwa lentswe la gago ka nako e o neng o ntumedisa ka yone, ngwana a tloa mo sebopelelong sa me ka boitumelo! **45** O dumetse gore Modimo o tlaa dira se o se buileng; ke ka moo o go neileng lethogonolo le le gaggamatsang le." **46** Marea a fetola a re, "Ao, ke galaetsa Morena jang. **47** Ke itumela jang mo Modimong Mmoloki! **48** Gonne o tthokometse motlanka wa one wa morweetsana, le jaanong kokomana morago ga kokomana go ya bosakhutleng ba tlaa mpitsa mosegofadiwa wa Modimo. **49** "Gonne ene yo mogolo yo o boitshepo, o nitiretse dilo tse dikgolo. **50** Boutlwebo-botlhoko jwa gagwe bo tsamaya go tsweng kokomaneng go ya kokomaneng, mo go botlhe ba ba o boifang: **51** "Nonofo ya letsogo la gagwe e kgolo jang! O faladitse baikgantshi le ba ba ikgodisang. **52** O digile dikgosi tse di kgolo mo ditlong

tsa tstone tsa bogosi mme o godisitse ba ba ingotlileng. 53 O kgorisitse dipelo tse di bolailweng ke tlaa mme o busitse bahumi ba sa tsaya sepe. 54 Ebile o thusitse mothanka wa gagwe Iseraele jang! Ga a ka a lebala tsholofetso ya kutlwelobothoko. 55 "Gonne o solofeditse bo rraarona-Aberahame le bana ba gagwe go nna kutlwelobothoko mo go bone go ya bosakhutleng." (aiōn g165) 56 Marea a nna le Elisabetha selekanyo sa dikgwedi tse tharo mme a boela kwa legaeng la gagwe. 57 Ka nako e, tebelelo ya ga Elisabetha e ne e setse e wetse, ka gore lobaka lo ne lo setse lo fitlhile lwa ngwana gore a tsholwe mme ya bo e le mosimane. 58 Mme lefoko la anamela ka bonako kwa go bangwe ka ene le ba losika gore Morena o mo diretse molemo go le kae, mme mongwe le mongwe a itumela. 59 E rile fa ngwana a na le malatsi a fera bobedi bothe ba losika le ditsala ba tla modirong wa thupiso. Bothe ba ne ba ithaya ba re leina la ngwana e tlaa nna Sakarea, a reelelwa rraagwe. 60 Mme Elisabetha a re, "Nnyaa! O tshwanetse go bidiwa Johane!" 61 Mme ba gakgamala ba re, "Wa reng? Ga go na ope mo go ba gaeno wa leina leo." 62 Jalo ba botsa rangwana, ba bua le ene ka diatla. 63 Mme a kopa pampiri e e kwalelang mme mo kgakgamaleng ya mongwe le mongwe a kwala a re, "Leina la gagwe ke Johane!" 64 Ka bonako Sakarea a kgona go bua gape, mme a simolola go baka Modimo. 65 Kgakgamalo ya wela bothe ba ba agileng gauifi, mme mafoko a se se diregileng a anama le dithota tsa Judea. 66 Mme batho bothe ba ba utlwieng kaga gone, ba akanya ka bolelele ba ipotsa ba re, "Re a gakgamala gore ngwana yo o tsile go nna eng? Gonne letsogo la Morena ruri le mo okame ka mokgwa mongwe wa bothokwa." 67 Hong rraagwe ebong Sakarea a tlaa Mowa o o Boitshepo mme a ntsha polelopele e e reng: 68 Bakang Modimo, Morena wa Iseraele gonne o tsile go etela batho ba gagwe mme o ba golotse. 69 O re romeletse Mmoloki yo o senatla a tswa mo losikeng lwa mothanka wa gagwe Dafide, 70 fela jaaka a solofeditse ka baporofiti ba gagwe ba ba boitshepo mo lobakeng lo lo fetileng (aiōn g165) 71 gore o tlaa re romelela mongwe yo o tlaa re gololang mo babeng ba rona, le mo go bothe ba ba re ilang. 72 "O na a le kutlwelobothoko mo bagolwaneng ba rona, ee, mo go Aberahame ka bo ene, ka go gakologelwa tsholofetso ya gagwe e e boitshepo mo go ene, 74 le go re naya tshwanelo ya go direla Modimo kwa ntle ga poifo, re golotse mo babeng ba rona. 75 Le go re dira boitshepo le go amogelesega, re siametse go ema fa pele ga one ka bosakhutleng. 76 "Mme wena morwaaka yo mmotlana, o tlaa bidiwa moporofiti wa Modimo o o galalelang, gonne o tlaa baakanya diisela tsa ga Mesia. 77 O tlaa bolelela batho ba one ka fa ba ka bonang poloko ka teng ka boitshwarelo jwa diibe. 78 Gothe mo go tlaa nna ka ntlha ya gore boutlwelobothoko jwa Modimo wa rona bo bonolo thata, e bile bosa jwa legodimo bo tlaa re sela. 79 Go bonesetsa ba ba ntseng mo leffing la moruti wa loso, le go re goga mo tseleng ya kagiso." 80 Mme e rile ngwana a sena go gola a rata Modimo thata. A nna kwa ntle mo sekakeng a le esi go fithelela a simolola thuto ya gagwe mo Iseraele.

2 Ka nako e Kaesare Aguseti, Kgosi e kgolo ya Roma a ntsha molao wa gore merafe yotha e kwalwe. 2 Go kwalwa mo go

ne ga dirwa ka lobaka lwa Kwirinio e le molaodi wa Siria. 3 Mongwe le mongwe o ne a kopiwa go boela kwa ga gabo mogolo go ikwadisa. 4 Mme Josefe ka e ne e le ngwana wa bogosi, a tshwanelwa ke go tswa kwa motseng wa Galalea wa Nasaretha a etela kwa Bethlehema mo Judea legae la bogologolo la ga Kgosi Dafide. 5 A tsamaya le Marea, mmelediwa wa gagwe yo o neng a bonala a le moimana ka nako e. 6 Mme fa ba sa le teng foo, lobaka lwa tla lwa gore ngwana a tsholwe; 7 mme a tshola ngwana wa ntlha, e le mosimane. A mo phuthela ka kobo a mmaya mo boeleng jwa diruwa, gonne ba ne ba sena bonno mo motseng wa baeti. 8 Bosigo joo badisa bangwe ba bo ba le mo nageng kwa ntle ga motse, ba disitse letsomane la bone la dinku. 9 Ka tshoganetso moengele a iponatsa mo go bone mme lefatsho la phatsima ka ntlha ya kgalalelo ya Morena, mme ba tshoga thata. 10 Mme moengele a ba nametsa a re, "Se boifeng!" "Ke lo lereditse mafoko a boitumelo jo bogolo jo bo tlaa bolelwang ka bosakhutleng, mme ke jwa mongwe le mongwe! 11 Mmoloki ee, Mesia o tsetswe bosigong jono mo Bethlehema! 12 Lo tlaa mo lemoga jang? Lo tlaa bona losea lo phuthetswe mo kobong, lo robaditswe mo boeleng!" 13 Ka tshoganetso moengele a thakana le lesomo le legolo la ba bangwe ebong mephato ya legodimo ba baka Modimo ba opela ba re: 14 "Kgalalelo e nne go Modimo kwa magodimong, le kagiso mo lefatsheng mo go bothe ba ba mo itumedisang." 15 E rile mophato o mogolo wa baengele o sena go boela gape kwa legodimong, badisa ba raana ba re, "A re yeng! A re yeng kwa Bethlehema! A re yeng go bona kgakgamatso e e diragetseng, e Morena o re boleletseng kaga yone." 16 Mme ba sianela kwa motseng ba tsaya tselo e e yang kwa go Marea le Josefe. Mme ga bo go le ngwana a rapame mo boeleng. 17 Badisa ba bolelela mongwe le mongwe kaga se se diragetseng le se moengele o se ba boleletseng kaga ngwana yo. 18 Bothe ba ba utlwieng polelo ya badisa ba gakgamala. 19 Mme Marea a baya dilo tse mo pelong ya gagwe ka tidimalo mme a akanya kaga tstone gantsi. 20 Hong badisa ba boela gape kwa nageng kwa letsomaneng la bone, ba galaletsa Modimo kaga go etelwa ke moengele le gore ba bone ngwana, fela jaaka baengele ba ba boleletse. 21 Morago ga malatsi a fera bobedi, kwa tirelong ya thupiso ya losea, a rewa leina gatwe Jesu, leina le o le neilweng ke moengele pele ga a ise a ithwalwe. 22 E rile fa nako e tla ya gore Marea a ntshe tshupelo ya ntlafatso kwa tempeleng, ka fa melaong ya ga Moshe morago ga botsalo jwa ngwana, batsadi ba gagwe ba mo tseela kwa Jerusalema go ya go mo neela mo Moreneng; 23 Gonne mo melaong e go tulwe, "Fa ngwana wa ntlha wa mosadi e le mosimane, o tlaa neelwa Morena." 24 Ka nako eo batsadi ba ga Jesu le bone ba ntsha sethabelo sa bone sa go itshekisiwa, a e ka nna maphoi a le mabedi! kgotsa maebana a mabedi! E ne e le kopo e e ka fa molaong. 25 Ka letsatsi leo monna yo o bidiwang Simione moagi wa Jerusalema, o na a le mo tempeleng. E ne e le monna yo o siameng, morapedi yo mogolo, a tletse Mowa o o Boitshepo ebile ka metlha yotha e solofetse Mesia go tla ka bonako. 26 Gonne Mowa o o Boitshepo o ne o iponaditse mo go ene gore ga a na go swa go fithelela a bona kgosi e e tloditsweng ya Modimo. 27 Mowa O O Boitshepo o ne wa mo tlhotlheletsa go

ya kwa tempeleng ka letsatsi leo; mme jalo fa Marea le Josefe ba goroga go neela Jesu mo Moreneng ka go ikobela molao, 28 Simione o ne a le teng mme a tsaya ngwana ka mabogo a gagwe, a baka Modimo. 29 A re, "Morena. Jaanong ke ka a swa ka kagiso! Gonne ke mmone jaaka o ntsholofeditse gore ke tlaa mmona, ke bone Mmoloki yo o mo neileng lefatshe. 32 Ke lesedi le le tlaa phatshimelang dichaba, e bile o tlaa nna kgalalelo mo bathong ba gago ba Iseraele!" 33 Marea le Josefe ba ema fela foo, ba gaggamalela se se buiwang kaga Jesu. 34 Simione a ba segofatsa mme a raya Marea a re, "Chaka e tlaa thaba mowa wa gago, gonne ngwana yo o tlaa ganwa ke batho ba le bantsi mo Iseraele ka ntsha ya tshenyego ya bone. Mme o tlaa nna boipelo jo bogolo jwa ba bangwe ba le bantsi. Le dikakanyo tse di kwa teng tsa dipelo tse di ntsi di tlaa senolwa." 36 Ana, moporofiti wa mosadi o na a le teng ka letsatsi leo. E ne e le morwadia Fanuela, wa morafe wa Sejuta wa ga Ashere, mme o ne a tsofetse, gonne e ne e le mothlagadi wa selekanyo sa dingwaga di le masome a fera bobedi le bone go tloga mo dingwageng di supa tsa lenyalo la gagwe, o ne a seka a tloga mo tempeleng mme a nna teng bosigo le motshegare, a obamela Modimo ka go rapela le go itima dijo gantsi. 38 A atamela fa Simione a sa ntse a bua le Marea le Josefe, mme a simolola go leboga Modimo le go itsise mongwe le mongwe mo Jerusalemaya yo a neng a letile go tla ga Mmoloki kaga kgorogo ya ga Mesia. 39 Erile batsadi ba ga Jesu ba sena go diragatsa gothe mo go neng go tlhokwa ke Molao wa Modimo ba boela gae kwa Nasaretha mo Galalea. 40 Koo ngwana a feta a nna mosimane yo o thata yo o nonofileng, a ba a itsiwe ka bothale jo bo fetileng dingwaga tsa gagwe; mme Modimo wa gometsa mathlongonolo a one mo go ene. 41 Erile Jesu a le dingwaga di le lesome le bobedi a tsamaya le batsadi ba gagwe go ya kwa moletlong wa Tlomaganyo o ba neng ba o tsena ngwaga le ngwaga. 43 Morago ga moletlo ba simolola go boela gae kwa Nasaretha, mme Jesu a sala mo Jerusalemaya. Mme batsadi ba gagwe ga ba a ka ba mo tlhoka letsatsi la ntsha, 44 gonne ba ne ba gopola gore o na le ditsala mo baeting ba bangwe. Mme erile fa a sa bonale mo maabanyaneng ao, ba simolola go mmatla mo diisaleng tsa bone. 45 Mme ya re ba sa mmone, ba boela kwa Jerusalemaya go ya mmatla teng. 46 Morago ga malatsi a mararo ba mmona. O ne a le mo Tempeleng, a ntse fa gare ga baruti ba molao, a ganetsanya le bone ka dipotso tse di thata mme a gaggamatsa mongwe le mongwe ka kitso ya gagwe le dikarabo. 48 Mme batsadi ba gagwe ba se ka ba itse gore ba ka akanyang fa ba mmona a ntse foo a didimetse. Hong mmaagwe a mo raya a re, "Morwaaka! Ke eng fa o re diretse jaana. Rrago le nna re go batilwe ka tlhoafalo gongwe le gongwe?" 49 Mme a ba raya a re, "Lo ne lo mpateleng? A lo ne lo sa lemoge gore ke tlaa bo ke le fano mo Tempeleng, mo tlung ya ga Rre?" 50 Mme ba bo ba sa thaloganyegore o raya jang. 51 Hong a boela kwa Nasaretha le bone a ba utlwa; mme mmaagwe a boloka dilo tse tsotlhe mo pelong ya gagwe. 52 Mme Jesu a gola a nna moleele ebile a le bothale, mme a ratwa ke Modimo le batho.

3 Mme e rile mo ngwageng ya lesome le bothano ya puso ya ga kgosi kgolo Teberio Kaefase, molaetsa wa tla mo go

Johane (morwa Sakarea) ka a ne a nna kwa ntle mo dikakeng (Pilatwe e ne e le mmusi mo Judea ka lobaka loo; Herode e le mmusi mo Galalea, monnawe Filipino e le mmusi mo Iturea le Trakoniti; Lusaniase e le mmusi mo Abilene; Anase le Kaefase e le baperesiti ba bagolo ba Sejuta). 3 Hong Johane a tsamaya gongwe le gongwe mo ditlhakoreng tsoopedi tsa noka ya Jorodane, a rera gore batho ba tshwanetse go kolobediwa go supa gore ba sokoletse mo Modimong, ebile ba sokologile mo dibeng tsa bone, gore ba tle ba itshwarelwe. 4 Mo mafokong a ga moporofiti Isaia, Johane e ne, "E le lenswe le le kuang mo sekakeng, le re baakang tselwa e Morena o tlaa tsamayang mo go yone! Mo katolotsetse tselwa. 5 Ritibatsang dithaba! Katelang melatswana! Tlhamalatsang ditsela tse di kgopo! Rethefatsang le tsona tse di dikhutl! 6 Ke gone batho bothle ba tlaa bonang Mmoloki yo o tswang legodimong." 7 Se ke sekai sa thero ya ga Johane mo dikokoanong tsa batho ba ba neng ba tsile kolobetsong: "Losika lwa dinoga ke lona! Lo leka go falola moete kwa ntle ga go sokologela mo Modimong ka boammaaruri! Ke gone ka moo lo batlang go kolobediwa! 8 Tsamayang pele lo ye go itshupa ka mokgwa o lo tshelang ka one gore ke boammaaruri lo ikwathaila. Le gone lo se ka lwa akanya gore lo falotse ka gore lo losika lwa ga Aberahame. Moo ga go a lekana. Modimo o ka ntsha bana ba ga Aberahame mo majeng a a sekaka a! 9 "Selepe sa katlhola ya gagwe se tlhomilwe mo godimo ga lona, se baakanyeditse go kgaola medi ya lona le go lo kgaolela fa fatshe. Ee, setlhare sengwe le sengwe se se sa ungweng loungo lo lo siameng se tlaa rengwa se be se latlhelwa mo molelong." 10 Mme batho ba ba kokoaneng ba fetola bare, "O batla gore re direng?" Hong a ba fetola a re, 11 "Fa o na le dikobo di le pedi," naya yo o tlhokang e nngwe. Fa o na le dijo tse dingwe di abele ba ba bolailweng ke tlaa. 12 Le e leng bone bakgethisi tota ba ba itsegeng ka bosula jwa bone ba tla go kolobediwa mme ba botsa ba re, "Re tlaa go tlhomamisetsa jang gore re lathile dibe tsa rona?" 13 Johane a re, "Ke tlaa itse jang boammaaruri jwa lona. Tlhomamisang gore lo seka lwa phutha makgetho a a fetang a mmuso wa Seroma o o lo kopang gore lo a kokoanye." 14 Mme masole mangwe a botsa a re, "A le rona? Jaanong ka ga rona?" Johane a fetola a re, "Lo seka lwa gapa madi ka patiko le thubakanyo; lo se pateletse ope ka ga se lo itseng a sa se dire; mme itumeleleng tuelo ya lona!" 15 Batho bothle ba solofetse Mesia go tla ka bonako, ebile ba gakaletse go itse gore a Johane ke ene kgotsa nnyaa. E e ne e le potso ya lobaka lwa oura, mme ba ne ba tsaya kgang ka yone gongwe le gongwe. 16 Johane a araba potso e a re, "Ka nna legale ke lo kolobetsa ka metsi; mme mongwe o e tla yo o nang le nonofo e kgolo go feta yame; yo ke sa tshwanelang le fa e le go nna mothlanka wa gagwe mme ene o tlaa lo kolobetsa ka molelo ka Mowa o o Boitshupo. 17 O tlaa kgaoganya mmoko le mabele, a tshube mmoko ka molelo o o ksa khutleng mme a boloke mabele." 18 A dirisa ditlhagiso di le dintsi fa a ntse a bolelela batho mafoko a a molemo a Modimo. 19 (Mme ya re Johane a sena go bona Herode mmusi wa Galalea molato, ka go nyala Herodease, mosadi wa ga monnawe, le ka ga dipotso tse dintsi tse o di dirileng, Herode a tsenya Johane mo kgolelong, ka go

dira jalo a ba a oketsa sebe se, mo go tse dingwe tse dintsi tsa gagwe). 21 Erile ka letsatsi lengwe Jesu ka boene a tlhakana le boidiidi jwa batho ba ba neng ba kolobediwa ke Johane. Mme e rile fa a sena go kolobediwa, a rapela, mme magodimo a bulega, 22 mme Mowa o o Boitshepo o le mo setshwanong sa lephoi wa tlhomama mo godimo ga gagwe, mme lentswe le le tswang legodimong la re, "O Morwaake yo o rategang thata. Ee, o boitumelo jwa me." 23 Jesu o ne a na le dingwaga di ka nna masome mararo fa a simolola tirelo ya gagwe. O na a itsege e le morwa Josefe. 24 Josefe rraagwe e ne e le Eli; Eli rraagwe e ne e le Lefi; Lefi rraagwe e ne e le Meleki; Meleki rraagwe e ne e le Janai; Janai rraagwe e ne e le Josefe; 25 Josefe rraagwe e ne e le Mathatio; Mathatio rraagwe e ne e le Amose; Amose rraagwe e ne e le Nahume; Nahume rraagwe e ne e le Eseli; Eseli rraagwe e ne le Nagai; 26 Nagai rraagwe e ne e le Maathe; Maathe rraagwe e ne e le Mathatio; Mathatio rraagwe e ne e le Semeine; Semeine rraagwe e ne e le Joseke; Joseke rraagwe e ne e le Joda; 27 Joda rraagwe e ne e le Joane; Joane rraagwe e ne e le Resa; Resa rraagwe e ne e le Sorobabela; Sorobabela rraagwe e ne e le Salatheile; Salatheile rraagwe e ne e le Neri; 28 Neri rraagwe e ne e le Meleki; Meleki rraagwe e ne e le Adi; Adi rraagwe e ne e le Kosame; Kosame rraagwe e ne e le Elemadame; Elemadame rraagwe e ne e le Ere; 29 Ere rraagwe e ne e le Joshua; Joshua rraagwe e ne e le Eliesere; Eliesere rraagwe e ne e le Jorime; Jorime rraagwe e ne e le Mathate; Mathate rraagwe e ne e le Lefi; 30 Lefi rraagwe e ne e le Simione; Simione rraagwe e ne e le Juda; Juda rraagwe e ne e le Josefe; Josefe rraagwe e ne e le Joname; Joname rraagwe e ne e le Eliakime; 31 Eliakime rraagwe e ne e le Melea; Melea rraagwe e ne e le Mene; Mene rraagwe e ne e le Matatha; Matatha rraagwe e ne e le Nathame; Nathame rraagwe e ne e le Dafide; 32 Dafide rraagwe e ne e le Jese; Jese rraagwe e ne e le Obede; Obede rraagwe e ne e le Boase; Boase rraagwe e ne e le Sala; Sala rraagwe e ne e le Naasone; 33 Naasone rraagwe e ne e le Aminadabe; Aminadabe rraagwe e ne e le Admine; Admine rraagwe e ne e le Areni; Areni e ne e le rraagwe Eserome; Eserome e ne e le rraagwe Perese; Perese rraagwe e ne e le Juda; 34 Juda rraagwe e ne e le Jakobe; Jakobe rraagwe e ne e le Isake; Isake rraagwe e ne e le Aberahame; Aberahame rraagwe e ne e le Thara; Thara rraagwe e ne e le Nagore; 35 Nagore rraagwe e ne e le Seruge; Seruge rraagwe e ne e le Ragau; Ragau rraagwe e ne e le Faleke; Faleke rraagwe e ne e le Ebere; Ebere rraagwe e ne e le Sala; 36 Sala rraagwe e ne e le Kainame; Kainame rraagwe e ne e le Arpagasadi; Arpagasadi rraagwe e ne e le Sheme; Sheme rraagwe e ne e le Lamege; 37 Lamege rraagwe e ne e le Methusela; Methusela rraagwe e ne e le Enoke; Enoke rraagwe e ne e le Jareke; Jareke rraagwe e ne e le Mahalele; Mahalele rraagwe e ne e le Kainame; 38 Kainame rraagwe e ne e le Enose; Enose rraagwe e ne e le Sethe; Sethe rraagwe e ne e le Adamo; Adamo rraagwe e ne e le Modimo.

4 Mme ya re Jesu a ntse a tletse Mowa O O Boitshepo, a tloga mo nokeng ya Jorodane, a tlhohleditswe ke Mowa O O Boitshepo a ya mafatshing a Judea, kwa Satane o neng a mo

raela selekanyo sa malatsi a le masome a mane. O ne a sa je sepe mo lobakeng loo lotlhe, mme a ba a tshwerwe ke tlaa. 3 Satane a mo raela a mo raya a re, "Fa o le Morwa Modimo, raya leje le o re le fetoge senkgwe." 4 Mme Jesu a mo fetola a re, "Go kwadilwe mo dikwalong gatwe, 'Dilo dingwe mo botshelong di bothokwa thata go na le senkgwe.'" 5 Mme Satane a mo tseela kwa godimo mme a mmontsha magosi a lefatsho othe ka nako e khutshwane; 6 mme Satane a mo raya a re, "Ke tlaa go naya magosi a mantle a othe le kgalalelo ya one gonne ke a me ke a naya mongwe yo ke eletsang go a mo naya fa o ka khubama ka mangole wa nkobamela." 8 Jesu a fetola a re "Re tshwanetse go obamela Modimo, ene ka esi. 'Go kwadilwe jalo mo dikwalong.'" 9 Hong Satane a mo tseela kwa Jerusalem kwa sethoeng se se kwa godimo sa Tempele mme a re, "Fa o le morwa Modimo itige! Gonne dikwalo tsa re Modimo o tlaa romela baengele ba one go go sireletsa le go go tlamela gore o seka wa sugakana fa fatshe!" 12 Mme Jesu a fetola a re, "Dikwalo gape tsa re 'O se leke bopelotelele jwa Modimo.'" 13 Erile Diabole a sena go fetsa dithaelo tsothe a tlogela Jesu ka lobakanyana mme a tsamaya. 14 Mme Jesu a boela kwa Galalea, a tletse nonofo ya Mowa O O Boitshepo. Mme ka bofefo a tuma mo tikologong ya kgaolo eo yotho. 15 Gonne o ne a galalediwa ke mongwe le mongwe mo disenagogeng ka nthla ya dithero tsa gagwe. 16 E rile fa a tsena mo motsing wa Nasaretha, mo legaeng le o tsaletsweng mo go lone, a ya jaaka gale kwa tlung ya thuto ka Sabata, mme a ema a bala dikwalo. 17 Mme a neelwa lokwalo lwa ga Moporofiti Isaia, mme a lo bula mo kgaolong e e reng. 18 "Mowa wa Modimo o mo go nna. O ntaoletse go rerela bahumanegi Mafoko a a Molemo; o nthometse go fodisa dipelo tse di phatlogileng le go bolela gore magolegwa a tla gololwa, le difofu di tlaa bona, bapatikegi ba tlaa gololwa mo bagateleding ba bone le gore Modimo o ipaakanyeditse go naya lethogonolo botho ba ba tlang mo go one." 20 Mme a tswala lokwalo a lo busetsa kwa molebeleding, a nna fa fatshe, mongwe le mongwe mo senagogeng a mo lebeletse thata ka thloafalo. 21 Hong a oketsa a re, "Dikwalo tse di diragetse gompieno!" 22 Botho ba ba neng ba le foo ba bua sentle kaga gagwe e bile ba gaggamaditswe ke mafoko a mantle a a neng a tswa mo molomong wa gagwe. Mme ba botsa ba re, "Mo go ka diragala jang. A motho yo ga se morwa Josefe?" 23 Mme Jesu a re, "Nkete lo tlaa mpuela seane se se reng, 'Ngaka, iphodise' ke gore, 'Ke eng fa o sa dire dikgagamatso fano mo legaeng la gaeno jaaka tse o neng o di dira kwa Kaperenama?'" 24 Mme ke lo thomamisetsa gore ga go moporofiti ope yo o amogelesegang mo ga gabo!" 25 Sekai ke se, "Gakologelwang jaaka moporofiti Elija a ne a dira Sarefa a le moeti go tswa lefatsheng la Sidona. Go ne go le bathologadi ba Sejuta ba le bantsi ba ba neng ba tlhoka thuso mo malatsing ao a leuba, gonne go ne go se na pula selekanyo sa dingwaga di le tharo le sephatlo, mme tlaa ya tsena mo lefatsheng ka bokukuntshwane; le fa go ntse jalo Elija a ba a sa romelwa kwa go bone. 27 Kgotsa akanyang moporofiti Elija, yo o neng a fodisa Naamane wa Mosiria, bogolo go balepero ba le bantsi ba Sejuta ba ba neng ba tlhoka thuso." 28 Mme mafoko a a ba shakgatsa thata; 29 Mme ba tloa, ba mo gagautha ba

ba ba mo tseela kwa losing lwa lentse le le godileng mo go neng go agilwe motse teng, go mo kgoromeletsa mo godimo ga lekhubu. **30** Mme a tswa mo bontsintsing jwa batho a ba tlogela. **31** Mme a boela kwa Kaperenama, motse o o mo Galalea, mme a ruta teng mo senagogeng ka Sabata mongwe le mongwe. **32** Teng koo le gone batho ba gakgamadiwa ke dilo tse o neng a di bua. Gonne o ne a bua jaaka mongwe yo o itseng boammaaruri mo boemong jwa go nankola megopolo ya ba bangwe. **33** Mme ya re nako nngwe a ruta mo ntlung ya thuto, monna yo o neng a tsenywe ke mowa o o maswe a simolola a goeletsa kwa go Jesu a re, **34** "Tsamaya! Ga re na sepe le wena, Jesu wa Nasaretha. O tsile go re senya, ke a itse gore o mangMorwa Modimo yo o boitshepo." **35** Jesu a mo kgaodisa go bua a re, "Didimala!" A raya mowa o o maswe a re, "Tswela kwa ntle!" Mme mowa o o maswe wa lathela monna fa fatshe fa bontsintsing jwa batho bo ntse bo lebeletse; mme wa mo tlogela 'o' sa mo utlwa bothoko gope. **36** Hong batho ba botsa ka kgakgamalo ba re, "Ke eng se se mo mafokung a monna yo fa le mewa e e maswe e mo utlwa?" **37** Mme polelo kaga se a se dirileng ya anama jaaka molelo wa naga mo tikologong yotlhe. **38** Erile a sena go tloga mo tlung ya thuto ka letsatsi leo, a ya kwa legeng la ga Simone kwa a neng a fitihela mogwagwadia Simone wa mosadi a lwala thata bolwetse jwa letshoroma. Mme batho bothle ba mo kopa go re a mo fodise. **39** Ya re a eme fa thoko ga bolao jwa gagwe a bua le letshoroma, a le kgalemela, ka bonako a fola a tsoga a ba direla dijo! **40** Ya re letsatsi le phirima mo maabanyaneng ao, baagi ba motse bothle ba ba nang le balwetse mo magaeng a bone, go sa re sepe gore e ka bo e le malwetse a a ntseng jang, ba ba tlisa kwa go Jesu; mme erile fa a ba baya diatla ba fola. **41** Bangwe ba ne ba tsenwe ke mewa e e maswe, mme mewa e e maswe ya tswela kwa ntle ka taolo ya gagwe, ya goa ya re, "O Morwa Modimo." Mme ka gore ba ne ba itse fa e le Keresete, a ba didimatsa. **42** Mme ya re phakela mo mosong o o latelang a tswela kwa ntle mo sekakeng. Bontsintsi jwa batho ba mmatlha gongwe le gongwe mme ya re fa ba mmonang gone ba mo kopa gore a seka a ba tlogela, mme a nne kwa Kaperenama. **43** Mme a ba fetola a re, "Ke tshwanetse go rera Mafoko a a Molemo a bogosi jwa Modimo le mo metseng e mengwe, gonne ke sone se ke se tletseng." **44** Jalo a nna a tsamaya a rera mo matlung a thuto mo Judea otlhe.

5 Mme ya re ka letsatsi lengwe a rera mo lotshitshing lwa lecha la Genesareta, bontsintsi jo bogolo jwa batho jwa kokoanela mo go ene go reetsa Lefoko la Modimo. **2** Mme a lebelala mekoro e mebedi e e senang sepe e eme fa thoko ga metse fa batshwari ba dithlapi ba tlhatswa matloa a bone. **3** Erile Jesu a tsena mo go mongwe wa mekoro, a raya Simone mong wa mokoro o mongwe a re, a o suteletse kwa pelenyana mo metsing gore a tle a nne mo go one a bue le batho a le mo teng. **4** Erile a sena go fetsa go bua, a raya Simone a re, "Jaanong tsamaela fa go boteng o lese matloa a gago mme o tlaa tshwara dithlapi di di ntshi!" **5** Mme Simone a fetola a re, "Morena," re dirile thata bosigo jotlhe mme ra se ka ra tshwara sepe, mme fa o rialo re tlaa leka gape. **6** Mme ka nako e matloa a bone a ne a tlaa thata mo e leng gore a ne a simolola go gagoga! **7** Mme go goa ga bone ba batla thuso ga

tlisa bangwe ka bone mo mokorong o mongwe mme ka bonako mekoro yotlhe ya bo e tletse dithlapi mo e ka nwelang. **8** Erile Simone Petera a lemoga se se diragetseng a itigela ka mangole fa pele ga ga Jesu mme a re, "Ao, Morena, tswee-tswee, re tlogele ke moleofi yo mogolo go ka nna le wena." **9** Gonne o ne a gakgamaditswe thata ke selekanyo se ba se tshwereng jaaka ba bangwe ba ba neng ba na le bone. **10** Le bapati ba bangwe le bone bo Jakobe le Johane, bomorwa Sebede. Mme Jesu a fetola a re, "Se tshwenyege! go simolola gompieno lo tlaa tshwara mewa ya batho!" **11** Mme ya re ka bonako fa ba fologa mo mekorong ba tlogela tsothe ba tsamaya le ene. **12** Mme ka letsatsi lengwe mo metsaneng mongwe o a neng a o etela, teng koo ga bo go le monna yo o neng a na le lepero le le sa foleng. Erile a bona Jesu a itigela fa fatshe fa pele ga gagwe, a oba sefathogo a kopa gore a fodisiwe. A re, "Morena, fa o rata o ka mphodisa." **13** Hong Jesu a otlolola seatla a ama monna yoo mme a re, "Go ntse jalo ke a rata, fola!" Mme lepero la mo tlogela ka bonako. **14** Mme Jesu a mo laela gore a tsamaye ka bofefo a sa bolelele ope se se diragetseng le go ya go tthatlhojwa ke moperesiti wa Sejuta. Mme Jesu a mo raya a re, "Ntsha sethabelo se ka molao wa ga Moshe se batlwang mo baleperweng ba ba fodisitsweng. Se se tlaa supegetsa mongwe le mongwe gore o fodile." **15** Hong polelo ya nonofo ya gagwe ya anama ka bonako mme kokoano e kgolo ya batho ya tla go utlwa a ruta le go fodisiwa malwetse a bone. **16** Mme Jesu o ne a tle a ngwangwaelele kwa nageng go ya go rapela. **17** Ka letsatsi lengwe fa a ntse a ruta, bangwe ba molao ba bo ba ntse gaufi nae. (Go ne go bonala fa batho ba ba ne ba tswa mo metsaneng mengwe le mengwe ya Galalea otlhe le Judea, le mo Jerusalema). Mme nonofo ya phodiso ya Morena e ne e le mo go ene. **18** Mme bonang! banna bangwe ba tlaa ba tshotse monna yo o suleng mofama a robetse mo phateng. Ba leka go itshukela mo gare ga bontsintsi jwa batho go ya kwa go Jesu mme ba se ka ba mmona. Jalo ba tthatlogela mo dithomesong fa godimo ga gagwe, ba tlosa makote a a neng a khurumetse dithomeso mme ba baya fa fatshe monna yo o lwalang mo bontsintsing jwa batho, a ntse a robetse mo phateng, fa pele ga ga Jesu! **20** Mme ya re Jesu a bona tumelo ya bone, a raya monna a re, "Tsala ya me, dibe tsa gago di itshwaretse!" **21** Mme Bafarasai le baruti ba molao ba botsanya ba re, "Motho yo o ikgopola a le eng?" O a tlapatsa! E mang fa e se Modimo yo o ka itshwarelang dibe. **22** Jesu a ba a setse a itsile se ba se akantseng, mme a fetola a re, "Ke eng fa e le tlapatso? **23** A go thata go itshwara dibe tsa gagwe go na le go mo fodisa?" **24** Jaanong ke tlaa supa thata ya me go itshwara sebe ka go supa nonofo ya me ka go fodisa bolwetse. Mme a raya monna yo o suleng mofama a re, "Ema o menaganye phate ya gago o ye gae." **25** Mme ya re ka bonako, fa mongwe le mongwe a lebeletse, monna a nanoga a tsaya phate ya gagwe a ya gae a baka Modimo. **26** Mme mongwe le mongwe yo o neng a le foo a tshwara ke kgakge le letshogo. Mme ba baka Modimo, ba boaboela gangwe le gape ba re, "Re bone dilo tse di gakgamatsang gompieno." **27** Mme morago ya re Jesu a tswa mo metseng a bona mokgethisi ka sekao sa gale sa go tsietsa a ntse fa bokgethelong. Leina la monna yo e ne e

le Lefi, Jesu a mo raya a re, "Tla o nne mongwe wa barutwa ba me!" 28 Mme Lefi, a tlogela sengwe le sengwe a nanoga a tsamaya le ene. 29 Mme ka bonako Lefi a dira modiro mo legaeng la gagwe a o direla Jesu e le moeng yo o tlotlegang. Ba le bantsi ba ditsala tsa ga Lefi tsa bakgethisi le baeti ba bangwe ba ne ba le teng. 30 Mme Bafarasai le baruti ba molao ba ngongoregela barutwa ba ga Jesu ka go ja le baleofi ba mofuta oo. 31 Mme Jesu a ba araba a re, "Ke molwetse yo o tlhokang ngaka eseng ba ba itekanetseng, 32 Tiro ya me ke go laletsa baleofi gore ba sokologe mo dibeng tsa bone, eseng go senya nako ya me ka ba ikgopolang gore ba setse ba siame thata." 33 Ngongorego e nngwe e ne e le ya gore barutwa ba ga Jesu ba dira modiro mo boemong jwa go ikitsa dijo, fa barutwa ba ga Johane le ba Bafarasai bone ba aga ba itima dijo ebile ba rapela. Ba re, "Ke eng fa barutwa ba gago bone ba a nwa ba a ja?" 34 Jesu a botsa a re, "A batho ba ba itumelang ba ka ikitsa go ja? A balalediwa ba lenyalo ba ka tshwarwa ke tlaa fa ba le mo moketeng le monyadi?" 35 Mme nako e tlaa tla e monyadi o tlaa bolawang ka yone; ke gone ba se kitlang ba batla go ja." 36 Hong Jesu a dirisa setshwantsho se: a re, "Ga go na ope yo o gagolang sebata sa seaparo se sesha go bitya seaparo se segologolo, gonne seaparo se sesha se tlaa bo se sentswe, mme seaparo se segologolo se tlaa lebega se le maswe ka ntlha ya sebata se sesha mo go sone. 37 Mme ga go ope yo o ka tshelang seno sa mofine se sesha mo teng ga dinkgwana tse di kgologolo, gonne seno se sesha se tlaa phunya dinkgwana mme di tsholole mofine. 38 Mofine o moshia o tshwanetse go tshelwa mo dinkwaneng tse disha. 39 Mme ga go ope yo e a reng a sena go nwa mofine o mogologolo a eletse o moshia. Mme batho ba re ditsela tsa bogologolo di botoka."

6 Ka Sabata mongwe ya re Jesu le barutwa ba gagwe ba tsamaya mo gare ga masimo mangwe a mabele, ba kgetla diako ba sosorela diithaka mo diatleng tsa bone mme ba a ja mabele. 2 Mme Bafarasai bangwe ba re, "Ga go ka fa molaong! Barutwa ba gago ba roba mabele, mme go kgatlhanoeng le molao wa Sejuta go dira jalo go le Sabata." 3 Jesu a fetola a re, "A ga lo bale dikwalo? a ga lo ise lo ke lo bale se Kgosi Dafide o neng a se dira fa ene le batho ba gagwe ba ne ba tshwerwe ke tlaa? 4 O ne a tsena mo teng ga Tempele mme a tsaya senkgwe sa tshupelo, senkgwe se se neng se tlhophetswe go bewa fa pele ga Morena, mme a se ja se sa letlelelwa go jewa fela jaaka mo go sa letlelelwa mme a se kgaogana le ba bangwe." 5 Mme Jesu a tlatsa a re, "Ke Morena le wa Sabata tota." 6 Ka Sabata nngwe o ne a le mo tlung ya thuto a ruta, mme monna mongwe a ba a le foo yo o golafetseng letsogo le legolo. 7 Baruti ba molao le Bafarasai ba lebelela sentle go bona gore a o tlaa fodisa monna ka letsatsi leo, ka e ne e le la Sabata. Gonne ba ne ba ikaetse go mmaya molato. 8 Hong a itse megopolo ya bone jang! Mme a raya monna yo o neng a golafetse letsogo a re, "Tla o eme fa, fa mongwe le mongwe a tlaa go bonang gone." Mme monna a dira jalo. 9 Hong Jesu a raya Bafarasai le baruti ba molao a re, "Ke na le potso. A go siame go dira tshiamo ke letsatsi la Sabata, kgotsa go thokofatsa? Go boloka botshelo kgotsa go bo senya?" 10 A

leba mongwe le mongwe wa bone mme a raya monna a re, "Otlolola letsogo la gago," mme ya re a le otlolola, la fola! 11 Mme ya re ka ntlha ya tiragalo e, baba ba ga Jesu ba galefa thata, mme ba simolola go rerisanya polao ya gagwe. 12 Ka letsatsi lengwe Jesu a tswela mo dithabeng go ya go rapela, bosigo jothle. 13 Mme ya re letsatsi le tswa a bitsa balatedi ba gagwe a tlhophi ba le lesome le bobedi mo go bone go nna baeteledipele ba barutwa ba gagwe. (Ba ne ba tlhomamisiwa jaaka "Baapostoloi," ba gagwe kgotsa "Barongwa.") 14 Maina a bone ke a: Simone (yo o neng a bidiwa Petere), Anderea (monnawe Simone), Jakobe, Filipo, Barotholomea, Mathaio, Thomase, Jakobe, (morwa Alafaio), Simone, (yo o neng a bidiwa "Moselote") Judase (morwa Jakobe), Judase Isekariota (yo o neng ya re morago a oka Jesu). 17 Erile fa ba fologa mekgokolosa ya thaba, ba ema le Jesu mo lobaleng lo lo tona, ba dikaganyeditswe ke bontsi jwa balatedi ba gagwe, ba le bone ba neng ba dikaganyeditswe ke bontsintsi jwa batho. Gonne batho bothe ba ba tswang mo tikologong ya Judea le go tswa Jerusalem le go tswa bokgakala jwa bokone jwa lotshitshi lwa lewatle la Ture le Sidona ba ne ba tsile go mo reetsa a ruta kgotsa a fodisa. Mme a kgoromeletsa mewa e e maswe e le mentsi ntle. 19 Mongwe le mongwe o ne a leka go mo ama, gonne ka go dira jalo nonofo ya phodiso e ne e tswa mo go ene mme ba fodisiwe. 20 Hong a retologela kwa barutweng ba gagwe a ba raya a re, "Lo sego lona ba lo bahumanegi, gonne Bogosi jwa Modimo ke jwa lona! 21 Lo sego lona ba lo bolawang ke tlaa, gonne lo tlaa kgorisiwa. Lo sego lona ba lo lelang gonne nako e e tla, e lo tlaa tshegang ka boitumelo! 22 "Lo sego motlhang batho ba ba lo ilang ba ikgaoganya le lona ba lo kgoba ba lo senya leina ka ntlha ya gore lo ba me! 23 Fa moo go diragala itumeleng! Ee, ipeleng gonne lo tla nna le tuelo e kgolo. Mme lo tlaa nna mo lesomong le le siameng baporofiti ba bogologolo ba ne ba dirwa jalo le bone. 24 "Mme mafutsana a letile bahumi! Gonne ba na le boitumelo fela fano. 25 Ba nonne ba tswelsetse pele gompieno, mme lobaka lwa tlaa e e boitshegang lo ba letile. Ditshego tsa bone tse e seng tsa sepe gompieno di raya kutlobothoko. 26 Mme kutlobothoko e lebagane ba ba galalediwaeng ke batho gonne baporofiti ba tsietso ba ne ba aga ba galalediwa jalo. 27 "Reetsang! Ratang baba ba lona. Direlang tshiamo ba ba lo ilang. 28 Rapelelang boitumelo ba ba lo hutsang; kopelang ba ba lo utlusang bothoko mathogonolo a Modimo. 29 "Fa mongwe a go faphola mo lerameng, mo lese a faphole le lengwe! Fa mongwe a go kopa baki, mo nee le hemepe ya gago. 30 Naya se o nang naso yo o se kopang; mme fa dilo di tshotswe mo go wena, se tshwenyega ka gore di boe. 31 Direla ba bangwe jaaka o batla ba go direla. 32 "A o gopola gore o tshwanetswe ke tlotlo ka go rata ba ba go ratang fela? Le baleofi ba dira jalo! 33 Mme fa o direla molemo fela ba ba go direlang molemo-a moo go siame? Le baleofi ba dira jalo! 34 Fa o adima madi fela ba ba go duelang ana ke tshiamo, efe? Le baikepi ba bagolo le bone ba tle ba adime baikepi ka bone gore ba amogele mo go kalo gape! 35 "Ratang baba ba lona! Ba direlang tshiamo. Ba adimeng! Mme lo se ka lwa tshwenyega ka gore ga ba kitla ba duela. Hong tuelo ya lona kwa legodimong e tlaa nna kgolo

thata, mme ruri lo tlaa dira jaaka bomorwa Modimo: Gonne o siametse ba ba sa lebogeng le ba ba bosula. **36** "Leka go supa kutlwelo bothoko e tona jaaka Rraeno a dira. **37** "O se ka wa tshwaya diphoso kgotsa wa sekisa, e se re kgotsa ga boela mo go wena. Direla ba bangwe ka bopelonomi; mme le bone ba tlaa go direla jalo. **38** Gonne fa o aba, o tlaa bona! Mpho ya gago e tlaa go boela ka botlalo e bile e le selekanyo se se tshologang, e papietswe e tshikintswe go direla tse dingwe photlha, e bile e penologa. A e ka bo e le selekanyo sefe se o se dirisang se se go tona kgotsa se se nnye se tlaa dirisiwa go lekanya se se go boelang." **39** Dingwe tsa ditshwantsho tsa dipolelo tse Jesu a neng a di dirisa mo ditherong tsa gagwe ke tse: "Go thusang gore sefoku se etelele se sengwe kwa pele? Gonne e tlaa re se wela mo kगतamping se gogele se sengwe mo teng. **40** "Moithuti o ka itse jang go gaisa moruti wa gagwe? Mme fa a ithuta thata o ka tshwana le moruti wa gagwe. **41** "Mme ke eng fa o tshwenyega kaga selabe se se mo leitlhong la yo mongwe ebong molato o monnye wa gagwe fa mosipori o le mo go la gago? **42** O ka akanya jang go mo raya o re, mokaulengwe, tla ke go thuse go ntsha selabe mo leitlhong la gago, fa o sa kgone go bona ka nthla ya mosipori pele ke gone gongwe o ka bonang sentle go dira sengwe ka selabe sa gagwe. Moitimokanyi: **43** "Setlhare se se tswang mo thitong e e siameng ga se ka ke sa unywa loungo lo lo motlhofo le dithare tse di tswang mo thitong e e motlhofo ga di ka ke tsa unywa loungo lo lo thophegileng. **44** Setlhare se lemogwa ka mofuta wa loungo lwa sone. Maungo a difeige ga a ka ke a ungiwa ke dithare tse di mitlwa, kgotsa moretlwa mo manganeng. **45** "Motho yo o siameng o ntsha ditiro tse di siameng mo pelong e e siameng. Mme motho yo o bosula o ntsha dilo tse di bosula mo boikepong jwa gagwe jo bo fithegileng. Sengwe le sengwe se se mo pelong ya gagwe se fetogela mo puong. **46** "Jaanong ke eng fa lo mpitsa Morena lo sa nkutlwe? **47** Mme botlhe ba ba tlang go reetsa le go nkutlwa ba tshwana le monna yo o agang ntle mo motheong o o nonofileng o o beilweng mo lefikeng le le kwa tlase. E re fa merwalela e tlhatloga e thubaka ntle, e eme e nitame mo lefikeng. **49** Mme ba ba reetsang mme ba sa utlwa ba tshwana le monna yo o agileng ntle e e senang motheo. E re fa merwalela e elelela mo tlung eo, e senyeye e be e tswa letlotla."

7 Erile Jesu a sena go fetsa thero ya gagwe a boela mo motsing wa Kaperenama. **2** Fela ka yone nako eo motlhanka yo mogolo wa moeteledi pele wa mophato wa Seroma o ne a lwala a bile a le gaufi le go swa. **3** E rile fa moeteledipele wa mophato a utlwa kaga Jesu, a romela bangwe ba Sejuta ba ba tlotlegang go ya go mo kopa gore a tle go fodisa motlhanka wa gagwe. **4** Hong ba simolola go kopa Jesu ka thoafoalo go ya le bone go thusa monna yoo. Ba mmolelela ka fa moeteledipele wa masole o neng a le senatla ka gone. "Fa mongwe a tshwanelwa ke go thusiwa, ke ene, **5** gonne o rata Bajuta o bile o re agetse ntle ya thuto!" **6** Jesu a tsamaya le bone; mme ya re pele ga ba goroga kwa tlung, moeteledipele wa masole a romela ditsala dingwe go ya gore, "Morena o se ka wa itapisa ka go tla kwa lwapeng la me, gonne ga ke a tshwanelwa ke tlotlo e e kalo kgotsa le fa e le go ka kopana nao, bua lefoko fela fa o leng

teng mme motlhanka wa me o tlaa fola. **8** Ke a itse, ka gore ke ka fa tlase ga taolo ya maotlana a magolo, mme ke na le taolo mo bathong ba me. Ke na le tshwanelo ya gore 'Tsamayang!' mme ba tsamaye; kgotsa 'Tlang!' mme ba tle; mme ke reye motlhanka wa me ke re, dira se kgotsa sele; mme a se dire. [Jalo, bua fela jaana o re, 'Fola' mme motlhanka wa me o tlaa fola!]" **9** Jesu a hakgamala. A retologela kwa bathong ba ba kgobokaneng a re, "Ga ke ise nke ke kopane le motho wa tumelo e e ntseng jaana mo Bajuteng botlhe ba ba mo Iseraele." **10** Mme ya re ditsala tsa moeteledipele wa masole di boela kwa tlung ya gagwe, tsa fitlhela motlhanka a fodile gothelele! **11** Morago ga lobakanyana Jesu a tsamaya le barutwa ba gagwe ba ya kwa motsaneng wa Naine le batho ba bantsi ba mo kgobokanetse jaaka gale. **12** Popelelo ya phitlho ya tswela kwa ntle fa Jesu a atamela kgoro ya motsana. Mosimane yo o neng a sule e ne e le ene fela ngwana wa mosimane wa mosadi wa motlholagadi, mme bahutsahadi ba le bantsi ba tswa nae mo motsaneng oo. **13** E rile fa Morena a mmona, pelo ya gagwe ya tlaa kutlwelobothoko. Mme a mo raya a re, "Se lele!" **14** Hong a tsamaela kwa kesing ya moswi! Mme a e ama, mme batshodi ba yone ba ema. A mo raya a re, "Morwaaka, tsoga mo losong!" **15** Hong mosimane a nna sentle mme a simolola go bua le ba ba neng ba mo dikaganyeditse! Mme Jesu a mmusetsa kwa go mmaagwe. **16** Letshogo le legolo la tsena batho, mme ba goa ba baka Modimo. Ba re, "Moporofiti yo mogolo o tsogile mo gare ga rona mme re bonye letsogo la Modimo le dira gompiano!" **17** Polelo ya se a se dirileng ka letsatsi leo ya anamela ka bonako go tswa ntheng e nngwe go ya go e nngwe ya Judea le go kgabaganya meelwane tota. **18** Mme barutwa ba ga Johane wa Mokolobetsi ba tloga ba utlwa gotlhe mo Jesu o neng a go dira. Ya re ba bolelela Johane kaga gone, **19** a romela bangwe ba barutwa ba gagwe ba le babedi kwa go Jesu go ya go mmotsa ba re, "A o Mesia tota? Kgotsa re nne re mo lebeletse?" **20** Barutwa ba babedi ba fitlhela Jesu a sa ntse a alafa balwetse ba malwetse a a farologanyeng, a fodisa digole le difofu ebile a kgoromeletsa ntle mewa e e maswe. Erile ba mmotsa potso ya ga Johane, a fetola a re, "Boelang kwa go Johane mme lo mmolelele gotlhe mo lo go boneng le mo lo go utlwieng gompiano: gore ba ba neng ba fufetse ba a bona! Batlhotsi ga ba thole ba tlhosa! Balepero ba setse ba fodisitse! Bosusu ba a utlwa! Baswi ba a rula! Mme bahumanegi ba utlwa Mafoko a a Molemo. **23** Mme lo mmolelele gore, 'Go sego yo o sa lathegelwang ke tumelo mo go nna.'" **24** Erile ba sena go tsamaya Jesu a bua le batho kaga Johane. A re, "Motho yo ke mang yo lo neng lo ile go mmona mo sekakeng sa Judea? A lo ne lwa mmona a le motlhofo jaaka bojang jo bo sutisiwang ke musomo mongwe le mongwe wa phefo! **25** A lo kile lwa mmona a apere diaparo tse di tlhathlwa kgolo? Nnyaa! Batho ba ba nngang mo monateng ba bonwa mo matlung a segosi, e seng kwa ntle mo sekakeng. **26** Mme a lo kile lwa bona moporofiti? Ee! Le go feta moporofiti? **27** Ke ene yo dikwalo di neng di mo raya fa di re, 'Bona! Ke romela morongwa wa me kwa pele ga gago, go go baakanyetsa ditsela!' **28** Mo bathong botlhe ga go na ope yo mogolo go feta Johane. Mme le fa go ntse jalo yo mmoatlana mo Bogosing jwa Modimo o

mogolo go mo feta.” 29 Mme botlhe ba ba utlwieng Johane a rera, le e leng bone ba ba neng ba le bosula thata, ba dumela gore se se batlwang ke Modimo se siame, mme ba kolobediwa ke ene. 30 Botlhe ba kolobediwa kwa ntle ga Bafarasai le baruti ba molao wa ga Moshe. Ba ne ba gana leano la Modimo mo go bone mme ba gana kolobetso ya ga Johane. 31 Mme Jesu a ba botsa a re, “Ke ka reng ka batho ba ba ntseng jalo? Ke ka ba tshwantsha le eng?” 32 Ba tshwana le sethlopha sa bana ba ba ngongoregang mo ditsaleng tsa bone, ba re, ‘Ga lo rate fa re tshameka “Lonyalo” e bile ga lo rate fa re tshameka phitlho!’ 33 Gonne Johane wa Mokolobetsi o ne a tswaetse go tsamaya a sa tsaya dijo e bile a se ke a tsaya seno mo botsheleng jwa gagwe jotle, mme lwa re, ‘O tshwanetse a ba a tsenwa!’ 34 Mme ke ja dijo tsa me e bile ke nwa mofine wa me mme lwa re, ‘Kana Jesu o rata dijo jang! E bile o a nwa! E bile o na le ditsala tsa mofuta o o kwa tlase!’ 35 Mme nna ke tlhomamisa gore lo ka kgona go itshegetsatsa mo tshiamololong ya lona.” 36 Hong mongwe wa Bafarasai a kopa Jesu gotla kwa lwapeng lwa gagwe go ya go ja, mme Jesu a amogela taletso eo. Ya re ba nna fa fatshe ba a ja, 37 mosadi wa mebila, wa seaka, a utlwaleta fa Jesu a le foo mme a lere lebotlolo le tletse setlolo se se tlhwalhwa kgolo. 38 Ya re a tsena mo teng a obama fa dinaung tsa gagwe ka mangole, a lela go fitlhela dinao tsa ga Jesu di kolobediwa ke dikeledi tsa gagwe; mme a di phimola ka moriri wa gagwe a di atla a ba a tshela setlolo mo go tstone. 39 E rile Mofarasai mongwe yo Jesu o neng a mmiditse, a bona se se diregang le gore mosadi e ne e le mang, a ithaya a re, “Se supa gore Jesu ga se moporofiti, gonne fa tota a ne a romilwe ke Modimo, o ka bo a itsile gore mosadi yo ke wa mofuta ofe!” 40 Hong Jesu a buela kwa godimo a araba dikakanyo tsa ga Simone wa Mofarasai a re, “Ke na le sengwe se ke batlang go se bua le wena.” Simone a fetola are, “Gosiame moruti, tswelela.” 41 Hong Jesu a mmolelela polelo e: “Monna o kile a adima batho ba babedi madi, a adima yo mongwe dikete di le tlhano tsa dipula mme a adima yo mongwe makgolo a mathano a dipula. 42 Mme ga go ise go ke go nne le ope wa bone yo o neng a mo duela, jalo ka bopelo-tlhomogi a ba itshwarela botlhe, a ba lesa gore ba seka ba duela. Ke ope yo o gopolang gore o ne a mo rata thata morago ga moo?” 43 Simone a araba a re, “Ke gopola gore ke yo o neng a mo kolota thata.” Jesu a dumela a re go ntse jalo. 44 Hong a retologela kwa mosading a raya Simone a re, “A o bona mosadi yo o khubameng fa yo! Erile ke tsena mo lwapeng lwa gago ga o a ka wa tshwenyega ka go nnaya metse go thapa lorole mo dinaong tsa me, mme ene o di thapisitse ka dikeledi tsa gagwe a ba a di phimola ka moriri wa gagwe! 45 Lo nkganeletse katlo ya tlwaelesego ya tumedisio, mme ene o atilile dinao tsa me gangwe le gape go simologa ka nako e ke neng ke goroga ka yone. 46 Lo ne lwa tlhokomologa bopelonomi jwa gale jwa lookwane lwa motlhwane go tlotsa tlhogo ya me, mme ene o bipile dinao tsa me ka setlolo se se sa tlwaelesegang. 47 Ka moo dibe tsa gagwe tse dintsi di itshwaretsewe, gonne o nthatile thata; mme yo o itshwaretsweng go le gonnye go supa lorato lo lo nnye.” 48 Mme a mo raya a re, “Dibe tsa gago di itshwaretsewe.” 49 Mme banna ba ba neng ba ntse fa lomating lwa bojelo ba raana ba re, “Monna yo o akanya gore ke mang,

yo o tsamayang a itshwarela dibe?” 50 Mme Jesu a raya mosadi a re, “Tumelo ya gago e go bolokile; tsamaya ka kagiso.”

8 Mme ka bofofe morago ga moo a etela metse le metsana ya Galalea go bolela go tla ga Bogosi jwa Modimo, mme a tsamaya le barutwa ba gagwe ba ba lesome le bobedi. 2 Basadi bangwe ba tsamaya nae, ba o ntshitseng mewa e e maswe mo go bone kgotsa ba o ba fodisitseng; mo go bone go ne go le Marea Magatalena (Jesu o ne a ntshitse mewa e e maswe ele supa mo go ene). 3 Joana mosadi wa ga Chusa (Chusa e ne e le molaodi wa papadi ya ga Kgosi Herode a bile a le mothokomedi wa ntlo ya segosi le dilwana tsa yone). Susana, le ba bangwe ba ba neng ba ntsha dikatso go otla Jesu le barutwa ba gagwe. 4 Ka letsatsi lengwe a neela boididi jwa batho ba ba neng ba phuthegile go tla go mo utlwa, setshwantsho se, fa ba bangwe ba bantsi ba sa ntse ba le mo tseleng ba tswa mo metseng e mengwe. 5 “Molemi o kile a tswela kwa tshimong ya gagwe go ya go jala peo. Ya re a gasa peo fa fatshe, nngwe ya yone ya wela mo tseleng mme ya gatakwa; mme dinonyane tsa e e ja ka e ne e le mo lobaleng. 6 Peo e nngwe ya wela mo mmunyaneng o go neng go ikadile letlapa ka fa tlase ga one. Peo ya simolola go gola, mme ka bonako ya swaba ya a swa ka nthla ya go tlhoka longola. 7 Peo e nngwe ya wela mo gare ga masitlwana, mme medi e mennye ya akofa ya hupela. 8 E nngwe ya wela mo mmung o o molemo; peo e ya gola ya ungwa thobo ya selekanyo sa lekgolo go menagane go gaisa ka fa a neng a jetse ka teng.” (Ya re a fa setshwantsho se a re, “Yo o nang le ditsebe a a utlwe.”) 9 Baapostoloi ba gagwe ba mmotsa gore polelo e e rayang. 10 Mme a fetola a re, “Modimo o lo letleletse go itse tlhaloso ya ditshwantsho tse, gonne di bolela tiro e kgolo ya Bogosi jwa Modimo. Mme bontsintsi jo jwa batho bo utlwa mafoko mme ga ba tlhaloganye, fela jaaka baporofiti ba boletse. 11 “Tlhaloso ya sone ke e: Peo ke molaetsa wa Modimo mo bathong. 12 Tsela e e kwakwaletseng e peo nngwe e wetseng mo go yone e tshwantshiwa le dipelo tse di thata tsa batho ba ba utlwang mafoko a Modimo, mme diaboloi a tle a utswa mafoko a kganele batho go dumela le go bolokwa. 13 Lefatshe le le maje le tshwantshiwa le ba ba itumelelang go reetsa diithero, mme ka mokgwa mongwe molaetsa tota o sa tsene mo go bone le gone ga o mele ebile ga o gole. Ba a itse gore molaetsa o o boammaaruri mme ba dumela ka lobakanyana fela; ere fa dipogiso di tla ba felelwe, ke kgatlhego. 14 Peo e e mo gare ga mitlwa e tshwantshiwa le batho ba ba dumelang mafoko a Modimo mme ba e reng morago tumelo ya bone e hupediwe ke matswenyego le dikhumo le ditiro le maitumelo a botshelo. Mme jalo ga ba na nonofo ya go thusa ope go dumela mafoko a a Molemo. 15 “Mme mmu o o molemo o tshwantshiwa le batho ba ba ikanyegang ba ba pelo di siameng. Ba reetsa mafoko a Modimo ba a tshegetse mme ba a anamisa ka bonya mo go ba bangwe.” 16 [Ka nako e nngwe a botsa a re,] “E mang yo o kileng a utlwaletsa mongwe yo e a reng a sena go tshuba lobone a lo khurumetse gore lo se ka lwa bonesa? Nnyaa! Dipone di bewa mo di ka bonwang tse. 17 Se se supa gore ka letsatsi leo sengwe le sengwe [mo dipelong tsa batho] se tlaa leriwu mo leseding mme se supegediwe botlhe.

18 Jalo ithokomeleng ka fa lo reentsang ka gone, gonno ye o nang le gone, o tlaa nawa mo go tona; mme le fa e le mang yo o senang sepe, le e leng se o nang naso tota o tlaa se tseelwa." 19 Mme ya re ka nako nngwe fa mmaagwe le bomonnawe ba tsile go mmona, ba seka ba tsena mo tlung e o neng a ruta mo go yone ka ntlha ya bontsintsi jwa batho. 20 E rile Jesu a utlwa fa ba eme kwa ntle ba batla go mmona, 21 a re, "Mme le bonnake ke botlhe ba ba utlwang molaetsa wa Modimo ba bo ba o tshegets." 22 Ka letsatsi lengwe mo lobakeng loo, fa ene le barutwa ba gagwe ba le kwa ntle mo mokorong, a ntsha mogopolo wa gore ba kgabaganyetse ka kwa ntlheng e nngwe ya lecha. 23 Mme ya re ba kgabaganya a rapama a thulamela, mme ya re a sa ntse a robetse ga tsoga matsubutsubu a phefo a a boitshegang a leka go kgaphela mokoro mo lewatteng. Mme ba ne ba le mo diphatseng tse di kgolo. 24 Mme ba taboga ba mo tsosa ba goa ba re, "Morena, Morena re a nwela!" Hong a bua le phefo a re, "Kgaotsa," mme diphefo le makhubu a metse tsa khutla, gotlhe ga nna tidimalo. 25 Mme a ba botsa a re, "Tumelo ya lona e kae?" Mme ba bo ba tletse therego le go mmoifa ba raana ba re, "Monna yo ke mang, yo le e leng diphefo le makhubu a metse a mo utlwang?" 26 Mme ba goroga ka fa ntlheng e nngwe, mo lefatsheng la Bagerasena go lebagana le lecha la Galalea. 27 Ya re a fologa mo mokorong monna yo o tswang mo motseng wa Gataro a tla go mo kgathantsha, monna yo o neng a tsenwe ke mewa e e maswe ka lobaka lo lo leele. A se na legae a bile a sa ikatega, a nna mo mabilteng mo gare ga diphupu. 28 Ya re ka bonako fa a bona Jesu a gala a wela fa fatshe fa pele ga ga Jesu, a goa, a re, "O batla go dirang ka nna, Jesu, Morwa Modimo o o tlotelegang? Tsweetswee, ke a go rapela, o se ka wa ntlhokofatsa!" 29 Gonno Jesu o ne a setse a laola mowa o o maswe gore o tsewe mo go ene. Mowa o o maswe o ne o tle o laole monna yo mo e leng gore e ne e tle e re le fa a bofilwe ka dikeetane a kgaole mme a siele mo nageng, a laolwa ke mowa o o maswe gothelele. 30 Mme Jesu a botsa mowa oo maswe a re, "Leina la gago ke mang?" Mme wa fetola wa re, "Diketeketete," gonno o ne a tletse diketekete tsa mowa o o maswe! 31 Mme ya mo kopa gore a se ka a e laolela go tsena mo lehuting le le senang bolekanngo. (Abyssos g12) 32 Serapa sa dikolobe sa bo se fula gautshwane mo mhapheng wa thaba mme mewa e e maswe ya mo kopa gore a e letle go tsena mo dikolobeng. Mme Jesu a e letla. 33 Mme ya tswa mo monneng ya tsena mo dikolobeng, mme ka bonako serapa sothe sa kgokologa thaba sa wela mo teng ga lecha kwa tlase, mo di neng tsa nwela teng tsothe. 34 Hong badisa ba dikolobe ba sianela kwa motsing o o gaufi, ba gasa mafoko ba ba ntse ba siana. 35 Ka bofelo bontsintsi jwa batho jwa tla go iponela ka bobone se se diragetseng mme ba bona monna yo o neng a tsenwe ke mowa o o maswe a ntse ka tidimalo fa dinaong tsa ga Jesu, a apere a bile a ikutlwa sentle. Mme bontsintsi jwa batho botlhe ba tshoga thata. 36 Hong ba ba neng ba bone selo se se diragala ba bolela ka fa monna yo o neng a tsenwe ke mewa e e maswe a fodisitsweng ka teng. 37 Mme batho botlhe ba kopa Jesu gore a tsamaye a ba togele (gonno therego e kgolo ya letshogo e ne ya ba wela). Mme a boela kwa mokorong a tsamaya, a kgabaganyetsa gape ka

kwa ntlheng e nngwe ya lecha. 38 Monna yo o neng a tsenwe ke mewa e e maswe a kopa go tsamaya le ene, mme Jesu a gana. 39 A mo raya a re, "Boela kwa go ba ntlo ya gago, o ba bolelele selo se sentle se Modimo o se go diretseng." O ne a tsamaya le motse othe a bolelele mongwe le mongwe kaga kgakgamatso e kgolo ya ga Jesu. 40 Ka fa ntlheng e nngwe ya lecha bontsintsi jwa batho jwa mo amogela ka botlalo, gonno ba ne ba ntse ba mo lebeletse. 41 Mme jaanong monna yo o neng a bidiwa Jairo, moeteledipele wa ntlo ya thuto ya Sejuta, a tla a wela fa dinaong tsa ga Jesu a mo kopa gore a ye nae kwa ga gagwe, 42 gonno ngwana wa gagwe yo o esi o ne a swa, morweetsana wa dingwaga tse di lesome le bobedi. Mme Jesu a tsamaya nae, ba suthelela ka bothata mo gare ga batho. 43 Ya re ba ntse ba tsamaya mosadi yo o neng a batla phodiso a tla kwa morago a ama Jesu, gonno o ne a dutlile madi ka bonya selekanyo sa dingwaga di le lesome le bobedi, mme a sa bone kalafi (ntswa a sentse sengwe le sengwe se a neng a na naso mo dingakeng), mme nako e o neng a ama ntlha ya seaparo sa ga Jesu, madi a ema. 45 Mme Jesu a botsa a re, "Ke mang yo o nkamileng?" Mme mongwe le mongwe a itatola, mme Petera a re, "Morena, bontsintsi bo go dikaganyeditse..." 46 Mme Jesu a mo raya a re, "Nyaa, e ne e le mongwe fela yo o nkamileng ka bomo, gonno ke utlwile nonofo ya phodiso e tswa mo go nna." 47 Mme ya re mosadi a lemoga gore Jesu o a itse, a simolola go roroma a wela fa fatshe ka mangole fa pele ga gagwe a mmolelela go re o ne a mo amelang le gore jaanong o fodile. 48 Hong Jesu a mo raya a re, "Morwadiaka, tumelo ya gago e go fodisitse. Tsamaya ka kagiso." 49 E rile a sa ntse a bua le ene, morongwa a goroga a tswa kwa lapeng la ga Jairo ka mafoko a a reng ngwanyana o sule. A raya rraagwe ngwana a re, "O sule, ga go thuse go tshwenya Moruti jaanong." 50 Mme e rile fa Jesu a utlwalela se se diragetseng, a raya rraagwe ngwana a re, "Se boife! Ikanye nna fela, ngwana o tla siana." 51 Ya re ba goroga kwa tlung Jesu a se ka a letla ope go tsena mo tlung fa e se Petera, Jakobe le Johane le batsadi ba morweetsana. 52 Lelapa le ne le tletse batho ba ba hutsafetseng, mme a re, "Lesang go lela! Ga a a swa; o robetse fela!" 53 Se sa tliša tshotlo le setshego, gonno ba ne ba itse botlhe gore o sule. 54 Hong a mo tshwara ka seatla a mmitsa a re, "Tsoga morweetsana." 55 Mme ka yone nako eo a rula a nanoga! A ba raya a re, "Mo neeng sengwe a je!" 56 Batsadi ba gagwe ba ne ba itumela thata. Mme Jesu a ba laya gore ba seka ba bolelela ope kaga se se diragetseng.

9 Mme ya re ka letsatsi lengwe Jesu a phutha baaposetoloi ba gagwe ba ba lesome le bobedi! A ba naya taolo mo meweng e e bosula, a ba naya nonofo go e kgoromeletsa ntle go fodisa malwetse othe. 2 Hong a ba roma go ya go bolelela mongwe le mongwe kaga go tla ga Bogosi jwa Modimo le go fodisa balwetse. 3 A ba laela a re, "Se tseyeng le fa e le seikokotlolo, kgotsa kgetsana ya loeto, kgotsa dijo, kgotsa madi le fa e le hempe e nngwe. 4 Lo nne fela fa lo gorogetseng teng mo motsing mongwe le mongwe. 5 "Fa batho ba motse ba sa lo reetse fa lo tsena, hularang lo tsamaye, lo supa bogale jwa Modimo kgathlanong le motse o o ka go ithlithlora lorole lwa

one mo dinaong tsa lona fa lo tsamaya." 6 Mme jalo ba simolola go tlhatloganya metsana, ba rera Mafoko a a Molemo ba bile ba fodisa balwetse. 7 Mme e rile fa dipolelo tsa dikgakgamatso tsa ga Jesu di tsena kwa go Herode wa mmusi, a tshwenyega thata a akabala, gonne bangwe ba ne ba re "Ke Johane wa Mokolobetsi o rudile", 8 ba bangwe ba re, "Ke Elija kgotsa mongwe wa baporofiti ba bogologolo o tsogile mo losong." Mme magatwe a a anama le lefatshe lotlhe. 9 Mme Herode a re, "Ke kgaotse Johane tlhogo." "Jaanong ke mang monna yo ke utlwang dipolelo tse di sa tlwaelesegang ka ga gagwe?" Mme a eletsa go mmona. 10 Mme ya re Baapostoloi ba sena go boela kwa go Jesu go ya go bolela se ba se dirileng, a ngwangwaela ka tidimalo le bone go ya kwa motsing wa Bethesaida. 11 Mme bontsintsi jwa batho jwa bona kwa o yang gone, mme ba mo sala morago. A ba amogela a ba ruta gape kaga Bogosi jwa Modimo a ba a fodisa ba ba neng ba lwala. 12 Mo tshokologong barutwa botlhe ba ba lesome le bobedi ba tla ba mo kopa gore a phatlalaitse batho kwa metsaneng le masimo a a gautshwane go ya go batla dijo le marobalo. Ba re, "Gonne ga go na se se jwang fa mo sekakeng se." 13 Mme Jesu a fetola a re, "Ba feng dijo!" Mme bone ba re, "Go reng, re na le dinkgwe di le tlhano fela le ditlhapi tse pedi mo gare ga bontsintsi jwa rona, kgotsa o gopotse gore re ye go rekela bontsintsi jo dijo tse di lekaneng?" 14 Gonne go ne go na le batho ba ka nna dikete tse tlhano foo. Jesu a fetola a re, "Ba reyeng ba nne fa fatshe ka ditlhapha tse di ka nnang tsa masome a mathano." 15 Mme ba dira jalo. 16 Mme Jesu a tsaya dinkgwe tse tlhano le ditlhapi tse pedi a leba kwa godimo mo loaping a leboga; mme a ngathoganyetsa barutwa ba gagwe go di abela batho. 17 Mme mongwe le mongwe a ja a kgora; mme ga sala diroto di le lesome le bobedi di tletse masalela! 18 Ka letsatsi lengwe fa a le esi, a rapela le barutwa ba gagwe, a tla kwa go bone a ba botsa a re, "Batho ba re ke mang?" 19 Ba mo raya ba re, "Johane wa Mokolobetsi, kgotsa gongwe Elija kgotsa mongwe wa baporofiti ba bogologolo a tsogile mo losong." 20 Hong a ba botsa a re, "Lona lo akanya gore ke mang?" Mme Petere a fetola a re, "O Mesia Keresete wa Modimo!" 21 Mme a ba naya ditaolo tse di gagametseng gore ba se ka ba bolelela ope. 22 A re, "Gonne ke tlaa sotlega thata, e bile ke tlaa ganwa ke baeteledipele ba Sejuta, bagolwane, baperesiti ba bagolo le bomaitseanape ba molao, ke tlaa bolawa mme morago ga malatsi a mararo ke tlaa rula!" 23 Mme a ba raya botlhe a re, "Le fa e le mang yo o batlang go ntshala morago a a tseye mokgoro wa gagwe letsatsi le letsatsi a nne gaufi le nna! 24 Le fa e le mang yo o latlhegelwang ke botshelo ka ntlha ya me, o tlaa bo boloka mme le fa e le mang yo o tseletseng a boloka botshelo jwa gagwe bo tlaa mo lathegela; 25 mme go thusang gore motho a gape lefatshe lotlhe mme a lathegelwe ke botshelo jwa gagwe?" 26 "Fa nna Morwa Motho, ke tla ka kgalalelo ya ga Rara le baengele ba ba boitshepo, ke tlaa ba tlhabelwa ke ditlhong botlhe ba ba ntlhabelwang ke ditlhong le mafoko a me gompieno. 27 Mme boammaaruri jo e leng jone ke jo, bangwe ba lona ba ba emeng fano fa nako e, ga ba kitla ba a swa go fithelela lo sena go bona Bogosi jwa Modimo!" 28 Morago ga malatsi a le lesome le bofera bobedi Jesu a tsaya

Petere, Jakoba le Johane go ya go rapela kwa dithabeng. 29 Mme ya re a ntse a rapela, sefathogo sa gagwe sa simolola go phatsima le diaparo tsa gagwe tsa sweufala tsa lakasela. 30 Hong banna ba babedi Moshe le Elija ba iponatsa mme ba simolola go bua nae. 31 Ba ne ba bonala ba galalela, ba le bantle thata; ba bua ka loso lwa gagwe lo lo tlaa diragalang kwa Jerusalema go diragatsa leano la Modimo. 32 Petere le ba bangwe ba ne ba otsela ebile ba robotse. Hong ba tsoga ba bona Jesu a apesitwe ke phatsimo le kgalalelo, le banna ba babedi ba eme le ene. 33 Erile fa Moshe le Elija ba simolola go tsamaya, Petere a sa ithaloganye, a bile a sa itse se a se buang a kgomoga a re, "Morena, go molemo jang! Re tlaa aga metlaagana e le meraro, o mongwe e le wa gago o mongwe e le wa ga Moshe o mongwe e le wa ga Elija." 34 Mme ya re a santse a bua jaana leru le le phatsimang la ikaga mo godimo ga bone; mme ba tshwarwa ke poifo fa le ba khurumetsa. 35 Mme lentswe le le tswang mo lerung la re, "Yo ke morwaake, yo ke mo ithaletseng; mo utlweng." 36 Mme ya re morago, lentswe le sena go feta, Jesu a bo a le esi le barutwa ba gagwe. Mme ba seka ba bolelela ope se ba se boneng go fithelela morago ga lobaka lo lo leele. 37 Mme ya re ka letsatsi le le latelang fa ba fologa thaba, boidiidi jo bogolo jwa batho jwa mo kgaatlantsha, 38 hong monna mongwe mo bontsing a mo tlhaeletsa a re, "Moruti, mosimane yo o fano yo ke ene fela morwaake, 39 mme mowa o o maswe o tseletse ka go mo tshwenya, o mo dira gore a goe; mme o mo karalatse gore a bo a phoke mafulo mo molomong; o aga o mo keteka, mme ga o ke o bo o mo tlogela. 40 Ke kopile barutwa ba gago gore ba kgoromeletse mowa o o maswe o kwa ntle mme ga ba a ka ba kgona." 41 Hong Jesu a raya barutwa ba gagwe a re, "Batho ba ba logwadi ke lona ba lo senang tumelo, ke tlaa nna le lona lobaka lo lo kae? Mo tliseng kwano." 42 Ya re mosimane a tla mowa o o maswe wa mo digela fa fatshe wa mo karalatsa mo go bothoko. Mme Jesu a laola mowa o o maswe gore o tselele kwa ntle, a fodisa mosimane mme a mo neela rraagwe. 43 Mme batho ba welwa ke kgakgamalo fa ba bona tiragalo ya nonofo ya Modimo. E rile ba sa ntse ba bolela diilo tse di molemo tse o neng a di dira, Jesu a raya barutwa ba gagwe a re, 44 "Ntheetsang lo bo lo gakologelwe se ke se buang. Nna, Morwa Motho, ke tlaa okwa." 45 Mme barutwa ba gagwe ba ne ba sa itse gore o rayang, gonne megopolo ya bone e ne e kaneletswe, ba boifa go mmotsa. 46 Mme jaanong ga tsoga kgang mo gare ga bone gore ke ofe wa bone yo o tlaa nnang mogolo [mo Bogosingjo bo tlang!]. 47 Mme Jesu a bo a setse a itsile megopolo ya bone, a baya ngwanyana fa go ene, 48 mme a ba raya a re, "Le fa e le mang yo o tlhokomelang ngwananyana yo o tshwanang le yo, o tlhokomela nna! Mme le fa e le mang yo o ntlhokomelang o tlhokometse Modimo o o nthomileng. Tlhokomelo ya lona mo go ba bangwe ke sone selekanyo sa bogolo ba lona." 49 Mme morutwa mongwe wa gagwe ebong Johane a tla kwa go ene a re, "Morena, re bone mongwe a dirisa leina la gago go kgoromeletsa mewa e e maswe kwa ntle. Mme ra mo itsa. Ka gonne e ne e se wa setlhapha sa rona!" 50 Mme Jesu a re, "Ga lo a tshwanela go ka bo lo dirile jalo! Gonne mongwe le mongwe yo o seng kgaatlhanong le lona ke wa lona." 51 Mme

ya re ka lobaka lwa gagwe lwa go boela kwa legodimong lo atamela, a tsamaya ka boiketlo go ya Jerusalema ka maikaelelo a a tlhomameng. **52** Mme ya re ka letsatsi lengwe a romela barongwa kwa pele go ya go ba baakanyetsa matlwana mo motseng wa Samaria. **53** Mme batho ba motse oo ba ba koba ba gana go ba amogela ka gore ba ne ba fetela Jerusalema. **54** Mme e rile fa ba utlwa gore go diragetseng, Jakobe le Johane ba raya Jesu ba re, "Morena, a ke re laole molelo gore o fologe kwa legodimong o ba laile?" **55** Mme Jesu a retologa a ba kgalemela, **56** mme ba tsamaela kwa motseng o mongwe. **57** Ya re ba ntse ba tsamaya mongwe a raya Jesu a re, "Nna ke tlaa go sala morago gongwe le gongwe kwa o yang teng." **58** Mme Jesu a mo fetola a re, "Gakologelwa gore ga ke na fa ke robalang teng, bophokoje ba na le mesima e ba nnang mo go yone, le dinonyane di na le dintlhaga, mme nna Morwa Motho ga ke na lelapa mo lefatsheng gothelele." **59** Mme ya re ka nako e nngwe fa a laetsa monna mongwe go nna morutwa wa gagwe, monna a dumela, mme a batla go leta go fitlhela loso lwa ga rraagwe. **60** Hong Jesu a mo fetola a re, "Lesa ba ba senang botshelo jo bo sa khutleng ba dire dilo tse di ntseng jalo. Wena tiro ya gago ke go tla go rerela lefatše lothe Bogosi jwa Modimo." **61** Yo mongwe a re, "Ee, Morena, ke tlaa tla, mme ntelletla go ya go kopa tetelelo mo go bagaetsho." **62** Mme Jesu a mo raya a re, "Le fa ele mang yo o iteseletsang go tsietsaga mo tirong e ke e mo laetseng ga a a nonofela Bogosi jwa Modimo."

10 Hong Morena a tlhophela barutwa ba le masome a supa mme a ba roma ka bobedi ka bobedi mo metseng le metsana e o neng a laotse go e etela. **2** Mme ditaelo tse a neng a di ba naya ke tse: "Rapelang Morena wa thobo gore a romele badiri ba bangwe go tla go lo thusa. **3** Tsamayang jaanong, mme lo gakologelwe gore ke lo roma jaaka dikonyana mo gare ga diphiri. **4** Lo se ka lwa tsaya madi, kgotsa kgetsana, kgotsa le fa e le dilwana tse dingwe le gone lo se ka lwa senya nako mo tseleng. **5** "Mme e ne e re fa lo tsena mo lolwapeng, lo lo segofatsa. **6** Fa lo tshwanelwa ke tshgefotato, tshgefotato e tlaa nna mo go lone; fa e sa lo tshwanele; tshgefotato e tlaa boela mo go lona. **7** "Mme e re fa lo tsena mo motseng, **8** Fa lo amogelesega mo motseng lo se ka lwa tlhatlologanya malwapa, lo nne mo lefelong le le lengwe, lo o ja lo o nwa se lo tlaa bong lo se nwa kwa ntle ga potsa epe. Mme lo se ka lwa etsaetsega ka go amogelesega mo motseng, fa lo amogelesega mo motsing, lo latele ditaelo tse pedi tse: jang sengwe le sengwe se lo se fiwang. Fodisang balwetse; mme e re fa lo ba fodisa lo ba reyeng lo re 'Bogosi jwa Modimo bo gauifi le lona thata gompieno.' **10** "Mme fa batho ba motse ba lo gana, tsamayang le mebila ya one lo re, **11** 'Re tlhothlora lorole lwa motse wa lona mo dinaong tsa rona elekanamiso ya lona mo pontsheng. Lo se le bale gore lo ne lo le gauifi jang le Bogosi jwa Modimo!' **12** "Le Sodoma tota yo o bosula o tlaa nna botoka go na le motse oo ka letsatsi la katholo. **13** A bo go lathega lona, metse ya Korasina le Bethesaida! Gonne fa dikgakamatso tse ke di lo diretseng di ka bo di dirilwe mo metseng ya Ture le Sidona, batho ba yone ba ka bo ba sa bolo go sokologa bogologolo, ba apere letsela la kgetse ba bile ba latsetse melora mo ditlhogong tsa bone go

supa kutlobothoko ya dipelo tsa bone. **14** Ee, Ture le Sidona ba tlaa reng kaga lona? A lo tlaa golediwa kwa legodimong? Nnyaa, lo tlaa folesediwa kwa moleteng." **15** Mme lona batho ba Kaperenama, ke tla reng kaga lona? A lo tla galalediwa kwa legodimong? Nnyaa, lo tla folesediwa kwa moleteng. (Hadēs 986) **16** Mme a raya barutwa ba gagwe a re, "Ba ba lo amogelang ba amogela nna. Mme ba ba lo ganang ba gana nna. Le ba ba nkganang ba gana Modimo o o nthomileng." **17** Mme e rile barutwa ba gagwe ba ba masome a supa ba boa, ba mmolelela ka boitumelo ba re, "Le mewa e e maswe tota e a re utlwa fa re dirisa leina la gago." **18** Mme Jesu a ba raya a re, "Ee, ke bone Satane a wa kwa legodimong jaaka logadima! **19** Mme ke lo neetse taolo mo nonofong yotlhe ya Mmaba le go tsamaya mo gare ga dinoga le diphepeng le go di gataka. Mme ga go na sepe se se tlaa lo utlwisang bothoko! **20** Le fa go ntse jalo, selo sa bothokwa ga se go re mewa e e maswe e a lo utlwa, mme e bo e le gore maina a lona a kwadilwe jaaka baagedi ba legodimo." **21** Mme a tlaa boitumelo jwa Mowa O O Boitshepo a re, "Ke a go baka, Rara Morena wa legodimo le lefatše, ka go fitlhela ba ba nang le ditlhaganyo le bothale, dilo tse, mme wa di senolela ba ba ikanyegang jaaka bana. Ee, ke a le boga, gonne ke ka fa o batlileng ka teng. **22** Ke moemedi wa ga Rre mo dilong tsothle; mme ga go ope tota yo o itseng Morwa fa e se Rara, le gone ga go ope yo o itseng Rara fa e se Morwa le ba Morwa o ba thophang go mo senola." **23** Mme Jesu a retologela kwa barutweng ba gagwe ba ba lesome le bobedi a ba sebetsa a re, "Lo lesego jang go bona dilo tse lo di boneng. **24** Baporofiti ba le bantsi le dikgosi tsa bogologolo ba ne ba eletsa malatsi ano, go bona le go utlwa se lo se boneng le se lo se utlwieng!" **25** Ka letsatsi lengwe moitseanape wa melao ya ga Moshe a tla go leka tumelo ya ga Jesu ka go mmotsa potso e: "Moruti, motho o tshwanelwa ke go dira eng gore a nnele ruri mo legodimong?" (aiōnios 9166) **26** Mme Jesu a fetola a re, "Molao wa ga Moshe wa reng ka ga gone?" **27** Mme moitseanape a fetola a re, wa re, "O tshwanetse go rata Morena Modimo wa gago ka pelo yotlhe ya gago, le ka mowa otlhe wa gago, le ka nonofo yotlhe ya gago, le ka mogopolo otlhe wa gago. Le gore o tshwanetse go rata mong ka wena fela jaaka o ithata." **28** Jesu a mo raya a re, "Go siame, dire sone se mme o tlaa tshela!" **29** Monna a batla go siamisana (go thaela ga lorato lwa gagwe mo bathung bangwe) jalo a botsa a re, "Bangwe ka nna ba fe?" **30** Jesu a mo fetola ka setshwantsho: a re, "Mojuta mongwe o kile ya re a etile go tswa Jerusalema go ya Jeriko a thaselwa ke dinokwane. Tsa mo tseela diaparato le madi tsa ba tsa mo keteka mme tsa mo tlogela a namaletse foo. **31** Ka tshoganetso Moperesiti wa Mojuta a feta ka tsela eo, mme ya re a mmona a mo feta fela. **32** Fela jalo le Molefi ya re a fitlha felong foo, mme a mmona a mo feta fela. **33** "Mme ga tla Mosamaria yo o nyatsegileng, e rile a mmona, a tlhomoga pelo thata. **34** A obama ka mangole fa go ene a tlotso dinto tsa gagwe molemo a ba a di fapa. Mme a pega monna mo tonking a tsamaya fa thoko ga gagwe go fithelela ba tsena hoteleng, kwa o neng a mo oka bosigo jothle teng. **35** Ka letsatsi le le latelang a naya motlhokomedi wa hotele dipula di le masome a mane a mo laela gore a tlhokomele monna yoo a mo raya a re, 'Fa

di shenyegelo tsa gago di feta foo; ke tlaa go duela a a setseng fa ke boa." 36 "Jaanong ke ofe mo go ba bararo ba yo wena o ka reng e ne e le mongwe ka yo o bolailweng ke dinokwane?" 37 Monna a fetola a re, "Ke yo o mo tlhomoge-t seng pelo." Mme Jesu a re, "Ee, jaanong tsamaya o dire fela jalo." 38 Ya re Jesu le barutwa ba gagwe ba tsewetse mo loetong lwa bone go ya Jerusalem ba tsena mo motsaneng mongwe kwa mosadi yo o neng a bidiwa Maratha o neng a ba amogela mo lwapeng lwa gagwe. 39 Monnawe Marea a nna fa fatshe, a reeditse Jesu fa a bua. 40 Mme Morena a mo raya a re, Maratha, tsala ee rategang, o ngongorega thata mo dilong tse tsotlhe. 41 Mme Maratha e ne e le motho yo o mathagathaga, mme a bo a ngongorega fa a ntse a baakanya dijo. Hong a tla kwa go Jesu a re, "Morena, a ga o bone gore ga go a siama gore ke dire tiro yothle nnake ene a ntse fela fa fatshe. 42 Go na le selo se le sengwe fela se o tshwanetseng go amega mo go sone, Marea o se bone, mme ga nke ke se tsaya mo go ene!"

11 Mme ya re ka nako nngwe fa Jesu a ile go rapela, mongwe wa barutwa ba gagwe a tla mo go ene fa a fetsa a re, "Morena re rute thapelo jaaka Johane a rutile barutwa ba gagwe." 2 Mme e ke yone thapelo e a neng a e ba ruta: "Rara leina la gago le titelwe boitshepo jwa lone; Romela Bogosi jwa gago ka pele. 3 Re fe dijo letsatsi le letsatsi. 4 Mme o re itshwarele melato ya rona gonne re itshwaretse ba ba neng ba re leofetse. Mme o se re letle go raelesega." 5 Hong ya re a ba ruta thata ka ga thapelo, a dirisa setshwantsho se a re: "A ke re o etetse tsala ya gago bosigogare o batla go adima dinkgwe di le tharo. O tlaa mo tlhaelets a re, 'Tsala ya me e nketetse e e tswang kgakala mme ga ke na sepe se e ka se jang!' 7 O tlaa fetola a le ka fa ntlwaneng ya borobalo a re, 'Tswee-tswee se ntose. Ga ke ka ke ka go thusa ka nako e!' 8 "Mme ke tlaa go bolelela se, le fa a sa go direla jaaka tsala, fa o tswelela o kokota o tlaa tsoga a go neye sengwe le sengwe se o se batlang ka nthla ya bobelotelele jwa gago. 9 Mme go ntse fela jalo mo thapelong, tswelelang lo lope lo tlaa newa, batlang lo tlaa bona, kokotang lo tlaa bulelwa. 10 Mongwe le mongwe yo o kopang o tlaa amogela; bothe ba ba batlang, ba a bona; mme go bulelwa mongwe le mongwe yo o kokotang. 11 "Mme lona bo rra-bana, fa ngwana wa gago wa mosimane a go kopa senkgwe, a o ka mo naya lentswe? Fa a kopa thapi a o ka mo naya noga? 12 Fa a kopa lee, a o ka mo naya phepheng? [Nnyaa!] 13 "Mme fa baleofi jaaka lona ba naya bana se ba se tlhokang, a ga lo lemoge gore Rraeno yo o kwa legodimong o tlaa dira mo go tona, a neela Mowa O O Boitshepo ba ba o kopang?" 14 Ka nako nngwe, fa Jesu a kgoromelets a ntle mowa o o maswe mo monneng yo o neng a le semumu, lentswe la gagwe la mmoela, a mumuloga. Mme bontsintsi jwa batho jwa itumela thata ba nna mathagathaga, 15 mme bangwe ba re, "Ga go hakgamatse fa a kgoromelets a mewa e e maswe ntle. O tsaya nonofo ya gagwe mo go Satane, Kgosi ya mewa e e maswe!" 16 Bangwe ba kopa gore a dire sesupo sengwe mo loaping go supa go ipitsa ga gagwe a re ke Mesia. 17 Mme ka a ne a itsile dikakanyo tsa mongwe le mongwe wa bone a re, "Bogosi bongwe le bongwe jo bo itwantshang bo a senyega; le lolwapa

lo lo tletseng kganetsanyo le ntwa lo ntse fela jalo. 18 Hong fa se lo se buang e le boammaaruri, gore Satane o a itwantsha ka go nnonotsha go kgoromelets a mewa ya gagwe e e maswe ntle, bogosi jwa gagwe bo ka ema jang? 19 Mme fa ke newa nonofo ke Satane, balatedi ba lona bone? Gonne ba kgoromelets a mewa e e maswe ntle! A lo gopola gore mo go supa gore ba tsenywe ke Satane? Ba botseng fa e le gore lo bolelela ruri! 20 Mme fa ke kgoromelets a ntle mewa e e maswe ka nthla ya nonofo e e tswang mo Modimong, go supa gore Bogosi jwa Modimo bo tsile. 21 "Gonne fa Satane a le thata a bile a tshotse dibolao, a tlhokomela ntlo ya gagwe ya segosi, e bolokesebile. 22 Go fithelela mongwe yo o nonofileng a bile a tshotse dibolao tse di botoka a tla a mo fenya a bo a gapa dibolao tsa gagwe le dilwana tsa gagwe. 23 "Mongwe le mongwe yo e seng wa me o kgalhanong le nna; fa a sa nthuse, o a nthlokofatsa. 24 "E ya re fa mowa o o maswe o dule mo mothong o ye kwa dikakeng o batla boikhutso; mme e re o sa bo bone o boele kwa go yo o neng o tswa mo go ene, 25 mme o fithele lolwapa lwa one lwa gale lo feetswe lo le phepa. 26 Hong 'o' tsamaye, 'o' ye go tliisa mewa e mengwe e e maswe e le supa e e bosula go na le one, mme yothle e tsene mo mothung yoo. Hong motho wa mogolo a bife go gaisa jaaka a ne a ntse pele." 27 Mme ya re a ntse a bua mosadi mongwe mo bontsintsing jwa batho a mo tlhaelets a re, "A Modimo o segofatse mmago, le sehopelo se o duleng mo go sone, le mabele a o a amuleng." 28 Hong a mo fetola a re, "E, mme bogolo go sego bothe ba ba utlwang Lefoko la Modimo ba le dirisa." 29 Ya re bontsi jwa batho bo ntse bo ikgotlhaganyetsa mo go ene, a ba rerela thero e, a re: "Dipaka tseno ke tse di bosula, tsa batho ba ba bosula. Ba tswelela ka go kopa tiragalo e e sa tswaelesegang mo loaping [gore ke supe gore ke Mesia], mme kgakgamalo e ke tlaa ba e nayang fela ke ele ya ga Jona, yo dikai tsa gagwe di neng tsa supegets a batho ba Ninefe gore o rometswe ke Modimo. Sekai sa me se se tshwanang le sone se tlaa supegets a batho ba gore ke romilwe ke Modimo. 31 "Mme ka Letsatsi la Katlholo Mohumagadi wa Sheba o tlaa tsoga mme a supe morafe o ka monwana, a o sekise gonne o tsamaile loeto lo lo leele go tla go reetsa bothale jwa ga Solomone; mme fano go yo mogolo thata go gaisa Solomone [mme o reediwa ke ba se kae fela]. 32 "Batho ba Ninefe le bone ba tlaa tsoga ba sekisa sechaba se, gonne ba sokologile ka lobaka lwa thero ya ga Jona, mme yo mogola go gaisa Jona o fano. [Mme sechaba se ga se mo reetse]. 33 "Ga go ope yo o tshubang lobone a tswa a lo fithele! eseng jalo, o lo baya mo setlhomong go bonesets a bothe ba ba tsenang mo tlung. 34 Matlho a gago a bonesa bokafateng jwa gago. Leitlho le le nang le keletso e e bosula le fifatsa lesedi mme le go latlhela mo leffing. 35 Jalo tlhokomela gore lesedi la gago le se ka la fifala. 36 Fa go tletse lesedi mo go wena, go se na dintlha dipe tsa lefifi, hong bontle jwa gago le jone bo tlaa phatsima jaaka ekete lesedi le go phatsimela ka marang a lone." 37 Ya re a ntse a bua, mongwe wa Bafarasai a mo kopa go ya go ja kwa lwapeng lwa gagwe. Mme ya re a goroga a nna fa fatshe a ja kwa ntle ga go dirisa mokgwa wa Sejuta wa go thapa diatla pele ga a ja. Mme mo ga gagamatsa yo o neng a mo laleditse. 39 Mme Jesu a mo raya a re, "Lona Bafarasai lo

tlhatswa bokafa ntle, mme mo teng lo sa le leswe, go tletse bobelotshelha le bosula! **40** Dieleele ke lona! A Modimo ga oa ka wa dira bokafateng le bokafantle? **41** Bophepa bo supa bopelontle. **42** "Mme a bo go latlhega lona Bafarasai! Gonne le fa lo tlhokomela go ntsha di tsa bosome tsa mo go nnye mo lo go amogetseng, lo lebala gotlhelele kaga tshiamo le lorato lwa Modimo. Lo tshwanetse go kgetha, ee, lo tshwanetse go ntsha di tsa bosome, mme ga lo a tshwanela go tlogela tse dingwe tse di sa dirwa. **43** "A bo go latlhega lona Bafarasai! Gonne lo rata manno a tlotlego mo disenagongeng le go dumedišwa ka maitse go mongwe le mongwe lo lo tsamaya mo mareklong! **44** Ee, kathholo e e boitshegang e lo letlie. Gonne lo tshwana le mabitla a a fithilweng mo nageng. Batho ba feta ka lona ba sena kitso ya gore lo batho ba ba kgopo jang." **45** Mme moitseanape wa tumelo yo o neng a eme foo a re, "Morena, o tshaditše le yone tiro ya me ka se o ntseng o se bua." **46** Mme Jesu a re, "Ee, bogale jo bo ntseng jalo bolo emetse! Gonne lo gatelela batho mo ditaolong tsa tumelo tse di se ka keng tsa kgonega, tse le lona ka bo lona lo se ka keng lwa leka go di tšhegets. **47** A bo go latlhega lona! Gonne lo tshwana fela le bagolwane ba lona ba ba bolaileng baporofiti bogologolo. **48** Babolai ke lona! Lo dumalana le bo rraalona gore se ba neng ba se dira se ne se siame, lo ka bo lo dirile jalo le lona. **49** "Mme se ke se Modimo o se buang kaga lona: 'Ke tlaa romela baporofiti le baapostoloi kwa go lona, mme lo tlaa bolaya bangwe ba bone lo bo lo leleke ba bangwe'. **50** "Mme lona ba dipaka tseno lo tlaa arabela polao ya batlhanka ba Modimo go tswa tshimologong ya lefatše, **51** go tswa polaong ya ga Abele go tšena ka ya ga Sakarea yo o swetseng fa gare ga aletara le felo fa go boitšhepo. Ee, ruri e tlaa lopiwa mo go lona. **52** "A bo go latlhega lona baitseanape ba tuelo! Gonne lo fithela batho boammaaruri. Ga lo bo ikamogelele, mme lo kganela ba bangwe go nna le nako ya go bo dumela." **53** Hong Bafarasai le baruti ba molao ba gakala; mme ya re go tswa foo ba mo gagautlha ka dipotso tse dintsi, ba leka go mo raela gore a bue sengwe se ba ka mo tshwarang ka sone.

12 Mme ya re ka lobakanya na loo bontsintsi jwa batho jwa ntsifala go fithelela ba nna diketekete ba bo ba hereetsega ba gatakana. Mme Jesu a retologela kwa barutweng ba gagwe a ba tshagisa a re, "Mo godimo ga dilo tsothe, lo tlhokomeleng mo Bafarasaiing ba, le ka mokgwa o ba ipayang jaaka ba siame mme ba sa siama. Mme boitimokanyi jo bo kana ga bo ka ke jwa fithelaga ruri. **2** Bo tlaa nna sesupo jaaka sebediso mo bopong jo bo dubilweng. **3** Sengwe le sengwe se ba se buetseng mo lefifiing se tlaa utlwiwa mo pontsheng, le se lo se sebetseng mo matlung a a kwa teng se tlaa anamisiwa mo diithoeng tsa matlo gore bothe ba utlwe! **4** "Ditsala tse di rategang, lo se ka lwa boifa ba, ba ba batlang go lo bolaya. Ka gore ba ka bolaya mmele fela mme ga ba na nonofo mo meweng ya lona. **5** Mme ke lo bolelela yo lo tshwanetseng go mmoifa, boifang Modimo o o nang le nonofo ya go bolaya le go latlhelela mo moleteng. (Geenna 1067) **6** "Tlhwatlhwa ya dithaga tse tlhano ke bokae? A ke dithebe di se kae e seng go feta moo? Le fa go ntse jalo Modimo ga o lebele le fa e le epe ya

tsone. **7** Ebile o itse palo ya meriri ya dithogo tsa lona! Se boifeng gonne lo bothokwa thata mo go one go gaisa sethopho sa dithaga. **8** "Mme ke lo tlhomamisetsa se, ka re: Nna Morwa Motho ke tlaa lo tlotla mo pepeneneng fa pele ga baengele ba Modimo fa lo mpoela jaaka Tsala ya lona mono lefatsheng. **9** Mme ba ba intatolang mo gare ga batho ke tlaa ba itatola fa pele ga baengele. **10** (Le fa go ntse jalo ba ba buang ka ga me ba ka nna ba itshwarelwa, fa ba ba buang kgatllhanong le Mowa O O Boitšhepo ba se kitla ba itshwarelwa). **11** "Mme e re fa lo tlišiwa tšhekong fa pele ga babusi ba ba Sejuta le ba ba nang le ditaolo mo matlung a thuto lo se tshwenyege ka se lo tlaa se buang go iphemela, **12** gonne Mowa O O Boitšhepo o tlaa lo naya mafoko a a tshwanetseng fa lo ntse lo le foo." **13** Hong mongwe a mo tlhaelets a mo bontsintsing jwa batho a re, "Morena, tswée-tswée raya mogolole a kgaogane boswa le nna." **14** Mme Jesu a mo fetola a re, "Rra, ke mang yo o ntrileng moatlhodi mo go lona go akanya dilo tse di ntseng jaaka tseo? **15** Tlhokomeleng lo se ka lwa aga lo elets dilo tse lo senang natso. Gonne botshelo jwa boammaaruri le go tshela ga boammaaruri ga go a ikaega ka dikhumo tsa rona." **16** Mme a fa setshwantsho: a re, "Monna wa mohumi o ne a na le tshimo e e mmu o nonneng e e ntshang thobo e ntsi. **17** Le fa go ntse jalo difalana tsa gagwe di ne di tletse mo go penologang, o ne a sa kake a kgona go tšenya sengwe le sengwe mo teng. Mme a akanya mathata a gagwe, **18** ya re kwa bofelong a go a re, 'Ke a itse, ke tlaa rutla difalana tsa me ke aga tse di tona! Jaanong ke tlaa nna le polokelo e e lekaneng. **19** Mme ke tlaa nna, ke ithaya ke re, "Tsala o na le dithoto tse dintsi tsa dingwaga tse di tlang. Thuba kobo segole! Itumedise botshelo jwa gago ka mofine le basadi o opelelwe." **20** "Mme Modimo wa mo raya wa re, 'Seelelele ke wena; bosigo jono o a swa mme dilo tse tsothe e tlaa nna tsa ga mang?' **21** Ee, mongwe le mongwe le seelelele yo o amogelang dikhumo mo lefatsheng e seng kwa legodimong." **22** Hong a retologela kwa barutweng ba gagwe a ba raya a re, "Se tshwenyegeng ka gore a lo na le dijo tse dintsi go ja kgotsa diaparo go apara. **23** Gonne botshelo bo gaisa dijo le diaparo. **24** Lebelelang magakabe, ga a leme, ga a robe, ga a na difalana go boloka dijo tsa one, mme le fa go ntse jalo a tshela sentle fela gonne Modimo o a a otla. Mme lo tlhwatlhwa kgolo mo go one go gaisa dinonyane! **25** "Jaanong mo godimo ga mo, go thusang gore lo tshwenyege? Go lo thusa ka eng? A go ka lo okelets a botshelo ka letsatsi le le lengwe fela? Nnyaa! **26** Mme fa tlhobaelo e se ka ke ya dira selo se sennye jaaka seo, go thusang go tlhobaela dilo tse di tona? **27** "Lebelelang dithunya: Ga di dire ebile ga di otlhe tlhale mme le fa go ntse jalo Solomone mo kgalalelong yotlhe ya gagwe o ne a sa apare sentle jaaka tsone. **28** Mme fa Modimo o apesa dithunya tse di leng fano gompiono e re ka moso di bo di seyo, a ga lo gopole gore o tlaa lo apesa babelaelo ke lona! **29** Le gone lo se ka lwa tshwenyega ka ga dijo, se se jewang le se se nowang; se tshwenyegeng gotlhelele gonne Modimo o tlaa di lo naya. **30** "Batho botlhe ba itapisa ka senkgwe sa letsatsi le letsatsi, mme Rraeno yo o kwa legodimong o itse go tlhoka ga lona. **31** O tlaa aga a lo naya tsothe tse lo di tlhokang letsatsi le letsatsi fa lo tlhafaletse Bogosi jwa Modimo. **32** "Jalo se boifeng,

lona mothape o monnye gonnye go naya Rraeno boitumelo jo bogolo go lo naya Bogosi. 33 Rekisang tse lo nang natsolo di neye ba ba tlhokang. Mo go tlaa oketsa dikhumo tsa lona kwa legodimong! Mme dikgwama tsa legodimo ga di gagoge e bile ga di na maroba. Dikhumo tsa lona ga di kitla di nyelela, ga go na magodu a a ka di utswang, ga go na motoutwana o o di senyang. 34 Gongwe le gongwe kwa khumo ya gago e leng teng, pelo ya gago le dikakanyo tsa gago di tlaa nna teng. 35 "Nnang lo ipaakantse, lo apere lo iketleeditse, 36 go boa ga Morena wa lona kwa modirong wa lonyalo. Hong lo tlaa bo lo ipaakanyeditse go mmulela kgoro gore a tsene ka nako e o gorogang ka yone a kokota. 37 Go tlaa nna boitumelo jo bogolo mo go ba ba ipaakantseng ba bile ba letile go boa ga gagwe. Ene ka boene o tlaa ba amogela a ba naya bonno a ba a apara seaparo sa baabi ba dijo go ba heha. 38 "O ka nna a tla ka nako ya boroba bongwe bosigo, kgotsa bosigo gare. Mme e tlaa re mogang a tlang, go tlaa nna boitumelo mo bathankeng ba gagwe ba ba ipaakantseng! 39 "Mongwe le mongwe o ne a tlaa mo ipaakanyetsa fa ba ne ba itsile nako tota ya go boa ga gagwe, fela jaaka ba ne ba ka ipaakanyetsa legodu fa ba itsile fa le tlaa tla. 40 Jalo ipaakanyeng ka nako tsoitlhe. Gonnye Nna Morwa Motho, ke tlaa tla go sa solofela ope." 41 Petere a botsa a re, "Morena a o bua le rona fela kgotsa le mongwe le mongwe?" 42 Mme Morena a fetola a re, "Ke bua le mongwe le mongwe yo o ikanyegang yo o nang le tlhologanyo yo mong wa gagwe o mo nayang tiro ya go otlha bathanka ba gagwe. Mme fa mong wa gagwe a boa a fitlhela a dirile tiro e e siameng, go tlaa nna le tuelo, mong wa gagwe o tlaa mmaya motlhokomedi wa dilo tsa gagwe tsoitlhe. 43 "Mme fa motho a simolola go akanya gore, 'Morena wa me ga a nke a tla o diegile,' hong a simolole go itaya banna le basadi ba o tshwanetseng go ba sireletsa, le go senya nako ya gagwe mo medirong ya dino le botagwa, 44 Mme mong wa gagwe o tlaa boa kwa ntle ga kitsiso epe mme a mo ntshe mo maemong a gagwe a go tshephega a mo neye bonno jwa ba ba sa ikanyegeng. 45 O tlaa otlhaiwa mo go bothoko, gonnye le fa a ne a itse tiro ya gagwe o ganne go e dira. 46 "Mme le fa e le mang yo o sa itseng gore o dira phoso o tlaa otlhaiwa fela go le gonnye. Mo go tona go batlwa mo go ba ba neilweng mo go tona, gonnye boikarabelo jwa bone bo bo tona. 47 "Ke tsile go lere molelo mo lefatsheng, mme ruri, ke eletsa jang gore ekete tiro ya me e ka bo e setse e fedile! 48 Go na le kolobetso e e maswe kwa pele ga me, mme ke pitlagane thata go tsamaya e diragala! 49 "A lo gopola gore ke tsile go lere kagiso mo lefatsheng? Nnyaa! Ke lerile ntwale le kgaogano fela. 50 Go tloga fano malwapa a tlaa kgaogana ka bogare, ba bararo ba eme le nna, ba babedi ba nne kgatthanong le nna, kgotsa go nne ka mogwa o sele. 51 "Rrabana o tlaa ntsha maikutlo a sele ka ga me; morwae le e ntshe a sele; mmangwana le morwadie ba tlaa tlhoka kutlwisanyo, mogopolo wa matsalaa motho yo o tlotlegang o tlaa nyadiwa ke ngwetsi ya gagwe." 52 Mme a retologela kwa bontsintsing jwa batho a re, "Fa lo bona maru a simolola go ipopa kwa bophirima, lwa re, 'Pula e tla', mme lo bo lo bolelela ruri. 53 "Fa phefo ya borwa e foka lo re, 'Gompieno go tlaa nna mogote'. Mme ruri go nne jalo. 54 Baitimokanyi! lo lemoga loapi sentle thata, mme

lo gana go lemoga ditlhagiso tse di lo dikaganyeditseng kaga dipaka tse di diphatsa tse di tlang. 55 Ke eng fa lo gana go iponela se se siameng? 56 "Fa o kopana le moganetsi wa gago mo tseleng a isa kgang ya lona kgotleng, leka go letlana nae pele ga kgang e tsena kwa moathoding, e se re gongwe a go isa kwa kgolegelong; 57 gonnye fa seo se diragala ga o kitla o gololesega gape go fithelela thebe ya bofelo e duelwa yotlhe".

13 Mme ya re ka lone lobaka lo a itsisiwe fa Pilatwe a bolaile Bajuta bangwe ba ba neng ba tswa kwa Galalea fa ba ntsha ditlhabelo kwa Tempeleng mo Jerusalema. 2 Mme a ba botsa a re, "A lo akanya gore e ne e le baleofi ba bagolo go feta batho botlhe ba ba tswang Galalea? A ke gone ka fa ba sotlegileng ka gone? 3 Ga go a nna jalo! A ga lo lemoge gore le lona lo tlaa nyelela fa lo sa tlogele ditsela tsa lona tse di bosula lwa sokologela mo Modimong? 4 "Mme lwa reng kaga batho ba ba lesome le bofera-bobedi ba ba neng ba a swa fa kago e e godileng ya Siloama e ba wela. A e ne e le baleofi ba bagolo mo Jerusalema? 5 Ga go a nna jalo! Mme le lona lo tlaa nyelela fa lo sa ikwathae." 6 Hong a dirisa setshwantsho se: "Monna mongwe o kile a tlhoma setlhare sa mofeige mo tshimong mme a tla gangwe le gape go tlhola gore a ga a ka ke a bona loungo lope mo go sone, mme o ne a aga a sa fithele sepe. 7 Mme ya re kwa bofelong a raya motlhokomedi wa tshimo ya gagwe a re a se reme. A mo raya a re, 'Ke letile dingwaga di le tharo ga go ise nke go nne le fa e le feige e le nngwe! Ke eng fa o se ngongoregela?' se tsere phatlha e re ka bong re e dirisetsa sengwe gape.' 8 "Mme motlhokomedi wa tshimo a araba a re, 'Se neye lobaka lo longwe gape. Se lese ngwaga e le nngwe, ke tlaa se tlhokomela ka go se tshela monontshane. 9 Fa re ka bona difeige ngwaga e e tlang go siame, mme fa go sa nne jalo ke tlaa se rema.'" 10 Mme ka Sabata mongwe ya re a ruta mo senagongeng, 11 ga bo go na le sekoa sa mosadi yo o neng a obegile selekanyo sa dingwaga di le lesome le boferabobedi mme a sa kgone go ithamalatsa. 12 Mme Jesu a mmitsa a re, "Mosadi o fodisitswe mo bolwetseng jwa gago!" 13 A mo ama mme a akofa a inamologa. Hong mosadi a leboga a ba a galaletsa Modimo! 14 Mme motlhokomedi wa ntlo ya thuto ya Sejuta a gakala thata ka gonnye Jesu o ne a fodisitse mosadi yoo ka letsatsi la Sabata. A goa a raya batho a re, "Go na le malatsi a le marataro mo bekeng a go dirwang ka one, ke one malatsi a go ka fodisiwang ka one eseng go le Sabata!" 15 Mme Morena a mo fetola a re, "Moitimokanyi ke wena! O dira go le Sabata! A ga o ko o golola dikgomo tsa gago mo marakang a tsone go le Sabata o di kgweletsa kwa metsing. 16 Jaanong a go phoso mo go nna, fela ka ntsha ya gore e re ka letsatsi la Sabata ke golole mosadi yo wa Mojuta mo bokgobeng jwa ga Satane selekanyo sa dingwaga di le lesome le boferabobedi?" 17 Mo ga tlhabela baba ba gagwe ditlhong. Mme batho botlhe ba itumelela tiro e ntle e o e dirileng. 18 Jaanong a simolola go ba ruta kaga Bogosi jwa Modimo; A ba botsa a re, "Bogosi jwa Modimo bo ka tshwantshiwa le eng? Ke ka bo tshwantsha le eng? 19 Bo tshwana le peo e nnye ya mosetara e e jetsweng mo tshimong; ya akofa ya gola ya tswa setlhare, mme dinonyane tsa nna mo gare ga dikala tsa sone. 20 Bo tshwana le sebediso

se se dubetsweng mo boupeng, se se dirang se sa bonwe go fithelela boupe bo gogomoga bo bo bo nna mothofo.” 22 Hong a tsamaya metse le metsana, a ruta fa a ntse a tsamaela kwa Jerusalema. 23 Mongwe a mmtotsa a re, “A go tlaa bolokwa ba se kae fela?” Mme a mo fetola a re, 24 “Kgoro e e yang legodimong e tshesane. Lekang thata go tsena mo go yone, gonne boammaaruri ke gore ba le bantsi ba tlaa leka go tsena mme fa mong wa ntlo a setse a tswetse kgoro, nako e tlaa bo e setse e fetile. Mme e tlaa re fa lo eme kwa ntle lo kokota lo re, ‘Morena re bulele,’ o tlaa fetola a re, ‘Ga ke lo itse’. Hong lo tlaa re, 26 “Mme re jele le wena ebile o rutile mo mebileng ya rona.” 27 “Mme o tlaa fetola a re, ‘Ke a lo bolelela, ga ke lo itse. Ga lo ka ke lwa tla fa lo le molato jaana. Tsamayang.’ 28 “Mme go tlaa nna selelo le khuranyo ya meno fa lo eme kwa ntle lo bona Aberahame, Isake le Jakobe le baporofiti botlhe mo Bogosing jwa Modimo, 29 gonne batho ba tlaa tswa ntsheng tsothe tsa lefatshe go tla go tsaya manno a bone. 30 Mme tlhokomelang se: Ba ba nyatsegang gompiano ba tlaa tlotlwa thata, ba ba tseetsweng kwa godimo gompiano ba tlaa ngotlafadiwa.” 31 Mme ya re morago ga metsotso e se kae Bafarasai bangwe ba mo raya ba re, “Tloga fano fa o batla go tshela, gonne Kgosi Herode o go tsomile!” 32 Jesu a ba fetola a re, “Tsamayang lo reye phokoje yoo lo re ke tlaa tswela ke ntshetsa mewa e e maswe ntle, ke dira dikgakgamatso tsa phodiso gompiano le ka moso; mme ka letsatsi la boraro ke tlaa fitlha kwa ke yang teng. 33 Ee, gompiano, ka moso le ka letsatsi le le latelang! Gonne ga go ka ke ga direga gore moporofiti wa Modimo a bolawe ka kwa ntle ga Jerusalema! 34 “Jerusalema wee! Jerusalema! Motse o o bolayang baporofiti. Motse o o kgobotletsang ka maje ba ba rometsweng go o thusa. Ke ratile gantsi jang go phutha bana ba gago jaaka koko e e sireletsang dikokwana tsa yone ka fa diphekeng, mme ga o aka wa ntetla. 35 Mme jaanong, ntlo ya gago e tlogetse e le letlotla. Ga o kitla o mpona gape go fithelela o re, ‘A go bakwa yo o tlang mo leineng la Morena.’”

14 Mme ka Sabata nngwe ya re a le mo lwapeng lwa leloko lengwe la Legotla la Sejuta, Bafarasai ba bo ba mo lebeletse thata jaaka bophakalane go bona gore a o tlaa fodisa monna yo o neng a le foo a lwala go tala metsi mo ditokololong. 3 Mme Jesu a raya Bafarasai le bomaitseanape ba ba neng ba le foo a re, “A go kafa molaong go fodisa motho ka letsatsi la Sabata, kgotsa nnyaa?” 4 Mme ya re ba gana go mo araba, Jesu a tshwara monna yo o lwalang ka letsogo a mo fodisa a mo rebola go tsamaya. 5 Hong a retologela kwa go bone: A botsa a re, “Ke ofe wa lona yo o sa direng ka letsatsi la Sabata? Fa kgomo ya gago e wela mo sedibeng, a ga o ka ke wa tswela pele go e ntsha ka bonako?” 6 Gape ba tlhoka karabo. 7 Mme erile fa a lemoga fa batho botlhe ba ba tsileng dijong ba leka go nna gaufi le lomati lwa bojelo, a ba gakolola a re: 8 “Fa lo laleditswe modiro wa nyalo, lo se ka lwa aga lo lwela go nna kwa mannong a a botoka. Gonne fa mongwe yo o tlotlegang thata go lo gaisa a goroga, 9 ene yo o laleditseng o tlaa mo lere fa o ntseng gone mme a re, ‘A monna yoo a nne fa mo boemong jwa gago’. Mme wena, ka ditlhong o tlaa tshwanelwa ke go nna mo setilong se se setseng kwa morago ga lomati lwa bojelo! 10 “Jaanong dira se mo boemong jwa seo, simolola

kwa morago; mme fa yo o go laleditseng a go bona, o tlaa tla a go raya a re, ‘Tsala, re go bonetse bonno jo bo botoka go na le jo! Hong o tlaa tlotlega fa pele ga balalediwa ba bangwe botlhe! 11 Gonne mongwe le mongwe yo o lekang go itlotla o tlaa ngotlafadiwa; mme yo o ikokobetsang o tlaa tlotlwa.’” 12 Hong a retologela kwa go yo o mo laleditseng a re, “E re fa o dira dijo, o se ka wa laetsa ditsala, bomorwarrago, bagaeno, le bahumi! Gonne le bone ba tlaa go laetsa. 13 Mme mo boemong jwa mo, o laletse bahumanegi, digole, bathhotsi le difofu. 14 Hong e tlaa re ka tsogo ya basiami, Modimo o tlaa go duelela go laetsa ba ba se ka keng ba go laetsa.” 15 Erile monna mongwe yo o neng a ntse fa lomating lwa bojelo le Jesu a utlwa dilo tse a goa a re, “Go tlaa nna boitumelo jo bo kae go tsena mo Bogosing jwa Modimo!” 16 Mme Jesu a fetola ka setshwantsho se: “Monna mongwe o kile a baakanya modiro o mogolo mme a dira ditaletso tse dintsi. 17 Erile fa gotlhe go siame, a roma mothanka wa gagwe go itsise balalediwa gore ke nako ya gore ba tle. 18 Mme botlhe ba simolola go dira diipato. Mongwe a re, ke gone fela o neng a reka tshimo mme o batla go ya go e bona, mme a kopa go itshwarelwa. 19 Yo mongwe a re ke gone fela a neng a reka sepane sa dipholo tse some mme o batla go di lekeletsa. 20 Yo mongwe e ne e le gone fela a neng a nyala, ka lebaka leo ga aa ka a tla. 21 “Mothanka a boa a ya go bolelela mong wa gagwe se ba se buileng. Mong wa gagwe a gakatsega thata mme a mo raya a re, tlhaganelele mo mebileng le mo dikgorong tsa motse o laletse bakopi, digole, bathhotsi le difofu. 22 Mme ga bo go santse go na le phatlha. 23 “Mong wa gagwe a re, ‘Go siame, jaanong tswela mo diferwaneng tsa motse le mo morago ga dikgoro o kope mongwe le mongwe yo o mmonang go tla, gore ntlo e tle e tlale. 24 Gonne ga go ope mo go ba ke ba laleditseng pele yo o tlaa itatswang mo go se ke se ba baakanyeditseng.’” 25 Mme batho ba bantsi ba ne ba mo setse morago. Hong a retologa a ba raya a re, 26 “Fa mongwe a batla go nna molatedi wa me o tshwanetse go nthata bogolo go gaisa rraagwe, mmaagwe, mosadi wa gagwe, bana ba gagwe, bomonnawe kgotsa bokgaitadie-ee, go gaisa le jone tota botshelo jwa gagwe, kwa ntle ga moo ga a ka ke a nna morutwa wa me. 27 Ebile ga go na ope yo o ka nngang morutwa wa me fa a sa sikare mokgoro wa gagwe a ntshala morago. 28 “Mme lo se ka lwa simolola go fithelela lo bala tlhathlwa. Gonne e mang yo o ka simololang kago, kwa ntle ga go bona pele tekanyo le go bona gore a o na le madi a a lekanyeng go duela melato. 29 E seng jalo, o ka kgona go fetsa motheo pele ga a thaelelwa ke madi. Mme ka ntsha ya moo mongwe le mongwe o ka mo tshaga jang! 30 “Mme ba tlaa mo sotla ba re, ‘A lo bona motho yo o fa yole? O simolotse kago ele mme o thaeletswe ke madi pele ga a e fetsa!’ 31 “Kgotsa ke efe kgosi e e ka lorang go ya ntsweng pele ga e nna fa fatshe le bagakolodi ba yone ba buisanya gore a masole a selekanyo sa dikete tse di lesome a itekanetse go ka fenywa a a dikete tse di masome a mabedi a a kgathanonng nae? 32 Mme fa mogopolo o sa kgonege, e re fa masole a mmaba a sa le kgakala, e rome batsereganyi go buisanya ka mafoko a kagiso. 33 Jalo ga go na ope yo o ka nngang morutwa wa me fa a sa nna fa fatshe pele ga a bala masego a gagwe, mme a a latlhela otlhe mo go nna.

34 Tshiamo ya letswai ke eng fa le latlhegetswe ke molodi? 35 Letswai le le senang molodi ga le na tiro le fa e le go nna monontshane. Ga le na tiro mme le tshwanetse go latlhelela kwa ntle. Reetsang sentle, fa lo batla go tlhologanya phuthololo ya me.”

15 Mme bakgethisi ba ba sa ikanyegeng le baleofi ba ne ba tla gantsi go reetsa dithero tsa ga Jesu, 2 mme mo ga tsosa dingongorego mo baeteledingpele ba tumelo ya Sejuta le bomaitseanape ba melao ya Sejuta ka gore o na a tsalane le baleofi ba ba ntseng jalo, ebile aa ja le bone! 3 Hong Jesu a dirisa setshwantsho se: “Fa o na le dinku di le lekologo mme nngwe ya tsone ya bo e ya le naga, e timela a ga o ka ke wa tlogela tse di masome a ferabongwe le metso e fera bongwe wa latela e e timetseng go fithelela o e bona? 5 Mme o tlaa e baya mo magetleng o ya gae ka boitumelo. 6 Ere fa o goroga o phuthe ditsala tsa gago le ba o agileng nabo go itumela le wena ka gore o bonye nku e e neng e timetse. 7 “Go ntse fela jalo, legodimo le tlaa itumelela moleofi a le mongwe yo o sokologelang mo Modimong go na le ba ba masome a ferabongwe le metso e ferabongwe, ba ba neng ba sa timela! 8 “Setshwantsho se sengwe ke se: Mosadi o na le diselefera di le lesome tsa madi mme a bo a latlhegelwa ke e le nngwe. A ga a ka ke a tshuba lobone go sekaseka mo dihukung tsa ntlo le go feela mo dikgokgotshwaneng le mo diphatlheng go fithelela a e bona. 9 A mme ga a ka ke a bitsa ditsala tsa gagwe ba a agileng nabo go itumela nae? 10 Fela jalo go na le boitumelo fa pele ga baengele ba Modimo fa moleofi a le mongwe a sokologa.” Go tshwantsha ntsha e ka bottlalo, a ba bolelela polelo e: 11 “Monna o ne a na le bomorwawe ba le babedi. 12 Ya re yo mmotlana a raya rraagwe a re, ‘Ke batla seabe sa boswa jwa gago gompieno, go na le go letela go fithelela o swa!’ Rraagwe a dumela go kgaoganyetsa bomorwawe ba babedi khumo ya gagwe. 13 “E rile morago ga malatsi a se kae morwawe yo mmotlana a phutha dilwana tsa gagwe a etela kwa lefatsheng le le kgakala, koo a feta a senya madi a gagwe mo medirong le mo boakeng. 14 Mme ya re mo lobakeng lo madi a gagwe a neng a fedile ka lone, leuba, le legolo la wela lefatsho, mme a simolola go bolawa ke tlaa. 15 A tshwenya morui mongwe wa lefatsho leo gore a mo hire go otlala dikolobe tsa gagwe. 16 Mosimane o ne a bolawa ke tlaa mo a neng a bona le tsone dijo tsa dikolobe di mo siametse. Mme ga seka ga nna le ope yo o mo nayang sepe. 17 “E rile kwa morago a tlelwa ke tlhologanyo, a ithaya a re, ‘Kana le bone tota banna ba ba hirilweng kwa gaetsho ba na le dijo tse di lekanyeng, di bo di sala, mme nna fano, ke bolawa ke tlaa! 18 Ke tlaa ya gae kwa go rre ke re, “Rra, ke leofetse legodimo le wena.” 19 Mme ga ke thole ke tshwanetse go bidiwa morwao. Tswee-tswee mma ke nne modiredi wa gago.’ 20 “Jalo a boela gae kwa go rraagwe. Mme e rile a sa le kgakala, rraagwe a mmona a tla, mme a mo tlhomogela pelo ka lorato a taboga a mo tlamparela a bo a mo atla. 21 “Morwawe a mo raya a re, ‘Rra, ke leofetse legodimo le wena, mme ga ke na tshwanele yo go bidiwa morwao—’ 22 Mme rraagwe a raya bathanka a re, ‘Itlhaganeleng! Tlisang seaparo se se ntle mo tlung lo mo apese. Le mhitshana wa bothokwa go o rwala mo monwaneng wa gagwe le dithako. 23

Mme lo bolaya kgongwana e e nonneng e re nang nayo mo saking. Re tshwanetse go dira mokete, 24 gonne morwaake yo, o ne a sule mme o rudile. O ne a timetse mme o bonyewe! Hong modiro wa simologa. 25 “Ka nako eo, morwawe yo mo tona o ne a dira mo tshimong, erile fa a boela gae a utlwa moopelo wa mmimo o tswa mo tlung; 26 mme a botsa mongwe wa bathanka gore go diregang? 27 “A mo raya a re, ‘Monnao o buile mme rrago o bolaile kgongwana e e nonneng o baakantse modiro o mogolo wa go itumelela go boa ga gagwe a sa bolaisega gope’. 28 “Mogolowe a shakgala thata a bo a se ka a tsena mo teng. Rraagwe a tswela kwa ntle a mo rapela, 29 mme a fetola a re, ‘Mo dingwageng tse tsotlhe ke go diretse thata mme ga ke ise nke ke gane go dira sepe se o neng o re ke se dire; mme mo lobakeng loo lotlha go o ise o ke o nneye le fa e le potsane go dira modiro le ditsala tsa me. 30 Le fa go ntse jalo ngwana yo wa gago yo o boileng a sena go senya madi mo boakeng, o mo itumeletse ka go mo tlhabela kgongwana e e nonneng e re neng re na nayo mo saking’. 31 “Mme rraagwe a mo raya a re, ‘Bona morwaake yo o rategang, wena le nna re atamalane thata, sengwe le sengwe se ke nang naso ke sa gago. 32 Mme go tshwanetse go dirwa modiro. Gonne ke monnao; yo o neng a sule mme o rudile, yo o neng a timetse mme o bonyewe.”

16 Mme Jesu a bolelela barutwa ba gagwe polelo e: “Monna wa mohumi o kile a hira molebeledi go tlhokomela dilo tsa gagwe mme ka bonako ga utlwa fa molebeledi a sa ikanyege. 2 Mme mong wa gagwe a mmitsa a mo raya a re, Ke eng se ke se utlwang ka go nkutswela ga gago? Baakanya pego ya gago, gonne o tshwanetse go tlogela tiro. 3 “Mme molebeledi a ithaya a re, ‘Ke tlaa dirang? Fano ke feditse mme ga ke na nonofo ya go tsamaya ke epa mesele, le gone go kopa go ntlhabisa dithong. 4 Ke itse selo se fela! Gore ke tlaa nna le ditsala tse dintsi go ntlhokomela fa ke tswa mo tirong.’ 5 “Mme a laletsa mongwe le mongwe yo o neng a kolota mong wa gagwe go tla go buisana nae. A botsa wa ntsha a re, ‘O mo kolota bokae?’ Monna a fetola a re, ‘Molato wa me ke selekanyo sa dinkgwana di le magkolo a ferabobedi le masome a matlhano a lookwane.’ Molebeledi a mo raya a re, ‘Ee, tumalano e o e kwadileng ke e: e senye o kwale e e leng bontlha bongwe jwa yone.’ 7 “Mme a botsa monna yo mongwe a re, ‘Wena o mo kolota bokae?’ A fetola a re, ‘Sekete sa dikgetse tsa mabele. Mme molebeledi a re tsaya lokwalo lwa gago o kwale o re, di magkolo a ferabobedi.’ 8 “Monna wa mohumi a tshwanelewa ke go baka molebeledi yo o bolotsana ka go dira bothale jo bo kalo. Mme ke boammaaruri gore banni ba lefatsho le, ba thalefile thata [mo go sa ikanyegeng! go gaisa batho ba Modimo. (aiōn g165) 9 Mme a ke tshwanetse go lo raya ke re lo dire jalo, go reka botsalano ka go tsietsa? A mo go tlaa lo tlhomamisetsa go tsena ga lona mo legaeng la bosakhutleng kwa legodimong? (aiōnios g166) 10 Nnyaa! Gonne fa lo sa ikanyege mo dilong tse di potlana, ga lo ka ke lwa ikanyega mo go tse di kgolo. Fa lo dira tsietsa e potlana, ga lo ka ke lwa ikanyega mo dilong tse dikgolo. 11 Mme fa lo sa ikanyege kaga mahumo a lefatsho, ke mang yo o tlaa lo ikanyang mo mahumong a boammaaruri a legodimo? 12 Mme fa lo sa ikanyege ka madi a batho ba

bangwe, lo ka ikanyega jang ka madi a e leng a lona. 13 "Gonne le fa e le wena kgotsa mongwe fela ga go ope yo o ka direlang barena ba babedi. O tlaa ila yo mongwe mme o rate yo ka mongwe, kgotsa go nne ka mokgwa mongwe o sele. O tla nna mafolofolo ka yo mongwe mme o nyatse yo mongwe. Ga o ka ke wa direla Modimo le madi!" 14 Mme Bafarasai, ba ba ratang madi thata, ba mo sotla ka nthla ya mo gotlhe. 15 Mme a ba raya a re, "Lo apara tshiamo ya lona mo pepeneneng, mme Modimo o itse bosula jwa dipelo tsa lona. Go ipaya ga lona jaaka ekete lo siame go lo tlisetsa tlotlo mo bathong, mme ke makgapha fa pele ga Modimo. 16 Go tla go fitlha mo motlheng o Johane wa Mokolobetsi o neng a simolola go rera ka one, melao ya ga Moshe le ya Baporofiti e ne e le yone e e lo kaelang. Mme Johane a lo itsise kaga: Mafoko a a Molemo gore bogosi jwa Modimo bo tlaa tla ka bonako. Mme bontsinti jwa ba ba eletsang ba itshukunyetsa mo go jone. 17 Mme moo ga go reye gore molao o seryegetswe ke thata le fa e le ka nthanyana epe. O nonofile ebile ga o na botshikhinngo fela jaaka legodimo le lefatsho. 18 "Mme jalo fa mongwe a tlhala mosadi wa gagwe a nyala o sele o dira boaka, mme yo o nyalang mosadi yo o tlhadihweng le ene o dira boaka". 19 Hong Jesu a re, "Gonne go ne go na le monna mongwe wa mohumi, yo o neng a apara sentle a nna mo letlepong mo monateng ka letsatsi le letsatsi. 20 Mme ya re ka letsatsi lengwe Lasaro, wa mokopi, yo o neng a le dintho, a lala fa kgorong ya gagwe. 21 E ne e tle e re a rapame foo a laletse masalela a a wang mo lomating lwa bojelo jwa monna wa mohumi, dintsa di latswe dintho tsa gagwe. 22 Mme ya re kwa bofelong mokopi a swa mme a tswa ke baengele go ya go nna le Aberahame mo felong ga baswi ba ba siameng. Mme monna wa mohumi le ene a swa a fitlha, 23 mme mowa wa gagwe wa ya moleting. E rile fa a le koo, mo tlhokofatsong a lebelala Lasaro a le kgakala a na le Aberahame. (Hadēs g86) 24 "Mme a goa a re Rre Aberahame, Nkutlwela bothoko! romela Lasaro kwano fela gore a ine nthla ya monwana wa gagwe mo metsing go ntsidifatsa lolerme, gonne ke mo tlhokofatsong e e maswe mo dikgabung tse. 25 "Mme Aberahame a mo raya a re, 'Morwaaka, gakologelwa gore erile mo botshelong jwa gago o ne o na le sengwe le sengwe se o se batlang, mme Lasaro o ne a sena sepe. Jaanong o fano o a gomodiwa mme wena o mo tlhokofatsong. 26 Gape kwa ntle ga moo, go na le phata e tona e e senang boleketsetso, e e re kgaoganyang, mme mongwe yo o batlang go tla kwa go wena a tswa fano o kganelwa ke losi lwa yone; le gone ga go ope yo o ka kgabaganyetsang ka kwano go rona'. 27 "Mme monna wa mohumi a re, 'Ao, Rre Aberahame, tswee-tswee mo romele kwa legaeng la ga rre, 28 gonne go na le bana ba ga rre ba le batlhano ba basimane, go ba thagisa kaga felo fano ga tlhokofatso e e bothoko gore ba se ka ba tla fano fa ba a swa.' 29 "Mme Aberahame a re, 'Dikwalo di ba thagisitse gangwe le gape. Bomorwarrago ba ka di bala ka nako nngwe le nngwe e ba e ratang'. 30 "Mme monna wa mohumi a fetola a re, 'Nnyaa Rre Aberahame ga ba kitla ba itshwenya ka go di bala. Mme fa mongwe a rometswe kwa go bone a tswa mo baswing ke gone ba ka sokologang mo dibeng tsa bone.' 31 "Hong Aberahame a mo fetola a re, 'Fa ba

sa reetsa Moshe le baporofiti ga ba kitla ba reetsa le fa mongwe a ka tsoga mo baswing."

17 Mme ya re ka letsatsi lengwe Jesu raya barutwa ba gagwe a re, "Go tlaa aga go le dihaelo tsa go leofa, mme a bo go lathega motho yo o raelang. 2 Fa a ne a latlhetse mo lewatlang ka lentsewe le legolo le fapeletswe mo molaleng wa gagwe, o ne a ka bo a le botoka thata go na le go otlhaelwa go tlhokofatsa mewa ya ba bannye ba. Ke a lo thagisa! Kgalemela morwa-rrago fa a leofa mme o mo itshwarele fa a ipona molato. 4 Le fa a go leofela ga supa ka letsatsi mme nako nngwe le nngwe a boela go wena a kopa maitshwarelo, mo itshwarele." 5 Ka letsatsi lengwe Baaposetoloi ba raya Morena ba re, "Re tlhoka tumelo e kgolo; re ka e bona jang?" 6 Jesu a ba araba a re, "Fa tumelo ya lona e le selekanyo sa peo ya mosetara, e tlaa bo e le kgolo thata go kumula setlhare se se kwa sele sa mosikamine le go se thoma mo teng ga lewatle! Taolo ya lona e ne e ka diragala ka bofelo! 7 Fa mothanka a tswa go lema kgotsa a tswa go disa dinku, ga a nne fela fa fatshe a a ja, mme pele o baakanyetsa mong wa gagwe dijo tsa maitseboa pele ga a a ja tsa gagwe. Mme ga a lebogwe, gonne o dira se a tshwanetseng go se dira. 10 Fela jalo, fa lo nkutlwa, ga lo a tshwanela go galalediwa. Gonne lo dirile tiro ya lona!" 11 E rile ba ntse ba tswetse mo loetong lwa go ya Jerusalema, ba tsena fa molelwane o o fa gare ga Galalea le Samarea, 12 mme ya re ba tsena mo motsaneng oo, baleperwa ba le some ba bo ba emetse kwa kgakajana, 13 ba goa ba re, "Jesu, Morena, re utlwele bothoko!" 14 Mme a ba leba a re, "Tsamayang lo ye kwa moperesitiing wa Sejuta lo mo supegetse gore lo fodisitswe!" Mme ya re ba tsamaya, boleperwa jwa bone jwa nyelela! 15 Mme mongwe wa bone a boela kwa go Jesu a goa a re, "A go galalediwe Modimo, ke fodisitswe!" 16 A wela fa fatshe fa pele ga dinao tsa ga Jesu, a lebile fa fatshe mo loroleng a lebogela se a se dirileng. Monna yo e ne e le Mosamarea yo o nyatsegileng. 17 Mme Jesu a botsa a re, "A ga ke a fodisa banna ba le lesome? Ba ba ferang bongwe ba kae?" 18 A ke Modichaba yo fela yo o boileng go tla go galaletsa Modimo?" 19 Mme Jesu a mo raya a re, "Ema o tsamaye tumelo ya gago e go fodisitse." 20 Mme ya re ka letsatsi lengwe Bafarasai ba botsa Jesu ba re, "Bogosi jwa Modimo bo tlaa simologa leng? Jesu a ba fetola a re, Bogosi jwa Modimo ga bo tle ka ditshupo tse di bonalang. 21 Ga lo ka ke lwa kgona gore lo re, 'Bo simologile fano mo lefelong le kgotsa kwa ntheng ele ya lefatsho'. Gonne Bogosi jwa Modimo bo mo go lona." 22 Mme morago a bua gape kaga selo se le barutwa ba gagwe. A ba raya a re, "Lobaka lo e tla lo tlaa nthloafalelang ka lone go nna le lona le fa e le letsatsi le le lengwe fela mme ke tlaa bo ke seyo fa." 23 "Dipolelo di tlaa tla mo go lona tsa gore ke boile le gore ke mo lefelong le kgotsa le; mme lo se ka lwa di dumela kgotsa lwa ya go mpatla. 24 Gonne e tlaa re fa ke boa, lo tlaa itse kwa ntle ga pelaelo epe. Ke tlaa bo ke tshwana le logadima lo lo phatsimang go kgabaganya loapi. 25 Mme pele ke tshwanetse go sotlega thata le go ganwa ke sechaba se sotlhe. 26 "[E tlaa re fa ke boaj] lefatsho le tlaa [tlhokomologa dilo tsa Modimo] jaaka batho ba lobaka lwa ga Noa. 27 Ba ne ba a ja, ba a nwa,

ba nyala, sengwe le sengwe se siame go fitlhelela letsatsi le Noa o neng a tsena mo tlung e e kokobalang ka lone mme morwalela wa tla wa senya botlhe. **28** "Mme lefatshe le tlaa nna jaaka mo metlheng ya ga Lote: Batho ba ne ba dira ditiro tsa bone tsa letsatsi le letsatsi, ba a nwa ba a ja, ba reka ba rekisa, ba tlhoma diithare ba aga, **29** go fitlhelela mo mosong o Lote o neng a tswa mo Sodoma. Hong molelo le sebafole tse di neng di tswa kwa legodimong tsa ba nyeletsatsi botlhe. **30** Ee, go tlaa 'bo go berekwa' jaaka gale go fitlhelela lobaka lwa go boa ga me. **31** "Ba ba tlaa bong ba se mo lwapeng ka letsatsi leo ba seka ba ya go phutha; ba ba mo nageng ba se ka ba boela kwa motsing. **32** Gakologelwang se se neng sa diragalela mosadi wa ga Lote! **33** Le fa e le mang yo o ngaparetseng botshelo jwa gagwe bo tlaa mo lathegela mme le fa e le mang yo o lathegelwang ke botshelo jwa gagwe o tlaa bo boloka. **34** Mo bosigong joo banna ba le babedi ba tlaa bo ba robetse mo tlung e le nngwe mme mongwe o tlaa tsewa yo mongwe a tlogetse. **35** Basadi ba le babedi ba tlaa bo ba dira botlhe mo tlung; yo mongwe o tlaa tsewa, yo mongwe o tlaa tlogetse; mme go tlaa nna fela jalo mo banneng ba ba dirang ba bapile mo tshimong." **37** Mme barutwa ba botsa ba re, "Morena, ba tlaa bo ba isiwana kae?" Jesu a fetola a re, "Kwa setoto se leng gone, manong a phuthegela gone!"

18 Mme ya re ka letsatsi lengwe Jesu a bolelela barutwa ba gagwe polelo ya go ba supegetsatsi ka fa go tlokegang ka teng gore ba rapele ka metlha yotlhe le go ba bontsha gore ba tshwanetse go tswela ba rapela go fitlhelela ba bona karabo. **2** A ba raya a re, "Go kile ga bo go na le moathodi mo motsing, monna yo o ne a sa boife Modimo a le lonyatso lo logolo mo go botlhe. **3** Mme motholagadi mongwe wa motse oo o ne a tla kwa go ene nako le nako go ikopela tshoko kgatshanong le monna yo o neng a mo utlwisitse bothoko. **4** "Moathodi o ne a mo tlhokomologa ka lobakanyana mme ya re morago a mo lapisa. A ithaya a re, 'Ga ke boife Modimo le fa e le motho, mme mosadi yo o a ntshwenya. Ke tlaa mo athola gone o ntapisa ka go boaboa ga gagwe.'" **6** Hong Morena a ba raya a re, "Fa e le gore moathodi yo o bosula o ka dira jalo, **7** a ga lo akanye gore Modimo o tlaa atholela batho ba one ka tshiamo ba ba o lopang bosigo le motshegare?" **8** Ee! O tlaa ba araba ka bonako! Mme potsa ke gore: Fa nna Morwa motho, ke boa, ke tlaa fitlhela ba le kae ba ba nang le tumelo [ebile ba rapela]?" **9** Hong a ba bolelela polelo ya bangwe ba ba kileng ba ikgantsha ka tshiamo ya bone ba nyatsa ba bangwe. **10** "Banna ba babedi ba kile ba ya kwa Tempeleng go ya go rapela. Mongwe e ne e le moikgantshi wa Mofarasai, yo o iponang tshiamo yo mongwe e le mokgethisi wa motsietsi. **11** Mme moikgantshi wa Mofarasai a 'rapela' thapelo e: 'Ke a leboga Mo-dimo, ga ke moleofi jaaka ba bangwe, bogolo jang jaaka mokgethisi yole! Gonne ga ke tsietse, ga ke dire boaka, **12** Ke itima dijo gabedi mo bekeng, mme ke naya Modimo di tsa bosome jwa dilo tsotlhe tse ke di bapalang.' **13** "Mme mokgethisi yo o bosula a emetse kwa kgakala a sa batle go lerala kwa legodimong fa a rapela, a ititaya sefuba ka kutlbothoko, a goa a re, 'Modimo nkutlwela bothoko nna moleofi!' **14** Ke a lo bolelela, moleofi yo, e seng

Mofarasai, o ne a boela gae a itshwaretswe! Gonne baikgantshi ba tlaa ngotafadiwa mme ba ba ingotlang ba tlaa godisiwa." **15** Ka letsatsi lengwe basadi bangwe ba tisa masea a bone kwa go ene go ba ama le go ba segofatsa. Mme barutwa ba ba raya ba re ba tsamaya. **16** Hong Jesu a ipiletsa bananyana mme a raya barutwa a re, "Lesang bananyana ba tle kwa go nna! Lo se ka lwa ba kganela! Gonne Bogosi jwa Modimo ke jwa batho ba dipelo tsa bone di nang le tumelo jaaka tsa bananyana. Mme le fa e le mang yo o senang tumelo e e tshwanang le ya bone, ga a killa a tsena ka dikgoro tsa Bogosi!" **18** Ka bofefo Moeteledipele wa tumelo ya Sejuta a mmotsa potsa e: "Morena yo o molemo ke ka dira jang go tsena mo legodimong?" (*aiōnios g166*) **19** Mme Jesu a mo raya a re, "A o lemoga se o se buang fa o mpitsa 'molemo'? Ke Modimo fela ke one o molemo, e seng ope gape. **20** Mme ka fa potsong ya gago, o itse gore melao e e lesome ya re, o seka wa dira boaka, o seka wa bolaya, o seka wa utswa, o se ka wa aka, tlotla batsadi ba gago, le e mengwe jalo." **21** Mme monna a fetola a re, "Ke tlhokometse mongwe le mongwe wa melao eo go tswa bonnyeng jwa me." **22** Hong Jesu a mo raya a re, "Go santse go na le sengwe se o se tlhokang, rekisa tsotlhe tse o nang natsa o abele bahumanegi madi, e tlaa nna yone khumo ya gago kwa legodimong, mme o tle, o ntshale morago." **23** Mme e rile fa monna a utlwa se, a tsamaya ka kutlo bothoko, ka a ne a humile thata. **24** Jesu a mo lebelela a tsamaya mme a raya barutwa ba gagwe a re, "Go thata jang gore mohumi a tsene mo bogosing jwa Modimo! **25** Go bonolo mo kammeleng go tsena ka leroba la nna bogolo go mohumi go tsena mo Bogosing jwa Modimo!" **26** Mme ba ba mo utlwileng jaana ba gakamala ba re, "Fa go le thata jalo, batho ba ka bolokeseja jang?" **27** A ba fetola a re, "Modimo o ka dira se batho ba se ka keng ba se dira!" **28** Mme Petere a re, "Re tlogetse malwapa a rona ra go sala morago." **29** Jesu a fetola a re, "E, mme botlhe ba ba dirileng jaaka lona, ba tlogetse lolwapa, mosadi, bomorwarraagwe, batsadi kgotsa bana ka nthla ya Bogosi jwa Modimo, **30** ba tlaa duelwa gantsintsi ka lobaka lo, le go amogela botshelo jo bo sa khutleng mo lefatsheng le le tlang." (*aiōn g165, aiōnios g166*) **31** Hong a phutha ba ba Lesome le Bobedi a ba raya a re, "Jaaka lo itse, re ya Jerusalem. Mme fa re tsena koo dipolelelo-pelo tsa baporofiti ba bogologolo ka ga me di tlaa diragala. **32** Ke tlaa neelwa Badichaba go sotlwa le go kgwelwa mathe le go gagautlwa mo go tshabisang diithong, **33** ke tlaa itewa ke bo ke bolawa. Mme ka letsatsi la boraro ke tlaa tsoga gape." **34** Mme ba seka ba tlhaloganya selo se o neng a se bua. O ne a bonala ekete o bua dinaane fela. **35** Mme ya re ba atamela Jeriko, ga bo go le monna mongwe wa sefoku a ntsa fa thoko ga tsela, a kopa mo bafeting. **36** E rile a utlwa modumo wa bontsintsi bo feta a botsa gore go diragalang? **37** A bolelelwa gore Jesu wa Nasaretha o a feta. **38** Hong a simolola go goa a re, "Jesu, Morwa Dafide, nkutlwela bothoko!" **39** Mme bontsintsi jwa batho jo bo neng bo eteletse Jesu pele jwa leka go didimatsa monna yo, mme a goela kwa godimo a re, "Morwa Dafide nkutlwela bothoko!" **40** E rile Jesu a goroga fa lefelong leo a ema a re, "Lereng monna yoo wa sefoku kwano." **41** Hong Jesu a botsa monna a re, "O batlang"? A kopa a re, "Morena

ke batla go bona!" 42 Jesu a mo raya a re, "Go siame, bona! Tumelo ya gago e go fodsitse!" 43 Mme ka bofelo monna a kgona go bona, a latela Jesu, a baka Modimo. Mme botlhe ba ba neng ba go bona go direga le bone ba baka Modimo.

19 Mme ya re a feta mo Jeriko, monna mongwe yo o neng a bidiwa Sakaio, yo e neng e le mongwe wa bathotholetsisi ba Sejuta mo papading ya go phutha lekgetho la Seroma (ebile e le mohumi), 3 a leka go bona Jesu mme a ba a le mokhutshwane thata go mmona mo bontsintsing jwa batho. 4 Mme a sianela kwa pele a palama sethware sa mosikamore fa thoko ga tsela, a lebelela a le koo. 5 E rile Jesu a feta foo a lelala Sakaio mme a mmitsa ka leina a re, "Sakaio! Ithaganele! Fo-loga! Gonnye ke ya go nna moeng mo lwapeng lwa gago gompieno!" 6 Sakaio a ithaganela a fologa a tseela Jesu kwa tlang ya gagwe ka boitumelo jo bogolo. 7 Mme bontsintsi jwa batho ba se ka ba itumela. Ba ngongorega ba re, "O ile go nna moeng wa moleofi yo o itsegeng ka mokgwa o a maswe". 8 Mme ya re ka lobaka loo, Sakaio a ema fa pele ga Morena a re, "Morena, go tloga fano ke tlaa abela bahumanegi bontlha bongwe jwa diikhumo tsa me, mme fa ke bona ke patikile mongwe mo makgethong a gagwe ke tlaa ipona molato ka go mmusetsa di tsa gagwe go menagane gane!" 9 Mme Jesu a mo raya a re, "Se se supa gore poloko e tsile mo lwapeng lo gompieno. Monna yo e ne e le mongwe wa bana ba ga Aberahame yo o neng a timetse, mme nna Morwa Motho, ke tsile go batla ke bo ke boloka mewa e e ntseng jaaka wa gagwe." 11 Mme ka gonnye Jesu o ne a atamela Jerusalem, a bolela polelo go baakanya mogopolo o o reng Bogosi jwa Modimo bo tlaa simologa gone jaana. 12 A re, "Mogolwane mongwe yo o neng a nna mo lefatsheng lengwe kwa motseng mogolo o o kgakala wa bogosi, o ne a bile diwa go ya go tlhlongwa kgosi ya lefatsho la gagwe. 13 Pele ga a tsamaya o ne a phutha bathusi ba le some a naya mongwe le mongwe wa bone dikete tse pedi tsa dipula, go sala ba di atisa fa a setse a tsamaile. 14 Mme bangwe ba batho ba gagwe ba ne ba mo ila ba bo ba mo romelela polelo ya gore ba batla boipuso, ba bolela gore ba mo tsogolegetse ga ba kitla ba mo amogela go nna kgosi ya bone. 15 "Ya re fa a boa a bitsa batho ba o neng a ba neetse madi, go bona gore ba dirileng ka one, le gore ba boetswe ke bokae. 16 "Monna wa ntlha a bega papadi e kgolo, e menaganye ga some go feta tlhathlwa e o neng a e neetswe. 17 "Mme kgosi ya goa ya re, 'O dirile sentle! O monna yo o siameng o ikanyegile mo bonnyenyaneng jo ke go bo neileng. Mme tuelo ya gago ke gore, o tlaa nna molaodi wa metse e le some!' 18 Monna wa bobedi le ene a bega papadi e e itumedisang, e menaganye ga tlhano go feta tlhathlwa e o neng a e neetswe. 19 "Mong wa gagwe a mo raya a re, 'Go siame! o ka nna molaodi mo metseng e metlhano.' 20 "Mme monna wa boraro a bega fela madi a o neng a simolotse ka one, a re, 'Ke a bolokile, 21 ka gore ke ne ke tshaba [gore o tlaa batla papadi ya me] gonnye o monna yo o thata go dirisanya nao o tsaya se e seng sa gago e bile o gapa jalo tse di lemilweng ke ba bangwe.' 22 Mme Kgosi ya goa ya re, 'Selo ke wena sa motlhanka yo o bosula. A ke pelo e thata? Ke tlaa nna fela jalo mo go wena! Fa o itsile bopelo-e-thata jwa me le ka fa ke leng logwadi ka gone,

23 ke eng fa o ne o sa boloke madi a me mo polokelong gore ke tle ke bone morokotso mo go one.' 24 "Mme a retologela kwa go ba ba emeng fa go ene a ba raya a re, 'Tsayang madi mo go ene lo a neele monna yo o dirileng a mantsi.' 25 "Mme ba re 'Morena, o setse a na le a mantsi!' 26 Kgosi ya fetola ya re, 'Ee, ke boammaaruri gore ba ba nang le go le gontsi ba newa go le gontsi, mme ba ba nang le go le gonnye ba lathegelwa le ke gone mo ba nang nago. 27 Mme jaanong kaga baba ba, ba me ba ba rukuthileng, ba tiseng kwano lo ba bolaya fa pele ga me!' 28 Mme ya re Jesu a sena go bolela polelo e, a ya Jerusalem le barutwa ba gagwe (a ba etelela pele). 29 Ya re ba tsena mo motsing wa Bethefeige le Bethania, mo Thoteng ya Lotlhwane, a romela barutwa ba gagwe ba le babedi kwa pele, 30 a ba laela go ya kwa motseng o o fa pele le gore e re ba tsena ba senke tonki e e golegilweng fa thoko ga tsela. E tlaa bo e le tonkana, e e iseng e ke e palangwe. "E gololeng, mme lo e lere kwano. 31 Mme e re fa mongwe a lo botsa gore lo dira eng, lo re, 'Morena o a e batla!' 32 Mme ba bona tonkana jaaka Jesu a boletse, 33 mme ka boammaaruri ya re ba e golola, beng ba yone ba batla tlhaloso. Ba botsa ba re, "Lo dira eng? Lo gololelang tonkana ya rona?" 34 Mme barutwa ba fetola ba re, "Morena o a e batla!" 35 Mme ba lere tonkana kwa go Jesu ba pega dingwe tsa diaparo tsa bone mo go yone gore a e palame. 36 Mme bontsi jwa batho jwa ala diaparo tsa bone mo tseleng kwa pele ga gagwe, mme ya re ba fitlha fa tsela e fologelang gone go tswa kwa Thoteng ya Lotlhwane, batho ba simolola go goa ba opela fa ba ntse ba tsamaya ba baka Modimo kaga dikgakgamatso tse Jesu o di dirileng. 38 Ba ipela ba re, "Modimo o re neile Kgosi, e tshela ka bolelele! A legodimo lotlhe le itumele! Kgallalelo go Modimo kwa magodimong!" 39 Mme bangwe ba Bafarasai mo gare ga batho ba re, "Morena, kgalemela balatedi ba gago go bua dilo tse di ntseng jalo!" 40 Mme a fetola a re, "Fa ba ka didimala, maje a a fa thoko ga tsela a, a tlaa thubega ka tuduetso!" 41 Mme ya re ba atamela Jerusalem a lebelela motse kwa pele, a simolola go lela. 42 A lela a re, "Kagiso e e sa khutleng e ne e le gautshwane le wena mme wa e gana, mme jaanong lobaka lo setse lo fetile. 43 Baba ba gago ba tlaa go agelela ka lobota lwa mmu, ba go dika, ba go kganelela ka ntlha tsothle, 44 ba bo ba go ripitlala fa fatshe le bana ba gago ba o nang nabo; ga ba kitla ba tlogela leje le tlhatlaganye le le lengwe, gonnye o ganne sebaka se Modimo o se go neileng." 45 Hong a tsena mo Tempeleng a simolola go lelekelana ntle barekisi mo marekisetong a bone, 46 a ba raya a re, "Dikwalo di bolela gore 'Tempele ya me ke lefelo la thapelo; mme lo e fetotse mongobo wa magodu.'" 47 Morago ga moo a ba ruta malatsi otlhe mo Tempeleng, mme baperesiti ba bagolo le baruti bangwe ba molao le bagwebi ba ne ba leka tsela e ba ka mmolayang ka yone. 48 Mme ba se ka ba akanya sepe, gonnye o ne a tumile thata mo bathong, ebile ba utlwa lefoko lengwe le lengwe lo o neng a le bua.

20 Mme ya re ka letsatsi lengwe la malatsi ao fa a ntse a ruta a bile a rera Mafoko a a Molemo mo Tempeleng, a engwa pele ke baperesiti ba bagolo le baeteledipele ba tumelo le bagolwane ba motse. 2 Ba batla go itse gore o neilwe e mang nonofo ya go lelekelana barekisi kwa ntle ga Tempele. 3 A ba

ba simolola go bua kaga bontle jwa maje a a kgabisitseng Tempele le mekgabisa ya segopotso mo dipoteng. 6 Mme Jesu a re, "Lobaka lo e tla lo dilo tse tsothe tse di lo kgatlang di tlaa digelwang fa fatshe, mme ga go leje lepe le le tlaa tlogelwang le thlatlaganye le le lengwe; gotlhe go tlaa nna moko a o le mongwe fela wa matlakala." 7 Mme ba goa ba re, "Morena! mo go tlaa diragala leng? A go tlaa nna le thagiso nngwe pele ga nako ya go diragala?" 8 Mme a fetola a re, "Lo se lese ope go lo timetsa. Gonne ba le bantsi ba tlaa tla ba ipolela fa e le bo-Mesia, ba re, 'Nako e gorogile' mme lo se ka lwa ba dumela!" 9 "Mme e re fa lo utlwele dintwa le dipheretlhego di simologa, lo se ka lwa tshoga. Dintwa tsa boammaaruri di tshwanetse go tla mme bokhutlo ga bo kitla bo tla ka bonako, 10 gonne chaba e tlaa tsogologela chaba e nngwe le bogosi bo tlaa tsogologela jo bongwe, 11 mme go tlaa nna dihoromo tse dikgolo tsa lefatshe le mauba mo mafatsheng a le mantsi, le maroborobo le dipoitshogo tse di diregang mo magodimong. 12 "Mme pele ga mo gotlhe go diragala; go tlaa nna le paka ya dipogiso, lo tlaa gogelwa mo disenagongeng mo dikgolegolong le fa pele ga dikgosi le balaodi ka nthla ya Leina la Me. 13 "Mme ka nthla ya gone moo, Mesia o tlaa itsege ka bophara a bo a tlotlwa. 14 Jalo, lo se tshwenyeye ka gore lo tlaa ikarabela jang, 15 gonne ke tlaa lo naya mafoko a a tshwanetseng le bothale mo e leng gore baganetsi ba lona ga ba kitla ba lo fetola! 16 Le e leng ba ga lona tota, batsadi ba lona, bomorwarraalona, ba lo tsalwang nabo ditsala tsa lona di tlaa lo oka gore lo tshwarwe; mme bangwe ba lona ba tlaa bolawa. 17 "Mme batho bothle ba tlaa lo ila ka nthla ya gore lo ba me e bile lo bidiwa ka Leina la Me. 18 Mme le fa e le thiri ya thlogo ya lona ga e kitla e nyelela! 19 Gonne fa lo eme ka thomamo, lo tlaa boloka mewa ya lona. 20 "Mme fa lo bona Jerusalema a dikaganyeditswe ke dintwa, ke gone lo tlaa itseng gore nako ya tshenyego e gorogile. 21 Hong lesang batho ba Judea ba tshabele kwa dithabeng. Lesang ba ba mo Jerusalema ba leke go falola, mme ba ba kwa ntle ga motse ba se ka ba leka go boa. 22 Gonne ao e tlaa bo e le malatsi a katlhoho ya Modimo, le mafoko a dikwalo tsa bogologolo a a kwadilweng ke baporofiti a tlaa diragala ka botlalo. 23 "Mme a bo go tlaa latlhega bomme ba baimana mo malatsing ao, le ba ba nang le masea. Gonne go tlaa nna pitlagano e kgolo mo chabeng e le bogale mo bathong ba. 24 "Ba tlaa bolawa polao e e setlhogo ka dithabani tsa mmaba, kgotsa ba isiwe jaaka bafaladi le ditshwara mo dichabeng tsothe tsa lefatshe; mme Jerusalema o tlaa fennngwa a gatakwa ke Badi-chaba go fithelala nako ya phenyoy ya Badi-chaba e khutla mo lobakeng lwa Modimo. 25 "Mme go tlaa nna le ditiragalo tse di sa tswaelesegang mo loaping, dithagiso le bothodi jo bo maswe mo letsatsing, ngwedi le dinaledi, le mono lefatsheng dichaba di tlaa nna mo pheretlhegong le mo tlalelong e kgolo ka nthla ya modumo wa mawatle le makhubu a a sa tswaelesegang. 26 Bopelo-kgale jwa batho ba le bantsi bo tlaa reketla ka nthla ya tiragalo e ba e bonang e tla mo lefatsheng, gonne dinonofa tsa magodimo di tlaa thubaganngwa. 27 Mme batho ba lefatshe ba tlaa mpona nna Mesia, ke tla mo lerung ka nonofa le kgalalelo e kgolo. 28 Mme e tlaa re fa dilo tse tsothe di simologa go diragala, lo eme lo thamalale lo lebe

kwa godimo! gonne poloko ya lona e gaufi." 29 Mme a ba fa setshwantsho se: "Lepang setlhare sa mofeige kgotsa setlhare sengwe fela. 30 Fa matlhare a thoga, lo itse lo sa bolelelwa gore selemo se gaufi. 31 Fela jalo fa lo bona ditiragalo tse ke di lo thaloseditseng di diragala lo thomamisa gore bogosi jwa Modimo bo gaufi. 32 "Ke lo thomamisetsa gore fa dilo tse di diragala, bokhutlo jwa motho ono bo tlaa bo bo gorogile. 33 Legodimo le lefatshe di tlaa feta, le fa go ntse jalo mafoko a me a eme mo boammaarung ka bosakhutleng. 34 "Itiseng! Lo se letle gore go tla ga me ka tshoganetso go lo fithlele lo sa ipaakanya. Ke se ka ka lo fithlele lo iketille mo boatleng, kgotsa mo medirong ya bothapelwa, lo gapilwe ke matshwenyego a botshelo jo, jaaka mo lefatsheng lotlhe. 36 Lo lebeleleleng ka metha yotlhe. Lo rapele gore e re fa go kgonega lo tle fa pele ga me lo ise lo bone dikhuduego tse." 37 Letsatsi le letsatsi Jesu o ne a ya kwa Tempeleng go ya go ruta, mme bontsi jwa batho ba phuthega go sa le mo mosong go ya go mo reetsa. Mme mo maabanyaneng mangwe le mangwe o ne a tle a boele kwa Thoteng ya Lotlhwane go ya go lala teng.

22 Mme jaanong moletlo wa Tlolaganyo wa bo o le gaufi, moletlo wa Sejuta o go neng go dirisiwa senkgwe se se sa bedisiwang. 2 Baperesiti ba bagolo le baeteledipele ba bangwe ba tumelo ba ne ba thloafatsetse polao ya ga Jesu ba leka go senka tsela e ba ka mmolayang ka yone kwa ntle ga go tsosa mokubukubu, selo se ba neng ba se tshaba segolo. 3 Mme Satane a tsena mo go Judase Isekariota, yo e neng e le mongwe wa barutwa ba ba lesome le bobedi, 4 a ya kwa baperesiting ba bagolo le bagolwane ba bathokomedi ba Tempele go ya go buisanya ka tsela e e siameng ya go ba okela Jesu. 5 Mme ba ne ba rata, ba itumelela go itse fa a ipaakanyeditse go ba thusa mme ba mo solofetsa tuelo. 6 Hong a simolola go ba senkela nako ya go tshwara Jesu ka tidimalo batho ba seyo. 7 Mme letsatsi la moletlo wa Tlolaganyo la fithla, le ka lone kwana ya modiro e neng ya bolawa ya ba ya jewa le senkgwe se se sa bedisiwang. 8 Jesu a roma Petere le Johane go ya go batla felo fa go tlaa baakanyediwang Tlolaganyo ya bone gone. 9 Mme ba botsa ba re, "O batla re ya kae?" 10 Mme a fetola a re, "E tlaa re fela fa lo tsena mo Jerusalema, lo tlaa bona monna a tshotse nkgwana ya metsi. Mo lateleng go ya kwa lwapeng lo a tsenang mo go lone, 11 mme lo reye monna yo o nnang foo lo re, 'Moruti wa rona a re o re kaele ntle ya baeti fa a ka jelang Tlolaganyo gone le barutwa ba gagwe.' 12 Mme o tlaa lo tseela kwa godimo kwa tlong e tona e re setseng re e baakanyeditse. Ke lone lefelo leo. Tsamaeleng pele lo ye go baakanya dijo gone." 13 Mme ba tswa ba ya kwa motseng mme ba fithlela sengwe le sengwe se ntse fela jaaka Jesu a boletse, mme ba baakanya dijo tsa Tlolaganyo. 14 Mme Jesu le ba bangwe ba goroga, mme ka nako e e tshwanetseng ba nna fa fatshe bothle fa lomating lwa bojelo; 15 mme a ba raya a re, "Ke lebeletse lobaka lo ka thloafalo e kgolo, ke batla go ja Tlolaganyo e le lona pele ga pogiso ya me e simologa. 16 Gonne ke a lo bolelela gompieno gore ga nkitla ke tlhola ke e ja gape; go fithlela se e se emetseng se diragala mo Bogosing jwa Modimo." 17 Mme a tsaya senwelo sa mofine, ya re a sena

go se lebogela a re, "Tsaya se lo se kgaogane. 18 Gonne ga nkitha ke e nwa mofine gape go fithelela Bogosi jwa Modimo bo tla." 19 Mme a tsaya senkgwe; mme a se lebogela, a se ngathoganyana a se ba naya a re, "Se ke mmele wa me, o lo o neetsweng. O jeng e le segopotso sa me." 20 Morago ga dijo a ba naya senwelo se sengwe sa mofine a re, "Mofine o, ke sesupo sa kgolagano e ncha ya Modimo go lo boloka, kgolagano e e kanetsweng ka madi a ke tlaa a tshololang go reka mewa ya lona. 21 Mme fano fa lomating lwa bojelo go ntse mongwe jaaka tsala mo gare ga rona, ke ene monna yo o tlaa nkakang. 22 Ke tshwanetse go swa. Ke nthla nngwe ya leano la Modimo. Mme bomadimabe bo letile monna yo, yo o nkakang," 23 Mme barutwa ba ikgakgamalela gore ke ofe wa bone yo o ka dirang selo se se ntseng jalo. 24 Ba simolola go ganetsanya gore ke ofe yo o tlaa nnang mo maemong a a kwa godimo [mo Bogosing jo bo tlang]. 25 Mme Jesu a ba raya a re, "Mo lefatsheng leno dikgosi le banna ba batona ba laola bathanka ba bone, mme bathanka ga ba ke ba ithlphela fa e se go ineela fela! 26 Mme mo gare ga lona, ene yo o lo direlang ke ene o tlaa nnang moeteledipele ya lona. 27 Mo lefatsheng Morena o nna fa lomating lwa bojelo mme a direlwe ke bathanka ba gagwe. Mme e seng fano! Gonne ke motlhanka wa lona. 28 Le fa go ntse jalo, ka nthla ya gore lo ntse lo le boammaaruri mo go nna mo malatsing a a matshwenyego, 29 le ka nthla ya gore Rre a nneetse Bogosi, le Nna gompiano ke lo naya tshwanelo, 30 ya go ja le go nwa fa lomating lwa bojelo mo Bogosing joo; mme lo tlaa nna mo ditlong tsa segosi lo athola ditso tse di lesome le bobedi tsa Iseraele. 31 "Simone, Simone, Satane o lopile gore lo mo neelwe, gore a lo fefere jaaka mabele, 32 mme ke go rapeletse gore tumelo ya gago e seka ya fennngwa gotlhelele. Mme e re fa o sena go sokologa o bo o boela mo go nna gape, o nonotshe tumelo ya bakaulengwe ba gago o bo o e age." 33 Simone a re, "Morena ke ipaakanyeditse go ya kgolegelong le wena, le go swa le wena." 34 Mme Jesu a mo raya a re, "Petere, mma ke go bolelele sengwe. Go simolola ka nako eno go ya go tsena ka moso mo mosong fa mokoko o lela, o tlaa bo o intatotse gararo, o bolela gore ga o nkitse." 35 Mme Jesu a ba botsa a re, "E rile fa ke lo phatlalatsa go ya go rera mafoko a a Molemo lo sena madi, sekgwama kgotsa diaparo tse dingwe, lo ne lwa tsamaya jang?" Mme ba fetola ba re, "Re tsamaile sentle." 36 A re, "Jaanong a yo o nang le sekgwama a se tseye le madi. Mme le yo o senang chaka, go botoka gore a rekise diaparo tsa gagwe a ye go e reka! 37 Gonne lobaka lo fithlile lwa gore polelele pele ka ga me e e reng: 'O tlaa bonwa molato jaaka dinokwane,' e diragale! Ee, sengwe le sengwe se se kwadilweng ka ga me ke baporofiti se tlaa diragala." 38 Mme ba fetola ba re, "Morena, re na le dichaka tse pedi," mme a ba fetola a re, "Di lekane!" 39 Mme a tswa mo tlung e e kwa godimo a ya kwa Thoteng ya Lothware jaaka gale. 40 Mme ya re teng koo a ba raya a re, "Rapelang Modimo gore lo se ka lwa fennngwa ke thaelo." 41 Mme a tsamaya gongwe e ka ne e le sebaka sa konopelo ya lentsewe, a khubama a rapela thapelo e: "Rara, fa o rata sweetswee, tlosa senwelo se sa tlhokofatso mo go nna mme ke batla go rata ga gago, e seng ga me." 43 Mme moengele yo o tswang legodimong a iponatsa a mo nonotsa,

44 gonne o ne a le mo tlhokofatsong ya mowa mo o neng a rotha mofutso wa madi; ka marothodi a magolo a wela fa fatshe fa a ntse a rapela thata ka tlhoafalo. 45 Mme ya re lwa bofelo a boela gape kwa barutweng ba gagwe, a ba fithlela ba robotse, ba lapisitswe ke bohutsana. 46 A ba raya a re, "A lo robotse! Tsogang! Rapelang gore lo se ka lwa fennngwa fa lo raelwa." 47 Mme ya re fa a sa ntse a bua jaana lesomo la batho la tla le eteletsewe pele ke Judase, mongwe wa barutwa ba gagwe ba ba neng ba le lesome le bobedi. Judase a tsamaela kwa go Jesu a mo atla mo lerameng ka tumedisong ya botsalano. 48 Mme Jesu a mo raya a re, "Judase ke eng fa o dira jaana, o oka Morwa Motho ka katlo?" 49 Mme ya re barutwa ba gagwe ba bona se se tlaa tlogang se direga ba goa ba re, "Morena a re ka lwa? Re tsile le dichaka!" 50 Mme mongwe wa bone a rema tsebe e e kafa letsogong le legolo la motlhanka wa Moperesiti yo Mogolo a e kgaola. 51 Mme Jesu a re, "Lo seka lwa busolosa ka gope". Mme a ama fa tsebe e neng e le teng a e busetsa. 52 Mme Jesu a bua le baperesiti ba bagolo le balaodi ba bathlokamedi ba Tempele le baeteledipele ba tumelo ba ba neng ba eteletse lesomo la batho pele. A botsa a re, "A ke serukuthli, fa lo tsile ka dichaka le melamu go ntshwara jaana?" 53 Ke eng fa lo ne lo sa ntshware mo Tempeleng. Ke ne ke le koo malatsi otlhe. Mme lo ke lobaka lwa lona, lobaka lo nonofo ya ga Satane e busang thata ka lone. 54 Jalo ba mo tshwara ba mo isa kwa bonnong jwa Moperesiti yo Mogolo, mme Petere a ba latela a katogetse kgakajana. 55 Mme masole a gotsa molelo mo lwapeng ba nna fa fatshe ba ora, mme Petere a ora nabo. 56 Mme motlhanka wa morweetsana a mo lemoga mo leseding la molelo hong a simolola go mo tlhoma mathlo. Mme ya re lwa bofelo a re, "Monna yo o ne a na le Jesu!" 57 Petere a itatola a re, "Mosadi, ga ke itse monna yoo gotlhelele!" 58 Morago ga lobakanyana mongwe a mo leba a re, "O tshwanetse wa bo o le mongwe wa bone!" Petere a fetola a re, "Nnyaa rra, ga ke ene!" 59 E rile kwa moragonyana e ka nna lobaka lwa oura mongwe a tlhomamisa a re, "Ke itse motho yo, ke mongwe wa barutwa ba ga Jesu, gonne ba tswa Galalea mmogo." 60 Mme Petere a re, "Monna ke wena, ga ke itse gore o bua kaga eng." Mme ya re a bua mafoko a, mokoko wa lela. 61 Mme ya re ka lobaka loo Jesu a retologa a leba Petere mme Petere a gakologelwa gore o ne a mo reile a re, "Pele ga mokoko o lela ka moso mo mosong o tlaa bo o intatotse gararo." 62 Hong Petere a tswa mo lwapeng, a lela mo go bothoko. 63 Mme badisa ba ba neng ba disitse Jesu ba simolola go mo sotla. Ba mo fapa mathlo ba mo itaya ka mabole ba mmotsa ba re, "E mang yo o neng a go itaya ka nako eo, moporofiti?" 65 Ba mo tlhaeletsa ka mathlaha a mefuta yotlhe. 66 E rile letsatsi le tlhaba mo mosong o o latelang Kgotta e Tona ya Sejuta ya phuthega, go na le baperesiti ba bagolo le baruti ba molao ba bagolo ba Sechaba, Jesu a tliwa fa pele ga Lekgotla leo, 67 mme a tewa gatwe a tlhomamise gore a o ipitsa Mesia kgotsa nnyaa. Mme a fetola a re, "Le fa nka lo bolelela ga lo kitla lo ntumela kgotsa lo ntetla go ntsha ngongorego ya me. 69 "Mme nako e e tla ka bofelo fa Nna, Morwa Motho, ke tlaa nnang fa seatleng se segolo sa nonofo ya Modimo." 70 Hong ba goa bothle ba re, "A jaanong o ipitsa gore o Morwa Modimo?" Mme a fetola a re, "Ee ke ene."

71 Mme ba goa ba re, "Re santse re thoka eng? Gonne rona ka bo rona re mo ikutlwetse a bua jalo."

23 Mme Lekgotla lotlhe la tseela Jesu kwa go Pilatwe wa molaodi. 2 Mme ba simolola go mmaya molato ba re: "Motho yo o ntse a timetsa batho ba rona ka go ba raya a re ba se ka ba ntshetsa mmuso wa Seroma makgetho ebile o ipitsa gore ke Mesia wa rona, Kgosi." 3 Mme Pilatwe a mmotsa a re, "A o Mesia wa bone, Kgosi ya bone?" Jesu a fetola a re, "Ee, ke jaaka o bua." 4 Mme Pilatwe a retologela kwa baperesitiing ba bagolo le kwa lesomong la batho a re, "Moo ga se molato!" 5 Ba kgobega marapo ba re, "Mme o tsosa dipheretlhego kgatllhanong le mmuso gongwe le gongwe kwa o yang teng, mo Judea otlhe, go tswa Galalea, go ya Jerusalem!" 6 Pilatwe a botsa a re, "A ke Moga lalea?" 7 Mme ya re ba dumela, Pilatwe a re ba mo ise kwa go Kgosi Herode, gonne Galalea o ne a le ka fa tlase ga taolo ya ga Herode, mme Herode o ne a le mo Jerusalem ka lobaka loo. 8 Herode o ne a itumelela sebaka seo sa go bona Jesu, gonne o ne a mo utlwaletse thata mme a solofetse go bona a dira kgakgamatso. 9 A botsa Jesu dipotso ka go latelana, mme a se ka a fetola. 10 Mme ya re ka lobakanyana loo, baperesiti ba bagolo le baeteledipele ba tumelo ba goa ba eme foo ba mmaya molato. 11 Mme Herode le masole a gagwe ba simolola go sotla Jesu ba mo tshaga; ba mo apesa seaparo sa segosi, ba mmusetsa kwa go Pilatwe. 12 Mme ya re letsatsi leo Herode le Pilatwe ba ba kileng ba ne ba thaoane pele, ba nna diatsala tse dikgolo. 13 Mme Pilatwe a phutha baperesiti ba bagolo le baeteledipele ba bangwe ba Sejuta le batho, 14 a bolela mogopolo wa gagwe a re, "Lo ntereditse monna yo, lo mmaya molato ka go tsosa khuduego kgatllhanong le mmuso wa Se-Roma. Mme ke mo thathobile sentle mo ntlheng e mme ga ke mmone molato ope. 15 Herode le ene o mmuseditse kwano go rona, a sa mmona molato o o tshwanetseng loso. 16 Jalo ke tlaa mo kgwathisa ka thupa e e mitlwa, ke bo ke mo golola." 17 Mme modumo o mogolo wa tsoga mo bathong ka lentse le le lengwe ba re, "Mmolaye, o re gololele Barabase!" 19 (Barabase o ne a le mo kgolegelong ka ntlha ya go simolola dipheretlhego mo Jerusalem kgatllhanong le mmuso le go bolaya batho). 20 Mme Pilatwe a ganetsanya nabo, gonne o ne a batla go golola Jesu. 21 Mme ba goa ba re, "Mmapole! Mmapole!" 22 A bo a bua le bone la boraro a kopa a re, "Ka ntlha yang? O dirile molato ofe? Ga ke a bona lebaka lepe la go mo atlholela loso. Mme ke tlaa mo kgwathisa ke bo ke mo lesa a tsamaya." 23 Mme ba goela kwa godimodimo gore Jesu a bapolwe, mantsewe a bone a bo a fenyi. 24 Mme Pilatwe a atlholela Jesu loso jaaka ba lopile. 25 Mme a golola Barabase, ka fa kopong ya bone, monna yo o neng a tshwaretse go feretlha le go bolaya batho. Mme Pilatwe a ba neela Jesu gore ba mo dire ka fa ba ratang ka teng. 26 Mme ya re bontsi jwa batho bo isa Jesu kwa o neng a ya go bolaelwa teng, ba bona Simone wa Mokurene yo e neng e le gone a gorogang mo Jerusalem a tswa kwa dikgaolong, mme ba mo pateletsa go ba sala morago, a sikere mokgoro wa ga Jesu. 27 Bontsintsijwa batho jwa mo sala morago, le basadi ba le bantsi ba ba neng ba mo lelela ka kutlobothoko. 28 Mme Jesu a retologa a ba raya a

re, "Bomorwadia Jerusalem, se nteleleng, iteleleng lo bo lo lelele bana ba lona. 29 Gonne malatsi a e tla, a basadi ba ba senang bana ba tlaa bidiwang ba ba sego tota. 30 Batho ba tlaa lopa dithaba gore di ba wele di ba sugakanye le maje gore a ba khurumetse. 31 Gonne fa dilo tse di ntseng jaana di dirwa mo go nna Sethare sa Botshelo, lona ba tlaa lo dira jang?" 32 Dinokwane tse pedi di ne tsa tliisiwa go ya go bolawa nae kwa lefelong le le bidiwang "Logata." Ka boraro jwa bone ba bapolwa, Jesu a le mo mokgorong o o fa gare, dinokwane tse pedi di le mo dithakoreng. 34 Mme Jesu a re, "Rara, itshwarele batho ba, gonne ga ba itse se ba se dirang." Mme masole a kgaogana diaparo tsa gagwe ba di laola ka bola. 35 Batho ba lebelele. Mme Baeteledipele ba Sejuta ba sotla. Ba re, "O ne a siame thata go thusa ba bangwe, a re mmoneng a ipoloka fa e le gore ke ene tota yo o tlhophilweng ke Modimo go nna Mesia." 36 Mme masole le one a mo sotla ka go mo nosa seno se se botlha sa mofine. 37 Mme ba mo thaeletsa ba re, "Fa o le kgosi ya Bajuta, ipoloke!" 38 Kitisyo ya pegwa mo mokgorong fa godimo ga gagwe ka mafoko a, "Yo ke Kgosi ya Bajuta." 39 Mongwe wa dinokwane yo o neng a pegilwe go bapa nae a sotla a re, "Wa re o Mesia, a ga o ene? Itshupe ka go ipoloka le rona o re boloke." 40 Mme senokwane se sengwe sa re, "A le Modimo ga o o boife, le fa o o swa? Re tshwanetse go swa ka ntlha ya ditiro tsa rona tse di bosula, mme monna yo ga a a dira sepe se se molato." 42 Mme a re, "Jesu, o nkgopole fa o tseno mo Bogosing jwa gago!" 43 Mme Jesu a fetola a re, "Tsatsi jeno o tlaa nna le nna kwa Paradaiseng ke go solofetsa ka boammaaruri. 44 Mme ya bo e setse e le motshegare wa sethoboloko; ga nna lefifi mo lefatshing lotlhe selekanyo sa oura tse tharo, go filtha ka nako ya boraro. 45 Letsatsi la fifala, mme ka tshoganetso sesiro sa Tempele sa gagoga ka bogare. 46 Mme Jesu a goa a re, "Rara, ke go neela mowa wa me." Mme ka mafoko ao a swa. 47 Ya re molaodi wa masole a Se-Roma yo o neng a laola polao ya bone a bona se se diragetseng, a tlwa ke poifo fa pele ga Modimo a re, "Ruri monna yo o ne a sena molato." 48 Mme ya re bontsintsi jwa batho ba ba neng ba tsile go bona papolo ba bona Jesu a sule, ba boela magang ka kutlobothoko e kgolo. 49 Mme ya re barutwa ba gagwe ba bona se se tla tlogang se direga ba goa ba re "Morena, a re ka lwa re tsile le dichaka." 50 Mme monna mongwe yo o bidiwang Josefa, leloko la Kgotla Kgolo ya Sejuta, wa motse wa Arimathea mo Judea, a ya kwa go Pilatwe a mo kopa setopo sa ga Jesu. E ne e le monna yo o boifang Modimo yo o neng a ntse a lebeletse go tla ga Mesia ebile o ne a ise a ke a dumalane le maikaelelo le dikgato tsa baeteledipele ba bangwe ba Sejuta. 53 Mme a folosa mmele wa ga Jesu a o phuthela ka letsela le le leele la lene mme a o baya mo lebitleng le lesa le le iseng le ke le dirisiwe, [le gabilwe mo lefikeng mo mhapheng wa thaba]. 54 Mo go ne ga diragala ka Labotlhanong mo tshokologong ka letsatsi la iketleetso ya Sabata. 55 Mme ya re setopo se tswa, basadi ba ba neng ba tswa Galalea ba se sala morago, ba se bona se tsenngwa mo phupung. 56 Mme ba ya magang go ya go baakanya malao le ditlolo go dibela setopo; mme ya re ba fetsa ga bo go le Sabata. Hong ba itapolosa letsatsi leo lotlhe ka fa molaong wa Sejuta.

24 Erile go sa le mo mosong ka Tshipi ba tseela ditlolo tsa bone kwa phupung, 2 mme ba fithela lentswe le legolo le le neng le khurumeditse phupu le hidikolotswe. 3 Jalo ba tsena mo teng, mme setopo sa ga Jesu sa bo se seyo. 4 Ba ema foo ba reregile ba akanya gore se ka bo se diragaletswe ke eng? Ka tshoganetso banna ba babedi ba iponatsa mo go bone, ba apere diaparao tse di tshweu di lakasela mo e leng gore matlho a bone a ne a kaloga. 5 Basadi ba bo ba tshogile thata mme ba obama fa pele ga bone. Mme banna ba ba botsa ba re, "Ke eng fa lo batla motshedi mo diphupung?" 6 Ga a yo fa! O rudile! A ga lo gakologelwe se o neng a se lo bolelela kwa Galalela gore Mesia o tshwanetse go okelwa mo nonofong ya batho ba ba bosula a bo a bapolwa mme a tsoge ka letsatsi la boraro?" 8 Mme ba gakologelwa, 9 ba sianela kwa Jerusalema go ya go bolelela barutwa ba gagwe ba ba lesome le bongwe le mongwe le mongwe se se diragetseng. 10 (Basadi ba ba neng ba ya kwa phupung e ne e le Marea Magatalena, Joana le Marea mmagwe Jakobe le ba bangwe ba le bantsinyana). 11 Mme polelo e ya utlwala ekete dinaane fela mo bathong, ba se ka ba e dumela. 12 Le fa go ntse jalo, Petere a sianela kwa phupung go ya go bona. A obama a okomela mme a bona diphutho tse di senang sepe; a boela gae, a gakgamaletse se se diragetseng. 13 Ka lone letsatsi leo, balatedi bangwe ba ga Jesu ba le babedi ba bo ba ya kwa motsaneng wa Emau; bokgakala jwa dimmaele di supa go tswa kwa Jerusalema. 14 Ya re ba ntse ba tsamaya ba bo ba bua; kaga loso lwa ga Jesu, 15 mme ka tshoganetso Jesu ka sebele a tla a tseisanya nabo tse! 16 Mme ba se ka ba mo lemoga, gonne Modimo o ne wa dira gore ba seka ba lemoga. 17 A ba raya a re, "Lo lebega o ka re lo tshotse kgang e tona ka ga sengwe. Lo tshotse kgang ka ga eng?" Ba ema go se kae ba tlhontse difathogo. 18 Mme mongwe wa bone, ebong Keleopase a fetola a re, "E tshwanetse ya bo e le wena fela mo Jerusalema yo o iseng o utlwalele dilo tse di gakgamatsang tse di diragetseng mo bekeng e e fetileng." 19 Jesu a botsa a re, "Dilo di fe?" Ba re, "Dilo tse di dirageletseng Jesu, wa Monasara. E ne e le Moporofiti yo o neng a dira dikgagamatsa tse di leng thata go dumelwa ebile e le Moruti yo mogolo yo o neng a tlolwa thata ke Modimo le batho. 20 Mme baperesiti ba bagolo le baeteledipele ba tumelo ya rona ba ne ba tshwara ba mo neela mmuso wa Se-Roma go athlolelwa loso, ba bo ba mmampola. 21 Re ne re solofetse gore e ne e le Mesia yo o galalelang yo o tsileng go golola Iseraele. Mme jaanong, mo godimo ga mo gotlhe mo go diragetseng mo malatsing a mararo a a fetileng, 22 basadi bangwe ba sethopho sa rona sa balatedi ba gagwe ba ne ba le kwa phupung phakela thata mme ba boa ka polelo e e hakgamatsang e e reng setopo sa gagwe ga seyo, le gore ba bonye baengele gone ba ba ba boleletseng gore Jesu o a tshela! 24 Bangwe ba rona ba ne ba sianela teng go ya go bona, mme ka boammaaruri jo bo tletseng setopo sa ga Jesu sa bo se seyo, fela jaaka basadi ba boletse." 25 Mme Jesu a ba raya a re, "Lo dieleele go le kae? A batho ba ba dieleele! Lo palelwa ke go dumela se baporofiti ba se kwadileng mo dikwalong! 26 A ga go a thalosiwa pele ke baporofiti gore Mesia o tlaa bogela dilo tse tsotlhe pele ga a tsena mo kgalalelong ya Gagwe!" 27 Mme a ba phuthololela mafoko ka go latelana

ga one mo dikwalong tsa baporofiti, a simolola ka lokwalo lwa Genesese mme a tsamaya le dikwalo tse dingwe, a thalosa gore mafoko a ne a raya eng le gore a ne a bua kaga gagwe. 28 Ka nako e ba ne ba atamela Emau kwa ba neng ba ya teng. Jesu a dira jaaka o ka re o santse a fetela kwa pele, 29 mme ba mo kopa go lala nabo, ka nako e ne e setse e fetile. Jalo a ya lwapeng nabo. 30 Mme ya re ba nna fa fatshe ba a ja, a kopela dijo tshogafatso mo Modimong mme a tsaya senkgwe se sennye a se ngathoganya a se ba naya, 31 ka bonako matlho a bone a bulega mme ba mo lemoga! mme ka sone sebaka se a nyelela. 32 Ba simolola go bolelelana ka fa dipelo tsa bone di tlhotlhelesegileng ka teng fa a bua le bone a thalosa dikwalo fa ba ntse ba tsamaya mo tseleng. 33 Fela ka yone nako eo ba nanoga ba boela kwa Jerusalema, kwa barutwa ba ba lesome le motso le balatedi ba bangwe ba ga Jesu ba neng ba ba dumedisana ka mafoko a, "Ruri Morena o tsogile. O iponaditse mo go Petere!" 35 Mme ba babedi ba ba tswang Emau ba bolela ka fa Jesu a iponaditseng mo go bone ka teng fa a ngathoganya senkgwe. 36 Mme ya re ba sa ntse ba bua ka gone, ka tshoganetso Jesu a bo a setse a eme foo mo gare ga bone, a ba dumedisana! 37 Mme botlhe ba bo ba tshogile thata, ba gopola gore ba bona sepoko. 38 A ba botsa a re, "Lo tshositswe ke eng? Ke eng fa lo belaela gore a ruri ke Nna?" 39 "Lebelelang dinao tsa me! Lo ka bona gore ke nna ka sebele. Nkamang gore lo thomamise sentle gore ga ke sepoko! Gonne dipoko ga di na mebele, jaaka lo bona nna ke na le one." 40 Mme ya re a bua jaana, a tsholetsa diatla gore ba bone [dipadi tsa dipekere] mo diatleng tsa gagwe, a ba a ba kaela dintho mo dinaong tsa gagwe. 41 Le fa go ntse jalo ba nna foo ba sa itse gore ba ka reng, ba tletse boitumelo le pelaelo. Mme a ba botsa a re, "A lo na le sengwe se se jewang fano?" 42 Ba mo naya setoki sa tlhapi e e besitsweng. 43 Mme a e ja ba mo lebeletse. 44 Mme a ba raya a re, "Mafoko a, ke ona a ke kileng ka a bua le lona ke santse ke na le lona fa dilo tsotlhe di na le go diragala, ebong tse di kwadilweng mo molaong wa ga Moshe, le mo baporofiting le mo dipesalemeng, kaga me." 45 Hong a rarabolola thaloganyo ya bone, gore ba thaloganyo dikwalo. 46 Mme a ba raya a re, "Go kwadiwe jaana, fa ene Keresete a tla swa jalo, mme a ba a tsoga mo losong ka letsatsi la boraro; 47 le gore go rerelwe merafe yotlhe boikotlhaio jwa dibe ka leina la gagwe, go simolola mo Jerusalema. 48 "Lona lo basupi ba dilo tse. 49 Mme, bonang, ke tiisa polelo ya tsholofetso ya ga Rre mo go lona: mme lo name lo sa diegile mo motseng wa Jerusalema, go tlo go tsamaye lo amogele nonofo e e tswang kwa godimo." 50 Mme a ba etelela pele ba ya go fitlha go lebagana le Bethania; mme a choletsa mabogo a gagwe, a ba segofatsa. 51 Mme ga diragala ya re a sa ntse a ba segofatsa, a kgaogana nabo, mme a tsholelediwa kwa legodimong. 52 Mme ba mo obamela; mme ba boela kwa Jerusalema ka boitumelo jo bogolo, 53 mme ba tlhola ba ntse ba le mo tempeleng ka gale, ba baka Modimo.

Johane

1 Erile pele ga tholego ya dilo tshotlhe, Keresete a bo a ntsa a le teng le Modimo. Ga a bolo go nna a tshela mme a le Modimo ka sebele. **3** O tlhodile sengwe le sengwe se se leng teng, ga gona sepe se se tshelang se se sa tholwang ke ene. **4** Botshelo jo bo sa khutleng bo mo go ene, mme botshelo jo bo naya batho lesedi. **5** Botshelo jwa gagwe ke lesedi le le phatsimang mo leffing, mme leffi ga le kake la tima lesedi. **6** Modimo o ne wa roma Johane wa Mokolobetsi e le mosupi wa gore Jesu Keresete ke lesedi la Boammaaruri. **8** Johane e ne e se lesedi ka boene; o ne a le mosupi wa lone fela. **9** Moragonyana, yo e leng ene lesedi la boammaaruri a goroga go tla go phatsima mo go mongwe le mongwe yo o tlang mo lefatsheng. **10** Mme le fa tota a dirile lefatsho, lefatsho ga le a ka la mo itse fa a sena go tla. **11** Le fa e le mo lefatsheng la ga gabo le mo go ba ga gabo ebong Bajuta, ga a a ka a amogelesega. Ba se kae fela ba ne ba mo amogela. Mme botlhe ba ba neng ba mo amogela, o ne a ba naya tshiamelo ya go nna bana ba Modimo. Gotlhe mo ba neng ba thoka go go dira, e ne e le go mo ikanya gore a ba boloke. **13** Botlhe ba ba dumelang se, ba tsalwa sesha eseng ga senama mo go tswang mo thatong ya motho kgotsa leano; mme go tswa mo go rateng ga Modimo. **14** Mme Keresete a nna motho mme a nna mo lefatsheng mo gare ga rona a tsetse lorato lwa boitshwarelo le boammaaruri. Bangwe ba rona ba bonye kgalalelo ya gagwe; kgalalelo ya Morwa yo o esi wa ga Rara wa Legodimo! **15** Johane a mo supegets batho, a bolelela batho ba le bantsintsi a re, "Yo ke ene yo ke neng ka bua ka ga gagwe ke re, 'Mongwe o e tla yo o mphetang go menaganye; gonne ga a bolo go nna pele ga ke tsalwa.'" **16** Rotlhe re amogetse mahumo a a tswang mo matlhogonong le gagwe a o a re lereditse, lethogonolo mo godimo ga lethogonolo go koegilwe mo go rona! **17** Gonne Moshe o re neetse molao fela o o nang le maikaelelo a a thata go tshagediwa, le tshiamo e e senang kutwelobothoko, fa Jesu Keresete ene a re lereditse lorato le boitshwarelo. **18** Ga go na ope yo tota o kileng a bona Modimo ka matlho, fa e se Morwawe fela a le esi yo o mmonyeng, gonne ke mopati wa ga Rara ebile o re boleletse gotlhe ka ga Ene. **19** Baetedipele ba Sejuta ba roma baperesiti le bathusi ba bone go tsweng kwa Jerusalem go botsa Johane gore a o ne a ipitsa Mesia. **20** Mme a ganela mo go senang gotwe sepe. A re, "Ga ke Keresete." **21** Mme ba mmotsa ba re, "Go siame, jaanong o mang? A o Elija?" A fetola a re, "Nnyaa." "A o moporofiti?" "Nnyaa." **22** "Jaanong o mang? Re bolelele gore re tle re kgone go neela ba ba re romileng karabo. Wa reng fa o ikarabela?" **23** A fetola a re, "Ke lentswe le le tswang mo sekakeng se se senang sepe, ke goa fela jaaka Isaia a porofitile a re, 'ipaakanyetseng go tla go Morena.'" **24** Mme ba ba neng ba romilwe ke Bafarasai ba mmotsa ba re, "Fa o se Mesia kgotsa Elija kgotsa moporofiti, o tsaya kae tsetlelo ya go kolobetsa?" **26** Johane a ba raya a re, "Ke kolobetsa fela ka metsi, mme mo gare ga bontsintsi jwa batho, go na le mongwe yo lo iseng lo ke lo rakane nae. **27** Yo o tlaa tlogang a simolola tirelo-Modimo mo go lona, mme ga

ke a lekana go nna le fa e le lekgoba la gagwe." **28** Tiragalo e ne ya diragala kwa Bethania, motse o o ka fa ntheng e nngwe ya Noka ya Jorodane kwa Johane o neng a kolobetsa teng. **29** Letsatsi le le latelang Johane a bona Jesu a tla ntheng ya gagwe mme a re, "Bonang! Kwana ya Modimo e e tlosang bolelo jwa lefatsho!" **30** Ke ene yo ke neng ke bua ka ga gagwe ke re, 'Monna yo o mphetang thata o tlaa tloga a tla ka bofelo, yo o sa belong go nna pele ga me!' **31** Ke ne ke sa itse gore ke ene, mme ke fano ke kolobetsa ka metse gore ke mo supe mo chabeng ya Iseraele." **32** Mme Johane a bolela ka go bona Mowa O O Boitshepo o fologela mo go Jesu o le mo setshwanong sa lephoi o tswa kwa legodimong. **33** Gape Johane a re, "Ke ne ke sa itse gore ke ene, mme erile ka nako e Modimo o neng o nthoma ka yone go tla go kolobetsa wa re, 'Fa o bona Mowa O O Boitshepo o fologa o nna mo mongweng, ke ene yo o mmatlant. Ke ene yo o kolobetsang ka Mowa O O Boitshepo.'" **34** Ke bonye go diragala mo monneng yo, mme ke sone se ke supang gore ke Morwa Modimo." **35** Letsatsi le le latelang fa Johane a eme le barutwa ba bangwe ba le babedi, **36** Jesu a feta gautshwane le bone. Johane a mo leba thata mme a bua a re, "Bonang Kwana ya Modimo!" **37** Mme barutwa ba babedi ba ga Johane ba retologa ba sala Jesu morago! **38** Jesu a retologa a ba bona ba mo setse morago. Mme a ba botsa a re, "Lo batlang?" Ba mo raya ba re, "Rra, o nna kae?" **39** A ba raya a re, "Tlang lo bone." Mme ba ya le ene kwa a neng a nna teng mme ba nna nae lobaka lo e neng e ka nna go simologa nako ya bone mo tshokologong go fithelela go nna lotlatlana. **40** (Mongwe wa banna ba e ne e le Anderea Monna Simone Petoro). **41** Mme Anderea a ya go senka Petoro mogolowe a mo raya a re, "Re bonye Mesia." **42** Mme a isa Petoro kwa go Jesu. Jesu a tlhoma Petoro matlho le mogopolo ka lobakanyana mme a re, "O Simone, morwa Johane, mme o tlaa bidiwa Petoro, ke gore Lefika!" **43** Letsatsi le le latelang Jesu a ikaelela go ya Galalea. Mme bona Filipino a mo raya a re, "Ntshala morago." **44** Filipino a ya go senka Nathaniele mme a mo raya a re, "Re bonye Mesia! Ene tota motho yo Moshe le baporofiti ba boletseng ka ga gagwe! Leina la gagwe ke Jesu, morwa Josefe yo o tswang Nasaretha!" **45** Nathaniele a hakgamala a re. **46** "Kwa Nasaretha! a gona le sengwe se se siameng se se ka tswang teng?" Filipino a re, "Tla fela o iponele." **47** Ya re ba atamela Jesu a re, "Monna yo o ikanyegang ke yo o e tla, Moiseraele wa boammaaruri." **48** Nathaniele a re, "O nkitsile jang?" Mme Jesu a fetola a re, "Erile o le ka fa tlase ga sethare sa mofeige, Filipino a ise a go bone, ke ne ke go bona." **49** Nathaniele a fetola a re, "Rra, O Morwa Modimo, Kgosi ya Iseraele!" **50** Jesu a mmotsa a re, "A o dumela gotlhe mo fela ka gore ke go boleletse gore ke ne ka go bona ka fa tlase ga sethare sa mofeige? O tlaa bona ditshupo tse dikgolo go na le tse. **51** O tlaa bo o bone le legodimo le athamologa le baengele ba Modimo ba boaboelela ba tla kwa go nna, Monna wa kgalalelo."

2 Mme erile morago ga malatsi a mabedi, mmaagwe Jesu o ne a le molaediwa mo lenyalong kwa motseng wa Kana mo Galalea, 2 mme Jesu le barutwa ba gagwe le bone ba ne ba laleditswe. **3** Mofine wa fela go sa ntse go itumelwa, mme mmaagwe Jesu a tla kwa go ene go mmolelela ka mathata

a. 4 Mme Jesu a mo fetola a re, "Ga nkake ka go thusa jaanong jaana ga e ise e be e nne nako ya me ya go dira dikgagamatso." 5 Mme mmaagwe a raya bathhanka a re, "Dirang sengwe le sengwe se a se lo bolelelang." 6 Dinkgwana tsa metse di le thataro tse di dirilweng ka lentswe, tsa bo di le foo; di ne di dirisiwa kafa mokgweng wa Sejuta wa mediro mme nngwe le nngwe ya tsone e ne e ka tshela diemere di ka nna masome a le mabedi kgotsa a le mararo. 7 Mme Jesu a raya bathhanka a re, ba di tlatse metsi go fithelela metsi a nna mo mosethong o o kwa godimo. Erile go sena go dirwa jalo a re, "Gang mo go tsone lo ise kwa go motsamaisi wa modiro." 9 Erile motsamaisi wa mediro a leka metsi mo ganong a jaanong a neng a fetogile mofine, a sa itse gore o ne o tswa kae (lefa tota bathhanka bone ba ne ba itse), a bitsa monyadi a re, 10 "Se ke seno se se gkgamatsang! Wena o farologanye le batho ba bangwe! Motho yo o amogelang balalediwa o tle a dirise mofine o o monate pele, mme e re morago fa mongwe le mongwe a kgotshe a sa tlhole a kgathala, mme a lere mofine o o seng monate. Mme wena o beetse lobaka lono lwa bofelo mofine o o monate." 11 Kgagamatso e e ne ya dirwa mo Kana wa Galalea e le sesupo sa nthla sa ga Jesu mo pontsheng sa nonofo ya legodimo e a romilweng go tla go e supa. Mme barutwa ba gagwe ba dumela tota gore ke Mesia. 12 Erile morago ga lenyalo a ya Kaperenama go ya go nna teng malatsinyana le mmaagwe, le bomonnawe le barutwa. 13 Mme ya bo e le lobaka lwa Tlolaganyo ya Sejuta ya ngwaga le ngwaga, mme Jesu a ya Jerusalema. 14 Mme a bona mo patlelong ya Tempele barekisi ba rekisa dikgomo, dinku le maphoi e le ga diithabelo, le baananyi ba madi ba le ka fa morago ga mabati a go ananyediwang mo go one. 15 Erile Jesu a bona go dirwa jalo a loga seiteo sa megala, a ba lelekela kwa ntle le dinku le dipelesa, a gasagasa madi a baananyi mo bodilong, a pitikolola ditafole tsa bone! 16 Hong ya re a ya kwa banneng ba ba rekisang maphoi a ba raya a re, "Ntshang dilo tse fa. Se fetoleng Ntlo ya ga Rre ntlo ya marekisetso!" 17 Mme barutwa ba gagwe ba gakologelwa seporofeto se se mo dikwalong se se reng, "Tlhoafalelo ya ntlo ya Modimo e tlaa nna tirololo ya me." 18 Mme baeteledipele ba Sejuta ba mmotsa ba re, "O tsaya kae tetelelo ya go ba lelekela kwa ntle? Fa e le gore tetelelo e o e newa ke Modimo, re bontshe kgagamatso e e go supelang." 19 Jesu a fetola a re, "Go siame se ke kgagamatso e ke tlaa e lo direlang: Senyang kago e mme e tlaa re mo malatsing a le mararo ke e tsose!" 20 Ba gkgamala ba re, "Wa reng! go tsere dingwaga di le masome a mane le borataro go aga Tempele e, mme wena wa re o ka e aga mo malatsing a le mararo?" 21 Mme ka "Kago e" o ne a raya mmele wa gagwe. 22 Erile a sena go rula, barutwa ba gakologelwa fa a kile a bua jalo mme ba lemoga gore se a neng a se bua o ne a se ntsha mo dikwalong, se ne se raya ene ka sebele, le gore gotlhe go diragetse ka boammaaruri! 23 Ka nthla ya dikgagamatso tse a di dirileng kwa Jerusalema go le moletlo wa Tlolaganyo, batho ba le bantsi ba dumela gore e ne e le ene Mesia tota. 24 Mme Jesu a seka a ba ikanya ka gore o ne a itse motho le thaloganyo ya gagwe. O ne a sa tlhoke gore le fa e le mang o ka mmolelela gore tlhologo ya motho e fetoga fetoga jang!

3 Mme ya re bosigo bongwe morago ga lottatlana, moeteledipele wa tumelo ya Sejuta yo o bidiwang Nikodemo, wa leloko la phuthego ya Bafarasai, a tla go kopa Jesu thuso. A re, "Rra, rotlhe re itse gore Modimo o go romile go tla go re ruta. Dikgagamatso tsa gago di supa ka botlalo gore o romilwe ke Modimo." 3 Mme Jesu a fetola a re, "Ka tlhoafalo yotlhe e ke nang nayo ke go bolelela se: fa o sa tsalwe sesho, ga o kake wa tsena mo Bogosing jwa Modimo." 4 Mme Nikodemo a gkgamala a re, "Ke tsalwe gape! O rayang? Motho e ka re e le mogolo o ka boela jang mo sehopelong sa ga mmaagwe gore a tsalwe gape?" 5 Mme Jesu a fetola a re, "Se ke se go bolelelang ka tlhoafalo ke se: kwa ntle ga gore motho a tsalwe ka metsi le ka mowa ga a ka ke a tsena mo Bogosing jwa Modimo. 6 Batho ba ka tsala batho ba bangwe fela, mme Mowa O O Boitshepo o naya botshelo jo boshia jo bo tswang legodimong. 7 Jalo he, o se gkgamalele go bua ga me fa ke re o tshwanetse go tsalwa gape! 8 Fela jaaka o ka utlwa phefo mme o ka seka wa bolela kwa e tswang teng kgotsa kwa e tlaa fokelang teng gape, Mowa o ntse fela jalo. Ga re itse gore o tlaa neela mang botshelo jo, jo bo tswang legodimong." 9 Mme Nikodemo a mmotsa a re, "O rayang?" 10 Mme Jesu a fetola a re, "O moruti wa Bajuta yo o tlotlegang, mme a ga o ise o thaloganye dilo tse? Ke go bolelela se ke se itseng e bile ke se bonye, mme le fa go ntse jalo ga o ise o ntumele. 12 Mme fa o sa ntumele fa ke go bolelela ka ga dilo tse di diragalang fano mo bathong, o ka dumela jang fa ke go bolelela ka tse di diragalang kwa legodimong? 13 Gonnye ke nna fela, Morwa Motho, yo ke tsileng mo lefatsheng mme ke tlaa boela kwa legodimong gape. 14 "Mme fela jaaka Moshe a ne a tsholetsa setshwantsho sa noga ya kgotlho mo mopakong, le nna ke tshwanetse go tsholedwa fela jalo mo mopakong. 15 Gore le fa e le mang yo o dumelang mo go nna a tle a bone botshelo jo bo sa khutleng. (aiōnios g166) 16 Gonnye Modimo o ratile lefatsho mo go kalokalo mo o neng wa ntsha Morwa One a le esi gore le fa e le mang yo o dumelang mo go ene a seka a nyelela mme a bone botshelo jo bo sa khutleng. (aiōnios g166) 17 Modimo ga o wa ka wa romela Morwa One go athola lefatsho, fa e se go le boloka. 18 "Ga go na tshekiso ya bosakhutleng e e emetseng ba ba mo ikanyang go ba boloka. Mme ba ba sa mo ikanyeng ba setse ba sekisitswe ebile ba athotswe ka nthla ya go sa dumelang mo go morwa Modimo yo o esi. 19 Katholo ya bone e itsetsepitse mo boammaaruring jo: gore Lesedi le le tswang kwa legodimong le tsile mo lefatsheng, mme ba rata lefifi go gaisa Lesedi, gonnye ditiro tsa bone di ne di le bosula. 20 Ba ila Lesedi la legodimo gonnye ba ne ba batla go leofa mo leffing. Ba nna gkgala le Lesedi leo gonnye ba ne ba tshaba gore dibe tsa bone di tlaa bewa mo pontsheng, mme ba othaiwe. 21 Mme ba ba dirang tshiamo, ba tla ka boitumelo mo Leseding gore mongwe le mongwe a bone gore ba dira se Modimo o batlang ba se dira." 22 Erile morago, Jesu le barutwa ba gagwe ba tswa mo Jerusalema mme ba nna ka lobakanyana mo Judea ba kolobetsa teng. 23 Ka nako e, Johane wa Mokolobetsi o ne a ise a tsenngwe mo kgolegelong. O ne a kolobetsa kwa Ainona gaufi le Salema, gonnye go ne go na le metsi a mantsi teng. 25 Letsatsi lengwe mongwe a simolola go ngangisa barutwa ba ga Johane a ba bolelela gore

kolobetso ya ga Jesu ke yone fela e e botoka. **26** Hong ba tla kwa go Johane ba mo raya ba re, "Rra, monna yo o neng o na nae ka kwa moseja ga Noka ya Jorodane, yo o neng wa re ke Mesia, le ene o a kolobetsa, mme mongwe le mongwe o ya teng mo boemong jwa go tla kwano go rona." **27** Johane a fetola a re, "Modimo kwa legodimong o tlhoma tiro ya mongwe le mongwe. **28** Tiro ya me ke go betlela monna yoo tselo gore mongwe le mongwe a tle a ye kwa go ene. Le lona tota lo itse ka fa ke lo boleletseng sentle ka teng gore ga ke Mesia. Ke fano go mmaakanyetsa tselo, ke gone gotlhe. **29** Ka tlwaelo bontsintsi bo ya kwa go se se gapang maikutlo, monyadiwa o ya kwa monyadi o teng! Ditsala tsa monyadi di itumela nae. Ke tsala ya monyadi, mme ke tletse boitumelo mo tsweleng pele ya gagwe. **30** O tshwanetse go tlotlega thata, mme nna ke tshwanetse go ngotlafala thata. **31** O tswa legodimong ebile o mogolo mo go mongwe le mongwe. Nna ke wa lefatshe, mme tlhologanyo ya me e lekaganyeditswe mo dilong tsa lefatshe fela. **32** O bolela se a se bonyeng le se a se utlwileng, mme ke ba se kae fela ba ba dumelang sa a se ba bolelelang! **33** "Ba ba mo dumelang ba bona gore Modimo ke motswedi wa boammaaruri. Gonne yo, yo o romilweng ke Modimo, ebile o bua mafoko a Modimo, gonne Mowa wa Modimo o mo go ene mo go senang selekanyo. **35** Rara o rata monna yo gonne ke Morwae, mme Modimo o mo neile sengwe le sengwe se se leng teng. **36** Mme bothe ba ba dumelang Morwa Modimo go ba boloka, ba na le botshelo jo bo sa khutleng; ba ba sa mo dumeleng ebile ba sa mo reetse ga ba kitla ba bona legodimo, mme bogale jwa Modimo bo ntse mo go bone." (aiōnios g166)

4 Erile Morena a itse gore Bafarasai ba utlwile kaga bontsintsi jo bo yang kwa go ene go na le kwa go Johane go kolobediwa le go nna barutwa ba gagwe **2** (ntswa Jesu ene ka boene a ne a sa ba kolobetse, go ne go kolobetsa barutwa ba gagwe). **3** A tswa mo Judea mme a boela kwa kgaolong ya Galalea. **4** Mme a tshwanetse ke go ralala Samaria a le mo tseleng. **5** Mme erile motshagare wa sethoboloko, fa a atamela motse wa Sikara, a goroga fa Sedibeng sa ga Jakobe se se neng se le mo setsheng sa lefatshe se Jakobe a neng a se neile morwawe Josefe. **6** Jesu o ne a lapisitwe ke go tsamaya mo mogoteng wa letsatsi sekgala se se leele, hong a nna fa thoko ga sediba a lapile thata. **7** Mme ka bofofo ga tla mosadi wa Mosamaria a tla go ga metsi, mme Jesu a mo kopa metse a go nwa. **8** O ne a le nosi ka nako eo, barutwa ba gagwe ba ile kwa motseng go reka dijo. **9** Mosadi a gakgamala gore a Mojuta o ka kopa "Mosamaria yo o nyatsegang" sengwe, ka tlwaelo ba ne ba sa buisanaye! Mme a bua kaga selo se le Jesu. **10** Mme Jesu a fetola a re, "Fa o ne o itsile gore Modimo o go tsholetse neo e e gakgamatsang jang, le gore ke nna mang, o kabo o nkopile metse a botshelo!" **11** Mme mosadi a re, "Ga o na segelelo, le gone sediba se se boteng thata! O ne o tlaa tsaya kae metse a botshelo?" **12** Kwa ntle ga moo, a o mogolo mo go rraarona mogolwagolwane Jakobe? O ka mpha metse a a botoka jang go na le a Jakobe le bo morwawe le dikgomo tsa bone di a noleng ka boitumelo?" **13** Jesu a fetola a re, "Batho ba tshwarwa ke lenyora ka bofofo fa ba sena go nwa metsi a. **14** A ke a ba nayang, a nna motswedi

wa bosakhutleng mo go bone. Mme metsi a. A ke a motswedi o o ba nose-tsang ka metlha ka botshelo jo bo sa khutleng." (aiōn g165, aiōnios g166) **15** Mme mosadi a mo raya a re, "Tswetswee rra, nnosa metsi ao! Hong ga ke na go tlhola ke nyorwa gape, le fa e le go tsamaya mosepele o moleele o wa go tla go ga metse fano malatsi otlhe." **16** Mme Jesu a mo raya a re, "Tsamaya o ye go tla le monna wa gago." **17** Mme mosadi a mo fetola a re, "Kana ga ke a nyalwa." **18** Jesu a re, "O bua boammaaruri Ka gore o kile wa nna le banna ba le bathlano, mme monna yo o nngang le ene gompieno jaana ga a go nyala." **19** Mme mosadi a mo raya a re, "Rra, o tshwa-netse wa bo o le moporofiti. **20** Mme he, mpoletlela, ke eng fa lona Bajuta lo re Jerusalema ke lone fela lefelo la kobamelo-Modimo, fa rona Basamaria re re ke fano [mo Thabeng ya Gerasime] kwa borraa-rona mogolwagolwane ba neng ba obamela teng?" **21** Jesu a fetola a re, "Nako e e tla, mma, fa re tlaa bong re sa tlhole re tshwenyega ka gore a re obamela Rara fano kgotsa mo Jerusalema. **22** Gonne ga go mo go reng re obamela kae, fa e se gore re obama jang, ebong gore a kobamelo ya rona ke ya semowa le ya boammaaruri?" A re na le thuso ya Mowa O O Boitshupo? **23** Gonne Modimo ke Mowa, jalo re tshwanetse go nna le thuso ya one go o obamela jaaka re tshwanetse. Rara o batla one mofuta o wa kobamelo mo go rona. **24** Mme lona Basamaria lo itse go se kae fela kaga gagwe, lo obamela ka bofofo fa rona Bajuta re itse gotlhe kaga gagwe, gonne poloko e tla mo lefatseng ka Bajuta." **25** Mosadi a re, "Go siame, le fa go ntse jalo ke itse gore Mesia o tlaa tla, yo ba mmitang Keresete, mme fa a tla o tlaa re tlhalosetsa sengwe le sengwe." **26** Hong Jesu a mo raya a re, "Ke nna Mesia!" **27** Mme erile gone foo fela barutwa ba gagwe ba goroga. Ba gakgamalela go mmona a bua le mosadi, mme le fa e le ope wa bone a se ka a mmotsa gore ke eng. **28** Mme mosadi a tsamaya a tlogela nkgwana ya gagwe ya metsi fa thoko ga sediba a boela kwa motseng mme a feta a bolelela mongwe le mongwe jaana, **29** "Tlang lo bone monna yo o mpoletletseng sengwe le sengwe se ke neng ke tshela ke se dira! A e ka ne e le ene Mesia?" **30** Mme batho ba motse ba tla ba tsoisitse modumo ba ya go mmona. **31** Erile ka lobakanyana fa mosadi a sa ntse a ile go bolelela batho kwa motseng, barutwa ba sala ba leka ga kgothaletsa Jesu go ja. **32** Mme Jesu a ba fetola a re, "Nnyaa, ke na le dijo tse lo sa itseng kaga tsoe." **33** Mme barutwa ba botsanya ba re, "Yo o di mo lereditseng ke mang?" **34** Mme Jesu a ba tlhalosetsa jaana a re: "Dikotla tsa me di mo go direng go rata ga Modimo o o nthomileng, le mo go fetseng tiro ya One. **35** A lo gopola gore tiro ya thobo ga e na go simolola go fitlhelela selemo se fela mo dikgweding tse nne go simolola jaanong jaana? Lebang mo tikologong! Masimo a magolo a e leng mewa ya batho, a simolola go butswa mo tikologong yotlhe ya rona, ebile a setse a ka rojwa. **36** Barobi ba tlaa duelwa tuelo e ntle, mme ba tlaa phuthela mewa e e bolokwang mo difalaneng tsa legodimo! Ke boitumelo jo bogolo jang jo bo letileng mojadi le morobi! (aiōnios g166) **37** Gonne ke boammaaruri gore mongwe o a jala mme yo mongwe o a roba. **38** Ke lo romile go roba kwa lo sa jalang teng; ba bangwe ba dirile tiro ya bone mme lona lwa amogela thobo." **39** Batho ba le bantsi ba ba tswang mo

motseng wa Samarea, ba dumela gore ke Mesia ka ntlha ya polelo ya mosadi e e reng, "O mpoleletse sengwe le sengwe se ke neng ke aga ke se dira!" **40** Erile ba ya go mmona kwa sedibeng, ba feta ba mo kopa go ya go nna mo motseng wa bone; mme a dira jalo, a nna malatsi a le mabedi, **41** a a neng a lekanye ba le bantsi go dumela mo go ene ba sena go mo utlwa. **42** Mme ba raya mosadi ba re, "Jaanong re a dumela gonne re mo ikutlwetse, e seng fela ka ntlha ya se wena o se re boleletseng. Ke ene tota Mmoloki wa lefatsho." **43** Erile a sena go nna malatsi a mabedi, a ya Galalea **44** fela jaaka a ne a tle a re, "Mporofiti o tlotlega gongwe le gongwe fa e se fela mo lefatsheng la ga gabo!" **45** Mme Bagalalea ba feta ba mo amogela sentle ka diatla tsoo pedi gonne ba ne ba le mo Jerusalem ka moletlo wa Tlaganyo le gore ba ne ba bonye dikgagamato dingwe tsa gagwe. **46** Mo lobakeng lwa loeto lwa gagwe a raletse Galalea, o ne a goroga mo motseng wa Kana kwa a neng a kile a fetola metsi mofine teng. Erile a sale teng koo, monna mongwe mo motseng wa Kaperenama, yo e neng e le kgosana, yo morwawe o neng a lwala thata, **47** a utlwa gore Jesu o boile kwa Judea jaanong o mo Galalea. Monna yo a ya kwa Kana, a fitlhela Jesu, mme a kopa gore a ye le ene kwa Kaperenama go ya go fodisa morwawe yo a neng a le fa gare ga loso le botshelo. **48** Mme Jesu a mmonsatsa a re, "A ga gona ope wa lona yo o dumelang mo go nna fa e se ke tsewelela ka go dira dikgagamato?" **49** Kgosana ya mo rapela ya re, "Rra, tswee-tswee ithaganele pele ngwanake o a swa." **50** Mme Jesu a mo raya a re, "Boela kwa gae. Morwao o fodile!" Mme kgosana ya dumela Jesu ya boela kwa gae. **51** Mme ya re fa a sale mo tseleng, bangwe ba batlhanka ba gagwe ba mo rakanthsha ka mafoko a a reng sengwe le sengwe se siame, morwao o namologile mo bolwetseng. **52** A ba botsa gore mosimanyana o sale a simolola go ikutlwa botoka leng? Mme ba mo fetola ba re, "Erile maabane mo tshokologong nako e ka nna ya bongwe, letshoroma la gagwe la bo le nyelela!" **53** Hong rraagwe a lemoga gore e ne e le ka lone lobaka lo Jesu a neng a mo raya a re, "Morwao o fodile." Mme Kgosana le bantlo ya gagwe ba dumela gore Jesu ke Mesia. **54** Se e ne e le kgagamato ya bobedi mo Ga-lalea morago ga go boa ga ga Jesu kwa Judea.

5 Mme erile morago ga mo o Jesu a boela kwa Jerusalem ka ntlha ya letsatsi lengwe la malatsi a boikhutso a tumelo ya Sejuta. **2** Mo mo-tseng, gaufi le kgoro ya dinku go ne go na le Lekadiba ja Betheseda le na le maobo a le mathano. **3** Bontsintsi jwa batho ba ba lwalang, ba ba tlho-tsang, ba ba fufetseng, kgotsa ba ba suleng mefama ba ne ba ntse mo maobong ba letetse go fetlhega ga metsi, **4** gonne moengele wa Morena o ne a tle a tle go fetlha metsi, mme motho wa ntlha go tolela mo teng o ne a fodisiwa. **5** Mongwe wa banna ba ba neng ba namaletse gone foo, o ne a sa bolo go lwala mo dingwageng di le masome mararo le bofera bobedi. **6** Erile fa Jesu a mmona ebile a itse lobaka lo a saleng a lwala ka lone a mmonsatsa a re, "A o batla go fola?" **7** Mme monna yo o lwalang a re, "Ga ke kgone, ka gore ga ke na ope yo o ntsenyang mo lekadibeng ka nako ya phetho ya metsi, e a re fa ke sa ntse ke leka go tolela mo teng,

mongwe a bo a nthaka." **8** Mme Jesu a mo raya a re, "Nanoga, phutha phate ya gago o ye gae!" **9** Ka bonako monna a fola! A phutha phate a simolola go tsamaya! Mme go ne go le letsatsi la Sabata ba kgagamato e e diragala. Mme baeteledipele ba Sejuta ba nna kgatlhanong le tiro eo. **10** Ba raya monna yo o fodisitsweng ba re, "Ga o a tshwanela go dira ka letsatsi la Sabata! Ga go kafa molaong go tshola phate eo!" **11** Mme ene a ba fetola a re, "Monna yo o mphodisitseng o rile ke e tsee." **12** Ba mmonsatsa ba re, "Yo o neng a bua selo se se ntseng jalo ke mang?" **13** Monna yo o fodisitsweng a bo a sa itse gore ke mang, gonne Jesu o ne a nyetsetse mo bontsintsi jwa batho. **14** Mme erile kwa morago Jesu a mmona mo Tempeleng mme a mo raya a re, "Jaanong o fodile; o se ka wa tlhola o leofa gape, ka gore fa o ka leofa e ka re kgotsa wa diragalelwa ke se se bosula bogolo!" **15** Mme monna yo o fodisitsweng a ya go senka baeteledipele ba Sejuta mme a ba bolelela gore o fodisitswe ke Jesu. **16** Mme ba simolola go gagautha Jesu ba mo raya ba re ke motlola melao ya Sabata. **17** Mme Jesu a fetola a re, "Rre o tswetsetse pele ka go dira tshiamo, mme le nna ke dira jaaka ene." **18** Mme baeteledipele ba Sejuta ba gakala thata ba batla go mmolaya gonne mo godimo ga go tloa melao ya Sabata, o ne a re Modimo ke rraagwe, ka go bua jalo a itekanya le Modimo. **19** Mme Jesu a fetola a re, "Ga go na sepe se Morwa a ka se dirang ka boene. O dira fela se a bonang Rara a se dira, ka tsela e e tshwanang. **20** Gonne Rara o rata Morwa, o mmolelela sengwe le sengwe se a se dirang; mme Morwa o tlaa dira dikgagamato tse dikgolo go feta phodiso ya monna yo! **21** Ebile o tlaa tsosa mo baswing mongwe fela yo ene a batlang go mo tsosa, fela jaaka Rara a dira. **22** Mme Rara o neetse Morwa katlholo yotho; ya sebe **23** gore mongwe le mongwe a tle a tlotle Morwa, fela jaaka ba tlotla Rara. Mme fa lo gana go tlotla Morwa Modimo, yo o mo romileng kwa go lona, hong ga lo tlotle Rara gotlhelele. **24** "Ke bua ke gatelela gore mongwe yo o reetsang molaetsa wa me a bo a dumela mo Modimong o o nthomileng, o na le botshelo jo bo sa khutleng, mme ga a na go sekisiwa ka ntlha ya dibe tsa gagwe, gonne o setse a dule mo losong a tsenye mo botshelong. (aiōnios g166) **25** Mme ke bua ka tlhoafalo ke re, 'Lobaka lo e tla, tota legale lo setse lo fitlhile, fa baswi ba tlaa utlwang lentswe la me, lentswe la Morwa Modimo, mme ba ba reetsang ba tlaa tshela.' **26** Rara ka esi o na le botshelo, jalo he o neetse Morwawe botshelo joo gore bo nne mo go ene ka esi, **27** le go athola dibe tsa batho botho gonne ke Morwa Modimo. **28** Se gagamaleng! Ruri lobaka lo e tla lo baswi botho mo mabitleng a bone ba tlaa utlwang lentswe la Morwa Modimo, **29** mme ba ba dirileng tshiamo ba tlaa tsoga gape go ya botshelong jo bo sa khutleng; mme ba ba neng ba tswetsetse mo bosuleng, ba tlaa bo ba tsogela katlholong. **30** Mme ga ke dire katlholo epe ke sa rerisa Rara. Ke athola jaaka ke laetswe. Mme katlholo ya me e siame ebile e tlhamaletse gonne e ka fa go rateng ga Modimo o o nthomileng, ga se ya me fela. **31** Fa ke bua ka bo nna, ga ke dumelwe. **32** "Mme mongwe, ebong Johane wa Mokolobetsi, le ene o bua ka ga me. Lo ne lwa tswa lwa ya go reetsa thero ya gagwe, mme ke lo thomamisetsa gore mo a go buang ka ga me ke boammaaruri! **34** Mme bosupi jwa boammaaruri jo

ke nang nang najo, ga bo tswe mo mothong, lo gakolotswa ka bosupi jwa ga Johane gore lo tle lo dumele mo go nna lo bolokwe. **35** Johane o ne a phatsima sentle ka lobakanyana, mme go ne ga lo solegela molemo lwa itumela, **36** mme Nna ke na le mosupi yo mogolo go feta Johane. Ke raya dikgakamatso tse ke di dirang; ke di neetswe ke Rara, mme di supa gore Rara o nthomile. **37** Mme Rara le ene o supile ka ga me, le fa a sa lo itshupegetsa ka sebele, kgotsa a bua le lona lo lebaganye mo matlhong. **38** "Mme ga lo mo reetse, gonne lo gana go ntumela, nna yo ke romilweng kwa go lona ka molaetsa wa Modimo. **39** Na phuruphutsa dikwalo tsa tumelo, gonne lo dumela gore di lo naya botshelo jo bo sa khutleng. Mme dikwalo di raya nna! (aiōnios g166) **40** "Mme ga lo tle kwa go nna gore ke lo neye botshelo jo jo bo sa khutleng! **41** Go rata kgotsa go sa rateng ga lona ga go reye sepe mo go nna gonne jaaka ke itse sentle, ga go na lorato lwa Modimo mo go lona. **43** Ke a itse, gonne ke tsile kwa go lona ke emetse Rre mme lo gana go nkamogela, le fa go ntse jalo lo ipaakanyeditse go amogela ba ba sa rongwang ke ene, mme ba ikemetse ka bo bone! **44** Ga go hakgametse fa lo sa dumele! Gonne lo tlotlana ka boitumelo, mme ga lo na sepe ka ga tlotlo e e tswang Modimong o o osi! **45** "Mme ga se nna yo ke tlaa lo bayang molato ka ga selo se kwa go Rara; ke Moshe yo o tlaa dirang jalo! Moshe, yo mo melaong ya gagwe lo tthomileng ditsholofelo tsa lona tsa legodimo. **46** "Gonne lo ganne go dumela Moshe. O kwadile ka ga me, mme lo gana go mo dumela, jalo he, le nna lo gana go ntumela. **47** Mme ka lo sa dumele se a se kwadileng, ga go hakgamatse fa le nna lo sa ntumele."

6 Morago ga mo, Jesu a kgabaganya Lewatlle la Galalea, le le itsegeng gape ka leina la Tiberia. **2** Mme bontsi jo bogolo jwa batho, jo bontsi jwa bone e neng e le batsamai ba ya Jerusalema kwa moletlong wa Tlolaganyo, ba bo ba mo setse mo-rago gongwe le gongwe kwa a yang teng, go mmona a fodisa balwetse. Mme erile Jesu a sena go tshatlogela mo thabeng a nna fa fatshe, barutwa ba gagwe ba mo dikaganyeditse, mme a tloga a bona bontsi jo bogolo jwa batho bo tshatloga thaba bo mo senka. Hong a retologela kwa go Filipino a mo raya a re, "Filipo, re ka reka senkgwe kae go fa batho ba botlhe?" **6** (O ne a leka Filipino, gonne o ne a setse a itse se a neng a ya go se dira). **7** Filipino a fetola a re, "Go tlaa lopa madi a mantsi thata go simolola go dira jalo!" **8** Mme Anderea, monnaa Simone Petoro, a bua a re, "Go na le mosimanyana fano yo o tshotseng dinkgwe tsa korong di le tlhano le dithlapi di le pedi! Mme go ka thusang fa batho ba le bantsi jaana?" **10** Mme Jesu a ba raya a re, "Rayang mongwe le mongwe a nne fa fatshe," mme botlhe fela ba nna fa fatshe mo bojannye, mme palo ya banna ba le bosii e ne e ka nna dikete di le tlhano. **11** Hong Jesu a tsaya dinkgwe, a di lebogela, a di naya batho. Morago ga moo a dira fela jalo ka dithlapi. Mme mongwe le mongwe a ja a kgora! **12** Mme Jesu a ba raya a re, "Kokoanyang masalela, gore le fa e le sepe se seka sa lathwa." **13** Mme diroto di le lesome le bobedi tsa tlaa masalela ao! **14** Erile fa batho ba lemoga kgakamatso e tona tona eo e e diragetseng, ba bua ka kgakgamalo ba re, "Ammaaruri, ke mopopofiti yo re ntseng re

mo solofetse!" **15** Mme erile ka go bua jalo, Jesu a bona gore ba ipaakanyeditse go mo tsaya ka pateletso go mo dira kgosi ya bone, hong a tshatlogela kwa godimo mo dithabeng a le nosi. **16** Mo maabanyaneng ao barutwa ba gagwe ba fologela kwa lotshitshing go mo emela teng. **17** Mme erile go nna lefifi Jesu a ise a tle, ba tsena mo mokorong ba kgabaganya lewatle go ya Kaperenama. **18** Mme ka bofefo ga tsoga phefo e kgolo thata mo lewatleng, ya ba tsubutletsatsa le mokoro o ba neng ba o kgweetsa, le lewatle la rwalelesega. Mme le fa go ntse jalo, erile ba ka ne ba tsamaile bommaele ba le bararo kgotsa ba le bane, ka tshoganetso ba bona Jesu a tsamaela ntheng ya mokoro! Mme ba tshoga thata, **20** mme a ba bitsa a re se boifeng. **21** Mme ba eletsa go mo tseela mo teng, mme ka bofefo mokoro wa goroga kwa ba neng ba ya teng! **22** Mme ya re mo mosong o o latelang, morago ga ba kgabaganya lecha, bontsintsi jwa batho jwa simolola go phuthaganela mo lotshitshing (bo emetse go bona Jesu). Gonne ba ne ba itse gore barutwa ba ne ba tsamaile ka mokoro wa bone ba mo tlogela kwa morago. Mekoro e mennye e le mentsinyana e e tswang kwa Tiberia e ne e le gautshwane, **24** mme erile batho ba bona gore Jesu o ne a seyo foth, le fa e le barutwa ba gagwe, ba tsena mo mekorong ba kgabaganyetsa kwa Kaperenama go ya go mo senka teng. **25** Erile fa ba goroga ba mmona ba re, "Morena o tsile fano jang?" **26** Jesu a ba fetola a ba raya a re, "Boammaaruri jwa potsotso ya lona ke gore lo batla go nna le nna gonne ke lo file dijo, e seng ka nthla ya gore lo dumela mo go nna. **27** Jalo he, ga lo a tshwanela go baya mo dilong tse di nyelelang jaaka dijo. Nnyaa, dirisang nonofo ya lona ka go batla botshelo jo bo sa khutleng jo nna Morwa Motho ke ka bo lo nayang. Gonne Modimo Rara o nthomile gone go dira jalo." (aiōnios g166) **28** Mme ba mo fetola ba re, "Re tshwanetse go dira eng go itumedisa Modimo?" **29** Jesu a ba raya a re, "Go rata ga Modimo ke gore lo dumele mo go yo o mo romileng." **30** Ba fetola ba re, "O tshwanetse go re bontsha dikgakamatso tse dingwe fa o batla gore re dumele gore o Mesia. Re fe dijo mahala malatsi otlhe, jaaka borraa rona ba ne ba di fiwa fa ba tsamaya ba raleitse sekaka! Fela jaaka dikwalo di re, 'Moshe o ba neetse senkgwe se se tswang legodimong'." **32** Jesu a ba raya a re, "Moshe ga a ise a ke a se ba neele. Rre ke ene yo a neng a se ba naya. Mme jaanong o lo fa senkgwe sa boammaaruri se se tswang legodimong. **33** Senkgwe sa boammaaruri ke Motho, yo o romilweng ke Modimo a tswa legodimong, mme ene o neela lefatshe botshelo." **34** Mme ba mo raya ba re, "Morena, re neele senkgwe se mo matshelong a rona malatsi otlhe!" **35** Mme Jesu a re, "Ke nna Senkgwe sa Botshelo. Ga go na ope yo o tlang kwa go nna yo o tlaa tiholang a bolawa ke tlaa gape. Ba ba dumelang mo go nna ga ba kitla ba tihola ba nyorwa. **36** Mme molato fela ke gore, jaaka ke lo boleletse pele, ga lo dumele le fa tota lo mponye. **37** Mme bangwe ba Rara a ba nneileng ba tlaa tla kwa go nna mme ga nkitla ke ba gana. **38** Gonne ke tsile fano ke tswa legodimong go tla go dira go rata ga Modimo o o nthomileng, e seng go rata ga me. **39** Mme mo ke go rata ga Modimo go re, 'Ke seka ka lathegelwa le fa e le ke a le mongwe fela mo go botlhe ba o ba nneileng, mme e leng gore ke ba tsosetse botshelong jo bo sa khutleng ka Letsatsi la Bofelo.' **40**

Gonne ke go rata ga ga Rre gore mongwe le mongwe yo o bonang Morwawe a ba a dumela mo go ene o tshwanetse go nna le botshelo jo bo sa khutleng, gore ke tle ke mo tsose ka Letsatsi la Bofelo." (aiōnios g166) 41 Hong Bajuta ba simolola go mo ngongoregela, gonne a re ke Senkgwe se se tswang legodimong. 42 Ba hakgamala ba re, "A reng? Gonne re mo itse e le Jesu fela, morwa Josefa yo rraagwe le mmaagwe re ba itseng. O rayang fa a re o fologile kwa legodimong?" 43 Mme Jesu a fetola a re, "Se ngongoregeng ka nthla ya go bua ga me jalo. 44 Gonne ga go ope yo o ka tlang kwa go nna fa e se Rara yo o nthomileng a mo gogela kwa go nna, mme ka Letsatsi la Bofelo ke tlaa mo tsoa. 45 Jaaka go kwadilwe mo Dikwalong, 'Botlhe ba tlaa rutwa ke Modimo.' Ba Rara o buang nabo, ba ba ithutang boammaaruri mo go ene, ba tlaa tla kwa go nna. 46 (Ga go ope yo o bonyeng Rara, ke nna fela yo ke mmonyeng). 47 "Ke bua ka go gatelela ke re, le fa e le mang yo o dumelang mo go nna o setse a na le botshelo jo bo sa khutleng! (aiōnios g166) 48 Ee, ke senkgwe sa botshelo. 49 Go ne go sena botshelo bope mo senkgweng se, se se neng se tswa mo loaping, se se neng sa neelwa borraeno mo sekakeng, gonne botlhe ba ne ba a swa. 50 Mme go na le senkgwe tota se se tswang legodimong se se nayang mongwe le mongwe yo o se jang botshelo jo bo sa khutleng. 51 Mme ke sone senkgwe seo se se tshelang se se fologileng kwa Legodimong. Le fa e le mang yo o jang senkgwe se o tlaa tshela ruri; mmele wa me ke sone senkgwe se, se ntshediswe go golola batho." (aiōn g165) 52 Hong Bajuta ba simolola go ganetsanya kaga se a se rayang. Ba re, "Monna yo o ka re naya nama ya gagwe gore re e je?" 53 Hong Jesu a ipoeletsa a re, "Ka thomamiso yotlhe e ke nang nayo ke lo raya, ke re: fa lo sa je nama ya Morwa Motho lo bo lo nwa madi a gagwe, ga lo ka ke lwa nna le botshelo jo bo sa khutleng mo go lona. 54 Mme le fa e le mang yo o jang nama ya me a ba a nwa le madi a me, o na le botshelo jo bo sa khutleng, mme ke tlaa mo tsoa ka Letsatsi la Bofelo. (aiōnios g166) 55 Gonne nama ya me ke dijo tsa boammaaruri, le madi ke seno sa boammaaruri. 56 "Mongwe le mongwe yo o jang nama ya me a ba a nwa madi a me o mo go nna, le nna ke mo go ene. 57 Ke tshela ka nonofo ya ga Rara yo o tshelang yo o nthomileng, mme fela jalo ba ba njang le bone ba tlaa tshela ka nthla ya me! 58 Ke Senkgwe sa boammaaruri se se tswang legodimong; mme le fa e le mang yo o jang Senkgwe se, o tlaa tshela ruri, a sa swe jaaka borraeno ba ne ba a swa, le fa ba ne ba jele senkgwe se se tswang legodimong." (aiōn g165) 59 (A rera thero e mo ntung ya thuto mo Kaperenama). 60 Le barutwa ba gagwe tota ba re, "Golo mo go thata go thalogangwa. Ke mang yo o ka thalasang se a se rayang?" 61 Jesu a itse mo pelong ya gagwe gore barutwa ba gagwe ba ne ba ngongorega mme a ba raya a re, "A golo mo go a lo kgopisa? 62 Mme lo tlaa akanya eng fa lo mpona, Morwa Motho, ke boela kwa legodimong gape? 63 Mowa O O Boitshepo ke one fela o o nayang botshelo jo bo sa khutleng. Ba ba tsetsweng gangwe fela ka tsalo ya senama, ga ba kitla ba amogela mpho e. Mme jaanong ke lo boleletse ka fa lo ka nnang le botshelo jo jwa semowa ka teng. 64 Mme bangwe ba lona ga ba ntumele." (Gonne Jesu o ne a sale a itse kwa tshimologong ba ba neng

ba sa dumele le yo o tlaa mo okang). 65 Mme a re, "Ke sone se ke neng ke se raya fa ke re ga go na ope yo o ka tlang kwa go nna fa e se Rara a mo lere kwa go nna." 66 Erile fela gone foo barutwa ba gagwe ba le bantsinti ba mo furalela ba mo tlogela. 67 Mme Jesu a retologela kwa go ba ba lesome le bobedi a ba botsa a re, "A le lona lo a tsamaya?" 68 Mme Simone Petoro a fetola a re, "Morena, re ka ya kwa go mang? Ke wena fela o le esi yo o nang le mafoko a a nayang botshelo jo bosakhutleng, (aiōnios g166) 69 jalo he re a dumela ebile re itse gore o Morwa Modimo o o boitshepo." 70 Hong Jesu a re, "Ke thophile ba le lesome le bobedi ba lona, mme a le esi ke diabololo." 71 (O ne a busa ka ga Judase, Morwa Simone Isekariota, mongwe wa ba ba lesome le bobedi, yo o tlaa mo okang).

7 Erile morago ga mo, Jesu a ya Galalea, a tsena motse le motsana gonno o ne a batla go nna ka kwa nthle ga Judea kwa Bajuta ba neng ba mo logela leano la go mmolaya teng. 2 Mme jaana ya bo e le lobaka lwa Mediro ya Metlaagana letsatsi lengwe la ngwaga la boitapoloso la Sejuta. 3 Mme bomonnaa Jesu ba mo thothleletsa gore a ye kwa Judea kwa medirong. Ba mo raya ka tshotlo ba re, "Ya kwa batho ba bantsi ba ka bonang dikgakgamatso tsa gago gone! 4 Ga o ka ke wa tuma fa o iphitlha jaana! Fa o le mogolo jaana, itshupegetse lefatshel!" 5 Gonno le bomonnawe ba ne ba sa dumele mo go ene. 6 Jesu a fetola a re, "Ga e ise e nne nako e e ntshwanetse gore ke ye teng. Mme lona lo ka nna lwa tsamaya nako ngwwe fela ga go na go dira pharologanyo epe mo go lona. 7 Gonno lefatshel ga le ka ke la lo ila; mme nna le a nkila gonno ke le bona molato kaga sebe le bosula. 8 Lona tsamayang, ke tlaa tla kwa morago fa nako e setse e siame." 9 Jalo a sala mo Galalea. 10 Mme erile bomonnawe ba sena go ya moletlong, le ene a tsamaya, le fa go ntse jalo a ngwangwaela a sa bonwe ke ope. 11 Baeteledipele ba Sejuta ba leka go mo senka kwa moletlong mme ba nna ba botsa gore a ope ga a ise a ke a mmonne. 12 Go ne, go na le ditlotlo tse dintsi kaga gagwe mo bathong. Bangwe ba re, "Ke monna yo o gakgamatsang," fa ba bangwe bone ba ne ba re, "Nnyaa, o timetsa batho." 13 Mme ga bo go sena motho ope yo o neng a na le maikaelelo a go mmuelela mo pontsheng ka nthla ya go tshaba ipusolotsetso ya baeteledipele ba Sejuta. 14 Mme erile go setse go le fa gare ga moletlo, Jesu a ya kwa Tempeleng mme a feta a ruta mo pontsheng. 15 Baeteledipele ba Sejuta ba hakgamala fa ba mo utlwa, mme ba botsanya ba re, "Ke eng fa a itse thata jaana mme a ise a ke a tsene dikole tsa rona?" 16 Mme Jesu a ba raya a re, "Ga ke lo rute megopolo ya me, fa e se ya Modimo o o nthomileng. 17 Fa mongwe wa lona a ikaelela go dira go rata ga Modimo ka boammaaruri, hong lo tlaa itse gore a thuto ya me e tswa Modimong kgotsa ke ya me fela. 18 Le fa e le mang yo o ntshang megopolo ya gagwe o a bo a ipuisa a batla go galalediwa, mme yo o batlang go tlotla yo o mo romileng, ke motho yo o siameng yo o boammaaruri. 19 Ga go na ope wa lona yo o obamelang melao ya ga Moshe! Jalo ke eng fa lo ntshwaya phoso ka go sa e obamelang? Ke eng fa lo mpolaela go dira jaana?" 20 Mme bontsi jwa batho jwa fetola jwa re, "O a tsenwa! Yo o lekang go go bolaya ke mang?" 21 Jesu a fetola a re, "Ke dirile go le Sabata ke fodisa motho, mme lo ne lwa

hagkamala. Mme le lona lo dira go le Sabata, fa lo obamela molao wa ga Moshe wa go rupisa (tota, le gale, mokgwa o wa go rupisa o mogologolo go na le molao wa ga Moshe); ka gore fa nako e e siameng ya go rupisa bana ba lona e tla go le Sabata, lo tswelela pele lo rupisa, jaaka lo tshwanetse. Jaanong ke eng fa ke atholelwa go fodisa motho go le Sabata? 24 Aka-nyang selo se mme lo tlaa bona gore ke bolelela ruri." 25 Bangwe ba batho ba ba neng ba nna koo mo Jerusalemaba buisanya ba re, "A monna yo ga se ene yo ba lekgang go mmolaya? 26 Mme ke yo fa, o rera mo mpepeneng, ga ba mo rrele sepe. A e kane e le gore baeteledipele ba rona ba bonye gore ke Mesia tota? 27 Mme o ka nna Mesia jang? Gonne re itse kwa monna yo a tsaletsweng teng; fa Keresete ene a tla, o tlaa bonala fela mme ga gona ope yo o tlaa itseng kwa o tswang teng." 28 Mme Jesu mo therong ya gagwe mo Tempeleng a goa a re, "Ee, lo a nkitse le kwa ke tsaletsweng gone le kwa ke neng ka godisediwa gone, mme ke moemedi wa mongwe yo lo sa mo itseng, mme ene o Boammaaruri. 29 Ke a mo itse nna ka gore ke ne ke na nae, mme o nthomile mo go lona." 30 Mme baeteledipele ba Sejuta ba batla go mo tshwara, le fa go ntse jalo ga se ka ga nna letsogo le le mo amang, gonne nako e a e beetsweng ke Modimo e ne e ise e nne yone. 31 Ba le bantsi mo bontsintsing jwa batho kwa Tempeleng ba dumela mo go ene ba re, "Oai, lo solofela dikgagamatso dife mo go Mesia tse monna yo a sa di dirang?" 32 Erile Bafarasai ba utlwa gore bontsintsi bo ne bo le mo mogopolong o, bone le ditlhogo tsa baperesiti ba romela mapodise a Tempele go tshwara Jesu. 33 Mme Jesu a ba raya a re, "Ga e ise e nne nako! Ke tshwanetse go nna fa ka lobakanyana. Hong ke gone ke tlaa boelang kwa go yo o nthomileng. 34 Lo tlaa mpatla mme ga lo na go mpona, gape ga lo na go kgona go tla kwa ke gone!" 35 Baeteledipele ba Sejuta ba akabadiwa ke polelo e, mme ba botsanya ba re, "O ikaelela go ya kae? Kgotsa o akanya go tswa mo kgaolong e a tsamaya e le moruti mo Bajuteng mo dikgaolong tse dingwe tsa lefatshe, kgotsa le fa e le kwa go Badichaba! 36 O raya eng fa a re, re tlaa mmatlal mme ga re na go mmona, le gore, 'Ga lo kitla lo kgona go tla kwa ke leng teng?'" 37 Mo letsatsing la bofelo, e le pheletso ya malatsi a boitapoloso, Jesu a goela kwa bontsintsing jwa batho a re, "Le fa e le mang yo o nyorilweng, a a tle kwa go nna a nwe. 38 Gonne dikwalo tsa re dinoka tsa metse a a tshedileng di tlaa elela diitwa mo teng ga yoo o dumelang mo go nna." 39 (O ne a bua ka Mowa O O Boitshupo, o o tlaa newang mongwe le mongwe yo o dumelang mo go ene; mme Mowa o ne o ise o abiwe, gonne Jesu o ne a ise a boele kwa kgalalelong ya gagwe kwa legodimong). 40 Erile bontsintsi bo utlwa a buajaana, bangwe ba bone ba re, "Ammaaruri monna yo ke moporofiti yo o tlaa tiang pele ga Mesia." 41 Bangwe ba re, "Ke Mesia." Mme ba bangwe bone ba nna ba re, "Ga e ka ke ya nna ene! A Mesia o tlaa tswa kwa Galalea? Gonne dikwalo di bua sentle fela gore Mesia o tlaa tsalwa ke ba ntlo ya bogosi jwa ga Dafide, mo Bethelhehema, motse o Dafide o neng a tsalelwa mo go one." 43 Jalo ga tsoga kgaogano mo bontsing jwa batho ka ga gagwe. 44 Mme bangwe ba batla gore a tshwarwe mme ga seka ga nna ope yo o mo amang ka letsogo. 45 Mapodisi a Tempele a a neng a romilwe go mo tshwara a boela kwa

ditlhogong tsa baperesiti le Bafarasai. Mme tsa feta tsa ba botsa tsa re, "Ke eng lo ne lo sa tle le ene?" 46 Mme mapodisi a dumaduma a re, "O bua dilo tse di hakgamatsang! Ga re ise re ke re be re utlwe sepe se se ntseng jaaka se a se buang." 47 Mme Bafarasai ba fetola ka tshotlo ba re, "Go raya gore le lona lo timeditswe?" 48 "A go na le mongwe mo go rona babusi ba Sejuta kgotsa Bafarasai yo o dumelang fore Jesu ke Mesia? 49 Bontsintsi jo jwa dielele bo a dumela, ee, mme baitse ka ga gone? Le gale ba hutsegile!" 50 Mme Nikodemo a bua. (A lo a mo gakologelwa? Ke ene yole yo e neng e le moeteledipele ba Sejuta yo o neng a tla ka sephiri go tla go buisanya le Jesu), 51 A botsa a re, A go ka fa molaong go athola motho pele ga a sekisiwa? 52 Mme ba mo gakalela ba re, "A le wena o Mogalalea yo o tlhomolang pelo? Tlathhoba dikwalo o iponele, ga go na baporofiti ba ba tlaa tswang kwa Galalea!" 53 Mme phuthego ya phatlalala mongwe le mongwe a ya gae.

8 Mme Jesu a boela kwa Thabeng ya lothware, 2 mme ya re phakela mo mosong o o latelang a bo a le mo Tempeleng gape. Mme bontsintsi jwa simolola go kokoana, mme a nna fa fatshe a bua nabo. 3 Ya re a santse a bua, baeteledipele ba Sejuta le Bafarasai ba lere mosadi yo o tshwerweng mo boakeng ba mmaya fa pele ga bontsintsi jwa batho jo bo lebeletseng. 4 Ba raya Jesu ba re, "Moruti, mosadi yo o tshwerwe fela a santse a dira boaka. 5 Molao wa ga Moshe wa re a bolawe. Wa reng ka ga gone?" 6 Ba ne ba leka go mmeela seru sa gore a bue sengwe se ba tlaa mmonang molato ka sone, mme Jesu a inama a kwala mo mmung ka monwana wa gagwe. 7 Ba tswelela pele ba batla karabo mo go Jesu, jalo a inamologa a ba raya a re, "Go siame, mo kgoboteng ka matlapa go fitlhela a swa. Mme le gale a konopiwe lwa nthla ke yo a iseng a ke a leofe." 8 Mme a inama a kwala gape mo mmung. 9 Mme baeteledipele ba Sejuta ba ngwangwaela ka bongwe ka bongwe go simolola ka yo mogolo mo go bone go fitlhelela Jesu le mosadi ba sala ba le bosii fa pele ga bontsintsi jwa batho. 10 Mme Jesu a inamologa gape mme a mo raya a re, "Ba ba go bayang molato ba kae? A le fa e le ope wa bone ga aa go sekisa?" 11 Mme mosadi a fetola a re, "Nnyaa rra." Mme Jesu a mo raya a re, "Le nna ga ke go sekise. Tsamaya mme o seka wa tlhola o leofa." 12 Mme erile morago, mo go nngwe ya diithero tsa gagwe, Jesu a raya batho a re, "Ke lesedi la lefatshe. Jalo fa lo ntshala moragao, ga lo na go kgotswa mo lefifing, gonne lesedi le le tshelang le tlaa bonesa tsela ya lona." 13 Mme Bafarasai ba mo fetola ba re, "O a ikgantsha ebile o bua maaka!" 14 Jesu a ba raya a re, "Ditshupo tse di boammaaruri le fa ke di bua di raya nna. Gonne ke itse kwa ke tswang teng le kwa ke go yang, mme ga lo itse kwa ke go tswang le kwa ke go yang. 15 Lo nkatlhola lo sena mabaka a a utlwalang. Nna ga ke lo athole jaanong jaana, 16 mme fa ke ne nka lo athola, e ne e tlaa bo e le katlhola ya boammaaruri gotlhelele, gonne ke na le Rara yo o nthomileng. 17 Melao ya lona ya re fa batho ba le babedi ba dumalana mo go sengwe se se diragetseng, bosupi jwa bone bo amogelwa e le boammaaruri. 18 Mme he, Nna ke mosupi yo mongwe le Rre yo o nthomileng ke mosupi yo mongwe." 19 Mme bone ba botsa Jesu ba re, "Rrago o kae?" Jesu a ba araba a re, "Ga lo nkitse gore ke mang, jalo he, ga lo

itse gore Rre ke mang. Fa lo no lo nkitsile, hong le ene lo ka bo lo mo itsele." 20 Jesu o ne a bua mafoko a sa ntse a le mo lefelong la Tempele le le bidiwang Ntlo ya Dikhumo. Mme ga a ka a tshwarwa, gonne e ne e ise e nne lobaka lwa gagwe. 21 Kwa morago a ba raya a re, "Ke a tsamaya; mme lo tlaa mpatla, mme lo tlaa swela mo dibeng tsa lona. Mme ga lo ka ke lwa tla kwa ke yang teng." 22 Bajuta ba botsa ba re, "A o ikaelela go ipolaya? O raya eng fa a re, 'Ga lo ka ke lwa tla kwa ke yang teng?'" 23 Mme a ba raya a re, "Lo tswa kwa tlase; ke tswa kwa godimo. Lo ba lefatshene leno; nna ga ke wa lona. 24 Ke sone se ke neng ke re lo tlaa swela mo dibeng tsa lona; gonne fa lo sa dumele gore Ke Mesia, Morwa Modimo, lo tlaa swela mo dibeng tsa lona." 25 Ba batla go itse, "Re bolelele gore o mang." A fetola a re, "Ke yo o agang a lo ipolelela malatsi otlhe. 26 Ke ne ke ka lo sekisetsa dilo di le dintsi ka ba ka lo ruta di le dintsi, mme ga ke na go dira jalo, gonne ke bua fela se ke se boleletsweng ke yo o nthomileng; yo o boammaaruri." 27 Mme ba nna ba tlhoka go tlhologanya gore o ne a bua le bone ka ga Modimo. 28 Mme Jesu a re, "E tlaa re lo sena go bolaya Morwa Motho, lo tlaa lemoga gore ke nna tota le gore ke ntse ke sa lo bolelele se ke se intshetsang fela mo tlhologanyong ya me, mme ke ne ke bua se Rara o se nthutileng. 29 Mme yo o nthomileng o na le nna, ga a n tatlha, gonne ke aga ke dira dilo tse di mo itumedisang." 30 Mme baeteledipele ba Sejuta ba le bantsi ba ba mo utlwileng a bua dilo tse ba simolola go mo dumela fa e le Mesia. Jesu a ba raya a re, "Lo barutwa ba me ba boammaaruri fa lo tshela ka fa ke lo bolelelang ka teng, 32 mme lo tlaa itse boammaaruri, mme boammaaruri bo tlaa lo golola." 33 Mme ba re, "Mme re losika lwa ga Aberahame, ga re ise re ke re nne makgoba a ga ope mo lefatsheng! O raya eng fa o re 'boammaaruri bo tlaa lo golola?'" 34 Mme Jesu a ba raya a re, "Lo makgoba a sebe, mongwe le mogwe wa lona. 35 Mme makgoba ga a na ditshwanelo, mme Morwa o na le tshwanelo nngwe le nngwe, e e teng! (aiōn g165) 36 Jalo fa Morwa a lo golola, lo tlaa gololesega tota. 37 (Ee, ke lemoga gore lo losika lwa ga Aberahame!) Mme le fa go ntse jalo bangwe ba lona ba leka go mpolaya gonne molaetsa wa me ga o bone boikhutso mo dipelong tsa bone. 38 Ke lo bolelele se ke se bonyeng fa ke na le Rre. Mme lona lo diragatsa kgakololo ya ga rraa-lona." 39 Ba re, "Rraa-rona ke Aberahame," mme Jesu a fetola a re, "Nnyaa! Fa e ne e le ene, lo ka bo lo tshwana nae. 40 Mme mo boemong jwa gore lo tshwane nae lo leka go mpolaya, ka ntlha ya go bo ke lo boleletse boammaaruri jo ke bo utlwileng kwa Modimong. Aberahame o ne o ka seka a dira selo se se ntseng jalo! 41 Nnyaa! Lo obamela rraa-lona tota fa lo dira jalo." Ba fetola ba re, "Ga re a tsalelwa mo dikgoreng, rraa-rona wa boammaaruri ke Modimo o le osi." 42 Mme Jesu a ba raya a re, "Fa go ne go ntse jalo, lo ka bo lo nthata, gonne ke tsile kwa go lona ke tswa kwa Modimong. Ga ke fano ka go rata ga me, ke ene o nthomileng. 43 Ke eng fa lo sa kgone go tlhologanya se ke se buang? Ke ka ntlha ya gore lo kganelwa go dira jalo! 44 Gonne lo bana ba ga rraa-lona ebong Diabolo, jalo he lo rata dilo tse di bosula tse a di dirang. Ene o sale a nna mmolai le mo tshimologong, le Moidi wa boammaaruri, ga go na le fa e le tlhase-nyana ya boammaaruri mo go ene. Fa a bua maaka, ke

tlwaelo ya gagwe gonne ke Ramaaka. 45 Mme jalo fa ke bua boammaaruri, ga lo dumele ka ntlha ya ka fa lo thologileng ka teng! 46 "Ke ofe wa lona yo o ka mpayang molato wa sebe? [Ga gona ope!] Mme ka ke lo bolelela boammaaruri, ke eng fa lo sa ntumele? 47 Le fa e le mang yo e leng gore rraagwe ke Modimo o reetsa mafoko a Modimo ka boitumelo. Mme ka lo sa reetse, go supa fa lo se bana ba one." 48 Mme baeteledipele ba Sejuta ba goa ba re, "Mosamarea ke wena! Motswakwa! Diabolo! A ga re a go bolelela ra re o tsenwe ke mowa o o maswe?" 49 Jesu a re, "Nnyaa, ga ke a tsenwa ke mowa o o maswe. Gonne ke tlota Rre, mme nna ga lo ntlotle? 50 Mme le fa ke sa eletse go ikgodisa, Modimo o mpatlela selo se eblile o athola ba ba sa mpatleng. 51 Ka tlhomamiso yotlhe ke lo raya ke re, ga go na ope yo o nthoetsang yo o tlaa swang!" (aiōn g165) 52 Baeteledipele ba Sejuta ba mo raya ba re, "Jaanong re itse gore o tsenwe ke mowa o o maswe. Le Aberahame tota le baporofiti ba bagolo ba sule, mme wena wa re fa re go obamela ga re kitla re e swa! (aiōn g165) 53 Jalo he, a o mogolo mo go rraa-rona Aberahame yo o suleng? Gape a o mogolo mo baporofiting ba ba suleng? O ikgopola gore o eng." 54 Hong Jesu a ba raya a re, "Fa e le gore ke a ikgodisa, ga go reye sepe. Mme Modimo ke Rre, mme lwa re Modimo ke wa lona, yo o buang dilo tse di galalelang tse ka ga me. 55 Mme le fa e le go mo itse ga lo mo itse. Nna ke a mo itse. Fa e le gore ke buile ka tsela nngwe, ke tlaa bo ke mo obamela ka bottalo. 56 Rraa-lona Aberahame o itumeletse go bona letsatsi la me. O ne a itse gore ke e tla mme a itumela." 57 Mme baeteledipele ba Sejuta ba re, "Ga o ise o bo o nne dingwaga di le masome mathano, tota ga o ise o ke o bone Aberahame!" 58 Mme Jesu a re, "Boammaaruri jotlhe ke gore ke ne ke sale ke tshedile pele ga Aberahame a tsalwa!" 59 Gone fela foo baeteledipele ba Sejuta ba sela matlapa go mmolaya. Mme a ba iphithela, a ba ralala a tswa mo Tempeleng.

9 Mme ya re a santse a tsamaya, a bona monna yo o saleng a tsalwa a foufetse. 2 Mme barutwa ba gagwe ba mmotsa ba re, "Morena, ke eng fa monna yo a tsetswe e le sefofu? A ke ka ntlha ya dibe tsa gagwe kgotsa dibe tsa batsadi ba gagwe?" 3 Mme Jesu a araba a re, "Ga se ka ntlha ya dibe dipe. Go ne go direlwa gore nonofo ya Modimo e supiwane. 4 Rotlhe re tshwanetse go akofa ra dira ditiro tse re di neetsweng ke yo o nthomileng, gonne go setse nakonyana fela pele ga bosigo bo tla mme tiro yotlhe e bo e khutla. 5 Mme fa ke santse ke le fano mo lefatsheng, ke naya lefatshene lesedi la me." 6 Mme a kgwela mathe mo mmung a duba seretse ka mathe mme a se tshasa mo mathong a monna yo o foufetseng, 7 mme a mo raya a re, "Tsamaya o ye go tlhapa mo lekadibeng la Siloame" (lefoko le le reng 'Siloame' le raya gore 'Romilwe') jalo monna a ya kwa a romilweng teng, mme a feta a tlhapa a boela kwa morago a bona! 8 Mme ba ga gabo le batho ba bangwe ba ba mo itseng e le sefofu sa mokopi ba botsanya ba re, "A yo ke ene tota, mokopi yo re mo itseng?" 9 Bangwe ba re, ee, mme ba bangwe ba re nnyaa. Jalo ba akanyetsa ba re, "Ga e ka ke ya nna ene, mme o lebeaga jaaka ene!" Mme mokopi a ba raya a re, "Ke nna yo lo nkitseng!" 10 Mme ba mmotsa

gore go diragetse jang gore a foufologe. Tota-tota go tsamaile jang! **11** Mme a ba raya a re, "Monna yo ba mmitang Jesu o ne a duba seretse a se tshasa mo matlhong a me mme a nthaya a re ke ye kwa lekadiheng la Siloame ke ye go tlhapa seretse. Mme ke ne ka dira jalo, jaanong ke a bona!" **12** Mme ba mmotsa ba re, "O kae jaanong?" Mme a araba a re, "Ga ke itse." **13** Mme ba tsaya monna ba mo isa kwa Bafarasaing. **14** Mme ya re mo go diragala ga bo go le letsatsi la Sabata. **15** Mme Bafarasai ba mmotsa gotlhe ka ga tiragalo eo. Jalo a ba bolelela ka fa Jesu a neng a dira seretse ka teng a se tshasa mo matlhong a gagwe, mme ya re a sena go tlhapa a bona! **16** Bangwe ba bone ba re, "Motho yo Jesu ga a tswe kwa Modimong gonne o dira go le Sabata." Ba bangwe ba re, "Mme motho fela wa modira dibe ao ka dira dikgakgamatso tse jang?" Mme ga nna kgaogana e tona ya megopolo mo go bone. **17** Mme Bafarasai ba retologela kwa monneng yo a neng a foufetse ba mmotsa ba re, "Wa re monna yo o go foufolotseng ke mang?" Mme monna a re, "Ke bona gore e tshwanetse ya bo e le porofiti a romilwe ke Modimo." **18** Mme Baeteledipele ba Sejuta ba seka ba dumela gore o ne a foufetse, go fitlhelela ba botsa batsadi ba gagwe. **19** Erile ba sena go ba bitsa ba ba botsa ba re, "A motho yo ke morwaa lona? A o-tsetse a foufetse? Fa go ntse jalo, ke eng fa a bona?" **20** Batsadi ba gagwe ba fetola ba re, "e itse gore motho yo ke ngwana wa rona le gore o tsetse e le sefofu, **21** mme ga re itse gore go diragetse jang gore a foufologe, kgotsa gore o foufotswe ke mang. O setse a godile o lekanye go ikarabela. Mmotseng." **22** Ba ne ba bua jaana ka ba boifa baeteledipele ba Sejuta ba neng ba setse ba anamitsitse gore mongwe fela yo o reng Jesu ke Mesia o tlaa kgaolwa mo phuthegong. **24** Mme lwa bobedi ba bitsa monna yo o foufotsweng ba mo raya ba re, "Galaletsa Modimo e seng Jesu, gonne re itse gore Jesu ke motho yo o bosula." **25** Mme monna a fetola a re, "Ga ke itse gore a o siame kgotsa o bosula, mme nna ke itse fela gore, ke ne ke le sefofu mme jaanong ke a bona!" **26** Ba mmotsa ba re, "O ne a dira eng? O ne a go fodisa jang?" **27** Mme monna a ba botsa a re, "Bonang! Ke lo boleletse gagwe fela, a lo ne lo sa reetse? Ke eng fa lo mpotsa gape? A le lona lo batla go nna barutwa ba gagwe?" **28** Mme ba mo hutsa ba mo raya ba re, "Morutwa wa gagwe, mme rona re barutwa ba ga Moshe. **29** Re itse gore Modimo o buile le Moshe, mme fa e le yo ene ga re itse sepe ka ga gagwe." **30** Mme a fetola a re, "Ka nthla yang, go a hakgamatsa! **31** O foufolola difofu, mme o na le ditsebe tse di bulegetseng ba ba o obamelang ba dirago rata ga one. **32** Fa e sale lefatsho le simologa ga go ise go ke go nne le ope yo a neng a ka foufola matlho a mongwe yo o tsetsweng a le sefofu. (aiōn g165) **33** Fa monna yo a ne a sa tswe kwa Modimong, o ka bo a sa kgona go foufolola difofu." **34** Mme ba goa ba re, "Ngwana wa mpa ya dikgora ke wena! A o leka go re ruta?" Mme ba mo kgoromeletsa kwa ntle. **35** Erile fa Jesu a utlwalela se se diragetseng, a bona monna yo mme a mo raya a re, "A o dumela mo go Mesis?" **36** Mme monna a araba a re, "E mang, rra, gonne ke a batla." **37** Mme Jesu a re, "O mmonye, ebile ke ene yo o buang le wena!" **38** Monna a re, "Ee, Morena, Ke a dumela!" mme a obamela Jesu. **39** Mme

Jesu a mo raya a re, "E tletse mo lefatsheng go naya ba ba foufetseng mo moweng pono le go kaela ba ba ithayang ba re ba a bona gore ba foufetse." **40** Bafarasai ba ba neng eme foo ba botsa ba re, "A wa re re foufetse?" **41** Mme Jesu a ba raya a re, "Fa lo ne lo foufetse, lo ka bo lo se molato! Mme lo molato gonne lo ipona gore lo itse se lo se dirang."

10 "Le fa e le mang yo o ganang go tsena ka kgoro mo lesakeng la dinku, yo o tlolelang ka lokotswana, o tshwanetse tota a be a le legodu. **2** Gonne modisa o tsena ka kgoro. **3** Motlhokomedi wa kgoro o a e mmulela, mme dinku di utlwa lentswe la gagwe jalo di tle kwa go ene; mme a bitse dinku tsa gagwe ka maina a di etelele pele di ya kwa ntle. **4** O tsamaya kwa pele ga tstone; mme di mo sale morago, gonne di thaloganya lentswe la gagwe. **5** Ga di kitla di sala moeng morago, mme di tlaa mo phatlalalela, gonne ga di itse lentswe la gagwe." **6** Ba ba neng ba utlwa Jesu a dirisa setshwantsho se ba ne ba seka ba thaloganya se a se rayang. **7** Mme a se ba thalosetsa a re, "Ke nna Kgoro ya dinku. **8** Botlhe ba bangwe ba ba tsileng pele ga me e ne e le magodu le dinokwane. Mme dinku tsa boammaaruri ga di ise di ke di ba reetse. **9** Ee, ke nna Kgoro. Ba ba tsenang ka Kgoro ba tlaa bolokwa mme ba tlaa tsena ba bo ba tswa mme ba tlaa bona mafulo a matalana. **10** Maikaelelo a legodu ke go utswa, le go bolaya le go senya. Mme nna maikaelelo a me ke go aba botshelo jo bo sa khutleng ka letlotlo. **11** "Ke Modisa yo o Molemo. Modisa yo o molemo o ntshetsa dinku botshelo jwa gagwe. **12** Motho yo o thapilweng o tlaa sia a tlogela dinku fa a bona phiri e tla, gonne ga se tsa gagwe ebile ga se modisa wa tstone. Mme jalo phiri e di tlolele e phatlalatsa letsomane. **13** Motho yo o thapilweng o sia ka nthla ya gore o thapilwe, le ka nthla ya gore ga a kgathalele dinku thata. **14** "Ke Modisa yo o Molemo ebile ke itse dinku tsa me, le tstone di a nkitse. **15** Fela jaaka Rara a nkitse le nna ke itse Rara; jalo ke ntshetsa dinku botshelo jwa me. **16** Ke na le dinku tse dingwe mo lesakeng le lengwe. Le tstone ke tshwanetse go di lere, mme di tlaa utlwa lentswe la me; jalo go tlaa nna letsomane le le lengwe ka fa tlase ga tlhokomelo ya Modisa a le mongwe fela. **17** "Rara o a nthata gonne ke ntsha botshelo jwa me sethabelo gore ke tle ke nne le jone gape. **18** Ga go na ope yo o ka mpolayang kwa ntle ga go rata ga me. Ke ntsha botshelo jwa me sethabelo ka bonna. Gonne ke na le tshwanelo le nonofo ya go bo ntsha sethabelo fa ke batla le tshwanelo le nonofo ya go bo tsaya gape. Gonne Rara o nneile tshwanelo e." **19** Erile fa a bua jaana, baeteledipele ba Sejuta ba kgaogana mo megopolong gape ka ga gagwe. **20** Bangwe ba bone ba re, "O na le mowa o o maswe eseng jalo o a tsenwa. Ke eng re reetsa motho yo o ntseng jalo?" **21** Ba bangwe ba re, "Mo go rona golo mo ga go utlwale go buiwa ke motho yo o tsenweng ke mowa o o maswe! A mowa o o maswe o ka fofolola matlho a difofu?" **22** Go ne go le mariga, fa Jesu a le mo Jerusalem ka lebaka lwa Moletlo wa Boshafatso. O ne a le kwa Tempeleng, a raletse golo fa go bidiwang Mathudi a ga Solomone. **24** Baeteledipele ba Sejuta ba mo dikgaganyetsa mme ba mmotsa ba re, "O tlaa re baya mo leffing la bosena-kitso fitlhelela leng? Fa e le gore o Mesia re bolelele sentle." **25**

Mme Jesu a ba raya are, "Ke setse ke lo bole-letse, mme ga lo ntumele. Sesupo ke dikgakgamatso tse ke di dirang ka leina la ga Rara. 26 Mme ga lo ntumele gonne ga lo ba letsomane la me. 27 Dinku tsa me di itse lentswe la me, le nna ke a di itse, mme dintshala morago. 28 Ke di naya botshelo jo bo sa khutleng mme ga di kitla di nyelela. Ga gona ope yo o tlaa di phamolang mo go nna, (aiōn g165, aiōnios g166) 29 gonne Rara o di nneile, mme o nonofile go feta mongwe le mongwe, jalo he ga go na ope yo o ka di utswang mo go nna. 30 Nna le Rara re selo se le sengwe." 31 Mme gape baeteledipele ba Sejuta ba sela matlapa go mmolaya. 32 Jesu a ba raya a re, "E fa kaelong ya Modimo ke dirile dikgakgamatso di di dintsi go thusa batho. Lo mpolaela kgakgamatso efe?" 33 Mme ba mo fetola ba re, "Ga re go balaale tiro epe e e siameng, re go bolaela tlhatpatso; wena, mothonyana ke wena yo o seng wa sepe o ipiditse gore o Modimo." 34 Mme a fetola a re, "Mo molaong wa lona gatwe batho ke medimo Jalo he, fa lokwalo, lo lo sa ka keng lwa bua maaka, lo bua ka gore medimo ke batho ba molaetsa wa Modimo o tsileng mo go bone, a lo go bitsa tlhatpatso fa yo ene a itshepitsiweng a bile a romilwe go lefatsheng ke Rara a re, 'Ke Morwa Modimo?' 37 Se ntumeleng, fa e se fela ke dira dikgakgamatso tsa Modimo. 38 Mme fa ke di dira, di dumeleng lefa lo sa ntumele. Hong lo tlaa dumela tota gore Rara omo go nna, le gore ke mo go Rara." 39 Gape ba leka go mo tshwara. Mme a tsamaya a ba tlogela... 40 Mme a tlhatlogela kwa moseja ga Noka ya Jorodane go nna gaufile lefelo le Johane a neng a kolobeletsa mo go lone lwa nthla. 41 Mme ba le bantsi ba mo sala morago. Mme ba le bantsi ba mo sala morago. Mme ba dumaduma ba re, "Johane ga a ise a ke a dire dikgakgamatso, mme dipolelelopele tsa gagwe tsothe kaga monna yo di diragetse," 42 Hong ba le bantsi ba dumela gore ke Mesia.

11 Mme jaana ga bo go le monna mongwe yo o neng a bidiwa Lasaro yo o neng a lwala. O ne a tswa Bethania motse wa ga gabo Marea Le Maratha mogolowe. Marea Kgaisadia Lasaro, ke ene yo o kileng a tlotsa Morena settlolo a ba a se phimola mo dinaong tsa gagwe ka moriri. 3 Mme bokgaisadie ba babedi ba romela molaetsa kwa go Jesu ba mo raya ba re, "Morena, tsala ya gago e e molemo e lwala thata thata." 4 Mme erile fa Jesu a utlwa ka ga moo, a re, "Maikaelelo a bolwetse jwa gagwe ga se loso, mme ke maikaelelo a gore Modimo o tlo o galalediwe. Nna, Morwa Modimo, Ke tlaa galalediwa ka ga jone bolwetse jo." 5 Lefa Jesu a ne a rata Maratha le Marea le Lasaro thata, 6 o ne a nna fela kwa a neng a le teng malatsi a mabedi a a latelang a sa ye kwa go bone fa a sena go bolelelwa. 7 Lwa bofelo morago ga malatsi a mabedi, a raya barutwa ba gagwe a re, "A re yeng kwa Judea." 8 Mme barutwa ba gagwe ba gana ba re, "Morena, malatsinyana fela a a fetileng a se kae, baeteledipele ba Sejuta mo Judea ba ne ba leka go bo golaya. A o yo teng gape?" 9 Jesu a fetola a re, "Motshegare mongwe le mongwe o na le dioura di le lesome le bodedi, mme mo oureng nngwe le nngwe ya one motho o ka tsamaya a babalesegile a sa kgotswe. 10 Bosigo fela ke gone go nang le diphatsa tsa go kgotswa, ka nthla ya lefifi." 11 Mme a bua a re, "Tsala ya rona Lasaro o robetse, mme jaanong ke ya

go mo tsosa!" 12 Erile ka barutwa ba ne ba gopola gore Jesu o raya gore Lasaro o robetse boroko fela jwa bosigo, ba re, "Moo go raya gore o nna botoka!" Mme Jesu o ne a raya gore Lasaro o sule. 14 Mme a ba bolelela sentle a re, "Lasaro o sule. 15 Mme ka nthla ya lona, Ke a itumela, ka ke ne ke se fa go ene, mme mo go tlaa lo naya sebaka sa go dumela mo go nna. A re yeng kwa go ene." 16 Thomase yo o bidiwang "Lewelana" a raya barutwa ba bangwe ka ene a re, "A re tsamaeng le rona re ye go swa nae." 17 Mme ya re ba goroga kwa Bethania, ba bolelelwa gore Lasaro o setse a le mo phupung malatsi a le mane. 18 Bethania o ne a le dimmaele di se kae fela ka tsela e e tswang Jerusalem, 19 mme baeteledipele ba Sejuta ba le bantsi ba ne ba tsile Maratha le Marea matshidiso. 20 Erile fa Maratha a utlwa gore Jesu o e tla, a ya go mo kgatlhantsha, mme Marea ene a sala mo lwapeng. 21 Maratha a raya Jesu a re, "Morena, fa o ka bo o ne o le fano kgaisadiake o ka bo a sa swa. 22 Mme le jaanong ga go ise go fete nako e telele thata, gonne ke itse gore Modimo o tlaa lere kgaisadiake mo botshelong gape, fa o ka mo kopa gore a dire jalo." 23 Jesu a mo raya a re, "Kgaisadio o tlaa rula." 24 Maratha a re, "Ee, fa mongwe le mongwe o rula mo Letsatsing la Tsogo." 25 Mme Jesu a mo raya a re, "Ke nna yo ke tsosang baswi ke bo ke ba naya botshelo gape. Le fa e le mang yo o dumelang mo go nna, le mororo a a swa jaaka mongwe le mongwe, o tlaa tshela gape. 26 O neelwa botshelo jo bo sa khutleng ka nthla ya go dumela mo go nna mme ga a kitla a nyelela, A o dumela se Maratha?" (aiōn g165) 27 Mme Maratha a re, "Ee, Morena, ke dumela gore o Mesia, Morwa Modimo, ene tota yo re sa bolong go mo letela." 28 Mme a mo tlogela a boela kwa go Marea, mme a feta a mmiletsa kwa thoko ga ba ba tsileng ma-tshidiso, a mo raya a re, "Jesu o fano o batla go go bona." 29 Mme Marea a ithlaganelela kwa go ene. 30 Ka nako eo Jesu o ne a ntse ka kwa nthle ga motse, kwa lefelong le Maratha a neng a rakana le ene teng. 31 Fa baeteledipele ba Sejuta ba ba neng ba le mo tlong ba leka go gomotsa Marea ba bona a nanoga ka bofelo, ba ne ba gopola gore o ya kwa phupung ya ga Lasaro go lela; jalo ba mo sala morago. 32 Erile fa Marea a goroga kwa Jesu a leng teng, a wela ka mangole fa pele ga dinao tsa gagwe a mo raya a re, "Morena, fa o ne o le fano, kgaisadiake o ka bo a sa ntse a tshela." 33 Erile fa Jesu a mmona a lela, le baeteledipele ba Sejuta ba lela nae a hohomoga mo moweng a huduega. 34 Mme a ba botsa a re, "O fitlhlwe kae?", "Tla o bone." 35 Jesu a lela. 36 Mme baeteledipele ba Sejuta ba re, "Ba ne ba le ditsala tse di ratanang thata. Bonang gore o ne a mo rata jang." 37 Mme bangwe ba re, "Motho yo o foufolotse monna wa sefoku, ke eng a ne a sa dire gore Lasaro a seka a swa?" Mme gape Jesu a hohomoga mo moweng. Mme ba tla kwa lebitleng. Lebitla leo e ne e le logaga lo lo tswalwang ka lentswe le legolo thata. 39 Jesu a ba raya a re, "Pitikololelang lentswe kwa thoko." Mme Maratha, kgaisadia moswi, a re, "Ka nako eno monkgo wa gagwe o tlaa nna maswe thata, gonne o na le malatsi a le mane a sule." 40 Jesu a mmotsa a re, "A mme ga ke a go raya ka re o tlaa bona kgakgamatso e e tswang Modimong fa o dumela?" 41 Mme ba pitikololela lentswe fa thoko. Jesu a leba kwa legodimong mme a re, "Rara, ke lebogela go nkutlwa

ga gago. **42** (O nkutlwa ka gale, ee, mme ke ipoeleditse ka ntlha ya batho ba bothle ba ba emeng fano, gore ba tle ba dumele fa o nthomile).” **43** Mme a goa a re, “Lasaro, tswela kwa ntle!” **44** Mme Lasaro a tswa a fapilwe ka matsela a phitlho, sefathlogo sa gagwe se fapilwe ka tuku. Jesu a ba raya a re, “Mmofololeng lo mo lese a tsamaye!” **45** Mme jalo lwa bofelo fa baeteledipele ba Sejuta ba le bantsi ba ba neng ba na le Marea ba bona tiragalo eo, ba dumela ene! **46** Mme bangwe ba ya kwa Bafarasaing go ba bolelela ka ga gone. **47** Mme diithlogo tsa baperesiti tsa bitsa lekgotla go buisanya ka ga tiragalo e. Mme ba botsanya ba re, “Re dirang ka ga tiragalo e, gonne monna yo tota o dira dikgagamatso?” **48** Fa re mo lesa fela, sechaba sotlhe se tlaa mo sala morago, mme masole a Roma a tlaa tla go re bolaya a bo a tsaya mmuso wa Sejuta.” **49** Mme mongwe wa bone ebong Kaefase, yo a neng a le Moperesiti yo Mogolo mo ngwageng eo, a re, “Dielele ke lona, **50** tlogelang monna yo a swele batho bothle, ke eng fa sechaba sotlhe se ka nyelela ka ntlha ya motho a le nosi?” **51** Seporofeto se sa gore Jesu o tshwanetse go swela Sechaba sotlhe, se dule mo go Kaefase a le mo maemong a gagwe jaaka a ne a le Moperesiti yo mogolo, e ne e se ene a se ikanyeditseng mme o ne a tlhotlhelediwa ke mowa go bua jalo. **52** E ne e le polelo pele gore loso lwa ga Jesu e tlaa bo e se lwa Iseraele fela, mme e tlaa bo e le lwa bana ba Modimo ba ba anameng mo lefatsheng lotlhe. **53** Jalo go simolola nako eo baeteledipele ba Sejuta ba simolola go tsoma Jesu. **54** Mme Jesu a khutlisa dithuto tsa gagwe mme a tswa mo Jerusalema, a ya kwa lotshitshing lwa sekaka, kwa motseng wa Eferaima; mme a nna teng le barutwa ba gagwe. **55** Tlologanyo, e e leng letsatsi la Sejuta la boitapolo, e ne e le gaufi, mme batho ba le bantsi ba ba tswang kwa dikgaolong ba goroga mo Jerusalema malatsinyana a sa le kwa pele gore ba tle ba tsene mo modirong wa bontlafatso pele ga Tlologanyo e simolola. **56** Ba ne ba batla go bona Jesu, mme ka ba ne ba sebaseba mo Tempeleng, ba be ba botsanya ba re, “Lo akanya jang? A o tlaa tla kwa Tlologanyong?” **57** Ka lone lobaka loo, diithlogo tsa baperesiti le Bafarasai di ne di anamititse phatlalatsa gore yo o tlaa bonang Jesu a ba bolelele gore ba tle ba mo tshware.

12 Malatsi a le maratara pele ga meletlo ya Tlologanyo e simologa, Jesu a goroga mo Bethania kwa Lasaro monna yo a mo rudisitseng a neng a le teng. **2** Mme Jesu a baakanyediwa modiro wa tlotlo teng. Maratha a ba tsholela mme Lasaro ene a nna le bone kwa lomating lwa bojelo (tafole). **3** Mme Marea a tsaya setlolo se se tlhwalhwa kgolo se dirilwe ka dinkgisamonate a tlotsa dinao tsa ga Jesu ka sone, a bo a di phimola ka moriri wa gagwe. Mme ntlo ya tlaala monkgo o o monate wa setlolo. **4** Mme Judase Isekariota, mongwe wa barutwa ba gagwe, ene yo o tlaa mo okang, a re, **5** “Setlolo seo se ne se lekanye madi a mantsi. Se ka bo se rekisitswe mme madi a sone a abelwa bahumanegi.” **6** E ne e se gore ka go bua jalo o gopotse go tlhokomela bahumanegi, gonne o ne a le mmei wa madi a barutwa mme o ne a tle a a utswa a a dirise mo diitirong tsa gagwe! **7** Mme Jesu a fetola a re, “Mo tlogele. O dirile jalo e le paakanyetso ya phitlho ya me. **8** Lo ka aga

lo thusa bahumanegi, mme nna ga ke na go nna le lona ka lobaka lo lolelele.” **9** Erile fa ba e leng batho fela ba Jerusalema ba utlwalela ka kgorogo ya gagwe ba ithaganela ka bontsintsi go ya go mmona le go bona Lasaro, monna yo o rudileng. **10** Mme diithlogo tsa baperesiti tsa ikaelela go bolaya le Lasaro, **11** gonne e ne e le ka ntlha ya ga Lasaro gore baeteledipele ba Sejuta ba le bantsi ba tlogele Sejuta ba dumele mo go Jesu e le Mesia wa bone. **12** Letsatsi le le latelang, dikgang tse di reng Jesu o mo tseleng ya Jerusalema tsa anama mo motseng, mme bontsintsi jo bogolo jwa baeti ba Tlologanyo, **13** jwa tsaya dikala tsa makolane mme jwa fologela mo tseleng yo mo kgathantsha ba goa ba re, “Mmoloki! Modimo segofatsa Kgosi ya Iseraele! A go bakwe moemedi wa Modimo!” **14** Jesu a tsamaya a palame tonkana, a diragatsa seporofeso se se reng **15** “Se boifeng Kgosi ya lona, batho ba Iseraele, gonne e tlaa tla kwa go lona ka boingotlo, e palame tonkana!” **16** (Barutwa ba gagwe ba seka ba lemoga ka nako eo gore se e ne e le tiragatso ya seporofeso; mme morago ga Jesu a boela kwa kgalalelong ya gagwe kwa legodimong, ba simolola go lemoga gore go setse go diragetse diporofeso di le kae tsa lokwalo mo mathlong a bone). **17** Mme ba ba mo bontsintsing joo ba ba neng ba bonye Jesu a tsosa Lasaro mo baswing ba ne ba bolelela gotlhe ka gone. **18** Ke sone se batho ba le bantsi ba neng ba ya go mo kgathantsha, gonne ba ne ba utlwile kgagamatso e tona eo. **19** Mme Bafarasai ba raana ba re, “Re fentswe. Bonang, lefatsheng lotlhe le mo setse morago!” **20** Bagerika bangwe ba ba neng ba tsile mo Jerusalema go obama mo Tlologanyong, **21** ba etela Filipino yo a neng a tswa Bethesaida, mme ba feta ba re, “Rara, re batla go rakana le Jesu.” **22** Filipino ba bolelela Anderea ka gone, mme ba tsamaya bothle go kopa Jesu. **23** Jesu a ba fetola ka gore nako e mo gorogetse ya go boela kwa kgalalelong ya gagwe kwa legodimong, le gore, “Ke tshwanetse go wa ka swa jaaka tlhaka ya mabele e e welang mo mmung wa bolelele. Fa ke sa swe, ke tlaa nna ke le nosi, peo e e yosi. Mme loso lwa me lo tlaa tlhoga tsa ditlhaka tsa mabele di le dintsi, thobo e kgolo ya matshelo a masha. **25** Fa lo rata botshelo jwa lona mono lefatsheng, bo tlaa lo latlhegela. Mme fa lo nyatsa botshelo jwa lona mono lefatsheng, o tlaa bo ananya ka kgalalelo ya bosakhutleng. (aiōnios g166) **26** “Fa e le gore Bagerika ba, ba batla go nna barutwa ba me, ba boleleleleng gore ba tle ba ntshale morago, gonne bathanka ba me ba tshwanetse go nna kwa ke teng. Mme fa ba ntshala morago, Rara o tlaa ba tlotla **27** Jaanong mowa wa me o tshwenyegile thata. A nka rapela ka re, “Rara, mpoloka mo go se se nkemeng pele?” Mme ke lone lebaka le ke le tletseng! **28** Rara, galaletsa leina la gago o bo o le tlotle.” Mme ga bua lentswe le tswa kwa legodimong le re, “Ke setse ke dirile jalo, mme ke tlaa dira jalo gape.” **29** Erile fa bontsintsi jwa batho bo utlwa lentswe, bangwe ba bone ba gopola gore ke tladi, fa ba bangwe bone ba re ke moengele o buile nae. **30** Mme Jesu a ba raya a re, “Lentswe leo ga le a tla ka ntlha ya me, mme e leng ka ntlha ya lona. **31** Lobaka lwa katlholo ya lefatsheng lo gorogile, le nako ya fa Satane, Kgosana ya lefatsheng leno a tlaa kgoromelediwang ntle. **32** Mme fa ke tsholeliwa (mo mokgorong) ke tlaa gogela mongwe le mongwe kwa go nna?” **33** O ne a bua jaana go supa

ka fa o tlaa swang ka teng. **34** Bontsintsi jwa botsa jwa re, "Go swa? Re utwile gore Mesia o tlaa tshela ka bosakhutleng mme ga a kitla a a swa. Ke eng fa o re o tlaa swa? O bua kaga. Mesia ofe?" (**aiōn g165**) **35** Mme Jesu a fetola a re, "Lesedi la me le tlaa lo phatsimela ka lobakanyana. Tsamayang mo go lone lo sa ntse lo ka kgona, mme lo ye kwa lo batlang go ya teng pele ga lefifi le tla, gonne ka nako eo lobaka lo tlaa bo lo setse lo fetile thata gore lo bone tsela ya lona. **36** Dirisang Lesedi nako e sa le teng; ka go dira jalo lo tlaa nna batsamaisi ba lesedi." Morago ga a bua dilo tse, Jesu a tsamaya mme a ba iphitsetse. **37** Mme le fa a ne a dirile dikgakgamatso tse tsothe, batho ba le bantsi ba ne ba sa dumele gore ke Mesia. **38** Ke sone tota se Isaia o se porofetileng a re: "Morena, re tlaa dumelwa ke mang? E mang yo o tlaa tsayang dikgakgamatso tsa Modimo tse di tona e le bosupi?" **39** Mme ba ne ba seka ba dumela, fela jaaka Isaia le ene a ne a rile: **40** "Modimo o fofaditse matho a bone o bile o thatafaditse dipelo tsa bone gore ba seka ba bona le fa e le go thaloganya e se re kgotsa ba sokologela kwa go nna gore ke ba fodise." **41** Isaia o ne a raya Jesu fa a porofeta jaana, gonne o ne a bonye ponatshego ya kgalalelo ya ga Mesia. **42** Le fa go ntse jalo, le baeteledipele ba Sejuta ba le bantsi ba ne ba dumela mo go ene gore ke Mesia mme legale ba ne ba sa dumele fa ba na le batho ka nthla ya go tshaba go kgaolwa ke Bafarasai mo tlung ya ga Jehofa; **43** gonne ba ne ba rata kgalalelto ya batho bogolo go kgalalelto ya Modimo. **44** Mme Jesu a goela kwa bontsintsing a re, "Fa lo ntumela lo dumela Modimo. **45** Gonne fa lo mpona, lo bona ene yo o nthomileng. **46** Ke tsile ke le Lesedi go phatsima mo lefatsheng leno le le lefifi gore bothe ba ba dumelang mo go nna ba seka ba thola ba tsamaya mo lefifing. **47** Mme le fa e le mang yo o nkutlwang mme a sa nkobamele, ga ke moathodi wa gagwe, gonne ke tletse go boloka lefatsheseng go le athola. **48** Mme bothe ba ba nkganang le molaetsa wa me, ba tlaa atholwa ka Letsatsi la Katholo ka mafoko a boammaaruri a ke a buileng. **49** Gonne se ga se thaloganyo ya me, mme ke lo boletse se Rara a rileng ke se lo bolelele. **50** Mme ke itse gore ditaolo tsa gagwe di gogela kwa botshelong jo bo sa khutleng; jalo sengwe le sengwe se a reng ke se bue, ke a se bua!" (**aiōnios g166**)

13 Jesu o ne a itse mo maitseboeng a tsatsi la Thloganyo gore ke bosigo jwa gagwe jwa bofelo mo lefatsheng pele ga a boela kwa go Rraagwe. Erile go jewa dijo tsa maitseboa Diabolo a bo a setse a feditse mogopolo wa ga Judase Isekariota, morwa Simone, gore jo ke bosigo jwa gore a dirise leano la gagwe la go oka Jesu. Jesu o ne a itse gore Rara o mo neetse sengwe le sengwe le gore o ne a tswa kwa Modimong le gore o tlaa boela kwa Modimong. Le ka fa a neng a rata barutwa ba gagwe ka teng! **4** Mme a tswa fa lomating lwa bojelo, (tafole) a apola seaparo sa gagwe, a thathelela toulou (taole) mo lothekeng, **5** a tshela metsi mo mogotswaneng mme a simolola a thapisa barutwa ba gagwe dinao a ba a di phimola ka taole e a neng a ithathile ka yone. **6** Erile a tla fa go Simone Petere, Petere a mo raya a re, "Morena, ga o a tshwanela o ka bo o re thapisa dinao!" **7** Jesu a fetola a re, "Ka nako e ga o thaloganyane se ke se dirang, mme o tlaa thaloganya ka

letsatsi lengwe." **8** Petere a gana a re, "Nyaa, ga o kitla o nthapisa dinao gope!" Mme Jesu a fetola a re, "Kana fa ke sa di thapise, ga o kake wa nna mopati wa me." (**aiōn g165**) **9** Simone Petere a mo raya a re, "Mme thapisa diatla tsa me le tlhogo, e seng dinao fela!" **10** Jesu a fetola a re, "Yo o setseng a thapile mmele otlhe o thoka go thapiswa dinao fela gore a nne phepa gothelele. Jaanong o phepa, mme ga go a nna jalo mo go mongwe le mongwe yo o fano." **11** Gonne Jesu o ne a itse gore o tlaa okwa ke mang. Ke sone se a neng a se raya fa a re, "Ga lo phepa lotlhe." **12** Erile a sena go ba thapisa dinao, a apara seaparo sa gagwe gape mme a nna fa fatshe a botsa potso a re, "A lo thaloganya se ke neng ke se dira? **13** Lo mpitsa 'Moruti' le 'Morena', mme lo dira sentle go bua jalo, gonne ke boammaaruri. **14** Mme ka nna, Morena, le Moruti, ke lo thapisitse dinao, lo tshwanetse go thapisanya dinao fela jalo. **15** Ke lo neile sekai se lo tshwanetseng go se sala morago: dirang jaaka ke lo diretse. **16** Go boammaaruri thata jang gore mothanka ga a mogolo go mong wa gagwe. Le fa e le morongwa ga a mogolo go motho yo o mo romang. **17** Lo itse dilo tse, jaanong di direng! Ke yone tsela ya matlhogonolo. **18** "Ga ke lo reye lotlhe; ke itse mongwe le mongwe wa lona yo ke mo tlhophileng sentle. Lokwalo lo bua jaana lwa re, 'Ene yo o jang dijo le nna o tlaa nkoka' mme se ke se buang se tlaa tloga se diragala. **19** Mme ke lo bolelela selo se jaanong jaana gore e re fa se diragala, lo dumele mo go nna. **20** "Ammaaruri, le fa e le mang yo o amogelang Morongwa wame, yo ke tlaa mo romang, o amogela nna. Mme go nkamogela ke go amogela Rara yo o nthomileng." **21** Mme jaanong Jesu o ne a huduegile thata mo moeng mme a re, "Ee, go boammaaruri, mongwe wa lona o tlaa nkoka." **22** Barutwa ba lebana, ba hakgamala gore o ka ne a raya mang. **23** E re ka ke ne ke ntse go bapa le Jesu fa lomating lwa bojelo (tafole) ke le tsala ya gagwe e tona thata, **24** Simone Petere a tla kwa go nna go mpotsa gore ke mang yo o tlaa dirang tiro e e setlhogo eo ya go mo oka. **25** Mme ka retologa ka mmotsa ka re, "Morena, ke mang?" **26** A mphetola a re, "Ke yo ke mo tlotlang ka go mo neela senkgwe se innwe mo morong." Mme erile a sena go se ina, a se inola a se neela Judase, morwa Isekariota. **27** Mme ya re Judase a sena go se ja, Satane a tsena mo go ene. Mme Jesu a mo raya a re, "lthaganele, dira se o se ikaletseng jaanong jaana." **28** Go ne go sena le fa e le ope wa ba ba fa lomating lwa bojelo yo o neng a itse se Jesu o se rayang. **29** Bangwe ba gopola gore ka Judase e ne e le mmei wa madi a bone Jesu o ne a mmolelela gore a ye go duelela dijo kgotsa a ye go abela bahumanegi madi mangwe. **30** Judase a nanoga ka bofefo, a ralala lefifi. **31** Erile fela Judase a tswa mo tlung, Jesu a re, "Lobaka lwa me lo gorogile; kgalalelo ya Modimo e tlaa tloga e ntikaganyetsa, mme Modimo o tlaa amogela kgalalelto e tona ka nthla ya gotlhe mo go ntriragalelang. **32** Mme Modimo o tlaa nnaya kgalalelo ya one, fela jaanong jaana. **33** Bana ba ba rategang, kana nako e khutshwane jang pele ga gore ke tsamaye ke lo tlogele! Mme, le fa lo ka ntshenka ga lo ka ke lwa tla kwa go nna, fela jaaka ke boletse baeteledipele ba Sejuta. **34** "Jaanong ke lo naya taolo e ncha ka re, "Ratanang fela jaaka ke lo ratile." **35** Go ratana ga lona mo go kitlaneng go tlaa supegetsa lefatsheseng gore lo barutwa

ba me." 36 Simone Petere a re, "Morena o ya kae?" Mme Jesu a fetola a re, "Ga o ka ke wa tsamaya le nna jaanong jaana; mme e tlaa re morago, o ntatele." 37 Mme Simone Petere a mmotsa a re, "Mme ke kganelwa ke eng go tla jaanong jaana gonne ke ipaakanyeditse go go swela?" 38 Jesu a araba a re, "O ntshwela? Nnyaa e tlaa re pele ga mokoko o lela gararo ka moso o tlaa bo o intatotse o re ga o nkitse."

14 "A dipelo tsa lona di se fuduege. Lo ikanya Modimo, jaanong inkanyeng le nna. 2 Go na le malapa a le mantsi kwa godimo kwa Rara o nnang teng, mme ke ya go a baakanyetsa go tla ga lona. Fa go setse go siame gothe, mme ke tlaa tla go lo tsaya, gore lo nne le nna ka metha yotlhe kwa ke teng. Fa go ne go sa nna jalo nkabo ke lo boleletse sentle fela. 4 Mme lo itse kwa ke yang teng le tsela e e yang teng lo a e itse." 5 Thomase a mo raya a re, "Nnyaa, ga re itse, ga re na kitso epe ya kwa o yang teng, jaanong re ka itse tsela jang?" 6 Mme Jesu a mo raya a re, "Ke nna Tsela, ee, le Boammaaruri le Botshelo. Ga go na ope yo o ka tlang kwa go Rara fa e se ka nna. 7 Fa lo ne lo itsile gore ke mang, hong lo ka bo lo itsile gore Rre ke mang. Go tloga fano lo a mo itse, ebile lo mmonyel!" 8 Filipino a mo raya a re, "Morena, re supegetse Rara mme go tlaa bo go re lekanye." 9 Jesu a fetola a re, "A ga o ise o nkitse Filipino, le fa ke sa bolo go nna le wena ka lobaka lo lo kana? Le fa e le mang yo o mponyeng o bonye Rre! Jaanong ke eng fa o kopa go mmona?" 10 A ga o dumele gore ke mo go Rara yo o agileng mo go nna. Ebile o dira tiro ya gagwe ka nna. 11 Dumela fela gore ke mo go Rara ebile le Rara o mo go nna. E seng jalo dumela ka nthla ya dikgagamatso tse dikgolo tse o mponyeng ke di dira. 12 "Ka boammaaruri jo bo feletseng ke lo bolelela gore, le fa e le mang yo o dumelang mo go nna o tlaa dira dikgagamatso tse ke di dirileng, gonne ke ya go nna le Rara. Lo ka mo kopa sengwe le sengwe lo dirisa leina la me, mme ke tlaa se dira, gonne mo go tlaa lere kgalaletso kwa go Rara ka nthla ya se nna, Morwa, ke tlaa se lo direlang. 14 Ee, lopang le fa e le eng lo dirisa leina la me mme ke tlaa se dira!" 15 "Fa e le gore lo a nthata, inkokobeletseng; 16 mme ke tlaa kopa Rara mme o tlaa lo naya Mogomotsi yo mongwe, mme ga a kitla a lo tlogela. (aiōn g165) 17 Mogomotsi yoo ke Mowa O O Boitshepo, Mowa o o gogelang mo boammaaruring jotlhe. Lefatshe ka bophara ga le ka ke la o amogela, gonne ga le o batle ebile ga le o itse. Mme lona lo a mo itse gonne o nna le lona gompieno, mme mo malatsinyaneng a latelang o tlaa bo o le mo go lona. 18 Nnyaa, ga ke na go lo latlha kgotsa go lo tlogela lo le masiela mo setsuatsueneng, ke tlaa tla kwa go lona. 19 Mo lobakanyaneng ke tlaa bo ke tsamaile ke dule mo lefatsheng, mme ke tlaa bo ke sa ntse ke na le lona. Gonne ke tlaa tshela gape, mme le lona lo tlaa tshela. 20 E tlaa re fa ke boela mo botshelong gape, lo tlaa itse gore ke mo go Rre, mme lona lo mo go nna le nna ke mo go lona. 21 Ene yo o inkobelang ke ene yo o nthatang; mme ka nthla ya gore o a nthata, Rara o tlaa mo rata; mme le nna ke tlaa mo rata, ke tlaa mo itshenolela." 22 Judase, (eseng Judase Isekariota, mme e leng morutwa yo mongwe wa gagwe yo o bidiwang ka leina leo le ene) a mo raya a re, "Morena, ke eng fa e le gore o tlaa itshenolela rona barutwa fela e seng

lefatshhe ka bophara?" 23 Jesu a fetola a re, "Gonne ke tlaa itshenolela ba ba nthatang le ba ba inkobelang. Rara le ene o tlaa ba rata, mme re tlaa tla kwa go bone go nna nabo. 24 Le fa e le mang yo o sa inkobelang ga a nthate. Mme gakologelwang, ga se nna ke arabang potso ya lona ka go bua jaana! Ke karabo e e tswang mo go Rara yo o nthomileng. 25 Ke lo bolelela dilo tse gompieno ke sa ntse ke na le lona. 26 Mme fa Rara a roma Mogomotsi mo boemong jwa me, mme ka Mogomotsi ke raya Mowa O O Boitshepo, o tlaa lo ruta go le go ntsi thata, le go lo gakolola sengwe le sengwe se nna ke se lo boleletseng. 27 "Ke lo tlogela ka mpho, ebong, kagiso ya pelo le mogopolo. Mme kagiso e ke e lo nayang ga e senyeje jaaka kagiso e lo e newang ke lefatshhe. Mme ke gona se tshwenyegeng kgotsa lwa boifa. 28 Gakologelwang se ke se lo boleletseng, ke a tsamaya, le gale ke tlaa boela kwa go lona gape. Fa e le gore lo a nthata, lo tlaa intumelela, gonne jaanong nka ya kwa go Rara, yo o leng mogolo mo go nna. 29 Ke lo boleletse dilo tse pele ga di diragala gore ere di diragala, lo tle lo ntumele. 30 "Ga ke nako e ntsi ya go bua le lona, gonne Kgosana e e bosula ya lefatshhe leno e a atamela. Ga e na nonofo epe mo go nna, 31 mme ke tlaa dira ka kgololesego se Rara o se batlang mo go nna gore lefatshhe le tie le itse fa ke rata Rara. Tlang, a re tsamayeng."

15 "Ke nna mofine wa boammaaruri, mme Rara ke ene mmaakanyi wa tshimo. 2 O kgaola kala nngwe le nngwe e e sa ungweng. Mme o ntlafatsa dikala tse di ungweng gore di ungwetha. 3 O setse a bile a lo ntlafaditse ka go lo ntlafatsa mo go ene gore lo nne le nonofo e kgolo thata le tirisso ka ditaalo tse ke di lo neileng. 4 Elang tlhoko gore lo nne mo go nna, le nna ke nne mo go lona. Gonne ga e kake ya re kala e kgaotswe mo mofineng ya ungwana, le lona ga lo kake lwa ungwana kwa ntle ga me. 5 "Ee, ke mofine; lona lo dikala. Lefa e le mang yo o nnang mo go nna le nna ke nna mo go ene, o tlaa ungwana loungo lo logolo. Gonne ga go na sepe se lo ka se dirang kwa ntle ga me. 6 Fa mongwe a ikgaoganya le nna, o latlwa jaaka kala e e senang molemo, e omelela, e phuthwa le tse dingwe mme di tshujwe. 7 Mme fa lo nna mo go nna lo reetsa ditaalo tsa me, lo ka kopa kopo nngwe fela e lo e ratang, mme lo tlaa e newa! 8 Barutwa ba me ba boammaaruri ba ungwana thobo e kgolo thata. Mme go tlisa kgalalelo e kgolo thata mo go Rre. 9 "Ke lo ratile fela jaaka Rara a nthatile. Nnang mo loratong lwa me. 10 Fa lo inkobela, lo nna mo loratong lwa me, fela jaaka ke reetsa Rara ebile ke nna mo loratong lwa gagwe. 11 Ke lo boleletse se gore lo tlale boitumelo jwa me. Ee, senwelo sa lona sa boitumelo se tlaa penologa. 12 Ke batla gore lo ratane fela jaaka ke lo rata. 13 Mme lorato lo lekannngwa jaana, lorato lo logolo lo supega fa motho a ntshetsa ditsala tsa gagwe botshelo jwa gagwe; 14 mme lona lo ditsala tsa me fa lo inkobela. 15 Ga ke sa thole ke lo bitsa batlhanka gonne mong wa batlhanka ga a ba rerise sepe; lo ditsala tsa me jaanong, gonne go supuwa ke lobaka lwa gore ke lo boleletse sengwe le sengwe se Rara o se mpoleletseng. 16 "Ga lo a nthophah! Ke nna ke lo thophiheng! Ke lo thomile go ya go ntsha maungo a mantle malatsi othe, gore le fa e le eng se lo se kopang mo go Rara, lo dirisa leina la me, o tlaa se lo neela. 17 Ke batla gore lo ratane. 18 "Gonne lo ilwa

ke lefatshe thata! Mme nna lefatshe le sale le nkila pele ga lona. **19** Lefatshe le ne le ka lo rata fa lo ne lo le ba lone; mme ga lo ba lone, gonne ke lo tlhophetse go tswa mo lefatsheng, mme jalo le a lo ila. **20** A lo gakogelwa se ke se lo boleletseng? 'Motlhanka ga a mogolo mo go mong wa gagwe!' mme ereka ba mpogisitse, le lona fela jalo ba tlaa lo bogisa. Mme fa ba ka bo ba ne ba ntheetsa, ba ne ba tlaa lo reetsa. **21** Batho ba lefatshe ba tlaa lo bogisa gonne lo ba me, gonne ga ba itse Modimo o e leng one o nthomileng. **22** "Ba ka bo ba se molato fa nkabo ke sa tla ka buisanya nabo. Mme jaanong ga ba na seipato ka ntlha ya dibe tsa bone. **23** Le fa e le mang yo o nkilang, o ila Rara. **24** Fa nkabo ke sa dira dikgakgamatso tse dikgolo jaana mo go bone ba ka bo ba sa tsewe ba le molato. Mme jaanong jaaka go ntse, ba bonye dikgakgamatso tse, mme ba re ila rotlhe, Nna le Rara. **25** Mo go diragatsa se baporofiti ba se buileng ka ga Mesia ba re, 'Ba nkidle ke sena molato.' **26** "Mme ke tlaa lo romelela Mogomotsi, Mowa O O Boitshepo, motswedi wa boammaaruri jotlhe. O tlaa tswa kwa go Rara mme o tlaa lo bolelela gotlhe ka ga me. **27** Mme le lona lo tshwanetse go bolelela mongwe le mongwe ka ga me, gonne lo ntse lo na le nna go tswa kwa tshimologong."

16 "Ke lo boleletse dilo tse gore lo seka lwa etsaetsega (ka ga dilo tse di kwa pele). **2** Gonne lo tlaa kgaolwa mo matlung a thuto, mme tota lobaka lo, e tla nna lo ka lone babolai ba lona ba tlaa gopolang gore ba dira tiro ya Modimo. **3** Se ke ka ntlha ya gore ga go nako epe e ba kileng ba itse Rara le fa e le nna. **4** Ee, ke lo bolelela dilo tse gompiano gore e tle e re di diragala lo tlo lo gakogelwe gore ke lo tlhagisitse. Ga ke ise ke ko ke lo bolelele le fa e le sepe gonne ke ne ke tsile go nna le lona ka lobaka lo lo leejana. **5** "Mme jaanong ke a tsamaya ke boela kwa go yo o nthomileng; mme go bonala fa e le gore ga go na ope wa lona yo o nang le kgalhego mo lebakeng la go tsamaya ga me; le fa e le ope ga a hakgamale. **6** Mo boemong jwa go dira jalo lo tletse bohutsana fela. **7** Mme boammaaruri ke gore, go lo solegela molemo fa ke tsamaya, gonne fa ke sa tsamaye, Mogomotsi ga a na go tla. Fa ke tsamaya, o tlaa tla, gonne ke tlaa mo romela kwa go lona. **8** "Mme fa a sena go tla, o tlaa senolela lefatshe boleo jwa lone, le gore tshiamo ya Modimo e teng, le kgololo mo katlholong. **9** Boleo jwa lefatshe ke go sa dumeleng mo go Nna; **10** mme tshiamo e teng gonne ke ya kwa go Rara mme ga lo na go tlhola lo mpona gape; **11** go na le go gololwa mo katlholong gonne kgosana ya lefatshe leno e setse e bile e athotswe. **12** "Oo, go sa ntse go na le dilo di le dintsi tse ke batlang go di lo bolelela, mme ga lo ka ke lwa di thaloganya jaanong jaana. **13** Fa Mowa O O Boitshepo, o e leng boammaaruri, o tla, o tlaa lo gogela mo boammaaruring jotlhe, mme o tlaa bo o sa bue mafoko a one; mme o tlaa bo o lo bolelela se o se utlwieng. O tlaa lo bolelela kaga dilo tse di tlaa tlang. **14** O tlaa nkgalaletsa a bo a nteretse tlotlo e kgolo ka go lo bontsha kgalalelo ya me. **15** Kgalalelo yotlhe ya ga Rara ke ya me; ke sone se ke se rayang fa ke re o tlaa lo supegetsa kgalalelo ya me. **16** E tlaa re fela mo lobakanyaneng morago ga moo, lo tlaa mpona gape!" **17** Mme bangwe ba barutwa ba gagwe ba re, "A reng? Ke eng se a se rayang fa a re ke ya kwa go Rara? Rona ga re thaloganye se a se rayang." **19** Jesu a

lemoga gore ba batla go mmotsa, mme a ba botsa a re, "A lo ipotsa se ke se rayang?" **20** Lefatshe le tlaa itumela thata kaga se se tsileng go ntragalela, mme lona lo tlaa lela. Mme e tlaa re ka bonako selelo sa lona se fetoge boitumelo jo bogolo (fa lo mpona gape). **21** E tlaa bo e le boitumelo jo bo tshwanang le jwa mosadi a le mo dithlabing fa a tshola ngwana wa gagwe, hong dithabi tse di lebalwe gothelele. **22** Gompiano jaana lo futsafetse, mme ke tlaa lo bona gape, mme lo tlaa itumela, mme ga gona ope yo o ka lo tseelang boitumelo joo. **23** Ka nako eo ga lo na go tlhokana le go nkopa sepe, gonne lo tlaa bo lo ka thamalalela kwa go Rara go mo kopa, mme o tlaa lo naya se lo tlaa bong lo se kopa gonne lo tlaa bo lo dirisa leina la me. **24** Ga lo ise lo ke lo leke go dira jaana pele, (mme simololang gompiano). Kopang, lo dirisa leina la me. Mme lo tlaa amogela, mme senwelo sa lona sa boitumelo se tlaa penologa. **25** Ke buile kaga dilo tse ke itisitse mo puong, mme nako e tlaa tla fa go itisa mo puong go tlaa bo go sa tlhokege mme ke tlaa lo bolelela sentle thata gotlhe ka ga Rara. **26** Mme lo tlaa lere dikopo tsa lona ka leina la me! Mme ga nkita ke tlhoka go kopa Rara go lo naya dikarabo tsa dikopo tse, **27** gonne Rara ene o lo rata fela thata ka gore lo a nthata ebile lo dumela gore ke tsile ke tswa kwa go Ene. **28** Ee, ke tsile ke tswa kwa go Rara fa ke tla mo lefatsheng, mme ke tlaa tswa mo lefatsheng ke boela kwa go Rara." **29** Mme barutwa ba gagwe ba re, "Jaanong o bua sentle thata, eseng ka diane. **30** Jaanong re thaloganya gore o itse sengwe le sengwe ebile ga o tlhoke ope go go bolelela sepe. Jaanong ka ntlha ya one mabaka a, re dumela gore o tsile o tswa kwa Modimong." **31** Mme Jesu a ba raya a re, "A jaanong lo dumela se ke se buang? **32** Mme lobaka lo e tla, le gone tota lo setse lo fitlhile, fa lo tlaa phatlalala, mongwe le mongwe a boela kwa legaeng la gagwe, a ntlogela ke le nosi. Le fa go ntse jalo ke tlaa bo ke se nosi, gonne Rara o na le nna. **33** Ke lo boleletse mo gotlhe gore lo tle lo nne le kagiso mo mogopolong le mo pelong. Lo tlaa nna le meleko e mentsi le dikutlobothoko fano mo lefatsheng; mme lo itumele thata, gonne ke fentse lefatshe."

17 Erile fa Jesu a sena go fetsa go bua dilo tse tsoitlhe, a lelelela kwa legodimong mme a re, "Rara, Nako e gorogile. Senola kgalalelo ya ga Morwao gore a tle a kgone go e busetsa kwa go wena. **2** Gonne o mo neile taolo mo godimo ga banna le basadi mo lefatsheng lotlhe. O neela mongwe le mongwe botshelo jo bo sa khutleng jo o bo mo neileng. (aiōnios g166) **3** Mme tsela e e isang botsheleng jo bosa khutleng ke e—ke ka go go itse wena Modimo o o boammaaruri o le esi, le Jesu Keresete, ene yo o mo romileng mo lefatsheng! (aiōnios g166) **4** Ke go lereditse kgalalelo mo lefatsheng ka go dira sengwe le sengwe se o ntheleng wa re ke se dire. **5** Mme jaanong, Rara, senola kgalalelo ya me jaaka ke eme fa pele ga gago, kgalalelo e re neng ra e tlhakanela pele ga lefatshe le simologa. **6** "Ke boleletse batho, ba, gotlhe ka ga gago. Ba ne ba le mo lefatsheng, mme wa ba nneela. Tota tota e ne e le ba gago ka malatsi othe, mme wa ba nnaya, mme ba go reetsa. **7** Jaanong ba itse gore sengwe le sengwe se ke nang naso ke mpho e e tswang kwa go wena, **8** gonne ke ba neetse melao e o e

nneetseng; mme ba e amogetse ebile ba itse ka bottlalo gore ke tsile mo lefatsheng ke tswa kwa go wena, jalo ba dumela fa o nthomile. 9 "Thapelo ya me ga se go rapelela lefatsheng, mme ke go rapelela ba o ba nneileng gonne ke ba gago. 10 Mme bothle fela, ka e le ba me, ke ba gago; mme o ba buseditse mo go nna ka sengwe le sengwe se e leng sa gago, jalo ba o ba nneileng ke kgalalelo ya me! 11 Jaanong ke tloga mo lefatsheng, mme ke ba tlogela kwa morago, ke tla kwa go wena. Rara yo o Boitshepo, ba babalele, bothle ba o ba nneileng, gore ba nne selo se le sengwe fela jaaka re ntse, go sa latlhega ope. 12 Ka nako ya fa ke sa ntse ke le mono, ke bolokile batho bothle ba o ba nneileng ba lwapa lwa gago. Ke ne ka ba thokomela gore le fa e le ope wa bone a seka a nyelela, fa e se morwa tatlhego fela fela jaaka dikwalo di boletse pele. 13 "Mme jaanong ke tla kwa go wena. Ke ba boletse dilo tse dintsi fa ke sa ntse ke na le bone gore ba tle ba tlae boitumelo jwa me. 14 Ke ba neetse ditaolo tsa gago. Mme lefatsheng le a ba ila gonne ga ba dire mekgwa ya lone e e maswe, fela jaaka nna ke sa e dire. 15 Ga ke go kope gore o ba ntse mo lefatsheng, mme ke kopa gore o ba boloke ba se ka wela mo nonofong ya ga Satane. 16 Ga ba sa tlhole e le ba lefatsheng leno jaaka le nna ke se wa lone. 17 Ba ntlafatse o ba itshepise ka go ba ruta mafoko a gago a boammaaruri. 18 Fela jaaka o nthomile mo lefatsheng, le nna ke ba roma mo lefatsheng. 19 Mme ke ineela gore ke ba thuse mo ditlhokong tsa bone tsa go gola mo boammaaruring le mo boitshepong. 20 "Ga ke rapelele fela ba, mme ke rapelela le badumedi ba malatsi a a tlang ba ba tlaa tlang kwa go nna ka ntlha ya bosupi jwa bone ba. 21 Go ba rapelela ga me bothle ke gore ba nne pelo e le nngwe le mogopolo o le mongwe fela jaaka wena le nna re ntse, Rara. Gore fela jaaka o le mo go nna le nna ke le mo go wena, le bone ba tle ba nne mo go rona, jalo lefatsheng le tlaa dumela fa o nthomile. 22 "Ke ba neile kgalalelo e o e nneileng, kopano e e galalelang ya go bopagana, jaaka re ntse, 23 Nna ke le mo go bone le wena o le mo go nna, bothle ba ntlafaditswe mo go bopaganeng, gore lefatsheng le tle le itse fa o nthomile le bo le thaloganye gore o ba rata fela jaaka o nthata. 24 Rara, ke batla gore ba o ba nneetseng ba, ba nne le nna kwa ke gone, gore ba tle ba bone kgalalelo ya me. O neetse kgalalelo gonne o sale o nthata pele ga lefatsheng le simologa! 25 "Oo Rara yo o tshiamo, lefatsheng ga le go itse, mme nna ke a go itse; le barutwa ba, ba itse fa o nthomile. 26 Mme ke go senotse mo go bone, jalo ke tlaa nna ke go senola gore lorato lwa gago lo logolo lo o ntshotseng ka lone lo nne mo go bone, le nna ke nne mo go bone."

18 Mme erile Jesu a sena go bua dilo tse, a kgabaganya molatswana wa Kide-rona le barutwa ba gagwe mme a tsena mo sekgweng sa lothware. 2 Judase wa moraedi, o ne a itse lefelo le, gonne Jesu o ne a sa bolo go nna a ya teng gantsi le barutwa ba gagwe. 3 Dithogo tsa baperesiti le Bafarasai di ne di neetse Judase segopa sa masole le mapodisi go mo pata. Mme ba goroga mo sekgweng sa lothware ba tshotse dipone tsa mefuta e farologanye ba tshotse le ditlhabi. 4 Jesu a thaloganya ka bottlalo se se seng se ya go mo diragalela. Erile a tsamaela kwa pele go ba kgathantsha a re, "Lo batla

mang?" Mme ba mo fetola ba re, "Jesu wa Nasaretha." Mme Jesu a ba raya a re, "Ke nna." 6 Mme erile a bua jalo, bothle ba boela kwa morago ba wela fa fatshe. 7 Mme a ba botsa gape a re, "Lo batla mang?" Mme ba mo fetola gape ba re, "Jesu wa Nasaretha." Mme Jesu a ba raya a re, 8 "Ke lo reile ka re ke Nna, mme ka ke Nna yo lo mpatlang, tlogelang ba bangwe ba, ba tsamaye." 9 O ne a dira jaana go diragatsa seporofeso se a neng a setse a se buile a re, "Ga ke a latlhegelwa ke ope mo go ba o ba nneileng." 10 Mme Simone Petere a somola chaka a kgaola "tsebe e e ka fa letsogong la moja ya ga Maleko motlhanka wa moperesiti yo mogolo." 11 Mme Jesu a raya Petere a re, "Somela chaka ya gago. A ga ke a tshwanela go nwa mo senwelong se Rara o se nneileng?" 12 Mme mapodisi a Sejuta le masole le maotlana a tshwara Jesu a mo golega. 13 Ba mo tseela "pele" kwa go Anase mogwagadia Kaiafase, Moperesiti yo mogolo mo ngwageng eo. 14 Kaiafase e ne e le ene yo o reileng baeteledipele ba Sejuta a re go botoka gore motho a le mongwe fela a swele batho bothle. 15 Simone Petere a ba sala morago, jaaka yo mongwe wa barutwa yo ene a neng a tsalanye le Moperesiti yo Mogolo a ne a dira 16 fa Petere a eme fa ntle ga kgoro ya batsena. Mme Morutwa yo a buisanya le mosetsana yo o thokometseng kwa kgorong, mme a letlelela Petere go tsena. 17 Mosetsana a botsa a re, "A ga o mongwe wa barutwa ba ga Jesu?" Mme Petere a re, "Nnyaa ga ke mongwe wa bone." 18 Mme mapodisi le bathanka ba mo lwapeng ba ne ba eme ka dinao ba dikologile molelo o ba neng ba o gotsitse gonne go ne go le serame. Mme Petere a nna foo le bone a ikomosa. 19 Mme mo teng ga kgotla ya tshkelo Moperesiti yo Mogolo a simolola go botsa Jesu kaga barutwa ba gagwe le se a neng a ntse a se ba ruta. 20 Jesu a fetola a re, "Se ke se rutang se itsege ka bophara, gonne ke rutile ka gale mo disenagongeng le mo Tempeleng; ke utlwiwe ke baeteledipele ba Sejuta bothle mme ga ke rute sepe mo sephiring se ke sa se buang mo ponong ya mongwe le mongwe. 21 Ke eng fa o mpotsa potso e? Botsa ba ba nkutlwieng. O na le bangwe ba bone fano. Ba itse se ke se buileng." 22 Mongwe wa masole a a emeng foo a ngadibola Jesu ka lebole a mmotsa a re, "A ke yone tsela ya go araba Moperesiti yo Mogolo eo?" 23 Mme Jesu a fetola a re. "Fa ke buile maaka, ntsha bosupi, a o tshwanetse go iteela motho go bua boammaaruri?" 24 Mme Anase a romela Jesu a golegilwe kwa go Kaiafase Moperesiti yo Mogolo. 25 Mme ya re ka lobaka loo, fa Simone Petere a sa ntse a eme fa molelong, a bodiwa gape gatwe, "A ga o mongwe wa barutwa ba gagwe?" Mme ene a fetola a re, "Nnyaa," 26 Mme mongwe wa bathanka ba mo lwapeng lwa Moperesiti yo mogolo, wa losika lwa monna yo o neng a kgaotswe tsebe ke Petere, a botsa a re, "A ga ke a go bona kwa sekgweng sa lothware o na le Jesu?" 27 Mme Petere a itatola gape. Mme ka bofofo mokoko wa lela. 28 Go sekisiwa ga ga Jesu ke Kaiafase ga fela maphakela thata. Go tsweng foo a tseelwa kwa kgotleng ya Molaodi wa Mmuso wa Roma. Basekisi ba gagwe ba seka ba tsena mo teng gonne ba ne ba re, go ne go tlaa ba "itshokolola", le gone ba ne ba sena go letlelelwa go ja kwanyana ya Tlologanyo. 29 Mme Pilatwe molaodi wa mmuso wa Roma, a ya kwa ntle kwa go bone a botsa a re, "Lo bona

monna yo molato wa eng? Lo mmona molato wa go dira eng.”
30 Mme ba fetola ka go gakala ba re, “Fa e ka bo ene e se serukuthi re ka bo re sa mo tshwara!” 31 Mme Pilatwe a ba raya a re, “Mo tseyeng lo mo athole lo le nosi ka melao ya lona.” Mme ba re, Mme kana re batla a bapolwa, mme, re batla tetelelelo ya gago 32 Se se ne sa rurifatsa kakanyetsopele ya ga Jesu ka ga tsela e a tla bolawang ka yone. 33 Mme Pilatwe a boela kwa kgotleng ya gagwe ya tshkelo a laola gore Jesu a leruwe kwa go ene. Ammotsa a re, “A o Kgosi ya Bajuta?” 34 Jesu a botsa a re, “A le wena wa re ke ‘Kgosi’ kgotsa o bua kafa Bajuta ba buang ka teng.” 35 Pilatwe a botsa ka kgakalo a re, “A ke Mojuta? Batho ba gaeno le ditlhogo tsa bone tsa baperesiti ba go lerile kwano. Ka nthla yang? O dirile eng?” 36 Mme Jesu a araba a re, “Ga ke Kgosi ya lefatshe. Fa ke ne ke le yone, balatedi ba me ba ka bo ba lole fa ke tshwarwa ke baeteledipele ba Sejuta. Mme bogosi jwa me ga se jwa lefatshe.” 37 Pilatwe a fetola a re, “Ee, fa e le gore go ntse jalo o Kgosi?” Jesu a re, “Ee, ke tsaletswe gone moo. Mme ke tletse go lere boammaaruri mo lefatsheng. Botlhe ba ba ratang boammaaruri ke balatedi ba me.” 38 Pilatwe a botsa a re, “Boammaaruri ke eng?” Mme a boela a tswela gape kwa ntle kwa bathong a ba raya a re, “Ga a na molato ope wa borukuthi motho yo. 39 Mme lo na le ngwao ngwaga le ngwaga ya go nkopa go lo gololela mongwe mo kgolegolong fa go le Tlologanyo. Mme fa lo batla ke dira jalo, ke tlaa golola ‘Kgosi ya Bajuta.’” 40 Mme ba goa ba re, “Nnyaa! E seng monna yo, e leng Barabase!” Barabase e ne e le serukuthi.

19 Mme Pilatwe a fatola mokwatla wa ga Jesu ka thupa, 2 mme masole a loga serwalo sa mitlwa a se mo rwesa mo tlhogong a bo a mo apesa seaparo se se bohobidu jo bo mokgona. 3 Ba mo sotla ba re, “Dumela, Kgosi ya Bajuta!” Ba bo ba mo itaya ka mabole. 4 Pilatwe tswela kwa ntle gape mme a raya Bajuta a re, “Ke ya go mo ntshetsa kwa ntle kwa go lona jaanong, mme legale tihaloganyang sentle gore nna ga ke mmone molato.” 5 Mme Jesu a tswela kwa ntle a rwele serwalo sa mitlwa a bile a apere seaparo se se bohobidu jo bo mokgona. Mme Pilatwe a re, “Bonang monna yo!” 6 Erile fela fa ba mmona, ditlhogo tsa baperesiti le bagolwane ba Sejuta ba simolola go goa ba re, “A a bapolwe! A a bapolwe!” Pilatwe a re, “Mmapoleng lona, nna ga ke mmone molato.” 7 Mme ba mo fetola ba re, “Ka melao ya rona o tshwanetse go swa gonne o ipiditse Morwa Modimo.” 8 Erile fa Pilatwe a utlwa ba bua jalo, a tshoga thata go gaisa malatsi otlhe. 9 A busetsa Jesu kwa kgotleng ya tshkelo a mmotsa a re, “O tswa kae?” Mme Jesu a seka a ntsha karabo epe. 10 Mme Pilatwe a re, “A ga o batle go bua le nna? A ga o lemoge gore ke na le nonofo ya go go golola kgotsa go go bapola?” 11 Mme Jesu a re, “O ka bo o sena nonofo epe gotlhelele mo go nna fa o ne o sa e newa e tswa kwa godimo. Mme ba ba ntšitseng kwa go wena ba na le sebe se segolo.” 12 Mme Pilatwe a leka go mo golola, mme baeteledipele ba Sejuta ba mo raya ba re, “Fa o golola monna yo, ga o tsala ya ga Kaesara. Le fa e le mang yo o ipitsang gore ke Kgosi o tshabana le Kaesara.” 13 Erile Pilatwe a utlwa mafoko a, a ntshetsa Jesu kwa ntle gape kwa go bone mme a

nna mo setilong sa tshkelo mo bonnong jo bo dirilweng ka matlapa. 14 E ne jaanong e ka nna motshegare wa sethoboloko pele ga letsatsi la Tlologanyo. Mme Pilatwe a raya Bajuta a re, “Kgosi ya lona ke e!” 15 Mme ba goa ba re, “A a ye koo, A a ye koo, mmapole!” Pilatwe a re, “Lwa reng? Ke bapole Kgosi ya lona? Baperesiti ba bagolo ba goa ba re, Ga re na kgosi epe fa se Kaesara.” 16 Mme Pilatwe a ba neela Jesu gore a bapolwe. 17 Jalo Jesu lwa bofelo a tsenngwa mo diatleng tsa bone, mme a tselwa kwa ntle ga motse, a itshikaretse mokgoro a isiwa kwa lefelong le le bidiwang ‘Logata.’ Ka Sehebera le bidiwa ‘Gologotha.’ 18 Ba feta ba mmapola le ba bangwe teng koo ba le babedi, yo mongwe a bapolwa ka fa letsogong la gagwe la molema, yo mongwe ka fa go la moja, Jesu a le fa gare ga bone. 19 Mme Pilatwe a baya sesupo fa godimo ga ga Jesu se se balegang jaana, “JESU WA NASARETHA, KGOSI YA BAJUTA.” 20 Lefelo le Jesu a bapoletsweng mo go lone le ne le le gaufi le motse; mme sesupo se ne se kwadilwe ka Selatina le Segerika, gore batho ba le bantsi ba tle ba kgone go se bala. 21 Mme baperesiti ba bagolo ba raya Pilatwe ba re, “Fetola sesupo mo go reng, ‘Kgosi ya Bajuta’ o se fetolele mo go reng, ‘A re ke Kgosi ya Bajuta.’” 22 Pilatwe a fetola a re, “Se ke se kwadileng ke se kwadile. Se nna fela jaaka se ntse.” 23 Erile masole a sena go bapola Jesu, a baya diaparo tsa gagwe ka mekoanyana e le mene, mongwe le mongwe wa one masole ao a nna le seabe mo mekoanyaneng eo. Mme ba re, “Re seka ra kgagola seaparo sa gagwe,” gonne se ne se sena momo, “A re se tsheleng bola (mataese) gore re tle re bone gore se tswa e mang.” Mo ga diragatsa polelo ya dikwalo e e reng, “Ba kgaogana diaparo tsa me, mme ba tshela hemepe ya me bola.” 25 Se ke sone se ba se dirileng. Gaufi le mokgoro go ne go eme Marea Mma Jesu le mmangwanaagwe ebong mosadi wa ga Kelopase le Marea Magatalena. 26 Erile fa Jesu a bona mmaagwe a eme foo fa thoko ga me, nna tsala ya gagwe e kgolo, a raya mmaagwe a re, “Ke morwao.” 27 Nna a nthaya a re, “Ke mmago.” Mme go simolola foo ka mo tseela kwa lwapeng lwa me. 28 Jesu a itse gore sengwe le sengwe jaanong se weditswe, mme go diragatsa dikwalo a bua a re, “Ke nyorilwe.” 29 Nkgwana ya mofine o o botsarara e ne e le foo, mme ngami ya inwa mo go yone ya ba ya tlhomelwa ka thupa ya mosiama mme ya tsholelediwa kwa molomong wa gagwe. 30 Erile fa Jesu a sena go leka mofine ka legano, a re, “Go fedile,” mme a lepeletsa tlhogo a golola mowa wa gagwe. 31 Baeteledipele ba Sejuta ba ne ba sa rate gore batho ba ba bapotsweng ba nne foo go fithelela letsatsi le le latelang, le e neng e le Sabata (le gone e le Sabata yo mogolo thata, gonne e ne e le Tlologanyo) mme ba kopa Pilatwe go laola gore maoto a banna bao a rojwe go re ba swe ka bonako, le gore mebele ya bone e tle e fofosiwe. 32 Mme masole a tla a roba maoto a banna ba babedi ba ba bapotsweng le Jesu; 33 mme erile fa ba tla kwa go ene, ba bona gore o setse a sule, mme ba seka ba roba a gagwe. 34 Le fa go ntse jalo, mongwe wa masole a tshaba lothakore lwa gagwe ka segai, mme madi le metsi a elela. 35 Ke iponetse selo se ka matho mme ke ntshitse polelo ya boammaaruri gore le lona lo dumele. 36 Masole a dira jaana a diragatsa seporofeso sa dikwalo se se reng, “Le fa e le

lengwe la marapo a gagwe ga le na go rojwa, mme ba tlaa leba kwa go ene yo ba mo thabileng.” 38 Moragonyana Josefa wa Arimathea, yo a neng a le morutwa wa ga Jesu ka sephiri ka ntlha ya go boifa baeteledipele ba Sejuta, a kopa Pilatwe ka bopelokgale go mo fa tetelelo ya go tsaya mmele wa ga Jesu; mme Pilatwe a mo raya a re o ka tswelela pele wa ya go o tsaya. Mme a ya teng a ya go o tsaya a tsamaya ka one. 39 Nikodemo, monna yo a neng a kile a ya kwa go Jesu go le bosigo, a tla le ene a lere lookwane lo lo dirilweng ka mera le aloe lo lo tlhathwa ya makgolo a le mabedi a dipula. 40 Botlhe ka bobedi ba phutha mmele wa ga Jesu ka leloba le le telele le inwwe mo ditlong tse di nkhang monate, ka e le mokgwa wa Sejuta wa phitlho. 41 Lefelo la Papolelo le ne le le gaufi le sekgwa sa ditlhare, kwa go neng go na le lebitla le leshe le le neng le ise le ke le dirisiwe. 42 Mme jalo, ka ntlha ya iketletso pele ga Sabata, le ka ntlha ya gore lebitla le ne le le gautshwane, ba mo robatsa mo go lone.

20 Mme ya re mo mosong wa letsatsi la Tshipi, go sa ntse go le leffi, Marea Magatalena a tla kwa phupung mme a fitlhela lentsewe le pitikolotsewa fa kgorong. 2 A siana mme a bona Simone Petere le nna mme a re raya a re, “Ba tsere mmele wa Morena mo phupung, mme ga ke itse kwa ba mmeileng gone!” 3 Ra sianela kwa phupung go bona, mme ka sia Petere ka goroga pele, 5 mme ka inama ka leba mo teng ka bona letsela la leloba le le moo, mme ka seka ka tsena mo teng. 6 Mme Simone Petere le ene a goroga mme a tsena mo teng. Le ene a bona leloba le le teng moo, 7 fa tuku e e neng e fapile Jesu mo tlhologong yone e ne e phuthilwe e beilwe fa thoko. 8 Mme le nna ka tsena mo teng, mme ka bona, ka ba ka dumela (gore o tsogile). 9 Gonno go fitlhelela letsatsing leo go ne go ise go ke go tle mo kgakologelong ya rona gore a kana dikwalo di rile o tla rula. 10 Re ne ra ya gae. 11 Mme ka nako eo Marea o ne a boetse kwa phupung a eme kwa ntle a lela. Mme ya re a ntse a lela a inama a leba mo teng. 12 Mme a bona baengele ba le babedi ba apere diaparotse tse ditshweu yo mongwe a ntse fa tlhologong yo mongwe kwa maoteng a lefelo le mmele wa ga Jesu o neng o namaletse mo go lone. 13 Baengele ba mmotsa ba re “O lelelang?” A ba fetola a re, “Gonne ba tsere Morena wa me, mme ga ke itse kwa ba mmeileng teng.” 14 A gadima mme a bona mongwe a eme fa morago ga gagwe. E ne e le Jesu, mme a seka a mo lemoga! 15 Mme Jesu a mmotsa a re, “O lelelang? O batla mang?” Mme a mo raya a re, “Fa o mo tsere, mpoletlela kwa o mmeileng teng, mme ke tlaa tsamaya ke ya go mo tsaya.” 16 Mme Jesu a mmotsa a re, “Marea!” Mme Marea a retologela kwa go ene a araba “Morena!” 17 A mo thagisa a re, “Se nkame, gonno ga ke ise ke tlhatlogele kwa go Rara. Mme tsamaya o ye go senka bana ba ga Rre o ba bolelele gore ke tlhatlogela kwa go Rara le Rraa lona, Modimo wa me le Modimo wa lona.” 18 Marea Magatalena a bona barutwa mme a ba bolelela a re, “Ke bonye Morena!” Mme a ba bolelela molaetsa wa gagwe. 19 Maitseboeng ao barutwa ba ne ba kopana ba itotelela mo tlung ka ntlha ya go boifa baeteledipele ba Sejuta, fa ka tshoganetso Jesu abo a ema fa gare ga bone! Morago a ba dumedisa, 20 a ba kaela mabogo a gagwe le lothakore.

Mme boitumelo jwa bone jwa nna bogolo thata jang fa ba bona Morena wa bone! 21 A bua le bone gape a re, “Fela jaaka Rara a nthomile, le nna fela jalo ke a lo roma.” 22 Mme a ba budulela mowa a ba raya a re, “Amogelang Mowa o o Boitshepo. 23 Fa lo itshwarela mongwe dibe, di a itshwarelwa. Fa lo gana go di itshwarela ga di itshwarelwe.” 24 Mongwe wa barutwa ebong Thomase, “Lewelana,” o ne a seyo foo ka nako e ba bangwe ba neng ba na le Jesu ka yone. 25 Ya re ba tswelsetse pele ba mmolelela ba re, “Re bonye Morena,” a ba fetola a re, “Ga ke na go dumela fa e se ke bone dintho tsa dimapo mo mabongong a gagwe, ke bo ke tsenya senwana ya me mo go tsone, ke bo ke tsenya seatla sa me mo lothakoreng lwa gagwe.” 26 Erile malatsi a ferabobedi a sena go feta, barutwa ba bo ba le mmogo gape, mme ka nako e, Thomase o ne a na nabo. Dikgoro di ne di lotletswe; mme ka tshoganetso fela jaaka pele, Jesu a bo a eme fa gare ga bone a ba dumedisa. 27 Mme a raya Thomase a re, “Tsenya monwana wa gago mo diatleng tsa me. Tsenya seatla sa gago mo lothakoreng lwa me. O seka wa tlhola o tlhoka tumelo. Dumela!” 28 Thomase a re, “Morena wa me le Modimo wa me!” 29 Hong Jesu a mo raya a re, “O dumela ka ntlha ya gore o mponye. Go sego ba ba sa mponang mme le fa go ntse jalo ba dumela.” 30 Barutwa ba ga Jesu ba ne ba mmona fa a dira dikgakgamatso tse dingwe tse dintsi kwa ntle ga tse di bolelwang mo lokwalong lo, mme tse tsone di kwaletsewe gore lo tlo lo dumele gore ke Mesia, Morwa Modimo, le gore ka go dumela mo go ene lo tlaa nna le botshelo.

21 Mme ya re morago Jesu a bonala gape kwa barutweng fa thoko ga Lecha la Galalea. Go ne ga diragala jaana: 2 Setlhopho sa rona se ne se le teng koo, Simone Petere, Thomase “Lewelana” Nathaniele wa Kana mo Galalea, mokaulengwe Jakobe le nna le barutwa ba bangwe ba babedi. 3 Simone Petere a re, “Ke ya go tshwara ditlhapi,” le rona rotlhe ra re, “Re tsamaya nao.” Re ne ra dira jalo, mme ra seka ra tshwara sepe bosigo jothle. 4 Mme ya re ka makuku ra bona monna a eme mo moshaweng mme ra seka ra bona gore ke mang. 5 A botsa a re, “A go na le ditlhapi, basimane?” Mme ra mo fetola a re, “Nnyaa.” 6 Mme a re raya a re, “Latlhelang lotloa lwa lona ka fa letsogong le legolo la mokoro, mme lo tlaa di tshwara di le dintsi!” Ra dira jalo, mme ra seka ra kgona go goga lotloa ka ntlha ya bokete jwa ditlhapi, di ne di le dintsi thata! 7 Mme ka raya Petere ka re, “Ke Morena!” Erile fela foo, Simone Petere a apara seaparo sa gagwe (gonno o ne a se tsotse go fitlhelela kwa lothekeng). Mme a itatlhela mo metsing (a shapela kwa lotshitshing). 8 Mme rona ra sala mo mokorong ra gogela lotloa lo lo tletseng kwa moshaweng o o neng o ka nna dikgato di le makgolo a mararo. 9 Erile fa re goroga koo, ra fitlhela molelo o gotsitsewe, ditlhapi di besitsewe, ebile go na le senkgwe. 10 Mme Jesu a re raya a re, “Lereng dingwe tsa ditlhapi tse lo di tshwereng.” 11 Mme Simone Petere a tswela kwa ntle mme a gogela lotloa kwa lotshitshing. Ka bala e le ditlhapi di le legolo le masome a mathano le boraro; mme le fa go ntse jalo lotloa lo ne lo sa kgagoga! 12 Mme Jesu a re raya a re, “Tlang kwano re tle go fitlhola.” Mme ga go na ope wa rona yo o neng a tshwenyega go mmotsa gore a ke Morena tota, gonno re ne re thomamisa gore ke ene. 13 Mme Jesu a

ya le rona rotlhe a re fa senkgwe le ditlhapi. **14** Le e ne e le lekgetho la boraro Jesu a bonala mo go rona a sena go rula. **15** Morago ga sefitholo Jesu a raya Simone Petere a re, "Simone, morwa Johane, a o nthata go gaisa ba bangwe ba?" Petere a fetola a re, "Ee, O a itse gore ke tsala ya gago." Mme Jesu a mo raya a re, "Go siame hudisa dikwanyana tsa me." **16** Mme Jesu a boelela potso a re: "Simone morwa Johane, a o nthata tota?" Petere a re, "Ee, Morena, oa itse gore ke tsala ya gago." Mme Jesu a mo raya a re, "Tlhokomela dinku tsa me." **17** Gape gape a mmotsa a re, "Simone, morwa Johane, a o tsala ya me tota?" Petere a hutsafala ka ntlha ya tsela e Jesu o neng a botsa potso e lwa boraro ka yone. Mme a mo fetola a re, "Morena, o itse pelo ya me, O itse gore ke tsala ya gago." Mme Jesu a mo raya a re, "Hudisa dikwanyana tsa me. **18** Erile o sa le monana, o ne o kgona go dira ka fa o ratang ka teng, o ya gongwe le gongwe kwa o go ratang, mme fa o setse o tsofetse, o tlaa otlolola mabogo a gago mme ba bangwe ba tlaa go goga ba go isa kwa o sa rateng go ya teng." **19** Jesu o ne a bua jalo go mo itsise loso lo a tlaa lo swang go galaletsa Modimo. Mme Jesu a mo raya a re, "Ntshala morago." **20** Petere a retologa mme a bona morutwa yo Jesu o mo ratang a mo setse morago, ene yo a neng a le fela fa dijong ka nako ele gotla go botsa Jesu a re, "Morena, ke ofe wa rona yo o tla go okang?" **21** Petere a botsa Jesu a re, "Go tlaa diragalang ka ga gagwe, Morena? O tlaa swa loso lo lo ntseng jang?" **22** Jesu a mo fetola a re, "Fa e le gore ke batla gore a tshele go fithelela ke boa, moo go go ama ka eng? Wena ntshala morago." **23** Mme monahune oo wa anama mo bakaulengweng gore morutwa yoo ga a na go swa! Mme seo e ne e se se Jesu o se rayang! O ne a rile, "Fa ke batla gore a tshele go fithelela ke tla, go go ama ka eng?" **24** Ke nna morutwa yoo! Ke bonye ditiragalo tse mme ke di kwadile fano. Mme rotlhe re itse gore polelo ya me ya diilo tse e boammaaruri. **25** Mme ke bona gore fa ditiragalo tse dingwe mo botshelong jwa ga Jesu di ne di kwadilwe, lefatshe lotlhe le ne le ka se ka lekana go tshola dikwalo tseo tsothe!

Ditiro

1 Tsala e e ratelang e e ratang Modimo: mo lokwalong lwa me lwa ntlha, ke lo boletse kaga botshelo le dithuto tsa ga Morena Jesu le ka fa a neng a boela legodimong ka teng fa a sena go fa barutwa ba gagwe ditaelo tse di tswang kwa Moweng O O Boitshepo. **3** Mo malatsing a le masome mane morago ga papolo ya gagwe, o ne a ntse a ipontsha barutwa ba gagwe a le mo sebopegong sa setho, gape a ba lemotsha ka ditsela tse dintsi gore ke ene tota yo ba mmonang. Mme mo dinakong tse o ne a buisanya le bone kaga Bogosi jwa Modimo. **4** Mo go nngwe ya diphuthego tse, o ne a ba bolelela gore ba seka ba tloga mo Jerusalema go fithelela Mowa O O Boitshepo o ba apesa e le go diragatsa tsholofetso ya ga Rara, puo e a neng a kile a buisanya le bone ka yone. **5** Mme a ba gakolola gore "Johane o kolobeditse ka metsi, mme jaanong lo tlaa kolobediwa ka Mowa O O Boitshepo mo malatsing a se kae a a tlang". **6** Mme ka lobaka longwe fa a bonala kwa go bone, ba mmotsa ba re, "Morena a o ya go golola Iseraele [mo go Roma] jaanong o bo o re dira chaba e e gololesegileng?" **7** Mme a fetola a re, "Rara ke ene a rulaganyang dipaka tsa go nna jalo. Mme ga se ga lona gore lo itse kaga tsone. **8** Mme fa Mowa O O Boitshepo o sena go tla mo go lona, lo tlaa amogela nonofo ya go rera ka bothakga jo bogolo mo bathong ba Jerusalema le mo Judea yothe le mo Samarea. le kwa dikhutlong tsa lefatshe ka ga loso le tsogo ya me." **9** Mme erile a sena go bua mafoko a, a tlhatlhogela kwa legodimong a nyelela mo lerung, a ba tlogela ba mo lebile ka kakabalo. **10** Fa ba sa ntse ba mo tsepegile mathlo go mmona lwa bofelo, ka tshoganetso banna ba babedi ba apere dipurapura tse di tshweu ba bo ba eme fa thoko ga bone, **11** mme ba re, "Banna ba Galalea ke eng fa lo tsepegetse a mathlo kwa legodimong ka kakabalo? Jesu o ile legodimong mme ka letsatsi lengwe o tlaa tla fela jaaka a ile!" **12** Ba ne ba le kwa Thabeng Lotlhwane fa se se diragala, jaanong ba boela kwa morago ba tsamaya sephatlo sa mmaele go boela kwa Jerusalema. **13** Mme ba tshwara thapelo mo ntlwanenge e kwa godimo e ba neng ba nna mo go yone. A ke maina a ba ba neng ba le teng mo phuthegong ya thapelo. Petere, Johane, Jakobe Anderea, Filipino, Thomase, Baretholomea, Mathaio, Jakobe, le bomorwa rraagwe Jesu, ba le sethophanyana le mmaagwe Jesu, ba ne ba le teng. **15** Phuthego e ya thapelo e ne ya tswela ka malatsi a le mantsi. Mme ya re ka nako eo, mo letsatsing leo fa go ne go na le batho ba ka nna lekgolo le masome a mabedi, Petere o ne a ema ka dinao mme a ba raya a re: **16** "Bakaulengwe, go ne go tlokega gore dikwalo di diragadiwe mabapi le Jutase yo o okileng Jesu ka go supegetsa bontsintsi jwa batho kwa a leng teng, gonne selo se, se sale se boletse pele bogologolo ka Mowa O O Boitshepo o bua ka Kgosi Dafide. **17** "Jutase e ne e le mongwe wa rona a tlhophilwe go nna morutwa fela jaaka rona. **18** O ne a reka setsha sa lefatshe ka madi a o a amogetseng ka go loga maano a boithamako mme a wela fa fatshe a phanyega ka bogare mme mala a gagwe a gorometsegela kwa ntle. **19** Dikgang tsa loso lwa gagwe di ne tsa anama ka bofelo mo

bathong ba Jerusalema, jalo ba bitsa setsha seo Lefatshe la Madi! **20** "Polelelo-pele ya ga Kgosi Dafide ka ga se, e bonwa mo lokwalong lwa Dipesalema mo a reng, 'A motse wa gagwe o senngwe o seka wa nna ke ope.' Gape, 'A tiro ya gagwe e neelwe o sele go e dira.' **21** "Mme jaanong re tshwanetse go tlhophong mongwe yo o ka tsayang maemo a ga Jutase, le go re tlatsa re le basupi ba tsogo ya ga Jesu. A re tlhopheng mongwe yo o saleng a nna le rona go simolola fa re tsalana le Morena, go tloga ka nako e o neng a kolobediwa ke Johane go fithelela a tselwa kwa legodimong." **23** Phuthego e ne ya tlhophong maina a banna ba le babedi: Jusefa Justiso (yo gape a itseeng ka leina la Barenabase) le Mathiase. **24** Jalo ba rapela gore ba tlhophong monna yo o tshwanetseng, ba re, "O! Morena, o itse pelo nngwe le nngwe re bontshe gore ke ofe wa banna ba yo wena o mo kgethileng gore a nne moapostoloi, yo o ileng kwa mannong a a mo tshwanetseng." **26** Jalo ba laola ka bola mme ya re ba gasa bola jwa supa Mathiase, jalo a kgethwa go nna mongwe wa ba ba lesome le motso.

2 Mme erile go setse go fetile dibeke di supa, morago ga loso le tsogo ya ga Jesu, ga fitlha letsatsi la Pentekosete. Ya re ka letsatsi leo badumedi ba phuthego, **2** ka tshoganetso ga utlwala mosumo o ka re wa sefelo se segolo kwa loaping kwa godimo ga bone, mme wa tlaa ka ntle e ba neng ba phuthegotse mo go yone. **3** Hong, ga bonala kwa go bone sengwe ekete dikgabo kgotsa diteme tsa molelo mme tsa nna mo ditlhogong tsa bone. **4** Mme botlhe ba ba neng ba le teng ba tladiwa ka Mowa O O Boitshepo, mme ba simolola go bua ka dipuo tse ba sa di itse, gonne Mowa O O Boitshepo o ne wa ba naya nonofo e. **5** Mme ga bo go le Bajuta ba le bantsi ba ba boifang Modimo mo Jerusalema ka letsatsi leo mo moketeng wa tumelo, ba tswa mo dichabeng tse dintsi. **6** Mme ya re ba utlwa mosumo mo loaping kwa godimo, bontsintsi jwa batho jwa tla bo tabogile go tla go bona gore go diragala eng. Mme ba gamarega fa ba utlwa barutwa ba bua ka dipuo tsa bone. **7** Ba bua ka kgakgamalo ba re, "Mo go ka diragala jang? Gonne banna ba botlhe ke ba ba tswang kwa Galalea? **8** Mme re utlwa ba bua ka diteme tsotlhe tsa mafatshe a re tsaletsweng mo go one! **9** Fano re le Baparathai, le Bamedea, Baelama, le batho ba ba tswang kwa Mesopotamia, le kwa Judea, le Kapodokia le Ponto le kwa Asia. **10** Le kwa Feregia le Pamfilea le Egepeto le puo ya dikgaolo tsa Kurene ntlheng ya Libia, le baeng ba ba tswang kwa Roma, e le Bajuta le ba ba sokologetseng kwa Sejuteng. **11** Le Bakereta, le Baarabia. Mme rotlhe fela re utlwa banna ba ba bua dikgakgamatso tse dikgolo tsa Modimo ka puo ya ga rona!" **12** Mme ba ema foo ba hakgametse thata ebile ba gamaregile. Mme ba botsana ba re, "Tota mo go ka ne go raya eng?" **13** Mme bangwe le fa go ntse jalo ba ne ba ba sotla, ba re "Batho ba ba tagiwe fela ba!" **14** Mme Petere a ema fa pele le barutwa ba bangwe ba le lesome le motso, mme a goeletsa kwa bontsintsing jwa batho a re, "Lona lotlhe reetsang, baeng le lona baagi ba Jerusalema ka mokgwa o o tshwanang! **15** Bangwe ba lona ba re batho ba ba tlhaphetswe! Ga se boammaaruri! Go sa le mo mosong thata mo go se se ntseng jalo! Batho ga ba tlhaphelwe ka nako ya bofera o le mongwe mo mosong! **16** Nnyaa Se lo se bonang

mo mosong ono se ne sa porofeswa mo dingwageng tse di makgologolo tse di fitileng ke moporofiti Joele, o rile 17 'E tlaa re mo malatsing a bofelo ke goromeletse Mowa wa me O O Boitshepo mo bathong botlhe, bomorwaalona le bomorwadia lona ba tlaa porofesa. Makau a lona a tlaa bona diponatshegelo, le banna ba tlaa lora ditoro. 18 Ee, Mowa O O Boitshepo o tlaa goromediwa le mo bathlankeng ba me botlhe banna le basadi ka mokgwa o o tshwanang, mme ba tlaa porofesa. 19 Mme ke tlaa dira ditshupo tse di sa tlwaelesegang mo Magodimong le mo lefatsheng, madi le molelo le maru a a looto la mosi; 20 letsatsi le tlaa fifala le kgwedi e tlaa nna khibidu jaaka madi pele ga Letsatsi leo le le boitshegang la Morena le tla. 21 Mme le fa e le mang yo o kopang kutlwelo-botlhoko mo Modimong o tlaa e newa, matlho kwa legodimong ka kakabalo? Jesu o ile legodimong mme ka letsatsi lengwe o tlaa tla fela jaaka a ile!' 22 'Lona banna ba Iseraele, reetsang, "Modimo o ne wa supela Jesu wa Monasara ka go dira dikgakgamatso tse di kgolo ka ene fela jaaka lo itse sentle. 23 Mme Modimo o setse morago leano la one le o saleng o le dira bogologolo, a lo letla gore lo dirise puso ya Roma gore lo mmalope mo mokgorong lo mmolaye. 24 Mme Modimo wa mo golola mo losong lo lo boitshegang wa mo tsosa mo baswing, gone loso lo ne lo sena thata ya go mo tshetsa mo taolong ya lone. 25 "Kgosi Dafide o kile a ama mafoko a a builweng ke Jesu fa a re, 'Ke itse gore Morena o na le nna ka malatsi othe o a nthusa, nonofo e kgolo ya Modimo e a ntshireletsa. 26 "Mme ga go hakgamatse fa pelo ya me e tletse boitumelo le loleme lo goletsa dipako tsa gagwe, gone ke a itse gore dilo tsothe di tlaa ntshiamela mo losong. 27 "Gonne ga o kitla o tlogela mowa wa me mo bobipong le fa e le go letla mmele wa ga Morwao yo o Boitshepo go bola. (Hadēs g86) 28 "Mme o tlaa mpusetša botshelo jwa me, o mphe le boitumelo jo bo hakgamatsang fa pele ga gago.' 29 "Bakaulengwe ba ba rategang, gakologelwang gore Dafide o ne a sa ithee fa a bua mafoko a ke setseng ke tswa go a ama, gone o ne a swa, a ba a fitlha, le lebitla la gagwe le sa ntse le le teng le gompiano. 30 Mme e ne e le moporofiti, gape a itse gore Modimo o sale o solofetsa ka maikano a a sa senyegeng gore mongwe wa losika lwa ga Dafide (o tlaa nna Mesia) a nne mo setlong sa bogosi sa ga Dafide. 31 Dafide o ne a lebelo dilo pele, gape a porofeta tsogo ya ga Mesia mo baswing, a re Mowa wa ga Mesia ga o kitla o tlogelwa mo bobipong le mmele wa gagwe ga o na go bola. (Hadēs g86) 32 O ne a bua kaga Jesu, mme rotlhe, re basupi ba gore Jesu o tsogile mo baswing. 33 "Mme jaanong o ntse mo setlong sa bogosi sa tlotlo e kgolo thata kwa legodimong, go bapa le Modimo, mme fela jaaka go solofeditse, Rara o mo neile taolo ya go romela Mowa O O Boitshepo, ka ditshupo tse lo di bonang le tse lo di utlwanng gompiano. 34 [Nnyaa, Dafide o ne a sa ithee ka bo ene ka mafoko agagwe a ke sa tswang go a umaka gone ga a ise a ke a tlhatlhogele kwa magodimong.] Mo godimo ga moo, o buile gape a re, 'Modimo o buile le Morena wa me, Mesia, wa re, "Nna fano ka tlotlego go bapa le Nna, 35 go fithelela ke tliša baba ba gago" mo boineelong jo bo feletseng.' 36 Mme ke gone ka moo ke buang phatlalatsa le mongwe le mongwe mo Iseraele gore Modimo o dirile ene Jesu yo, yo lo

mmapotseng go nna Morena le Mesia." 37 Mme mafoko a a ga Petere a ba ama thata; mme ba mo raya le baaposetoloi ba bangwe ba re, "Bakaulengwe re tshwanetse go dira eng?" 38 Mme Petere a fetola a re, "Sokologang mo dibeng, lo boele mo Modimong, lo bo lo kolobediwe boitshwarelo jwa dibe tsa lona mo leineng la ga Jesu Keresete; mme ke gone le lona lo tlaa amogelang neo e ya Mowa o o Boitshepo. 39 Gonne Keresete o e solofeditse mongwe le mongwe wa lona yo o biditsweng ke Morena Modimo wa rona, le bana ba lona le ba ba kwa mafelong a a kgakala!" 40 Mme Petere a rera thero e telele a bolela ka ga Jesu, a gatelela ka go kopa bareetsi ba gagwe botlhe fela go ipoloka mo boleong jwa chaba ya ga bone. 41 Mme ba ba neng ba dumela thero ya ga Petere ba ne ba kolobediwa, e ne e ka nna batho ba le diketse tse tharo! 42 Mme ba kopanela ditirelo tsa malatsi othe le badumedi ba bangwe, mo dithutong le mo selalelong sa Morena le mo dikopanong tsa merapelo. 43 Mme poifo e kgolo e ne e le mo go bone botlhe, foo baaposetoloi ba dira dikgakgamatso tse dintsi. 44 Mme badumedi botlhe ba ne ba kopana ka nako tsothe ba abalana dilo tsothe tse ba nang natsi, 45 ba rekisa diithoto tsa bone ba di abela ba ba tlhokang. 46 Ba ne ba obama mmogo ka nako tsothe mo Tempeleng, ba kgobokana ka ditlhophanyana mo malwapeng, ba a ja Selalelo sa Morena, gape ba tlhakanela le tsone dijo tsa bone ka boitumelo le ka tebogo e kgolo, 47 ba baka Modimo. Ba be ba ratwa ke batho botlhe ba motse, mme Modimo wa ba okeletsa malatsi othe ka ba ba bolokwang.

3 Erile maitsiboa mangwe Petere le Johane ba ya kwa Tempeleng go ya go kopanela merapelo e e neng e nna ka nako ya boraro malatsi othe. 2 Ya re ba atamela Tempele, ba bona monna yo o neng a sale a nnanye go tsweng mo sehopelong sa ga mmaagwe a rwelwe mo tseleng mme a bewa fa thoko ga kgoro ya Tempele e e neng e bidiwa Bontle, ka e ne e le tlwaelo ya gagwe ya malatsi othe. 3 Ya re Petere le Johane ba feta gaufi nae a ba kopa madi. 4 Ba mo tlhoma matlho, mme Petere a re, "Leba kwano!" 5 Segole sa ba tlhoma matlho ka tlhoafalo, se solofetse mpho nngwe. 6 Mme Petere a mo raya a re, "Ga re na madi a re ka go a nayang! Mme ke tlaa go naya sengwe! Ke go laola ka leina la ga Jesu Keresete wa Nasaretha ka re, Ema o tsamaye!" 7 Petere a tshwara segole ka seatla a se emisa ka dinao. Mme ya re a dira jalo, maoto a monna yoo le magwejana a fodisiwa a bo a nonotshiwa mo leng gore o ne a ba a kgona go tlolaka, a ema foo lobakanyana mme a simolola go tsamaya! Mme a tsamaya a tlolaka a baka Modimo a tsena le bone mo Tempeleng. 9 Erile fa batho ba ba mo Tempeleng ba mmona a tsamaya ebile ba utlwa a galaletsa Modimo, 10 ebile ba lemoga fa e le mokopi yo ba mmoneng gantsi fa kgorong e e bidiwang Bontle, ba hakgamadiwa ke se se diragetse. 11 Ya re a ntse a ngaparetse Petere le Johane, batho botlhe ba taboga ba ba kgobokanela kwa loobong lo lo bidiwang lwa ga Solomone ba hakgamatse thata. 12 Mme Petere a bona sebaka sa go bua le batho a ba raya a re, "Batho ba Iseraele, ke eng se se hakgamatsang thata kaga se? Ke eng fa lo re lebile thata jaaka o ka re re fodisitse monna yo ka nonofo le ka bo-Modimo jwa rona re dirile gore a tsamaye? 13 Gonne ke Modimo wa ga Aberahame, Isake, Jakobe le Modimo

wa borra-a-rona mogolwagolwane o o lerileng kgalalelo mo motlhangeng wa one Jesu Keresete ka go dira jalo. Ke raya Jesu yo lo mo itatotseng fa pele ga ga Pilatwe, mo godimo ga maikaelelo a ga Pilatwe a go mo golola. **14** Ga lo aka lwa batla gore moitshepi yo o siameng yo a gololwe. Mo boemong jwa gagwe lwa lopa gore go gololwe mmolai. **15** Mme lwa bolaya Motlhodi wa botshelo; mme Modimo wa mo rudisa mo losong. Mme nna le Johane re basupi ba selo se se diragetseng se, gonne, erile lo sena go mmolaya ra mmona a tshela! **16** Leina la ga Jesu le fodisitse monna yo, mme lo itse gore o ne a le segole jang pele. Go fola mo go itekanetseng mo go dirilwe ke go dumela mo leineng la ga Jesu le tumelo e re e neilweng ke Modimo. **17** "Bakaulengwe ba ba rategang, ke lemoga gore se lo se dirileng mo go Jesu lo se dirile ka go tlhoka kitso; mme le baeteledipele ba lona ba ka bolelwa fela jalo. **18** "Mme Modimo o ne o diragatsa seporofeso sa gore Mesia o tshwanetse go boga dilo tse tsotlhe. **19** Ke gone sokololelang ditlhaloganyo le megopolo ya lona kwa Modimong, lo sokolegele kwa go one gore o tlase maleo a lona o bo o lo leretse metlha ya boitumelo jo bo tswang kwa Moreneng, **20** le go re a bo a lo romelele Jesu Mesia wa lona gape. **21** Gonne o tshwanetse go nna kwa legodimong go fithelela nako e Modimo o busetsang dilo tsotlhe mo maemong a tsone, jaaka go porofitilwe mo dinakong tsa bogologolo. Fela jaaka Moshe a kile a bua bogologolo a re, 'Morena Modimo o tlaa tsosa Moporofiti mo gare ga lona yo o tlaa tshwanang le nna! Lo mo reetseng ka kelo-tlhoko mo go sengwe le sengwe se o se lo bolelelang. (aiōn g165) **23** Lefa e le mang yo o se kitlang a mo reetsa o tlaa senyediwa ruri. **24** Samuele le moporofiti mongwe le mongwe ga ba bolo go bolela kaga se se diragalang gompieno.' **25** "Lo bana ba baporofiti bao; mme lo baletswe mo tsholofetsong ya Modimo e o e diretseng bagologolwane ba lona go segofatsa lotlhe ka Bajuta, eo ke tsholofetse e Modimo o e neileng Aberehame. **26** Mme erile fela fa Modimo o sena go rudisa motlhangeng wa one mo baswing, o ne wa mo roma pele kwa go lona batho ba Iseraele, go lo segofatsa ka go lo sokolola mo dibeng tsa lona."

4 Mme ya re ba santse ba bua le batho, baperesiti ba bagolo le molaodi wa mapodisi a Tempele, le bangwe ba Basadukai ba tla kwa go bone, **2** ba tshwenyegile thata ka nthla ya gore Petere le Johane ba ne ba bolela gore Jesu o tsogile mo baswing. **3** Ba ba tshwara, mme ka go ne go setse go le maitsiboa, ba ba tlathlthela mo tlung ya kgolegelo bosigo jotle. **4** Mme bontsi jwa batho ba ba utlwieng molaetsa wa bone ba o dumela, mo e leng gore palo ya badumedi e ne ya tsholetsega ya batla go nna diketse tse tlhano! **5** Erile ka letsatsi le le latelang ga diragala gore Lekgotla la baeteledipele ba Sejuta le bo le phuthegetse mo Jerusalema. **6** Anase Moperesiti yo mogolo a bo a le teng, le Kaiafase, Johane, Alekesandere le ba bangwe ba losika lwa Moperesiti yo Mogolo. **7** Jalo barutwa ba babedi ba leriwe kwa go bone. Mme lekgotla la ba botsa la re, "Lo dirile selo se ka nonofo ya ga mang kgotsa ka taolo ya ga mang?" **8** Mme Petere, ka a tletse Mowa O O Boitshepo a ba raya a re, "Baeteledipele ba ba tlotlegang le ditlhogo tsa sechaba sa rona, **9** fa lo raya tiro e ntle e e diretsweng segole

se, le ka fa o neng a fodisiwa ka teng, **10** a nke ke lo bolelele sentle lona le batho botlhe ba Iseraele gore tiro e e dirilwe ka leina le nonofo ya ga Jesu wa Nasaretha, Mesia, monna yo lo mmapotseng, mme Modimo o mo tsoisitse mo baswing. Ke ka nonofo ya gagwe fa monna yo a eme fano a fodile! **11** Gonne Jesu Mesia (ene yo go buiwang ka ga gagwe mo dikwalong) ke 'lentswe je le gannweng ke baagi le le neng la nna lentswe la kgokgotshwana.' **12** Ga go na poloko mo go ope! Ka fa tlase ga legodimo lotlhe ga gona leina lepe le batho ba ka le bitsang gore ba bolokwe." **13** Erile Lekgotla le bona bopelokgale jwa ga Petere le Johane, gape le lemoga gore ga ba a rutega ke batho fela, ba hagamala mme ba lemoga gore go nna le Jesu go ba diretse hange. **14** Mme Lekgotla le ne le se kake la latola go fodisiwa ga gagwe gonne motho yo o neng a fodisitse o ne a eme gone foo gaufi nabo! **15** Mme ba ba ntshetsa kwa ntle ga ntlwana e Lekgotla le kopanelang mo go yone ba sala ba gakololana. **16** Ba botsana ba re, "Re tlaa dirang ka banna ba? Ga re ka ke ra gana gore ba dirile kgakgamatso e kgolo, gonne mongwe le mongwe mo Jerusalema o itse ka ga selo se. **17** Mme gongwe re ka ba emisa mo go anamiseng tumelo ya bone. Re tlaa ba bolelela gore fa ba ka dira gape jalo re tlaa dira gore ba obamele molao wa rona ka kgang." **18** Mme ba ba biletsa mo teng, ba ba raya ba re ba seka ba tlhola ba bua sepe ka ga Jesu. **19** Mme Petere le Johane ba ba raya ba re, "Atlholang lona gore a Modimo o batla re reetsa lona mo boemong jwa one! **20** Ga re ka ke ra khutlisa go bua ka dilo tse di ntle tse re bonyeng Jesu a di dira ebile re mo utlwile a di bua." **21** Mme Lekgotla la ba bopela, lwa bofelo ba ba lesa ba ntamaya gonne ba ne ba sa itse gore ba ka ba otlhaya jang kwa ntle ga go tsosa mokubukubu. Gonne mongwe le mongwe o ne a galaletsa Modimo ka nthla ya tiro e ntle e, **22** ebong phodiso ya monna yo o saleng a lwetse dingwaga di le masome mane! **23** Ka bofelo fela fa ba sena go gololwa, Petere le Johane ba bona barutwa ba bangwe mme ba ba bolelela se Lekgotla le se ba reileng. **24** Mme badumedi botlhe ba kopanela thapelo e: "Oo Morena yo o dirileng legodimo le lefatshe le lewatle le tsotlhe tse di mo go tsone, **25** o buile bogologolo ka Mowa O O Boitshepo ka mogolwagolwane wa rona, motlhangeng wa gago Kgosi Dafide, wa re 'Ke ka nthla yang fa baheitane ba tsogologela Morena, le merafe e e dielelele e dira maanonyana a a kgaatlhanong le Modimo-Mothata-Yotlhe? Dikgosi tsa lefatshe di a kopana go tlhabantsha Morwa Modimo yo o tlotitsweng!' **27** "Ke sone se se diragalang fano mo motseng o gompieno! Gonne Kgosi Herode, le Ponto Pilato mmusi, le ba-Roma botlhe le batho ba Iseraele, ba kopanetse Jesu, Morwa yo o tlotitsweng, motlhangeng wa gago yo o boitshepo. **28** Ga ba na go tlogela le fa e le sepe se wena mo nonofong ya gago o tlaa ba letlang go se dira. **29** Mme jaanong Morena, utlwa go bopa ga bone, mme o neye bathlanka ba gago bopelokgale jo bogolo mo thering ya bone, **30** o bo o romelele nonofo ya gago ya phodiso, le dikgakgamatso di le dintsi le ditshupo di dirwe ka leina la motlhangeng wa gago yo o itshepileng Jesu." **31** Morago ga thapelo e, kago e ba neng ba kopanetse mo go yone ya tshikinyega, mme botlhe ba tlaa Mowa O O Boitshepo mme ba rera molaetsa wa Modimo ka bopelokgale. **32** Badumedi botlhe ba ne ba le pelo e le nngwe le

mowa o le mongwe, mme ga bo go sena ope yo o reng sepe sa dilo tse o nang natso ke sa gagwe; mme dilo tsothe ba ne ba di tlhakanetse. **33** Mme baaposetoloi ba rera dithero tse di nonofileng ka ga tsogo ya ga Morena Jesu, mme ga nna le bolekanane jo bo nitameng mo badumeding botlhe. **34** Go ne go sena ope yo o tlhokang, gonne botlhe ba ba neng ba na le ditsha kgotsa matlo ba ne ba a rekisa ba tisa madi kwa baaposetoloing go a abela ba ba tlhokang. **36** Jaaka go ne go na le Josefa, (yo baaposetoloi ba neng ba mmita "Barenabase wa Moreti!" E ne e le wa Balifi ba kwa setlhakethakeng sa Kupro). **37** E ne e le mongwe wa ba ba neng ba rekisa ditsha tsa bone tse ba neng ba na natso mme ba tisa madi kwa baaposetoloing gore ba a abele ba ba tlhokang.

5 Mme ga bo go le monna a bidiwa Ananiase (le mosadi wa gagwe Safira) ba ba neng ba a rekisa bontlha-bongwe jwa setsha, **2** mme ba tisa bontlhabongwe fela jwa madi, ba kaya fa e le tlhwalhwa e e feletseng (mosadi wa gagwe o ne a dumalana tsetso e). **3** Mme Petere a re, "Ananiase, Satane o tladitse pelo ya gago ka maaka fa o bolega gore tlhwalhwa e ke yone yotlhe, o ne o aketsa Mowa O O Boitshupo. **4** Setsha e ne e le sa gago go se rekisa kgotsa nnyaa, go ya fela ka fa o neng o rata ka teng. Mme morago ga o sena go se rekisa, e ne e le ga gago go bona gore o ntsha bokae. Ke eng fa o ne o dira jaana? Ga oa aketsa rona o akeditse Modimo." **5** Erile fela fa Ananiase a utlwa mafoko a, a wela fa fatshe a swa! Mongwe le mongwe a tlewa ke poifo e kgolo, **6** mme makau a mo phutha ka letsela a mo tsaya a ya go mo fitlha. **7** Erile morago ga dioura di le tharo mosadi wa gagwe a tla, a sa itse se se diragetseng. **8** Petere a mmotsa are, "A lo rekisitse setsha sa lona ka bokana?" A araba are "Ee, re se rekisitse ka bokalo." **9** Mme Petere a re, "Ke eng fa wena le monna wa gago lo ka akanya go dira selo se se ntseng jaana, lo leka maano a bosula go leka nonofo ya Mowa wa Modimo go itse se se diragalang? Ka kwa ntle ga kgoro ele go na le makawana a a tswang go boloka monna wa gago, mme le wena ba tlaa tla go go rwala ba ya go go boloka." **10** Erile gone fela foo a wela fa fatshe, a swa, mme makawana a tsena mo teng, ya re ba mmona gore o sule, ba mo tsaya ba ya go mmoloka go bapa le monna wa gagwe. **11** Mme poifo e kgolo ya tela phuthago yotlhe le ba bangwe botlhe ba ba utlwieng se se diragetseng. **12** Ka sebaka seo, Baaposetoloi ba ne ba kopane mo lefelong le le bidiwang mathudi a ga Solomone, mme ba dira ditshupo tse di bonalang le dikgakgamatso mo mathlong a batho. **13** Badumedi ba bangwe ba seka ba kgalthea go kopana le bone, le fa go ntse jalo, ba ne ba ba tlotla thata. **14** Mme badumedi ba oketsega thata mo Moreneng, bontsi jwa banna le basadi. **15** Balwetse ba ntshediwa kwa mebileng ba le mo malaong le mo diphateng gore bogolo moriti wa ga Petere o wele bangwe ba bone fa a feta! **16** Mme bontsi jwa batho jwa tla bo tswa mo tikologong ya Jerusalema, ba tisa balwetse ba bone le ba ba tsenyeng ke mewa e e maswe; mme mongwe le mongwe wa bone a fola. **17** Mme Moperesiti yo mogolo le botlhe ba losika le ditsala tsa gagwe mo Basadukaing ba tlaa lefufa, **18** mme ba tshwara baaposetoloi, ba ba tsenya mo kgolegelong. **19** Mme moengele wa Morena a tla bosigo, a bula dikgoro tsa kgolegelo

a ba ntshetsa kwa ntle. Mme a ba raya a re, **20** "Tsamayang lo ye mo Tempeleng lo rere kaga Botshelo jo!" **21** Mme ba goroga mo Tempeleng e ka ne e le ka nako ya letsatsi le tlhaba mme ka bonako ba simolola go rera! Moragonyana mo mosong oo, Moperesiti yo Mogolo le botlhe ba lekgotla ba tsena mo Tempeleng, ba bitsa Lekgotla le legolo la bagolwane ba Puso, ba romela batho go ya go bitsa baaposetoloi go tla go sekisiwa. **22** Mme erile fa mapodisi a tsena kwa kgolegelong, banna ba bo ba seyo, jalo ba boela kwa Lekgotleng ba bega gore **23** "Dikgoro tsa kgolegelo di ne di tswetswe, mme bathlokomedi ba ne ba ema ka kwa ntle, mme erile fa re bula dikgoro, ga bo go sena ope!" **24** Mme erile fa molaodi wa mapodisi le baperesiti ba bagolwane ba utlwa se, ba akabala, ba hakgametse thata gore go tlaa diragalang le gore mo gotlhe go tlaa felela kae! **25** Mme mongwe a goroga ka mafoko a a reng banna ba ba neng ba le mo kgolegelong ba mo Tempeleng ba rerela batho! **26** Mme Mogolwane wa mapodisi a tsamaya le mapodisi ba ba tshwara kwa ntle ga mokubukubu, (gonne ba ne ba tshaba batho gore ba tlaa ba bolaya fa ba ka gakalela barutwa) mme ba ba lere fa pele ga Lekgotla. **28** Moperesiti yo Mogolo a bua a re, "A ga re a lo bolelela gore lo seka lwa tlhola lo ruta kaga Jesu yo? Mme mo boemong jwa go khutlisa go rera kaga Jesu lo tladitse Jerusalema ka thuto ya lona mme lo ikaelela go re baya molato ka loso lwa monna yo!" **29** Mme Petere le baaposetoloi ba araba ba re, "Re tshwanetse go obamela Modimo go na le batho. **30** Modimo wa borra-a-rona mogolwagolwane o tsositse Jesu go tla mo botshelong gape morago ga lo sena go mmolaya ka go mo pega mo mokgorong. **31** Mme ka nonofo e kgolo, Modimo wa mo tsholetsa go nna Kgosana le Mmoloki, gore batho ba lseraele ba tle ba nne le lobaka lwa boikwalhao le gore dibe tsa bone di itshwarelwe. **32** Mme re basupi ba dilo tse, ga mmogo le Mowa O O Boitshupo, o o neetsweng botlhe ba ba obamelang Modimo." **33** "Ya re ka ntsha ya go bua jalo, Lekgotla la gakala la ikaelela go ba bolaya." **34** Mme mongwe wa bone, Mofaraisai yo o bidiwang Gamaliele, (moitseanape wa molao wa tumelo a bile a itsege thata mo bathong) a ema a kopa gore baaposetoloi ba ntshediwe kwa ntle fa a sa ntse a bua. **35** Mme a raya banna ba Lekgotla a re, **36** "Motha mongwe go kile ga bo go le Theudase, yo o neng a ipaya jaaka e ka re ke mongwe yo o kwa godimo. Bangwe ba ka nna makgolo a mane ba ikopanya nae, mme a bolawa, mme botlhe ba ba ineetseng mo go ene ba phatlaladiwa kwa ntle ga kutlwelobothoko epe. **37** "Morago ga gagwe, ka nako ya fa go kgethisiwa, ga bo go le Judase wa Galalea. A itatedisa batho bangwe go nna barutwa, mme le ene a swa, mme balatedi ba gagwe ba phatlalala. **38** "Mme jaanong kgakololo ya me ke e, tlogelang banna ba, mme fa se ba se rutang le se ba se dirang e le ga bone fela, ka bofofe se tlaa fedisiwa. **39** Mme fa e le ga Modimo lo tlaa retelelwa ke go ba emisa, e sere kgotsa lona ka bo lona lwa iphitlhela lo tlhabantsha Modimo." **40** Lekgotla la dumalana le kgakololo ya gagwe, ba bitsa baaposetoloi, ba ba itaya, ba ba bolelela gore ba seka ba tlhola ba bua ka leina la ga Jesu, mme morago ba ba lesa ba tsamaya. **41** Ba tloga fa lekgotleng ba itumeletse gore Modimo o ba supile ba nonofile go tlotlologela leina la

one. 42 Mme ka malatsi otlhe mo Tempeleng le mo motsing, ba tswelela go ruta le go rera gore Jesu ke Mesia.

6 Mme ya re ka go ntsifala ga badumedi ka bofelo, ga nna le dingongorego. Ba ba buang puo ya Segerika fela ba ngongoregela gore bathologadi ba bone ba a kgethololwa ga ba newe dijo tse di lekanyeng ka nako ya fa go abiwa dijo, jaaka go fiwa ba ba buang Sehebera. 2 Jalo ba ba lesome le bobedi ba bitsa phuthego ya badumedi bothe ba re, "Re tshwanetse go dirisa nako ya rona mo go rereng, e seng go tsamaisa thulaganyo ya dijo. 3 Ke gone bakaulengwe ba ba rategang, senkang banna ba supa mo gare ga lona, ba ba bothhale ba bile ba tletse Mowa O O Boitshepo, ba ba itsegegeng ka molemo mo bathong bothe; mme re tlaa ba tlhoma go nna batsamaisi ba tiro e. 4 Mme re tlaa dirisa nako ya rona mo thapelong, mo therong, le mo thutong." 5 Mme mo ga utlwala sentle mo phuthegong yotlhe, mme ba tlhopho ba ba latelang: Setefane, (monna yo o tletseng tumelo le Mowa O O Boitshepo), Filipino, Porokoro, Nikanore, Timone, Paramenase, Nikolase wa Antioka (Modichaba yo o sokologoetseng mo tumelong ya Sejuta, yo o rileng la bofelo a sokologela mo Bokereseteng). 6 Mme ba ba supang ba, ba isiwa fa pele ga Baaposetoloi ba ba baya diatla ba ba rapelela ba ba kopela tshogofatso. 7 Molaetsa wa Modimo wa rerwa ka bophara mo tikologong yotlhe, mme palo ya barutwa ya ntsifala ka go anama mo Jerusalema; mme baperesiti ba Sejuta ba le bantsi le bone ba sokologa. 8 Setefane, monna yo o tletseng tumelo le nonofo ya Mowa O O Boitshepo a dira dikgakgamatso tse dikgolo tse di sa tlwaelesegang mo bathong. 9 Mme ya re ka letsatsi lengwe banna bangwe ba tumelo ya Sejuta ba simolola go ganetsanya nae, mme ya re ka bofelo ba kopana le Bajuta ba ba tswang kwa Saerine, Alekesandria mo Egepeto, le mo dikgaolong tsa Take, ebong Kilikia le Ausia. 10 Mme go ne go se ope wa bone yo o emelanang le bothhale le mowa wa ga Setefane. 11 Mme ba tisa bangwe ba banna go tla go bua maaka ka ga gagwe ba re ba utlwile Setefane a thapatsa Moshe, le Modimo tota. 12 Mme ditshole tse, tsa dira gore batho ba tsogolegele Setefane, mme baeteledipele ba Sejuta ba mo tshwara ba mo tisa fa pele ga lekgotla. 13 Basupi ba maaka ba supa gore Setefane o ne a aga a bua kgathanonng le Tempele le melao ya ga Moshe. 14 Mme ba re, "Re mo utlwile a re Jesu wa Nasaretha o tlaa senya Tempele le melao yotlhe ya ga Moshe." 15 Ya re ka nako eo bothe ba ba neng ba le mo lekgotleng ba bona sefathogo sa ga Setefane se tsabakela jaaka sa moengele.

7 Mme Moperesiti yo Mogolo a mmotsa a re, "A mafoko a, a boammaauri?" 2 Mme Setefane a araba ka boleele a re, "Mo-dimo o o galalalang o ne wa iponatsa mo go rraetsho Aberahame mo Iraka pele ga a ya kwa Seria, 3 mme wa mo raya wa re a tloge mo lefatsheng la ga gabo, a laele ba gagabo a ba a tloge a ye kwa lefatsheng le Modimo o tlaa le mo kaelang. 4 Hong a tswa mo lefatsheng la Bakaladea a ya go nna mo kgaolong ya Harana, mo Seria, go fithelela rraagwe a a swa. Mme Modimo wa mmusetsa mono lefatsheng la Iseraele, 5 ga wa ka wa mo naya sepe sa dilo tsa gagwe, le fa e le setsha se sennye sa lefatshhe. Le fa go ntse jalo Modimo wa mo

solofetsa gore o tlaa mo naya lefatshhe lotlhe le ditlogolwana tsa gagwe, le fa ka nako eo a ne a sena bana! 6 "Mme Modimo wa mo raya gape wa re, ditlogolwana tsa gago di tlaa tswa mo lefatsheng leo di ye go nna mo lefatsheng la seeng mme koo di nne bathanka, selekanyo sa dingwaga di le makgolo a mane. 7 Mme Modimo wa ba raya wa re, 'Ke tlaa otlhaya Chaba e e tlaa ba dirang bathanka mme morago ga moo batho ba me ba tlaa boela mo lefatsheng le la Iseraele ba nkobamela teng.' 8 "Gape Modimo wa neela Aberahame kgolagano ya bogwera ka nako eo; e le kgolagano fa gare ga Modimo le batho ba ga Aberahame, mme Isake, morwa Aberahame a rupisiwa fa a le malatsi a fera bobedi a tshotswe. Isake a tsala Jakobe, Jakobe a tsala diithogo di le lesome le bobedi tsa lotso lwa Sejuta. 9 Mme batho ba, ba ne ba fufegela Josefa thata ba bo ba mo rekisa go ya go nna motlhanka kwa Egepeto. Mme Modimo o ne wa nna nae, 10 o ne wa mo golola mo tlalelong yotlhe ya gagwe, wa mo naya tlotlego mo go Farwe Kgosi ya Egepeto. Gape Modimo wa naya Josefa bothhale jo bogolo, mo Farwe o ileng a mo tlhopho go nna molaodi mo Egepeto yotlhe, a bo a mmaya motlhokomedi wa ditiro tsothle tsa segosi. 11 "Mme ga nna leuba mo Egepeto le Kanana, mme ga nna le bohutsana jo bogolo mo go borraetsho. Erile fa dijo tsa bone di setse di fedile, 12 Jakobe a utlwa fa go sa ntse go na le mabele kwa Egepeto, jalo a romela bomorwawe go ya go a reka. 13 Erile fa ba ya labobedi, Josefa a itshebolela bomogolowe, mme ba itsisiwe Farwe. 14 "Mme Josefa a romela bangwe go ya go tsaya rraagwe ebong Jakobe le ba malwapa a bomogolowe bothe go tla Egepeto, bothe e ne e le batho ba le masome a supa le bothhano. 15 Jalo Jakobe a tla Egepeto, kwa o neng a swela teng, le bana bothe ba gagwe. 16 Mme bothe ba ne ba isiwa kwa Shekema ba fitlwa mo lebitleng le Aberahame o neng a le rekile mo go bomorwa Hamore, rraagwe Shekema. 17 Mme erile fa nako e atamela e Modimo o neng o tlaa diragatsa tshlofetso ya one mo go Aberahame go golola bana ba gagwe mo bothhankeng, Bajuta ba ntsifala thata mo Egepeto; mme ga tlhongwa kgosi e e neng e sena tlotlo mo segopotsoong sa ga Josefa. 19 Kgosi e ya nna kgathanonng le losika lwa rona, ya pateletsa batsadi go latlhela bana ba bone mo masimong. 20 "Mme ka nako eo Moshe a tsalwa, ngwana yo o neng a bonala a na le bontle jwa Se-Modimo. Batsadi ba gagwe ba mo fitlha mo lwapeng se-lekanyo sa dikgwedi tse tharo, 21 mme ya re kwa bofelong ba sa tlhole ba kgona go mo fitlha, ebile ba tshwanelwa ke go mo latlha, morwadia Farwe a mmona mme a mo ikgodisetsa e le ngwana wa gagwe, 22 mme a mo ruta bothhale jothle jwa Baegepeto, mme a nna kgosana e kgolo le sebui se se tumileng. 23 "Mme erile letsatsi lengwe fa a atamela bo-tsalu jwa letsatsi la gagwe la dingwaga tse di masome a mane, a tlwela ke mogopolo wa go etela ba ga gabo, batho ba Iseraele. 24 Mo loetong lo a bona Moegepeto a sotta Moiseraele. Jalo Moshe a bolaya Moegepeto. 25 Moshe o ne a gopola gore ba ga gabo ba tlaa lemoga gore Modimo o mo rometse go tla go ba thusa, mme ba se ka ba lemoga. 26 "Ka letsatsi le le latelang a ba etela gape mme a fitlhela banna ba le babedi ba Baiseraele ba lwa. Mme a leka go ba letlanya a re 'Banna, lo bana ba monna ga lo a tshwanela go lwa jaana!

Ga go a siama.' 27 "Mme monna yo o molato a raya Moshe a re, 'Re tlhokomologe o tlhokomele tsa gago. Ke mang yo o go beileng molaodi le moatlhodi mo go rona?' 28 A o rata go mpolaya jaaka o bolaile Moegepeto yole maabane? 29 "Mme ka ntlha ya lefoko le, Moshe a tswa mo Egepeto, a tshabela kwa lefatsheng la Mediana, kwa o neng a tsala bana ba basimane ba le babedi gone. 30 "Morago ga dingwaga di le masome a mane, mo sekakeng gaufi le Thaba ya Senai, moengele a iponatsa mo go ene a le mo kgabong ya molelo sethaheng. 31 Moshe a bona tiragalo e, mme a hakgamala gore ke eng, mme ya re a sianela go ya go bona, lentswe la Morena la bua nae le re, 32 'Ke Modimo wa bo-raeno mogolwagolwane, Modimo wa ga Aberahame, Isake le Jakobe!' Moshe a roroma ka poifo e kgolo mme a se ka a batla go leba. 33 "Mme Morena a mo raya a re, 'Rola ditlhako tsa gago, gonne o eme mo mmung o o boitshepo. 34 Ke bonye kutlobothoko ya batho ba me ba ba kwa Egepeto ebile ke utlwile sefelo sa bone. Ke tsile go ba golola. Tla, ke tlaa go romela kwa Egepeto.' 35 "Mme jalo Modimo wa romela ene tota motho yo ba ga bone ba kileng ba mo gana ka go mo raya ba re, 'Ke mang yo o go beileng molaodi le moatlhodi mo go rona?' Moshe o ne a rometswe go ya go nna molaodi le mmoloki wa bone. 36 Mme ka dikgagamato tse dintsi a ba ntsha mo Egepeto a ba kgabagantsha Lewatle le le Hibidu, a bo a ba ralatsa sekaka selekanyo sa dingwaga di le masome a mane. 37 "Moshe ka boene o ne a raya batho ba Iseraele a re, 'Modimo o tlaa tsosa moporofiti yo o tshwanang le nna mo gare ga bo-morwa rraa lona.' 38 Mme se se ne sa supega se le boammaaruri, gonne mo sekakeng, Moshe e ne e le ene yo o fa gare, motsereganyi fa gare ga batho ba Iseraele le moengele yo o neng a ba naya molao wa Modimo, Lefoko le le Tshelangmo thabeng ya Senai. 39 "Mme borraetsho ba ne ba gana Moshe, ba batla go boela kwa Egepeto. 40 "Ba raya Arone ba re, 'Re direle medimo ya disetwa, gore re tle re nne le medimo e e re etelelang pele go boela kwa morago; gonne ga re itse gore go rileng kaga Moshe yo o re ntshitseng mo Egepeto.' 41 Mme ba dira modimo wa namane mme ba o ntshetsa ditlhabelo, mme ba itumelela selo se, se ba se dirileng. 42 Mme Modimo wa ba huralela wa ba tlogela, mme wa ba lesa ba direla letsatsi, ngwedi le dinaledi jaaka medimo ya bone! Mo lokwalong lwa polelelopele ya ga Amose, Modimo o botsa jaana wa re, 'Iseraele, a o ne o direla nna sethabelo mo sekakeng selekanyo sa dingwaga di le masome a mane? 43 Nnyaa, tota kgatlhego ya gago e ne e le mo medimong ya shehitane ebong Sakuthe, le modimo wa naleli Kaiwae, le mo ditshwantshong tsothe tse o di dirileng. Jalo ke tlaa go isa botshwarong kgakala go feta Babelone.' 44 "Mme borraetsho mogolwagolwane ba ne ba tsamaya le motlaagana ba ralala sekaka. Mo teng ga one ba ne ba beile matlapa a go neng go kwadiiwe Melao e e Lesome mo go one. Kago e, e ne e agilwe fela ka thulaganyo e Moshe o neng a e kaetswe ke moengele. 45 Erile morago ga dingwaga, fa Joshua a eteletse pele dintwa kgatlhanong le Badichaba, Motlaagana o ba tsena nao mo lefatsheng le lesha, mme wa dirisiwa go fithelela mo lobakeng lwa ga Kgosi Dafide. 46 "Modimo o ne wa segofatsa Dafide a kopa tetelelo ya go agela Modimo wa ga Jakobe Tempele e e siameng. 47

Mme tota e ne ya agiwa ke Solomone. 48 Le fa go ntse jalo, Modimo ga o nne mo Ditempeleng tse di agilweng ka diatla tsa batho. Morena o bua ka baporofiti jaana a re, 'Legodimo ke setilo sa me sa bogosi, mme lefatsho ke sebeo sa dinao tsa me'. Morena o botsa jaana a re, 'Lo ka nkagela ntlo e e ntseng jang? A ke ka nna mo go yone? 50 A ga ke a dira legodimo le lefatsho?' 51 "Baheitane ke lona ba lo thamo di thata! A lo tshwanetse go ganetsa Mowa O O Boitshepo ka bosakhutleng? Mme borraalona ba ne ba dira jalo, a le lona lo dira jalo! 52 Bolelang moporofiti mongwe yo borralona ba iseng ba ke ba mmogise! Ba bolaile le ene tota yo o ntshitseng polelelopele ya go tla ga Mosiami, Mesia yo lo mo okileng lwa ba lwa mmolaya. 53 Ee, lo sentse Melao ya Modimo ka bomo, le fa lo ne lo e amogetse mo diatleng tsa baengele." 54 Mme baeteledipele ba Sejuta ba tenwa thata ke go omanngwa ke Setefane ba bo ba mo shenela meno ka kgakalo. 55 Mme Setefane, a tletse Mowa O O Boitshepo, a leba ka iketlo kwa legodimong, a bona kgalalelo ya Modimo le Jesu a ntse ka fa letsogong le legolo la Modimo. 56 Mme a ba raya a re, 'Bonang, ke bona legodimo le bulegile mme Jesu Mesia a eme fa thoko ga Modimo, ka fa letsogong la one le legolo!' 57 Mme ba mo gagautlha, ba ikaba ditsebe, ba tima lentswe la gagwe ka go goa thata, 58 mme ba mo gogela kwa ntle ga motse go ya go mo kgotletsa ka matlapa. Basupi ba bagolo le babolai ba apola dibaki tsa bone ba di baya fa dinaong tsa lekawana lengwe le le bidiwang Saulo. 59 Mme erile fa babolai ba mo kgotletsa ka maje, Setefane a rapela a re, "Morena Jesu, amogela Mowa wa me." 60 Mme a wela fa fatshe ka mangole, a goa a re, "Morena o se ka wa ba bona molato ka ntlha ya bolelo jo!" Mme ka mafoko ao, a swa.

8 Mme Saulo o ne a dumalana le gore Setefane a bolawe. Mme pogiso e kgolo ya badumedi ya simologa ka letsatsi leo, ya thasela, mme mongwe le mongwe a tshabela kwa Judea le Samaria kwa ntle ga baaposetoloi fela. 2 (Mme bangwe ba badumedi ba Bajuta ba tla go fitha Setefane ka kutlo-bothoko e kgolo). 3 Mme Saulo o ne a nna jaaka setsenwa, a tsamaya gongwe le gongwe a nyeletsa badumedi, a tsena mo matlung a swatola banna le basadi a ba tsenya mo kgolegolong. 4 Mme badumedi ba ba neng ba tshabile kwa Jerusalema ba ne ba tsamaya gongwe le gongwe ba rera Mafoko a a Molemo kaga Jesu! 5 Jaaka Filipino, yo o neng a ya kwa Samaria go bolelela batho ka ga Keresete teng. 6 Bontsintsi jo bogolo jwa batho bo ne jwa reetsa thata se o neng a tshwanetse go se bua ka ntlha ya go bona dikgagamato tse o neng a di dira. 7 Mewa e le mentsi e e maswe e ne ya ntshediwa kwa ntle, e goa fa e tswa mo bathong ba e neng e ba tsenye, mme ba le bantsi ba ba neng ba tetesela kgotsa ba ba neng ba golafetse ba fodisiwa, 8 mme ga nna boitumelo jo bogolo mo motseng oo! 9 Mme monna mongwe yo o neng a bidiwa Simone o ne a kile a bo a dira boloi ka dingwaga di le dintsi; e ne e le monna yo o thothleletsang thata, a bile a le boikgogomoso ka ntlha ya dikgagamato tse o neng a di dira mo e leng gore Basamaria ba ne ba tlwaetse go bua kaga gagwe ba re ke Mesia. 12 Mme jaanong ba ne ba dumela molaetsa wa ga Filipino gore Jesu e ne e le Mesia, le mafoko a gagwe kaga Bogosi jwa Modimo; mme go ne ga kolobediwa banna le basadi ba le bantsi. 13 Mme

Simone ka sebele a dumela a bo a kolobediwa jalo a simolola go sala Filipino morago gongwe le gongwe kwa a yang teng, mme o ne a hakgamadiwa ke dikgakgamatso tse (Filipo) o neng a di dira. **14** Mme erile fa baaposetoloi kwa Jerusalema ba utlwa fa batho ba Samaria ba amogetse molaetsa wa Modimo, ba romela Petere le Johane. **15** Erile fela jaaka ba goroga ba simolola go rapelela Bakeresete ba basha ba, go amogela Mowa O O Boitshepo. **16** Gonne o ne o ise o tle mo go ope wa bone ka gonne ba ne ba kolobeditse fela mo leineng la Morena Jesu. **17** Jalo Petere le Johane ba baya diatla tsa bone mo badumeding ba, mme ba amogela Mowa O O Boitshepo. **18** Erile Simone a bona se, gore Mowa O O Boitshepo o ne o fologela mo bathong fa Baaposetoloi ba ba baya diatla, a ntsha madi go reka nonofo e. **19** Mme o ne a re, "Le nna nnayang nonofo e, gore mongwe le mongwe yo ke mmayang diatla a amogele Mowa O O Boitshepo!" **20** Mme Petere a mo fetola a re, "A madi a gago a nyelele le wena gonne o gopola gore mpho ya Modimo e ka rekwa! **21** Ga o ka ke wa nna le seabe mo go se, gonne pelo ya gago ga e a siama fa pele ga Modimo. **22** Sokologa mo tshiamololong e, mme o rapele. Gongwe Modimo o tlaa itshwarela dikakanyo tsa gago tse di bosula, **23** gonne ke bona fa go na le lefufa le bolelo mo pelong ya gago." **24** Mme Simone a re, "Nthapelela gore dilo tse di maswe tse di se ntiragalele." **25** Morago ga bosupi le thero mo Samaria, Petere le Johane ba ne ba boela Jerusalema, mme ba tla ba ema mo metsaneng ya Samaria mo tseleng go rera Mafoko a a Molemo. **26** Mme Filipino ene, moengele wa Morena a mo raya a re, "Ya kwa tseleng e e tswang Jerusalema e e ralalang sekaka sa Gasu, o goroge motshegare." **27** Mme o ne a dira jalo, mme ya re mo tseleng ga bo go tla mang fa e se motshola madi wa Itopia, moopa wa taolo kgolo ka fa tlase ga Kgosigadi ya Itopia. O ne a ile Jerusalema go rapela kwa Tempeleng, **28** mme o ne a bowa a le mo kareng ya gagwe a balela kwa godimo mo lokwalong lwa ga moporofiti Isaia. **29** Mowa O O Boitshepo wa raya Filipino wa re, "Tsamaya o ye gaufi le kara!" **30** Filipino a taboga mme a utlwa se o neng a se bala mme jalo a botsa a re, "A o tihloganya se o se balang?" **31** Mme monna a fetola a re, "Tota ga ke tihloganya! Nka tihloganya jang go sena yo o nthalosetsang?" Jalo a kopa Filipino go palama kara gore a tle go nna nae. **32** Se o neng a se bala mo lokwalong se ne se balega jaana. "O ne a gogwa jaaka nku e isiwa kwa matlhabelong, le jaaka kwanyana e e didimetseng fa pele ga babeodi ba yone, ga a ka a tswa molomo; **33** mo go sotlhweng ga gagwe, ga a ka a direlwa tshiamo; mme ke mang yo o ka ranolang bomaswe jwa losika lwa gagwe? Gonne botshelo jwa gagwe bo tlositse mo lefatsheng." **34** Mme moopa a botsa Filipino a re, "A Isaia o ne a bua ka ga gagwe kgotsa ka mongwe?" **35** Mme jaana Filipino a simolola ka lokwalo lo, le tse dingwe di di dintsi go mmolelela kaga Jesu. **36** Erile ba nise ba tsamaya ka koloi, ba fitlha fa metsing mangwe, moopa a re, "Metsi ke a, ke eng fa ke sa kolobediwe?" **37** Filipino o ne a mo araba a re, "O ka kolobediwa fa o dumela ka pelo ya gago yothe." Mme moopa a fetola a re, "Ke dumela gore Jesu Keresete ke Morwa Modimo." **38** Mme a emisa kara ya gagwe ba fologela mo teng ga metse mme Filipino a mo kolobetsa. **39** Mme erile fa ba tswa mo metsing, Mowa wa

Modimo wa tsaya Filipino, mme moopa a seka a tlhola a mmona gape, mme a tswela mo tseleng ya gagwe a itumetse. **40** Mme ka nako eo Filipino ene a ipona a le kwa Asoto. O ne a rera Mafoko a a Molemo gone koo le mo motseng mongwe le mongwe mo tseleng, fa a ya Kaesara.

9 Mme Saulo, ka go tshosa ka bogale jwa go nyeletsu Mokeresete mongwe le mongwe, o ne a ya kwa Moperesiting yo mogolo kwa Jerusalema. **2** O ne a kopa lokwalo lo lo kwaletsweng diphuthago kwa Damaseko, a kopa thuso ya go bogisa badumedi ba o tlaa ba bonang teng, banna le basadi gore a tle a ba lere kwa Jerusalema ba golegiwe. **3** Mme mo loetong lo, ya re a atamela Damaseko ka tshoganetso lesedi le le galalelang thata la mo phatsimela le tswa legodimong! **4** O ne a wela fa fatshe mme a utlwa lentse le re, "Saulo! Saulo! mpogisetsang?" **5** Mme ene a re, "O mang Morena?" Jalo lentse la fetola la re, "Ke Jesu yo o mmogisang! **6** Jaanong tsoga o tsene mo motseng mme o letele ditaello tsa me." **7** Mme banna ba ba neng ba na le Saulo ba ema ba tuulala ka kgakgamalo, gonne ba ne ba utlwa lentse la mongwe mme ba sa mmona! **8** Mme erile fa Saulo a tsoga fa fatshe a bo a sa bone. O ne a tshwanelwa ke go gogelwa kwa Damaseko kwa o neng a nna teng malatsi a mararo, a sa bone, a sa je, a sa nwe ka nako eo yothe. **10** Mme mo Damaseko go ne go na le morutwa, ebong Ananiase. Modimo o ne wa bua nae mo ponatshagelong wa re, "Ananiase! Mme a re, "Morena!" **11** Mme Morena a re, "Tsamaya o ye kwa mmileng o go tweng Tolamo o batle ntlo ya monna yo o bidiwang Judase mme o botse gore Saulo wa Tareso o kae. O a rapela gone jaanong, gonne **12** ke mmonatshitse ponatshagelo ya monna yo o bidiwang Ananiase a tla go baya diatla tsa gagwe mo go ene gore a fufologe gape!" **13** Mme Ananiase a re, "Morena, ke utlwile kaga dilo tse di sa siamang tse monna yo o di dirileng mo badumeding kwa Jerusalema! **14** Gape re utlwa gore o tshotse tetelele ya go tshwara e e tswang kwa baperesiting ba bagolo go mo fa thata ya go tshwara modumedi mongwe le mongwe mo Damaseko!" **15** Mme Morena a re, "Tsamaya o dire se ke se buang. Gonne Saulo ke sejana same se se thautsweng go isa molaetsa wame mo go Badichaba le mo dikgosing tsa bone, le mo bathong ba Iseraele. **16** Mme ke tlaa mo supegetsu gore o tshwanetse go mpogela go le kae." **17** Mme Ananiase a tsamaya a bona Saulo a bo a mmaya diatla a re, "Mokaulengwe Saulo, Morena Jesu yo o neng a go ipontsha mo tseleng, o nthomile gore o tle o tladiwe ka Mowa O O Boitshepo le gore o fufologe." **18** Ya re gone fela foo (ya ne ekete go wa dikgapetlana mo matlhong a ga Saulo) a fufologa, mme ka bonako a kolobediwa. **19** Mme a ja mme a nonofo. O ne a nna le badumedi mo Damaseko malatsinyana, **20** mme erile gone fela foo a ya kwa tlung ya thuto go bolelela mongwe le mongwe Mafoko a a Molemo kaga Jesu, gore tota ke Morwa Modimo! **21** Botlhe ba ba neng ba mo utlwa ba ne ba hakgamala. Ba ne ba botsa ba re, "A monna yo ga se ene yo o neng a bogisa thata balatedi ba ga Jesu kwa Jerusalema? Mme re utlwa gore o tletse fano go tla go ba tshwara botlhe mme a ba golega go ba isa kwa baperesiting ba bagolo." **22** Saulo o ne a nna thaga thata mo therong ya gagwe, mme Bajuta ba Damaseko ba ne ba sa kgone go emela

ditshupo tsa gagwe gore Jesu tota e ne e le Keresete. **23** Moragonyana, baeteledipele ba Sejuta ba ikaelela go mmolaya. **24** Mme o ne a bolelelwa kaga maikaelelo a bone, gore ba ne ba tlhokometse dikgoro tsa motse bosigo le motshegare ba ipaakanyeditse go mmolaya. **25** Mme erile bosigo bangwe ba o ba sokolotseng ba mo falotsha ka kgorwana mo loboteng lwa motse a le mo serotong. **26** Erile fa a goroga kwa Jerusalema a leka go kopana le badumedi, mme ba ne ba mo tshaba. Ba ne ba gopola gore o itira yo o dumelang! **27** Jalo Barenabese a mo tlisa mo baaposetoloing mme a ba bolelela ka fa Saulo a ileng a bona Morena ka teng mo tseleng a ya Damaseko, le se Morena o neng a se bua nae, le ka thero ya gagwe e e nonofileng ka leina la ga Jesu kwa Damaseko. **28** Mme ba mo amogela, mme morago ga moo o ne a nna le badumedi ka nako tsotlhe, **29** mme a rera ka bopelokgale mo leineng la Morena. Mme Bajuta bangwe ba ba neng ba bua Segerika ba o kileng a ganetsana nabo ba loga leano la go mmolaya. **30** Le fa go ntse jalo, erile badumedi ba bangwe ba utlwa diphatsa tse a leng mo go tsona, ba mo isa kwa Kaesarea mme ya re morago ga moo ba mo isa kwa ga gabo kwa Tareso. **31** Erile ka lobaka lo, phuthego e ne e le mo kagisong mo ntlheng tsotlhe tsa Judea, Galalea le Samaria, mme tsa gola mo nonofong le mo palong. Badumedi ba ithuta go tsamaya ba boifa Morena mo kgomotsong ya Mowa O O Boitshupo. **32** Petere o ne a tsamaya mafelo a a farologanyeng go ba etela, o ne a etela le badumedi ba ba kwa motseng wa Lida. **33** Teng koo, a kopana le monna yo o neng a bidiwa Aenease, yo o neng a gateletswe ke bolwetse a bile a sa kgone go tsoga mo bolaong ka dingwaga di roba bobedi. **34** Mme Petere a mo raya a re, "Aenease! Jesu Keresete o go fodisitse! Tsoga o baakanye bolao jwa gago." Mme erile fela gone foo a fodisiwa. **35** Mme batho botlhe ba Lida le ba Sharona ba sokologela mo Moreneng fa ba bona Aenease a tsamaya. **36** Mo motseng wa Jopa go ne go na le mosadi a bidiwa Dorokase, (le fa e le Tshephe) modumedi yo o neng a tshela a direla ba bangwe bo-molemo, bogolo jang bathoki. **37** Ka nako eo o ne a lwala mme a swa. Ditsala tsa gagwe tsa mmaakanyetsa phitho mme tsa mo robatsa mo ntlwaneng e e kwa godimo. **38** Mme erile fa ba utlwa fa Petere a le gaufi mo Lida, ba roma banna ba le babedi go kopa go boela le bone kwa Jopa. **39** Mme o ne a dira jalo, erile fela fa a goroga, ba mo tseela kwa ntlwaneng ee kwa go-dimo kwa Dorokase o neng a beilwe teng. Ntlo e ne e tletse bathologadi ba ba lelang ba ba neng ba bontshana diaparao tse Dorokase o di ba diretseng. **40** Mme Petere a ba kopa gore botlhe ba tswela kwa ntle; jalo a khubama a rapela. Erile a retologela kwa setopong a re, "Tsoga Dorokase," mme a bula matlho! Ya re a bona Petere a tsoga! **41** A mo naya letsogo a mo thusa go tsoga mme a biletša badumedi botlhe le bathologadi mo teng, a ba mo neela! **42** Dikgang tsa anama le motse, mme ba le bantsi, ba dumela mo Moreneng. **43** Mme Petere a nna lobaka lo lolele mo Jopa, a nna le Simone, wa mosuga matlalo.

10 Mme mo Kaesarea go ne go nna mo eteledipele wa mophato wa ntwā ya Seroma gotwe Korenelio, e le molaodi wa mophato wa Itale. **2** E ne e le motho yo o ratang

Modimo, a bile a o tlotla thata, le ba ntlo ya gagwe ba ne ba ntse jalo. O ne a aba ka mowa o o gololesegileng a bile a le motho wa thapelo. **3** Tshokologo nngwe ya letsatsi ya re a santse a ntse, ka nako e ka nna ya boraro, a bona ponatshegelo, mme mo ponatshegolong e, a bona moengele wa Modimo a tla kwa go ene a re, "Korenelio". **4** Korenelio a re, "O batlang Morena!" Moengele a fetola a re, "Dithapelo tsa gago le dimpho tsa gago Modimo o di bonye. **5** Jaanong roma banna bangwe kwa Jopa go ya go batla mongwe yo o bidiwang Simone Petere, yo o nngang le Simone wa mosuga matlalo, go bapa le lotshitshi lwa lewatle, mme lo mo kope gore a lo etele." **7** Erile moengele a sena go tsamaya, Korenelio a bitsa batlhanka ba ntlo ya gagwe ba le babedi le mothabani yo o boifang Modimo, mongwe wa ba ba ikanyegang, **8** mme a ba bolelela se se diragetseng a bo a ba roma kwa Jopa. **9** Erile letsatsi le le latelang, fa ba atamela motse, Petere a thathogela kwa godimo ga ntlo ya gagwe go rapela. Go ne go le motshegare ebile o ne a tshwerwe ke tšala, mme erile dijo tsa motshegare di sa ntse di baakanngwa a bona ponatshegelo. **11** O ne a bona legodimo le bulega, mme a bona letsela le legole le lepeditswe ka dinaka tsa lone tse nne, le filha fa fatshe. **12** Mme mo letseleng go ne go le diphologolo tsa mefuta yotlhe, dinoga le dinonyane (tse di idiwang Bajuta go di ja). **13** Mme lentswe la mo raya la re, "Tsamaya o bolaye o je nngwe ya tsona e o e batlang." **14** Petere a fetola a re, "Nnyaa, Morena, ga ke ise nke ke je diphologolo tse di ntseeng jaana mo botshelong jwa me, gonne di a idiwa ka melao ya rona ya Sejuta." **15** Lentswe la bua gape, la re, "Se ganetsanye le Modimo! Fa o re selo se tshwanetse go jewa go raya gore se siame." **16** Mme ponatshegelo e ya direga gararo. Mme letsela la boela gape kwa legodimong. **17** Petere o ne a akabala thata gore ponatshegelo e ka ne e raya eng? O ne a tshwanetse go dirang? Mme jaana banna ba ba romilweng ke Korenelio ba ne ba bone ntlo e, mme ba bo ba eme kwa ntle fa kgorong, **18** ba botsa gore a ntlo e ke yone e Simone Petere o nngang mo go yone. **19** Mme erile Petere a sa ntse a hakgamaletse ponatshegelo, Mowa O O Boitshupo wa mo raya wa re, "Banna ba bararo ba tsile kwa go wena. **20** Fologela kwa tlase o kopane le bone mme o tsamaye nabo. Sengwe le sengwe se siame, ke ba romile." **21** Jalo Petere a fologa, mme a re, "Ke nna yo lo mmatlang. Jaanong ke eng se lo se batlang." **22** Mme jalo ba mmolelela kaga Korenelio molaodi wa Mo-Roma yo o siameng wa Modimo, yo o neng a itsege thata mo Bajuteng le jaaka moengele a ne a mo laetse go ya go bitsa Petere go tla go mmolelela se Modimo o batlang a se dira. **23** Mme Petere a ba amogela a bo a ba fa boroko sigong joo. Letsatsi le le tlang a tsamaya nabo, ba na le (badumedi) ba ba tswang Jopa. **24** Ba goroga mo Kaesarea letsatsi le le latelang, mme Korenelio o ne a ba letela a bile a biditse ba losika lwa gagwe le ditsala tsa gagwe tsa bothokwa go nna le Petere. **25** Erile fa Petere a tsena mo ga gagwe, Korenelio a wela fa fatshe fa pele ga gagwe a mo obamela. **26** Mme Petere a re, "Ema! Le nna ka nosi ke motho!" **27** Mme a ema ba buisanya ka sebakanyana ba bo ba ya kwa ba bangwe ba neng ba phuthegetse teng. **28** Mme Petere a ba raya a re, "Lo a itse gore go kgathanong, le melao ya Sejuta gore ke tsene mo lolwapeng lwa Modichaba. Mme

Modimo o mpontshitse mo ponatshegelong gore ke seka ka ba ka lebelo ope kwa tlase. 29 Mme ka tla fela jaaka ke bidiwa. Jaanong mpolelelang se lo se batlang.” 30 Mme Korenelio a fetola a re, “Malatsi a mane a a fetileng ke ne ke rapela jaaka gale ka nako e ya maitseboa, fa ka tshoganetso monna a ema fa pele ga me a apere seaparo se se galalelang! 31 Mme a nthaya a re, ‘Korenelio, thapelo tsa gago di utlwetse le dimpho tsa gago di lemogilwe ke Modimo! 32 Jaanong roma banna bangwe kwa Jopa go itsise Simone Petere, yo o nnang mo motseng wa ga Simone, wa mosuga matlalo, fa lotshitshing lwa lewatle.’ 33 Mme ke ne ka re o ye go bidiwa, mme o dirile sentle ka go tla ka bonako. Jaanong ke rona ba, re letile fa pele ga Morena, re batla go itse se o se go boleletseng go se re bolelela!” 34 Mme Petere a fetola a re, “Ke bona sentle gore Bajuta ga se bone fela ba Modimo o ba ratang! 35 Mo chabeng nngwe le nngwe o na le ba ba mo obamelang ba bile ba dira dilo tse di siameng mme mo go ene ba a amogelesega. 36 Ke tlhomamisa gore lo utlwile kaga Mafoko a a Molemo a batho ba Iseraele, gore go na le kagiso mo Modimong ka Jesu, Mesia, yo e leng Morena wa (lobopo) lotlhe. Molaetsa o, o aname le Judea yotlhe, o simolotswa ke Johane wa Mokolobetsi mo Galalea. 38 Mme ga go belaelese go itse gore Jesu wa Nasaretha o ne a tloidiwa ke Modimo ka Mowa o o Boitshepo le ka nonofo, mme o ne a tsamaya a dira molemo a bile a fodisa bothe ba ba neng ba na le mewa e e maswe, gone Modimo o ne o na nae. 39 “Mme rona baaposetoloi re basupi ba tsothe tse o di dirileng mo Iseraele yotlhe le mo Jerusalema kwa o neng a bolaelwa teng mo sefapaanong. 40 Mme Modimo o ne wa mo tshedisisa gape morago ga malatsi a mararo, mme wa mmontsha basupi bangwe ba Modimo o neng o sale o ba tlhophisa pele, e seng mongwe le mongwe, mme e leng rona ba re neng ree ja re ba ree nwa nae a sena go tsoga mo baswing. 42 Mme o ne a re roma go ya go rera Mafoko a a Molemo gongwe le gongwe le go supa gore Jesu o beilwe go nna Moatlhodi wa bothe, baswi le batshedi. 43 Mme le baporofiti bothe ba kwadile ka ga gagwe, ba re mongwe le mongwe yo o dumelang mo go ene o tlaa itshwarelwa dibe ka leina la gagwe.” 44 Mme erile Petere a sa ntse a bua dilo tse Mowa O O Boitshepo wa fologela mo go bothe ba ba neng ba reeditse! 45 Mme Bajuta ba ba neng ba tsile le Petere ba ne ba hakgamala gore neo ya Mowa O O Boitshepo e ka nwa le Badichaba! 46 Mme go ne go ka se ka ga nna le pelaelo, gone ba ba utlwile ba bua ka diteme ba bile ba galaetsa Modimo. Petere o ne a botsa a re, “A mongwe o ka gana gore ke ba kolobetsa, ka gore jaanong ba amogetse Mowa O O Boitshepo fela jaaka re ne ra o amogela?” 48 Mme o ne a dira jalo, a ba kolobetsa mo leineng la ga Jesu, Mesia. Morago Korenelio a mo kopa go nna le bone malatsinyana.

11 Ka bonako dikgang tsa fitlha kwa baaposetoloing le bakaulengwe ba bangwe kwa Judea gore Badichaba le bone ba amogetse Lefoko la Modimo. 2 Mme erile Petere a boela kwa Jerusalema, badumedi ba Bajuta ba ganetsanya nae. 3 Ba ne ba mmaya molato ba re, “O itsalantse le Badichaba ebile o jele nabo.” 4 Mme Petere a ba bolelela polelo yotlhe. 5 O ne a re, “Erile letsatsi lengwe mo Jopa ke sa ntse ke rapela,

ka bona ponatshegelo, letsela le legolo la fologela fa fatshe ka dinaka tsa lone tse nne le tswa legodimong. 6 Mo letseleng go ne go le mefuta yotlhe ya diphologolo, digagabi le dinonyane (tse re sa tshwanelang go di ja). 7 Mme ke ne ka utlwa lentswe le re, ‘Bolaya mme o je tse o di ratang.’ 8 Mme ke ne ka fetola ka re, ‘Nnyaa, Morena, gone ga ke ise ke ko ke je sepe se se idiwang ka melao ya rona ya Sejuta!’ 9 “Mme lentswe la tla gape la re, ‘Se re ga go a siama go jewa fa Modimo One o re go siame.’ 10 “Mo go ne ga diragala gararo pele ga letsela le tsothe tse di neng di le mo go lone di nyelelela kwa legodimong. 11 Mme banna ba bararo ba ba neng ba tsile go ntsaya go ya Kaesarea ba goroga kwa tlung e ke neng ke nna mo go yone! 12 Mme Mowa O O Boitshepo o ne wa nthaya wa re ke tsamaye le bone le gone ke seka ka tshwenyega ka Bodichaba jwa bone! Bakaulengwe ba barataro ba, ba tsamaya le nna, mme ka bofefo ra goroga kwa mo-tseng wa monna yo o neng a romile barongwa. 13 Mme a re bolelela ka fa moengele a neng a tla kwa go ene ka teng a mmolelela gore a rome barongwa kwa Jopa go batla Simone Petere. 14 Moengele a mmolelela gore, ‘monna yoo o tlaa go bolelela ka fa wena le ba ntlo ya gago lo ka bolokwang ka teng.’ 15 Mme ka simolola go ba bolelela Mafoko a a Molemo, mme e rile fela jaaka ke simolola thero ya me, Mowa O O Boitshepo wa fologela mo go bone, fela jaaka o ne wa fologela mo go rona pele! 16 “Mme ke ne ka gopola mafoko a Morena fa a ne a re, ‘Ee, Johane o ne a kolobetsa ka metsi, mme lona lo tlaa kolobediwa ka Mowa O O Boitshepo.’ 17 Mme ka e ne e le Modimo ka boone o o neileng Badichaba ba mpho e e tshwanang le ya rona fa re dumela mo go Morena Jesu Keresete, ke ne ke le mang yo ke ka ganetsang?” 18 Mme erile fa ba bangwe ba utlwa kaga se, dikganetso tsa bone tsothe di ne tsa arabiwa mme ba simolola go galaetsa Modimo; ba ne ba re, “Ee, Modimo o neetse le Badichaba tshwanelo ya gore ba sokologele kwa go one le gore ba bone botshelo jo bo sa khutleng!” 19 Mme badumedi ba ba neng ba siile mo Jerusalema ka nako ya pogiso morago ga loso lwa ga Setefane ba tsamaya ba bo ba ya go fitlha kwa Fenikia, le kwa Kupro le kwa Antioka, ba gasa Mafoko a a Molemo mo Bajuteng fela. 20 Le fa go ntse jalo, bangwe ba badumedi ba ba neng ba ya kwa Antioka ba tswa mo Kupro le mo Kurene le bone ba ile ba rerela Bagerika molaetsa wa bone kaga Morena Jesu. 21 Mme Morena o ne a rotloetsa maiteko a gore Badichaba ba le bantsi ba nne badumedi. 22 Mme erile phuthogo e e kwa Jerusalema e utlwa se se diragetseng, ba romela Barenabase kwa Antioka go thusa ba e leng gone ba sokologang. 23 Erile fa a goroga ebile a bona dikgakgamatso tse Modimo o neng o di dira, a tlaa kgakgamalo le boitumelo, mme a kgothatsa badumedi gore le fa go ka nna jang, ba nne mo Moreneng. 24 Barenabase e ne e le motho yo o bonolo a tletse Mowa O O Boitshepo a bile a nonofile mo tumelong. Mme ka nthaya ya gone mo, batho ba le bantsi ba ne ba oketsega mo Moreneng. 25 Mme Barenabase o ne a ya kwa Tareso go batla Saulo. 26 Erile a mmona a mmusetsa kwa Antioka; ka bobedi jwa bone ba nna koo ngwaga yotlhe, ba ruta badumedi ba basha. (Ke kwa Antioka kwa badumedi ba neng ba simolola go bidiwa “Bakeresete” teng.) 27 Ka nako e baporofiti bangwe ba ne ba

tswa Jerusalema ba ya Antioka, 28 mme mongwe wa bone yo o bidiwang Agabuse, o ne a ema ka tlhothelotso ya Mowa mo go nngwe ya dikopano a bolelela pele gore leuba le legolo le tlaa tla mo lefatsheng la Isaraele. (Mo go ne ga diragala ka nako ya puso ya ga Kalaudio). 29 Mme jalo badumedi ba ikaelela go romela thuso kwa Bakereseteng mo Judea, mongwe le mongwe a ntsha kafa a ka kgonang ka teng. 30 Mme ba ile ba dira, ba isa dimpho tsa bone kwa go Barenabase le Saulo gore ba di ise kwa bagolwaneng ba phuthego kwa Jerusalema.

12 Mme ka nako e o Kgosi Herode o ne a nna kgatlhanong le badumedi bangwe, 2 mme a bolaya moaposetoloi Jakobe (mogolola Johane). 3 Erile fa Herode a bona gore go itumedisa baeteledipele ba Bajuta jang, a tshwara Petere ka modiro wa Tlomaganyo, 4 mme a mo tsenya mo kgolegelong, a mmaya ka fa tlase ga tlhokomelo ya masole a le lesome le borataro. Maikaelelo a ga Herode e ne e le go isa Petere kwa Bajuteng gore a bolawe morago ga modiro wa Tlomaganyo. 5 Mme thapelo e e nonofileng e tswa mo phuthegong e ne ya tsena kwa Modimong gore Petere a babalesege ka nako tsothe fa a sa ntse a le mo kgolegelong. 6 Bosigo pele ga nako e o neng a tshwanetse go bolawa ka yone, o ne a robetse, a bofilwe thata ka keetane a le fa gare ga masole a le mabedi le ba bangwe ba eme ba tlhokometse fa pele ga kgoro ya kgolegelo, 7 fa ka tshoganetso go nna lesedi mo ntlwaneng ya kgolegelo mme moengele wa Morena a ema fa thoko ga ga Petere! Moengele a mo itaya fa lotlhakoreng go mo tsoa, a mo raya a re, "Tsoga ka bonako!" Mme dikeetane tsa wa mo mabogong a gagwe! 8 Mme moengele a mo raya a re, "Apara o rwale dihlhako tsa gago." Mme a dira jalo. Moengele a re, "Apara seaparo sa gago o ntshale morago!" 9 Mme Petere a tlogela ntlwana ya kgolegelo, a sala moengele morago. Mme ka nako yotlhe o ne a gopola gore ke toro kana ponatshegelo mme o ne a sa dumele gore tota go a direga. 10 Ba ne ba feta ntlwana ya kgolegelo ya bobedi, mme ba tla fa kgorong ya tshipi fa mmileng, mme ya ba bulegela ka bo yone! ba feta ba tsamaya bothle, mme moengele a mo tlogela. 11 Mme kwa morago Petere a lemoga se se diragetseng; O ne a ithaya a re, "Ke boammaaruri! Morena o romile moengele wa gagwe ebile o mphaloditse mo go Herode le mo go se Bajuta ba neng ba ikemiseditse go se dira ka nna!" 12 Morago ga a itharabologelwa a ya kwa lwapeng lwa ga Marea, mmaagwe Johane Mareko, kwa ba le bantsi ba neng ba kgobokanetse thapelo teng. 13 O ne a kokota fa setswalong, se se kwa ntle, mme mosetsana yo o bidiwang Roda a tla go bula. 14 Erile fa a lemoga lentswe la ga Petere, a itumela thata mo a neng a tabogela mo teng go bolelela mongwe le mongwe gore Petere o eme kwa ntle mo mmileng. 15 Ga ba a ka ba mo dumela. Ba ne ba re, "O a tsenwa," mme erile a tlhomamisa ba re, "E tshwanetse ya bo e le moengele wa gagwe. (Ba tshwanetse ba bo ba mmolale)." 16 Ka lobaka loo Petere ene o ne a tswelsetse a kokota. 17 A ya kwa go bone a ba didimatsa mme a ba bolelela se se diragetseng le ka fa Morena a mo ntshitseng mo kgolegelong ka teng. Erile a tsamaya are, "Bolelelang Jakobe le ba bangwe se se diragetseng." 18 Mme ya re fa bosigo boo sa, ga tsoga

pherethlego e kgolo kwa kgolegelong. Bathabani ba botsanya gore Petere o ile kae? 19 Erile fa Herode a romela gore a Petere a ye go bidiwa mme a utlwa gotwe ga a yo, a laola gore bathokomedi ba ba lesome le borataro ba tshwarwe, mme ba bolawe. Erile kwa morago a tsamaya go ya go nna kwa Kaesarea ka lobakanyana. 20 Erile a ntse a le mo Kaesarea, ga tla barongwa ba ba neng ba tswa Ture le Sidoma ba tsile go mmona. Ga a ka a itumelela batho ba metse e mebedi eo, mme barongwa ba itsalanya le Belaseto, mokwaledi wa bogosi, ba bo ba kopa kagiso, gonne mo kgwebong, metse ya bone e ne e ikaegile thata mo lefatsheng la ga Herode. 21 Go ne ga dirwa tumalano ya go buisanya le Herode, mme erile fa letsatsi leo le tla, a apara diaparo tsa gagwe tsa bogosi, a nna mo setilong sa gagwe mme a bua nabo. 22 Mme erile kwa bokhutlong batho ba duduetsa ba re, "Ke lentswe la Modimo e seng la motho!" 23 Ka bonako, moengele wa Morena a otlhaya Herode ka bolwetse mo e leng gore o ne a jewa ke diboko a ntse a tshela mme a swa ka gonne o ne a amogela kobamelo ya batho go na le gore a galaetse Modimo. 24 Mafoka a Modimo a a Molemo a ne a anama ka bofelo mme go ne ga nna badumedi ba basha ba le bantsi. 25 Mme Barenabase le Paulo ba ne ba etela Jerusalema, mme ya re ba sena go fetsa tiro ya bone, ba boela kwa Antioka, ba tsaya Johane Mareko.

13 Mo baporofiting le mo baruting ba phuthego kwa Antioka go ne go le Barenabase le Simeone (yo gape o neng a bidiwa "Monna Montsho"), le Lukio (wa Kurene), le Manaene (yo o otletsweng gongwe le Kgosi Herode), le Saulo. 2 Letsatsi lengwe banna ba, ba ntse ba rapela ba bile ba itimile dijo, Mowa O O Boitshepo wa re, "Ntomololelang Barenabase le Saulo go dira tiro e e tlhophegleng e ke e ba bileditseng." 3 Mme morago ga go itima dijo le go rapela, ba ba baya diatla, mme ba ba naya tsela. 4 Mme ya re ka go gogwa ke Mowa O O Boitshepo ba ya kwa Seleukia ba bo ba ya kwa Kuperu. 5 Mme mo motseng wa Salamise, ba ne ba ya kwa tlung ya thuto ya Sejuta ba rera. (Johane Mareko o ne a tsamaya le bone e le mothusi wa bone). 6 Morago ba rera mo motseng mongwe le mongwe go kgabaganya setlhakethake sotlhe go fitlhelela ba tsena mo Pafosa kwa ba neng ba kopana teng le moloi wa Mojuta, moporofiti wa tsetso yo o neng a bidiwa Barajesu. O ne a ikgolagantse le molaodi Seregio Paulo, yo e neng e le motho yo o tlhologanyang thata. Molaodi a laletsa Barenabase le Saulo go mo etela, gonne o ne a batla go utlwa molaetsa wa bone o o neng o tswa kwa Modimong. 8 Mme Elemase (leina la gagwe ka Segerika), wa moloi a leka go faposa le go tlhothelsetsa gore molaodi a seka a reetsa se Saulo le Barenabase ba neng ba se bua, a leka go mo dira gore a seka a ikanya Morena. 9 Mme Saulo ka a tletse Mowa O O Boitshepo, a leba moloi ka bogale mme a re, 10 "Morwa diabololo ke wena, o tletse mofuta mongwe le mongwe wa go tsietsa le bolotsana, mmaba wa sengwe le sengwe se se siameng, a ga o kitla o khutlisa go ganetsa Morena? 11 Mme Modimo gompieno o beile seatla sa one sa kwatlhao mo go wena, mme o tlaa fofala ka lobakanyana." Ka bonako ga nna mowwane le lefifi mo go ene, mme a simolola go tsamaya a kopa mongwe gore a mo tshware ka letsogo a

mo goge. **12** Mme erile molaodi a bona se se diragetseng a dumela mme a hakgamaela nonofo ya molaetsa wa Modimo. **13** Mme Paulo le ba o neng a na nabo ba tlaga mo Pafosa ka sekepe ba ya Peregá, wa Pamfília. Mme Johane a ba ngwegela a boela Jerusalema. **14** Mme Barenabase le Paulo ba ne ba ya Antioka, motse o o neng o le mo kgaolong ya Pisidia. Ka letsatsi la Sabata ba ne ba tsena mo tlung ya thuto go tshwara tirelo-Modimo. **15** Mme morago ga go balwa mo go tswaelesengileng ga Dikwalo tsa ga Moshe le tsa Baporofiti, bagolwane ba ntlo ya thuto ba ba romelela molaetsa o: "Bakaulengwe, fa lo na le lefoko la tao mo go rona, tlang lo le buel!" **16** Mme Paulo a ema, a dumedisa mme a simolola a re, "Bana ba Iseraele, le bothe ba ba fano ba ba tlotlang Modimo, [mmang ke simolole se ke se buang ka go lo bolelela ditso di se kae]. **17** "Modimo wa chaba e, ya Iseraele o tlhophile bo raa-ronamogolwagolwane mme wa ba tlotla mo Egepeto ka go ba ntsha ka kgalalelo mo bothankeng jwa bone. **18** "Mme wa ba thokomela mo go tsamayeng ga bone mo sekakeng ka dingwaga di le masome mane. **19** Mme wa senya dichaba di supra mo Kanana, mme wa neela Iseraele lefatshela la bone e le boswa. Baatlhodi ba busitse ka lobaka lo e neng e ka nna dingwaga di le makgolo a mane le masome a mathano, mme ba ne ba salwa morago ke Samuele wa moporofiti. **21** "Mme batho ba kopa gore ba nne le kgosi, mme Modimo wa ba neela Saulo (morwa Kishe), monna wa lotso lwa ga Benjamine, yo o neng a busa ka dingwaga di le masome a mane. **22** "Mme le fa go ntse jalo, Modimo wa mo tlosa wa tlhoma Dafide go nna kgosi mo maemong a gagwe, monna yo Modimo o neng wa re ka ga gagwe, 'Dafide (morwa Jese) monna yo pelo yame e mo itumelelang thata, yo o tlaa dirang go rata ga me gotlhe.' **23** Go tswa mo losikeng lwa monna yo, Modimo o ne wa tlisetsa Iseraele Mmoloki, ebong Jesu, fela jaaka o solofeditse. **24** Mme pele ga a goroga, Johane wa Mokolobetsi o ne a rera bothokwa jwa gore mongwe le mongwe mo Iseraele a sokologe mo dibeng le go boela mo Modimong. **25** Mme erile fa Johane a fetsa tiro ya gagwe a botsa a re, 'A lo akanya gore ke Mesia? Nnyaa! Ene o e tla ka bonako, mme mo go ene ga ke sepe!' **26** "Bakaulengwe, lona bomorwa Aberahame, le lona lotlhe Badichaba ba lo tlotlang Modimo, poloko e ke ya rona rotlhe! **27** Bajuta mo Jerusalema le baeteledipele ba bone ba diragaditse seporofeso ka go bolaya Jesu, gonne ba ne ba sa mo lemoge, kgotsa ba sa itse gore ke ene yo baporofiti ba neng ba kwadile ka ga gagwe, le fa ba ne ba utlwa mafoko a baporofiti a balwa Sabata mongwe le mongwe. **28** Mme ba ne ba thoka mabaka a a utwalang go mmolaya, mme ba kopa Pilatwe gore a ba letle gore ba bolaye Jesu. **29** Mme erile ba sena go diragatsa seporofeso sotlhe ka ga loso lwa gagwe, o ne a pagololwa mo sefapanong mme a tsenngwa mo lebitleng. **30** "Mme Modimo wa mo tsosa gape! mo losong. **31** Mme o ne a bonwa gantsi mo malatsing a makhutshwane a a latelang ke banna ba ba neng ba na nae go tswa Galalea go ya Jerusalema, banna ba ba neng ba sa bolo go nna ba bolelela ka gale mo phatlalatseng. **32** "Mme jaanong Barenabase le nna re fano go lo tlisetsa Mafoko a a Molemo a, gore tsholofetso ya Modimo mo go borraetsho-mogolo e diragaditwe mo dinakong tsa rona, ka go tsosa Jesu mo losong gape. Se ke sone se

Pesalema ya bobedi e buang kaga sone fa e bua kaga Jesu e re, 'Gompieno ke go tlotile jaaka Morwaake.' **34** "Gonne Modimo o ne o solofeditse go mo rudisa gape, a se kitla a tlhola a a swa gape. Mo go kwadiilwe mo lokwalong lo lo reng, 'Ke tlaa lo direla dilo tse di hakgamatsang tse ke di solofeditseng Dafide.' **35** "Mo Pesalemeng e nngwe o thalositse thata a re, 'Modimo ga o kitla o letla gore yo o Boitshepo wa one a bole.' **36** Mo go ne go sa reye Dafide, gonne erile Dafide a sena go direla diokomana tsa gagwe ka fa go rateng ga Modimo, o ne a swa mme a fitlha, mme mmele wa gagwe wa bola. **37** [Nnyaa, go ne go raya yo mongwe], mongwe yo Modimo o mo rudisitse, yo mmele wa gagwe o iseng o ke o tshwarwe ke tshenyego ya loso. **38** "Bakaulengwe! Reetsang! Mo monneng yo ebong Jesu, go na le boitshwarelo jwa dibe tsa lona! **39** Mme mongwe le mongwe yo o mo ikanyang o golotswe mo melatong yotlhe le gone o siame, sengwe se molao wa Sejuta o neng o sa kake wa se dira. **40** Mme jaanong ithokomeleng! Se direng gore mafoko a baporofiti a reye lona. Gonne ba re, **41** 'Lebang mme lo nyelele, lona banyatsi ba boammaaruri, gonne ke dira sengwe mo lobakeng lwa lona, sengwe se lo se ka keng lwa se dumela fa lo utlwa se bolelwa.'" **42** Mme erile batho ba tswa mo tlung ya thuto ka letsatsi leo, ba kopa Paulo go boa a ya go bua le bone beke e e latelang. **43** Mme Bajuta ba le bantsi le Badichaba ba badumedi ba ba neng ba rapela kwa tlung ya thuto ba sala Paulo le Barenabase morago mo mmileng mme bone ba ba thotholetsa go amogela kutwelobothoko e Modimo o e ba nayang. **44** Beke e e latelang motse othe wa batla go tla go ba utlwa ba rera Lefoko la Modimo. **45** Mme erile fa Bajuta ba baeteledipele ba bona bantsi jwa batho ba tlala lefufa, mme ba hutsa ba bo ba ganetsa se Paulo o neng a se bua. **46** Mme Paulo le Barenabase ba ne ba bua ka bopelokgale ba re, "Go ne go thokega gore Mafoko a a Molemo a a tswang kwa Modimong a tshwanetse go neelwa lona Bajuta pele. Mme ka gobo lo a ganne, lwa ba lwa itshupa fa lo sa tshwanela botshelo jo bo sa khutleng, go siame re tlaa bo neela Badichaba. (aiōnios g166) **47** Gonne se ke se Morena o se laotseng fa a re, Ke lo dirile lesedi mo go badichaba, go ba goga mo khutlong tse di kgakala tsa lefatsho go ba tlisa mo polokong ya me." **48** Mme erile Badichaba ba utlwa se, ba itumela thata mme ba ipelela molaetsa wa ga Paulo; ba le bantsi ba ba neng ba batla botshelo jo bo sa khutleng, ba dumela. (aiōnios g166) **49** Mme molaetsa wa Modimo wa gasama mo kgaolong eo yotlhe. **50** Mme baeteledipele ba Sejuta ba feretlha badumedi ba basadi ba ba boifang Modimo ga mmogo le baeteledipele ba motse mme ba thotholetsa boidiidi jwa batho go nna kgatthanong le Paulo le Barenabase, mme ba ba kobela kwa ntle ga motse. **51** Mme ba ne ba ithothora lorole mo dinaong tsa bone go supa go nna kgatthanong le motse o, mme ba ya kwa motseng wa Ikonio. **52** Mme ba ba ba sokolotseng ba tlala boitumelo le Mowa O O Boitshepo.

14 Mme kwa Ikonio, Paulo le Barenabase ba ne ba tsamaya mmogo ba ya kwa tempeleng mme ba rera ka nonofo e kgole e Bajuta le Badichaba ba neng ba e dumela. **2** Mme Bajuta ba ba neng ba gana molaetsa wa Modimo ba feretlha Badichaba gore ba seka ba dumela Paulo le Barenabase, ba

bua ka dilo di le dintsi tse di maswe ka bone. 3 Mme le fa go ntse jalo, ba ne ba nna foo lobaka lo lo leele, ba rera ka bopelokgale, mme Morena a supa fa molaetsa wa bone o tswa kwa go ene ka go ba neela nonofo ya go dira dikgagamatso tse di kgolo. 4 Mme batho ba motse ba ne ba farologana ka maikutlo kaga banna ba. Bangwe ba ne ba dumalana le baeteledipele ba Sejuta mme ba bangwe ba dumalana le baaposetoloi. 5 Mme erile fa Paulo le Barenabase ba lemoga leano la go tlhohleletsa bontsi jwa Badichaba, Bajuta le baeteledipele ba Sejuta go ba tlhasela le go ba bolaya, ba ipoloka, ba ya kwa metseng ya Lukaonia, Lusetera, Derebe le mo tikologeng, 7 mme ba rera Mafoko a a Molemo teng koo. 8 Mme erile fa ba le kwa Lusetera, ba tla fa monneng yo o neng a golafetse dinao go tswa sebopele sa go mmaagwe, ebile a ise a ke a tsamaye. 9 O ne a reeditse fa Paulo a rera, mme Paulo a mo lemoga mme a bona gore o na le tumelo ya go fodisiwa. 10 Jalo Paulo a mmitsa a re, "Ema ka dinao!" Mme monna a tloa a ema ka dinao a simolola go tsamaya! 11 Mme erile boidiidi jo bo reeditse bo bona se Paulo a se dirileng, ba goa (ka puo ya bone) ba re, "Banna ba ke medimo mo setshwanong sa motho!" 12 Ba ne ba akanya gore Barenabase ene ke Modimo wa Segerika ebong Jupitere, mme Paulo, ka gonne e ne e le sebui se segolo, ke Merekuri. 13 Mme moperesiti wa Tempele ya Jupitere, e e agilweng ka kwa ntle ga motse, o ne a ba tlisetsa merwalo ya dithunya a bo a ba ntshetsa sethabelo sa dikgomo kwa kgorong ya motse fa pele ga boidiidi jwa batho. 14 Mme erile fa Paulo le Barenabase ba bona se se diragalang ba gagola diaparotse tsa bone ka kutlo bothoko mme ba ralala batho ba, ba goa ba re, 15 "Banna! Lo dirang? Re batho fela jaaka lona! Re tletse go lo neela Mafoko a a Molemo gore lo lalediwa go tlogela kobamelo ya dilo tsa bomatla mme mo boemong jwa moo go rapela Modimo o o tshelang one o o dirileng legodimo le lefatsho le lewatle le sengwe le sengwe se se mo go tsone. 16 Mo malatsing a a fetileng Modimo o ne wa letla dichaba go tsaya ditsela tsa tsone, 17 mme ga o ke o ne o tlhoka bosupi ja dilo tse di molemo tse o neng o di dira jaaka go lo nesetsa pula le dijalo tse di siameng le go lo fa dijo le boitumelo." 18 Mme le fa go ntse jalo, Paulo le Barenabase ba ne ba sa kgone go itsa batho go ba direla sethabelo! 19 Mme morago ga malatsinyana, Bajuta bangwe ba goroga ba tswa Antioka le Ikonio mme ba fetola boidiidi jwa batho gore bo nne babolai ba ba neng ba kgobotletsa Paulo ka matlapa ba mo gogela kwa ntle ga motse a bonala o ka re o sule. 20 Mme erile fa badumedi ba mo dikaganyetsa, a ema a tsena mo motseng! Letsatsi le le latelang a tsamaya le Barenabase ba ya Derebe. 21 Mme erile morago, ba sena go rera Mafoko a a Molemo teng koo, ba bo ba dira barutwa ba bantsi, ba boela gape kwa Lusetera, Ikonio le Antioka, 22 kwa ba neng ba thusa badumedi go tia mo loratong lwa Modimo le gore ba ratane. Ba ne ba ba kgothatsa go tsena mo Bogosing jwa Modimo ka dipogisego tse dintsi. 23 Mme Paulo le Barenabase le bone ba tlhopha bagolwane mo phuthegong nngwe le nngwe ba ba rapelela ka go itima dijo, ba ba isa mo thokomelong ya Morena yo ba mo ikantseng. 24 Mme ba ralala Pisidia go ya kwa Pamfilia, 25 ba rera gape mo Perega, mme ba tswela ba ya kwa Atalia. 26 Mme la

bofelo ba boela ka sekepe kwa Antioka, kwa loeto lwa bone lo simologileng teng, le kwa ba neng ba neela mo Modimong mo tirong e jaanong e weditsweng. 27 Erile fa ba goroga ba bitsa badumedi mme ba bolela loeto lwa bone, ba bolela ka fa Modimo o buletseng le Badichaba tumelo ka teng. 28 Mme ba ne ba nna le badumedi kwa Antioka sebaka se seleele.

15 Mme erile fa Paulo le Barenabase ba sa le kwa Antioka, banna bangwe ba tswa Judea ba goroga mme ba simolola go ruta badumedi gore fa ba sa ngaparele ngwao ya Sejuta ya bogologolo ya go rupisiwa ga ba ka ke ba bolokwa. 2 Paulo le Barenabase ba ganetsanya nabo, ba bo ba buisanya nabo ka nako e telele kaga selo se, mme la bofelo badumedi ba ba romela kwa Jerusalem, go ya go bua le baaposetoloi le bagolwane koo kaga selo se. 3 Mme morago ga phuthego yotlhe e ba ntsha mo motseng, ba ralala Foneshia le Samaria ba etela badumedi, ba ba bolelela mo go ileng ka itumedisa batho bothe, gore Badichaba le bone ba ne ba sokologa. 4 Fa ba goroga kwa Jerusalem, ba kopana le bagolwane ba phuthego, baaposetoloi bothe le bagolwane ba ne ba le teng mme Paulo le Barenabase ba bolela se Modimo o ntseng o se dira mo go boleleng Lefoko ga bone. 5 Mme banna bangwe ba e neng e le Bafarasai pele ga ba sokologa ba ema ka dinao ba bolela gore Badichaba bothe ba ba sokologileng ba tshwanetse go rupisiwa le gone go tlhokega gore ba sale ngwao le mekgwa ya Sejuta morago. 6 Mme jalo baaposetoloi le bagolwane ba phuthego ba ne ba ikemisetsa go bitsa phuthego ya go tla go buisanya kaga selo se. 7 Mme mo phuthegong, morago ga puisanyo e telele, Petere a ema mme a ba bolelela jaana: "Bakaulengwe, lotlhe lo itse gore Modimo ga o bolo go tlhopha bogologolo go rerela Badichaba Mafoko a a Molemo, gore le bone ba dumele. 8 Modimo o o itseng dipelo tsa batho, o thomamisitse gore o amogela Badichaba ka go ba neela Mowa O O Boitshepo, fela jaaka o re o neetse. 9 Ga o a dira pharologanyo fa gare ga bone le rona, gonne o tlhatswitse matshelo a bone ka tumelo, fela jaaka o tlhatswitse a rona. 10 Mme jaanong o la tlaa tshwaya Modimo phoso ka go rwsa Badichaba mokgwelelo o le e leng rona le borraetsho re sa kgonang go o rwala. 11 A ga lo dumele gore bothe ba bolokwa ka tsela e le nngwe, ka mpho e e neelwang fela kwa ntle ga theko ke Morena Jesu." 12 Ga go a ka ga tlhola go nna le kgang epe, mme mongwe le mongwe a reetsa fa Barenabase le Paulo ba bolela kaga dikgagamatso tse Modimo o di dirileng ka bone mo go Badichaba. 13 Mme erile ba sena go fetsa, Jakobete a ema a re, "Bakaulengwe, nthetsang. 14 Petere o lo boleletse ka nako e Modimo o etetseng Badichaba ka yone go ntsha mo go bone ba ba tlaa leretseng leina la one tlotlo. 15 Mme lobaka lo lwa go ipolela ga Badichaba lo dumalana le se baporofiti ba se buileng. Sekai ke se, reetsang temana e, e e tswang mo go moporofiti Amose: 16 Morena a re, 'Morago, ke tlaa tla ke tla go aga sesha ntlo ya ga Dafide e e senyegileng. 17 Gore Badichaba le bone, ba tle ba bone Morena, ebong bothe ba ba tshwailweng ka leina la me.' 18 Mme se ke se Morena o se buang, yo o senolang ditiro tsa gagwe tse di dirilweng mo tshimologong. (aiōn g165) 19 "Mme mogopolo wa me ke gore

re seka ra re Badichaba ba ba sokologang ba tshwanetse go obamela melao ya rona ya Sejuta, 20 fa e se gore re ba kwalele gore ba ikgaphe mo go jeng nama ya ditlhabelo tsa disetwa, mo boakeng jotlhe, le mo go jeng nama e e sa ntshiwang madi ya diphologolo tse di kgamilweng. 21 Gonne dilo tse tsotlhe ga go bolo go rerwa ka tsone mo matlung a thuto a Sejuta, mo metseng mengwe le mengwe ka Sabata mongwe le mongwe mo dikokomaneng tse dintsi.” 22 Mme baaposetoloi le bagolwane le phuthego yotlhe ba tlhophisa go romela barongwa kwa Antioka ba na le Paulo le Barenabase, go ya go bega kaga mogopolo o. Banna ba ba neng ba tlhophilwe e ne e le baeteledipele ba le babedi ba phuthego, Judase, (yo gape o neng a bidiwa Barabase) le Silase. 23 Lo ke lokwalo lo ba neng ba lo tsaya: “Lo tswa kwa baaposetoloing, bagolwane le bakaulengwe kwa Jerusalema. Go bakaulengwe ba Badichaba kwa Antioka, Siria le Silisia. Ditumediso! 24 “Re utlwa gore badumedi bangwe ba ba tswang kwano ba lo tlhakantse ditlhogo ba lo botsa kaga poloko ya lona, mme re ne re sa ba laela jalo. 25 Mme re bonye e le kakanyo e e siameng fa re sena go dumalana ka mogopolo o le mongwe gore re lo romelele baemedi ba babedi ba, ebong Barenabase le Paulo. 26 Banna ba, Judase le Silase, ba ba itatotseng matshelo a bone ka nthla ya Morena wa rona Jesu Keresete, ba tlaa bolela se re se dumalaneng kaga potso ya lona. 27 “Gonne go bonetse go siame mo Moweng O O Boitshepo le mo go rona gore re se beye morwalo o mogolo wa melao ya Sejuta mo go lona go na le gore re khutlise go ja dijo tse di neetsweng medimo ya disetwa le mo nameng e e sa ntshiwang madi a diphologolo tse di kgamilweng le mo boakeng. Fa lo dira se, go lekanye. Salang sentle.” 30 Mme barongwa ba bane ba ya kwa Antioka ka bonako, kwa ba neng ba bitsa teng phuthego ya Bakeresete mme ba ba neela lokwalo. 31 Mme go ne ga nna boitumelo jo bogolo mo phuthegong yotlhe letsatsi leo fa ba lo bala. 32 Mme Judase le Silase, ka bobedi e le dibui tse di abetsweng puo, ba rerela badumedi dithero tse di telele, ba ba nonotsha mo tumelong. 33 Ba ne ba nna malatsi, a mantsi, mme Judase le Silase ba boela kwa Jerusalema ba isa ditumediso le boitumelo kwa go ba ba neng ba ba romile. 34 Mme Paulo le Barenabase ba ne ba nna kwa Antioka go thusa ba bangwe ba se kae ba ba neng ba rera ba bile ba ruta koo. 36 Mme morago ga malatsinyana, Paulo a raya Barenabase a re, “A re boele kwa morago, re etele bakaulengwe mo metseng yotlhe e re rerileng Lefoko la Morena mo go yone, mme re bone ka fa ba tswelletseng ka teng.” 37 Barenabase o ne a dumela, mme a rata gore ba tsamaye le Johane Mareko. 38 Mme Paulo ene o ne a sa batle mogopolo oo gothelele, gonne Johane o ne a ba ngwegetse kwa Pamfilia. 39 Mme kganetsanyo ya bone e ne ya nna e kgolo thata kaga selo se, mo ba neng ba kgaogana. Barenabase a tsamaya le Mareko ba ya Kupro, 40 fa Paulo ene a tlhophisa Silase, mme ka tshagofatso ya badumedi ba ya Siria le Silisia, go kgothatisa diphuthego koo.

16 Paulo le Silase ba simolola pele ba ya kwa Derebe ba bo ba ya kwa Lusetera kwa ba neng ba kopana le Timotheo teng, modumedi yo mmaagwe e neng e le Mokeresete wa Mojuta, mme rraagwe e le Mogerika. 2 Timotheo o ne a kaiwa fa a le motho yo o siameng mo Lusetera le mo Ikonio, 3 Jalo

Paulo a mo kopa go tsamaya nabo mo loetong lwa bone. Ka nthla ya Bajuta ba Kgaolo eo, o ne a rupisa Timotheo pele ga ba tsamaya, gonne mongwe le mongwe o ne a itse gore rraagwe e ne e le Mogerika. (Mme o ne a ise a ke a letlelele selo seo pele). 4 Mme ba tsena motse le motse, ba itsise mogopolo o kaga Badichaba, jaaka go ne go laotse baaposetoloi le bagolwane kwa Jerusalema. 5 Mme phuthego ya gola letsatsi le letsatsi mo tumelong le mo palong. 6 Mme morago ga moo ba ralala Feregia le Galatia, gonne Mowa O O Boitshepo o ne o ba boleletse gore ba seka ba tsena mo Asia. 7 Mme erile ba tsamaya mo molelwane wa Misia ba leba kwa borwa kwa kgaolong ya Bithinia, mme gape Mowa wa ga Jesu wa gana. 8 Mme mo boemong jwa moo ba tswelela ba tsena mo kgaolong ya Misia go ya kwa motseng wa Toroase. 9 Bosigo joo Paulo a bona ponatshegelo. Mo torong ya gagwe o ne a bona kwa Masedonia, Mogerika, a mo rapela a re, “Tla kwano o re thuse.” 10 Jalo mo ga siamisa kgang. Mme ba re, re tlaa ya kwa Masedonia, gonne re lemoga gore Modimo o re roma go ya go rera Mafoko a a Molemo teng. 11 Mme re ne ra palama mokoro kwa Toroase, ra tlhamalala ra kgabaganyetsa kwa Samatharase, mme letsatsi le le latelang ra ya Neapolise. 12 Mme la bofelo ra tsena mo Filipi, motse mogolo wa Ba-Roma fela mo teng ga molelwane wa Masedonia, ra nna teng malatsinyana. 13 Ka letsatsi la Sabata, ra tsamaela kgakajana kwa ntle ga motse fa lotshitshing lwa noka kwa re neng re utlwaletse fa bangwe ba rakanela teng go rapela; mme re ne ra ruta basadi bangwe dikwalo ba ba neng ba tla. 14 Mongwe wa bone e ne e le Lidia, mosadi wa morekisi go tswa kwa Thiatira, mmapatsi wa letsela le le bohobidu jo bo mokgona. E ne e ntse e le morapedi wa Modimo gale, mme ya re a re reeditse, Morena a bula pelo ya gagwe mme a amogela gotlhe mo Paulo o neng a go bua. 15 O ne a kolobediwa le botlhe ba ntlo ya gagwe a bo a re kopa go nna baeng ba gagwe. O ne a re, “Fa lo dumela gore ke a ikanyega mo Moreneng, tlang lo nne kwa tlong ya me.” Mme o ne a re kopa go fithela re dumela. 16 Letsatsi le lengwe fa re ya kwa felong ga thapelo fa thoko ga noka, ra kopana le mosetsana mongwe yo o neng a na le mewa e e maswe yo o neng a bolela dilo tsa boitseanape, a direla beng ba gagwe madi a mantsi. 17 O ne a re sala morago a goa a re, “Banna ba ke batlhanka ba Modimo mme ba tsile go lo bolelela gore dibete tsa lona di ka itshwarelwa jang.” 18 Mme mo go ne ga tswelela ka malatsi a le mantsi go fithela Paulo, ka go tshwenyega thata, a bo a tla a bua le mowa o o maswe o o mo go ene a re, “Ke a go laola ka leina la ga Jesu Keresete go tswa mo go ene,” ka bonakonyana wa mo tlogela. 19 Mme ditsholofetso tsa beng ba gagwe tsa khumo tsa fela; ba tshwara Paulo le Silase ba ba gogela fa pele ga baatlhodi kwa borekisetso. 20 Mme ba ne ba re, “Bajuta ba, ba senya motse wa rona, ba ruta batho go dira dilo tse di kgatlhanong le melao ya Se-Roma.” 22 Mme ka bonako batho ba nna kgatlhanong le Paulo le Silase, mme baatlhodi ba laola gore ba apolwe diaparao ba kgwathisiwe. 23 Ba ne ba itewa thata mo mekwatleng mme morago ba tsenngwa mo kgolegolong. Motlhokomedi wa kgolegelo o ne a solofediwa loso fa a ka ba lesa, 24 mme jalo ga a ka a tshameka fa a sena go laiwa, o ne a ba tsenya mo ntlwaneng e e kwa teng mme a

bofelela maoto a bone mo disaneng. **25** Ka nako ya bosigogare, fa Paulo le Silase ba ntse ba rapela ba bile ba opelela Morena difela, magolegwa a mangwe a ne a reeditse, **26** ka tshoganetso ga nna thoromo e kgolo ya lefatshe; kgolegelo ya tshikinyega go ya go fitlha kwa motheong, ditswalo tsothe tsa kgolegelo tsa bulega, mme dikeetane tsothe tse di neng di bofile magolegwa tsa bofologa. **27** Mme erile fa motlhokomedi wa kgolegelo a tsoga a bona dikgoro tsa kgolegelo di bulegile, a gopola gore magolegwa a siile, mme a ntsha chaka ya gagwe a re o a ipolaya. **28** Mme Paulo a goa a re, "Se ipolaye re teng rotlhe!" **29** Ka go tshoga thata, motlhokomedi wa magolegwa a laola gore dipone o tle mme a tabogela kwa ntlwaneng e e kwa teng a feta a wela fa pele ga ga Paulo le Silase. **30** O ne a ba ntshetsa kwa ntle mme a ba kopa a re, "Barena, ke ka dirang gore ke bolokwe?" **31** Ba mohetola ba re, dumela mo go Morena Jesu mme o tlaa bolokwa, wena le bantlo ya gago. **32** Mme ba ne ba mmolelela le botlhe ba ntlo ya gagwe mafoko a a molemo a a tswang kwa Moreneng. **33** Ka yone nako eo a ba tlhatswa dintho mme ene le ba lwapa lwa gagwe ba kolobediwa. **34** Mme a ba isa kwa tlung ya gagwe a ba fa dijo. Ene le bantlo ya gagwe ba ne ba ipela thata ka neng botlhe jaanong e ne e le badumedi! **35** Moso o o latelang baathodi ba romela mapodisi go bolelela motlhokomedi wa kgolegelo jaana, "Tlogela banna bao ba tsamaye!" **36** Mme motlhokomedi o ne a bolelela Paulo gore ba golotswe. **37** Mme Paulo a fetola a re, "Nyaa, ga ba ka ke! Ba re iteife fa pele ga batho kwa ntle ga go sekisiwa, ba bo ba re tsenya mo kgolegolong le gone re baagi ba Roma! Jaanong ba batla gore re tsamaye ka sephiri? Ga go nne jalo! A go tie bone ba tie go re golola!" **38** Mme barongwa ba mapodisi ba ya go bolelela baathodi ba ba neng ba boifa thata fa ba utlwa gore Paulo le Silase ke Ba-Roma. **39** Mme jalo ba tla fa kgolegolong ba ba kopa gore ba tsamaye, ba ba ntshetsa kwa ntle ba kopa gore ba tswe mo motseng. **40** Mme Paulo le Silase ba boela kwa tlung ya ga Lidia kwa ba neng ba kopana le badumedi mme ba ba rerela gape pele ga ba tswa mo motseng.

17 Mme ba ralala metse ya Amfipolisa le Apolonia mme ba tla mo Thesalonika, kwa go neng go na le ntlo ya thuto ya Sejuta teng. **2** Jaaka e ne e le tlwaelo ya ga Paulo, a tsena mo teng a rera, mme ya re ka go latelana ga bo Sabata ba le bararo a bulela batho dikwalo, **3** a thalosetsa batho diporofeso ka pogo ya ga Mesia le ka tsogo ya gagwe mo baswing, a ba a tlhomamisa gore Jesu ke Mesia. **4** Bangwe ba ba neng ba reeditse ba ne ba kgonwa ke molaetsa wa Lefoko mme ba sokologa ba inaakanya le Paulo le Silase mmogo le badumedi ba Bagerika ba banna ba le bantsi, le basadi ba motse ba ba tlotlegang ba le bantsi. **5** Mme baeteledipele ba Bajuta ba ne ba fufega mme ba tlhotlheletsa batho ba ba senang molemo (dimatta) mo motseng go dira lesomo la go simolola mokubukubu. Ba ne ba thasela bonno jwa ga Jasone, ba loga leano la go isa Paulo le Silase kwa tlung ya tshoko go othaiwa. **6** Erile ba sa ba fitlehele koo, ba gogela Jasone kwa ntle le badumedi bangwe, mme ba ba tiisa fa pele ga lekgotla. Ba goa ba re, "Paulo le Silase ba fetotse lefatshe lotlhe, jaanong ba fano ba dubaka motse wa rona, **7** mme Jasone o ba letleletse go

tsena mo tlung ya gagwe. Botlhe ba molato wa go tsogologela puso, gonne ba bolela fa go na le kgosi nngwe, e go tweng Jesu mo boemong jwa ga Kaesarea." **8** Mme batho ba motse, le baathodi, ba ne ba tshwenyega thata ka mafoko a, mme ba ba lesa ba tsamaya fela ba sena go ba duedisa madi a go sekela kwa ntle. **10** Mme bosigo joo Bakeresete ba akofa ba tshabisetsa Paulo le Silase kwa Berea, mme jaaka gale, ba ya kwa tlung ya thuto go ya go rera. **11** Mme batho ba Berea ba ne ba tlhaloganya go na le ba ba kwa Thesalonika, ba ne ba reetsa molaetsa ka boitumelo. Ba ne ba batlisa mo dikwalong letsatsi le letsatsi go bona gore a se se builweng ke Paulo le Silase ke Boammaaruri. **12** Lwa bofelo bangwe ba bone ba le bantsi ba ne ba dumela, mmogo le basadi ba ba tlotlegang ba Bagerika le banna ba le bantsi le bone ba dumela. **13** Mme erile fa Bajuta mo Thesalonika ba utlwa gore Paulo o ne a rera kwa Berea, ba ya teng go ya go tsosa mokubukubu. **14** Ka bonako badumedi ba tshabisetsa Paulo kwa lewatlang, fa Silase le Timotheo bone ba sala. **15** Ba ba neng ba patile Paulo ba ne ba tsamaya nae go ya kwa Athena, mme ba boela kwa Berea ka molaetsa o o yang kwa go Silase le Timotheo gore ba ithaganelele go kopana nae. **16** Mme erile fa Paulo a sa ntse a ba letetse mo Athena, a tshwenyega thata ka go bona medimo ya disetwa gongwe le gongwe mo motseng. **17** O ne a ya kwa tempeleng go ya go buisanya le Bajuta le Badichaba ba ba neng ba kgatlhegela go obamela Modimo, mme a bua letsatsi le letsatsi mo pateleng le botlhe ba ba neng ba le foo. **18** Mme ba kopana le bathalefi bangwe ba Bapikuria le Basetoika. Erile fa a ba bolelela kaga Jesu le kaga tsogo ya gagwe ba re, "Ke molori," kgotsa, "O leka go dirisa tumelo ya seeng." **19** Mme ba ne ba mo laletsa kwa pateleng ya Thaba ya Marase ba re, "Tla o re bolelele thata ka ga tumelo e ncha e, **20** gonne o bua dilo tse di hakgamatsang mme re batla go utlwa mo gogolo." **21** (Ke tshwanetse go tlhalosa gore Baathena mmogo le baeng ba ba mo Athena ba ne ba lebeba ba senya nako ya bone yotlhe ba buisanya ka ga megopolo e mesha!) **22** Mme Paulo erile fa a ema fa pele ga bone kwa Areapago a ba raya a re, "Batho ba Athena ke lemoga fa lo le badumedi, **23** gonne erile ke ntse ke tsamaya ke ne ka bona dibeso di di dintsi tsa lona, mme nngwe ya tsone e ne e kwadilwe go twe. 'Go Modimo o o sa itseweng.' Lo ntse lo o obamela lo sa itse gore ke mang, mme gompieno ke batla go lo bolelela ka ga one. **24** "O dirile lefatshe le sengwe le sengwe se se mo go lone, mme jaaka e le Morena wa legodimo le lefatshe, ga o nne mo ditempeleng tse di dirilweng ke batho. **25** Le gone diatla tsa batho ga di ka ke tsa direla ditlhoko tsa one se o se tlhokang, ga o tloke sepe! One ka bo one o naya botshelo ebile o tshedisa sengwe le sengwe gape o diragatsa sengwe le sengwe se se tlhokegang. **26** O bopile batho botlhe ba lefatshe go tswa mo mothong a le mongwe Adamo, mme wa phatlalatsa dichaba mo lefatsheng. O itsile pele gore ke dife tse di tshwanetseng go tsholetsega le go wa, le gore leng. O emisitse melelwane ya tsone. **27** "Maikaelelo a one mo go tse tsothe ke gore batho ba tshwanetse go batla Modimo, le gore motlhaope ba bone tsela e e yang kwa go one ba o bone, ntswa o se kgakala le ope wa rona. **28** Gonne mo go one re a tshela ebile re a tsamaya! re bile re teng ka one! Jaaka

mongwe wa bakwadi ba lona ba maboko a boletse a re, 'Re bana ba Modimo!' 29 Fa se e le boammaaruri, ga re a tshwanela go gopola Modimo jaaka modimo o o dirilweng ka gauta kana selefera kgotsa o betlilwe ka lentswe. 30 Mme Modimo o ne wa itshokela bothoka-kitso jwa motho mo lobakeng lo lo fetileng kaga dilo tse, mme jaanong o laola mongwe le mongwe gore a latlhe medimo ya gagwe mme a obamele one fela. 31 Gonne o tlhophile letsatsi la go sekisa lefatshe ka tshiamo ka monna yo o mo losong." 32 Erile fa ba utlwa Paulo a bua kaga tsogo ya motho yo o neng a sule, bangwe ba tshega, mme ba bangwe ba re, "Re batla gore re tle re utlwe gape kaga gone." 33 Mme moo ga fetsa puisanyo ya bone le Paulo, 34 mme bangwe ba se kae ba ikopanya nae ba nna badumedi. Mongwe mo go bone e ne e le Dionisio wa lekgotla la motse le mosadi mongwe yo o neng a bidiwa Damarise, le ba bangwe.

18 Morago ga mo Paulo a tswa mo Athena a ya kwa Korintha. 2 Mme koo a feta a tlhaelana le Mojuta yo o bidiwang Akwila, yo o tsaletsweng kwa Ponto, yo o neng a sa tswa go goroga a tswa kwa Itale le mosadi wa gagwe Peresila. Ba ne ba kobilwe mo Itale ka nthla ya taolo ya ga Kalaudio Kaesarea ya gore Bajuta bothle ba lelekwé mo Roma, Paulo o ne a nna nabo a ba a dira le bone, gonne e ne e le badiri ba megope (ditante) fela jaaka ene. 4 Sabata mongwe le mongwe Paulo o ne a fetolana le batho mo tlung ya thuto, a leka go thaloesetsa Bajuta le Bagerika. 5 Mme erile Silase le Timotheo ba sena go goroga ba tswa kwa Masedonia, Paulo a dirisa nako ya gagwe yotlhe a rera ebile a bolelela Bajuta gore Jesu ke Mesia. 6 Mme erile fa Bajuta ba mo ganetsa ba kgala se a se buang, ba tlhapatsa Jesu, Paulo a tlotlhora lorole mo seaparong sa gagwe a re, "A madi a lona a nne mo ditlhogong tsa lona, nna ga ke na molato, go tloga gompiano ke tlaa rerela Badichaba." 7 Morago ga moo o ne a nna le Tito Jeseto, Modichaba yo o neng a obamela Modimo a nna gaufi le ntlo ya thuto. 8 Mme le fa go ntse jalo, Kerisepo, moeteledipele wa senagoge, le bothle ba ntlo ya gagwe ba ne ba dumela mo Moreneng mme ba kolobediwa le Bakorintha ba le bantsi ba ba mo utlwileng ba dumela ba bo ba kolobediwa. 9 Bosigo bongwe Morena o ne a bua le Paulo ka ponatshagelo a re, "O seka wa boifa! Bua! Se didimale! 10 Gonne ke na le wena mme ga go na ope yo o ka go utlwisang bothoko. Batho ba le bantsi mo motseng o ke ba me." 11 Mme Paulo a nna moo ngwaga e e lateleng le sephatlo, a ruta boammaaruri jwa Modimo. 12 Mme erile Galeo a nna molaodi wa Akai, Bajuta ba tsogologela Paulo mme ba mo isa fa pele ga molaodi gore a sekisiwe. 13 Ba ne ba re, "Paulo o molato wa go raya batho a re ba obamele Modimo ka mekgwa e e leng gore e kgatlhanong le molao wa Ba-Roma." 14 Mme erile fela jaaka Paulo a simolola go ikarabela, Galeo a retologela kwa go ba ba pegang Paulo molato a re, "Reetsang, lona Bajuta ke lona, fa mo e ka bo e ne e le molato wa borukhuthi, ke ne ke tlaa tlamega go lo reetsa, 15 mme e re ka e le dipotso fela tse di mabapi le mafoko a lo a ipopetseng, le melao ya lona ya Sejuta ya boeolele, lo tlaa nna lo ipona. Ga ke na kgatlhego mo kgannyeng eo ebile ga ke a me." 16 Hong a ba ntshetsa kwa ntle ga ntlo ya tshekelo. 17 Mme batho ba tshwara

Sosethenese, moeteledipele yo moshwa wa tempele, mme ba mo iteela kwa ntle ga ntlo ya tshekelo! Mme Galeo ene o ne a sena sepe. 18 Mme Paulo o ne a nna mo motseng malatsi a le mantsinyana morago ga moo a sadisa Bakeresete sentle, a bo a tshwara mokoro a leba kwa Siria a tsamaya le Peresila le Akwila. Mme kwa Kenkerea Paulo o ne a ipeola ka ngwao ya Sejuta, ka gonne o ne a ikanne. 19 Erile fa a goroga kwa boemelong jwa mekoro jwa Efeso, a ba tlogela mo mokorong a ya kwa tempeleng go buisanya le Bajuta. 20 Mme ba ne ba mo kopa go nna malatsi a se kae, mme a bona a sena nako epe e o ka e senyang nabo. 21 Mme a re, "Ke tshwanetse ka bo ke le kwa Jerusalem ka malatsi a boikhutso." Mme o ne a solofetsa go boela kwa Efeso fa Modimo o mo letla; mme jalo a tswelela le loeto gape. 22 Lefelo le le latelang le go neng ga engwa mo go lone e ne e le Kaesarea kwa o neng a etela phuthego [ya Jerusalem] go tswa foo a ya kwa Antioka. 23 Morago ga sebaka koo, a tsamaya mo Galatia le mo Feregia a etela badumedi bothle, a ba kgothatsa ebile a ba thusa go re ba gole mo Moreneng. 24 Mme ka nako eo Mojuta mongwe yo o neng a bidiwa Apolose, moruti le moreri wa Baebale yo o tumileng, e ne e le gone fela a gorogang mo Efeso a tswa kwa Alekesanderia mo Egepeto. 25 Erile fa a sa ntse a le mo Egepeto, mongwe o ne a mmoleletse ka ga Johane wa Mokolobetsi le se Johane o se buileng ka ga Jesu, mme moo e ne e le gone fela mo a go itseng. O ne a ise a ke a utlwe polelo yotlhe! 26 Jalo o ne a rera ka bopelokgale le ka bothlaga mo tlung ya thuto a re, "Mesia o e tla! Ipaakanyetseng go mo amogela!" Peresila le Akwila ba ne ba le teng mme ba mo utlwa, mme e ne e le thero e e nonofileng. Morago ga moo ba kopana nae mme ba mo thaloesetsa se se diragaletseng Jesu go tloga ka nako ya ga Johane, le gore mo gotlhe go raya eng! 27 Mme Apolose o ne a kile a akanya go ya Gerika, badumedi le bone ba mo kgothatsa go dira jalo. Ba ne ba kwalela bakaulengwe ba bone koo, ba ba raya ba re ba mo amogele. Mme erile fa a goroga kwa Gerika, a dirisiwa ke Modimo go nonotsha Phuthego, 28 gonne o ne a ganetsa Bajuta mo pepeneneng a supa ka dikwalo gore Jesu ka boammaaruri ke Mesia.

19 Mme erile Apolose a santse a le mo Kontha, Paulo a ralala ntheng ya godimo mme a goroga kwa Efeso, kwa o neng a fithela teng barutwa ba le bantsinyana. 2 One a ba botsa a re, "A lo ne lwa amogela Mowa O O Boitshepo fa lo dumela?" Mme ba fetola ba re, "Nyaa, ga re itse gore o rayang. Mowa O O Boitshepo ke eng?" 3 Mme Paulo a ba botsa a re, "Lo kolobeditse ka kolobetso e e ntseng jang?" Mme ba araba ba re, "Kolobetso ya ga Johane?" 4 Mme Paulo a ba bolelela gore kolobetso ya ga Johane e ne e le go supa keletso ya go sokologa mo sebeng go ya kwa Modimong le gore ba ba amogelang kolobetso ya gagwe ba tshwanetse go tswelela ba dumela mo go Jesu, yo Johane o neng a bolela gore o tlaa tla. 5 Erile fela jaaka ba utlwa a bua jaana, ba kolobediwa mo leineng la Morena Jesu. 6 Erile fa Paulo a ba baya diatla, Mowa O O Boitshepo wa fologela mo go bone, mme ba bua dipuo di sele ba bo ba porofesa. 7 E ne e ka nna banna ba le lesome le bobedi 8 Mme Paulo o ne a ya kwa tlung ya thuto a rera ka bopelokgale Sabata mongwe le mongwe mo dikgweding tse tharo, a bolela

se a se dumetseng di gore ke ka nthla yang fa a ne a dumela, ebile a tlhothleetsa ba le bantsi gore ba dumele mo go Jesu. 9 Mme bangwe ba ne ba gana molaetsa wa gagwe mme ba bua mo pepeneneng kgalthanong le Keresete, mme a tsamaya, a gana go ba rerela gape. Mme a tswa le badumedi, mme a simolola kopano e nngwe gape mo tlung ya ga Turano mme a rapela koo letsatsi le letsatsi. 10 Mo go ne ga tswela dingwaga di le pedi, mo e leng gore mongwe le mongwe mo kgaolong ya Asia ebong Bajuta le Bagerika, ba ne ba utlwa molaetsa wa Morena. 11 Mme Modimo wa naya Paulo nonofo ya go dira dikgakgamatso tse di sa tlwaeleseng, 12 mo e leng gore e ne e re fa diiphimolo (disakatuku) tsa gagwe kgotsa diaparo tsa gagwe di bewa mo balwetseng, ba fole, le mewa e e maswe e e neng e le mo go bone e tswa. 13 Mme sethlopha sengwe sa Bajuta ba ba neng ba tsena motse le motse ba ntsha mewa e e maswe, ba ne ba loga leano la go leka go dirisa leina la ga Jesu Keresete. Se ba neng ba se akantse e ne e le gore ba tlaa bua ba re, "Ke a go laola ka Jesu yo Paulo o mo rerang gore o tswela kwa ntle!" 14 Bo-morwa Sekefa moperesiti wa Mojuta, ba supa, ba ne ba dira jalo. 15 Mme erile ba lekeleetsa mo monneng yo o nang le mowa o o maswe wa fetola wa re, "Ke itse Jesu ebile ke itse Paulo, mme lona lo bo mang?" 16 Mme a tlolela bangwe ba bone ba le babedi a ba betsa mo ba neng ba siela kwa ntle ga ntlo ya gagwe ba sa ikatega ebile ba bolaisegile thata. 17 Polelo ya se se diragetseng ya anama ka bonako mo motseng othe wa Efeso, mo Bajuteng le mo Bagerikeng ka go tshwana, ga nna poifo e kgolo mo motseng, mme leina la Morena Jesu la tlotlwa thata. 18 Badumedi ba le bantsi ba ba neng ba dirisa maselamose ba ipolela ditshiamololo tsa bone ba tliša dikwalo tsa bone tsa boloi le melemo e ba e dirisang ba di tshuba ka molelo mo pepeneneng. (Mongwe a akanyetsa tlhwalhwa ya dikwalo tseo go ka nna dipula di le dikete tse di masome mathano). 20 Mo go ne go supa gore kgaolo yothle e ne e amilwe ke molaetsa wa Modimo go le kae. 21 Morago ga moo Paulo a utlwa a gogwa ke Mowa O O Boitshepo go ya kwa Gerika pele ga a boela Jerusalem. O ne a re, "Morago ga moo ke tshwanetse go ya kwa Roma!" 22 O ne a romela bathusi ba gagwe ba le babedi, Timotheo le Eraseto, gore ba tsamaele pele go ya Masedonia fa a sa ntse a setse lobakanyana mo Asia. 23 Mme ka nako eo, go ne ga nna pherethego e kgolo mo Efeso kaga Bakeresete. 24 E ne ya simologa ka Demeterio, mothudi wa tshipi tsa selefera yo o neng a hirile babetli ba le bantsi go dira ditempelana tsa selefera tsa ga Diana, modimo wa sesadi wa Segerika. 25 O ne a bitsa phuthego ya banna ba gagwe, le ba bangwe ba ba hirilweng mo ditirong tse di boletsweng, mme a ba bolelela jaana: "Borra, tiro e ke yone re amogelang ka yone. 26 Jaaka lo itse sentle mo go se lo se boyeng le se lo se utlwieng, monna yo, Paulo, o tlhothleditse batho ba le bantsintsi gore medimo e e itirelwang ga se medimo gothelele. Ka nthla ya moo, theko ya dilo tsa rona e ya kwa tlase! Mme mo ga go bonale fela mo Efeso, go mo tikologong yothle ya kgaolo! 27 Mme ruri, ga ke bue fela ka theko le thekiso mo seemong se, le kaga tathegelo ka fa re neng re ntse re boelwa ka teng, mme le gore go ka diragala gore tempele ya ga Diana modimo wa sesadi o mogolo e lathegelwe ke tlotlo,

mme Diana, modimo o montlentle o, o o sa obamelweng fela ke tikologong yothle ya Asia mme o obamelwa ke lefatsho lotle, o lebalwe!" 28 Erile fa ba utlwa jaana, ba galefa thata mme ba simolola go goa ba re, "Go mogolo Diana wa Baefesia!" 29 Bantsi jo bogolo jwa batho jwa simolola go phuthega mme ka bofefo motse wa tšala pherethego. Mongwe le mongwe a tabogela kwa kagong ya botshamekelo, ba swaswaila Gaio le Arisetareko, bapati ba ga Paulo go ya go sekisiwa. 30 Paulo o ne a batla go tsena, mme barutwa ba ne ba se ka ba mo letla. 31 Mme bangwe balaodi ba Baroma ba kgaolo e, ditsala tsa ga Paulo, le bone ba ne ba romela molaetsa kwa go ene, ba mo kopa gore a seka a ba a tšameka ka botshelo jwa gagwe ka go tsena mo tlung ya botshamekelo. 32 Mo teng, batho botlhe ba ne ba goa, ba tsositse modumo, mongwe a bua sele yo mongwe le ene a bua sele, sengwe le sengwe se ne se tlhakathakanye. Tota bantsi jwa bone bo ne bo sa itse gore bo tletse eng foo. 33 Mme Alekesandere o ne a lemogwa mo boidiiding ke Bajuta bangwe mme ba mo gogela fa pele. O ne a gwethla ka seatla gore go didimalwe mme a leka go bua. 34 Mme ya re fa boidiidi jwa batho bo lemoga gore ke Mojuta, ba simolola gape ba tsosa modumo sebaka sa oura tse pedi ba ntse ba re, "Go mogolo Diana wa Baefesia!" 35 Mme lwa bofelo molaodi o ne a kgona go ba didimatsa gore a kgone go bua. O ne a re, "Banna ba Efeso, mongwe le mongwe o itse gore Efeso ke motse mogolo wa tumelo ya ga Diana yo mogolo, yo setshwantsho sa gagwe se fologileng se tswa legodimong. 36 Mme e re ka se e le boammaaruri jo bo sa kakeng jwa ganediwa, ga lo a tshwanela go tshwenyega le fa go ka buiwa go tweng ebile lo seka lwa dira sepe ka mahega. 37 Ntswa lo tlisitse banna ba fano ba sa utswa sepe mo tempeleng ya ga Diana le gone ba sa mo nyenyefatsa ka gope. 38 Mme fa Demeterio le babetli ba gagwe ba na le molato nabo, ditsheko di tsenye mme baskisi ba ka seka tshoko e gone jaanong jaana. A ba tsamaye ka fa molaong. 39 Mme fa go na le dingongorego kaga dilo dingwe, di ka baakangwa sentle mo diphuthegong tsa lekgotla la motse; 40 gonne re mo dipatseng tsa go bidiwa ke mmuso wa Ba-Roma gore re bolele gore khuduego e ya gompiono e simologile jang, ka go sena mabaka ape a a e simolotšeng. Mme fa Baroma ba batla tlhaloso ga ke itse gore ke tlaa reng." 41 Hong a ba phatlalatsa ba tsamaya.

20 Mme erile mo gothe go fela, Paulo a laetsa gore barutwa ba ye go bidiwa, a ba rerela molaetsa wa go ba sadisa sentle, mme a ya Masedonia, 2 a tsamaya a rerela badumedi mo tseleng, mo metseng yothle e o neng a feta ka yone. 3 O ne a nna mo Gerika dikgwedi di le tharo mme o ne a ipakanyetsa go ya kwa Siria fa a lemoga leano la Bajuta la go mmolaya, jalo a ikaelela go ya kwa borwa jwa Masedonia pele. 4 Banna ba le bantsinyana ba ne ba tsamaya nae, ba ya kwa Asia; e ne e le bo Sopatere wa Barea, morwa Pirilia, Arisetareko le Sekundo wa Mothesalonia, Gaio wa Moderebe le Timotheo; le Tukiko le Terofimo, ba ba neng ba boela kwa magang a bone kwa Asia, 5 mme ba ne ba tsamaetse pele ebile ba ne ba re letetse kwa Teroase. 6 Erile fela fa modiro wa Tlomaganyo o fela, ra palama sekepe kwa Filipi, borwa jwa Gerika mme morago ga malatsi a mathano ra goroga mo Teroase, kwa re neng ra nna teng beke.

7 Mme ka Sontaga ra phuthega ra a ja selalelo, Paulo a rera. Mme ka a ne a tsamaya letsatsi le le latelang, o ne a bua go fithelela bosigogare! 8 Ntlwana e e kwa godimo e re neng re phuthaganetse mo go yone e ne e na le dipone di le dintsi tse di tshubilweng. 9 Mme erile Paulo a ntse a tswelotse a bua, lekau lengwe le le neng le bidiwa Eutiko, a nnetse fa fensetereng, a thulamela mme a wa a tswa kwa ntlwaneng ya boraro e e kwa godimo a swa. 10 Paulo o ne a tswela kwa ntle mme a mo tsaya ka diatla a re, "Se tshwenyegeng, o siame fela!" Mme ka boammaaruri o ne a siame! Mme ga nna boitumelo jwa kgakamalo jang mo bathong! Botlhe ba boela kwa ntlwaneng e e kwa godimo mme ba a ja selalelo sa Morena mmogo; Paulo a rera gape thero e telele go fithelela phakela fa a ba tlogela lwa bofelo! 13 Paulo o ne a tsamaya ka dinao go ya kwa Asoso, mme rona re ne ra tsamaela pele ka sekepe. 14 O ne a re fithela teng kwa Asoso mme ra tsena mo sekepeng rothe ra ya Mitilene; 15 mme ka letsatsi le le latelang ra feta Kioso; le le latelang ra tsena mo Samosa; mme morago ga letsatsi leo ra goroga mo Mileto. 16 Paulo o ne a feditse mogopolo gore ga a kake a ema mo Efeso ka nako e, gonne o ne a ithaganeletse go tsena kwa Jerusalema, gore fa go kgonega, a ye go kopanela modiro wa Pentekosete le bone. 17 Mme erile fa re goroga kwa Mileto, a romela molaetsa kwa bagolwaneng ba phuthago kwa Efeso a ba kopa gore ba ye go kopana nae kwa mokorong. 18 Mme erile ba goroga, a ba raya a re, "Lona banna ke lona lo itse gore go simologa ka letsatsi le ke gorogileng ka lone mo Asia go fithelela gompiano, 19 ke dirile tiro ya Morena ka boikokobetso, ee, le ka dikeledi, mme ke kopane le mathata a a boitshegang a maano a Bajuta a go mpolaya. 20 Mme ke ne ke sa etsaetsege go lo bolelela boammaaruri, mo bathong kgotsa mo magaeng a lona. 21 Ke ne ka nna le molaetsa o o tshwanang mo Bajuteng le mo go Badichaba ebong tlhokego ya gore ba sokologe mo sebeng ba ye kwa Modimong ka tumelo mo go Morena wa rona Jesu Keresete. 22 "Mme jaanong ke ya Jerusalema, ke gogelwa teng ke Mowa O O Boitshepo o ke se ka keng ka o ganetsa, ke sa itse se se nkemetseng kwa pele, 23 fa e se fela gore Mowa O O Boitshepo o mpoletse gore fa ke sena go tsena motse le motse kgolegelo le tshotlego di ntetsetse kwa pele. 24 Mme botshelo ga se sepe fa ke sa bo dirise go dira tiro e ke e neetsweng ke Morena Jesu, tiro ya go bolelela ba bangwe Mafoko a a Molemo kaga lorato le kutlwelo bothoko e kgolo ya Modimo. 25 Mme jaanong ke a itse gore ga go ope wa lona mo go ba ke ba rutileng kaga Bogosi yo o tlaa mponang gape. 26 Mmang ke bue phatlalatsa fela ke re ga go na madi a ga ope a a tlaa lopiwang mo tlhogong ya me, 27 gonne ga ke a ka ka boifa go lo bolelela molaetsa wa Modimo otlhe. 28 "Mme jaanong ithokomeleng! Tlhomamisang gore lo otle lo bo lo dise letsomane la Modimo, ebong phuthago, e e rekolotsweng ka madi a gagwe, gonne Mowa O O Boitshepo o lo thomile go nna baokamedi. 29 Ke itse sentle gore morago ga ke tsamaya, go tlaa tla mo go lona baruti ba ba maaka, jaaka diphiri tse di gagolakang, tse di sa rekegeleng letsomane. 30 Bangwe ba lona ba tlaa fetola boammaaruri gore ba salwe morago. 31 Ithokomeleng! Gakologelwang dingwaga tse tharo tse ke di ntseng le lona, tlhokomelo ya me mo go lona ka metlha yothle

le dikeledi tsa me tse dintsi ke lo lelela. 32 "Mme jaanong ke lo neela Modimo le mo tlhokomelong ya one le mo mafokong a one a a hakgamatsang a a kgonang go aga tumelo ya lona le go lo fa boswa jotlhe jwa ba ba itshenketsweng ke one. 33 "Ga ke ise ke be ke eletse madi kgotsa diaparo tse dintle, 34 lo itse gore diatla tse tsa me di diretse tse ke neng ke di tlhoka le go thusa ba ke neng ke na nabo. 35 Mme ke ne ka nna sekao sa nako tsotlhe mo go lona mo go thuseng bahumanegi; gonne ke ne ka gakologelwa mafoko a ga Morena Jesu a a reng; 'Go lesego go aba go na le go amogela.'" 36 Erile fa a sena go bua a khubama a rapela nabo, 37 mme ba lelela kwa godimo fa ba mo tlamparela ba mo tsamaisa sentle, 38 ba utlwa bothoko go feta ka gore o ne a re ga a kitla a tlhola a tla gape. Hong ba tsamaya nae go ya kwa sekepeng.

21 Mme erile re sena go kgaogana le ba golwane ba Efeso, ra thamalalela kwa Kosa, letsatsi le le latelang ra goroga mo Rodesa ra ba ra tswelera ra ya Patara. 2 Mme foo ra tshwara sekepe se se yang kwa Siria mo kgaolong ya Finikia. 3 Re ne ra bona sethake sa Kopero, mme ra se feta ka fa molemeng ra ema mo Ture, kwa Siria, kwa sekepe se neng sa ololelwa teng. 4 Mme re ne ra fologa mo sekepeng, ra bona badumedi, mme ra nna le bone selekanyo sa beke. Barutwa ba ba ne ba thagisa Paulo, Mowa O O Boitshepo o porofesa ka bone gore a seka a ya Jerusalema. 5 Mme erile bofelo ja beke fa re boela kwa mokorong, phuthago yotlhe mmogo le basadi le bana ba ya le rona kwa lotshitshing kwa re neng ra rapela ra bo ra ba sadisa sentle. 6 Mme rona ra palama sekepe bone ba boela gae. 7 Mme kwa re neng ra ema teng gape go tloga kwa Ture ke kwa Potolomaia kwa re neng ra dumedisa badumedi teng mme ra tlhola nabo le-tsatsi le le lengwe fela. 8 Hong ra tswelera ra ya Kaesarea ra nna kwa lwapeng lwa ga Filipino wa Moefangele, mongwe wa batiakone ba nthla ba ba supa. 9 O ne a na le bana ba basetsana ba le bane ba ba sa nyalwang ba ba neng ba na le mpho ya go porofesa. 10 Mme erile re santse re ntse malatsinyana, monna mongwe yo o neng a bidiwa Agabo, yo le ene o neng a na le mpho ya go porofesa, o ne a goroga a tswa Judea, 11 mme a re etela. O ne a tsaya moitlamo wa ga Paulo, a ipofa maoto le mabogo ka one mme a re, "Mowa O O Boitshepo ware, mme fela jalo mong wa moitlamo o, o tlaa bofiwa ke Bajuta kwa Jerusalema a bo a isiwa Roma!" 12 Mme erile re utlwa mo, rona rotlhe badumedi ba mo gae le bapati ba gagwe ba o tsamayang nabo, ra kopa Paulo gore a seka a ya Jerusalema. 13 Mme ene a re, "Lo lelelang? Lo mphatlola pelo! Gonne ke ipaakanyeditse gore ke se ka tshwarwa fela kwa Jerusalema, mme le gore ke swe ka nthla ya Morena Jesu." 14 Mme erile fa re bona gore ga a ka ke a rapelesega, ra ithoboga mme ra re, "A go rata ga Morena go diragadiwe." 15 Mme ya re morago ga moo ra phutha dilwana tsa rona ra ya kwa Jerusalema. 16 Barutwa bangwe kwa Kaesarea ba tsamaya le rona, mme fa re goroga re ne re le baeng kwa lwapeng lwa ga Monasone; mongwe wa badumedi ba pele, yo o tlhologileng a tswa Kuperu 17 mme le badumedi botho kwa Jerusalema ba re amogela ka boitumelo. 18 Letsatsi la bobedi Paulo o ne a re tsaya go ya go kopana le

Jakobe le bagolwane ba phuthego ya Jerusalema. **19** Mme morago ga re dumedisana, Paulo a bolela gape dilo tse dintsi tse Modimo o di diretseng Badichaba ka tirelo ya gagwe. **20** Ba ne ba galaletsa Modimo mme ba re, "O a itse, mokaulengwe yo o rategang, gore go dumetse Bajuta ba le dikete tse kae. Mme ba gatelela thata gore Bajuta ba badumedi ba tshwanetse go sala ngwao ya bone morago. **21** Bakeresete ba rona ba Sejuta mono Jerusalema ba setse ba boleletswe gore lo kgatthanong le melao ya ga Moshe, le ngwao ya rona ya Sejuta, le gore lo itsa bana ba bone go rupa. **22** Mme jaanong go ka dirwang? Gonne ba tlaa utlwa gore lo tsile. **23** "Rona re akanya jaana: Re na le banna ba le bane fano ba ba ipaakanyeditseng go ipeola le go ikana. **24** Tsamayang le bone kwa Tempeleng le lona lo fete lo ipeole, mme lo ba duelele go ipeola. Mme mongwe le mongwe o tlaa itse gore lo dumalana le Bakeresete ba Sehebera le gore lo lona lo obamela melao ya Sejuta mme lo akanya jaaka rona mo dilong tse. **25** Mme mo Bakereseteng ba Badichaba ga re ba laolele gore ba sale dingwao tse tsa Sejuta morago gothelele, fa e se tse re di ba kwaletseng kaga gore ba seka ba a ja dijo tse di thabetsweng medimo ya disetwa, ba seka ba a ja nama e e sa tshololwang madi ya diphologolo tse di kgamilweng, le gore ba seka ba dira boaka." **26** Mme jalo Paulo o ne a dumalana le kopo ya bone mme letsatsi le le latelang a tsamaya le banna a ya kwa Tempeleng, a dira gore maikano a gagwe a itsege ka go ntsha sethabelo morago ga malatsi a supa le ba bangwe. Malatsi a supa a ne a tloga a fela fa Bajuta bangwe ba ba tswang Asia ba mmona mo Tempeleng mme ba tsosa mokubukubu mo bathong kgatthanong nae. Ba ne ba mo tshwara, **28** ba goa ba re, "Banna ba Iseraele! Thusang! Monna yo ke ene yo o rerang kgatthanong le batho ba rona a ba raya a re ba tlole melao ya Sejuta. Ebile o bua kgatthanong le Tempele ebile a e leswafatsa ka go tsenya Badichaba mo teng." **29** (Gonne mo motseng letsatsi leo, ba ne ba mmoneye a na le Terofimo wa Modichaba yo o tlhologileng kwa Efeso, mme ba gopola gore o tsentswe ke Paulo mo Tempeleng.) **30** Baagi ba motse otlhe ba ne ba shakgadiwa thata ke melato e a e pegwang mme ga tsoga mokubukubu o mogolo. Paulo o ne a gogelwa kwa ntle ga Tempele, mme ga tswalwa mabati ka bonako a sena go tsena. **31** Erile fa ba ntse ba leka go mmolaya, lentsewa le tla mo molaoding wa mophato wa masole a Roma gore motse otlhe wa Jerusalema o feretlhegile. **32** Mme a akofa a laola masole a gagwe le baeteledipele gore ba tsene fa gare ga boidiidi. Erile fa baferethi ba bona mephato e tla, ba khutisa go betsa Paulo. **33** Mme molaodi wa mephato a tshwara Paulo mme a laola gore a bofiwe gabedi ka dikeetane. Mme a botsa boidiidi jwa batho gore ke mang le gore o dirileng. **34** Bangwe ba ne ba bua se, ba bangwe le bone ba bua se sele. Mme erile fa a sa tlhagananye se ba mo pegang molato ka sone, a laola gore Paulo a isiwhe kwa kagong ya dithabano. **35** Mme erile fa ba fitlha fa mapalamong ga nna pheretlhego e kgolo thata mo e leng gore masole a ne a tsholetsa Paulo a mmaya mo magetleng a bone go mmabalela, **36** mme boidiidi jwa batho jwa salela kwa morago bo goa bo re, "A a bolawe! A a bolawe!" **37** Mme erile fa Paulo a tloga a tsenngwa mo teng a raya molaodi a re, "A nka bua nao?" Molaodi a botsa ka

kgakgamalo a re, "A o itse Segerika? A ga o Moegepeto yo o neng a eteletse pele ditsulodi dingwaganyana tse di fetileng a bo a tsaya maloko a babolai a le dikete tse nne a ya nabo kwa sekakeng?" **39** Paulo o ne a fetola a re, "Nyaa, Nna ke Mojuta kwa Tareso mo Kilikia, motse o o seng mmotlana. Ke kopa tetelelo go bua le batho ba." **40** Mme molaodi o ne a dumela, jalo Paulo a ema mo mapalamong mme a gwethla batho ka seatla gore ba didimale; ka bofelo ga nna tidimalo mo bathong, mme a bua le bone ka Sehebera a re:

22 "Bagaetsho le borara ntheetsang fa ke bolela boiphemelo jwa me." **2** (Erile fa ba utlwa a bua Sehebera, ga nna tidimalo e kgolo). **3** A ba raya a re, "Ke Mojuta, yo o tsaletsweng kwa Tareso, motse o o mo Kilikia, mme ke ithutile fano mo Jerusalema mo go Gamaliele yo ke ithutleng mo go ene go sala morago sentle melao le dingwao tsa Sejuta. Ke ne ka thloafalela go tlotla Modimo mo go sengwe le sengwe se ke neng ke se dira, fela jaaka lo lekile go dira gompieno. **4** Mme ke ne ke bogisa Bakeresete, ke ba beletsa go swa, ke bofa banna le basadi ke ba tsenya mo kgolegolong. **5** Moperesiti yo mogolo kgotsa mongwe wa bagolwane o ka ntshupela. Gonne ke ne ka kopa tetelelo ya dikwalo tse di yang kwa baeteledipele ba Sejuta ba ba kwa Damaseko, tse di nang le ditaello go ntetla go bofa Bakeresete bangwe ba ke ba bonang go ba isa kwa Jerusalema gore ba othaiwe. **6** "Mme erile ke le mo tseleng, ke le gaufi le Damaseko, go le motshegere, ka tshoganetso lesedi le le galalelang thata le tswa legodimong la phatshima mo tikologong ya me. **7** Ke ne ka wela fa fatshe mme ka utlwa lentsewa le nthaya le re, 'Saulo, Saulo, o mpogisetsang?' **8** "Mme ke ne ka re, 'Ke mang yo o buang le nna Morena?' Mme a fetola a re 'Ke nna Jesu wa Nasaretha, yo o mmogisang!' **9** Banna ba ke neng ke na nabo ba ne ba bona lesedi mme ba ne ba sa tlhagananye se se neng se buiwa. **10** "Mme ke ne ka re, 'Ke direng Morena?' Mme Morena o ne a nthaya a re, 'Tsoga o tsene mo Damaseko, mme koo o tlaa bolelelwa se se go letetseng mo dingwageng tse di kwa pele.' **11** Ke ne ka fufadiwa ke lesedi le legolo, mme ka tshwanelwa ke go gogelwa mo Damaseko ke bapati ba me. **12** Mme koo ga bo go na le monna yo o bidiwang Ananiase, monna yo o neng a boifa Modimo ka fa molaong, a bile a bolelwa bo-molemo ke Bajuta botlhe ba Damaseko, **13** o ne a tla kwa go nna, mme ya re a eme fa thoko ga me a re, 'Mokaulengwe Paulo, fufologa!' Mme ka yone nako eo ka fufologa ka mmona! **14** "Mme a nthaya a re, 'Modimo wa borraa rona o go tlhophile go itse go rata ga One le go bona Mesia le go mo utlwa a bua. **15** Mme o tshwanetse go tsamaisa molaetsa wa gagwe gongwe le gongwe, o bolela se o se bonyeng le se o se utwileng. **16** Mme jaanong o diegelang? Tsamaya o ye go kolobediwa, o bo o tlhatswiwe mo dibeng tsa gago, o bitse leina la Morena.' **17** "Mme erile letsatsi lengwe ke sena go boela kwa Jerusalema, fa ke santse ke rapela mo Tempeleng, ka nna jaaka ekete ke a lora mme ka bona ponatshegelo ya Modimo o nthaya o re, 'Akofa! Tswa mo Jerusalema, gonne batho ba ba fano ga ba na go go dumela fa o ba neela molaetsa wa me.' **19** Mme ka re, 'Morena, ba itse sentle gore ke ne ka betsa ka bo ka tsenya

mo kgolegelong ba ba neng ba dumela mo go wena, mo tlung ya thuto nngwe le nngwe. 20 Le ka nako e mosupi wa gago Setefane o neng a bolawa ka yone, ke ne ke eme teng foo ke dumalana nabo, ke tshotse diaparotse ba neng ba di beetse fa thoko fa ba mmolaya.' 21 Mme Modimo o ne wa nthaya wa re, 'Tswa mo Jerusalema, gonne ke tlaa go roma kgakala kwa go Badichaba!'" 22 Mme boidiidi jwa batho bo ne jwa reetsa go fithelela Paulo a tla mo lefokong leo, mme ka lentswe le le lengwe ba goa ba re, "A motho yoo a tlosiwe! Mmolaeng! Ga a tshwanela go tshela!" 23 Ba ne ba goa ba latlhela diaparotse tsa bone kwa godimo ba kubuela lorole. 24 Mme molaodi o ne a mo tliša mo teng kaga kago ya bathabani mme a laola gore a itewe ka dithupa gore a tie a ipolele bosula jwa gagwe. O ne a batla go itse gore ke eng fa batho ba ne ba galefa thata! 25 Mme ya re ba bofa Paulo gore ba mmetse, Paulo a raya moeteledipele mongwe wa mophato a re, "A go siame ka molao gore o betse Mo-Roma a ise a bo a sekisiwe?" 26 Moeteledipele wa mophato a ya kwa go molaodi le ene a re, "O dirang? Monna yo ke Mo-Roma!" 27 Mme molaodi a ya kwa go Paulo a mmotsa a re, "A ko o mpolelele, a o Mo-Roma!" Mme Paulo a fetola a re, "Ee, ke Mo-Roma!" 28 Mme molaodi le ene a re, "Le nna ke Mo-Roma, le gone go ntopile tlhathwa e kgolo go nna Mo-Roma!" Mme Paulo ene a re, "Nna ke tsetswe ke le Mo-Roma!" 29 Masole a a neng a ipaakanyeditse go mo itaya, a nyelela ka bonako fa ba utlwa gore Paulo ke Mo-Roma, mme molaodi le ene o ne a tshoga ka gore o ne a laotse gore a bofiwe a bo a itewe. 30 Mme erile letsatsi le le latelang molaodi a golola Paulo mo dikeetaneng mme a laela baperesiti ba bagolo gore ba kopane le lekgotla la Sejuta. O ne a laola gore Paulo a tlišiwe fa pele ga bone go leka go bona gore molato ke eng.

23 Mme erile Paulo a tsepega mathlo mo go ba lekgotla, a ba raya a re, "Bagaetsho, ke ntse ke tshela fa pele ga Modimo ka pelo e e siameng!" 2 Ka bonako Ananiase Moperesiti yo mogolo a laola gore ba ba gaufi le Paulo ba mo itee mo molomong. 3 Mme Paulo a mo raya a re, "Modimo o tlaa go itaya, wena yo o leng lobota lo lo takilweng. O molaodi yo o ntseng jang yo o tiolang molao ka go laola gore ke itewe?" 4 Mme ba ba neng ba eme go bapa le Paulo ba mo raya ba re, "A ke yone tsela ya go bua le moperesiti yo mogolo wa Modimo". 5 Mme Paulo a fetola a re, "Ke ne ke sa itse gore a ke Moperesiti yo mogolo, bagaetsho, gonne Dikwalo tsa re, 'O seka wa ba wa bua bosula kaga ope wa balaodi ba gago.'" 6 Mme Paulo a akanya kaga sengwe! Bontlha bongwe jwa batho e ne e le Basadukai mme jo bongwe e le Bafarasai! Mme o ne a goa a re, "Bagaetsho, ke Mofarasai fela jaaka borraetsho mogologolwane mme ke sekisiwa fa gompieno ka gore ke dumela mo tsogong ya baswi!" 7 Mme mo go ne ga kgaoganya lekgotla ka bogare, Bafarasai ba nna kgatlhanong le Basadukai, 8 gonne Basadukai ba re ga go na tsogo ya baswi kgotsa baengele kgotsa le mowa wa bosenabokhutlo mo go rona, mme Bafarasai bone ba dumela mo go tse tsothle. 9 Jalo ga tsoga modumo o mogolo. Bangwe ba baeteledipele ba Bajuta ba tlola ba re Paulo o bua sentle. Ba ne ba goa ba re, "Rona ga re bone molato ope mo go ene, gongwe mowa kgotsa

moengele o buile le ene [gone mo tseleng ya Damaseko]." 10 Modumo o ne wa golea kwa pele, mme batho ba rutha Paulo mo ditlhakoreng tsoopedi ba mo gogela kwa le kwa. La bofelo molaodi, a laola gore masole a gagwe a mo tseye mo go bone ka dikgoka go mmusetsa mo kagong ya bathabani ka gore o ne a tshaba gore ba tloga ba mo gagolaka. 11 Mo bosigong joo Morena o ne a ema Paulo fa lotlhakoreng a mo raya a re, "Se tlhobaele, Paulo; fela jaaka o boletsetse batho ka ga me mo Jerusalema, o tshwanetse go dira fela jalo le mo Roma." 12 Tsatsi le le latelang Bajuta ba ka nna masome a mane kgotsa go feta ba ipopa ka maikano a go re ga ba kitla ba a ja le fa e le go nwa go fithelela ba bolaya Paulo! 14 Mme ba ya kwa baperesiting ba bagolo le bagolwane ba ya go ba bolelela se ba se dirileng. 15 Ba ne ba kopa jaana, "Re kopa gore molaodi wa masole a busetse Paulo mo lekgotleng, lo dire jaaka o ka re lo batla go mmotsa dipotso gape. Rona re tlaa mmolaya mo tseleng." 16 Mme setlogolo sa ga Paulo sa lemoga leano la bone le le bosula mme a ya kwa kagong ya bathabani a bolelela Paulo. 17 Mme Paulo a bitsa mongwe wa bagolwane a mo raya a re, "Tsay mosimane yo o mo ise kwa go molaodi. O na le sengwe sa bothokwa go se mmolelela." 18 Jalo mogolwane a dira jalo, a feta a thalosa a re, "Legolegwa Paulo, o mpiditse mme a kopa gore ke tlise mosimane yo kwano go wena go go bolelela sengwe." 19 Molaodi a tshwara mosimane ka seatla, a mo gogela kwa thoko a mmotsa a re, "Ke eng se o batlang go se mpolelela mosimane?" 20 Mme mosimane a mo raya a re, "Ka moso Bajuta ba tlaa tla go kopa gore o tlise Paulo mo lekgotleng gape, ba dira jaaka o ka re ba batla go tlhotlhomisa thata ka ga gagwe. 21 Mme o seka wa dira jalo! Go na le banna ba feta masome a mane ba ba iphitlhileng go bapa le tsela ba ipaakanyeditse go mo tlolela ba mmolaya. Ba ipopile ka maikano a gore ba seka ba ja kgotsa baa nwa go fithelela a a swa. Ba mo laletse teng koo, ba lebeletse gore o dumalane le kopo ya bone." 22 Mme molaodi o ne a thagisa mosimane a re, "O seka wa ba wa dira gore mongwe a itse gore o mpoleletse selo se." 23 Mme molaodi a bitsa bangwe ba bagolwane ba gagwe ba le babedi a ba raya a re, "Baakanyang bathabani ba le makgolo mabedi ba ye Kaesarea ka nako ya boroba bongwe bosigo! Tsayang banna ba dichaka ba le makgolo a mabedi le bapalami ba le masome a supa. Neelang Paulo pitse gore a palame mme lo mo ise kwa go kgosana Felise a babalesegile." 25 Mme a kwalela Felise lokwalo lo lo buang jaana: 26 "Go tswa kwa go Kalaudio Lusya, Lo ya kwa go Motlotlegi Kgosana Felise, Ditumediso! 27 "Monna yo o ne a gapilwe ke Bajuta mme ba ne ba batla go mmolaya mme ke romela masole gore ba mo falotsho, gonne ke ne ke utlwile fa e le Mo-Roma. 28 Mme ke ne ka mo isa kwa lekgotleng la bone go bona se a se dirileng. 29 Mme ka bofofo ka lemoga fa e le sengwe kaga ditumelo tsa bone tsa Sejuta, mme tota go sena sepe se se neng se supa gore o ka tsenngwa mo kgolegelong kgotsa a bolawa. 30 Mme erile ke bolelelwa ka leano la go mmolaya, ka tlelwa ke kakanyo ya go mo romela kwa go wena mme ke tlaa laela ba ba mmonyeng molato go tliša dikatholo tsa bone fa pele ga gago." 31 Mme erile bosigo joo, jaaka go laotswe masole a isa Paulo kwa Antipateri. 32 Mme ba boela kwa kagong ya

batlhabani moso o o latelang, ba mo tlogela le bapalami ba dipitse gore ba mo ise kwa Kaesarea. **33** Erile ba goroga kwa Kaesarea, ba neela Kgosana Paulo le lokwalo. **34** O ne a bala lokwalo mme a botsa Paulo gore o tswa kae. Paulo a araba a re, "Ke tswa Kilikia." **35** Kgosana ya mo raya ya re, "Ke tlaa utlwa kgang ya gago sentle fa ba ba go bonyeng molato ba tla," mme a laola gore Paulo a tshegediwe mo kgolegelong e e mo kagong ya Bogosi ya ga Kgosi Herode.

24 Erile morago ga malatsi a le matlhamo Ananiase Moperesiti yo Mogolo a goroga le bangwe bagolwane ba Bajuta le mmueledi Teretulo, go tla go bolela molato wa ga Paulo. **2** Mme erile Teretulo a bidiwa, a bolelela kgosana kaga molato wa ga Paulo jaana: "Motlotlegi, rona Bajuta o re neile kagiso le kutlwano ebile o ngotlile kgethololo thata mo go rona. **3** Mme ka se, re go leboga thata. **4** Mme gore ke se ka ka thola ke go lapisa, ntheetsa ka kopelo-namagadi fela ka bokhutshwane fa ke bua ditlhogo tsa tsheko ya rona kgatthanong le monna yo. **5** Gonne re mmonyeng gore ke motho yo o letshwenyo, monna yo ka nako tsothe o tlhotlheletsang Bajuta mo tikologong yotlhe ya lefatshe go tsogologela mmuso wa Roma. Ke Moeteledipele wa lekoko le le bidiwang Banasaretha. **6** Mme gape o ne a leka go senya Tempele fa re mo tshwara. Re ka bo re mo neile se tota se mo tshwanetseng, **7** mme Lisiase, molaodi wa mophato, o ne a tla go mo tsaya ka kgopholo mo go rona, **8** a batla gore a sekisiwe ka molao wa Roma. O ka nna wa utlwa boammaaruri jwa go mo tshwaa phoso ga rona ka go mo tlhotlhomisa." **9** Mme Bajuta ba bangwe bothe ba dumalana gore sengwe le sengwe se Teretulo o se buileng ke boammaaruri. **10** Mme jaanong e ne e le nako ya ga Paulo gore a bue. Kgosana ya mo gwetlha ka seatla gore a eme a bue. Paulo a simolola a re, "Ke a itse rra, gore ga o bolo go nna moathodi wa diitshoko tsa Sejuta fa ke bua boiphemelo jwa me, **11** o ka lemoga ka bonako gore ke malatsi a le lesome le bobedi ke sena go goroga kwa Jerusalema go tla go obama mo Tempeleng, **12** mme gape o tlaa lemoga gore ga ke ise ke tsose khuduego mo tlang ya thuto kgotsa mo mebileng ya motse; **13** mme banna ba tota ga ba ka ke ba supa dilo tse ba di ntshwaelang phoso. **14** "Mme selo sengwe fela se ke se dumelang ke gore ke dumela mo polokong, e ba e bitsang lekoko la tumelo ya bakgelogi, ke sala morago mokgwa oo wa go direla Modimo wa borraetshomogolo; ke dumela thata mo molaong wa Sejuta le sengwe le sengwe se se kwadilweng mo dibukeng tsa seporofete; **15** mme ke a dumela, fela jaaka banna ba, gore go tlaa nna le tso go ya basiami le baleofi. **16** Mme ka ntsha ya se, ke leka ka bojotlhe gore ka metlha yotlhe ke nne le pelo e e senang sekgopi fa pele ga Modimo le batho. **17** "Morago ga dingwaga tse dintsinzana tse di fetileng, ke ne ka boela kwa Jerusalema ka madi go thusa Bajuta, le go ntshetsa Modimo sethabelo. **18** Balatofatsi ba me ba ne ba mpona mo Tempeleng fa ke ntsha dimpho tsa me. Ke ne ke ipeotse tlhogo jaaka go batlwa ke melao ya bone mme go ne go se na bontsi bope fa go nna, le fa e le khuduego! Mme Bajuta bangwe ba ba neng ba tswa Asia ba ne ba le teng, **19** (ba ba neng ba tshwanetse ba ka bo ba le fano fa, fa e le gore ba na le sengwe kgatthanong le nna), **20** mme bona! Botsa banna ba gone fa gore ke ofe molato o lekgotla la bone le o

bonyeng mo go nna, **21** fa e se go bua selo se le sengwe fela se ke neng ke sa tshwanela go se bua fa ke re, "Ke fano fa pele ga lekgotla go iphemela ka ntsha ya go dumela gore baswi ba tlaa tsoga gape!" **22** Mme Felise, yo o neng a itse gore Bakeresete ba ne ba ise ba ke ba tsamaye ba tsosa khuduego, a bolelela Bajuta gore ba iketle ba emele go goroga ga ga Lusua molaodi wa mophato, mme ke gone o tlaa atholang kgang. **23** Mme a laola gore Paulo a tsenngwe mo kgolegelong, a bo a laela batlhokomedi gore ba mo tshware sentle le gore ba seka ba itsa ditsala dipe tsa gagwe go mo etela kgotsa go mo tlitsa dimpho go dira gore a nametsege fa a ntse a le mo kgolegelong. **24** Erile morago ga malatsi a se kae Felise a tla le Durusila, mosadi wa gagwe wa Mojuta. A romela gore Paulo a ye go bidiwa, ba reetsa jaaka a ba bolelela kaga tumelo mo go Keresete Jesu. **25** Mme erile a sa ntse a buisanya nabo kaga tshiamo le boikgape le katholo e e tlang, Felise a boifa thata. Mme a mo raya a re, "Tsamaya jaanong, mme fa ke na le nako e e siameng, ke tlaa go bitsa gape." **26** Mme gape o ne a gopola gore Paulo o tlaa mo reka ka madi, jalo, he, o ne a mmitisa kgapetsakgapetsa go buisanya nae. **27** Dingwaga tse pedi tsa fela ba ntse ba buisanya; mme Porokio Feseto a tsaya maemo a ga Felise. Mme ka gore Felise o ne a batla go itumedisa Bajuta, o ne a tlogela Paulo mo kgolegelong.

25 Erile morago ga malatsi a mararo Feseto a sena go goroga kwa Kaesarea go tsaya maemo a gagwe a masha, a ya Jerusalema, **2** kwa baperesiti ba bagolo le bangwe bagolwane ba Bajuta ba neng ba mo fitlhela teng ba bo ba mmolelela polelo ya bone ka ga Paulo. **3** Ba mo kopa go tiisa Paulo ka bonako kwa Jerusalema. (Leano la bone e ne e le go mo lalela mo tseleng ba mmolaya). **4** Mme Feseto a ba fetola a re, "E re ka Paulo a le kwa Kaesarea, le ene ka boene a ne a boela teng ka bofefo, **5** ba ba nang le thata mo puong e ba tshwanetse go boela le ene kwa tshokong." **6** Erile morago ga malatsi a robabobedi kgotsa a le some a boela kwa Kaesarea. Mme letsatsi le le latelang a rebola gore tshoko ya ga Paulo e tsene. **7** Mme erile fa Paulo a goroga mo kgotleng Bajuta ba ba tswang Jerusalema ba phuthega, ba mo pega melato e mentsi e ba neng ba sena bosupi mo go yone. **8** Mme Paulo a itatola melato ya bone a re, "Ga ke molato, ga ke ise ke ko ke ganetse melao ya Sejuta le fa e le go nyatsa Tempele ya Sejuta kgotsa go tsogologela mmuso wa Seroma." **9** Mme erile ka Feseto a batla go itumedisa Bajuta, a mmitso a re, "A o batla go ya Jerusalema go ya go sekisiwa ke nna?" **10** Mme Paulo a fetola a re, "Nnyaa! Ke batla go utlwa katholo ya me fa pele ga Kgosi e kgolo ka bo yone. O itse sentle gore ga ke molato. Fa ke dirile sengwe se se tshwanetseng loso, ga ke tshabe go swa! Mme fa ke se na molato, lefa e le wena kgotsa mongwe fela ga a na thata ya go nneela banna ba gore ba mpolaye. Ke ikuela mo go Kaesara!" **12** Mme Feseto a buisanya le bagakolodi ba gagwe a fetola jaana, "Go siame! o ikuetse mo go Kaesara, mme o tlaa ya kwa go Kaesara!" **13** Mme erile morago ga malatsinyana Kgosi Ageripa a goroga le Berenise mo Kaesarea a etetse Feseto. **14** Erile ba ntse ba le mo malatsing a bone a loeto Feseto a tlotlela Kgosi ka tshoko

ya ga Paulo. A mo raya a re, "Go na le legolegwa lengwe fano le tsheko ya lone ke e tlogeletsweng ke Felise. 15 Erile fa ke le kwa Jerusalem, baperesiti ba bagolo le bangwe bagolwane ba Bajuta ba mpolelela bontlha-bongwe jwa polelo ya bone kaga Paulo mme ba nkopa gore ke mo athole gore a bolawe. 16 Mme ruri ke ne ka ba bolelela ka bonako gore molao wa Roma ga o tshwae motho phoso a ise a sekisiwe. O neelwa sebaka sa go re a iphemele a lebaganye le basekisi ba gagwe. 17 "Erile fa ba tla kwano ba tlela tsheko, ka bitsa kgang e ka letsatsi le le latelang mme ka laola gore Paulo a tsiwiwe. 18 Mme melato e o neng a e bonwa e ne e se yone tota e ke neng ke e solofetse. 19 E ne e le sengwe kaga tumelo ya bone, le kaga mongwe yo o bidiwang Jesu yo o neng a swa, mme Paulo ene o ne a tswelela a bolelela gore o tshedile! 20 Ke ne ke eme tlhogo ke sa itse gore ke ka athola tsheko ya mofuta o jang mme ka mmotsa gore a o ka rata go ya go sekisediwa kwa Jerusalem. 21 Mme Paulo a ikuela kwa go Kaesara! Mme ka mmusetsa mo kgolegelong go fithelela ke rulaganya gore a ye kwa Kgosing e kgolo." 22 Ageripa a fetola a re, "Ke batla go utlwa monna yoo ka bonna." Mme Feseto a fetola a re, "O tlaa mo utlwa ka moso!" 23 Mme erile letsatsi le le latelang, morago ga Kgosi le Berenise ba goroga mo Kgotleng ka boitlotmatso jo bogolo, ba patilwe ke matona a masole le banna ba ba tlotlegang ba motse, Feseto a laola gore Paulo a leriwe mo teng. 24 Mme Feseto a buisa bareetsi jaana: "Kgosi Ageripa le ba ba teng bothe, monna yo ke ene yo loso lwa gagwe lo batlwang ke Bajuta bothe; ba mono le ba ba kwa Jerusalem! 25 Mme mo mogopolong wa me ga a dira sepe se se tshwanetseng loso. Legale, o ikuetse mo go Kaesara, mme nna ga go na se ke ka se dirang fa e se go mo romela kwa go ene. 26 Mme ke tlaa kwalela kgosi-kgolo ke mo raya ke reng? Gonne ga go na molato ope o o bonalang mo go ene! Mme ke mo tlisitse fa pele ga lona lotlhe, bogolo jang wena Kgosi Ageripa, go mo tlhothomisa sentle o bo o mpolelela se ke ka se kwalang. 27 Gonne ga go lebege go utlwala sentle go romela legolegwa kwa kgosing e kgolo go sena molato o o bonwang mo go lone!"

26 Mme Ageripa a raya Paulo a re, "Tswelela o re bolelele polelo ya gago." Jalo Paulo a otlolola letsogo a ikarabela a re: 2 "Ke sego, Kgosi Ageripa, fa ke na le tshwanelo ya go ikarabela fa pele ga gago gompiano, 3 gonne ke itse fa o le moitseanape wa melao ya Sejuta le ngwao. Mme ke a go kopa gore o ntheetse ka bopelotelele! 4 "Fela jaaka Bajuta ba itse sentle, ke rutilwe thata ka Sejuta go tswa bonyaneng jwa me kwa Tareso, mme morago ka rutwa kwa Jerusalem, mme ka tshela fela jalo. 5 Mme fa ba rata ba ka dumalana le nna, ba itse gore ke ne ke le mofarasai yo o tlhokomelang melao fa go tla mo kobamelong ya melao ya Sejuta le dingwao. 6 Mme lebaka le ba ntshetseng morago go ntshekisa ke ka ntsha ya selo sengwe, ke ka ntsha ya gore ke solofetse tiragalo ya tsholofetso ya Modimo e e neng ya solofediwa borraa-ronamogologolwane. 7 Merafe e e lesome le bobedi ya Iseraele e leka bosigo le motshegare go goroga kwa tsholofelong e ke nang nayo! Le fa go ntse jalo Kgosi, mo go nna ba re ke molato! 8 A mme go molato go dumela mo tsogong ya baswi. 9 "A go utlwala go sa

dumelesege mo go wena gore Modimo o ka tsosa batho mo losong gore ke tshwanetse go dira ditiro tse di boitshegang mo balateding ba ga Jesu wa Nasaretha. 10 Ke ne ka tsenya bailshepi ba le bantsi mo kgolegelong kwa Jerusalem, jaaka go ne go laotswe ke baperesiti ba bagolo; mme erile ba atholelwa lesa ka dumelana nabo. 11 Ke ne ke tlhokofatsa Bakeresete gongwe le gongwe go leka gore ba hutsa Keresete. Ke ne ke le bogale thata mo go bone mo ke neng ka bogisa le ba metse e e kgakala mo mafatsheng a sele. 12 "Ke ne ke le mo loetong lo lo ntseng jalo ke ya Damaseko, ke tshotse ditaelo tse di neng di tswa kwa baperesiting ba bagolo, 13 fa ka letsatsi lengwe ka e ne e le motshegare wa sethoboloko, nna le bapati ba me ra phatshimelwa ke lesedi le le neng le phatsima go gaisa letsatsi. 14 Re ne ra wela fa fatshe rotlhe, mme ka utlwa lentswe le bua le nna ka Sehebera le re, 'Saulo, Saulo, o mpogisetsang? O ikutlwa bothoko fela!' 15 "Ka bota ka re, 'O mang Morena?' Mme a fetola a re, 'Ke Jesu, yo o mmogisang. 16 Jaanong ema ka dinao! Gonne ke bonetse mo go wena go go dira modiredi le mosupi wa me. O tshwanetse go bolelela lefatshe ka tiragalo e, le kaga tse dingwe tse ke tlaa di go supegetsang. 17 Mme ke tlaa go sireletsa mo go bagaeno le mo go Badichaba. Ee, ke tlaa go romela kwa go Badichaba, 18 go bula matlho a bone mo go tse e leng tsa boammaaruri gore ba tle ba ikwatlhaye ba nne mo leseding la Modimo go na le gore ba tshele mo leffing la ga Satane, gore ba tle ba bone boitshwarelo jwa dibe tsa bone le go ja boswa jwa Modimo mmogo le batho bothe gongwe le gongwe ba dibe tsa bone di tlhatswitsweng, ba ba beetsweng kwa thoko ka ntsha ya go dumela mo go nna.' 19 "Mme jalo, Kgosi Ageripa, ga ke a ka ka tlhoka go reetsa ponatshagelo eo e e tswang kwa legodimong! 20 Ke ne ka rerela pele ba ba kwa Damaseko, le Jerusalem le mo tikologong yotlhe ya Judea, le mo go Badichaba gore bothe ba tshwanetse go tlogela dibe tsa bone mme ba sokologela kwa Modimong, mme ba supe tshokologo ya bone ka go dira ditiro tse di siameng. 21 Bajuta ba ne ba ntshwara mo Tempeleng ka ntsha ya go rera jaana, mme ba leka go mpolaya, 22 mme Modimo o ne wa ntshireletsa gore ke be ke sa ntse ke tshela gompiano gore ke bolelele mongwe le mongwe dilo tse, bagolo le bannye. Ga ke rute sepe fa e se se baporofiti le Moshe ba se buileng, 23 gore Mesia o tlaa boga, mme a nne wa ntsha go tsoga mo baswing, go tliša lesedi mo Bajuteng le mo go Badichaba." 24 Mme ka tshoganetso Feseto a goa a re, "Paulo oa tsenwa, Go rutega thata ga gago go a go tsentsha!" 25 Mme Paulo a fetola a re, "Ga ke tsenwe, Motlotlegi Feseto. Ke bua mafoko a boammaaruri jo bo itekantseng. 26 Mme Kgosi Ageripa o itse kaga dilo tse. Ke bua ke gololesegile gonne ke itse sentle gore ditiragalo tse di tswaelesegile mo go ene, gonne ga di a direlwa mo sephiring! 27 Kgosi Ageripa, a o dumela baporofiti? Mme ke a itse gore o a dumela." 28 Mme Ageripa a mo tsena ganong a re, "A o batla go ntira Mokeresete mo lobakeng lo lokhutshwane lo?" 29 Mme Paulo a fetola a re, "Mo Modimong le fa mafoko a me a le bokoa kgotsa a nonofile, wena le bothe ba ba leng fano mo bathong ba ba tsileng go reetsa ba, lo ka nna jaaka nna, ke sa reye lo golegilwe ka dikeetane tse." 30 Mme Kgosi le molaodi, le Berenise le ba bangwe bothe ba ema ba tsamaya. 31 Mme erile ba ntse ba

buisanya kangang e, ba dumalana jaana ba re, "Monna yo ga a dira sepe se se tshwanetseng loso kgotsa go tsenngwa mo kgolegolong." 32 Mme Ageripa a raya Feseto a re, "Fa a ka bo a sa dira boikuelo kwa go Kaisara, o ka bo a gololwa."

27 Mme lwa bofelo dithulaganyo tsa dirwa go re re simolole mosepele wa rona wa go ya kwa Roma ka sekepe; jalo Paulo le magolegwa a mangwe a mantsi ba bewa mo tlhokomelong ya mogolwane yo o neng a bidiwa Julio, leloko la mophato wa badisa. 2 Mme re ne ra tsamaya ka sekepe se se neng se ya kwa Gerika, se se neng se rulaganyeditswe go ema gantsinyana mo mafelong a sekae mo lotshitshing lwa lewatle la Asia. Ke tshwanetse go boleta gore Arisetareka wa Mogerika yo o neng a tswa kwa Thesalonika o ne a na le rona. 3 Tsatsi le le latelang erile re ema kwa Sidona, Julio o ne a siame thata mo go Paulo mme a mo letla gore a fologe mo sekepeng a etele ditsala tsa gagwe gore di mo amogele ka boitumelo. 4 Mme erile go tloga foo, ra kgolediwa ke diphefo tse di neng tsa dira gore go nne thata go thamalatsa sekepe, jalo ra leba kwa bokone jwa Kupro ga gare ga sethake le lefatshe, 5 mme ra feta go bapa le kgaolo ya Kilikia le Pamfilia, ra ema kwa Mira, mo kgaolong ya Lukia. 6 Mme foo molaodi wa rona a bona sekepe sa Egepeto se se tswang kwa Alekesanderia, se ya ltale, mme sa re tsaya. 7 Re ne ra tsamaya mo dikgoberegong malatsi a le mantsi, mme la bofelo ra atamela Kinido; mme diphefo di ne di tsetse di gaketse, jalo ra tabogela kwa Kereta, ra feta mo boemelong dikepe jwa Salamone. Mme erile re ntse re lebaganye le phefo ka bothata jo bogolo re tsamaya re iketile mo lotshitshing lwa borwa, ra goroga mo felong fa go bidiwang Dinwane Dintle gaufi le motse wa Lusitania. 9 Mme ra nna malatsi a le mantsi koo. Ka nako eo phefo e ne ya nna maswe mo e leng gore re ne re sa kgone go tsamaya mosepele o molelele, gonne ngwaga e ne e tsamaela go fela, mme Paulo a bua le balaodi ba sekepe ka gone. 10 A re, "Borra, ke dumela gore go tlaa nna mathata kwa pele fa re ka tswelela, gongwe sekepe sa rona se ka nna sa senyega, kgotsa ra latlhegelwa ke morwalo wa rona, ra gobala kgotsa ra a swa." 11 Mme le fa gontse jalo bathokomedi ba magolegwa ba ne ba reetsa molaodi wa sekepe le mong wa sone go na le Paulo. 12 Mme ka gore Dinwane Dintle e ne e le boemelo jo bo mo pepeneneng, lefelo le le sa siamelang go nna mo go lone mariga, bontsi jwa batho ba ba dirang mo sekepeng ba re gakolola gore go ka nna jang fa re leka go tlhatlogela kwa Finekisa go fetsa mariga teng; Finekisa e ne e le boemelo jwa dikepe jo bo siameng bo lebile kwa bokone-bophirima le kwa borwa-bophirima. 13 Mme ka yone nako eo ga simologa phefo e e fokang ka bonya e tswa borwa, mme go ne go lebega e le letsatsi le le siametseng loeto, jalo ba tsamaya ba ikamile lotshitshi lwa lewatle. 14 Mme ka bofelo morago ga moo, ga nna le phetogo mo loaping, ga tsoga ledimo la phefo e e nonofileng thata (e ba e bitsang ya Bokonebothaba) la kapa sekepe la se phaila kwa teng ga lewatle. La ntlha ba ne ba leka go se lebisa kwa lotshitshing mme ba se ka ba kgona, jalo ba inela gore phefo e kgweletse sekepe kwa e yang teng. 16 Mme la bofelo ra goroga fa sethakenyaneng se se neng se bidiwa Jauda, kwa e rileng ka bothata ra tlolela

mo mokorong wa namolo o o neng o tswa kwa morago, 17 mme ra fapa sekepe kwa tlase. Badiri mo sekepeng ba ne ba tshaba go phepheulelwa ke phefo kwa go totomelang kwa lotshitshing lwa Afrika. Ba folosa disaile tsa sekepe ba ntse ba phepheulwa ke phefo. 18 Erile letsatsi le le latelang fa lewatle le kokomoga, badiri mo sekepeng ba simolola go latlhela merwalo mo lewatleng. 19 Mme letsatsi le le latelang ba latlhela diwana tsa bone le sengwe le sengwe se se neng se le gaufi nabo. 20 Dikhuduego tsa lewatle tsa nna dikgolo ka malatsi a le mantsi go fithelela la bofelo go sena tsholofelo epe. 21 Mme ka lobaka lo lo leele go ne go sena ope yo o kileng a ja, mme la bofelo Paulo o ne a bitsa badiredi ba sekepe bothe a re, "Banna, lo ka bo lo ne lwa ntheetsa lantha mme ra seka ra tloga mo Dinwane Dintle, lo ka bo lo falotse dikgobalo tse le latlhegelo! 22 Mme le fa go ntse jalo nametsegang! Ga go ope wa rona yo o tlaa latlhegelwang ke botshelo, ntswa sekepe sone se tlaa nwela. 23 "Gonne bosigo jo bo fetileng moengele wa Modimo yo ke leng wa gagwe le yo ke mo direlang o ne a ema fa thoko ga me, 24 a re, 'Se boife, Paulo, gonne ka boammaaruri o tlaa sekisiwa ke Kaesara! Mo gongwe gape ke eng, Modimo o arabile kopo ya gagwe mme o tlaa boloka matshelo a bothe ba ba mo loetong le wena.' 25 Mme jaanong nametsegang! Gonne ke dumela Modimo! Go tlaa nna fela jaaka o buile! 26 Mme le fa go ntse jalo sekepe sa rona se tlaa senyegela fa sethakeng." 27 Mme erile e ka nna nako ya bosigo-gare mo bosigong jwa bo lesome le bone jwa khuduego ya lewatle, fa re ntse re phepheulelwa kwa pele le kwa morago mo lewatleng la Aderia, batsamaisi ba sekepe ba belaela gore lefatshe le gaufi. 28 Ba ne ba lekeletsa boteng jwa metse mme ba bona e le boteng jwa dikgato di le lekgolo le masome a mabedi. Morago ga sebakanyana ba lekeletsa gape, mme ba bona e le dikgato di le masome a roba bongwe. 29 Mme ka selekanyo se ba itse gore ba gaufi le go phepheulelwa kwa lotshitshing, mme ka ba tshaba mafika a a gaufi le lotshitshi, ba digela diitsetsepelo di le nne ka kwa morago ga sekepe mme ba rapela gore go nne leledi. 30 Mme batsamaisi ba bangwe ba loga leano la go tlogela sekepe, mme ba fologa mokoro wa phalotsho jaaka o ka re ba ya go tlhoma diitsetsepelo kwa pele. 31 Mme Paulo a raya masole le molaodi a re, "Lo tlaa swa lothe fa lo ka seka lwa nna mo sekepeng." 32 Mme masole a kgaola megala a tlogela mokoro wa wa. 33 Erile masa a sa, Paulo a kopa mongwe le mongwe gore a je, a re, "Ga lo ise lo ke lo ame dijo mo dibekeng tse pedi tse di fetileng! 34 Tsweeng-tweeng jang sengwe gore lo thusege! Gonne le fa ele thiri ya ditlhogo tsa lona ga e na go nyelela!" 35 Mme a tsaya senkgwenyana se se omisitsweng a leboga Modimo fa pele ga bone bothe, mme a ja. 36 Ka bofelo mongwe le mongwe a ikutlwa sentle mme ba simolola go ja, 37 rothe re ne re le makgolo a mabedi le masome a supa le borataro, gonne eo ke yone palo e e neng e le mo sekepeng. 38 Erile re sena go ja, badiri ba sekepe ba fokotsa morwalo ka go latlhela mabele mo lewatleng. 39 Mme erile bosa bo sele, ba seka ba tlhologanya lefatshe gore ke lefe, mme ba bona senwane se se lobota lo papametseng mme ba akanya gore a ba ka tsena fa gare ga mantswa ba phepheulelwa ke phefo kwa lotshitshing. 40 Mme la bofelo ba ikaelela go leka jalo.

Ba kgaola diitsetsepelo ba di tlogela mo lewatlang, ba folosa dikgong tse di sokololang sekepe ba pega disaile ba leba kwa lotshitshing. **41** Mme sekepe sa thula totoma ya mothaba sa totomela. Mpa ya sone ya tsena mo mmung, mme marago a sone a thujwa ke makhubu a metsi. **42** Mme masole a buisanya le molaodi wa bone gore ba bolaye magolegwa e se re kgotsa ope wa bone a shapela kwa lotshitshing a falola. **43** Mme Julio ka a ne a batla go boloka Paulo, a ganana le mogopolo oo. Mme a laola gore botlhe ba ba ka kgonang go shapa ba fologe ba shapele kwa ntle, **44** mme ba ba sa kgoneng go shapa ba leke ka dipolanka le dikgong tse di robegileng mo sekepeng. Mme mongwe le mongwe a kgona go falolela kwa lotshitshing.

28 Mme ka bofefo ra lemoga fa re gorogile mo sethakeng sa Malita. Batho ba setlhake ba ne ba re siametse thata, ba ne ba gotsa molelo o motona fa lotshitshing go re amogela le go re thuthafatsa mo puleng le mo botsididing. **3** Mme erile fa Paulo a kokoanya ngata ya dikgong go di tsenya mo molelong, noga e e bothole ya ntshiwa mo molelong ke mogote, ya ithatha ka letsogo la gagwe! **4** Mme batho ba setlhake ba ne ba e bona e lepeletse mme ba raana ba re, "Ke mmolai ga gona pelaelo! Le ntswa a falotse mo lewatlang, tshiamiso ga e ka ke ya mo letla gore a tshiele!" **5** Mme Paulo a tlhothorela noga mo molelong e sa mo loma. **6** Mme batho ba solofela gore ba tlaa bona a ruruga kgotsa a wa fela ka tshoganelo a a swa; mme erile ba sena go nna ba lebeletse ka lobaka lo loleele mme go sena kgobalo epe mo go ene, ba fetola megopolo ya bone mme ba re ke modimo. **7** Fa lotshitshing fa re neng ra nna teng go ne go na le tshimo ya ga Pubelio, molaodi wa setlhake. O ne a re amogela sentle a bo a re fa dijo ka malatsi a le mararo. **8** Mme erile ka yone nako eo, rraagwe Pubelio a bo a lwala bolwetse jwa letshoroma le motabogo o mohibidu. Paulo a tsena a mo rapelela, mme a mmaya diatla a mo fodisa! **9** Mme balwetse ba bangwe botlhe mo setlhakeng ba tla mme ba fodisiwa. **10** Mme ka nthla ya moo ra tshologelwa ke dimpho di le dintsi, mme erile fa go tla nako ya gore re tsamaye, batho ba olela mefuta yotlhe ya dilo tse re tlaa di tlhokang mo loetong. **11** E ne e le kgwedi tse tharo sekepe se sena go senyega pele ga re simolola go tsamaya, mme ka nako e, re ne ra tsamaya ka sekepe se se bidiwang Mafattha a Basimane sa Alekesandaria, sekepe se se neng se feditse mariga mo setlhakeng. **12** Re ne ra ema la nthla kwa Sirakuse, kwa re neng ra nna teng malatsi a mararo. **13** Mme go tswa foo ra dikologa ra ya kwa Regiama; letsatsi le le latelang phefo ya borwa ya simolola go foka, mme letsatsi le le latelang ra goroga kwa Puteoli, **14** kwa re neng ra bona badumedi bangwe teng! Ba ne ba re kopa gore re nne nabo malatsi a supa. Go tsweng foo ra tsewelela ra ya Roma. **15** Bakaulengwe ba Roma ba ne ba utlwile gore re e tla mme ba tla go re kopantsha kwa patlelong mo Tseleng ya Apio. Bangwe ba kopana le rona kwa matlung a mararo a boitapoloso. Erile Paulo a ba bona, a leboga Modimo mme a nametsega. **16** Mme erile fa re goroga kwa Roma, Paulo o ne a letlelelwa gore a nne fa a ratang teng, le fa a ne a disitswe ke lesole. **17** Mme erile malatsi a mararo a sena go feta, a bitsa bagolwane ba Bajuta botlhe ba motse mme a ba raya a re: "Bakaulengwe ke ne ke tshwerwe

ke Bajuta kwa Jerusalema mme ka isiwa kwa mmusong wa Roma gore ke sekisiwe, ntswa ke ne ke sa utlwa ope bothoko kgotsa go tsuolola ngwao ya borraetsho mogologolwane. **18** Mme Ba-Roma ba ne ba ntshekisa ba bo ba rata go nkgolola, gonne ba ne ba sa bone molato ope o o tshwanetseng loso jaaka bagolwane ba Bajuta ba ne ba batla. **19** Mme erile fa Bajuta ba gana katlholo eo, ka bona go tlhokega, gore ke ikuele mo go Kaisara, ke sa ba eleletse bosula bope. **20** Ke lo kopile go tla fano gompiano gore re itsanye le gore ke lo bolelele gore ke golegilwe ka dikeetane ka nthla ya gore ke dumela gore Mesia o tsile." **21** Mme ba fetola ba re, "Ga re ise re ke re utlwe sepe se o sekisiwang ka ga sone! Ga re ise re ke re amogele dikwalo dipe tse di tswang kwa Judea kgotsa dipego tse di tlang le ba ba tswang kwa Jerusalema. **22** Mme re batla go utlwa se o se dumelang, gonne se re se itseng fela kaga Bakeresete ba ke gore ba nyadiwa gongwe le gongwe!" **23** Mme ga thongwa nako, mme ka letsatsi leo ga tla batho ba le bantsi mo tlung ya gagwe. A ba bolelela kaga Bogosi jwa Modimo a bo a ba ruta kaga Jesu mo Dikwalong, go tswa mo dikwalong tsa ga Moshe tse tlhano le dikwalo tsa baporofiti. A simolola a ruta mo mosong go filhelela maitseboa! **24** Mme bangwe ba ne ba dumela, ba bangwe ba gana go dumela. **25** Mme erile ba sena go ganetsanya ka boshi ba tsamaya ba tlhahilwe ke lefoko la bofelo la ga Paulo le le reng, "Mowa O O Boitshepo o ne o bua boammaaruri fa o bua ka Moporofiti Isaia o re, **26** 'Raya Bajuta o re, "Lo tlaa utlwa lo bo lo bona mme ga lo na go tlhologanya," **27** gonne dipelo tsa lona di thata le ditsebe tsa lona ga di reetse mme lo tswetse mathlo a lona gore lo seka lwa bona lwa tlhologanya, le go sokologela kwa go nna gore ke lo fodise.' **28** Mme jalo ke batla gore lo lemoge gore poloko e, e e tswang kwa Modimong le Badichaba ke ya bone, ebile bone ba tla e amogela." **30** Mme Paulo o ne a nna dingwaga tse pedi mo tlung e o neng a e hirile, mme a amogela botlhe ba ba neng ba mo etela, **31** a ba bolelela ka bopelokgale jotlhe kaga Bogosi jwa Modimo le kaga Morena Jesu Keresete; mme ga seka ga nna le ope yo o lekang go mo didimatsa.

Baroma

1 Ditsala tse di rategang mo Roma, Lokwalo lo lo tswa kwa go Paulo, motlhanka wa ga Jesu Keresete, yo o tlhophilweng go nna morongwa, ebile a romilwe go rera Mafoko a Modimo a a Molemo. **2** Mafoko a a Molemo a, a ne a sa bolo go solofediwa batho bogologolo ke baporofiti ba Modimo mo Kgolaganong e kgologolo. **3** Ke Mafoko a a Molemo kaga Morwaa one, Jesu Keresete Morena wa rona, yo o tsileng e le ngwana mo setshwanong sa motho, a tsalelwa mo losikeng lwa bogosi lwa ga Kgosi Dafide. **4** mme ka go tsoisiwa mo baswing o ne a supywa e le Morwa Modimo yo o senatla, ka tlhologo e e boitshepo ya Modimo ka sebele. **5** Mme jaanong, ka Keresete, tshiamo yothle ya Modimo e goromeleditswe mo go rona baleofi ba e neng e sa re tshwanela; mme jaanong o re roma mo tikologong ya lefatshe go bolelela batho botlhe gongwe le gongwe kaga dilo tse dikgolo tse Mo-dimo o di ba diretseng, gore le bone ba tle ba dumele ba o obamele. **6** Mme lona, ditsala tse di rategang mo Roma, le lona lo bangwe ba o ba ratang thata, le lona lo lalediwa ke Jesu Keresete go nna ba Modimo tota, ee batho ba one ba ba boitshepo. A masego othe a Modimo le kagiso e e tswang kwa Modimong Rara wa rona, le Jesu Keresete Morena wa rona a nne le lona. **8** Mmang ke simololeng ka go re, gongwe le gongwe kwa ke yang teng ke utlwa go buiwa kaga lona! Gonne tumelo ya lona mo Modimong e simolola go itsege mo tikologong ya lefatshe. Ke leboga Modimo thata jang ka Jesu Keresete ka pego e e molemo, le ka mongwe le mongwe wa lona. **9** Modimo o itse gore ke lo rapelela gangwe le gape jang. Bosigo le motshegare ke lo baya le tse lo di thokang ka thapelo mo go yo ke mo direlang ka thata yothle, ke bolelela ba bangwe Mafoko a a molemo kaga Morwaa one. **10** Mme sengwe sa dilo tse ke di rapelelang gangwe le gape ke lobaka lo lo atlegileng lwa gore, fa Modimo o rata, ke tle go lo bona, le gore fa go kgonega ke tle ke nne le mosepele o o babalesegileng. **11** Gonne ke tlhogeletswe go lo etela gore ke tle ke kgone go lo naya tumelo e e tlaa thusang phuthego ya lona go nitama mo Moreneng. Fela jalo le nna, ke tlhoka thuso ya lona, gonne ga ke batle fela go abalana tumelo ya me le lona le nna ke tlhoka go kgothadiwa ke tumelo ya lona. Mongwe le mongwe wa rona o tlaa nna tshogafatso mo go yo mongwe. **13** Ke batla gore lo itse, bakaulengwe ba ba rategang, gore ke gantsi ke ikaelela go tla kwa go lona (mme go sa kgonege) gore ke tle go dira le lona ke bo ke bone maungo a a molemo, fela jaaka ke dirile mo diphuthegong tse dingwe tsa Badichaba. **14** Gonne ke molato o mogolo mo go lona le mo go mongwe le mongwe, le mo bathong ba ba tlhabetlogileng le dichaba tsa baheitane; ee, mo go ba ba rutegileng le mo go ba ba sa rutegang fela ka go tshwana. **15** Jalo he, ka fa selekanyong sa nonofo ya me e e tletseng, ke setse ke siame go tla le kwa go lona mo Roma go rera Mafoko a a Molemo a Modimo. **16** Gonne ga ke tlhabiswe ditlhong ke Mafoko a a Molemo a, kaga Keresete. Ke leano la Modimo le le nonofileng la go gapela kwa legodimong bothe ba ba dumelang. Molaetsa o, o ne wa rerelwa Bajuta pele ba le bosii, mme jaanong mongwe le mongwe o

lalediwa go tla mo Modimong ka yone tsela e. **17** Mafoko a a Molemo a, a re bolelela gore Modimo o re baakanyetsa gore re ye legodimong, a re siamisa mo ponong ya Modimo fa re baya tumelo ya rona le boikanyo mo go Keresete go re boloka. Mo go bonwa ka tumelo go tswa tshimologong go ya bokhutlong. Jaaka lokwalo lo bua lo re, "Motho yo o bonang botshelo o tlaa bo bona ka go ikanya Modimo." **18** Mme Modimo o supa bogale jwa one jo bo tswang legodimong mo baleofing, batho ba ba bosula ba ba tlosang boammaaruri mo go bone. **19** Gonne ba itse boammaaruri kaga Modimo sentle thata; Modimo o tsentse kitso e mo dipeleng tsa bone. **20** Go simolola mo dinakong tsa pele batho ba bonye lefatshe le loapi le gotlhe mo Modimo o go dirileng, ebile ba itsile ka go tshela ga one le nonofo e kgolo ya bosakhutleng. Jalo ga ba kitla ba nna le seipato (fa ba ema fa pele ga Modimo ka letsatsi la katlholo). (**aidios g126**) **21** Ee, ba itsile kaga one sentle thata, mme ga ba a ka ba dumela gore ba a o itse kgotsa ba o obamela le fa e le go o leboga ka fa o ba tlhokomelang ka teng malatsi otlhe. Mme morago ga lobakanyana ba simolola go akanya dikakonyo tsa boelele tsa gore Modimo o ntse jang le gore o batla gore ba dire eng. Jalo ga diragala gore megopolo ya bone ya boelele e fifale e bo e tlhakatlhakane. **22** Ba ikaya fa ba le botlhale kwa ntle ga Modimo, mme ba fetoga dielelele tse di feteletseng ka nthla ya go tlhoka go ikanya Modimo. **23** Mme hong mo boemong jwa go obamela Modimo o o galalelang o o tshelang ka bosakhutleng, ba ne ba tsaya dikgong le maje mme ba itirela medimo ya disetwa go e obamela, ba e betla go nna jaaka dinonyane le diphologolo le dinoga le batho ba e seng ba sepe ba ba nyatsegang. **24** Jalo Modimo wa ba lesa go tswela pele mo mofuteng mongwe le mongwe wa boaka, le go dira sengwe le sengwe se ba se batlang ee, ba tlontlolo-lana mebele ka boatla. **25** Mo boemong jwa gore ba dumele se ba itseng e le boammaaruri kaga Mo-dimo, ba dumela ka bomo mo maakeng. Jalo ba obamela dilo tse Modimo o di dirileng, ba gana go obamela one Modimo o o dirileng dilo tse. (**aiñon g165**) **26** Ke sone se Modimo o ba leseleditseng go dira tsothe tse di bosula tse, le gore le basadi ba bone ba furalele leano la Modimo la tlhologo mme ba simolola go tlontlololana mebele. **27** Mme banna, mo boemong jwa go tlhakanela dikobo le basadi ka fa tlhologeng, ba simolola go gakalelana, banna ba dira dilo tse di tlhabisang ditlhong le banna ba bangwe, mme ka nthla ya moo ba bona tuelo e e ba tshwanetseng. **28** Jalo ke sone se e rileng fa ba latlha Modimo ebile ba sa batle go o itse, Modimo wa ba tlhokomologa gore ba dire sengwe le sengwe se megopolo ya bone e e bosula e neng e ka se akanya. **29** Matshelo a bone a tlaa mofuta mongwe le mongwe wa boikepo le sebe, wa bogagapa le kilo, keletso ya senama, polao, ntwaa, maaka, bogalaka le ditshebo. **30** E ne e le basebi, ba ba ilang Modimo, ba le makgakga, e le baikgantshi, ba aga ba akanya ditsela tse dintsha tsa go leofa ebile ba tswela pele ba sa reetse batsadi ba bone. **31** Ba leka go itira ba ba sa tlhologanyeng, ba senya ditsholofetso tsa bone, ba le setlhogo, ba se pelothomogi. **32** Ba ne ba itse sentle thata gore Modimo o atholela loso ka nthla ya melato e, le fa go ntse jalo ba tswela pele mme ba e dira ka methale yothle, ba kgothatsa ba bangwe gore le bone ba e dire.

2 Go siame, o ka ne kgotsa o re, "O ntse o bua kaga batho ba ba sa siamang thata jang!" Ikettle pele! Le wena o tshwana nabo. Fa lo re ba ikepila ba tshwanetse go othaiwa, go ithaya lona gonne lo dira tsona fela ditiro tse ba di dirang. **2** Mme re itse gore Modimo mo tshekisong o tlaa othlaha le fa e le mang yo o dirang dilo tse di tshwanang le tse. **3** A o gopola gore Modimo o tlaa sekisa o bo o athola ba bangwe ka nthla ya go dira dilo tseo mme o go tlodise matlho fa le wena o ntse o di dira? **4** A ga o lemoga ka fa Modimo o leng pelotelele mo go wena ka teng? Kgotsa a ga o tshwenege ka gope? A ga o bone gore o ntse o sa go othlhae mo lobakeng lo lotlhe, e le go go naya sebaka sa go sokologa mo sebeng? Bopelonomi jwa one bo diretswe go go gogela kwa boikwatlhaong. **5** Mme le fa go ntse jalo, ga o reetse; mme ka go dira jalo o ipolokela kwatlhao e e sethogo ka nthla ya bothogo-e-thata jwa gago jwa go gana go soko-loga mo sebeng; gonne go tlaa tla letsatsi la bogale fa Modimo o tlaa bong o le moathodi yo o sa patikeng wa lefatsho lotlhe. **6** O tlaa naya mongwe le mongwe tuelo ka fa ditirong tsa gagwe. **7** O tlaa naya botshelo jo bo sa khutleng ba ba dirang go rata ga Modimo ka bopelotelele, ba batla kgalalele e e sa bonweng ka matlho le tlotlo le botshelo jo bo sa khutleng jo o bo abang. (aiōnios g166) **8** Mme o tlaa othlaha sethogo ba ba tlhabantshang boammaaruri jwa Modimo ba tsamaya mo ditseleng tse di bosula, bogale jwa Modimo bo tlaa ba wela godimo. **9** Go tlaa nna khutsafalo le pogisego mo Bajuteng le mo go Badichaba ba ba tswelolang ba dira boleo. **10** Mme go tlaa nna kgalalele le tlotlo le kagiso e tswa kwa Modimong e le tsa ba ba o reetsang, le fa e ka ne e le Bajuta kgotsa Badichaba. **11** Gonne Modimo o tsaya batho ka tekatekanyo. **12** O tlaa othlaha sebe gongwe le gongwe kwa se bonwang teng. O tlaa othlaha baheitane fa ba leofa, le fa ba ise ba ke ba nne le melao ya Modimo e e kwadilweng, gonne mo botennywe jwa dipelo tsa bone ba itse tshiamo le bosula. **13** Melao ya Modimo e kwadilwe mo go bone; segakolodi sa bone se ba baya molato, ka nako e nngwe se dumalana nabo. **14** Mme Modimo o tlaa othlaha Bajuta go leofa gonne ba na le melao ya one e e kwadilweng mme ga ba e tshegetse. **15** Ba itse se se siameng mme ga ba se dire. Kana poloko ga e newe ba di itseng se ba tshwanetseng go se dira, fa e se fela ba se dira. **16** Ammaaruri letsatsi le tlaa tla fa ka taolo ya Modimo, Jesu Keresete o tlaa atholang masaitsweng a mongwe le mongwe, maikutlo a bone a a kwa teng le maikaelelo a bone; se ke bontlha bongwe jwa leano la Modimo le legolo le ke lo le bolelelang. **17** Lona Bajuta lo gopola gore gothe go siame fa gare ga lona le Modimo gonne o lo neetse melao ya one; lo ipelafatsa ka gore lo ithaya lo re lo ditsala tsa one tse di thophegileng. **18** Ee, lo itse se o se batlang; lo itse pharologanyo ya bosula le molemo mme lo rata tshiamo gonne lo rutilwe melao ya one go tsweng bonyaneng jwa lona. **19** Lo tlhomamisa tota tsela e e yang kwa Modimong mo e leng gore lo ka e supegetsa le sone sefoku tota. Lo ipona lo le masedi a a bontshang tsela, lo kaela batho ba ba latlhegetseng mo leffing tsela ya go ya kwa Modimong. **20** Lo akanya gore lo ka goga dielelele lwa ba lwa ruta le bana ditiro tsa Modimo, gonne lo itse melao ya one sentle e e tletseng kitso yotlhe le boammaaruri. **21** Ee, lo ruta ba bangwe, jaanong ke

eng fa lona lo sa ithute? Lo raya ba bangwe lo re ba seka ba utswa, a e bile lo a utswa? **22** Lwa re go phoso go dira kgokafalo a ebile lo a e dira? Lwa re, "Go seka ga rapelwa medimo ya disetwa," mme lona lo dira madi modimo wa lona wa disetwa mo boemong jwa go rapela Modimo. **23** Lo ipelafatsa thata ka go itse melao ya Modimo, mme lo o tlotlola ka go e roba. **24** Ga go gakgamatse fa Dikwalo di re lefatsho le bua bosula ka ga Modimo ka nthla ya lona. **25** Go nna Mojuta go bothokwa fa o tshegetsa melao ya Modimo; mme fa o sa e tshegetse, ga o botoka go na le moheitane. **26** Mme fa baheitane ba tshegetsa melao ya Modimo, a Modimo ga o killa o ba naya ditshwanelo tsothle le tlotlo e o neng o ikaeletse go e naya Bajuta? **27** Ammaaruri baheitane bao ba tlaa nna botoka thata go na le lona Bajuta ba lo itseng thata kaga Modimo ebile lo na le ditsholofetso tsa one mme lo sa tshegetse melao ya one. **28** Gonne ga lo Bajuta tota, fela ka nthla ya gore lo tsetswe ke batsadi ba Sejuta kgotsa ka nthla ya gore lo rupisitswe mo mokgweng wa Sejuta, ebong modiro wa bogwera. **29** Nnyaa, Mojuta tota ke mongwe fela yo pelo ya gagwe e siameng mo Modimong. Gonne ga o batle ba ba kgaolang ditokololo dingwe tsa mebele ya bone go rupisiwa ga senama, mme o batla ba ba fetogileng dipelo le mewa. Le fa e le mang yo o nang le phetogo e e ntseng jalo mo botshelong jwa gagwe o tlaa amogela pako e e tswang kwa Modimong, le fa e sa tswa mo go lona.

3 Mme go thusang go nna Mojuta? A go na le bothokwa bongwe mo thupisong ya Sejuta? **2** Ee, go nna Mojuta go na le dithuso di le dintsi. Santlha Modimo o ne wa ba neela melao ya one ka go ba ikanya [gore ba tle ba itse mme ba dire go rata ga one]. **3** Boammaaruri ke gore, bangwe ba bone ba ne ba sa ikanyege, mme fela ka nthla ya gore ba ne ba senya ditsholofetso tsa bone mo Modimong, a seo se raya gore Modimo o tlaa senya ditsholofetso tsa one? **4** Ga go a nna jalo! Le fa batho mo lefatsheng e le baiki, Modimo one ga o a nna jalo. A o gakogelwa se se buiwang ke lokwalo lwa Dipesalema kaga selo se? Gore mafoko a Modimo a tlaa aga a supega a le boammaaruri a bile a siame, ga gore sepe gore mongwe o a ganetsa. **5** Mme bangwe ba re, "Mme go senya tumelo ya rona mo Modimong go siame, tsa rona dibe di bontsha tshiamo, gonne batho ba tlaa lemoga gore Modimo o siame thata jang fa ba bona ka fa re leng maswe ka teng. A go siame jaanong, gore o re othlhae fa dibe tsa rona di o thusa?" (Ke ka fa batho bangwe ba buang ka teng.) **6** Modimo o a gana wa re a go se tualo! Gonne e ne e tlaa bo e le Modimo o o ntseng jang, fa o tlodisa sebe matlho? O ne o ka athlola le fa e le mang jang? **7** Gonne o ne o ka seka wa ntshekisa wa bo wa nkathola ke le moleofi fa go thoka go ikanyega ga me go ne go o leretse kgalalele ka go supa go ikanyega ga one fa go tshwantshangwa le maaka a me. **8** Fa o tswelutse ka mogopolo o o reng: Modimo o itumela fa re le baleofi! Kahlolo e go emetse wena yo o buang dilo tse di ntsengjaana. Legale bangwe ba re ke sone se ke se rutang se! **9** Jalo he, a rona Bajuta re botoka go na le ba bangwe? Nnyaa, le goka, gonne re setse re supile gore batho bothle ke baleofi ka go tshwana, a e ka ne e le Bajuta kgotsa Badichaba. **10** Jaaka dikwalo di bua, "Ga go na ope yo o siameng, ga go na ope mo lefatsheng lotlhe yo o senang molato." **11** Ga go na

le fa e le ope yo o kileng a tsamaya sentle mo ditseleng tsa Modimo, kgotsa le fa e le go batla go tsamaya mo go tsone ka boammaaruri. **12** Botlhe ba leofile ba fapogile. Ga go na ope le fa e le kae yo o tswelletseng pele a dira se se siameng; le fa e le a le mongwe. **13** Dipuo tsa bone di leswe ebile di bosula jaaka monkgo wa sebedu o o tswang mo phupung e e athameng. Diteme tsa bone di tletse maaka. Sengwe le sengwe se ba se buang se na le lobelega le bothole jwa dinoga tse di bolayang. **14** Melomo ya bone e tletse thogakano le bogalaka. **15** Ba bofefo go bolaya, ba ila le fa e le mang yo o sa dumalaneng le bone. **16** Gongwe le gongwe kwa ba yang teng ba tlogela tshotlego le matshwenyego kwa morago. **17** le gone ga ba ise ba ke ba itse tsela ya kagiso le fa e le go akola masego a Modimo. **18** Ga ba boife sepe kaga Modimo le fa e le se Modimo o se gopolang kaga bone. **19** Jalo tshegetsela melao ya Modimo mo boemong jwa go dira dilo tse tsothe tse di bosula; ga go na le fa e le ope wa bone yo o nang le seipato; ka boammaaruri lefatshe lotlhe le didimetse ebile le molato fa pele ga Modimo Mothatayotlhe. **20** Jaanong a lo lemoga sentle? Ga go na le fa e le ope yo o ka siamisiwang mo ponong ya Modimo ka go dira se molao o se laolang. Gonnye fa re ntse re tswela ka go itse melao ya Modimo, re simolola go lemoga sentle gore ga re e obamele; melao ya one e dira gore re bone gore re baleofi. **21** Mme jaanong Modimo o re supegeditse tsela e sele ya go ya kwa legodimong, e seng "ka go siama ga rona" le go leka go tshegetsela melao ya one, mme e leng ka tsela e ncha (lefa go ntse jalo tota ga e ncha, gonnye dikwalo ga di bolo go bolela ka ga yone bogologolo). **22** Jaanong Modimo wa re o tlaa re amogela o bo o re golola, o re supa "re se molato" fa re ikanya Jesu go tlosa dibe tsa rona. Mme le rona rotlhe re ka bolokwa mo go yone tsela e, ka go tla kwa go Keresete, ga gore sepe gore re bomang kgotsa gore ra re ntse jang. **23** Ee, botlhe ba leofile; botlhe ba thaela kgalaletso ya Modimo; **24** mme le fa go ntse jalo Modimo o re supa "re se molato" wa go o leofela fa re ikanya mo go Jesu Keresete, yo mo bopelonong jwa gagwe o tlosang dibe tsa rona kwa ntle ga tuelo epe. **25** Gonnye Modimo o rometse Jesu Keresete go tlosa kwathao ya rona ka ntlha ya dibe tsa rona, le go fedisa bogale jotlhe jwa Modimo jo bo re okameng. Modimo o dirisitse madi a ga Keresete le tumelo ya rona e le tsela ya go re boloka mo bogaleng jwa one. Ka yone tsela e, o ne wa supa tshiamo ya one o sa patike ope, le fa o ise o ke o othae ba ba neng ba leofa mo metheng ya pele. Gonnye o ne o lebetse kwa pele nako e Keresete o neng a tlaa tla ka yone go tlosa dibe tse tsothe. **26** Mme jaanong le mo malatsing ano, o ka amogela baleofi ka yone tsela e, gonnye Jesu o tlositse dibe tsa bone. A mme tota golo mo go siame gore Modimo o golole badira bosula, mme o bo o re ga ba na le fa e le molato ope? Nnyaa, gonnye o go dira ka go ikanya ga bone mo go Jesu yo o tlositseng dibe tsa bone. **27** Mme re ka ipelafatsa ka go dira eng gore re bone poloko? Ga go sepe gothelele. Ka go reng? Gonnye kgololo ya rona ga e a ikaega mo ditrong tsa rona tse di molemo; e ikaegile mo go se Keresete o se dirileng, le tumelo ya rona mo go ene. **28** Jalo go raya gore re bolokwa ka tumelo ya rona mo go Keresete e seng ka ditiro tse di molemo tse re di dirang. **29** A mme Modimo o

boloka Bajuta fela ka yone tsela e? Nnyaa, le Badichaba ba ka tla kwa go ene ka yone tsela e. **30** Modimo o re tsaya fela ka go tshwana; botlhe fela, a e ka ne e le Bajuta kgotsa Badichaba, ba a gololwa fa ba na le tumelo. **31** Mme jalo he, fa re bolokwa ka tumelo, a mo go raya gore ga re sa thole re tlhokana le go obamela melao ya Modimo? Nnyaa ga go a nna jalo! Tota fela fa re ikanya Jesu ke gone re ka o obamelang ka boammaaruri.

4 Aberahame fa re bua ka fa nameng, re ka re ke mosimolodi wa sechaba sa Sejuta. Maitemogelo a gagwe kaga potso e ya go bolokwa ka tumelo e ne e le eng? A Modimo o ne wa mo amogela ka ntlha ya ditiro tsa gagwe tse di molemo? Fa e le gore go ntse jalo, o ne a ka nna le sengwe se a ipelafatsang ka sone. Mme mo mogopolong wa Modimo, Aberahame o ne a sena sepe se a ka ipelafatsang ka sone. **3** Gonnye dikwalo di re bolelela gore Aberahame o ne a dumela Modimo, mme ke sone se Modimo o neng wa phimola dibe tsa gagwe wa mo supa gore "ga a na molato". **4** A mme ga a ka a bona tshwanelo ya gagwe go ya kwa legodimong ka ntlha ya dilo tsothe tse di molemo tse a di dirileng? Nnyaa, gonnye go bolokwa, ke mpho; fa e le gore motho o ne a ka e bona ka go e fufulela, mme e ne e ka seka ya nna mpho fela ntswa tota e le mpho fela! E newa ba ba sa e fufuleleng: Gonnye Modimo o supa baleofi ba le molemo mo ponong ya one fa ba na le tumelo mo go Keresete go ba boloka mo bogaleng jwa Modimo. **6** Kgosi Dafide o buile ka sone selo se, fa a thalosa boitumelo jwa molefo yo o neng a sa bo tshwanela pele ga a supa "sena molato" ke Modimo. **7** O ne a re, "Go sego ba ba itshwaretsweng dibe ebile di tlositswe mo matlhong a bone. **8** Ee, go boitumelo thata jang mo mothong yo dibe tsa gagwe a sa tholeng a di balelwa ke Morena." **9** Jaanong he, potso ke gore: A lesego le le neelwa fela ba ba dumelang mo go Keresete ebile ba boloka melao ya Sejuta, kgotsa le neelwa le ba ba sa bolokeng melao ya Sejuta, mme ba ikanya Keresete fela. Mme he, ra reng kaga Aberahame? Ra re o amogetsa masego a ka tumelo ya gagwe. A e ne e le ka tumelo fela? Kgotsa a e ne e le ka ntlha ya gore le ene o ne a boloka melao ya Sejuta? **10** Mo go arabeng potso eo, arabang e: Modimo o neetse Aberahame masego a leng? O a mo neetse pele ga a nna Mojuta, pele ga a tsena mo modirong wa thupiso ya Sejuta. **11** Erile Modimo o sena go solofetsa go mo segofatsa ka ntlha ya tumelo ya gagwe, a rupisiwa. Sekao sa thupiso e ne e le sesupo sa gore Aberahame o ne a setse a na le tumelo le gore Modimo o ne o setse o mo amogetsa o mo supile fa a le tshiamo mo ponong ya one pele ga modiro wa thupiso o diragala. Jalo Aberahame ke rara wa semowa wa ba ba dumelang mme ba bolokwa kwa ntle ga go tshegetsela melao ya Sejuta. Re a bona, jaanong gore ba ba sa tshegetseng melao e, ba siamisiwa ke Modimo ka tumelo. **12** Gape Aberahame ke rara wa semowa wa Bajuta ba ba rupisitsweng, gonnye Aberahame o ne a bona kutlwelo bothoko ya Modimo ka ntlha ya tumelo fela, pele ga a rupisiwa. **13** Jaanong go bonala sentle gore tsholofetso e Modimo o neng wa e naya Aberahame ya gore o tlaa mo naya lefatshe lotlhe mmogo le losika lwa gagwe, e ne e se ka ntlha ya gore Aberahame o ne a tshegetsela melao ya Modimo, mme e ne e le

ka ntlha ya gore o ne a ikanya Modimo gore o tlaa diragatsa tsholofetso ya one. **14** Mme fa e le gore o sa ntse o re masego a Modimo a ya kwa go ba ba "siameng thata" mme o raya gore ditsholofetso tsa Modimo mo go ba ba nang le tumelo ga di reye sepe, ebile tumelo ke boelele. **15** Mme boammaaruri ke gore: Fa re leka go nna le lesego le poloko ya Modimo ka go boloka melao ya one re aga re felela mo bogaleng jwa one, gonne re palelwa ke go e tshegetsatsa malatsi othe. Tsela e nngwe fela e re ka ipabalelang ka yone gore re seka ra tlola melao, ke ya gore go seka ga bewa melao, e se re kgotsa ra e tlola. **16** Jalo masego a Modimo re a nnewa ka tumelo, e le neo fela; re tlhomamisa go nna le one re sala morago ngwao ya Sejuta kgotsa re sa e sale morago fa re na le tumelo e e tshwanang le ya ga Aberahame, gonne Aberahame ke rraa rona rotlhe fa go tla mo dilong tse tsa tumelo. **17** Ke sone se dikwalo di se rayang fa di re Modimo o dirile Aberahame rara wa dichaba tse dintsi. Modimo o tlaa amogela batho botlhe mo dichabeng tsothle ba ba o ikanyang jaaka Aberahame a ne a dira. Mme tsholofetso e, e tswa mo Modimong ka bo one, o o dirang gore baswi ba tshele gape, ebile o bua ka ditiragalo tsa malatsi a a tlang ka tlhomamiso e e gagamseng jaaka o ka re di setse di bile di diragetse! **18** Jalo erile fa Modimo o raya Aberahame o re o tlaa mo naya ngwana wa mosimane yo o tlaa nngang ramerafe e mentsi e bo e nna chaba e tona, Aberahame o ne a dumela Modimo le fa tsholofetso e e ntseng jalo e ne e ka seka ya diragala! **19** Mme ka ntlha ya gore tumelo ya gagwe e ne e nonofile, o ne a seka a tshwenyega kaga lobaka lwa gore o ne a tsofetse thata go ka nna motsadi, ka nako eo o ne a le dingwaga di le lekgolo, le ene Sara mosadi wa gagwe o ne a le dingwaga di le masome a fera bongwe, a tsofetse thata go ka nna le ngwana. **20** Mme Aberahame ga a ise a ke a belaele. O ne a dumela Modimo, gonne tumelo ya gagwe le tshupo di ne di nonofile, mme o ne a galaletsa Modimo, ka masego a, le pele ga a diragala. **21** O ne a tlhomamisa thata gore Modimo o ne o kgona sentle go dira le fa e le eng se o se solofeditse. **22** Mme ka ntlha ya tumelo ya ga Aberahame Modimo o ne wa mo itshwarela dibe wa mo supa "a sena molato." **23** Jaanong polelo e ntle e, ya gore o ne a amogelwa a bo a letlelesega ka tumelo ya gagwe, e ne e sa solegele Aberahame molemo a le nosi. **24** Le rona e ne e le ya rona, e re tlhomamisetse gore Modimo o tlaa re amogela ka yone tsela e o amogetseng Aberahame ka yone, fa re dumela ditsholofetso tsa Modimo o o tsositseng Jesu Morena wa rona mo baswing. **25** O swetse dibe tsa rona mme a tsoga gape go re siamisa mo Modimong a re tsa ka tshiamo ya Modimo.

5 Mme jaanong, ka re siamisitse mo ponong ya Modimo ka tumelo mo ditsholofetsong tsa one, re ka nna le kagiso mo go one ka ntlha ya se Jesu Keresete Morena wa rona o se re diretseng. **2** Gonne ka ntlha ya tumelo ya rona, o re beile mo lefelong le le nang le tshwanelo e e kwa godimo fa re leng teng jaanong, mme re lebeleletse ka tshupo le ka boitumelo go nna se tota Modimo o neng o gopotse gore re nne sone. **3** Le rona re ka itumela, fa re tsena mo matha-teng le mo melekong gonne re itse gore mathata a re siametse, a re thusa go ithuta go nna pelotelele. **4** Mme bopelotelele bo tlhogisa boitshwaro jo bo

nonofileng mo go rona, ebile bo re thusa go ikanya Modimo thata mo nakong nngwe le nngwe fa re bo dirisa go fithelela lwa bofelo tsholofelo ya rona le tumelo di nonofa di bo di dira ka boiketlo le kelothoko di sa rekettle. **5** Mme fa moo go diragala, re kgona go ema re nitame, ga go re sepe gore go diragala eng ebile re itse gore gotlhe go siame, gonne re itse ka fa Modimo o re ratang ka teng, ebile re utlwa lorato lo lo tukang gongwe le gongwe mo go rona gonne Modimo o re neile Mowa O O Boitshepo go tsa dipelo tsa rona ka lorato lwa one. **6** E rile re sa kgone go ithusa gotlhelele go se na letshoba la go falola, Jesu a tla ka nako e e tshwana-ntse mme a re swela rona baleofi ba re neng re sena molemo mo go ene. **7** Le fa tota re ne re siame, re ne re se ka ke ra solofela ope go re swela, lefa go ntse jalo, go re swela go ne go ka kgonega. **8** Mme Modimo o ne wa supa lorato lwa one lo logolo mo go rona ka go romela Keresete go tla go re swela fa re ne re sa ntse re le baleofi. **9** Mme e re ka madi a gagwe a re diretse mo gotlhe re le baleofi, o tlaa re direla go le gogolo thata jang jaanong ka a re supile re se molato? Jaanong o tlaa re boloka mo bogaleng jothle jwa Modimo jo bo tlang. **10** Mme e re ka re ne re le baba ba one, re ne ra busediwa kwa Modimong ka loso lwa Morwaa one, kana ke masego a magolo thata jang a o tshwanetseng go a re naya jaanong ka gore re ditsala tsa one, le ka gore o nna mo go rona! **11** Jaanong re itumela mo kgolaganong ya rona e ntle e ncha le Modimo, gotlhe ka ntlha ya se Morena wa rona Jesu Keresete o se dirileng ka go swela dibe tsa rona, a re dira ditsala tsa Modimo. **12** Erile fa Adamo a leofa, sebe sa tsena mo bathong botlhe. Sebe sa gagwe sa lere loso mo lefatsheng lotlhe, jalo sengwe le sengwe sa simolola go tsofala le go swa, gonne tsothe di leofile. **13** (Re itse gore ke sebe sa ga Adamo se se dirileng selo se) gonne le fa go ntse jalo, batho ba ne ba tswelela ba leofa go simolola ka nako ya ga Adamo go fithelela ka Moshe, ka malatsi ao Modimo o ne o ise o ba neele melao ya one le fa e le go ba bolelela se o batlang ba se dira. **14** Jalo e ne ya re fa mebele ya bone e e swa e bo e se ka ntlha ya dibe tsa bone, ka ntlha ya gore bone ka bo bone ba ne ba ise ba ke ba tlole molao mongwe wa bothokwa wa Modimo kgatshanong le go ja loungo lo lo idiwang, jaaka Adamo a ne a dira. A pharologanyo e tona fa gare ga ga Adamo le Keresete yo o neng a tlaa tloga a tla! **15** Gape a pharologanyo e tona fa gare ga sebe sa motho le boitshwarelo jwa Modimo! Gonne monna yo fela a le nosi Adamo, o lerile loso mo go ba le bantsi ka sebe sa gagwe. Mme monna yo ebong Jesu Keresete, o lerile boitshwarelo mo go ba le bantsi ka ntlha ya kutlwelo bothoko ya Modimo. **16** Sebe sa ga Adamo se le sosi se lerile loso mo go ba le bantsi, fa Keresete a tlosa dibe tsothe a ba naya botshelo jo bo galalelang mo boemong jwa loso. **17** Sebe sa monna yo a le nosi, ebong Adamo, se dirile loso go nna kgosi mo go botlhe, mme botlhe ba ba tlaa amogelang neo ya Modimo ya boitshwarelo le kgololo ke dikgosi tsa botshelo ka ntlha ya monna yo, a le nosi, ebong Jesu Keresete. **18** Ee, Sebe sa ga Adamo se tšitšitse kothao mo go botlhe, mme tshiamo ya ga Keresete e dira batho tshiamo mo Modimong, gore ba tshele. **19** Adamo o dirile ba le bantsi gore ba nne baleofi gonne gaa a ka a reetsa Modimo, mme Keresete o dirile ba le bantsi go

amogesege kwa Modimong gonno e ne a reetsa Modimo. 20 Melao e e some e ne ya ntshiwa gore bothe ba bone selekanyo sa ka fa ba tlhangelang ka teng go obamela melao ya Modimo. Mme fa re ntse re bona bolelo jwa rona ke gone bogolo re bonang kutlwelobothoko ya Modimo o o re itshwarelang. 21 Pele, sebe se ne se busa batho bothe mme sa ba lere mo losong, mme jaanong kutwelo-bothoko ya Mo-dimo e busa mo boemong jwa sebe, e re naya tshwanelo ya go ema fa pele ga Modimo re le ba ba itekanetseng gore re nne le botshelo jo bo sa khu-tleng ka Jesu Keresete Morena wa rona. (aiōnios g166)

6 Jalo he, a re tlaa nna re tswelera re dira dibe gore Modimo o tle o nne o re kaele tshiamo le boitshwarelo. 2 Nnyaa ga go a nna jalo! A re tshwanetse go nna re dira dibe fa re sa tshwanela? Gonno nonofo ya sebe e e neng e re imelela e robilwe fa re nna Bakeresete ra bo ra kolobediwa go nna tokololo ya ga Keresete; ka loso lwa gagwe. 4 Nonofo ya tlhologo ya lona e kgologolo e e ratang go leofa e tsentswe le ene mo phupung ka kolobetso fa a a swa, mme erile fa Modimo Rara, ka nonofo e e galalalang o mo rudisa, lo ne lwa neelwa botshelo jwa gagwe jo bontle jo bosha go itumela ka jone. 5 Gonno lo fetogile tokololo ya gagwe, jalo he lo sule nae, go bua jalo ke raya ka nako e a neng a a swa ka yone; mme jaanong lo na le seabe mo botshelong jwa gagwe jo bosha mme lo tlaa tsoga fela jaaka a ne a tsoga. 6 Dikeletso tsa lona tse di bosula tsa bogologolo di ne tsa kokotlwa mo mokgorong nae, tokololo eo ya lona e e ratang go leofa e ne ya riplitiwa ya ba ya ntshiwa dintho mo go bolayang, gore mmele wa gago o o ratang go leofa o seka wa tlhola o nna ka fa tlase ga taolo ya sebe, o sa tlhole o tlhoka go nna motlhanka wa bolelo; 7 gonno fa o sa tlhole o dira sebe o golotswe mo thaelong ya sone le nonofo ya sone go go laola. 8 Mme ka tlhologo ya lona e kgologolo ya go rata bolelo e "sule" le Keresete, re itse gore lo tlaa nna le seabe mo botshelong jwa gagwe jo bosha. 9 Keresete o tsogile mo baswing mme ga a kitla a tlhola a a swa gape. Loso ga lo sa tlhole lo na le nonofo mo go ene. 10 O swetse ruri gangwe fela go fedisa nonofo ya sebe, mme jaanong o tshela ka metlha yotlhe mo botsalanong go ya bosakhutleng. 11 Jalo he, tsaya tlhologo ya gago e kgologolo ya sebe jaaka e ka bo e sule e sa saalane molelo le sebe, mme mo boemong jwa go utlwana le sebe tshelera Modimo, o tlhomame mo go one, ka Jesu Keresete Morena wa rona. 12 Se tlhole o letlelela sebe go laola mmele wa gago o o kgobaletseng; se ineele mo dithatong tsa one tse di leofang. 13 Se letleleleng tokololo epe ya mebele ya lona go nna didirisiwa tsa bolelo, go dirisiwa mo go direng bolelo; mme ineeleng gotlholelele mo Modimong, tokololo nngwe le nngwe ya lona, gonno lo tswa mo losong mme lo batla go nna didirisiwa tsa Modimo, go dirisiwa mo megopolong ya one e e siameng. 14 Sebe ga se sa tlhole se tshwanetse go nna monnga lona, gonno jaanong ga lo sa tlhole lo golegeletswe mo molaong mo sebe se lo dirang makgoba teng, mme lo gololesegile ka fa tlase ga thato ya Modimo le kutwelo-bothoko ya one. 15 A mo go raya gore re ka nna ra tswelera ra leofa mme ra seka ra tshwenyega ka ga gone? (Gonno poloko ya rona ga e ikaege mo go bolokeng molao; fa e

se mo go amogeleng tshogefatso ya Modimo). Nnyaa ga go a nna jalo! 16 A ga o lemoge gore o ka tlhophela mong wa gago? O ka tlhophela sebe (le loso) kgotsa theetso (le kgololo). Yo o mo ineelang, o tlaa go tsaya a bo a nna mong wa gago mme o tlaa nna motlhanka wa gagwe. 17 A go lebogwe Modimo ka gore le fa lo kile lwa tlhophela go nna bathanka ba bolelo; jaanong lo tshogeditse thuto e Modimo o e lo neileng ka pelo yotlhe ya lona. 18 Mme jaanong lo gololesegile mo go mong wa lona yo mogologolo, (sebe); jaanong lo bathanka ba mong wa lona yo mosh, ebong tshiamo. 19 Ke bua jaana, ke dirisa sekai sa bathanka le barena, gonno se mothofo go tlhalogangwa: fela jaaka lo kile lwa bo lo le bathanka mo mefuteng yotlhe ya bolelo, jaanong lo tshwanetse go itelelela go nna bathanka mo go gotlhe mo go siameng go bile go itshepile. 20 Mo malatsing ale fa lo ne lo sa ntse lo le bathanka ba bolelo, lo ne lo sa tshwenyega ka tshiamo ya Modimo. 21 Mme maduo e ne ya nna eng? Go bonala sentle gore ga e aka ya nna tshiamo, ka jaanong lo tlhabiwa ke dithong go akanya kaga dilo tse lo kileng lwa bo lo di dira, gonno tsotlhe di felela mo tatlhegong ya bosakhutleng. 22 Mme jaanong lo gololesegile mo nonofong ya bolelo lo bathanka ba Modimo, mme thobo ya lona mo go one ke boitshelo le botshelo jo bo sa khutleng. (aiōnios g166) 23 Gonno maduo a bolelo ke loso, mme neo ya Mo-dimo e e sa rekweng ke botshelo jo bosakhutleng ka Jesu Keresete Morena wa rona. (aiōnios g166)

7 A ga lo ise lo bo lo tlhaloganye, bakaulengwe ba Sejuta ba ba rategang mo go Keresete, gore fa motho a a swa, molao ga o sa tlhole o mo tlama? 2 Mmang ke tshwantshe: Fa mosadi a nyalwa, molao o mo golegelela mo monneng wa gagwe fela fa a sa ntse a tshela. Mme fa monna a a swa, mosadi ga a sa tlhole a golegeletswe mo go ene; melao ya lonyalo ga e sa tlhole e mo ama. 3 Mme o ka nna a nyalwa ke monna o sele fa a rata. Moo go ne go tlaa bo go sa siama fa monna a ne a sa ntse a tshela, mme go siame sentle fela fa monna a sule. 4 "Monna wa gago," mong wa gago e kile ya ne e le molao wa Sejuta; mme o ne wa "swa" jaaka o ka re o swa le Keresete mo mokgorong; mme ka o "sule", ga o sa tlhole o "Nyetswe ke molao," le gone molao ga o sa tlhole o na le taolo mo go wena. Mme o ne wa boela mo botshelong gape fa Keresete a rula, jalo he o motho yo mosh. Mme jaanong o "nyetswe," go bua jalo ke raya gore, o nyetswe ke yo o tsogileng mo baswing, gore o tle o ungewe loungo lo lo siameng, ke gore ditiro tse di siameng tsa Modimo. 5 Erile fa tlhologo ya lona e kgologolo e sa ntse e dira mo nameng, dithato tsa bolelo di ne di dira mo go lona, di lo batlisa go dira sengwe le sengwe se Modimo o neng o re lo seka lwa se dira, lo ungewa ditiro tsa bolelo, loungo lo lo bolayang lwa loso. 6 Mme jaanong ga lo sa tlhole lo tlhokana le go tshwenyega ka melao ya Sejuta le ngwao gonno lo ne lwa "swa" lo sa ntse lo le mo botshwarongjwa yone, mme jaanong lo ka direla Modimo tota; eseng ka tsela e kgologolo e ka yone lo neng lo obamela melao ka fa go batlwang ka teng, mme e leng ka tsela e ncha, (lo o obamela ka bojotlhe jwa dipelo tsa lona le maikutlo). 7 Mme jalo, a ke raya gore melao e ya Modimo e bosula? Nnyaa ga ke rialo! Molao ga o bolelo gonno ke one

molao o o mponsthiteng sebe sa me. Nkabo ke ile ka seka ka itse sebe se se mo pelong ya me, dithato tse di bosula tse di fitlheleng mo go yone fa molao o ne o sa re, "O seka wa nna le dithato tse di bosula mo pelong ya gago." 8 Mme sebe se dirisitse molao o kgathang le dithato tse di bosula ka go nkgakolola gore dithato tse di ntseng jalo ga di a siama ebile di tsosa mefuta yothle ya dithato tse di sa letlelelweng mo go nna! Fela fa go ne go sena melao e e ka rojwang go ka bo go sena bolelo. 9 Ke sone se ke neng ke ikutlwa sentle fa ke sa thaloganye se tota molao o neng o se batla. Mme erile fa ke sa sena go ithuta boammaaruri, ke ne ka lemoga gore ke robile molao ebile ke moleofi yo o tshwanetseng go swa. 10 Mme ka fa ke lemogileng ka teng, molao o o molemo o o neng o tshwanetse go ntshupegetsatsela ya botshelo o ne wa dira gore ke atholelwe loso. 11 Sebe sa ntsiatsa ka go tsaya melao e e molemo ya Modimo se e dirisa go nkatlholela loso. 12 Le fa go ntse jalo, lemoga gore molao ka bo one o ne o siame ebile o le molemo. 13 Mme moo go ka diragala jang? A molao ga se one o o dirileng gore ke atholelwe loso? Mme jaanong molao o ka nna molemo jang? Nnyaa, e ne e le sebe, ke selo sa bo-Satane, se se dirisitseng se se neng se le molemo go lere katholo ya me. Jalo o ka bona ka fa maikaelelong a sone a a bosula go bolaya le go atholela loso. 14 Molao o molemo, jalo he, molato ga o mo molaong o mo go nna, gonne ke rekisitswe mo bothankeng jwa sebe jaaka monngake. 15 Ga ke ithaloganye gothelele, gonne tota ke batla go dira se se molemo, mme ga ke kgone. Ke dira se ke sa se rateng go se dira, se ke se ilang. 16 Ke itse sentle gore se ke se dirang ga se a siama, le letswala me le le sa siamang le supa gore ke dumalana le melao e ke e robang. 17 Mme ga ke kgone go ithusa, gonne ga se nna ke se dirang. Ke sebe se se mo go nna ke sone se nonofileng go mpheta, ke sone se ntrisang dilo tse di bosula tse. 18 Ke itse gore ke bodile e le ruri ka nthla ya tholego ya me e kgologolo ya bolelo. Le fa ke re ke leka go tilela kae, ga ke kgone go itira gore ke dire tshiamo. Ke a rata mme ga ke kgone. 19 Fa ke batla go dira molemo ga ke o dire; mme fa ke leka gore ke se ka ka dira bosula, ke a bo dira. 20 Jaanong fa ke dira se ke sa rateng go se dira, go bonala sentle kwa molato o leng teng: Sebe se santse se nngaparetse ka bosula jwa sone. 21 Go bonala e le boammaaruri jo bo leng teng mo botshelong gore fa ke batla go dira se se siamang, ke hekeetsega go dira se se sa siamang. 22 Ke rata go dira go rata ga Modimo fela kafa tholegong yame e ncha e ntseng ka teng; 23 mme go na le selo sengwe mo botenyne jwa me, mo tholegong ya me e kgologolo, se se thabanang le thaloganyo ya me, mme se ntira mothanka wa bolelo jo bo sa ntseng bo le mo go nna. 24 Mo thaloganyong ya me ke batla go nna mothanka wa Modimo yo o ikemise-ditseng go dira go rata ga one mme mo boemong jwa moo ke iphihlhela ke sa ntse ke le mothanka wa bolelo. Jalo lo bona ka fa go ntseng ka teng: Botshelo jwa me jo bosha bo mpolelela gore ke dire molemo, mme tholego e kgologolo e e sa ntseng e le mo go nna e rata go leofa. 25 Oo, ke mo bothateng jo bo boitshegang jang! Emang yo o tlaa nkgololang mo bothankeng jo jwa tholego e ya loso. Ke leboga Modimo! Gonne go setse go dirilwe ke Keresete Morena wa rona. O nkgolotse.

8 Mme jaanong ga go na tshetso e e emet seng ba e leng ba ga Keresete Jesu. 2 Gonno nonofo ya Mowa wa botshelo, nonofo e e leng gore ke ya me ka Keresete Jesu, e nkgolotse mo bogaleng jwa sebe le loso. 3 Ga re bolokwe mo botshwarong jwa sebe ke go itse melao ya Modimo, gonno ga re ka ke le gone re bile ga re e tshetsetse, mme Modimo o ne wa dirisa leano lengwe go re boloka. O romile Morwaa one mo setshwanong sa rona, pharologanyo fela ke gore mebele ya rona e na le bolelo, mme Morwaa one ene o bolaila taolo ya sebe mo go rona ka go intsha sethabelo sa dibe tsa rona. 4 Jaanong re ka tshetsetsa melao ya Modimo fa re sala morago Mowa O O Boitshepo re bo re khutisa go obamela tholego e kgologolo e e bosula e e mo go rona. 5 Ba ba iteseletsang go laolwa ke ditsholego tsa bone tse di kgologolo ba tshetsetsa fela go itumedisa matshelo a bone, mme ba ba salang Mowa O O Boitshepo morago ba iphihlhela ba dira dilo tse di itumedisang Modimo. 6 Go sala morago Mowa O O Boitshepo go isa kwa botshelong le kagiso, mme go sala morago tholego e kgologolo go isa losong, 7 gonno tholego e kgologolo ya bolelo e e mo go rona e kgathang le Modimo. Ga e ise e ke e bo e obamela melao ya Modimo mme le gone ga e kita e e obamela. 8 Ke sone se e leng gore ba ba sa ntseng ba le ka fa tlase ga taolo ya bone e kgologolo ya bolelo, ba gapesetse ka fa go salang morago dikeletso tsa bone tse di kgologolo tse di bosula, ba ka se ke ba itumedisa Modimo. 9 Mme lona ga lo a nna jalo. Lo laolwa ke tholego ya lona e ncha fa mowa wa Modimo o nna mo go lona. (Mme gakologelwang gore le fa e le mang yo o senang Mowa wa ga Keresete, ga se Mokeresete gothelele). 10 Mme le fa tota Keresete a nna mo go wena, mmele wa gago o tlaa swa ka nthla ya sebe, mme mowa wa gago o tlaa tshela, gonno Keresete o o itshwaretse. 11 Mme fa Mowa wa Modimo, o o tsositseng Jesu mo baswing, o nna mo go lona, o tlaa dira gore mebele ya lona e e swang e tshetsetse morago ga lo o swa, ka one Mowa O O Boitshepo o, o o nnang mo go lona. 12 Jalo he, bakaulengwe ba me ba ba rategang, ga lo na ditshwanelo le fa e le dipe mo tholegong ya lona e kgologolo ya bolelo go dira se e batlang gore lo se dire. 13 Gonno fa lo tshetsetsa go e sala morago lo latlhelile ebile lo tlaa nyelela, mme fa ka nonofo ya Mowa O O Boitshepo lo e ripitla le ditiro tsa yone tse di bosula, lo tlaa tshela. 14 Gonno ba ba gogwang ke Mowa wa Modimo ke bana ba Modimo. 15 Jalo ga re a tshwanela go tshwana le batlhanka ba ba boi ba ba magatlapa, mme re tshwanetse go nna jaaka bana ba Modimo ka sebele, ba ba dirilwang bana ka go tsenngwa mo lwapeng lwa one, go mmita "Rara, Rara." 16 Gonno Mowa wa one O O Boitshepo o buisanya le rona mo botenyne jwa dipelo tsa rona, ebile o re bolelela gore re bana ba Modimo tota. 17 Mme ka re le bana ba one, re tlaa rua mahumo a one, gonno gotlhe mo Modimo o go neelang Morwaa one le rona jaanong ke ga rona. Mme fa e le gore re tshwanetse go nna le seabe mo kgalalelong ya gagwe le rona re tshwanetse go nna le seabe mo bogisiweng ga gagwe. 18 Le fa go ntse jalo dipogiso tsa rona tsa malatsi ano ga se sepe fa di tshwantshiwa le kgalalelo e o tlaa e re nayang mo nakong e e tlang. 19 Gonno lobopo lotlhe lo letetse lone letsatsi leo ka bopelotelele le ka tsholofelo fa Modimo o tlaa bo o tsosa bana ba one. 20 Gonno mo letsatsing

leo mitlwa, mesetlho, sebe, loso le go bola, dilo tse di neng tsa fenyha lefatshe kgatlhanong le keletso ya lone mo taolong ya Modimo di tlaa nyelela tsotlhe, le lefatshe le le re dikologileng le tlaa nna le seabe mo kgololesegong e e galalelang e bana ba Modimo ba e itumelelang ka go bo ba kgaogane le bole. 22 Gonne re itse gore le dilo tsa tlhologo, jaaka diphologolo le ditlhare, di boga bolwetse le loso di sa ntse di emetse tiragalo e kgolo e. 23 Mme le rona tota Bakeresete, le fa re na le Mowa O O Boitshepo mo go rona e le ketapele ya kgalalelo ya malatsi a a tlang, re tshwenyega gore re gololwe mo ditlhabing le mo tshotlegong. Le rona, ka tlhwaafalo re letetse letsatsi leo le Modimo o tlaa re neelang ditshwanelo tsa rona tsotlhe jaaka bana ba one, le mebele e mesha e o e re solofeditse, mebele e e se kitlang e tlhola e lwala gape ebile e se kitla e tlhola e e swa. 24 Re bolokilwe ka tsholofelo. Jalo he, tsholofelo e raya tebelelo ya go nna le sengwe se re iseng re nne naso, gonne motho yo a setseng a na le sengwe ga a thoke go solofela le go dumela gore o tlaa nna naso. 25 Mme fa re tshwanetse go nna re ikanya Modimo ka sengwe se se iseng se diragale, go re ruta go letela ka bopelotelele le ka boikanyo. 26 Gape ka yone tsela eo, ka tumelo ya rona, Mowa O O Boitshepo o re thusa mo matshwenyegong a rona a malatsi otlhe le mo go rapeleng ga rona. Gonne ga re itse le se tota re tshwanetseng go se rapelela, le ka fa re tshwanetseng go rapela ka teng; mme Mowa O O Boitshepo o re rapelela ka maikutlo a e leng gore ga a ka ke a tlhalosiwa ka mafoko ape. 27 Mme Rara yo o itseng dipelo tsotlhe o a itse, se Mowa o se buang jaaka o re rapelela ka kagiso le ka fa go rateng ga Modimo. 28 Jalo he, re itse gore gotlhe mo go re diragalelang go re direla bomolemo fa re rata Modimo ebile re tsena sentle mo maikaelelong a one. 29 Gonne go simologa kwa tshimologong Modimo o ne wa ikaelela gore ba ba tlang kwa go one, ebile ka o ne o ntse o itse gore e tlaa nna bo mang, ba tshwanetse go nna jaaka Morwaa one, gore Morwaa one a tle a nne motsalwa pele mo bakaulengweng ba le bantsi. 30 Mme erile Modimo o sena go re ithophela, o ne wa re biletisa kwa go one; mme erile fa re tla, wa re supa “re sena molato”, wa re tlatsa ka bomolemo jwa ga Keresete, wa re naya tshiamelo ya go ema le one, re le ba ba siamisitsweng, wa ba wa re solofetsa kgalalelo ya one. 31 Tota fela re ka reng kaga dilo tse di ntseng jaana tse di hakgamatsang? Fa Modimo o re eme nokeng, emang yo o ka nnang kgatlhanong le rona? 32 Ka Modimo o ise o ke o be o rekegele Morwaa one o ne wa mo ntshetsa go nna sethabelo sa rona rotlhe, a le ene tota ga a na go re naya sengwe le sengwe? 33 Ke mang yo o ka re bayang molato rona ba re itsheketsweng ke Modimo gore re nne ba one? A Modimo o tlaa dira jalo? Nnyaa! Ke one o o re itshwaretseng wa ba wa re naya tshwanelo ya go ema nao. 34 Emang jaanong yo o tlaa re sekisang? A Keresete o tlaa dira jalo? Nnyaa! Gonne ke ene yo o re swetseng a bo a boela mo botshelong gape ka ntsha ya rona, mme jaanong o ntse mo lefelong la tlotlo e kgolo go bapa le Modimo, ebile o a re rapelela. 35 Emang jaanong yo o ka re kgaoganyang le lorato lwa ga Keresete? Fa re na le mathata kgotsa re le mo tlalelong, fa re tsongwa kgotsa re bolawa, a ke ka ntsha ya gore ga a sa tlhole a re rata? A mme

fa re bolawa ke tlaa, kgotsa re sena madi, kgotsa re le mo diphatseng, kgotsa re tshosiwa ke loso, a Modimo o a bo o re latlhile? 36 Nnyaa, gonne Dikwalo di re bolelela gore ka ntsha ya gagwe re tshwanetse go ipaakanyetsa go lebagana le loso ka nako nngwe le nngwe ya letsatsi, re tshwana fela le dinku tse di emetseng go tlhajwa. 37 Mme mo godimo ga mo gotlhe, pheny e kgolo ke ya rona ka Keresete yo o re ratileng a bo a re swela. 38 Gonne ke tlhomamisa gore ga go na sepe se se ka re kgaoganyang le lorato lwa gagwe. Loso ga lo ka ke, le botshelo ga bo ka ke. Baengele ga ba ka ke, le dinonofa tsotlhe tsa molete ga di ka ke tsa re kgaoganya le lorato lwa Modimo. Dipoifo tsa rona tsa goompieno, boithobaelelo jwa rona kaga letsatsi le le latelang, 39 kgotsa fa re leng teng kwa godimodimo ga loapi, kgotsa mo lewatteng le le boteng-teng, ga gona sepe se se tlaa kgonang go re kgaoganya le lorato lwa Modimo lo lo supilweng ke Morena wa rona Jesu Keresete fa a re swela.

9 Ao Iseraele, batho ba me! Ao, bakaulengwe ba me ba Sejuta! Ke eletsa thata jang gore lo tle mo go Keresete. Pelo ya me e tshwenyegile ebile ke hutsahala mo go bothoko thata bosigo le motshegare ka ntsha ya lona. Keresete o a itse le Mowa O O Boitshepo o itse gore ga ke ake fa ke re ke eletsa go atholelwa loso lwa bosakhutleng fa e le gore go ka lo boloka. 4 Modimo o lo neetse mo go golo, mme lo santse lo sa o dumele. O lo tsera jaaka batho ba one ba ba itsheketsweng, jalo wa lo etelela pele ka lero le le phatshimang la kgalalelo wa bo wa lo bolelela ka fa o batlang go lo segofatsa ka teng. O lo neetse melao ya one ya botshelo jwa malatsi otlhe gore lo itse se o batlang lo se dira. O lo neile tshwanelo ya go mo obamela, wa ba wa lo naya ditsholofetso tse di kgolo. 5 Borraeno e ne e le badiredi ba bagolo ba Modimo, le Keresete e ne e le mongwe wa lona, e le Mojuta ka fa thilogong ya gagwe, ene yo jaanong a busang dilo tsotlhe. A go bakwe Modimo ka bosakhutleng! (aiōn 1:165) 6 Jalo he, a Modimo ga o a kgona go diragatsa ditsholofetso tsa one mo Bajuteng? Nnyaa! (Gonne ditsholofetso tse ke tsa ba e leng Bajuta tota). Mme ga se gore mongwe le mongwe yo o tsaletsweng mo go ba ntlo ya Sejuta ke Mojuta wa boammaaruri! 7 Lebaka la gore ba tswa mo go Aberahame ga le ba dire bana ba ga Aberahame tota. Gonne Dikwalo tsa re ditsholofetso tse ke tsa ga morwa Aberahame ebong Isake le losika lwa gagawe, le fa Aberahame a ne a na le bana ba bangwe gape! 8 Mo ga go reye gore bana bothle ba ga Aberahame ke ba Modimo, fa e se fela ba ba dumelang tsholofetso ya poloko e o e solofeditseng Aberahame. 9 Gonne Modimo o ne o solofeditse wa re, “Mo ngwageng e e tlang wena le Sara ke tlaa lo naya ngwana wa mosimane.” 10 Mme morago ga dingwaga, fa morwawe, Isake, a setse a godile ebile a nyetse, le Rebeka mosadi wa gagwe a tlaa tloga a mo tsholela mawelana, Modimo o ne wa raya Rebeka wa re, Esawe ngwana yo o tlaa tsalwang pele, o tlaa nna motlhanka wa ga Jakoba, lewelana la gagwe. 11 Jaaka mafoko a lokwala a re, “Ke thophile go segofatsa Jakoba, mme e seng Esawe.” 12 Mme Modimo o ne wa bua jaana pele ga bana ba tsholwa, pele ga ba dira se se molemo kgotsa se se bosula. 13 Se se supa gore Modimo o ne wa dira se o neng o se ikaeletse go tsweng kwa tshimologong; e ne e se ka ntsha ya se bana ba se dirileng

mme e ne e le ka nthla ya se Modimo o se batileng wa se ithophela. **14** A Modimo o ne o sa kgetholole? Nnyaa ga go a nna jalo. **15** Gonne Modimo o ne o reile Moshe wa re, "Fa ke batla go nna pelonomi mo go mongwe, ke tlaa dira jalo. Gape ke tlaa utlwela bothoko le fa e le mang yo ke batlang go mo utlwela bothoko." **16** Jalo he, masego a Modimo ga a bonwe ka nthla ya gore motho mongwe o ikaelela go nna nao kgotsa ka nthla ya gore o dira thata gore a nne nao. A bonwa ke ba Modimo o ba tlhomogelang pelo. **17** Farwe, Kgosi ya Egepeto, e ne e le sekai sa boammaaruri jo. Gonne Modimo o ne wa mmolelela gore o mo neetse bogosi jwa Egepeto ka maikaelelo a go supa nonofo ya one e e boitshegang ka ene: gore lefatsho lotlhe le tie le utlwe kaga leina la Modimo le le galalalang. **18** Jalo a lo a lemoga, Modimo o siametse bangwe, fela ka gore o batla go ba siamela, gape o dira gore ba bangwe ba gane go reetsa. **19** Jaanong ke eng fa Modimo o ba bona molato wa go tlhoka go reetsa? A ga baa dira se o dirileng gore ba se dire? **20** Nnyaa, se rialo. O mang wena yo o tshwa-yang Modimo diphoso? A selo se se dirileng se ka raya yo o se dirileng sa re, "Ke eng fa o ntirile jaana?" **21** Fa mmopi wa dinkgwana a bopa nkgwana ka mmopa, a ga a na tshwanelo ya go dirisa lone lekwete leo fela la mmopa go dira nkgwana e nngwe ntle, gore e dirisiwe mo go tlhomeng dithunya, mme e nngwe e dirisiwe go latlhela matlakala mo teng? **22** A Modimo ga o na tshwanelo e e itekane-tseng go supa bogale jwa one le nonofo mo go ba ba tshwanetseng go sennngwa, ba o ntseng o le pelotelele mo go bone mo nakong e yotho? **23** Gape o na le tshwanelo ya go tshola bangwe fela jaaka rona, ba re diretseng go tshola dikhumo tsa one tsa kgalalelo, le fa re ka ne re le Bajuta kgotsa Badichaba, le go re siamela gore mongwe le mongwe a kgone go bona ka fa kgalalelo ya one e leng kgolo thata ka teng. **25** Gakologelwang se seporofeto sa ga Hosea se se buang? Teng mo go Hosea Modimo wa re o tlaa itshenkela bana ba bangwe (ba ba sa tsweng mo lwapeng lwa one lwa Sejuta), o ba rate, le fa ope a ise a ke a ba rate. **26** Mme baheitane, ba ka bone go kileng ga twe, "Ga lo batho ba me, ba tlaa bidiwa bana ba Modimo o o tshelang." **27** Isaia moporofiti o ne a goeletsa kaga Bajuta a re, "Le fa ba ka ne ba le didikadike, ke palonyana fela e e seng kae e e bolokwang. **28** Gonne Morena o tlaa diragatsa katlholo ya gagwe mo lefatsheng, ka bofefo a khutlisa ditiro tsa gagwe, a di khutshwafatsa ka bomolemo." **29** Mme ke jaaka Isaia a rile, "Fela fa e ne e se ka kutlwelobothoko ya Modimo Bajuta botho ba ne ba tlaa nyelela." **30** Jaanong he, re tlaa reng kaga dilo tse? Re tlaa bua jaana re re, "Modimo o neetse Badichaba sebaka sa go gololwa ka tumelo, le fa tota ba ne ba ntse ba sa batle Modimo ka tlhwaafalo. **31** Mme Bajuta, ba ba neng ba leka ka thata yotho go siama mo Modimong ka go tshhegetsa melao ya one, ga ba a ka ba bona poloko. **32** Ke ka nthla yang? Ke ka nthla ya gore ba ne ba leka go bolokwa ka go tshhegetsa molao le go itshiamisa ka bo bone mo boemong jwa go ikaega mo tumelong. Ba kgopilwe ke lentswe le legolo le le kgopang. **33** Modimo o ba tlhagisitse ka se mo Dikwalong fa o re, 'Ke beile Lefika mo tseleng ya Bajuta, mme ba le bantsi ba tlaa kgotswa mo go lone, ebong Jesu. Ba ba dumelang mo go ene ga ba kitla ba tlhajwa ke ditlhong.'"

10 Bagaetsho ba ba rategang, keletso ya pelo ya me le thapelo ya me ke gore Bajuta ba bolokwe. **2** Ke itse ka fa ba tlhwaafaletseng go tlotla Modimo ka teng, mme le fa go ntse jalo ke tlhwaafalo e e seng ka fa mokgweng. **3** Gonne ga ba tlhaloganye gore Keresete o swetse go ba siamisa mo Modimong. Mo boemong jwa go tlhaloganya ba leka go itira tshiamo go gapa maikutlo a Modimo ka go tshhegetsa melao ya Sejuta le ngwao, mme moo ga se tselo ya Modimo ya poloko. **4** Ga ba tlhaloganye gore Keresete o neela ba ba mo ikanyang sengwe le sengwe se ba lekang go nna naso ka go tshhegetsa melao ya gagwe. O khutlisa goithe moo. **5** Gonne Moshe o kwadile gore fa motho a ne a ka nna molemo mo go senang le fa e le selabe, a ba a itisa mo thaelong yotho e sa ntse a tshela, a ba a sa leofe le fa e le gangwe, ke gone fela ka fa a ka itshwarelwang a bo a bolokwa. **6** Mme poloko e e tlang ka tumelo ya re, "Ga go tlhokege go puruputsha magodimo o batla Jesu Keresete o bo o mo folosa go tla go go thusa," ebile, **7** "ga go tlhokege gore o ye kwa baswing go lere Keresete mo botshelong gape." (*Abysso g12*) **8** Gonne poloko e e gautshwane mo go mongwe le mongwe wa rona; tota e gautshwane fela jaaka dipelo tsa rona le melomo. **9** Gonne fa o bolelela ba bangwe ka molomo wa gago gore Jesu Keresete ke Morena wa gago, o bo o dumela mo pelong ya gago gore Modimo o mo tsoisitse mo baswing, o tlaa bolokwa. **10** Gonne ke ka go dumela mo pelong ya gagwe gore motho o siama mo Modimong; mme ka molomo wa gagwe o bolelela ba bangwe kaga tumelo ya gagwe, a tlhomamisa kaga poloko ya gagwe. **11** Gonne Dikwalo di re bolelela gore ga go na ope yo o dumelang mo go Keresete yo o tlaa tlhabiswang ditlhong. **12** Mojuta le Modichaba ba tshwana fela mo lobakeng lo: Botho ba na le Morena a le mongwe yo ka bopelotshweu ja gagwe o abelang botho dikhumo tse ba di mo kopang. **13** Le fa e le mang yo o bitsang leina la Morena o tlaa bolokwa. **14** Mme ba tlaa mo kopa jang go ba boloka fa ba sa dumele mo go ene? Le gone ba ka dumela jang mo go ene fa ba ise ba ke ba bo ba utlwalele kaga gagwe? Gape ba ka utlwa jang kaga gagwe fa go sena ope yo o ba bolelelang? **15** Le gone mongwe o tlaa tsamaya jang a ya go ba bolelela kaga mongwe a sa mo rome? Ke sone se Dikwalo di buang kaga sone fa di re, "Ana go go ntle jang dinao tsa ba ba rerang Mafoko a kagiso le Modimo, ba bo ba lere mafoko a a itumedisang a dilo tse di molemo." Ka mafoko a mangwe ke gore, go amogelesega thata jang ba ba tlang ba rera Mafoko a Modimo a a Molemo! **16** Mme ga se mongwe le mongwe yo e a reng a utlwa Mafoko a a Molemo a a amogele, gonne Isaia moporofiti o rile, "Morena, ke mang yo o ntumetseng fa ke ba bolelela?" **17** Mme le fa go ntse jalo tumelo e tla ka go reetsa Mafoko a a Molemo a, Mafoko a a Molemo kaga Keresete. **18** Mme re tlaa reng ka Bajuta? A ba utlwile molaetsa wa Modimo? Ee, gonne molaetsa o ile gongwe le gongwe kwa ba leng teng, Mafoko a a Molemo a boletswe go ya khutlong tsa lefatsho. **19** Mme a ba ne ba tlhaloganya (gore Modimo o tlaa neela ba bangwe poloko fa ba gana go e amogela)? Ee, gonne le mo malatsing a bogologolo a lobaka lwa ga Moshe, Modimo o ne wa re o tlaa dira batho ba one go nna lefufa o bo o leka go ba tsosa ka go naya poloko ya one

dichaba tsa dielele tsa baheitane. 20 Mme moragonyana Isaia a bua ka bopelokgale a re "Modimo o tlaa bonwa ke batho ba ba neng ba sa o batle." 21 Mo lobakanyaneng lo, Modimo o tswelsetse ka go otlolela mabogo a one mo Bajuteng, mme ba tswelsetse ka go tatalala ba gana go tla mo go one.

11 Jaanong ke a botsa, A Modimo o ganne ebile o lathile batho ba one Bajuta? Nnyaa, le goka! Gakologelwang gore nna ke Mojuta, wa losika lwa ga Aberahame, wa lotso lwa ga Benjamine. 2 Nnyaa, Modimo ga o a latlha batho ba e leng ba one ba o saleng o ba ithophela go tsweng tshimologong. A lo gakologelwa se Dikwalo di se buang ka ga se? Elija moporofiti o ne a ngongorega mo Modimong kaga Bajuta, a bolelela Modimo ka fa ba bolaileng baporofiti ka teng ba bo ba rutlolola dibeso tsa Modimo; Elija o ne a bua gore e ne e le ene fela yo o setseng mo lefatsheng lotlhe a santse a rata Modimo, mme le ene ba ne ba leka go mmolaya. 4 A mme lo gakologelwa ka fa Modimo o neng wa mo fetola ka teng? Modimo o ne wa re, "Nnyaa, ga se wena o le nosi yo o setseng. Ke na le ba bangwe ba le diketse tse di supang kwa ntle ga gago, ba ba santseng ba nthata le gone ga ba ise ba ke ba obamele medimo ya disetwa." 5 Go ntse jalo le gompiano. Ga se Bajuta botlhe ba ba furaletseng Modimo; go na le ba se kae ba ba bolailweng ka nthla ya kutlwelobothoko ya Modimo ka go ba itshenkela. 6 Mme fa e le gore ke ka kutlwelo-boithoko ya Modimo, mme ga se ka nthla ya tshiamo ya bone. Gonne ka lebaka leo, neo ya mahala e ne e tlaa bo e sa tlhole e le mahala. Fa e direlwa ga e tlhole e le mahala. 7 Jalo, he, seemo ke se: Bajuta ba le bantsi ga ba a bona kutlwelobothoko ya Modimo e ba e batlang. Ba se kae ba e bonye, bone ba Modimo o ba ithophetseng, mme matlho a ba bangwe a fufaditswe. 8 Ke sone se Dikwalo tsa rona di se rayang fa di re Modimo o ba robaditse, o tswetse matlho le ditsebe tsa bone gore ba seka ba thaloganya se re se buang fa re ba bolelela Keresete. Nako kgolo ke eno ba ntse ba ntse fela jalo. 9 Kgosi Dafide o ne a bua kaga sone selo se fa a re, "A diji tsa bone tse di monate le masego a mangwe e nne seru mo go bone mo go itheyeng ga bone ba re gotlhe go siame fa gare ga bone le Modimo. A dilo tse di siameng tse di boele mo go bone di bo di ba wele mo ditlhogong go ba ripitla kwa ntle ga patiko. 10 A matlho a bone a fifale gore ba seka ba bona, o bo o ba obe mekwatla ka mokgweleo o o bokete ka bosakhutleng." 11 A mo go raya gore Modimo o lathetse ruri batho ba one Bajuta? Nnyaa, ga go a nna jalo! Maikaelelo a one e ne e le go dira gore poloko ya one e bonwe ke Badichaba, gonne Bajuta ba ne ba tlaa fufega ba bo ba simolola go ipatlela poloko ya Modimo ka bo bone. 12 Jaanong fa e le gore lefatsheng lotlhe le humisitswe ka nthla ya neo ya Modimo ya poloko, erile fa Bajuta ba kgotswa mo go yone ba bo ba e itatola, akanyang gore lefatsheng le le tlaa nna le seabe sa lesego le legolo thata jang motlhang Bajuta le bone ba tiang kwa go Keresete. 13 Jaaka lo itse, Modimo o nthophetse go nna morongwa wa bothokwa mo go lona badichaba. Ke gatelela selo se, ebile ke gakolola Bajuta kaga sone gangwe le gape fela ka fa ke ka kgonang ka teng, 14 gore e re fa go kgonega ke tle ke ba ratise se lona Badichaba lo nang naso mme ka yone tsela eo ke boloke bangwe ba bone. 15 Mme go tlaa nna go ntle thata jang fa ba nna Bakeresete!

Erile fa Modimo o ba furaela go bo go raya gore o retlogetse kwa go Badichaba go ba naya poloko ya one; mme jaanong ebile go go ntle thata fa Bajuta ba tla mo go Keresete. Go tlaa bo go tshwana le batho ba ba suleng ba boela mo botshelong. 16 Mme ka Aberahame le baporofiti e le batho ba Modimo, le bana ba bone e tlaa nna bana ba Modimo. Gonne fa medi ya setlhare e le boitshupo, dikala le tsone di tlaa nna fela jalo. 17 Mme dingwe tsa dikala tse, tse di tswang mo setlhareng sa ga Aberahame, dingwe tsa Bajuta, di kgaotswe. Mme lona Badichaba ba lo foo lo le dikala, a re re kgotsa, lo ditlhare tse di neng di kgaotswe mo motlhwang wa naga, lwa lomelelwa mo go one. Jaanong le lona, lo amogela lesego le Modimo o le solofeditse Aberahame le bana ba gagwe, lo tlhakanela go ja dikotla tsa Modimo. 18 Mme o ikele tlhoko o seka wa ipelafatsa ka go lomelelwa ga gago mo motlhwang go emisetsa dikala tse di neng di kgaotswe. Gakologelwa gore o bothokwa fela ka nthla ya gore jaanong o kala ya setlhare sa Modimo; o kala fela, e seng modi. 19 Mme o ka ne o re, "Hei, dikala tsele di ne di kgaolelwa gore ke tle ke lomelelwe, jalo, he, mo go raya gore ke tshwanetse ka be ke siame tota." 20 Tlhokomelang Gakologelwang gore dikala tseo, ebong Bajuta ba lomolotswe ka nthla ya gore ba ne ba sa dumele Modimo, mme wena o foo fela ka gore o a dumela. Se nne le boikgogomoso, nna le boingotlo le go leboga gape o ikele tlhoko. 21 Gonne fa Modimo o ise o ke o rekegele dikala tse o neng wa di thogisa pele, le wena ga o na go go rekegela. 22 Lemoga ka fa Modimo o leng pelonomi le pelo-e-thata ka teng. O pelo e thata mo go maswe mo go ba ba sa o reetseng, mme o molemo thata mo go wena fa o tswelela ka go o rata le go o ikanya. Mme fa o sa dire jalo, le wena o tlaa kgaolwa. 23 Gape, fa Bajuta ba kgaogana le go tlhoka go dumela ga bone mme ba boela kwa Modimong, Modimo o tlaa ba lomelela gape mo setlhareng. O na le nonofo go dira jalo. 24 Gonne fa Modimo o ne wa lo tsaya lona ba lo neng lo le kgakala nao, lo le dikala tsa motlhwang wa naga, wa ba wa lo lomelela mo setlhareng sa one se se molemo, a ga lo bone gore o tlaa bo o ipaakanyeditse go lomelela Bajuta ba ba neng ba le foo lwa nthla? 25 Ke batla gore lo itse kaga boammaaruri jo, jo bo tswang kwa Modimong, bakaulengwe ba ba rategang, gore lo tlo lo seka lwa ikgogomosa lwa simolola go belafala. Ee, ke boammaaruri gore jaanong bangwe ba Bajuta ba itirile go nna kgathano le Mafoko a a Molemo, mme mo go tlaa nna fela jalo go fithelela lona Badichaba lo tla mo go Keresete. 26 Mme hong Chaba yotlhe e tlaa bolokwa. A lo gakologelwa se baporofiti ba se buileng kaga se? "Go tlaa tswa Mogolodi mo Siona, mme o tlaa sokolola Bajuta mo boikepong jotlhe. 27 Ka nako eo ke tlaa tlosa dibe tsa bone tsothe, fela jaaka ke solofeditse." 28 Jaanong bontsi jwa Bajuta ke baba ba Mafoko a a Molemo. Ba a a ila. Mme mo go lo solegela molemo, gonne go dirile gore Modimo o lo neye dineo tsa one lona Badichaba. Legale Bajuta ba sa ntse ba ratwa ke Modimo ka nthla ya ditsholofetso tsa one mo go Aberahame, Isake le Jakoba. 29 Gonne Modimo ga o ke o busetsa morago dineo le pitso ya one; ga o kitla o boela kwa morago mo ditsholofetsong tsa one. 30 Lo kile lwa bo lo le batsuulodi ba Modimo, mme erile fa Bajuta ba gana dineo tsa one, Modimo mo boemong jwa go

gana ga bone wa nna kutlwelo bothoko mo go lona. **31** Mme jaanong Bajuta ke batsuulodi, legale letsatsi lengwe le bone ba tlaa balelwa mo kutwelong bothoko ya Modimo fela jaaka lona. **32** Gonne Modimo o ba dirile baleofi botlhe gore o tle o ba utliwele bothoko botlhe ka go tshwana. (elešē g1653) **33** Ana re na le Modimo O O molemo jang? Bothale jwa one le kitso le dikhumo tsa one di dikgolo jang! Ga go kgonege jang mo go rona go thaloganya maikaelelo a One le ditsela tsa One. **34** Gonne ke ofe mo go rona yo o ka itseng mogopolo wa Morena? Ke mang yo o ka itseng sentle go ka nna mogakolodi le mogogi wa one? **35** Gape ke ofe yo o ka abelang Morena sengwe se se lekanyeng pele go mo thotholetsa gore le ene a tle a mo direle sengwe? **36** Gonne sengwe le sengwe se ntse ka nonofo ya one. A kgalalele e nne mo go one ka bosakhutleng. (aiōn g165)

12 Ke gone, bagaetsho, ke a lo rapela gore lo neele Modimo mebele ya lona. A mebele ya lona e nne sethabelo se se tshelang, e le boitshepo, e le mofuta o Modimo o ka o amogelang. Fa lo akanya kaga se o se lo diretseng, a lo fitihela e le gore se o se lopang se segolo thata. **2** Se gapiweng ke mokgwa le ngwao ya lefatsho leno, mme nnang batho ba basha ba ba pharologanyo ba na le maikutlo a masha mo go tsothetse ba di dirang le tse ba di akanyang. Mme lo tlaa itemogela ka fa ditsela tsa Modimo di tlaa lo itumedisang ka teng. (aiōn g165) **3** Jaaka morongwa wa Modimo ke neela mongwe le mongwe wa lona tlhagiso ya Modimo: Ikanyengeng mo go kaeng seemo sa lona mo Modimong, lo lekanya letlotlo la lona gore Modimo o le lo neetse ka tumelo e e selekanyo se kae. **4** Fela jaaka go na le ditokololo di le dintsi mo mebeleng ya rona, mmele wa ga Keresete o ntse fela jalo. Rotlhe re ditokololo tsa one, mme go raya gore rotlhe fa re kopanye re dira mmele o o feletseng, gonne mongwe le mongwe wa rona o na le tiro e e farologanyeng go e dira. Jalo he, re ruanye, mongwe le mongwe o tlhokana le ba bangwe. **6** Modimo o neetse mongwe le mongwe wa rona nonofo go dira dilo dingwe sentle. Jalo fa Modimo o go neetse nonofo ya go porofesa dira jalo fa go kgonega ka dinako tsothetse tumelo ya gago e nonofileng o amogela molaetsa o o tswang kwa Modimong. **7** Fa e le gore neo ya gago ke ya go direla batho sentle, ba direle sentle. Fa o le moruti, dira tiro e ntle ya go ruta. **8** Fa o le moreri, bona gore dithero tsa gago di nonofile di bile di na le thuso. Fa Modimo o go file madi, nna pelotshweu mo go thuseng ba bangwe ka one. Fa Modimo o go file nonofo ya go laola ebile o go dirile mothokomedi wa tiro ya ba bangwe, tsaya tiro eo ya boikarabelo ka tlhwaafalo. Ba ba gomotsang ba ba hutsahetseng ba tshwanetse go dira jalo ka lorato lwa Sekeresete. **9** Se ipeye fela jaaka o ka re o rata ba bangwe: Ba rate ka boammaaruri. Ila se se sa siamang. Ema le bomolemo. **10** Ratang ka lorato lwa sekaulengwe lo bo lo itumelelane mo go tlotlaneng. **11** Se nneng ditshwakga mo tirong ya lona mme direlang Modimo ka tlhwaafalo. **12** Itumeleleleng gotlhe mo Modimo o go lo baakanyetsang. Nnang pelotelele mo mathateng, lo bo lo nne mo thapelong malatsi otlhe. **13** Fa bana ba Modimo ba tlhoka, a e nne wena o ba thusang. O bo o itlwaetse mokgwa wa go nna o laletsa baeng dijo kwa lapeng la gago, kgotsa le fa ba tlhoka boroko o ba bo

neye. **14** Fa mongwe a go sotla ka nthla ya gore o Mokeresete, se mo hutse; mo rapelele gore Modimo o mo segofatse. **15** Fa ba bangwe ba itumetse, itumelele nabo. Fa ba utlwile bothoko, utlwa bothoko nabo. **16** Dirisanyang ka boitumelo. Se lekeng go ikgodisa. Se lekeng go ithatisa batho ba maemo a a kwa godimo, mme itumeleleleng go nna mo lesomong la batho ba ba kwa tlase. Le gone lo seka lwa ikgopola gore lo bothale. **17** Se busoloseng bosula ka bosula. Dirang dilo ka tsela e e leng gore mongwe le mongwe o ka bona gore lo ikanyega mo go tsone. **18** Se omaneng le ope. Nnang kagiso le mongwe le mongwe, ka fa nonofong ya lona. **19** Bagaeatsho ba ba rategang, se ipusolosetseng. Tlogelang moo mo Modimong, gonne o rile o tlaa duela ba ba tshwanetsweng ke tuelo. (Se itseeleleng molao ka mabogo a lona). **20** Mo boemong jwa go dira jalo, fa mmaba wa gago a bolailwe ke tlala, mo fe dijo. Fa a tshwerwe ke lenyora mo nose, ka go dira jalo, o tlaa bo o "Tlhatlaganya magala a molelo mo thogong ya gagwe." Ka mafoko a mangwe o tlaa ithlhelwa ke diithong ka nthla ya se a se go diretseng. **21** Se dumeleng go fennngwa ke bosula mme fenyang bosula ka go dira tshiamo.

13 Obamelang mmuso, gonne o tlhomilwe ke Modimo, ga go na mmuso le fa e le kae o o sa thongwang ke Modimo go laola. **2** Jalo ba ba ganang go obamela melao ya mmuso ba gana go obamela Modimo, mme kwathao e tlaa nna teng. **3** Gonne lepodisi ga se setshosa mo go ba ba dirang tshiamo; mme ba ba dirang bosula ba tlaa aga ba le boifa. Jalo fa o sa batle go tshelela mo poifong, tshegetsatsa melao mme o tlaa tswelela sentle. **4** Lepodise le romilwe ke Modimo go go thusa. Mme fa o dira sengwe se se bosula, ee, o tshwanetse go tshoga, gonne le tlaa go tshwara gore o otlhaiwe. Le rometswe ke Modimo go dira yone tiro eo. **5** Obamela melao, mme ka nthla ya mabaka a mabedi a: lebaka la nthla ke go go dibela gore o seka wa otlhaiwa, mme lebaka la bobedi ke fela ka gore o itse gore o tshwanetse go obamela. **6** Duelang le makgetho a lona, ka nthla ya one mabaka a mabedi a. Gonne badiredi ba mmuso ba tlhoka go duelwa gore ba tle ba nne ba tswelela ba dira tiro ya Modimo, ba lo direla. **7** Duelang mongwe le mongwe ka se a tshwanetseng go duelwa ka sone: Duelang makgetho a lona ka boitumelo lo bo lo duele goromente makgetho a dithoto tse di tsenang mo lefatsheng ka phuthologo, ikobeleng ba ba lo okametseng, lo bo lo tlotle ba ba tshwanetseng go tlotlwa, **8** Duelang melato yotlhe fa e se fela molato wa lorato mo go ba bangwe, se khutlise go o duela! Gonne fa lo ba rata, lo tlaa bo lo obamela gotlhe ga melao ya Modimo, lo diragatsa tsothetse di batlwang. **9** Fa o rata mongwe ka wena fela jaaka o ithata, ga o na go rata go mo utlwa bothoko kgotsa go mo tsietsa, kgotsa go mmolaya kgotsa go mo utswela. Gape ga o na go dira bolelo le mosadi wa gagwe, kgotsa go batla se e leng sa gagwe, kgotsa go dira le fa e le eng se melao e e some e reng ga se a siama Yotlhe ka bosome jwa yone e akareditswe mo molaong o o reng, "Rata mongwe ka wena jaaka o ithata." **10** Lorato go lo direle ope bosula. Ke sone se e leng gore lo diragatsa gotlhe mo go batlwang ke Modimo. Ke one molao o le nosi fela o lo o tlhokang. **11** Lebaka le lengwe la go tshela ka

tlhamalalo ke le: lo itse gore nako e setse e fetile thata jang: nako e a fela. Tsogang, gonne go tla ga Morena go gautshwane jaanong, go na le jaaka re ne re dumela lwa nthla. **12** Bosigo bo setse bo fetile, letsatsi la go bowa ga gagwe le tlaa tloga le goroga. Jalo latlhang ditiro tse di bosula tsa lefifi lo apare seaparo sa tshiamo sa go tshela ka tlhamalalo, jaaka rona ba re nnang mo leseding re tshwanetse go dira! **13** Nnang molemo le boammaaruri mo go sengwe le sengwe se lo se dirang gore bothe ba tle ba dumelane le maitseo a lona. Se diriseng nako ya lona mo mediring e e sa siamang, le mo go tagweng kgotsa mo kgokafalong le dithato tsa nama, kgotsa mo ntweg, kgotsa mo lefufeng. **14** Mme kopang Morena Jesu go lo thusa go tshela jaaka lo tshwanetse, le gone lo se ka lwa etleeletsana nama go diragatsa dithato tsa yone.

14 Amogelang ka boitumelo mokaulengwe mongwe le mongwe yo o batlang go dirisanya le lona, le fa tumelo ya gagwe e le bokoa. Se mo tshwayeng diphoso ka go nna le megopolo e e farologanyeng le ya lona ka se se siameng le se se sa siamang. **2** Sekai ke se, se ngangisanyeng nae kaga gore a go tshwanetse kgotsa ga go a tshwa-nela go ja nama e e tlhabetsweng medimo ya disetwa. Wena o ka ne kgotsa o dumela gore ga go na sekgopi mo go e jeng, mme tumelo ya ba bangwe e bokoa; ba gopola gore ga go a siama, mme ba tlaa tswela ba ikitsa nama eo gotlhelele, ba je merogo fela go na le go ja nama e e ntseng jalo. **3** Ba ba bonang go ba siametse go ja nama e e ntseng jalo, ba seka ba nyatsa ba ba sa e jeng. Mme fa o le mongwe wa ba ba sa e jeng, se tshwaye phoso ba ba e jang. Gonne Modimo o ba amogetse go nna bana ba one. **4** Ke batlhanka ba Modimo, ga se ba gago. Ba tlaa ikarabela mo go one, e seng mo go wena. A Modimo o ba bolelele ka bo one gore a ba siame kgotsa ga ba a siama. Gonne Modimo o nonofile go ba dira gore ba dire ka fa ba tshwanetseng go dira ka teng. **5** Bangwe ba gopola gore Bakeresete ba tshwanetse go tshetsa malatsi a Sejuta a boikhutso e le malatsi a a thophegileng go obamela Modimo. Mme bangwe ba re ga go a siama go itshwenya ka dilo tse di ntsengjaana, gonne malatsi otlhe ka go tshwana ke a Modimo. Malebang le dipotso tse di ntsengjaana, mongwe le mongwe o tshwanetse go ikanyetsa. **6** Fa o na le malatsi a a thophegileng a go obamela Morena, o leka go mo tlotla; o dira selo se se molemo. Le motho yo o jang nama e e tlhabetsweng medimo ya disetwa o ntse fela jalo; o leboga Morena ka yone; le ene o dira sentle. Mme le motho yo o sa batleng go ama nama eo, le ene o gakaletse go itumedisa Morena gape o a leboga. **7** Ga re itaolele go tshela le go swa jaaka rona re ne re ka ithophela. **8** Gonne le fa re tshela, re tshela Morena, le fa ree swa re swela Morena. Re ba Morena ntheng tsoitlhe. **9** Gonne Keresete o ne a swela a bo a rulela one mogopolo o, gore a nne Morena wa rona rotlhe fa re santse re tshela le fa ree swa. **10** Ga o na tshwanelo ya go tshwaya wa gaeno diphoso kgotsa go mo nyatsa. Gakologelwa gore, mongwe le mongwe wa rona o tlaa ikarabela fa pele ga setilo sa tshetlo sa Modimo. **11** Gonne Jehofa o kwadile a re, "Jaaka ke tshedile, mangole otlhe a tlaa nkhubamela, le diteme tsoitlhe di tlaa ipolelela Modimo." **12** Ee, mongwe le mongwe wa rona o

tlaa ikarabela mo Modimong. **13** Jalo he, lo seka lwa tlhola lo nyatsana. Mo boemong jwa moo, leka go tshela ka tsela e e leng gore ga o kitla o dira gore wa gaeno a kgopiwe ka go dira gore a bone o dira se ene a ithayang a re ga se a siama. **14** Tota fela nna, ke tlhomamisa sentle fela thata mo taolong ya Morena Jesu gore, ga go na molato ope mo go jeng dijo tse di tlhabetsweng medimo ya disetwa. Mme fa mongwe a dumela gore go phoso, hong a seka a e ja ka nthla ya gore mo go ene ke molato. **15** Mme fa mokaulengwe wa gago a tshwenyega ka se o se jang, ga o dire ka la foratong fa o tswela ka go se ja. Se dire gore se o se jang se koafatse mongwe yo Keresete o mo swetseng. **16** Se dire sepe se se tlaa go iteising letsvalo le fa tota o itse gore se o se dirang se tlhamaletse. **17** Gonne tota fela, sa bothokwa mo go rona re le Bakeresete, ga se se re se jang kgotsa se re se nwang fa e se go dira bomolemo le kagiso le boitumelo jo bo tswang mo Moweng O O Boitshepo. **18** Fa o letla Keresete go nna Morena mo dilong tse, Modimo o tlaa itumela; fela jalo le ba bangwe ba tlaa itumela. **19** Ka yone tsela e, ikaelelele go agisanya ka kagiso mo phuthegong lo bo lo leke go agelelana ka go godisanya mo tumeleng. **20** Lo seka lwa senya tiro ya Modimo ka nthla ya dijo. Gakologelwang gore, ga go na sepe se se molato mo nameng, mme go phoso go e ja fa e kgopisa yo mongwe. **21** Selo se se siameng go dirwa ke go tlogela go ja nama kgotsa go nwa mofine kgotsa go dira sengwe se se kgopisang mokaulengwe wa gago kgotsa se mo leofisa. **22** O ka itse gore ga go na molato mo go se o se dirang, le ka fa BoModimong, mme se ipolokele mo pelong; se supe tumelo ya gago ka boikgogomoso fa pele ga ba bangwe, ba e ka reng kgotsa ya ba kgopisa. Ka mabaka a a ntseng jaana, go sego motho yo o sa leofeng ka go dira se a it seng gore se siame. **23** Mme le fa e le mang yo o dumelang gore selo se o batlang go se dira ga se a tshwanela, a seka a se dira. Fa a se dira o a leofa, gonne o akanya gore ga se a siama, jalo he, mo go ene ga se a tshwanela. Le fa e le eng se se dirwang kwa ntle ga se a bonang se siame, ke sebe.

15 Le fa re dumela gore go dire pha rologanyo epe mo Moreneng fa re dira dilo tse, le fa go ntse jalo ga re na go tswela pele re dira re iitumedisa; gonne re tshwanetse go rwala "mokgweleo" wa go akanyetsa dipelaelo le dipoi fo tsa ba bangwe, tsa ba ba bonang gore dilo tse ga di a siama. A re itumediseng yo mongwe, e seng rona, re bo re dire se se tshwanetseng tshiamo ya gagwe gore re mo age mo Moreneng. **3** Keresete ga a ise a ke a iitumedise. Jaaka Mopesalema a rile, "O tletse one maikaelelo a go bogisiwa ke mathlha a ba ba kgatthanong le Morena." **4** Dilo tse, tse di neng di kwadiwe mo dikwalong bogologolo di tshwanetse go re ruta bopelo-telele le go re kgothatsa, gore re tle re tlhame mogopolo kwa pele re solofetse nako ya fa Modimo o tlaa bong o fenywa sebe le loso. **5** A Modimo o o nayang bopelotelele, boiketlo, le kgothatso o lo thuse gore lo tshedisanye ka kutlwano, mongwe le mongwe mo go yo mongwe ka mokgwa wa ga Keresete. **6** Ke gone rotlhe re ka galaletsang Morena mmogo ka lentswe le le lengwe fela, re galaletsa Modimo, Rara wa Morena wa rona Jesu Keresete. **7** Jalo he, amogelanang ka boitumelo mo phuthegong, fela jaaka

Keresete a lo amogetse ka boitumelo; ke gone Modimo o tlaa galalediawang. **8** Gakologelwang gore Jesu Keresete o tletse go supa gore Modimo o boammaaruri mo ditsholofe-tsong tsa one le go thusa Bajuta. **9** Gape gakologe-lwang gore o tletse le gore Badichaba ba bolokwe mme ba galaletse Modimo ka ntsha ya kutlwelo bothoko ya one mo go bone. Ke sone se Mopesalema a neng a se raya fa a kwala a re, "Ke tlaa go galaletsa mo go Badichaba, ke bo ke baka leina la gago." **10** Mme o buile mo felong gongwe a re, "Itumeleng, lona Badichaba, mmogo le batho ba one Bajuta." **11** Mme gape a re, "Galaletsang Morena, lona Badichaba, a mongwe le mongwe a mo galaletse." **12** Le moporofiti Isaia o rile, "go tlaa nna morua-boswa mo lotsong lwa ga Jesu, mme o tlaa nna Kgosi ya Badichaba; ba tlaa solofela mo go ene a le nosi." **13** Jalo ke a lo rapelela Badichaba gore Modimo o o lo nayang tsholofelo o tle o lo itumedise o lo tlatsa ka kagiso fa lo ntse lo dumela mo go one. Ke rapela gore Modimo o lo thuse gore lo tlae tsholofelo mo go one ka nonofo ya Mowa O O Boitshepo mo go lona. **14** Ke itse gore lo bothale ebile lo molemo, bagaetsho, le gore lo itse dilo tse sentle thata mo e leng gore lo kgona go ruta bangwe ka ga tsone. **15** Mme fela jalo ke ntse ke na le bosena-poifo go gatelela mangwe a mabaka a, ke itse gore gotlhe mo lo go tlhokang ke yone kgakolole e, e e tswang mo go nna; gonne ka ntsha ya tshagofatso ya Modimo ke morongwa wa bothokwa go tswa mo go Jesu Keresete go ya kwa go lona Badichaba, ke lo leretse Mafoko a a Molemo ebile ke lo ntsha jaaka sethabelo se se lebosegang mo Modimong; gonne lo ntlafaditswe lwa ba lwa dirwa go mo itumedisa ka Mowa O O Boitshepo. **17** Jalo go ntshiametse go ipelafatsa go le gonnye kaga se Keresete Jesu o se dirileng ka nna. **18** Ke na le poifo go bua sentle thata ka fa a dirisitseng ba bangwe ka teng, mme legale ke itse se fela; o ntritsitse go gapela Badichaba mo Modimong. **19** Ke ba gapile ka molaetsa wa me le ka tsela e e molemo e ke neng ke itshotse mo go bone ka yone, le ka dikgakgamatso tse di dirilweng ka nna e le ditshupo tse di tswang kwa Modimong, tsotlhe fela e le ka nonofo ya Mowa O O Boitshepo. Ka yone tsela e, ke rerile mafoko a a Molemo a a tletseng a ga Keresete mo tseleng yotlhe go tsweng kwa Jerusalema go fitlha kwa Ilirikama. **20** Mme legale mo lobakeng lo lotlhe, maikaelelo a me e ntse e le go re ke fetele kwa pele, ke rere kwa leina la ga Keresete le iseng le ke le utlwale teng, go na le go rera kwa phuthego e setseng e simolotswa ke mongwe teng. **21** Ke ntse ke setse morago leano la ga Keresete le le buiwang mo dikwalong mo Isaia a reng, "Ba ba iseng ba ke ba bo ba utlwe kaga leina la ga Keresete pele ba tlaa bona ebile ba tlaa thaloganya." **22** Tota, leo ke lone lebaka le ke ntseng ke sa lo etele ka lone. **23** Mme legale jaanong ke feditse tiro ya me fano, ke setse ke siametse go tla jaanong morago ga dingwaga tse tsotlhe tsa tetelo. **24** Gonne ke ikaelela go ya kwa Sepaina, mme fa ke ya teng, ke tlaa ema mo Roma; mme fa re sena go nna mmogo ka lobakanyana ke gone lo ka ntetlelang go tswela pele le mosepele wa me. **25** Mme pele ga ke tla koo, ke tshwanetse go fologela kwa Jerusalema ke isa mpho kwa Bakereseteng ba teng ba Sejuta. **26** Gonne lo bona gore Bakeresete ba Masedonia le Akaia ba ntsheditse Bakeresete ba Jerusalema

ba ba mo mathateng mpho. **27** Ba ne ba itumela thata go dira jaana, gonne ba ne ba ikutlwa gore ba kolota Bakeresete ba Jerusalema. Ka go reng? Gonne dikgang kaga Keresete di tsile kwa go bone di tswa kwa phuthegong e e mo Jerusalema. Mme ka ba amogetse neo e ntle e ya semowa ya Mafoko a a Molemo mo go bone, ba bona gore bonnyennyane jo le bone ba ka bo ba direlang ke go ba fa thuso ya tse di tlhokwang ke nama. **28** E tlaa re fela ke sena go gorosa madi a, le go fetsa tiro e ya bone e e molemo, ke tlaa tla go lo bona ke le mo tseleng ya me ya go ya Sepaina. **29** Mme ke tlhomamisa gore e tlaa re fa ke tla, ke lo tele lesego le legole le le tswang mo Moreneng. **30** A lo tlaa nna barapedi mmogo le nna? Ka ntsha ya Morena Jesu Keresete, le ka ntsha ya ka fa lo nang le lorato mo go nna ka teng, lo lo neetsweng ke Mowa O O Boitshepo, nthapedisang thata mo tironng ya me. **31** Rapelelang gore ke sirelediwe mo Jerusalema mo go ba e seng Bakeresete. Rapelelang gape gore Bakeresete ba teng ba itumelele go amogela madi a ke a isang kwa go bone. **32** Mme ke tlaa kgona go tla kwa go lona ka pelo e e itumetseng ka go rata ga Modimo, mme ke gone re tlaa ikhutsang mmogo. **33** Mme ke gone a Modimo wa rona, o o re nayang kagiso, o nne le lona lotlhe. Amen.

16 Febe, Mokeresete wa mosadi yo o rategang yo o tswang kwa motseng wa Kenkerea, o tlaa bo a tla go lo bona mo bogautshwaneng. O dirile ka bonatla mo phuthegong teng. Mo amogeleng jaaka kgaitadia-lona mo Moreneng, lo mo amogele ka boitumelo jwa Sekeresete. Mo thuseng fela thata ka fa lo ka kgonang ka teng, gonne o thusitse ba le bantsi mo go tse ba di tlhokang, le nna tota o nthusitse. **3** Ntumedisetsang Peresila le Akhwila. Ba ntse ba le badiri ka nna mo ditironng tsa ga Keresete Jesu. **4** Tota ba ne ba nntshetsa matshelo a bone sethabelo; mme ga se nna fela ke le nosi yo ke ba lebogang: diphuthego tsothe tsa Badichaba le tsone di a ba leboga. **5** Tswee-tswee ntumedisetsang bothle ba ba phuthaganelang go obamela mo tlung ya bone. Dumedisang Epaeneto tsala ya me e e molemo. Ke ene motho wa ntsha go nna Mokeresete mo Asia. **6** Ntumedisetsang le Maria, yo o dirileng ka bonatla jothle jwa gagwe go re thusa. **7** Ntumedisetsang Andorionikase le Juniase, ba losika lwa me ba ke neng ke le mo kgolegelong nabo. Ba tlotlwa ke baaposetoloi, ebile ba ne ba fetoga Bakeresete pele ga me. Tswee-tswee ba ntumedisetseng. **8** Dumedisang Ampeliato, yo ke mo ratang jaaka mongwe wa bana ba e leng ba Modimo tota, **9** le Urebano, modiri ka rona, le Setakese yo o rategang. **10** Gape go na le Apelese, monna yo o molemo yo Morena o mo ratang; mo ntumedisetseng. Lo bo lo ntumedisitse ba ba dirang kwa tlung ya ga Arisetobulu. **11** Ntumedise-tsang Herodione wa losika lwa me. Dumedisang magolegwa a ga Keresete kwa tlung ya ga Narekiso. **12** Dumedisang Teraefina le Teraefosa, badiredi ba Morena le Peresise moratwa yo o diretseng Morena ka natla yotlhe. **13** Ntumedisetsang Rufase yo o itshenketsweng ke Morena go nna wa gagwe tota; le mmaagwe yo o rategang yo le nna a neng a ntsaya fela jaaka ngwana wa gagwe. **14** Gape tswee-tswee ntumedisetsang Asenkerithase, Felogone, Heremesa, Petorabase le bakaulengwe ba bangwe ba ba nang nabo. **15** Ntumedisetsang Filologase, Julisa Nerease le kgaitadie, le Olimpase, le Bakeresete bothle ba ba nang

nabo. **16** Dumedisanyang ka boitumelo ka diatla. Diphuthego tsotlhe fano di a lo dumedisa. **17** Mme legale go santse go na le sengwe se ke batlang go se bua pele ga ke fetsa lokwalo lo. Tswang mo go ba ba dirang dikgaogano ebile ba senya tumelo ya boammaaruri ya batho, ba ruta dilo kaga Jesu tse di kgathanong le se lo se rutilweng. **18** Baruti ba ba ntseng jalo ga ba direle Morena wa rona Jesu, mme ba fufulela dimpa tsa bone fela. Ke dibui tse di itseng go bua mme batho ba ba bopegileng senyana mo tihaloganyong ba tle ba tsiediwe ke bone ka puo ya bone e e borethe. **19** Mme mongwe le mongwe o itse gore lo eme ka boikanyego le ka boammaaruri mo go intumedisang fela thata. Ke batla gore lo age lo le botlhale ka go itse bomolemo le go nna le poifo mo go se se bosula. **20** Modimo wa kagiso o tlaa tloga o ripitla Satane ka fa tlase ga dinao tsa lona. A masego a a tswang kwa go Morena wa rona Jesu Keresete a nne le lona. **21** Timotheo modiri ka nna, le Lukio le Jasone le Sosipatere, ba losika lwa me, ba lo eleletsa mathogonolo. **22** Nna, Teretio, yo ke kwalelang Paulo lokwalo lo, ke romela ditumediso tsa me le nna, ke le mokaulengwe mo Sekereseteng. **23** Gaio a re ke lo dumedise. Ke moeng wa gagwe, phuthego le yone e tshwarelwa fano mo lwapeng lwa gagwe. Eraseto, motlhokomedi wa matlotlo a motse, o a lo dumedisa fela jalo le Kwaretose mokaulengwe o a lo dumedisa. **24** Salang sentle. A tshегоfatso ya Morena wa rona Jesu Keresete e nne le lona lotlhe. **25** Ke lo neela mo Modimong, o o kgonang go lo nonotsha le go lo pepetletsa mo Moreneng, fela jaaka Mafoko a a Molemo a bua, le jaaka ke lo boleletse. Se ke leano la Modimo la poloko ya lona badichaba, le le neng le fitlhegile go tsweng kwa tshimologong ya metlha. (aiōnios g166) **26** Mme jaanong fela jaaka baporofiti ba sale ba bolela le jaaka Modimo o laotse molaetsa o o rerwa gongwe le gongwe, gore batho mo tikologong yotlhe ya lefatshe ba tle ba nne le tumelo mo go Keresete ba mo obamele. (aiōnios g166) **27** A Kgalalelo e nne go Modimo ka osi o o leng botlhale, ka Jesu Keresete Morena wa rona. Amen. Ke nna wa boammaaruri, Paulo (aiōn g165)

Bakorintha I

1 Lokwalo lo lo tswang kwa go Paulo, yo o thophilweng ke Modimo go nna morongwa wa ga Jesu Keresete, le mokaulengwe Sosethene. **2** A kwalela: Bakeresete ba ba kwa Korinta, ba ba biditsweng ke Modimo go nna batho ba one ba ba itshepitsweng ke Keresete Jesu. Le go: botlhe Bakeresete gongwe le gongwe, ba ba bitsang leina la ga Jesu Keresete, Morena wa rona le wa bone. **3** A Modimo Rraetsho le Morena Jesu Keresete a lo segofatse, a lo neye kagiso e kgolo ya pelo le mowa. **4** Ga ke ka ke ka khutlisa go leboga Modimo kaga dineo tse dintle tse o di lo neileng, gore jaanong lo bo lo le ba ga Keresete. **5** O humisitse botshelo jwa lona jotlhe. O lo neile nonofo ya go bua kaga gagwe le go lo naya go tlhologanya boammaaruri. **6** Se ke se lo boleletseng gore Keresete o ka se lo direla se diragetse! **7** Jaanong lo na le lethogonolo le tshagofatso; mpho nngwe le nngwe ya semowa le nonofo go dira go rata ga one, dilo tse ke tsa lona mo lobakeng lono lwa go letela go bowa ga Morena wa rona Jesu. **8** O tlaa lo thomamisa go ya bokhutlong gore lo thokisiwe boleo le molato ka letsatsi le o tlaa bowang ka lone. **9** Modimo ruri o tlaa lo direla se, gonne o dira ka metlha yotlhe se o se buang, ebile ke one o o lo bileditseng mo botsalanong jo bontle jo le Morwa one, e leng ene Keresete Morena wa rona. **10** Mme bakaulengwe ba ba tlotlegang, ke a lo kopa mo leineng la Morena wa rona Jesu Keresete go khutlisa dikganetsano mo gareng ga lona. A go nne le kutlwano e e siameng gore go se ka ga nna le diikgaogano mo phuthegong. Ke a lo kopa gore lo nne mogopolo mongwe fela, lo kopane mo kgopolong le mo boikaelelong. **11** Gonne bangwe ba ba nnang kwa tlung ya ga Keloe ba mpoletse ka dikgane-tzano le dikgogakgogano tsa lona, bakaulengwe ba ba rategang. **12** Bangwe ba lona ba re, “Ke molatedi wa ga Paulo,” ba bangwe ba re ke balatedi ba ga, Apolose kgotsa Petere, ba bangwe mo bojosing jwa bone ba re ke balatedi ba boammaaruri ba ga Keresete. **13** Mme jalo, e tswa e le ruri lo kgaogantse Keresete. Mme a nna Paulo, ke swetse dibe tsa lona? A go na le mongwe wa lona yo o kolobeditsweng mo leineng la me? **14** Ke leboga thata ka nako e ka gore ga ke a kolobetsa ope wa lona fa e se Kerisepo le Gaijo fela. **15** Gonne jaanong ga go na ope yo o ka akanyang gore ke ne ke batla go simolola sengwe se sesha; ke simolola “phuthego ya ga Paulo.” **16** Ee, ke kolobeditse ba ntlwa ya ga Setefanase. Ga ke gakologelwe gore a ke kile ka kolobetsa mongwe o sele. **17** Gonne Keresete ga a nithomela go tla go kolobetsa, fa e se go rera Mafoko a a Molemo; mme le thero ya me e utlwala e le bokoa, gonne ga ke tlatsa thero ya me ka mafoko a a boteng le tumo ya megopolo e e kwa godimo, ke tshaba go tima nonofo e kgolo e e mo molaetseng o o motlhofo wa mokgoro wa ga Jesu Keresete. **18** Ke itse sentle gore go utlwala go le boeleele thata mo go ba ba latlhegang, fa ba utlwa gore Jesu o swetse go ba boloka. Mme rona ba re bolokilweng re lemoga molaetsa o e le nonofo ya Modimo. **19** Gonne Modimo wa re, “Ke tlaa senya maano othe a batho a poloko, ga go re sepe gore a a ka bo a lebege a le bothhale go le kae, le go tlhokomologa

megopolo e e botoka ya batho, le e leng bathhalefi tota.” **20** Jaanong go ka tweng ka batho ba ba bothhale, barutegi ba, bakanoki ba ba bothhale ba dilo tse di kgolo tsa lefatshe le? Modimo o ba dirile gore botlhe ba lebege e le dieleele, wa ba wa supa bothhale jwa bone bo sena mosola. (aiōn g165) **21** Gonne Modimo mo bothhaleng jwa one o bone gore lefatshe ga le kitla le bona Modimo ka bothhale jwa motho; mme wa tsena wa boloka botlhe ba ba dumetseng molaetsa wa one o lefatshe le o bitsang boeleele le bomatla. **22** Go bonala go le boeleele mo Bajuteng ka gore ba batla sesupo se se tswang legodimong e le tshupo ya gore se re rwang go boammaaruri; mme ke boeleele mo go Badichaba ka gore ba dumela fela se se dumalanang le bothhale jwa bone le go re se lebege se le sentle mo go bone. **23** Jalo fa re rera kaga Keresete jaaka a swetse go ba boloka, Bajuta ba a kgopisega mme Badichaba bone ba re ke diphirimisi fela. **24** Mme Modimo o butse matlho a ba ba batlang poloko, Bajuta mmogo le Badichaba go bona gore Keresete ke nonofo e kgolo ya Modimo go ba boloka; Keresete ka bo ene ke pinagare ya leano la Modimo mo polokong ya bone. **25** Leano le la Modimo le go tweng ke “Boeleele” le bothhale thata go gaisa leano la bathhalefi, mme Modimo mo bokoeng jwa one, jwa gore Keresete a swe mo mokgorong o nonofile go gaisa batho botlhe. **26** Lemogang mo go lona, bakaulengwe ba ba tlotlegang, gore ba se kae fela ba lona ba ba latelang Keresete ba na le maina a magolo kgotsa nonofo kgotsa dikhumo. **27** Mo boemong jwa moo, Modimo o thophile ka bomo fela go dirisa ditlhaloganyo tse batho ba lefatshe ba di bonang di le boeleele, ebile di sena mosola, e le go tlhabisa ditlhalong batho ba lefatshe le ba ba bonwang ba tlhalefile thata, ebile ba le bagolo. **28** O tlhophile leano le le nyaditsweng ke lefatshe, le le kailweng e se sepe, mme a le dirisa go latofatsa batho ba lefatshe le ba tlotlang, **29** gore gongwe le gongwe ope a se ka a ikgantsha fa pele ga Modimo. **30** Gonne go tswa fela kwa Modimong gore lo nne le botshelo ka Jesu Keresete. O re bontshitse leano la Modimo la poloka; ke ene yo o dirileng gore re amogelesege mo Modimong; o re itshekisitse a bo a re itshepisa a bo a intsha thekololo ya poloko ya rona. **31** Jaaka mo dikwalong go tse, “Fa mongwe a ikgantsha a a ikgantshela fela kaga se Morena o se dirileng.”

2 Bakaulengwe ba ba rategang, erile fa ke tla kwa go lona ga ke a ka ka dirisa mafoko a boikgogomoso le megopolo e e nonofileng go lo bolelela molaetsa wa Modimo. **2** Gonne ke ne ke ikaeletse gore ke tlaa bua kaga Jesu Keresete fela le loso lwa gagwe mo mokgorong. **3** Ke tsile kwa go lona ke le bokoa, ke boifa ke roroma. **4** Mme thero ya me e ne e tlhamaletse, e sena puo e e tsietsang ya bothhale jwa setho, mme nonofo ya Mowa O O Boitshupo e ne e le mo mafokong a me, e supegetsa ba ba neng ba a utlwa gore molaetsa o ne o tswa kwa Modimong. **5** Ke ne ke dira se ka gore ke ne ke batla gore tumelo ya lona e nitame mo Modimong, e seng mo megopolong e megolo ya batho. **6** Le fa go ntse jalo fa ke na le Bakeresete ba ba nonofileng mo tumeleng ke a tle ke bua mafoko a bothhale jo bogolo, mme e seng a mofuta o o tswang mona lefatsheng, le e seng ka mofuta wa batho ba

lefatshe le, ba ba tlaa tlogang ba nyelela. (aiōn g165) 7 Makofa a rona a bothale ka gore a tswa mo Modimong, a re bolelela bothale jwa leano la Modimo le re le tising mo dikgalalelong tsa Legodimo. Leano le le ne le fithegile mo lobakeng lwa pele, le fa le ne la dirwa go re solegela molemo pele ga tshimologo ya lefatshe. (aiōn g165) 8 Mme batho ba bagolo ba lefatshe ga ba a ka ba le tthaloganyana; fa ba ne ba le tthalogantse, ba ka bo ba sa bapola Morena wa kgalalelo. (aiōn g165) 9 Ke sone se Dikwalo di se rayang fa di re, ga go na motho ope yo o kileng a bona, a utlwa kgotsa a akanya tse dintle tse Modimo o di baakanyeditseng ba ba ratang Morena. 10 Mme re itse kaga dilo tse ka gore Modimo o rometse Mowa wa one go re di bolelela, mme Mowa wa one o a puruputsha ebile o re bontsha diphiri tse di kwa teng tsa Modimo. 11 Ga go na ope yo o ka itseng se yo mongwe o se akanyang, kgotsa gore o ntse jang, fa e se ene motho yoo ka boene. Ebile ga go ope yo o ka itseng dikakanyo tsa Modimo fa e se Mowa wa Modimo ka bo-one. 12 Modimo o re neile Mowa wa one (eseng mowa wa lefatshe) go re bolelela kaga dineo tse di ntle tsa tshhegofatso tse Modimo o re di neileng. 13 Mo go lo boleleleng kaga dineo tse, re dirisitse one tota mafoko a re neng re a newa ke Mowa O O Boitshepo go tshalosa ditiro tsa Mowa O O Boitshepo. 14 Mme motho yo e seng Mokeresete ga a ka ke a tthaloganyana a bo a amogela megopolo e e tswang mo Modimong, e Mowa O O Boitshepo o re e rutang. E utlwala e le boeleele mo go ene, ka gore ke ba ba nang le Mowa O O Boitshepo fela ba ba ka tthaloganyang gore Mowa O O Boitshepo o rayang. Ba bangwe ga ba ka ke ba tthaloganyana. 15 Mme motho wa semowa o tthaloganyana dilo tsothe, le tse di tshwenyang ebile di palela motho wa lefatshe, yo o se ka keng a mo tthaloganyana gothelele. 16 Go ka nna jang? Gonne ka boammaaruri ga a ise a ke a itse dikakanyo tsa Morena, kgotsa le fa e le go di buisana nae, kgotsa go tshikinya mabogo a Modimo ka thapelo. Mme go bonala go hakgamatsa, rona bakeresete mo go rona re na le bothlha bongwe jwa dikakanyo le mogopolo wa ga Keresete.

3 Bakaulengwe ba ba rategang, ke ntse ke bua le lona jaaka ekete lo santse lo le bana mo bo-tshelong jwa Sekeresete, ba ba sa latelang Morena, mme lo latela dikeletso tsa lona; ga ke ka ke ka bua le lona jaaka fa ke ka bua le Bakeresete ba ba nonofileng, ba ba tletseng Mowa O O Boitshepo. 2 Ke tshwanetse go lo otla ka mashi e seng ka dijo tse di thata, gonne ga lo ka ke lwa kgona go di sila. Mme le jaanong lo santse lo tshwanetswe ke go otla ka mashi. 3 Gonne lo santse lo le Bakeresete ba ba botlana, ba lo laolwang ke dikeletso tsa lona; e seng tsa Modimo. Fa lo huhegelana mme lo ikaba ka ditlhopho tse di omanang, a se ga se supe gore lo sa le bananyana, lo batla tsela e e leng ya lona? Le fa go ntse jalo, lo dira jaaka batho ba eseng ba Morena gothelele. 4 Mme ke foo, lo omana ka gore a ke mogolo go feta Apolose, ebile lo kgaoganya phuthego. A se ga se supe gore lo godile go le gonye mo Moreneng? 5 Nna ke mang, mme Apolose ene ke mang mo e leng gore re ka tsosa kgang? Ka goreng, gonne re bathanka ba Modimo fela, mongwe le mongwe wa rona o na le dinonofa tse di faphegileng, mme ka thuso ya rona lo dumetse.

6 Tiro ya me e ne e le go jala peo mo dipelong tsa lona, mme tiro ya ga Apolose e ne e le go e nosetsa, mme e ne e le Modimo fela, e seng rona, o o godisitseng peo mo dipelong tsa lona. 7 Motho yo o jalang kgotsa yo o nosetsang ga a bothokwa thata, mme Modimo o bothokwa gonne ke one o o godisang dilo. 8 Apolose le nna re badiri mmogo ka maikaelelo a a tshwanang, le fa mongwe le mongwe wa rona a tlaa duelelwa tiro ya gagwe e a e dirileng ka bonatla. 9 Re badiri mmogo le Modimo. Lona lo tshimo ya Modimo, ebile; lo kago ya Modimo e seng ya rona. 10 Modimo mo bopelonoming jwa one o nthutle gore ke ka nna moitseanape wa moagi jang. Ke thomile motheo mme Apolose o agile mo go one. Mme yo o agang mo motheo o tshwanetse go thokomela thata. 11 Gonne ga go na ope yo o ka tlhomang motheo ope wa boammaaruri go gaisa o re setseng re na nao, ebong Jesu Keresete. 12 Mme go na le mekgwa e le mentsi thata e e ka dirisiwang go aga mo motheoong oo. Bangwe ba dirisa Gauta le Selefera le maje a a phatsimang; bangwe ba aga ka dikgong, le bojang, kgotsa ka lotlhaka! 13 Mme go tlaa tla lobaka lwa thathobo ka letsatsi la ga Keresete la Katholo go bona mofuta wa didirisiwa tse moagi mongwe le mongwe o di dirisitseng. Tiro ya mongwe le mongwe e tlaa tsennywa mo gare ga molelo go re botlhe ba tle ba bone gore a e tlaa tshhegetsela selekanyo sa yone kgotsa nnyaa, le gore go bonwe ka fa go dirileng ka teng. 14 Ke gone ka moo modiri mongwe le mongwe yo o agileng mo motheoong ka didirisiwa tsa dikago tse di siameng, le yo tiro ya gagwe e santseng e eme, o tlaa bona tuelo ya gagwe. 15 Mme fa ntlo e o e agileng ee sha, o tlaa nna le tathegelo e kgolo. Ene ka boene o tlaa bolokwa, mme o tlaa bolokwa jaaka motho yo o falolang mo kgabong ya molelo. 16 A ga lo lemoge gore lotlhe lo ntlo ya Modimo, le gore Mowa wa Modimo o nna mo go lona mo tlang ya one? 17 Fa mongwe a leswafatsa kgotsa a senya legae la Modimo, Modimo o tlaa mo senya. Gonne legae la Modimo le itshepile le phepa, mme ke lona legae leo. 18 Lesang go itsietsa. Fa lo ikaya lo le bothale jo bo feteletseng, jaaka go lejwa ka fa ponong ya maemo a lefatshe le, go ka nna botoka go beela mo gotlhe fa thoko mme lwa nna dieleele go na le gore lo bo lese bo lo busetsa kwa morago mo bothaleng jwa boammaaruri jo bo tswang kwa godimo. (aiōn g165) 19 Gonne bothale jwa lefatshe ke boeleele mo Modimong. Jaaka mo lokwalong lwa ga Jobe gotwe, Modimo o dirisa bothale jwa motho go mo tshwara; o kgotswa mo "bothaleng" jwa gagwe mme a we. 20 Gape, mo lokwalong lwa Dipesalema re boleletswe gore Morena o itse sentle ka botlalo gore mogopolo wa motho o akanya jang, le boeleele le go tlhoka ga one. 21 Jalo se ikgantsheng ka go sala morago bathalefi ba lefatshe le. Gonne Modimo o setse o lo neile sengwe le sengwe se lo se tlhokang. 22 O lo neile Paulo le Apolose le Petero go nna bathusi ba lona. O lo neile lefatshe lotlhe go le dirisa, le botshelo le lone loso ke bathanka ba lona. O lo neile tsa motho ono le tsothe tsa o o tlang. Tsothe ke tsa lona, 23 ebile lo ba ga Keresete, mme Keresete ke wa Modimo.

4 Jalo Apolose le nna re tshwanetse go le bega re le bathanka ba ga Keresete ba ba abang tshhegofatso ya Modimo ka go tshalosa diphiri tsa one. 2 Jaanong selo se se bothokwa

kaga motlhanka ke gore a dire fela jaaka mong wa gagwe a mmolelela. 3 Lwa reng ka ga me? A ke ne ke le motlhanka yo o siameng? Ga ke tshwenyega gore lo akanyang kaga se, kgotsa ka se mongwe fela a se akanyang. Ga ke tshephe le yone katholo ya me mo ntheng e. 4 Maikutlo a me a bonala sentle, mme le fa seo e se sesupo sa bofelo, ke Morena ka boene yo o tshwanetseng go ntshekatshaka a bo a nkakanyetsa. 5 Jalo ithokomeleng gore lo se ka lwa athola pele ga Morena gore a mongwe ke motlhanka yo o molemo kgotsa nnyaa. Fa Morena a tla, o tlaa ntsha lesedi gore mongwe le mongwe a tle a bone sentle gore mongwe le mongwe wa rona o ntse jang, mo teng ga dipelo tsa rona. Ke gone mongwe le mongwe o tlaa itseng gore ke eng fa re ne re dira tiro ya Morena. Ka lobaka loo Modimo o tlaa naya mongwe le mongwe tlotlego nngwe le nngwe e e tlang mo go ene. 6 Ke dirisitse Apolose le nna jaaka dikai go supa se ke ntseng ke se bua: gore lo se ka lwa nna le ba lo ba ratang thata. Ga lo a tshwanela go ikgantsha ka mongwe wa baruti ba Modimo go feta ba bangwe. 7 Lo ikgogomositse kaga eng? Lo na le eng se Modimo o sa lo se nayang? Mme fa tsothle tse lo nang natso di tswa kwa Modimong, ke eng fa lo itira jaaka ekete lo kwa godimo thata le jaaka o kare lo iponetse sengwe ka bo-lona? 8 Go bonala gore lo akanya gore lo setse lo na le dijo tsothle tsa semowa tse lo di tlhokang. Lo kgotsotsetse mo moweng, lo dikgosi tse di humileng tse di ntseng mo ditlong tsa bogosi. Rona lo re tlogetse kwa moragorago! Ke eletsa gore lo ka bo lo le mo ditlong tsa lona tsa bogosi, gonne lobaka loo lo tlaa tlhomamisa gore le rona re tlaa nna teng, re busa le lona. 9 Ka nako tse dingwe ke akanya gore Modimo o re beile baaposetoloi kwa moragorago jaaka magolegwa a a tlogang a bolawa, gore kwa bofelong re tle re dirwe segakgamalelwa sa popelelo ya bafenyi, gore re tle re bonwe ke batho le baengele. 10 Lwa re, tumelo e re dirile dieleele mme le fa go ntse jalo lotlhe lo Bakeresete ba ba bothale ba ba nang le ditlhaloganyo! Re bokoa, ee mme e seng lona! Lo tlotlegile thata, fa rona re tshgwa. 11 Go fithelela jaanong, re tshwerwe ke tlaa le lenyora, re bile ga re na diaparo tse di lekaneng go re thuthafatsa. Re ragakilwe re sena magae a e leng a rona. 12 Re dirile ka letsapa le legolo ka diatla tsa rona gore re tshel. Re segofaditse ba ba neng ba re hutsa. Re ne ra nna pelotelele mo go ba ba neng ba re tlhokofatsa. 13 Re fetotse ka bonolo fa dilo tse di bosula di buiwa ka rona, lefa go ntse jalo go fitlha mo lobakeng lo re tshwana le leswe le le ka fa tlase ga lona, jaaka matlakala. 14 Ga ke kwale dilo tse go lo tlhabisa ditlong, fa e se go lo tlhagisa le go lo gakolola jaaka bana ba ba rategang. 15 Gonne le fa lo ka nna le ba bangwe ba le dikete di le lesome go lo ruta kaga Keresete, gakologelwang gore lo na le nna fela jaaka Rraa lona. Gonne ke nna yo ke lo tlisiteng mo Keresete fa ke lo rerela Mafoko a a Modimo. 16 Jalo ke lo kopa go latela sekao sa me, mme lo dire jaaka ke dira. 17 Ke gone ka moo re rometseng Timotheo kwa go lona, go lo thusa go dira se. Gonne ke mongwe wa ba ke ba gapetseng mo go Keresete, ngwana yo o rategang yo o ikanyegang mo Moreneng. O tlaa lo gakolola kaga se ke se rutang mo diphuthegong tsothle tse ke tsamayang mo go tsone. 18 Ke a itse gore bangwe ba lona ba tlaa ikgogomosa,

ba gopola gore ke tshaba go tla go dira le lona. 19 Mme ke tlaa tla, le gone ka bonako, fa Morena a ntetla, mme ke tlaa bona gore a baigantshi ba, a ke babalabadi fela kgotsa a ruri ba na le nonofo ya Modimo. 20 Bogosi jwa Modimo ga se go bua fela. Ke go tshela ka nonofo ya Modimo. 21 Lo tlhophaga gofe? A ke ke tle ka kotlhae le komano kgotsa ke tle ka lorato le bonolo?

5 Mongwe le mongwe o bua kaga selo se se maswe se se diragetseng koo mo gare ga lona, sengwe se se bosula thata se le e leng bone baheitane ba sa se direng! Lo na le motho mongwe mo phuthegong ya lona yo o tshelang mo sebeng le mosadi wa ga rraagwe. 2 Mme a lo santse lo ipelafatsa, lo re lo ba "Semowa?" Ke eng fa lo sa lele ka khutsafalo le ditlong, le gore lo bone gore motho yo o ntshiwa mo botokololong jwa lona? 3 Le fa ke se na le lona koo, ke ntse ke akanya thata kaga se mme mo leineng la Morena Jesu Keresete ke setse ke ntse ke akanya thata kaga se ke ka se dirang, fela jaaka ekete ke koo. Lo tshwanetseng go phutha phuthego, mme nonofo ya Morena Jesu e tlaa nna le lona fa lo kopana, mme le nna ke tlaa bo ke le teng mo moweng, 5 mme lo kgaole motho yo mo bolokong jwa phuthego, lo mo tsenye mo diatleng tsa ga Satane, go mo othaya, mo tsholofelong ya gore mowa wa gagwe o tle o bolokwe fa Morena Jesu Keresete a bowa. 6 Mo kana go hakgamatsa jang gore lo bo lo ipelafatsa kaga boitshekiso jwa lona, mme le fa go ntse jalo lo letla selo sa go nna jaana go tswela pele. A ga lo itse gore fa motho a le mongwe fela a letlelelwa go tswela mo sebeng, ka bofelo go tlaa ama batho botha? 7 Tlosang sefathli se se maswe se, motho yo o bosula yo, mo gare ga lona, gore lo nne lo le phepa. Keresete, Kwana ya Modimo re mmolaetswe. 8 Jalo a re jeng moletlo o mo dipelong tsa rona mo go ene re gole thata mo botshelong jwa Sekeresete, re tlogele gotlhe kwa morago, botshelo jo bogologolo ka mafufa otlhe a jone le bosula. Mo boemongjwa seo, a re jeng moletlo wa senkgwe se se itshekileng sa tlotlo le bopelo-e-phepha le boammaaruri. 9 Erile fa ke lo kwaletse la ntliha ke rile lo seka lwa tlhakana le batho ba ba bosula. 10 Mme erile fa ke bua jalo ke ne ke sa bue kaga batho ba ba sa dumeleng ba ba tsheleng mo boakeng, kgotsa difatlha tsa batsietsi le magodu le baobamedi ba medimo ya disetwa. Gonne ga lo ka ke lwa nna mo lefatsheng leno kwa ntle ga batho ba ba ntseng jalo. 11 Se ke neng ke se raya ke gore ga lo a tshwanela go tsalana le mongwe yo o ipitsang Mokeresete mme e le moakafadi, kgotsa sefathli, kgotsa motsietsi, kgotsa moobamedi wa medimo ya disetwa, kgotsa letagwa, kgotsa mkgodi. Lo se ka lwa ja le motho yo o ntseng jalo. 12 Ga se tiro ya rona go athola ba ba kwa ntle. Mme ke tiro ya rona tota go athola le go dirana thata le ba e leng ditokololo tsa phuthego, le ba ba leofang. 13 Modimo o le osi ke moathodi wa ba ba ka kwa ntle mme lona ka bo lona lo tshwanetseng go dirana le motho yoo gore lo mo kgaole mo phuthegong ya lona.

6 Go ka nna jang fa o na le sengwe kgatlha nong le Mokeresete yo mongwe, o "ya kwa Molaong" o ya go kopa tshkelo ya boheitane go go atholela mo boemong jwa go e tseela kwa Bakereseteng ba bangwe go ya go athola gore ke ofe wa lona yo o siameng? 2 A ga lo itse gore letsatsi lengwe rona

Bakeresete re tlaa athola re be re busa lefatsho? Jalo ke eng fa lo sa kgone go athola le tsona dilonyana tse di nnye tse di mo gareng ga lona. **3** A ga lo lemoge gore rona Bakeresete re tlaa athola re bo re duela baengele ba ba mo legodimong. Jalo lo tshwanetse go athola matshwenyego a lona mono lefatsheng ka bomothofo jo bogolo. **4** Ke eng fa jaanong lo ya kwa baathloding ba ba kwa ntle ba e seng Bakeresete? **5** Ke leka go lo tlhabisa ditlhong. A ga go na ope mo phuthengong yo o bothlale thata go athola dingongorego tse? **6** Mme mo boemong jwa se, Mokeresete o isa yo mongwe tshekgong mme a sekise mokaulengwe wa gagwe fa pele ga batho ba ba sa dumeleng. **7** Go nna le ditshokisano tse di ntseng jalo lo le Bakeresete go raya gore lo fentswe e le ruri. Ke eng fa lo sa ineela mo patikong? Mme lwa tlogela go ntse jalo? E tlaa bo e le tlotlo e kgolo mo Moreneng fa lo ineela go tsiediwa. **8** Mme mo boemong jwa gone moo, lona ka bolona ke lona ba lo dirang phoso, lo tsietsa ba bangwe, le e leng bone ba bakaulengwe ba lona tota. **9** A ga lo itse gore ba ba dirang dilo tse di ntseng jalo ga ba na seabe mo Bogosing jwa Modimo? Lo se ka lwa tsietsa. Ba ba tshelang botshelo jo bo makgapha, ba ba obamelang medimo ya disetwa, bagokagadi kgotsa banna ba ba tlhakanelang dikobo le banna ka bone ga ba na seabe mo bogosing jwa one. Le fa e le magodu, kgotsa batho ba ba bohula, matagwa, bagadi kgotsa baikgagapedi. **11** Nako nngwe bangwe ba lona ba kile ba bo ba ntse jalo mme jaanong dibe tsa lona di tlhatswitswe, mme lo beetswe fa thoko go nna ba Modimo, mme o lo amogetse ka nthla ya se Morena Jesu Keresete le Mowa wa Modimo o lo se diretseng. **12** Ke ka dira sengwe le sengwe se ke se batlang fa Keresete a sa nkganele, mme dilo dingwe tsa dilo tse ga di a ntshamela. Le fa ke letlelelwa go di dira, ke tlaa gana go di dira fa ke akanya gore di ka dira sekgopi se se ntseng jalo mo go nna se ke se ka keng ka se kganela motlhofo fa ke batla go se kganela. **13** A ke re, tsaya ngang ya go ja, Modimo o re neile go nna le keletso ya dijo le mpa go di sila. Mme moo ga go reye gore re tshwanetse go ja go feta jaaka re batla. Se akanyeng gore go ja go bothokwa, ka gore letsatsi lengwe Modimo o tlaa di nyeletsa tsoo pedi, mpa le dijo. Mme boaka ga bo a siama: mebele ya rona ga e a direlwa moo, mme e diretswe Morena, mme Morena o batla go tlatsa mebele ya rona ka bo ene. **14** Le gone Modimo o tlaa tsosa mebele ya rona mo baswing ka nonofo ya gagwe fela jaaka a tsositse Morena Jesu Keresete. **15** A ga lo lemoge gore mebele ya lona ke ditokololo tsa ga Keresete? Jalo a ke tshwanetse go tsaya tokololo ya ga Keresete ka e kopanya le seaka? Le goka! **16** Le gone a ga lo itse gore fa monna a ikopanya le seaka o nna tokololo ya sone le sone se nna tokololo ya gagwe? Gonne Modimo o re bolelela mo Dikwalong gore ka fa ponong ya one bodedi bo nna motho a le mongwe. **17** Mme fa o ineela mo Moreneng wena le Keresete lo a kopana lo nna motho a le mongwe. **18** Ke gone mo ke lo rayang ke re tshabang boaka. Ga go na sebe sepe se se amang mmele jaaka sebe se. **19** A ga lo ise lo ithute gore mmele wa lona ke legae la Mowa O O Boitshepo o Modimo o lo o neileng, le gore o nne mo teng ga lona? Mmele o e leng wa lona ga se wa lona. **20** Gonne Modimo o o rekile ka tlhathlwa e kgolo. Jalo dirisang

bontlha bongwe le bongwe jwa mmele wa lona go galaletsa Modimo, ka gore ke wa one.

7 Jaanong kaga dipotso tse lo neng lo di botsa mo lokwalong lwa lona lwa bofelo: Karabo ya me ke gore, fa lo sa nyale, go siame. **2** Mme ka legale go siame go nyala, monna mongwe le mongwe o tshwanetse a nna le mosadi yo e leng wa gagwe, le mosadi mongwe le mongwe a nna le monna yo e leng wa gagwe, e se re gongwe lwa boela gape mo sebeng. **3** Monna o tshwanetse go naya mosadi wa gagwe di tsa gagwe tsotlhe jaaka mosadi yo o nyetsweng, le mosadi o tshwanetse go direla monna wa gagwe fela jalo. **4** Gonne morweetsana yo o nyalwang ga a tlhole a na le taolo e e tletseng mo mmeleng wa gagwe, gonne monna wa gagwe o na le ditshwanelo tsa gagwe mo go one le ene; mme fela jalo monna le ene ga a tlhole a na le taolo e e tletseng mo mmeleng wa gagwe, gonne gape ke wa mosadi wa gagwe. **5** Jalo lo seka lwa ganelelana ka ditshwa-nelo tse. Fela selo sa bothokwa mo molaong o ke ka tumalano ya monna le mosadi go ikgapa mo ditaolong tsa lenyalo selekanyo sa lobaka lo lo kailweng, gore ba tle ba ineela mo thapelong ka tshosologo. Morago, ba tshwanetse go kopana gape gore Satane a se ka a kgona go ba raela ka nthla ya go tlhoka go itshwara ga bone. **6** Ga ke re lo tshwanetse go nyala; mme lo ka nyala fa lo eletsa. **7** Nna ke eletsa gore mongwe le mongwe o ka bo a nna a sa nyala, fela jaaka nna. Mme rotlhe ga re tshwane. Modimo o naya bangwe mpho ya mosadi kgotsa monna, mme ba bangwe ba ka kgona go nna ka boitumelo ba sa nyala. **8** Jalo ke raya ba ba sa nyalwang, le bathologadi ke re, go botoka go nna lo sa nyalwa fa lo kgona, fela jaaka nna. **9** Mme fa lo palelwa ke go itshoka, nyalang. Go botoka go nyala go na le go babalelwa. **10** Jaanong, mo go ba ba nyetseng ke na le taolo, e seng mogopolo. Mme ga se taolo e e tswang mo go nna, gonne se ke se Morena ka boene a se buileng: Mosadi ga a tshwanela go tlogela monna wa gagwe. **11** Mme fa a kgaogane nae, a a nne fela a sa nyalwa kgotsa a boele kwa go ene. Le monna ga a a tshwanela go tlhala mosadi wa gagwe. **12** Fa, ke batla go tlatsa ka megopolo e mengwe e e leng ya me. Se ga se ditaolo tse di tswang kwa Moreneng, mme di bonala di siame mo go nna. Fa Mokeresete a na le mosadi yo e seng Mokeresete, mme a batla go nna nae, ga a a tshwanela go mo tlogela kgotsa go mo tlhala. **13** Mme fa mosadi wa Mokeresete a na le monna yo eseng Mokeresete, ga a a tshwanela go mo tlogela. **14** Gonne gongwe monna yo e seng Mokeresete o ka nna Mokeresete ka thuso ya mosadi wa gagwe wa Mokeresete. Le mosadi yo e seng Mokeresete o ka nna Mokeresete ka thuso ya monna wa gagwe yo e leng Mokeresete. Ntle go moo fa lolwapa lo kgaogana, go ka diragala gore bana ba se ka ba tlhola ba itse Morena; fa lolwapa lo lo kopaneng lo ka itse Morena, mo leanong la Modimo go ka felela mo polokong ya bana. **15** Mme fa monna kgotsa mosadi yo e seng Mokeresete a batla go tsamaya, go a letlelesega. Ka mokgwa o o ntseng jalo monna yo e leng Mokeresete kgotsa mosadi ga a a tshwanela go kganela yo mongwe go tsamaya, gonne Modimo o batla bana ba one go nna mo kagisong le mo botsalanong. **16** Gonne le fa go ntse jalo, ga go na tlhomamiso

mo go lona basadi gore banna ba lona ba tlaa sokologa fa ba sa lo tlogele; mme fela jalo le lona banna kgang ke e, e a lo ama. 17 Mme lo nne le thomamiso mo go akanyeng dilo tse gore lo tshela jaaka Modimo o ikaeletse, go nyala kgotsa go tlhoka go nyala go nne ka fa kaelong le ka fa thusong ya Modimo, le go amogela seemo le fa e ka bo e le sefe se Modimo o go tsentseng mo go sone. Se ke molao wa me mo diphuthengong tsothe. 18 Nte ke tshwantshe ka monna yo o setseng a fetile mo medirong ya Sejuta ya thupiso pele ga a nna Mokeresete, ga a a tshwanela go tshwenyega ka ga gone; mme fa a ise a rupisiwe, ga a a tshwanela go go dira jaanong. 19 Gonne ga go na pharologanyo epe fa Mokeresete a fetile mo modirong o kgotsa nnyaa. Mme go nna le pharologanyo e kgolo fa a itumedisa Modimo ebile a tshegetsela melao ya one. Seo ke selo se se bothokwa. 20 Ka gale motho o tshwanetse go tswelela ka tiro ya gagwe e o neng a e dira fa Modimo o mmitsa. 21 A o lekgoba? A moo go se go tshwenye, mme e re, fa o bona lobaka lwa go gololesega, o lo dirise. 22 Fa Modimo o go bitsa, o le lekgoba, gakologelwa gore Keresete o go golotse mo nonofong e e boitshegang ya bolelo; mme fa a go biditse, ebile o gololesegele, gakologelwa gore jaanong o lekgoba la ga Keresete. 23 O rekilwe ebile o dueletswe ke Keresete, jalo o wa gagwe, gololesega jaanong mo dilong tse tsothe tsa mabela a lefatshe le poifo. 24 Jalo bakaulengwe ba ba rategang, le fa motho a ka bo a le mo seemong se se ntseng jang fa a nna Mokeresete, mo lese a nne foo, gonne jaanong Morena o teng go mo thusa. 25 Jaanong ke tlaa leka go araba potso e nngwe ya lona. Go ka tweng ka barweetsana ba ba iseng ba nyalwe? A ba tshwanetse go letlelelwa go dira jalo? Mo karabong ya potso e, ga ke na taolo e e thomameng ya bone go tswa mo Moreneng. Mme Morena mo bobelothomoging jwa gagwe o nneile bothale jo bo ka tshepegang, mme ke tlaa itumelela go lo bolelela se ke se akanyang. 26 Matshwenyego ke a. Rona Bakeresete re lebagane le dikotsi tse di kgolo mo matshelong a rona mo lobakeng lo. Mo dipakeng tse di tshwanang le tse, ke bona go le botoka gore motho a nne a sa nyalwa kgotsa a sa nyala. 27 Ee, fa lo setse lo nyetswe, se kgaoganeng ka ntsha ya se. Mme fa lo ise lo nyalwe, lo se ithaganeleleleng mo go yone ka lobaka lo. 28 Mme fa lona banna lo ikaelela go tswelela pele lo nyala jaanong, go siame; mme fa morweetsana a nyalwa mo dipakeng tse di tshwanang le tse, ga se bolelo. Le fa go ntse jalo lenyalo le tlaa tliša matshwenyego a mangwe a ke neng ke eletsa gore lo se ka lwa lebagane le one jaanong. 29 Selo sa bothokwa se re tshwanetseng go se gakologelwa ke gore, lobaka lo lo re saletseng lo lo khutshwane, (Go ntse jalo le ka nako ya rona ya go direla Morena) ka lebaka leo ba ba nang le basadi ba tshwanetse go nna ba phuthologetse Morena; 30 boitumelo kgotsa kutlobothoko kgotsa dikhumo ga di a tshwanela go kganela ope go dira tiro ya Modimo. 31 Ba ba atisang go amana le dilo tse di kगतhanong tsa lefatshe ba tshwanetse go dirisa mabaka a a batlegang ka go a sola molemo, gonne lefatshe mo seemong se le leng mo go sone le tlaa tloga le feta. 32 Mo go tsothe tse lo di dirang, ke batla gore lo nne le kgololesego mo dingongoreng. Monna yo o sa nyalang o ka senya lobaka lwa gagwe a dira tiro ya Morena le

go akanya ka fa o ka o itumedisang ka teng. 33 Mme monna yo o nyetseng ga a ka ke a dira jalo sentle; o tshwanetse go akanya kaga dilo tsa lefatshe le ka fa o ka itumedisang mosadi wa gagwe ka teng. 34 Dikgathego tsa gagwe di kgaogane. Go tshwana fela le morweetsana yo o nyalwang. O lebana le mathata a a ntseng fela jalo. Morweetsana yo o sa nyalwang o tlhwaafalela go itumedisa Morena ka bojotlhe jwa gagwe le se o se dirang. Mme mosadi yo o nyetsweng o tshwanetse go akanya dilo tse dingwe jaaka go tlhokomela ntlo ya gagwe le go rata le go sa rate ga monna wa gagwe. 35 Ke bua se go lo thusa, eseng go lo itsa go nyala. Ke batla lo dira se lo bonang se ka lo thusa go direla Morena sentle, mme a go se nne le dilo tse dintsi tse di ka tlosang theetso ya lona mo go ene. 36 Mme fa mongwe a batla go nyala ka ntsha ya gore o na le matshwenyego a a dirisang nama ya gagwe, go siame, ga se bolelo, a a nyale. 37 Mme fa monna a na le maitshegeletso a go tlhoka go nyala mme a ikaelela gore ga a batle ebile ga a nke a nyala, o dirile mogopolo o o siameng. 38 Jalo motho yo o nyalang o dira sentle, mme motho yo o sa nyaleng o dira sentle go gaisa. 39 Mosadi ke bontsha bongwe jwa monna mo botshelong jwa gagwe, fa monna wa gagwe a a swa, foo o ka nyalwa gape, mme fela fa a nyalwa ke Mokeresete. 40 Mme mo mogopolong wa me, o tlaa itumela fa a sa nyalwe gape; ebile ke gopola gore ke lo naya kgakololo e e tswang mo Moweng wa Modimo fa ke bua se.

8 Gape ke potso ya lona kaga go ja dijo tse di tlhabetsweng medimo ya disetwa. Mo potsong e mongwe le mongwe o ikutlwa gore karabo ya gagwe fela ke yone e e siameng! Mme le fa go ntse jalo go nna "moitse wa tsothe" go re dira gore re ipone botoka, mme se se tlhokegang tota, go aga phuthego ke lorato. 2 Fa mongwe a akanya gore o itse dikarabo tsothe, o supa bosenakitso jwa gagwe fela. 3 Mme motho yo o ratang Modimo ka boammaaruri ke yo o bulegetseng kitso ya Modimo. 4 Jaanong ke eng kaga gone? A re tshwanetse go ja nama e e tlhabetsweng medimo ya disetwa? Ee, re a itse gore modimo wa sesetwa ga se Modimo tota, le gore go na le Modimo o le mongwe fela, mme e seng ope gape. 5 Ka fa bathong ba bangwe, go na le medimo e megolo e le mentsi kwa legodimong le mo lefatsheng. 6 Mme rona re itse gore go na le Modimo o le mongwe fela, Rara, yo o dirileng dilo tsothe a bo a re dira gore re nne ba gagwe; le Morena a le mongwe fela ebong Jesu Keresete, yo o dirileng sengwe le sengwe a bo a re naya botshelo. 7 Le fa go ntse jalo, Bakeresete ba bangwe ga ba lemoge selo se. Mo matshelong a bone othe ba ntse ba akantse medimo ya disetwa gore e a tshela, le go dumela gore dijo tse di diretsweng medimo ya disetwa di neetswe medimo tota. Jalo fa ba a ja dijo tseo di a ba sulafalela ebile di koafatsa digakolodi tsa bone. 8 Gakologelwang fela gore Modimo ga o tlhokomele fa re di ja kgotsa re sa di je. Ga re molato fa re sa di je, ebile ga re botoka fa re di ja. 9 Mme ithokomele gore o se ka wa dirisa kgololesego ya gago go di ja, e se re kgotsa wa leofisa mokaulengwe mongwe yo o nang le tumelo e e bokoa. 10 O a bona, se ke se se ka diragalang: Mongwe yo o akanyang go le phoso go ja dijo tse o tlaa go bona o o ja kwa tlung ya dijo ya

Tempele, gonne o a itse fa go sena molato mo go tsone. Mme lo tlaa nna pelokgale thata go di ja le ene le fa ka nako tsothe a ntse a ikutlwa e le phoso. **11** Jalo ka gore o "itse gore go siame go di ja," o tlaa bo o tshwanetse go arabela go dira tshenyego e kgolo ya semowa mo mokaulengweng yo o nang le segakolodi se se boruma, yo Keresete a mo swetseng. **12** Mme ke sebe kgaithanong le Keresete go leofela mokaulengwe wa gago ka go mo kgothatsa go dira sengwe se a akanyang se le phoso. **13** Jalo fa nama e e ntshediwang medimo ya disetwa e tlaa leofisa mokaulengwe wa me, ga nkita ke e ja mo botshelong jwa me, ka gore ga ke batle go mo leofisa. (aiōn g165)

9 Ke nna moaposetoloi, morongwa wa Modimo, ga go na motho ope yo o nang le boikarabelo ka ga me. Ke nna yo ke bonyeng Jesu Morena wa rona ka matlho. Mme phetogo ya matshelo a lona ke maduo a tiro ya me e ke e dirileng ka bonatla. **2** Fa e le gore mo mogopolong wa bangwe ga ke moaposetoloi, ka boammaaruri ke ene mo go lona, gonne lo gapetswe mo go Keresete ke nna. **3** Se ke karabo ya me mo go ba ba botsang ditshwanelo tsa me. **4** Kgotsa a ga ke na ditshwanelo gotlhelele? A ga nkake ka batla tshwanelo e e tshwanang le e baaposetoloi ba bangwe ba nang nayo ya go nna moeng mo magaeng a lona? **5** Fa ke ne ke na le mosadi; mme e le modumedi, a ke ne ke se ka ke ka tsamaya nae mo maetong ame jaaka barutwa ba bangwe ba dira, le jaaka bakaulengwe ba Morena ba dira, le jaaka Petere a dira **6** A ke nna le Barenabase re le rosi ba re tshwanetseng go direla botshelo jwa rona, fa lona lo abela ba bangwe ba? **7** Ke lesole lefe mo ntsweng le le tshwanetseng go ituelela ditshenyegelo tsa lone. Mme a lo kile lwa utlwa kaga molemi yo o ithobelang thobo ya gagwe mme a sena tshwanelo ya go ja sengwe mo go yone? Ke modisa ofe yo o tihokomelang letsomane la dinku le dipodi mme a sa letlelelwa go nwa masi a tsone? **8** Mme ga ke kwale fela megopolo ya batho ka se se siameng. Ke lo bolelela se molao wa Modimo o se buang. **9** Gonne molao o Modimo o o neetseng Moshe wa re ga lo a tshwanela go fapa pelesa molomo go e itsa go ja fa e gataka e photha mabele. A lo gopola gore Modimo o ne o akanya kaga dipelasa fela fa o ne o rialo? **10** A o ne o sa akanye le kaga rona? Ee, go ntse jalo. O ne o bua se go re supegetsatsa gore badiri ba Sekeresete ba tshwanetse go duelwa ke ba ba ba direlang. Ba ba lelang le ba ba phothang ba tshwanetse go solofela seabe sengwe mo thobong. **11** Re jetse peo e e molemo ya semowa mo dipelong tsa lona. A ga go tshwanele fa re lopa dijo le diaparano mo go lona? **12** Lo di naya ba ba lo rerelang, ebile lo tshwanetse. Mme a ga re a tshwanela go nna le e leng tshwanelo e kgolo mo go bone? Le fa go ntse jalo ga re ise re ke re dirise tshwanelo e, mme re ithusa ka bo rona kwa ntle ga thuso ya lona. Ga re ise re kope tuelo ya mofuta ope re boifa gore, fa re dira jalo, lo ka nna le kgaithego e potlana mo molaetseng wa ga Keresete o o tlang ka rona. **13** A galo lemoge gore Modimo o boleletse ba ba neng ba dira mo Tempeleng ya gagwe go itseela dingwe tsa dijo tse di neng di tlisitswefoo e le dimpho tsa one? Mme ba ba dirang mo Aletareng ya Modimo ba tsaya seabe sa dijo tse di neng di tlisitswe ke ba ba neng ba abela Morena. **14**

Ka tsela e e ntseng jalo, Morena o ntshitse ditaolo gore ba ba rutang Mafoko a a Molemo ba tshwanetse go otlwa ke ba ba a amogelang. **15** Le fa go ntse jalo ga ke ise ke ke ke lo kope le fa ele ledi le le lengwe. Mme ga ke kwale se go lo tlhagisa gore ke batla go simolola, legale, ke ka mpa ka swa ke bolawa ke tlaa go na le go latlhegelwa ke boitumelo jo ke bo bonang mo go lo rereleng kwa ntle ga tuelo. **16** Gonne go rera Mafoko a a Molemo ga se tlotla epe mo go nna, ke ne ke ka se ke ka lesa go rera fa ke ne ke batla. Ke tlaa bo ke thomola pelo gotlhelele. A go latlhege nna fa ke sa rere. **17** Fa ke ne ke dira ka go ithaopa ga go rata ga me, jalo Morena o ne a tlaa nnaya tuelo e e faphegileng; mme seo ga se one mabaka, gonne Modimo o ntshitse wa nnaya tsholofelo e, e e boitshepo mme ga go na se ke ke sa dirang. **18** Ka mabaka a, tuelo ya me ke eng? Ke boitumelo jo bo faphegileng jo ke bo bonang mo go rereng Mafoko a a Molemo kwa ntle ga tshenyegelo mo go ope, ke sa kope ditshwanelo tsa me. **19** Mme mo go na le thuso tota: ga ke a tlamega go obamela ope fela ka ntlha ya go bo a ntuela; le fa go ntse jalo ke na le kgololesego le boitumelo go nna mothanka wa botlhe gore ke kgone go ba gapela mo go Keresete. **20** Fa ke na le Bajuta ke lebege ke le mongwe wa bone gore ba tle ba reetse Mafoko a a Molemo le go ka ba gapela mo go Keresete. Fa ke na le Badichaba ba ba latelang mekgwa le mediro ya Sejuta ga ke ganetse, le mororo ke sa dumalane nabo, ka gore ke batla go ba thusa. **21** Fa ke na le baheitane ke dumalana le bone jaaka ke ka kgona, le fa go ntse jalo ke ntse ke itse gore ke tshwanetse ka metlha yotlhe go dira se se siameng jaaka Mokeresete. Mme jalo ka go dumalana nabo, ke ka gapa digakolodi tsa bone le go ba thusa le bone. **22** Fa ke na le ba digakolodi tsa bone di leng bokoa, ga ke dire jaaka e ka re ke itse gotlhe ga ke ba bitse dielelele; pheletso ke gore ba eletsa gore ke ba thusa. Ee, le fa motho a ntse jang, ke leka go bona seemo se se mothofo ka ene go re a tle a ntsetle go mmolelela kaga Keresete le go letla Keresete gore a mmoloke. **23** Ke dira se go ba tlisetsa Mafoko a a Molemo le tshenyegelo e nna ka bo nna ke e amogelang fa ke ba bona ba tla mo go Keresete. **24** Mo lobelong, mongwe le mongwe o a siana mme motho a le mongwe fela a gape sekgele sa ntlha. Jalo sianang lobelo lwa lona go gapa sekgele. **25** Go gapa sekgele mo kgaisanong lo tshwanetse go itatola bolona le dilo di le dintsi tse di ka lo kganelang go dira ka botlalo. Mosiami o tsena mo matshwenyegong a le mantsi fela go gapa talama e tala kgotsa senwelo sa gauta, mme rona re direla tuelo ya selegodimo e e sa ka keng ya nyelela. **26** Jalo ke sianela fela kwa bofelong ka maikaelelo mo kगतong nngwe le nngwe, ke lwela go fenyha. Ga ke lwele lefela kgotsa dinyana. **27** Jaaka mosiami ke otlhaya mmele wa me, ke o tsenya mo pitlaganong, gongwe ke kaiwe ke sa itekanela mme ke laolalwe go emela fa thoko.

10 Gonne ga re a tshwanela go lebala, bakaulengwe ba ba rategang, se se diragaletseng batho ba ga rona mo sekakeng bogologolo. Modimo o ne wa ba etelela pele ka leru le le neng le tsamaya kwa pele ga bone; mme o ne wa ba ralatsa botlhe sentle metsi a Lewatle je Lehibidu. **2** Se se ka nna sa bidiwa e le "kolobetso" ya bone, —ba kolobeditse botlhe

mo lewattleng le mo lerung! —jaaka balatedi ba ga Moshe, boineelo jwa bone mo go ene jaaka moeteledi-pele wa lona. 3 Mme ka kgakgamatso wa ba romelela dijo go ja le metsi go nwa gone kwa sekakeng; ba ne ba a nwa metsi a Keresete o ba a neileng. O ne a le teng a na le bone jaaka Lefika le le nonofileng la thudiso ya semowa. 5 Le fa go ntse jalo bontsi jwa bone bothe ba ne ba se ka ba utlwa Modimo, mme o ne a ba nyeletsa mo sekakeng. 6 Mo thutong e re thagisiwa gore ga re a tshwanela go eletsa dilo tse di bosula jaaka ba ne ba dira, 7 le eseng go obamela medimo ya disetwa jaaka ba ne ba dira. (Dikwalo di re bolelela gore, "batho ba ne ba nna fa fatshe go ja le go nwa mme ba tloga ba nanoga ba bina," ba obamela namane ya gauta), modimo wa sesetwa. 8 Thuto e nngwe ya rona ke kaga se se neng sa direga fa bangwe ba bone ba leofa le basadi ba banna ba bangwe, mme dikete di le masome a mabedi le boraro tsa a swa ka letsatsi. 9 Mme se leke bobelotelele jwa Morena, ba ne ba dira jalo, mme ba a swa, ba bolawa ke malomo a noga. 10 Le gone o se ka wa ngongoregela Modimo le tirisano ya one le wena, jaaka bangwe ba bone ba ne ba dira, gonne ke gone ka moo Modimo o ileng wa romela moengele wa one go ba nyeletsa bothe. 11 Dilo tse tsothe di ba diragaletse e le dikai, jaaka dithuto tsa boitlamo mo go rona go re thagisa gore re seka ra dira jaaka bone; dilo tse di kwadilwe gore re tle re bale kaga bone le go ithuta mo go bone mo malatsing ano a bofelo jaaka lefatshe le le gaufi le bokhutlo jwa lone. (aiōn 165) 12 Jalo ithokomeleng. Fa lo akanya, lo re, "Oo, ga nka ke ka tlhola ke tshwara jalo gape", a se e nne thagiso mo go lona. Gonne le lona lo ka wela mo sebeng. 13 Mme gakologelwang se, dikeletso tse di bosula tse di tlang mo botshelong jwa lona ga se sepe se seshale le se se pharologanyo. Ba le bantsi ba ne ba lebagana le mathata a a ntseng fela jalo pele ga lona. Mme ga go na thaelo epe e e sa kganeleseng. Lo ka tshepa Modimo go kganela thaelo gore e se ka ya nna le thata mo lo sa ka keng lwa e fenywa, gonne Morena o solofeditse se, mme o tlaa diragatsa se a se buileng. O tlaa lo supegetsa ka fa lo ka falolang nonofo ya thaelo ka gone gore lo kgone go itshoka kgatthanong le yone. 14 Jalo diatsala tse di rategang, tshabang kobamelo nngwe le nngwe ya medimo ya disetwa. 15 Lo batho ba ba bothale. Bonang ka bo lona gore a se ke tlogang ke se bua ke boammaaruri. 16 Fa re kopela senwelo sa mofine tshegofatso fa Lomating lwa Morena, a se ga se reye gore, bothe ba ba se nwang ba tlhakanela tshegofatso ya madi a ga Keresete? Mme fa re ngathoganyanya senkgwe se go ja mmogo, se se supa gore rotlhe re thakanetse dithuso mo mmeleng wa gagwe. 17 Ga go re sepe gore re kae foo, rotlhe re ja mo senkgweng se le sengwe fela, go supa gore rotlhe re ditokololo tsa mmele o le mongwe wa ga Keresete. 18 Mme batho ba Sejuta bothe ba ba jang dithabelo ba kopa nngwa ka yone tiro eo. 19 Keleka go reng? A ka re medimo ya disetwa o baheitane ba e leretseng dithabelo e a tshela ka boammaaruri le gore ke medimo tota, le gore a dithabelo tse di na le tlhathwa nngwe? Nnyaa, ga ke rialo. 20 Se ke se buang ke gore batho ba ba ntshetsang medimo e ya disetwa dijo, ba ikopantse mmogo mo go direleng mewa e e maswe dithabelo, tota e seng Modimo. Mme ga ke rate ope wa lona a nna le

kabelo epe le mewa e e maswe fa loo ja dijo tse di tshwanang le tsa baheitane, tse di diretsweng mewa e e maswe. 21 Ga lo kake lwaa nwa senwelo fa lomating lwa bojelo lwa Morena le fa go lwa ga Satane. Ga lo kake lwaa ja senkgwe fa lomating lwa Morena le fa lomating lwa ga Satane. 22 Ke eng? A o leka Morena go go galefela. A o nonofile go mo feta? 23 O gololesegile go ja dijo tse di abetsweng medimo ya disetwa fa o batla go di ja; ga se kgathano le molao wa Modimo go ja dijo tse di ntseng jalo, mme ga go reye gore o tsewelele pele go go dira. Go ka nna ga letlelesegale, mme ga go kake ga nna botoka ga ba ga nna le thuso epe. 24 Se ikakanyetse fela ka bo wena. Leka go akanyetsa motho yo mongwe le ene, le se se mo siametseng. 25 Se lo tshwanetseng go se dira ke se: Jaang nama nngwe le nngwe e lo e batlang e e rekisiwang kwa mathabelong. Se botseng gore a e ka ne e abetswe medimo ya disetwa, e se re kgotsa karabo ya lo koafatsa. 26 Gonne lefatshe le sengwe le sengwe se se molemo mo go lone ke sa Morena ebile ke sa gago go se akola. 27 Fa mongwe yo e seng Mokeresete a go kopa go ya dijong nae, tsewelelang amogela taletso fa o batla. Ja sengwe le sengwe se se mo lomating lwa bojelo o se ka wa botsa dipotso dipe kaga sone. Mme ga o nke o itse go re a di diretsewe medimo ya disetwa kgotsa nnyaa, le gone ga o kitla o nna le segakolodi se se bokoa morago ga o di ja. 28 Mme fa mongwe a go thagisa gore nama e e abetswe medimo ya disetwa jalo se e je ka nthla ya motho yo o go boleletseng, le ka segakolodi sa gagwe. 29 Mo lebakeng le, maikutlo a gagwe kaga tsone ke selo sa bothokwa, e seng a gago. Mme o ka botsa gore ka go reng, a ke tshwanetse go kaelwa le go laolelwa ka se mongwe a se akanyang? 30 Fa ke ka leboga Modimo ka dijo mme ke di itumelela ke eng fa mongwe a ka letlelelwa go senya sengwe le sengwe fela ka gore o akanya gore ga se a siama? 31 Go siame, ke tlaa lo bolelela gore ke eng. Ke ka gore o tshwanetse go dira sengwe le sengwe mo kgalaletsong ya Modimo, le e leng go ja le go nwa ga gago. 32 Jalo se nne sekopipi mo go ope, le fa e ka bo e le Bajuta, kgotsa Badichaba kgotsa Bakeresete. 33 Seo ke leano le ke le latelang le nna. Ke leka go itumedisana mongwe le mongwe mo go sengwe le sengwe se ke se dirang, e seng go dira se ke se ratang kgotsa se se ntshwanetseng, fa e se se se siametseng ba bangwe, gore ba tle ba bolokwe.

11 Mme lo tshwanetse go latela sekao sa me, fela jaaka ke latela sa ga Keresete. 2 Ke a itumela, bakaulengwe ba ba rategang, ka gore lo ntse lo gakologelwa ebile lo dira dilo tsothe tse ke lo di rutileng. 3 Mme go na le sengwe se ke batlang go lo gakolola kaga sone: gore mosadi o kafa tlase ga taolo ya monna wa gagwe, monna wa gagwe o ka fa tlase ga taolo ya ga Keresete, Keresete ene o ka fa tlase ga taolo ya Modimo. 4 Ke gone ka moo, fa monna a gana go rola hutshe fa a rapela kgotsa a rera, o tlontlolola Keresete. 5 Mme ke gone ka moo mosadi yo o rapelang kgotsa a porofesa mo pepeneneng a sa rwala sepe mo tlhologong o tlontlolola monna wa gagwe (gonne go rwala ga gagwe ke sesupo sa gore o ka fa tlase ga taolo ya monna.) 6 Ee, fa a gana go rwala tukwi, o tshwanetse go beola moriri wa gagwe othe mme fa go thabisa dithong gore mosadi a beolwe, jalo o tshwanetse go rwala sengwe mo tlhologong. 7

Mme monna ga a a tshwanela go rwala sepe mo thogong (fa a obamela Modimo), gone monna ke setshwano le kgalalelo ya Modimo; mme mosadi ke kgalalelo ya monna. **8** Monna wa ntlha ga a tswa mo mosading, mme mosadi wa ntlha ene o dule mo monneng. **9** Le Adamo, monna wa ntlha, o ne a sa direlwa thuso ya ga Efa, mme Efa o ne a diretse Adamo. **10** Jalo mosadi o tshwa-netse go bipa tlhogo ya gagwe e le sesupo sa gore o ka fa tlase ga taolo ya monna, e le lebaka la gore baengele ba mo lemoge ba bo ba mo itumelele. **11** Mme gakologelwang gore mo leangon la Modimo banna le basadi ba a tlhokana. **12** Gonne le fa mosadi wa ntlha a dule mo monneng, banna bothle ba tsetswe ke basadi go tloga foga, mme banna le basadi ba tswa mo Modimong Mmopi wa bone. **13** Lona ka bo lona lo akanya jang kaga selo se? A go siame gore mosadi a rapele mo pepeneneng a sa bipa tlhogo? **14** A ga se gore le yone tlhologo e re ruta gore dithogo tsa basadi di tshwanetse go bipiwa? Gonne basadi ba ikgantsha ka meriri ya bone e melele, fa monna yo o moriri melele o mo tlhabisa dithong. **16** Mme fa mongwe a batla go ganetsa kaga mo, gotlhe mo ke ka go buang ke gore ga re rute sepe se sele go na le se, gore mosadi o tshwanetse go ipipa tlhogo fa a rapela kgotsa a porofesa mo phuthegong, mme diputhogo tsothe di ikutlwa ka mokgwa o le mongwe kaga se. **17** Se sengwe mo thulaganyong ya me ya dilo tse ke lo kwalelang ka ga tsone ke sengwe se ke se ka keng ka dumalana le sone. Gonne go utlwa jaaka e ka re go kopana ga lona mo selalelong go dira bosula go na le tshiamo. **18** Mongwe le mongwe o aga a mpolelela kaga kganetsanyo e e nnang mo dikopang tse, le dikgaogano tse di tsogang magareng ga lona ebile ke setse ke rata go dumela. **19** Mme ke gopola gore lo utlwa mo go le bothokwa mo e leng gore lona ba lo agang lo siame lo tlaa itse lo bo lo gakologelwa! **20** Fa lo kopana lotlhe go ja, ga se Selalelo sa Morena se lo se jang, **21** mme ke sa lona. Gonne ke boleletse gore mongwe le mongwe o ithaganelela go phamola dijo tsothe tse a ka di kgonang go na le go letela go di kgaogana le ba bangwe, jalo yo mongwe a thlaelwe mme a tsamaye ka tlaa fa ba bangwe ba nola ba tagilwe. **22** Ke eng? A mo ke boammaaruri tota? A ga lo kake lwa a ja lwa nwa kwa malapeng a lona, go tila go nyenyefatsa phuthogo le go tlhabisa bahumanegi dithong ba ba se ka keng ba tiisa dijo. Ke tshwanetse go reng kaga dilo tse? A lo batla ke lo galaletsa? Ga ke dire jalo! **23** Gonne se ke se Morena ka boene o se buileng ka Lomati lwa gagwe, mme ke lo boleletse pele: Gore mo bosigong jo Judase o mo okileng ka jone, Jesu o ne a tsaya senkgwe, **24** mme ya re a sena go se lebogela mo Modimong, a se ngathoganyana a se neela barutwa ba gagwe a re, "Tsaying se lo je. Se ke mmele wa me, o ke lo o nayang. Dirang se gore lo nkgakologelwe". **25** Ka mokgwa o o tshwanang, a tsaya senwelo sa mofine morago ga selalelo a re, "Senwelo se ke kgolagano e ncha fa gare ga Modimo le lona, se se thomamisitsweng sa bo sa tsamaisiwa ka madi a me. Dirang se gore lo nkgopole ka nako tsothe fa lo se nwa". **26** Gonne ka nako tsothe fa lo o ja senkgwe se lo bo lo nwa senwelo se, lo bolela molaetsa wa loso lwa Morena, gore o lo swetse. Dirang se go fitlhelela a tla gape. **27** Jalo fa mongwe a a ja senkgwe se a bo a a nwa mo senwelong se sa Morena a sa tshwanela, o

leofela mmele le madi a Morena. **28** Ke gone ka moo motho o tshwanetseng go itshekatsheka ka kelotlhoko pele ga a a ja senkgwe a bo a a nwa mo senwelong. **29** Gonne fa a a ja senkgwe se a bo a a nwa mo senwelong a sa tshwanela, a sa akanye kaga mmele wa ga Keresete le go re o rayang, o a bo a inwela ebile a ijela tshhekiso; gone o tshameka ka loso lwa Morena. **30** Ke gone ka mo bontsi jwa lona lo leng bokoa ebile lo lwala, mme bangwe ba setse ba sule. **31** Mme fa lo itshekatsheka ka kelotlhoko pele ga lo o ja ga lo kitla lo atholwa kgotsa lo othaiwa. **32** Le fa go ntse jalo fa re atholwa re bo re othaiwa ke Morena, ke gore ga re kitla re sengwa le lefatsho lotlhe. **33** Jalo, bakaulengwe ba ba rategang, fa lo phuthaganela sejo sa Morena, ebong tirelo ya Selalelo, letelang ba bangwe; **34** fa mongwe a tshwerwe ke tlaa thata o tshwanetse go ja kwa lapeng gore a se ka a itlisa kwa thao fa lo phuthaga lotlhe. Ke tlaa buisana le lona kaga dilo tse dingwe morago ga ke goroga.

12 Mme jaanong bakaulengwe, ke batla go kwala kaga dineo tse di faphegileng tse Mowa O O Boitshepo o di nayang bangwe le bangwe ba lona, gone ga ke batle thokakutlwisisanyo kaga tsone. **2** Lo tlaa gakologelwa gore pele ga lo rna Bakeresete lo ne lo thatlologanya medimo ya disetwa, lo tswa mo go o lo tsena mo go o mongwe, go se ope wa yone o o neng o ka bua lefoko le le lengwe. **3** [Mme jaanong lo kopana le batho ba ba reng ba bua melaetsa e e tswang mo Moweng wa Modimo.] Lo itse jang gore ba thotheleditse ke Modimo tota kgotsa ke batsietsi? Ithathobo ke e: ga go na ope yo o buang ka nonofo ya Mowa wa Modimo yo o ka hutsang Jesu, le gone ga go na ope yo o ka reng, "Jesu ke Morena," mme e le boammaaruri, fa a sa thusiwe ke Mowa O O Boitshepo. **4** Jaanong Modimo o re naya mefuta e mentsi ya dineo tse di faphegileng, mme ke Mowa O O Boitshepo o le mongwe fela o e leng one motswedi wa tsone tsothe. **5** Go na le mefuta e e farologanyeng ya ditirelo Modimo, mme ke Morena a le mongwe fela yo re mo direlang. **6** Go na le ditsela di le dintsi tse Modimo o dirang ka tsone mo matshelong a rona, mme ke Modimo o le mongwe fela o o dirang tiro mo go rona rotlhe ba re leng ba one. **7** Mowa O O Boitshepo o bonatsa nonofo ya Modimo mo go mongwe le mongwe wa rona e le go thusa phuthogo yotlhe. **8** Motho mongwe mowa o mo naya nonofo go ntsha kgakololo e e siameng; mongwe o ka bo a siame thata ka fa go ithuteng le go ruta, mme se ke mpho ya gagwe e e tswang e ntse e le mo go one Mowa O O Boitshepo. **9** O naya yo mongwe tumelo e e faphegileng, yo mongwe nonofo ya go fodisa balwetse. **10** O naya bangwe nonofo ya go dira dikgagamatso, ba bangwe nonofo ya go porofesa le go rera, o naya mongwe nonofo ya go itse fa mewa e e bosula e bua mo go ba ba ipitsang gore ba naya melaetsa ya Modimo, kgotsa gore a ke one tota Mowa wa Modimo o o buang. Fela jalo, motho yo mongwe o kgona go bua dipuo tse a iseng a ke a di ithute; mme ba bangwe ba ba sa itseng puo, ba nwa nonofo ya go thaloganyana se a se buang. **11** E ntse ke one Mowa O O Boitshepo fela o o nayang dimpho tsothe le dinonofo, go bona gore mongwe le mongwe wa rona o tshwanetse go nwa eng. **12** Mebele ya rona e na le ditokololo di le dintsi, mme ditokololo tse dintsi di dira mmele o le mongwe fela fa

di kopantswe. Go ntse fela jalo ka “mmele” wa ga Keresete. **13** Mongwe le mongwe wa rona ke tokololo ya mmele wa ga Keresete. Bangwe ba rona ke Bajuta, bangwe ke Badichaba, bangwe ke magolegwa mme bangwe ba gololesegile. Mme Mowa O O Boitshepo o re tshwaragantse mmogo mo mmeleng o le mongwe. Re kolobeditswe mo mmeleng wa ga Keresete ka Mowa o le mongwe, ra bo ra newa one Mowa O O Boitshepo oo. **14** Ee, mmele o na le ditokololo tse dintsi, e seng tokololo e le nngwe fela. **15** Fa lonao lo re, “Ga ke tokololo ya mmele ka gore ga ke letsogo,” seo ga se dira lonao tokololo e potlana ya mmele. **16** Mme o ne o ka reng fa o utlwa tsebe e re, “Ga ke tokololo ya mmele ka gore ke tsebe fela, ga ke leitho”. A seo se ne se tlaa e dira tokololo e potlana ya mmele? **17** A re re fa mmele otlhe e ne e le leitho, o ne o ka utlwa jang? Kgotsa mmele wa gago otlhe fela e le tsebe e le nngwe e tona, o ne o ka dupelela jang? **18** Mme ga se kafa Modimo o re dirileng ka gone. O diretse mebele ya rona ditokololo di le dintsi thata, mme wa baya tokololo nngwe le nngwe fa o e batlang gone. **19** Go ne go tlaa hakgamatsa jang fa mmele o ne o na le tokololo e le nngwe fela? **20** Jalo o dirile ditokololo tse dintsi, mme le fa go ntse jalo, mmele o ntse o mongwe fela. **21** Leitho ga le kake la raya letsogo la re, “Ga ke go batle,” Tlhogo ga e kake ya raya dinao ya re, “Ga ke lo batle”. **22** Mme ditokololo dingwe tse di lebegang di le bokoa ebile di se bothokwa thata ke tsone tota tse di tlokegang thata, **23** mme ditokololo tse re akanyang gore ga di bothokwa thata, re di eleng tlhoko thata; fa ditokololo tsa mmele tse di sa lebegang di le dintle thata di amogela kelotlhoko e e faphegileng, **24** fa tota ditokololo tse di ka bonwang di sa batle tlhokomelo e e faphegileng e. Jalo Modimo o bopile mmele ka tselo e e leng gore tlotlo le tlhokomelo di newe ditokololo tse di lebegang di sa tlotlwa thata. **25** Se se dira boitumelo mo ditokololong, gore ditokololo tse di nne le tlhokomelo e e tshwanelang tse dingwe gore di itirele ka bo tsone. **26** Fa tokololo nngwe e utlwa bothoko, ditokololo di utlwa bothoko nayo, mme fa tokololo e le nngwe e tlotlwa, ditokololo tsothe di a itumela. **27** Jaanong se ke batlang go se bua ke se: Lotlhe lo mmele o le mongwe fela wa ga Keresete mme mongwe le mongwe wa lona ke tokololo e e faphegileng e e tlokegang ya one. **28** Thulaganyo ya ditokololo dingwe tse a di beileng mo phuthengong ya gagwe ke e, e e leng mmele wa gagwe: Baporofiti—bao ba rerang Lefoko la Modimo, Baruti, bao ba dirang dikgakgamatso, bao ba nang le neo ya phodiso, bao ba ka thusang ba bangwe, bao ba ka dirang ba bangwe gore ba dire mmogo, bao ba buang ka diteme tse ba sa di ithutang. **29** A mongwe le mongwe ke moaposetoloi? Nnyaa. A mongwe le mongwe ke moreri? Nnyaa. A botlhe ke baruti? A mongwe le mongwe o na le nonofo go dira dikgakgamatso? **30** A mongwe le mongwe o ka fodisa bolwetse? Nnyaa. A Modimo o re naya rotlhe nonofo ya go bua ka diteme tse re sa di ithutang? A mongwe fela o ka thaloganya a bo a ranola se se buiwang ke ba ba nang le neo ya puo ya seeng? **31** Nnyaa, leka bojotlhe jwa gago go nna le neo e e di gaisang tsothe. Pele, le fa go ntse jalo, mma ke go bolelele sengwe se sele se se botoka go di gaisa tsothe!

13 Fa ke ne ke na le mpho ya go kgona go bua dipuo tse dingwe tse ke sa di ithutang le go ka bua puo nngwe le nngwe e e mo legodimong le mo lefatsheng lotlhe, mme ke sa rate ba bangwe, ke tlaa bo ke ne ke tsosa modumo fela. **2** Fa ke ne ke na le mpho ya go porofesa ebile ke itse tsothe tse di tlaa diragalang mo lobakeng lo lo tlang, ke itsile sengwe le sengwe kaga sengwe le sengwe, mme ke sa rate ba bangwe, go ne go ka dira molemo wa eng? Le fa ke ne ke na le mpho ya tumelo mo e leng gore ke ne ke ka bua le thaba ka e dira gore e sute, ke ne ke tlaa bo ke santse ke sena mosola gotlhelele fa se sena lorato. **3** Fa ke abetse bahumanegi sengwe le sengwe se ke nang naso, le fa e le gore ke tshubetswe go rera Mafoko a a Molemo, mme ke ne ke sa rate ba bangwe, go ka bo go sena molemo ope. **4** Lorato lo pelotelele lo bile lo pelonomi, ga lo pelotshetha kgotsa lefufa, ga lo ikgantse kgotsa go ipelafatsa, **5** ga lo ikgodise kgotsa ga lo ikgapele ebile ga lo makgakga. Lorato ga lo batle tselo ya lone fela. Ga lo rumolesege kgotsa go amega. Ga lo tshole ka pelo ebile ga lo nke lo tlhokomela le fa ba bangwe ba lo direla phoso. **6** Ga lo ko lo itumelela tshiamololo mme lo itumelela boammaaruri ka nako tsothe. **7** Fa o rata yo mongwe o tlaa nna le boammaaruri mo go ene go sa re sepe gore go a reng. O tlaa aga o dumela mo go ene, o solofela tse di molemo mo go ene, ebile o mo femela ka gale ka boammaaruri. **8** Dimpho tsothe tse di faphegileng le dinonofu tse di tswang kwa Modimong e tlaa re letsatsi lengwe di tle mo bokhutlong, mme lorato lo tsewelela ka bosakhutleng. Letsatsi lengwe seporofeso, go bua dipuo tse di sa itsiweng le kitso e e faphegileng, dimpho tse di tlaa nyelela. **9** Jaanong re itse go le gonnye fela, le kaga dimpho tsa rona tsa bothokwa le thero ya ba ba filweng go rera thata. Mme thero ya bone e santse e le bokoa, **10** mme fa se se itekanetseng se tla, se se sa itekanelang se tlaa nyelela. **11** Mme go ntse jaana: erile ke sa le ngwana ke ne ke bua ebile ke akanya jaaka ngwana. Mme ya re ke nna monna megopolo ya gola go feta ya bonyana jwa me, mme jaanong ke tlogetse dilo tsa sengwana. **12** Mme fela jalo, re ka bona ra bo ra thaloganya go le gonnye fela kaga Modimo, jaaka ekete re lebetse tsabakelo ya gagwe mo seiponeng se se letobo; mme letsatsi lengwe re tlaa mmona fela jaaka a ntse, re lebane mo matlhong. Mme gompieno ke santse ke le mo letobong, mme e tlaa re kwa morago ke tlaa bona sengwe le sengwe sentle; fela jaaka Modimo o bona mo teng ga pelo ya me gompieno. **13** Go na le dilo di le tharo tse di salang, tumelo, tsholofelo le lorato, mme se se tona mo dilong tse ke lorato.

14 A lorato e nne lone maikaelelo a lona a magolo; le fa go ntse jalo, kopang le tsone dineo tsa bothokwa tse Mowa O O Boitshepo o di nayang mme bogolo thata mpho ya seporofeso, go kgona go rera molaetsa wa Modimo. **2** Mme fa mpho ya gago e le ya go “bua ka diteme,” ke gore go bua ka dipuo tse o iseng o ke o di ithute, o tlaa bo o bua le Modimo e seng le batho ba bangwe, ka gonne ga ba kitla ba kgona go go thaloganya. O tlaa bo o bua ka nonofo ya Mowa mme e tlaa bo e le sephiri. **3** Mme yo o porofesang, a rera melaetsa ya Modimo, o thusa ba bangwe go gola mo Moreneng, go ba kgothatsa le go ba gomotsa. **4** Jalo motho yo o “buang ka

diteme" o ithusa go gola mo moweng, mme yo o porofesang, a rera melaetsa e e tswang kwa Modimong, o thusa phuthego yotlhe go gola mo boitshepong le mo boitumelong. 5 Ke eletsa fa lotlhe lo ka bo lo na le mpho ya go "bua ka diteme," mme le e leng go feta foo. Ke eletsa fa lotlhe lo ka bo lo kgona go porofesa, lo rera melaetsa ya Modimo, gonne seo ke nonofo e kgole e e nang le mosola thata go na le go bua dipuo tse di sa itsiweng, fa e se fela fa o ka bolelela batho bothle kwa morago gore o ne o rayang, gore le bone polelo ya gago e tle e ba solegele molemo. 6 Ditsala tse di rategang, le fa e le nna ke tla kwa go lona ke bua dipuo tse lo sa di tthaloganyeng, moo go ka lo thusa ka eng? Mme fa ke bua ka tlhamalalo se Modimo o se ntshenoletseng, ke lo bolelela dilo tse ke di itseng, le se se tlaa diregang le boammaaruri jo bogolo jwa Lefoko la Modimo, seo ke selo se lo se tlhokang; ke sone se se tlaa lo thusang. 7 Le fa e le diletso jaaka phala kgotsa harepa, ke dikai tsa tlhokego ya go bua puo e e utwalang, go na le go bua ka dipuo tse di sa itsiweng. Gonne ga go ope yo o ka tthaloganyang modumo o phala e o tshamekang fa e se nthla nngwe le nngwe ya molodi e utlwala sentle. 8 Mme fa moletsaphala wa mophato a sa letse phala sentle, masole a tlaa itse jang gore ba bilelwa go ya ntweng. 9 Ka tsela e e ntseng jalo, fa o bua le motho ka puo nngwe e a sa e tthaloganyeng, o tlaa itse jang gore o rayang? Go ka bo go tshwana fela le motho a bua a le nosi. 10 Ke dumela gore go na le makgolo kgolo a dipuo tse di farologanyeng mo lefatsheng, mme tsothe di siametse ba ba di tthaloganyang, 11 mme mo go nna ga di reye sepe. Motho yo o buang le nna ka nngwe ya dipuo tse o tlaa bo a le moeng mo go nna le nna ke tlaa bo ke le moeng mo go ene. 12 E re ka lo tshwenyegile thata go nna le dimpho tse di faphegileng tse di tswang mo Moweng O O Boitshepo, mo kopeng tse di botoka thata, tse di tlaa nnang le thuso thata mo phuthegong yotlhe. 13 Fa mongwe a neilwe mpho ya go bua ka diteme tse di sa itsiweng, o tshwanetse go rapelela mpho ya go itse se a se buileng gore a tle a kgone go tthalosetsa batho sentle se a neng a se bua. 14 Gonne fa ke rapela ka puo e ke sa e tthaloganyeng, mowa wa me o a rapela mme nna ga ke itse se ke se buang. 15 Mme jalo he, ke tlaa dirang? Ke tlaa di dira ka bobedi. Ke tlaa rapela ka diteme tse di sa itsiweng le ka puo fela e mongwe a e tthaloganyang. Ke tlaa opela ka diteme tse di sa itseeng le ka puo fela ya gale, gore ke tle ke tthaloganye pako e ke e opelang; 16 gonne fa o baka ebile o leboga Modimo ka mowa fela, o bua ka loleme lo longwe, ba ba sa go tthaloganyeng ba ka baka Modimo jang le wena? Ba ka tlhakanela jang tebogo le wena fa ba sa itse gore wa reng? 17 O tlaa bo o leboga sentle thata, fa go belaesega, mme batho ba bangwe ba ba leng teng ga ba kitla ba thusaga. 18 Ke leboga Modimo go bo ke "bua ka diteme" mo sephiring go lo gaisa lotlhe. 19 Mme mo kobamelong e e mo pepeneng ke ka bua mafoko a le mathano a batho ba ka a tthaloganyang a bo a ba thusa, go na le mafoko a a dikete di le lesome a a buiwang ka diteme ka puo e e sa itsiweng. 20 Bakaulengwe ba ba rategang, se nneng banyana mo go tthaloganyeng dilo tse. Nnang banyana fa go logwa maano a bosula, mme lo nne batho ba ba bothale mo go tthaloganyeng dilo tsa mofuta o. 21 Re

boleletswe mo dikwalong tsa bogologolo gore Modimo o tlaa roma batho go tswa mafatsheng a mangwe go bua ka dipuo tsa seeng mo bathong ba one, mme le fa go ntse jalo ga ba kitla ba reetsa. 22 Jalo a o a bona gore go kgona go "bua ka diteme" ga se sesupo sa bana ba Modimo kaga nonofo ya one, mme ke sesupo mo go ba ba sa bolokwang. Mme le fa go ntse jalo, seporofeso (go rera boammaaruri jo bo tibileng jwa Modimo) ke se Bakeresete ba se tlhokang, mme ba ba sa dumeleng ga ba ise ba go ipaakanyetse. 23 Mme le fa go ntse jalo, fa motho yo o sa bolokwang, a utlwa lotlhe lo bua dipuo tse dingwe, o a tshwanela go akanya gore lo a tsenwa. 24 Mme fa lo porofesa, lo rera Lefoko la Modimo, (le fa tota thero e e ntseng jalo bogolo e le ya badumedi) mme motho yo o sa bolokwang, kgotsa Mokeresete yo mosha a tsena, yo o sa tthaloganyeng kaga dilo tse, dihero tse tsothe di tlaa dira gore a dumele gore ke moleofi, le segakolodi sa gagwe se tlaa tlhajwa ke sengwe le sengwe se a se utlwang. 25 E tlaa re fa a reeditse, dikakanyo tsa gagwe tsa sephiri di tlaa bewa mo pepeneng mme o tlaa wela fa fatshe ka mangole a obamela Modimo, a bolela gore tota Modimo o teng mo gare ga lona. 26 Jaanong bakaulengwe ba me, a re oketseng se ke se buang. Fa lo kopana, bangwe ba tlaa opela, mongwe o tlaa ruta kgotsa a bolele kitsiso nngwe e Modimo o e mo neileng, kgotsa a bua puo e e sa itseeng, kgotsa a bolele se yo mongwe a se buang ka puo e e sa itseeng, mme sengwe le sengwe se se dirwang se tshwanetse go solegela bothle molemo, le go ba aga mo Moreneng. 27 Go se nne palo e e fetang bobedi kgotsa boraro ya ba ba buang puo e e sa itseeng, mme gape ba tshwanetse go bua ka go latelana mme mongwe o tshwanetse go ipaakanyetsa go ranola se ba se buang. 28 Mme fa go sena ope yo o ka ranolang, ga ba a tshwanela go buela kwa godimo. Ba tshwanetse go buela kwa tlase le Modimo ka puo e e sa itseeng mme e seng mo pepeneng. 29 Ba babedi kgotsa ba bararo ba ka porofesa ka tatelano fa ba na le mpho eo, ba bangwe bothle ba reeditse. Mme fa mongwe a porofesa, mongwe o sele a amogela molaetsa kgotsa mogopolo mo Moreneng, yo o buang o tshwanetse go khutlisa puo ya gagwe. 31 Ka tsela e bothle ba bang le mpho ya go porofesa ba ka bua ka tatelano, mme mongwe le mongwe o tlaa ithuta a bo a kgothatsega a bo a thusaga. 32 Gakologelwang gore motho yo o nang le molaetsa o o tswang mo Modimong o na le nonofo ya go ikganela kgotsa go emela lobaka lwa gagwe gore lo tle. 33 Modimo ga se one o o ratang gore dilo di nne e seng ka fa thulaganyong le ka tsela e e tenang. O rata kutlwano, mme o e bona mo diphuthegong tsothe tse dingwe. 34 Basadi ba tshwanetse go didimala mo dikopanong tsa phuthego. Ga ba a tshwanela go akgela mo puisanyong, gonne ba ba botlana mo banneng jaaka dikwalo le tsone di bolela. 35 Fa ba na le potsa go botsa, a ba botse banna ba bone kwa malapeng gonne ga go a siama gore basadi ba bua megopolo ya bone mo dikopanong tsa phuthego. 36 A ga lo dumele? A mme lo akanya gore kitso ya thato ya Modimo e a simologa ebile e felela ka lona Bakorinta? Fa lo rialo, lo a fosa! 37 Lona ba lo reng lo na le mpho ya go porofesa kgotsa nonofo nngwe e e tswang mo Moweng O O Boitshepo lo tshwanetse go nna ba nthla go lemoga gore se ke se buang ke taolo e e

tswang mo Moreneng ka bo ene. **38** Mme fa go na le mongwe yo o santseng a ganetsa, re tla mo togela mo boeleleng jwa gagwe. **39** Jalo badumedi ka nna, eletsang go nna baporofiti gore lo kgone go rera molaetsa wa Modimo sentle; mme lo seka lwa re go phoso go “bua ka ditebe,” **40** le fa go ntse jalo, thomamisang gore sengwe le sengwe se dirwa sentle mo tshiamong le mo thulaganyong.

15 Jaanong mmang ke lo gakolole, bakaulengwe, gore Efangela tota ke eng, gonne ga e a fetoga, e ntse ke one Mafoko a a Molemo a ke a lo reretseng pele. Lo a amogetse mme le gompiano lo santse lo le mo go one, gonne tumelo ya lona e agilwe ka go lekalekana mo godimo ga molaetsa o o hakgamatsang o; **2** mme ke Mafoko a a Molemo a, a a lo bolokang fa lo santse lo a dumela ka thomamo, fa e se fela fa lo ne lo se ka lwa a dumela lwa nthla. **3** Ke lo boleletse fela go tswa kwa tshimologong se ke se boleletsweng gore Keresete o swetse dibetse tsa rona fela jaaka Dikwalo di boletse. **4** Le gore o ne a fithwa le gore morago ga malatsi a le mararo o ne a tsoga mo phupung fela jaaka baporofiti ba boletse pele. **5** O bonywe ke Petera mme morago a bonwa ke botlhe “ba ba lesome le bobedi”. **6** Morago ga moo o bonywe ke bakaulengwe mo Moreneng ba feta makgolo a matlhano ka nako e le nngwe fela, ba bontsi jwa bone bo santseng bo tshela, le fa ba bangwe ba setse ba sule. **7** Mme Jakobe a mmona mme morago a bonwa ke baaposetoloi botlhe. **8** Morago ga bone botlhe le nna ka mmona, lobaka lo lo leele morago ga ba bangwe, jaaka e ka re ke tsetse moragorago mabapi le se. **9** Gonne ke mmošana mo baaposetoloing botlhe, ebile ke ne ke sa tshwanela go bidiwa moaposetoloi gotlhelele ka nthla ya ka fa ke neng ke bogisa phuthago ya Modimo ka teng. **10** Mme se ke leng sone gompiano, ke ka nthla ya gore Modimo o tshetse bopelonomi jo bogolo le tshogafatso mo go nna, e seng kwa ntle ga madu: gonne ke dirile thata go gaisa baaposetoloi ba bangwe botlhe, le fa go ntse jalo e ne e sa dirwe ke nna, mme Modimo o dira mo go nna, go ntshogafatsa. **11** Ga go na pharologanyo epe mo go yo o dirileng thata, nna kgotsa bone; selo sa bothokwa ke gore re lo reretse Efangela, le gore lo e dumetse. **12** Mme mpoletlelang se! Ka lo dumela se re se rerang, gore Keresete o ne a tsoga mo baswing, ke eng fa bangwe ba lona ba re baswi ga ba kitla ba rula? **13** Gonne fa go se na tsoga ya baswi, jalo Keresete o tshwanetse a bo a santse a sule. **14** Mme fa a santse a sule, go raya gore thero yotlhe ya rona ga e na molemo le go tshapa Modimo ga lona ga go reye sepe, ga go na thuso, ga go na tsholofelo; **15** mme le rona baaposetoloi re maaka rotlhe ka gore re rile Modimo o tsositse Keresete mo phupung, mme moo ga se boammaaruri fa baswi ba sa rule. **16** Fa ba sa rule, jalo go raya gore Keresete o santse a sule, **17** ebile lo dielelele thata go tswela lo tshapa Modimo go lo boloka, mme lo santse lo le ka fa tlase ga katholo ya maleo a lona; **18** ka tsela eo, Bakeresete botlhe ba ba suleng ba lathegile! **19** Mme fa go nna Mokeresete go re solegela molemo gompiano mo botshelong jo, re dibopiwa tse di thomolang pelo. **20** Mme boammaaruri ke gore Keresete o tsogile mo baswing mme a nna wa nthla wa batho ba ba didikadike ba ba tlaa rulang letsatsi lengwe.

21 Loso lo tsile mo lefatsheng ka nthla ya se motho a le esi (Adamo) o se dirileng, ebile ke ka nthla ya se motho yo mongwe yo (Keresete) o se dirileng gore jaanong go nne le tsoga ya baswi. **22** Mongwe le mongwe o a swa ka nthla ya gore rotlhe re ba losika lwa ga Adamo, re le maloko a lotso lwa gagwe a sebe, mme gongwe le gongwe kwa go nnang le sebe, loso lo a diragala. Mme botlhe ba losika lwa ga Keresete ba tlaa tsoga gape. **23** Mme le fa go ntse jalo mongwe le mongwe o tlaa tsoga ka fa thulaganong: Keresete o tsogile pele; mme fa Keresete a bowa, batho botlhe ba gagwe ba tlaa rula. **24** Morago ga moo bokhutlo bo tlaa tla fa o tlaa busetsang bogosi kwa go Modimo Rara, a beile fa fatshe baba botlhe ba mofuta mengwe le mengwe. **25** Gonne Keresete o tlaa nna Kgosi go fithelela a fenywa baba botlhe ba gagwe, **26** mmogo le mmaba wa bofelo ebong, loso. Le lone lo tshwanetse go fennngwa lwa ba lwa khutlisiwa. **27** Gonne Keresete o neetswe puso le taolo mo dilong tsothe ke Rraagwe; fa e se fela gore, Keresete ga a buse Rara ka bo ene, yo o mo neileng nonofo ya go busa. **28** Fa Keresete a sena go fenywa baba ba gagwe mo ntweng, mme ene Morwa Modimo, o tlaa ipaya ka fa tlase ga ditaolo tsa ga Rraagwe, gore Modimo o o mo neileng phenyo mo go sengwe le sengwe o nne mogolo mo go tsothe. **29** Fa baswi ba sa rule, jaanong go thusang gore batho ba kolobelediwe ba ba suleng? Ke eng fa lo go dira fa ele gore ga lo dumele gore letsatsi lengwe baswi ba tlaa tsoga. **30** Mme ke eng fa rona re aga re tsenya matshelo a rona mo diphateng re lebagana le loso nako le nako? **31** Gonne ke boammaaruri ke lebagana le loso letsatsi le letsatsi; moo go boammaaruri fela jaaka boipelafatso jwa me mo go goleng ga lona mo Moreneng. **32** Mme go ne go na le thuso ya eng mo go lona go lwantsha dibatana tsa naga, ebong batho bale ba Efeso, fa e ne e le ka nthla ya se ke se amogelang mo botshelong jono? Fa e le gore ga re kitla re tshela gape re sena go swa, le rona go ka nna botoka gore re tsamaye re ye go itumediswa; a re jeng, re ntweng, mme re itumeleng. Pharologanyo ke eng? Gonne ka moso re a swa, mme seo se lere sengwe le sengwe kwa bokhutlong. **33** Lo se ka lwa tsiediwa ke ba ba buang dilo tseo. Fa lo ba reetsa lo tlaa simolola go dira jaaka bone. **34** Itharabologelweng, lo tlogele go leofa. Gonne go thabisa ditlhong go re, bangwe ba lona ga se Bakeresete gotlhelele ebile ga ba ise ba ke ba itse Modimo. **35** Mme mongwe o ka botsa a re, “Baswi ba tlaa rudisiwa jang? Ba tlaa nna le mebele e e ntseng jang?” **36** Ke potso ya boelelele jang! Fa o tsenya peo mo mmung ga e gole e nna setlhatshana fa e se gore e “swe” pele. **37** Mme fa mogwang o motala o tswa mo teng ga peo, o pharologanyo thata le peo eo e o e jetseng lwa nthla. Gonne se o se tsentseng mo mmung ke peo e nnye ya mabele e e omeletseng, kgotsa le fa e ka nna eng se o se jalang, **38** fela jalo Modimo o e neye mmele o montle o mosha, mofuta fela o o batlang e nna le one; ditlhatshana tse di farologaneng di tswa mo mofuteng mongwe le mongwe wa peo. **39** Mme fela jaaka go na le mofuta e e farologanyeng ya dipeo le ditlhatshana, fela jalo go na le mofuta e e farologanyeng ya nama. Batho, dipholologo, ditlhapi le dinonyane tsothe di a farologana. **40** Baengele ba ba mo legodimong ba na le mebele e e farologanyeng thata le ya rona, le bontle le kgalalelo ya

mebele ya bone e farologanye le bontle le kgalalelo ya rona. 41 Letsatsi le na le kgalalelo e le nngwe fa ngwedi le dinaledi di na le mofuta o mongwe. Mme dinaledi le tsona di farologanye le tse dingwe ka bontle jwa tsona le phatsimo. 42 Fela jalo, mebele ya rona ya selefatshe e e swang, e bo e bola, e farologanye le mebele e re tlaa n nang le yone fa re rula, gonne ga e kitla ee swa. 43 Mebele e re nang nayo gompiano e a re bogisa gonne e a lwala ebile e a swa; mme e tlaa tlaa kgalalelo fa re rula. Ee, e bokoa, mebele e e swang gompiano, mme fa re sena go rula e tlaa bo e tsetse nonofo. 44 Ke mebele ya setho fela mo losong, mme fa e rula e tlaa bo e le mebele e e nonofileng thata. Gonne fela jaaka go na le mebele ya tholego, go na le mebele e e nonofileng ya semowa. 45 Dikwalo di bolela gore motho wa ntlha Adamo, o ne a neilwe mmele wa tholego, mme Keresete o feta moo, gonne o ne a le Mowa o o nayang botshelo. 46 Lwa ntlha, re na le mebele e ya setho mme moragonyana Modimo o tlaa re naya mebele ya semoya ya selegodimo. 47 Adamo o ne a dirilwe ka lorole lwa lefatshe, mme Keresete o dule kwa legodimong. 48 Motho mongwe le mongwe o na le mmele o o tshwanang fela le wa ga Adamo, o dirilwe ka lorole, mme botlhe ba ba n nang ba ga Keresete ba tlaa nna le mmele o o tshwanang le wa gagwe mmele o o tswang kwa legodimong. 49 Fela jaaka mongwe le mongwe wa rona a na le mmele o o tshwanang le wa ga Adamo, jalo e tlaa re letsatsi lengwe re bo re na le mmele o tshwanang le wa ga Keresete. 50 Ke lo bolelela se, bakaulengwe: mmele wa selefatshe o o dirilweng ka nama le madi ga o kake wa tsena mo Bogosing jwa Modimo. Mebele e ya rona e e swang ga e a siamelaga go ka tshela ruri. 51 Mme ke lo bolelela sephiri se se sa tlwaelesegang se, se se hakgamatsang: ga re kitla re e swa rotlhe, mme re tlaa newa mebele e mesha rotlhe! 52 Go tlaa diragala gotlhe ka nakonyana ka ponyo ya leitlho, fa torompeta ya bofelo e lela. Gonne go tlaa nna le go galaotega ga torompeta mo loaping mme Bakeresete botlhe ba ba suleng ba tlaa rula, ka mebele e mesha e e se kitlang e tlhola ee swa; mme rona ba re sa ntseng re tshela re tlaa akofa re nna le mebele e mesha. 53 Gonne mebele ya rona ya selefatshe, e re nang nayo gompiano e e swang, e tlaa tshwanelwa ke go fetolelwa mo mebeleng ya selegodimo e e se ka keng ya a swa mme e tlaa tshela ka bosakhutleng. 54 Fa se se direga, mme kwa bofelong lokwalo lo lo tlaa diragadiwa, lo lo reng, "Loso lo meditswe ke phenyo." 55 Loso ana phenyo ya gago e kae? Go loma ga gago go kae? Gonne sebe, lobelela lo lo dirang loso, lo tlaa bo lo nyeletse; mme molao o o senolang dibe tsa rona o tlaa bo o sa thole o le moathodi wa rona. (Hades g86) 57 Re leboga Modimo jang ka mo! Ke one o o re dirileng gore re fenye ka Jesu Keresete Morena wa rona. 58 Jalo bakaulengwe ba me, e re ka phenyo e e tlang e tlhommisega, nonofang lo nitame, lo tshwaragane mo tirong ya Morena ka nako tsothe, gonne lo itse gore ga go sepe se lo se direlang Morena se se senyegang jaaka go ne go ka nna fa go ne go sena tso go ya baswi.

ka di neela diphuthego kwa Galatia. 2 Ka Tshipi yo mongwe le yo mongwe, mongwe le mongwe wa lona a beele fa thoko sengwe mo go se o se amogetseng mo bekeng, mme lo se dirisetse mpho e. Tlhathwa e ya fela ka fa Morena o go thusitseng ka gone. Lo se lete go fithelela ke tsena koo mme le kang go a phutha otlhe gangwe fela. 3 E tlaa re fa ke tla ke tlaa romela mpho ya lona e ntle ka lokwalo kwa Jerusalem, go ya go tsewa gone ke barongwa ba ba tshephegang ba lona lo tlaa ba tlhophang. 4 Mme fa go ntshiametse gore le nna ke tsamaye, jalo re ka tsamaya rotlhe. 5 Ke tlaa lo etela ke sena go etela kwa Masedonia pele, mme ke tlaa nna koo ka lobakanyana fela. 6 Go ka nna ga diragala gore ke nne le lona lobaka lo lolelele, gongwe mariga otlhe, mme ke gone lo ka nthomelang kwa ke tshwanetseng go ya teng gape. 7 Ka nako e ga ke batle gore ke fete fela; ke batla go tla ke nna lobakanyana, fa Morena a ka ntetla. 8 Ke tlaa nna mono Efeso go fithelela letsatsi la boikhutso la Pentekosete, 9 gonne kgoro e bulegile ya gore ke rere ke bo ke rute mono. Dilo tse dikgolo di a direga, mme go na le baganetsi ba le bantsi. 10 Fa Timotheo a tla, dirang gore a nne ka phuthologo, gonne o dira tiro ya Morena jaaka nna. 11 A go se nne le ope yo o mo nyatsang kgotsa a mo ithokomolosa. [a le mmotlana], mme lo mmusetse kwa go nna a itumeletse go nna le lona; ke mo lebeletse go mmona ka bonako, le ba bangwe ba ba bowang nae. 12 Ke kopile Apolose go lo etela le ba bangwe, mme o akantse gore ga se go rata ga Modimo gothelele gore a tsamaye gompiano; o tlaa lo bona mo bogautshwaneng fa a na le lobaka. 13 Nnang lo ithokometse mo matshwenyegong a semowa; emang ka boammaaruri mo Moreneng; dirang jaaka banna; lo nonofe; 14 mme sengwe le sengwe se lo se dirang, se direng ka tshiamo le ka lorato. 15 A lo gakologelwa Setefanese le ba ntlo ya gagwe? Ke bone ba ntlha go nna Bakeresete mo Akaia mme ba dirisa matshelo a bone mo go thuseng Bakeresete gongwe le gongwe. 16 Tswetswee tshetsang ditaello tsa bone mme lo direng sengwe le sengwe se lo se kgonang go ba thusa le ba bangwe botlhe ba ba tshwanang le bone ba ba lo direlang thata ka boineelo. 17 Ke itumela thata gore Setefanese, Foretunalo, le Akaiko ba gorogile fano ba etile. Ba dirile thuso e lona lo sa kgoneng go o dira. 18 Ba intumedisitse thata ebile ba nkgothaditse mo go hakgamatsang, jaaka ke tlhommisa gore ba ne ba dira jalo le mo go lona. Ke solofela gore lo itumelela tiro ya banna ba ba ntseng jaaka ba. 19 Diphuthego mo Asia di a lo dumedisana. Akwila le Peresila ba romela lorato lwa bone le botlhe ba ba kopanelang tirelo mo malapeng a bone ba a dumedisana. 20 Ditsala tsothe fano di nkopile go lo di dumedisetsa. Mme lo dumedisana ka lorato fa lo kopana le ba bangwe. 21 Ke tlaa kwala mafoko a bofelo ka seatla se e leng sa me: 22 fa mongwe a sa rate Morena, motho yoo, o hutsegile. Morena Jesu tla! 23 A lorato le tshetsofatso ya Morena Jesu Keresete e nne le lona. 24 Lorato lwa me go botlhe, gonne rotlhe re ba ga Jesu Keresete. Kele, Wa lona ruri Paulo

16 Mme jaanong se ke ditsela dingwe kaga madi a lo a kgbokanyang go a romelela Bakeresete ba ba kwa Jerusalem; mme se ke ditsela tse di tshwanang le tse ke neng

Bakorintha II

1 Ditsala tse di rategang, Lokwalo lo lo tswa mo go nna Paulo, yo o tihomilweng ke Modimo go nna morongwa wa ga Jesu Keresete; le mo go mokaulengwe wa rona yo o rategang Timotheo. Re lo kwalela lotlhe Bakeresete ba Korinta le Akaia yotlhe. **2** A Modimo Rraetsho le Morena Jesu Keresete o segofatse mongwe le mongwe wa lona thata, o lo neye kagiso. **3** Kana re na le Modimo o o hakgamatsangjang, ke Rraagwe Morena wa rona Jesu Keresete, motswedi wa kutlwelo bothoko nngwe le nngwe, ene yo ka kgakgamatso o re gomotsang a bo a re nonotsha mo bothateng jwa rona le mo ditekong. Mme ke eng fa a dira jaana? Gore ba bangwe ba ba tshwenyegileng ebile ba tlhoka kutlwelo bothoko ya rona le kgothatso, re ba fe thuso e e ntseng jaana le kgomotso e Modimo o e re neileng. **5** Lo ka thomamisana gore fa re ntse re bogela Keresete, o tlaa nna a re supegetsa kgomotso ya gagwe le kgothatso. **6** Re mo matshwenyegong a magolo go lo tlisetse kgomotso ya Modimo le poloko. Mme mo matshwenyegong a rona Modimo o re gomoditse ebile o re thusa gore re lo supegetse mo maitemogeleng a rona ka fa Modimo o tlaa lo gomotsang ka kutlwelo bothoko ka teng fa lo tsena mo dipogisong tse di tshwanang le tse. O tlaa lo naya nonofo go itshoka. **8** Ke bona gore lo tshwanetse go itse, bakaulengwe ba ba rategang, kaga pitlagano e re neng ra feta mo go yone kwa Asia. Re ne re pitlaganye tota ebile re fentswe gothelele ebile re boifa gore ga re kake ra tshela mo go yone. **9** Re ne re ikutlwa o ka re re athholelwa go swa le go bona ka fa re neng re sena nonofo ka teng go ithusa; mme go ne go siame, gonne foo re ne ra baya sengwe le sengwe mo diatleng tsa Modimo, o ka osi o neng o ka re boloka, gonne o ka tsosa le bone baswi tota. **10** Mme o ne wa re thusa, wa re boloka mo losong, lo lo boitshegang; ee, re o lebeletse gore o re thusa gangwe le gape. **11** Mme lo tshwanetse go re thusa le lona, ka go re rapelela. Gonne ditebogo tse dikgolo le pako tse di tswang mo go lona a di tlaa ya kwa Modimong, di tswa kwa go lona ba lo boneng dikarabo tsa one tse di hakgamatsang mo dithapelong tsa lona tsa polohego! **12** Re itumela thata gore ka boikanyego jotlhe mo ditirong tsa rona tsotlhe re ne re itshekile ebile re le pelo e phepa, re ikanya mo Moreneng ka tshisibalo gore a re thusa, e seng ka fa bothaleng jwa rona. Mme mo go boammaaruri jo bogolo, fa go kgonega, kaga mkgwa o re o dirisitseng mo go lona. **13** Dikwalo tsa me di ne di thamaletse ebile di ikanyega; ga go na sepe se se neng se sa kwalwa sentle! Mme le fa lo sa nkitse sentle (ke solofela gore letsatsi lengwe lo tlaa nkitse), ke batla go re lo nkamogele lo bo lo ikgantsho ka nna, jaaka lo setse lo ntse, fela jaaka ke tlaa ikgantsha ka lona mo letsatsing leo le Morena Jesu o tlang gape ka lone. **15** E ne e le ka nthla ya go re ke ne ke rulagantse go tsena ka lona mo loetong lwa me go ya Masedonia, le morago jaaka fa ke tlaa bo ke bowa, gore ke ne ke ka nna tshogofatso e e menaganeng mo go lona le gore lo ka nthomela kwa Judea. **17** Mme lo ka botsa lwa re, a ke fetotse thulaganyo ya me? A tota ga ke a dira mogopolo wa me le fa go ntse jalo? Kgotsa ke tshwana le monna wa

selefatsho yo o reng "ee" fa tota a raya "nnyaa". **18** Le gokal Jaaka ruri Modimo o le boammaaruri, ga ke motho yo o ntseng jalo. "Ee", wa me ke "Ee". **19** Timotheo le Selefano le nna re ntse re lo bolelela kaga Jesu Morwa Modimo. Ga se yo o reng "ee" fa a raya "nnyaa". O aga a dira fela se a se buang. **20** O a dira ebile o diragatsa ditsholofetso tsotlhe tsa Modimo, ga go re sepe gore di bontsi bo kae, go galaletsana leina la gagwe. **21** Ke one Modimo o, o o diretseng nna le wena mo tumelong ya Sekeresete le go re dira baaposetoloi go rera Mafoko a a Molemo. **22** O beile lotshwao mo go rona, lotshwao lwa go nna ba one, wa bo wa re naya Mowa wa one O O Boitswaga mo dipelong tsa rona e le sesupo sa gore re ba one, e le tiragalo ya nthla ya tsotlhe tse o tlaa re di nayang. **23** Ke goeletsana kwa Modimong go ntshupela fa ke sa bue boammaaruri: Mabaka a a dirileng gore ke seka ka lo etela ke gore ga ke batle go lo utlwisana bothoko ka kgalemelo e e bothoko. **24** Fa ke tla, le fa ke sa kake ka dira thata go thusa tumelo ya lona, gonne e setse e nonofile, ke batla go ka dira sengwe ka ga boipelo jwa lona: ke batla go lo itumedisana, e seng go lo utlwisana bothoko.

2 Ke ne ka ithaya ka re "Nnyaa, ga nke ke go dira. Ga ke na go ba utlwisana bothoko ka loeto lo longwe lo lo bothoko". **2** Gonne fa ke lo utlwisana bothoko, ke mang yo o tlaa intumedisana? Ke lona ba lo tshwanetseng go go dira, mme lo ka intumedisana jang fa ke lo utlwisana bothoko? **3** Ke gone ka moo ke kwadileng jaaka ke ne ka kwala mo lokwalong lwa bofelo, gore lo tle lo thamaletse dilo pele ga ke tla. Mme fa ke tla, ga ke na go utlwisana bothoko ke ba ba tshwanetseng go intumedisana thata. Ke ne ka thomamisana gore boitumelo jwa lona ke selo se le sengwe fela le jwa me gore ga lo kitla lo itumelana fa e se ke tla ka boitumelo. **4** Oo, kana ke ne ke sa rate jang go kwala lokwalo lo! Go batlile go mphatlola pelo thata mo ebileng ke lo bolelela ka boammaaruri gore ke ne ka lela. Ke ne ke sa batle go lo utlwisana bothoko, mme ke ne ke tshwanetse go lo bontsha gore ke lo rata go le kae le go lo tlhokomela kaga se se neng se lo diragalela. **5** Gakologelwang gore monna yo ke neng ke kwala kaga gagwe, yo o tsoisitseng matshwenyego otlhe, ga a nkhusafatsa jaaka lona lotlhe, ntswa ke na le seabe mo go sone le nna. Ga ke batle go nna thata mo go ene go feta jaaka ke tshwanetse. O othailwe thata ke go mo gana ga lona. **7** Jaanong ke nako ya go mo itshwarela le go mo gomotsa. Fa go sa nne jalo o ka galakega thata a bo a ngodiega mo a se ka keng a fola. **8** Tsweetswee, mmontsheng gore lo santse lo mo rata thata. **9** Ke lo kwaletse jaaka ke ne ka dira gore ke tle ke bone go re go ka lo tsaya lobaka lo lo kae go nkutlwa. **10** Fa lo itshwarela mongwe, ke a mo itshwarela le nna. Mme le fa e le eng se ke se itshwaretseng, (mo e leng gore le nna go nkamile) go itshwaretswe ka tetelelo ya ga Keresete le gone go lo solegela molemo. **11** Lebaka le lengwe la boitshwarelo ke go ikgapha mo go tsiediweng ke Satane; gonne re itse se o lekang go se dira. **12** Jalo e rile ke filtha bokgakaleng jwa motse wa Terasa, Morena a nnaya dinako tse di ntle tsa go rera Efangele. **13** Mme Tito, Mokaulengwe wa me yo o rategang, o ne a seyo go nkgathantsha, mme ka se ka ka nna le boiketlo mo pelong, ke hakgamatse gore o kae le gore o diragaletswe ke eng. Mme

ka laela ka tlhamalalela kwa Masedonia go leka go mmona. 14 Mme a go lebogwe Modimo! ka se Keresete a se dirileng, ka go re naya phenyo gore gongwe le gongwe fa re tsamayang teng a re dirise go bolelela ba bangwe kaga Morena le go anamisa Efangele jaaka setlolo se se monate. 15 Ka ntsha ya Modimo go na le monko o o monate mo matshelong a rona. Ke monko o o monate wa ga Keresete mo go rona, monko o o monate mo go ba ba bolokilweng le ba ba sa bolokwang mo tikologong yotlhe ya rona. 16 Mo go ba ba sa bolokwang, re bonala jaaka monko o o boitshegang wa loso le tshenyego fa mo go ba ba itseng Keresete re le setlolo se se nayang botshelo. Mme ke mang yo o nonofetseng tiro e e ntseng jaaka e. 17 Ke bao fela ba ba tshwanang le rona, batho ba ba itekanetseng ba ba romilweng ke Modimo, ba bua ka nonofo ya ga Keresete, le leitho la Modimo le re okame. Ga re tshwane le ba ba bapalang ka Lefoko la Modimo, ebile ba bantsi thata, ba megopolo ya bone mo go tsamaiseng Efangele e leng ipapalelo ka yone.

3 A re simolola go nna jaaka baruti bao ba lona ba ba maaka ba ba tshwanetseng go lo bolelela gotlhe kaga bone le go tla le dikwalo tse di telele tsa go itshupa? Ke dumela gore ga lo tlhoke lwa ga ope go lo bolelela ka ga rona, a ga go a nna jalo! Mme ga re tlhoke kgakololo epe mo go lona! 2 Lokwalo loo lo ke lo batlang fela, ke lona ka bolona! Ka go leba phetogo e e molemo mo dipelong tsa lona, mongwe le mongwe o ka bona gore re dirile tiro e ntle mo go lona. 3 Ba ka bona gore lo lokwalo lo lo tswang kwa go Keresete, lo lo kwadilweng ke rona, ga se lokwalo lo lo kwadilweng ka pene le enke, fa e se ka Mowa wa Modimo o o tshedileng; e seng lo lo gabilweng mo lefikeng, fa e se mo dipelong tsa batho. 4 Re bua dilo tse di siameng tse kaga rona fela ka ntsha ya tshepho ya rona e kgolo mo Modimong ka Keresete, gore o tlaa re thusa go nna boammaaruri mo go se re se buang, 5 mme e seng ka ntsha ya gore re gopola re ka dira sengwe le sengwe se se sa feleng ka borona. Nonofo le phenyo ya rona e tswa fela mo Modimong. 6 Ke one o o re thutsitseng go bolelela ba bangwe Kgolagano e ncha go ba boloka. Ga re ba bolelele gore ba tshwanetse go utlwa molao mongwe le mongwe wa Modimo kgotsa ba swe; mme re ba bolelele gore ba na le botshelo mo Moweng O O Boitshepo. Tsela ya bogologolo ya go leka go bolokwa ka go tshegetsatsa Ditaolo tse di Lesome, e felela mo losong; mo tseleng e ncha, Mowa O O Boitshepo o ba naya botshelo. 7 Le fa tsamaiso ya molao wa bogologolo o o neng o isa losong e simologile ka kgalalelo e e kalo mo batho ba neng ba ka se ka ba leba sefathogo sa ga Moshe. Gonne jaaka a ne a ba neile melao ya Modimo go e utlwa, sefathogo sa gagwe se ne se phatsima ka kgalalelo e le nngwe le ya Modimo, le fa phatsimo e ne e setse e fifala. 8 A ga re kitla re lebelela kgalalelo e kgolo mo malatsing a no fa Mowa O O Boitshepo o naya botshelo? 9 Fa e ne e le gore leano le le isang tshenyegong le ne le galalela, kgalalelo e kgolo ke leano le le dirang batho go nna tshiamo le Modimo 10 Mme tota, kgalalelo eo ya ntsha e e phatsimileng mo sefathogong sa ga Moshe ga e na mosola gothelele fa e tshwantshiwa le kgalalelo e e feteletseng ya Kgolagano e Ncha. 11 Jalo fa mokgwa wa bogologolo o o nyeletseng o ne o tletse

kgalalelo ya legodimo, kgalalelo ya leano le lesa la Modimo la poloko ya rona le legolo thata, gonne le ka bosakhutleng. 12 Ere ka re itse gore kgalalelo e ncha e, ga e kitla e nyelela, re ka ruta ka bopelokgale jo bogolo, 13 mme e seng jaaka Moshe a ne a dira, yo o neng a baya letsela mo sefathogong sa gagwe gore Baiseraele ba se ka ba bona kgalalelo e tloga. 14 Ga se sefathogo sa ga Moshe fela se se neng sa bipiwa, mme megopolo ya batho ba gagwe le diithaloganyo tsa bone le tsone di ne tsa bipiwa tsa ba tsa fifadiwa. Le jaanong fa lokwalo lo balwa go lebeba e ka re dipelo tsa Bajuta le megopolo ya bone di bipiwe ka sesiro se se bokete, gonne ga ba kgone go bona ba bo ba thaloganya tlhaloso tota ya Dikwalo. Gonne sesiro se sa go tlhoka go thaloganya se ka tloswa fela ke go dumela mo go Keresete. 15 Ee, le gompiono fa ba bala mekwalo ya ga Moshe dipelo tsa bone di fifetse ebile ba akanya gore go obamela Melao e e lesome ke yone tsela ya poloko. 16 Mme le fa e le leng mongwe a sokologela mo Moreneng a tswa mo dibeng tsa gagwe, hong sesiro se a tloswa. 17 Morena ke Mowa o o ba nayang botshelo, mme fa ene a leng teng go na le kgololesego (mo go lekeng go bolokwa ka go tshegetsatsa melao ya Modimo.) 18 Mme rona Bakeresete ga re na sesiro mo difathogong tsa rona; re ka nna diipone tse di bonatsang kgalalelo ya Morena sentle. Mme e re ka Mowa wa Morena o dira mo go rona, re tswela thata re nna jaaka ene.

4 Ke Modimo ka bo one, mo kutlwelelong bothoko ya one, yo o re neileng tiro e e hakgamatsang e, (ya go bolelela ba bangwe Mafoko a one a a Molemo), mme jalo ga re kake ra lesa. 2 Ga re leke go gogela batho ka boferere mo go dumeleng, ga re na kgathego mo go tsietseng ope. Ga re ke re leka go gapa ope go dumela gore Baebele e ruta se e sa se ruteng. Ditsela tsothe tseo tsa matlhabisa diithong re di baketse. Re ema fa pele ga Modimo jaaka re bua mme jalo re bolele boammaaruri, jaaka botlhe ba re itseng ba tlaa dumela. 3 Fa Mafoko a a Molemo a re a rerang a siregetse bangwe, a siregetse yo o tsamayang mo tseleng e e isang losong lo lo sa khutleng. 4 Satane, yo o leng modimo wa lefatshe le le bosula le, o mo fofaditse, ga a kgone go bona kgalalelo ya lesedi la Efangele e e phatsimang mo go ene, kgotsa go thaloganya molaetsa o o hakgamatsang o re o rerang kaga kgalalelo ya ga Keresete, yo e leng Modimo. (aiōn g165) 5 Ga re tsamaye re rera kaga rona, mme fa e se ka ga Keresete Jesu jaaka Morena. Gotlhe mo re go buang ka ga rona ke gore re batlhanka ba lona ka ntsha ya se Keresete o se re diretseng. 6 Gonne Modimo, o o rileng, "A go nne lesedi mo leffing", o dirile gore re thaloganye gore ke phatshimo ya kgalalelo ya one e e bonalang mo sefathogong sa ga Jesu Keresete. 7 Mme khumo e ya bothokwa, lesedi le, le nonofo e jaanong e phatshimang mo go rona, e tshotswe ka setsholo se se nyelelang, se e leng mebele ya rona e e bokoa. Mongwe le mongwe o ka bona gore nonofo ya kgalalelo e e mo go rona e tshwanetse ya bo e tswa kwa Modimong mme ga se ya rona. 8 Re pitlagantswe mo ntheng tsothe ke matshwenyego, mme ga go re dire sepe. Re akabetse ka gore ga re itse gore ke eng fa dilo di direga jaana, mme ga re kgoebe marapo re tlogele. 9 Re a tsongwa, mme Modimo ga o re latlhe. Re digelwa fa fatshe, mme re tsoge re tswela pele. 10

Mebele e ya rona ka metlha yotlhe e lebaganye le loso fela jaaka wa ga Jesu Keresete o dirile; jalo go bonala sentle mo go bothe gore ke Keresete yo o tshelang mo go rona (yo o re babalelang). **11** Ee, re tshelela mo kotsing ka metlha yotlhe mo matsheleng a rona ka ntsha ya go direla Morena, mme se se re naya nako ka metlha go supela pele nonofo ya ga Jesu Keresete mo mebeleng ya rona e e swang. **12** Ka ntsha ya go rera ga rona, re lebagane le loso, mme go feletse ele botshelo jwa lona jo bosakhutleng. **13** Re bua ka bopelokgale ka se re se dumelang (re tshema Modimo go re tlhokomela), fela jaaka mokwadi wa Pesalema a ne a bua a re, "Ke a dumela ebile jalo ke a bua." **14** Re a itse gore Modimo o o tsotsiseng Morena Jesu mo losong, le rona o tlaa re busetsa gape mo botsheleng le Jesu, o bo o re baya fa pele ga one le lona. **15** Dipogiso tse tsa rona ke poelo mo go lona. Mme fa lo ntse lo ntsifala ka go gapelwa mo Moreneng, lo tlaa mo leboga ka bontsi ka ntsha ya kutlwelo bothoko ya gagwe e kgolo, le Morena o tlaa galalediwa thata. **16** Ke gone ka moo re sa kgobegeng marapo. Le fa mebele ya rona e e swa, go nonofo ga rona kafa teng mo Moreneng, go gola letsatsi le letsatsi. **17** Matshwenyego a le dipogiso tsa rona, a mannye ebile ga a tseye lobaka lo lo leele. Le fa go ntse jalo lobaka lo lo khutshwane lo lwa bohutsana lo tlaa felela mo tshogofatsong e kgolo ya Modimo mo go rona ka metlha le metlha! (**aiōnios g166**) **18** Jalo ga re lebe se re ka se bonang jaanong jaana, matshwenyego a re dikanyeditse, mme re lebeletse pele boitumelo mo legodimong jo re iseng re ke re bo bone. Matshwenyego a tloga a fela, mme boitumelo jo bo tlang bo tlaa nnela ruri. (**aiōnios g166**)

5 Gonne re itse gore fa motlaagana (mmele) o, o re nnang mo go one o rutlololwa, fa ree swa re tlogela mebele e, re tlaa nna le mebele e mesha e mentle kwa legodimong, magae a e tlaa nnang a rona ka bosakhutleng, a re a diretsweng ke Modimo, e seng ka diatla tsa batho. (**aiōnios g166**) **2** Re lapiswa ke mebele ya rona; ke gone ka moo re lebeletseng letsatsi thata le re tlaa nnang le mebele ya selegodimo e re tlaa e aparang jaaka diaparao tse dintsha. **3** Gonne re tlaa bo re se mewa fela e e senang mebele. **4** Mebele e ya selefatshe e re dira gore re fegelwe re bo re gogomoge, mme ga re nke re rata go akanya kaga loso le go tlhoka mebele gotlhelele. Re batla go nna mo mebeleng e mesha ya rona gore mebele e e swang, e, jaaka e ne e ntse, e tle e mediwe ke botshelo jo bosakhutleng. **5** Se ke se Modimo o re se baakanyeditse, mme go tlhomamisa se, wa re naya Mowa wa one O O Boitshepo. **6** Jaanong re lebeletse ka boikanyego mebele ya rona ya selegodimo, re lemoga gore nako nngwe le nngwe e re e senyang mo mebeleng e eya sefela-tshe ke nako e e senyegileng mo legang la rona la bosakhutleng kwa legodimong le Jesu. **7** Re itse gore dilo tse di boammaaruri ka go dumela, e seng ka go bona. **8** Le gone ga re boife, mme re itumelela go swa, gonne re tlaa bo re le kwa gae le Morena. **9** Jalo maikemisetso a rona ke go mo itumedisa ka metlha yotlhe mo go sengwe le sengwe se re se dirang, le fa re le fano mo mmeleng o, kgotsa re le kgakala le mmele o, mme re na le ene kwa legodimong. **10** Gonne re tshwanetse rotlhe go ema fa pele ga ga Keresete go atholwa le matshelo a

rona go bewa mo pepeneneng fa pele ga gagwe. Mongwe le mongwe wa rona o tlaa amogela sengwe le sengwe se se mo tshwanetseng sa dilo tse di molemo kgotsa tse di maswe tse o di dirileng mo mmeleng wa gagwe wa selefatshe. **11** Ke ka ntsha ya go boifa Morena ka tlhwaafalo, e e nnang ka metlha yotlhe mo megopolong ya rona, gore re dire thata go gapa ba bangwe. Mo-dimo o itse dipelo tsa rona, gore di itshekile mo selong se, ebile ke solofela gore, mo botennyeng jwa dipelo tsa lona, le lona lo a bo itse. **12** A re leka go ikopaopela mo mekwatleng gape? Nnyaa, ke lo naya diithabano tse di siameng! Lo ka di dirisa mo barering baa ba lona ba ba ikgantshang ka go bonala sentle le go rera ga bone, mme ba se na dipelo tsa boammaaruri tsa boikanyego. Lo ka ipelafatsa ka rona ka gore, re ikaeletse sentle ebile re a ikanyega. **13** A re a tsenwa (go bua dilo tse kaga rona)? Fa go ntse jalo, ke go tliša kgalalelo mo Modimong. Mme fa re le mo megopolong ya rona e e siameng, ke thusego mo go lona. Sengwe le sengwe se re se dirang, ga se poelo ya rona, mme ke ka ntsha ya lorato lwa ga Keresete lo lo re laolang jaanong. Ka re dumela gore Keresete o re swetse rotlhe, re tshwanetse go dumela gore le rona re sule mo botsheleng jo bogologolo jo re neng re bo tshela. **15** O swetse botlhe gore botlhe ba ba tshelang, ba amogele botshelo jo bosakhutleng mo go Ene, ba se ka ba tlhola ba itshelela, go iitumedisa, mme e le go dirisa matshelo a bone go itumedisa Keresete yo o ba swe-tseng a bo a ba tsogela. **16** Jalo lesang go sekaseka Bakeresete ka se lefatshe le se akanyang kaga bone kgotsa ka fa ba bonalang ba ntse ka teng ka fa ntle. Ke kile ka fosa ka go akanyetsa Keresete ka mokgwa oo, e le motho fela jaaka nna. Ke ikutlwa ke fetogile jang jaanong. **17** Fa mongwe a nna Mokeresete o nna motho yo mosha mo teng gotlhelele. Ga a tlhole a tshwana le jaaka pele. Botshelo jo boshaba bo simologile! **18** Dilo tse tsothle tse dintsha di tswa mo Modimong o o re buseditse mo go one ka se Keresete Jesu a se dirileng. Mme Modimo o re neile tshwanelo ya go tlhotlheletsa mongwe le mongwe go tla mo thatong ya one le go letlangwa nae. **19** Gonne Modimo o ne o le mo go Keresete, go busetsa lefatshe mo go one, o sa tlhole o bala dibe tsa batho fa e se go di phimola. O ke molaetsa o montle o o o re neetseng go o bolelela ba bangwe. **20** Re barongwa ba ga Keresete. Modimo o a re dirisa go bua le lona: re a lo Kopa, jaanong eketse Keresete ka bo ene o fano o a lo kopa, amogelang lorato lo o lo lo nayang, nnang le tetlano le Modimo. **21** Gonne Modimo o tshotse Keresete yo o senang bolelo mme a tshela mo go ene dibe tsa rona. Ke gone, mo kananyong, o tshetseng tshiamo ya one mo go rona.

6 Mme jaaka badiri le Modimo re lo kopa gore lo se phaile molaetsa o o hakgamatsang wa bopelonomi jo bogolo ja Modimo. **2** Gonne Modimo wa re, "Selelo sa lona se tsile mo go nna ka nako e e tshwanetseng, fa diikgoro tsa kamogelo di ne di athame. Ke lo thusitse ka letsatsi le poloko e neng e abiwa ka lone." Gone jaanong Modimo o ipaakanyeditse go lo amogela. Gompiono o ipaakanyeditse go lo boloka. **3** Re leka go tshela ka tsela e e siameng gore ope a se ka a dira molato kgotsa a boela kwa morago mo go batleng Morena ka tsela e re dirang ka yone, gore ope a se ka a re bona molato a ba a o baya mo Moreneng.

4 Mme tota, mo go sengwe le sengwe se re se dirang, re leka go supa gore re baruhi ba boamaaruri ba Modimo. Ka bobelotelele re itshokela pogiso le mathata matshwenyego a mefuta yotlhe. 5 Re iteilwe, ra tsengwa mo dikgolegolong, ra lebagana le bo nko-di-aboga, ra dira thata, ra nna re lebeletse mo masigong re sa robale, ra ba ra ikitsa dijo. 6 Re itshupile go nna se re se ipitsang ka matshelo othe a rona le ka go tshaloganya Efangele le ka bobelotelele jwa rona. Re ntse re le tshiamo le boamaaruri jwa lorato le go tladiwa ka Mowa O O Boitshepo. 7 Re ntse re le boamaaruri ka nonofo ya Modimo e re thusa mo go tsothle tse re di dirang. Dithabano tsothle tsa motho yo o boifang Modimo, dithabano tsa phemelo, le dithabano tsa go thasela, e ntse e le tsa rona. 8 Re emetse Morena ka boamaaruri le fa bangwe ba re tlotla kgotsa ba re nyatsa, le fa ba re tshwaya diphoso kgotsa ba re baka. Re a ikanyega, mme ba re bitsa baaki. 9 Lefatshe le a re tlhokomolosa, mme re itsiwe ke Modimo; re tshela gaufi le loso, mme ke rona ba, re santse re itekanetse. Re ne ra bolaesega mme ra bolokesega mo losong. 10 Dipelo tsa rona di bothoko, mme le fa gontse jalo re na le boitumelo jwa Morena. Re humanegile, mme re abela ba bangwe dimpho tse di kgolo tse di humileng tsa semowa. Ga re a itsholela sepe, mme le fa go ntse jalo re itumelela sengwe le sengwe. 11 Oo, ditsala tsa me tsa Korintha! "Ke lo boleletse maikutlo ame othe; ke lo rata ka pelo yame yotlhe". 12 Botsididi jo bo sa leng teng mo gare ga rona ga se ka nthla ya tlhalelo epe ya lorato ka fa ntheng ya me, mme ka gore lorato lwa lona lo lo nnye thata jalo ga lo nkame go ntsenya mo teng. 13 Ke bua le lona jaa-nong jaaka ekete lo bana ba e leng ba me. Re buleleng dipelo tsa lona! Re supegetseng lorato! 14 Lo se tlhakane le ba ba sa rateng Morena, gonne batho ba Modimo ba ka tlhakanela eng le baleofi? Lesedi le ka nna jang le lefifi? 15 Mme ke bokopano bofe jo bo ka nnang mo gare ga ga Keresete le Diabolo. Mokeresete o ka nna le botsalano jang le motho yo o sa dumeleng. 16 Mme go ka nna le bokopano bofe fa gare ga Tempele ya Modimo le medimo ya disetwa? Gonne lo Tempele ya Modimo, legae la Modimo o o tshelang, mme Modimo o buile kaga lona jaana wa re, "Ke tlaa nna mo go bone, ke bo ke tsamaya mo go bone, mme ba tlaa nna batho bame le nna ke tlaa nna Modimo wa bone." 17 Ke gone ka mo Morena o boileng a re, "Ba leseng; ikgaganyeng le bone; lo se ka lwa ama dilo tsa bone tse di maswe (makgapha), mme ke tlaa lo amogela, 18 Ke tlaa nna Rraalona, le lona lo tlaa nna bomorwaake le bo-morwadiake."

7 Ka re na le ditsholofetso tse di kgolo tse, ditsala tse di rategang, a re fulareng sengwe le sengwe se se ka re leswefatsang, a e ka bo e le mo mmeleng kgotsa mo moweng mme re iphepafatse gore re nne mo poifong-Modimo ka botlalo, re ineela one o le nosi. 2 Tswee-tswée re buleleng dipelo tsa lona gape, gonne ga go ope wa lona yo re kileng ra mmogisa. Ga go ope wa lona yo re mo timeditseng. Ga re a tsetsa ope le fa e le go tseela ope sepe. 3 Ga ke bue se go lo omanyana kgotsa go lo kgala, gonne jaaka ke setse ke buile, lo mo pelong ya me ka bosakhutleng, ebile ke tshela ke bo ke swa le lona. 4 Ke lo ikantse thata, le boikgantsho jwa me mo go lona bo bogolo.

Lo nkgothaditse thata; lo intumedisitse thata le mo dipogisong tsa me tsothle. 5 Erile re goroga mo Masedonia re ne re sena boitapoloso; ka kwa ntle, matshwenyego a ne a le gongwe le gongwe a re dikaganyeditse; mo teng ga rona, dipelo tsa rona di ne di tletse letshogo le poifo. 6 Mme Modimo o o nametsang ba ba dipelo di bothoko wa re nonotsha ka go goroga ga ga Tito. 7 E ne e se go bonala ga gagwe fela mo go neng ga re itumedisa, mme le mafoko a o neng a a tliša ka lobaka lo lo ntle lo a neng a na le lona ka lone. Fa a mpolelela ka fa lo neng lo ntebeletse ka teng, le ka fa lo neng lo hutsahetse ka teng ka ga se se neng se diragetse, le kaga boamaaruri jwa lona le lorato mo go nna, jalo, ka itumela thata! 8 Ga ke thole ke utlwa bothoko ka go bo ke lo romeletse lokwalo loo, ntswa ke ne ka utlwa bothoko ka lobakanyana ke lemoga ka fa go neng go tlaa lo utlwa bothoko ka teng. Mme go ne go lo tlhokofaditse ka lobakanyana fela. 9 Jaanong ke a itumela ka ke lo lo romeletse, e seng ka nthla ya gore e lo utlwisitse bothoko, mme e leng ka nthla ya gore le kutlo-bothoko e lo buseditse mo Modimong. E ne e le khutsafalo e e siameng e lo e utlwileng, khutsafalo e Modimo o batlang batho ba one ba nna nayo gore ke se ka ka tla mo go lona ka kgakalo. 10 Gonne ka dinako tse dingwe Modimo o dirisa bofutsana mo matshelong a rona go re thusa go ikwatthaela sebe le go batla botshelo jo bosakhutleng. Re se ka ra utlwa bothoko ka go bo romela ga one. Mme bohutsana jwa motho yo o seng Mokeresete ga se bohutsana jwa boikwatthao jwa boamaaruri ebile ga bo kake jwa kganela loso lo lo sa khutleng. 11 Bonang fela gore bo-molemo jwa khutsafalo e e tswang mo Modimong bo lo diretse go le kae! Ga lo thole lo kgotha magetla a lona mme lo ne lwa tlhwaafala lwa ba lwa ikanyega, lwa ba lwa tlhwaafalela thata go tiogela bolelo jo ke lo kwale-tseng kaga jone. 12 Lo ne lwa tshoga kaga se se neng sa diragala, lwa ba lwa tlhwaafalela go tla go thusa, lo ne lwa baakanya matshwenyego lwa ba lwa a fenywa lwa othaya monna jaaka ke ne ka dira gore Morena a tle a ntshupegetse selekanyo se lo re tlhokometseng ka sone. Seo e ne e le maikaelelo a me go thusa monna yo o leofileng, kgotsa rraagwe yo o mo diretseng phoso. 13 Mo kgothatsong e lo re e neileng ka lorato lwa lona, re ne ra itumedisiwa ke boitumelo jwa ga Tito ka fa lo neng lwa mo amogela sentle ka teng lwa ba lwa dira gore a ikutlwe a le mo gae. 14 Ke mmoleletse ka fa go tlaa nnang ka teng, ke mmoleletse pele ga a ntlogela ka boikgantsho jwa me ka lona, mme ga lo a ka lwa nthlhabisa dithlong, ke ne ke aga ke lo bolelela boamaaruri ka metha yotlhe, mme jaanong boikgantsho jwa me ka Tito le jone bo supile boamaaruri! 15 O lo rata thata bogolo go gaisa fa a gakologelwa ka fa lo neng lo mo reeditse ka teng ka lorato, ebile lo mo amogetse ka tlhwaafalo le ka lorato lo lo hakgamatsang. 16 Mo go intumedisa jang, ka nthla ya gore jaanong ke thomamisa gore rotlhe go siame mo go lona, gape ke ka nna le boikanyo mo go lona.

8 Mme jaanong ke batla go lo bolelela se Modimo mo tshogofatsong ya one o se diretseng diphuthego mo Masedonia. 2 Le fa ba ne ba feta mo matshwenyegong a magolo le dinako tse di thata, ba tlhakantse boitumelojwa bone jo bo hakgamatsang le lehuma la bone, mme ka nthla ya go

dira jalo ga penologa letlotlo la go aba ga bone. **3** Ba ne ba sa abe fela mo ba ka go kgonang mme ba ne ba aba mo go ntsi; ebile ke ka supa gore ba ne ba batla go dira jalo e seng ka nthla ya go ba tshwenya ga me. **4** Ba re kopile go tsaya madi gore ba tle ba a tlhokanele mo boitumelong jwa go thusa Bakeresete mo Jerusalem. **5** Mo go tsone tsothe, ba fetele mo re neng re go solofetse, gonne tiro ya bone ya nthla e ne e le go ikopanya le Morena le rona, mo ditaelong dingwe le dingwe tse Modimo o ka bong o di ba neile ka rona. **6** Ba ne ba na le kgathhego thata kaga gone gore re bo re kgothatitse Tito, yo o kgothatitseng go aba ga lona mo tshimologong, go lo etela le go lo kgothatisa go fetsa seabe sa lona mo tširelong e ya go aba. **7** Lona batho ba lo koo go na le baeteledipele ka ditsela tse dintsi, lona le tumelo e kgolo, bareri ba bantsi ba ba siameng, thuto e ntsi, tlhwaafalo e kgolo le lorato mo go rona. Jaanong ke batla lo nna baeteledipele mo neong ya go aba ka bopelonomi. **8** Ga ke lo neye taolo, ga ke re lo e dire, mme bangwe ba a e eletsa. Se ke tsela e le nngwe go supa gore lorato lwa lona ke lwa boammaaruri, gore lo feta mafoko fela. **9** Lo itse ka fa Morena wa rona Jesu Keresete o neng a le lorato le bonolo ka teng: Le fa a ne a humile thata, ka nthla ya go lo thusa o ne a humanega thata, gore ka go humanega ga gagwe a lo humise. **10** Ke batla go ntsha mogopolo wa gore lo fetse tse lo simolotseng go di dira mo ngwageng e e fetileng, gonne lo ne lo se ba nthla go bua mogopolo o, mme lo ba nthla go simolola go dira sengwe kaga one. **11** Ka lo simolotse ka tlhwaafalo e kgolo, lo tshwanetse go fetsa tiro e fela ka boitumelo, lo aba se lo ka se abang mo go se lo nang naso. A mogopolo wa lona o o simologileng ka tlhwaafalo o lekalekane le tiro ya lona ya boammaaruri jaanong. **12** Fa tota lo tlhwaafalese go aba, jalo ga go bothokwa gore lo aba go le kae. Modimo o batla lo aba se lo nang naso, e seng se lo senang naso. **13** Mme ga ke reye gore ba ba amogelang dimpho tsa lona ba thube kobo segole (iketlo) ka ditshenyegelo tsa lona, **14** mme lo tshwanetse lo abelane nabo. Gone jaanong lo na le mo go ntsi, lo ka ba thusa; ka nako e nngwe ba ka abelana le lona fa lo tlhoka. **15** Ka tsela e mongwe le mongwe o tlaa nna le sengwe le sengwe se a se tlhokang. **16** Ke leboga Modimo ka gore o neile Tito tlhwaafalo mo go lona e ke nang nayo. **17** O itumelela go latela mogopolo wa me gore a lo etele gape, mme ke solofela gore o ka ba a tsile, gonne o tlhwaafalese go lo bona! **18** Ke mo romela le mokaulengwe yo o itsegeng sentle, yo o bakwang thata e le Moreri wa Mafoko a a Molemo mo diphuthengong tsothe. **19** Mme tota, monna yo o tlhophiwe ke diphuthego go tsamaya le nna go isa mpho ya Jerusalem. Se se tlaa galaetsa Morena se bo se supa tlhwaafalo ya rona go thusa ba bangwe. **20** Ka go tsamaya mmogo re tlaa bo re itshireletsa mo dipelaelong dingwe le dingwe, gonne re eletsa gore ope a se ka a re bona molato ka mokgwa o re tshotseng mpho e kgolo e ka one. **21** Modimo o a itse gore re a ikanyega, mme ke batla gore mongwe le mongwe le ene a itse. Ke gone ka moo re dirileng thulaganyo e. **22** Mme ke santse ke lo romelela mokaulengwe yo mongwe, yo re mo itseng go tswa mo maitemogelong gore ke Mokeresete yo o tsepameng. O na le kgathhego, fa a lebelela loeto lo, ka gore ke mmoleletse gothe kaga tlhwaafalo ya lona ya go thusa.

23 Fa mongwe a botsa gore Tito ke mang, lo re ke modiri ka nna, mothusi wa me mo go lo thuseng, mme lo ka nna lwa re bakaulengwe ba bangwe ba babedi ba emetse diphuthego fano, ke dikai tse di galalelang tsa ba e leng ba Morena. **24** Tsweetswee supang lorato lwa lona mo go nna mo banneng ba, mme lo ba direle gothe mo ke ikgantshiseng ka gone gore lo tlaa go dira.

9 Ke lemoga gore ga go thokege go lo lotlegela se, go thusa batho ba Modimo. **2** Gonne ke itse ka fa lo tlhwaafaletseng go go dira ka teng, ebile ke ikgantsheditse ditsala mo Masedonia gore lo sale lo ipaakanyeditse go romela kabelo ngogola. Mme tota, ke ka thoafoalo e ya lona e e thothleleditseng ba le bantsi go simolola go thusa. **3** Mme ke romela banna ba fela go tlhomamisana gore tota lo ipaakantse, jaaka ke ba boleletse gore lo tlaa bo lo ipaakantse, le madi a lona othe a phuthiwe; ga ke batle gore mo nakong e go ikgantsha ga me kaga lona e bo e le lefela. **4** Ke ka tlhajwa ke ditlhong thata, mmogo le lona fa bangwe ba Masedonia ba tla le nna, mme ba fitlhela gore ga lo ise lo bo lo ipaakanye ke sena go lo bolelela! **5** Jalo ke kopile bakaulengwe ba bangwe go goroga pele ga me go bona gore mpho e lo e solofeditse e siame. Ke batla gore e bo e le mpho tota e sa lebege jaaka ekete e ntshitswe ka patiko. **6** Mme gakologelwang, fa o o fa go le go botlana, o tlaa amogela mo go botlana, molemi yo o lemanng peo e se kae fela, o bona thobo e potlana, mme fa a lema thata, o tlaa roba mo go ntsi. **7** Mongwe le mongwe o tshwanetse go akanya ka fa o tshwanetseng go aba ka teng. Lo se pateletse ope go ntsha mo go ntsi go feta mo tota ene a batlang go go ntsha, gonne batho ba ba abang ka bopelontle ke bone ba Modimo o ba nayang dikgele, **8** Modimo o nonofile go lo direla ka go lo naya sengwe le sengwe se lo se tlhokang le go feta moo, gore go se ka ga lekana le tse lo di tlhokang fela, gore go tle go sale go le gontsi mo go tlaa abelwang ba bangwe ka boitumelo. **9** Go ntse jaaka dikwalo di bolela di re: "Motho wa Modimo o abela bahumanegi ka pelo e tshweu. Ditiro tsa gagwe tse di molemo di tlaa nna tlotlo mo go ene ka bosakhutleng." (*aiōn g165*) **10** Gonne Modimo, o o nayang molemi peo go lema, mme morago, o mo neye thobo e e siameng go ja, o tlaa nna o lo naya peo gore lo leme, ebile o tlaa e godisa gore lo tle lo abele ba bangwe mo thobong ya lona. **11** Ee, Modimo o tlaa lo naya go le gontsi gore le lona lo tle lo abele ba bangwe mo thobong ya lona, mme fa re isa dimpho tsa lona kwa go ba ba di tsholang ba tlaa thubega ka tebogo le pako mo Modimong ka nthla ya thuso ya lona. **12** Jalo dilo tse pedi tse di molemo di diragala ka nthla ya dimpho tsa lona, ba ba tlhokang ba a thusiwa, mme ba leboga Modimo mo go golo. **13** Ba lo ba thusang ba tlaa itumela e seng fela ka nthla ya dimpho tsa bopelo-ntle jwa lona mo go bone le ba bangwe, mme ba tlaa baka Modimo ka tshupo e gore ditiro tsa lona di molemo fela jaaka thuto ya lona. **14** Mme ba tlaa lo rapelela ka tlhwaafalo e kgolo le maikutlo ka nthla ya tshagofatso e e hakgamatsang ya Modimo e e supilweng ka lona. **15** Lebogang Modimo ka Morwaa-one, ebong neo e e hakgamatsang e go leng thata go ka e thalosa ka molomo.

10 Ke a lo kopa Ee, Nna Paulo, ke kopa ka boikokobetso, fela jaaka Keresete a ne a tlaa dira. Le fa bangwe ba lona ba re, "Dikwalo tsa ga Paulo di supa bopelokgale thata fa a le kgakala, mme fa a tsena fano o boifa go tsholetsa lentswe la gagwe!" **2** Ke solofela gore ga nke go tlhokega gore ke lo supegetse fa ke tla gore ke ka nna bogale go le kae. Ga ke batle go diragatsa leano la me le ke nang nalo kgathanong le bangwe ba lona ba go bonalang ba akanya gore ditiro le mafoko a me ke tsa motho fela. **3** Ke boammaaruri gore ke motho fela yo o bokoa, mme ga ke dirise maano a setho le mekgwa ya sone go fenyha dintwa. **4** Ke dirisa dithabano tsa Modimo tse dikgolo, e seng tse di dirilweng ke batho, go fenyha dithata tsa ga Diabolo. **5** Dithabano tse di ka fenyha dikganetsanyo tse di tletseng boikgodiso tse di kgathanong le Modimo le dipotana dingwe le dingwe tse di ka agiwang go kgoreletsa batho go mmona. Ka dithabano tse, ke ka gapa dirukhuthli, ka bo ka di busetsa mo Modimong, ka bo ka di fetola go nna batho ba dikeletso tsa dipelo tsa bone di obamelang Keresete. **6** Ke tlaa dirisa dithabano tse mo serukhuthing sengwe le sengwe se se setseng ke sena go dirisa dithabano mo go lona, lo bo lo inelwa mo go Keresete. **7** Molato mo go lona ke gore ke lebeqa ke le bokoa ebile ke sena nonofo, gonne ga lo lebe kwa botebong; le fa go ntse jalo fa mongwe a ka re o na le nonofo, le taolo ya ga Keresete ke nna ke ka buang jalo. **8** Ke ka lebeqa ke ikgantsha thata go feta jaaka ke tshwanetse go ikgantsha kaga taolo ya me mo go lona, taolo ya go lo thusa, e seng go lo utlwiswa bothoko, mme ke tlaa diragatsa sengwe le sengwe se ke se buileng. **9** Ke bua jaana gore lo se ka lwa akanya gore ke tsosa modumo fela fa ke lo omanya mo dikwalong tsa me. **10** Bangwe ba re, "Se tshwenyegeng ka dikwalo tsa gagwe. O utlwala a le selo sengwe, mme gotlhe ke modumo fela. Fa a tsena fa lo tlaa bona gore ga go na sepe se segolo ka ga gagwe, ebile ga lo ise lo ke lo utlwe moreri yo o bokoa jaaka ene". **11** Ka nako e, go tla ga me mo go lona go tlaa nna bogale fela jaaka dikwalo tsa me di ntse mo go lona! **12** Oo, se tshwenyegeng, ga ke ka ke ka re ke siame jaaka banna ba, ba ba lo bolelelang gore ba siame go le kae! Molato wa bone ke gore ba itshwantsha fela le ba bangwe, ebile ba lepalepane le megopolonyana ya bone. A boeleele! **13** Mme ga re kitla re ipelafatsa ka nonofo e re senang nayo. Maikemisetso a rona ke go gatela kwa leanong le Modimo o re le beetseng, mme leano le balela le go dira ga rona le lona le koo. **14** Ga reye kgakala thata fa re re na le taolo mo go lona, gonne ke rona ba nthla go tla go lo bolelela Mafoko a a Molemo kaga Keresete. **15** Ga se jaaka e ka re ne re leka go batla go lebogelwa tiro e mongwe o sele o e dirileng mo go lona. Mme re solofela gore tumelo ya lona e tlaa gola, e ntse e le mo selekanyong se re se beetsweng, tiro ya rona mo go lona e tlaa okediwa thata. **16** Mme morago ga moo, re tlaa kgona go rera Mafoko a a Molemo mo metseng e mengwe e e kgakala le lona, kwa go senang ope yo o dirang gone; ke gone ga go kitla go nna le kgogakogano kaga go nna mo tshimong ya yo mongwe. **17** Jaaka dikwalo di bua di re, "Fa mongwe a ipelafatsa, a a ipelafatse kaga se Morena o se dirileng e seng kaga bo ga gagwe." **18** Fa mongwe a ipelafatsa ka bo ga gagwe

le kaga bontle jwa se o se dirileng, ga go lebosege. Mme fa Morena a mmaka, moo go pharologanyo!

11 Ke solofela gore lo tlaa nna pelotelele le nna fa ke ntse ke bua jaaka seeleele jaana. Ntletang go bua se se mo pelong ya me. **2** Ke lo tlhwaafaleitse ka tlhwaafalo ya Modimo, ke tlhwaafaleitse gore lorato lwa lona e nne lwa ga Keresete a le nosi, fela jaaka kgarebane e e itshakileng e bolokela monna a le mongwe lorato lwa yone, yo e tlang nnang ene monna wa gagwe. **3** Mme ke a boifa, ke tshaba gore ka tsela nngwe lo tlaa timediswa mo boitshekong jwa lona mo Moreneng, fela jaaka Efa a ne a tsiediwa ke Satane mo tshimong ya Edene. **4** Lo lebeqa lo tsietsega ka bonako: lo dumela sengwe le sengwe se mongwe fela o se lo bolelelang le fa a rera kaga Jesu yo mongwe go na le yo re mo rerang, kgotsa mewa e e farologaneng go na le Mowa O O Boitshepo o lo o amogetseng, kgotsa a lo supegetsa tsela e sele ya go bolokwa. Lo dumela gotlhe. **5** Le fa go ntse jalo, ga ke bone gore "Barongwa ba ba hakgamatsang" ba ba ipitsang gore ba tswa kwa Modimong, ga ba nkgaise ka gope. **6** Fa ke le sebui se se bokoa, mme ke itse se ke buang kaga sone, jaaka ke akanya gore lo gopola jalo jaanong, gonne re go thomamisitse gangwe le gape. **7** A ke kile ka dira phoso ka ingotla go dira gore lo ntebele kwa tlase ka nthla ya gore ke lo reretse Mafoko a Modimo a a Molemo kwa ntle ga go lo kopa sepe. **8** Mo boemong jwa moo ke "thophile" diputhetso tse dingwe ka go tsaya se ba neng ba se nthomeletse mme ka se dirisa fa ke santse ke na le lona, gore ke tle ke lo direle kwa ntle ga tuelo epe. Mme fa moo go setse go fetile mme ke tshwerwe ke tlaa, ke ne ke ntse ke sa lo kope sepe, gonne Bakeresete ba ba neng ba tswa kwa Masedonia ba nitsetse mpho e nngwe. Ga ke ise nke ke lo kope le fa e le ledi ebile ga ke kitla ke dira jalo. **10** Ke solofetsa se ka selekanyo sengwe le sengwe sa boammaaruri jo ke nang najo, gore ke tlaa bolelela mongwe le mongwe mo Akaija ka gone! **11** Ka nthla ya eng? A ke ka nthla ya gore lwa re ga ke lo rate? Modimo o a itse gore ke a lo rata. **12** Mme ke tlaa go dira gore ke tlhokise ba ba ipelafatsang seipato sa gore ba dira tiro ya Modimo jaaka re e dira. **13** Modimo ga o a roma batho bao gothelele; ke "batsietsi" ba ba lo tsietsang gore lo gopole gore ke baaposetoloi ba ga Keresete. **14** Le fa go ntse jalo ga ke hakgamale! Satane o ka iphetola moengele wa lesedi, **15** jalo ga go hakgamatse gore bathanka ba gagwe ba ka dira jalo le bone, ba bonale jaaka baruti ba Modimo. Kwa bokhutlong ba tlaa amogela kotlhaoo nngwe le nngwe e e tshwanelang ditiro tsa bone tsa boikepo. **16** Gape ke a lo kopa, se gopoleng gore ke latlhile bothale jwa me go bua jaana; mme le fa lo gopola jalo, nthleetsang, nna seeleele, sematla, fa le nna ke ipelafatsa go se kae jaaka ba dira. **17** Go ikgantsha mo go ntse jalo ga se sengwe se Morena o se ntaoletseng go se dira, gonne ke dira jaaka seeleele se se senang tlhologanyo. **18** Le fa go ntse jalo batho bao ba tswelitse ka go lo bolelela gore ba ditswerere go le kae, le nna ke tlaa tswelela jalo. **19** (Lo gopola gore lo bothale thata, le fa go ntse jalo lo reetsa dieleele tseo; ka boitumelo; ga lo re sepe fa di lo dira makgoba a tsone di bo di tsaya sengwe le sengwe se lo nang naso, ba lo ja ntsoma, di lo faphamola sefathogo. **21**

Kethabiwa ke ditlhong gore ke re ga ke a nonofa mme ke le pelokgale jalo! Mme le fa e le eng se ba ka ipelafatsang ka sone, ke bua jaaka seelelele gape, ke ka ipelafatsa ka sone le nna). 22 Ba ikgantsha gore ke Bahebera, a ke bone? Ee, le nna ke Mohebera, ebile ba re ke Baiseraele, batho ba ba ithophetsweng ke Modimo? Le nna ke Moiseralele. Ebile ba re ke bo morwa Aberahame? Ee, le nna ke morwawe. 23 Ba re ba direla Keresete? Mme ke mo diretse go feta! (A ke kile ka ipelafatsa jaana?) Ke dirile thata, ke golegilwe gantsinyana, ke iteilwe mo go senang palo, mme ka lebagana le loso gantsinti. 24 Makgetho a matlhano a a farologanyeng, Bajuta ba niteile dithupa di le masome a mararo le boferabongwe. 25 Ke iteilwe ka dithobane gararo. Ka kgobotlediwa ka maje gangwe fela. Ka thubegelwa ke sekepe gararo, ka tlhola mo lewattleng bosigo joihe le letsatsi le le latelang. 26 Ke tsamale maeto a maleele a a lapisang ebile ke tsenye mo kotsing ya merwalela gantsi, mo bothukuthing, le mo go bagaetsho, Bajuta, le mo diatleng tsa Badichaba. Ke ne ka lebagana le dikotsi tse di diphatsa thata di tswa mo bathong ba bantsi ba metse le mo losong mo dikakeng le mo matsubutsubung a mawatle le mo bathong ba ba ipitsang bakaulengwe mo Moreneng mme e se bone. 27 Ke tshedile ka letsapa, le ditlhabi le masigo ke sa robale. Ke bolailwe ke tlala gantsi le lenyora ka bo ka felelwa ke dijo; ke roromisitswe ke serame gantsi, ke sena diaparo tse di lekanyeng go nthuthafatsa. 28 Jalo, mo godimo ga tse tsothe, ke na le tlhobaelo e e tswelatseng pele gore diphuthago di tsamaya jang: 29 Ke mang yo e a reng a dirile phoso ke se ke ke mo utlwele bothoko? Ke mang yo e a reng fa a wa ke se ke ke rate go thusa? Ke mang yo e a reng fa a utlwisitse bothoko mo moweng ke nne fela ke sa gakalele yo o mo utlwisitseng bothoko? 30 Mme fa e le gore ke tshwanetse go ikgantsha, ke ka mpa ka ikgantsha kaga dilo tse di mpontshang bokoa jwa me. 31 Modimo, Rraagwe Morena wa rona Jesu Keresete, yo o tshwanetseng go bakwa ka metlha le metlha, o a itse gore ke bolela boammaaruri. (aiōn 9165) 32 Jaaka erile kwa Damaseko molaodi wa kgosi Aretase a mpeela badisa mo dikgorong tsa motse go ntshwara; 33 mme ke ne ka falotshiwa ka thapo le seroto mo phatlheng ya lokotswana lo lo ageletseng motse mme jalo ka tswa! (A go itsege mo go golo!).

12 Go ipelafatsa mo gotlhe ke boelelele, mme mmang ke tswelale. Mmang ke lo bolelele diponatshego tse kileng ka di bona, le ditsheno tse di tswang mo Moreneng. 2 Mo dingwageng tse di lesome le bone tse di fetileng, ke ne ka isiwa kwa legodimong. Lo se ka lwa mpotsa gore a mmele wa me kgotsa mowa wa me o ne o le teng kwa legodimong, gonne ga ke itse, ke Modimo fela o ka arabang moo, mme le fa go ntse jalo, ke ne ke le mo felong fa go ntle (legodimong), 4 ke ne ka utlwa dilo tse di hakgamatsang tse di fetang nonofo ya motho go ka di bolela (mme le fa go ntse jalo ga ke letlelelwe go di bolelele batho). 5 Maitemogelo ao ke sengwe se ke ka ikgantshang ka sone, mme ga nkitla ke dira jalo. Ke tlaa ipelafatsa fela ka bokoa jwa me le ka fa Modimo o leng mogolo ka teng go dirisa bokoa jo bo ntseng jalo kgalaletsong ya one. 6 Ke na le go le gontsi mo ke ka ipelafatsang ka gone ebile ke tlaa bo ke

se seelelele go dira jalo, mme ga ke batle ope go ntseela kwa godimo go feta jaaka a tshwanetse mo go se a ka se bonang mo botshelong jwa me le mo mola-e-tseng wa me. 7 Ke tlaa bua se: ka nthla ya gore maitemogelo a ke nang nao a magolo thata, Modimo o ne o tshaba gore a ka nkgogomosa; jalo ke ne ka nna le bolwetse jo e neng e le mutlwa mo nameng ya me, morongwa wa ga Satane go nthokofatsa le go ntshwenya, a bo a tlhaba boikgantsho jwa me. 8 Mo makgethong a mararo ke ne ka rapela Modimo go mphodisa. 9 Nako le nako a re, “Nnyaa. Ke na nao, ke gone gotlhe mo o go tlhokang. Nonofo ya me e supiwa sentle mo bathong ba ba bokoa”. Jaanong ke itumelela go ipelafatsa ka bokoa jwa me; ke itumelela go nna sekao se se tshelang sa nonofo ya ga Keresete, mo boemong jwa go supa nonofo e e leng ya me, le tse ke ka di dirang. 10 E re ka ke itse gore gotlhe mo go kgatlha Keresete, ke itumela thata kaga “mutlwa” o o mo nameng ya me, le kaga dithapa le mathata, dipogiso le matshwenyego; gonne fa ke le bokoa, jalo ke nonofile, ka nonofo e potlana e ke nang nayo, ke nna ke mo ikanya thata. 11 Lo ntirole gore ke dire jaaka seelelele—ke ipelafatsa jaana, gonne batho ke lona lo tshwanetse lo ka bo lo kwala kaga me go na le gore lo ntirole gore ke kwale kaga me. Ga go na sepe se batho ba, ba nang naso, se ke se nang naso, le fa ke se sepe gothelele. 12 Erile fa ke le koo ke lo supegeditse sentle gore ke moaposetoloi wa boammaaruri, yo o romilweng mo go lona ke Modimo; gonne ke dirile dikgakgamatso di le dintsi thata ka bopelotelele le ditshupo le ditiro tse dikgolo mo go lona. 13 Mme selo sengwe fela se ke sa se lo direlang se ke se dirang gongwe le gongwe mo diphuthegong tse dingwe tsothe, go nna morwalo mo go lona, ga ke ise nke ke lo kope dijo kgotsa bonno. Tswetswee intshwareleng phoso e! 14 Jaanong ke tla mo go lona gape la boraro; mme ke tlaa nna ke sa batle tuelo epe mo go lona, gonne ga ke batle madi a lona. Ke batla lona! Le fa go ntse jalo, lo bana ba me, mme bananyana ga ba duele dijo tsa batsadi ba bone, ke ka mokgwa o mongwe; batsadi ba abela bana ba bone dijo. 15 Ke itumelela go lo inaya le gotlhe mo ke nang nago go nna dijo tsa semowa, le fa go lebege ekete fa ke lo rata thata lona lo nthata go le gonnye. 16 Bangwe ba lona ba re, “Ke boammaaruri gore go re etela ga gagwe go bonala go ne go sa re senyetsa sepe, mme Paulo yole ke motho yo o bokukuntshwane, mme o re tsieditse. Ka boammaaruri o tshwanetse a bo a dirile madi mo go rona ka tsela nngwe.” 17 Mme jang? A mongwe wa banna ba ke neng ka ba romela kwa go lona o lo jele ntsoma? 18 Erile fa ke kgothatsa Tito gore a lo etele, le mokaulengwe yo mongwe nae, a ba ne ba dira madi mangwe? Nnyaa, ga ba ise ba ke ba dire jalo. Gonne re na le Mowa O O Boitshupo o le mongwe fela, ebile re gata mo dikgating tsa ba bangwe, re dira dilo ka go tshwana. 19 Ke gopola gore lo akanya gore ke bua mo gotlhe go lo ipatlala. Ga go a nna jalo gothelele. Ke a lo bolelele, le Modimo o reeditse fa ke bua, gore ke buile se go lo thusa, ditsala tse di rategang, go lo aga mo meweng e seng go ithusa. 20 Gonne ke boifa gore fa ke lo etela ga nke ke rate se ke se fitlhelang, mme jalo ga lo kitla lo rata mokgwa o ke tlaa dirang ka one. Ke boifa gore ke tlaa fitlhela lo omana, lo fufegelelana, lo gakalelana, lo ikgogomosa lo buana leswe, lo

sebana lo tletse mabela le dikgaogano. 21 Ee, ke boifa gore fa ke tla Modimo o tlaa nkokobetsa fa pele ga lona mme ke tlaa utlwa bothhoko ke bo ke hutsafala ka gore ba le bantsi ba lona ba ba leofileng ke baleofi ebile ga ba na sepe le dilo tse di bosula tse di sa itshekeng tse lo di dirileng; dikeletso tsa lona tse di bosula, boaka, le go tseela ba bangwe basadi.

13 Lo ke lobaka lwa boraro ke ntse ke lo etela. Dikwalo di re bolelela gore fa ba le babedi kgotsa ba le bararo ba bone phoso, e tshwanetse go otlhaelwa. [(Se ke tlhagiso ya me ya boraro jaaka ke tlaa bo ke lo etela)]. 2 Ke setse ke tlhagisitse ba ba neng ba leofa fa ke ne ke le koo mo lobakeng lo lo fetileng; jaanong ke tlhagisa gape le botlhe ba bangwe fela jaaka ke dirile, gore ka nako e, ke tla ke ipaakanyeditse go otlhaya thata ebile ga nke ke ba rekegela. 3 Ke tlaa lo naya bosupi jothle jo lo bo batlang gore Keresete o bua ka nna. Keresete ga a boko a mo go dirisanyeng ga gagwe le lona, mme ke ene nonofo e kgolo mo go lona. 4 Mmele wa gagwe wa setho o o bokoa o sule mo mokgorong, mme jaanong o tshela ka nonofo e kgolo ya Modimo. Le rona, re bokoa mo mebeleng ya rona, fela jaaka a ne a ntse, mme jaanong re a tshela re bile re na le nonofo yothle ya Modimo go e dirisa mo go dirisanyeng le lona. 5 Itshekatshkekeng, a lo Bakeresete tota? A lo feny a tlathhobo? A lo ikutlwa bolengteng jwa ga Keresete le nonofo gantsi mo go lona, kgotsa lo ipaya fela jaaka ekete lo Bakeresete ntswa lo se bone gotlhelele? 6 Ke solofela gore lo ka dumela gore ke emelane le tlathhobo eo mme ka boammaaruri ke wa Morena. 7 Ke rapela gore lo tshela matshelo a a siameng e seng ka ntsha ya gore re tla bonala, re supa gore se re se rutang se siame; nnyaa, gonne re batla gore lo dire tshiamo ntswa rona re nyadiwa. 8 Maikaelelo a rona ke go kgothatsa ka nako tse tsothe, e seng go solofela bosula. 9 Re itumelela go nna bokoa le go nyadiwa fa tota lo nonofile. Keletso ya rona e kgolo le thapelo ke gore lo nne Bakeresete ba ba nonofileng. 10 Mme ke lo kwalela se jaanong ka tsholofelo ya gore ga nkitla ke omana kgotsa ke otlhaya fa ke tla, gonne ke batla go dirisa taolo ya Morena e o e nneileng, e seng go lo otlhaya mme e leng go lo nonotsha. 11 Ke fetsa lokwalo lwa me ka mafoko a a bofelo. Itumeleng. Golang mo Moreneng. Tlhokomelang se ke se buileng. Nnang ka kutlwano le kagiso. A Modimo o o lorato le kagiso o nne le lona. 12 Dumedisanyang mo Moreneng ka lorato. 13 Bakeresete botlhe fano ba a dumedisa thata. 14 A tshhegotatso ya Morena wa rona Jesu Keresete e nne le lona lotlhe. A lorato lwa Modimo le botsa-lano jwa Mowa O O Boitshupo e nne tsa lona.

Bagalatia

1 Lokwalo lo lo tswa kwa go nna Paulo morongwa le Bakeresete ba bangwe fano bothle. Ke kwalela: Diphuthego tsa Galatia. Ga ke a bilelwa go nna morongwa wa Modimo ke sethophapha sengwe kgotsa boemedi bongwe jwa lefatsho. Pitso ya me e tswa kwa go Jesu Keresete ka sebele, le kwa go Rara yo o mo tsoitseng mo baswing. **3** A kagiso le tshogafatso tse di tswang kwa go Modimo Rara le Morena Jesu Keresete di nne le lona. **4** O swetse dibe tsa rona fela jaaka Modimo Rara wa rona a rulagantse, a bo a re falotsha mo lefatsheng leno le le bosula le re nnang mo go lone. (aiōn g165) **5** A kgalalelo yotho e nne go Modimo ka metlha yotho ya bosakhutleng. Amen. (aiōn g165) **6** Ke a hakgamala fa lo akofa lo furalala Mo-dimo, o mo loratong le kutlwelo-bothoko ya one o lo laleditseng go nna le seabe mo botshelong jo bosakhutleng jo o bo abang ka Keresete; lo setse lo sala "tsela e sele morago go ya legodimong," e tota e sa yeng kwa legodimong gotlhelele. **7** Gonne ga gona tsela epe e sele kwa ntle ga e re e lo kaetseng; lo tsiediwa ke ba ba sokamisang ebile ba fetola boammaaruri kaga Keresete. **8** A diphutso tsa Modimo di wele le fa e le mang, le nna tota, yo o ka rerang ka tsela nngwe fela ya go bolokwa go na le e re lo boleletseng ka ga yone; ee, fa moengele a tswa legodimong a mo wele. **9** Ke ipoeletsa gape ke re: fa mongwe a rera Mafoko a a Molemo a sele kwa ntle ga a lo a amogetseng, a petso ya Modimo e mo wele. **10** Lo ka bona gore ga ke leke go lo itumedisa ka puo e e monate le e e gapang maikutlo fela; nnyaa, ke leka go itumedisa Modimo. Fa ke ne ke santse ke leka go itumedisa batho ke ne ke ka seka ka nna mothanka wa ga Keresete. **11** Ditsala tse di rategang, ke ikana ka tlhwaafalo ka re tsela e e yang legodimong e ke e rerang, ga e a thaega mo mogopolonyaneng kgotsa mo torong ya motho. **12** Gonne molaetsa wa me ga o tswa mo go ope fa e se Jesu Keresete a le esi, yo o mpoletseng gore ke bua eng. Ga go na motho ope yo o nthutleng. **13** Lo itse gore ke ne ke ntse jang fa ke santse ke setse tumelo ya Sejuta morago, le ka fa ke neng ke le pelompe ka teng mo Bakereseteng, ke ba tsoma ebile ke leka ka bojotho jwa me go ba bolaya bothle. **14** Ke ne ke le mongwe wa bagolwane ba tumelo ya Sejuta mo mophatong wa balekane ba me ba malatsi ao mo lefatsheng ka fa ke neng ke ka kgona ka teng go sala morago melao yotho e megologolo ya ngwao ya tumelo ya me. **15** Mme sengwe sa diragala! Gonne le pele ga ke tsalwa Modimo o ne o nthophetse, wa ba wa mpitsa: ana ke tshiamo le tshogafatso e ntle thatajang, **16** go senola Morwa one mo go nna gore ke tie ke ye kwa go Badichaba ke ba bontshe Mafoko a a Molemo kaga Jesu. Erile fa mo gotlhe go ntagalela ga ke ise ke re gone fela foo ke ye go go rerisanya le ope; **17** ga ke ise ke ko ke tlhatlogele kwa Jerusalema go rerisanya le ba e neng e le baaposetoloi pele ga me. Nnyaa, ke ne ka ya kwa dikang tsa Arabia, ka bo ka boela kwa motsing wa Damaseko. **18** Erile dingwaga di le tharo di sena go feta ka ya kwa Jerusalema ke le mo loetong ke etela Petoro, mme ka nna koo le ene malatsi a le lesome le bothlano. **19** Mme

moaposetoloi yo mongwe yo ke neng ka rakana nae ka lobaka loo e ne e le Jakobe monnawe Morena wa rona. **20** (Reetsang se ke se buang, gonne ke lo bolelela boammaaruri jo fa pele ga Modimo tota. Se ke se se neng sa diragala tota ga ke lo aketse). **21** Erile morago ga loeto lo ka ya kwa Siria le Kilikia. **22** Mme Bakeresete mo Judea ba ne ba santse ba sa itse sebopogo sa me. **23** Se ba neng ba se itse fela e ne e le puo ya batho e e reng, "Yo o neng a le mmaba wa rona, jaanong o rera tumelo e a neng a leka go e nyeletsa." **24** Mme ba galeletsa Modimo ka nthla ya me.

2 Mme erile morago ga dingwaga di le lesome le bone ka boela kwa Jerusalema gape, ka nako eo ke ne ke patilwe ke Barenabase; mme Tito le ene a tsamaya le rona. **2** Ke ne ka ya teng ke tshotse ditaelo tse di tlhomameng di tswa kwa Modimong gore ke ye go gakololana le bakaulengwe teng koo kaga molaetsa o ke neng ke o rerela Badichaba. Ke ne ka buisanya le baeteledipele ba phuthego kwa thoko gore bothle ba tlhologanyo se ke neng ke ntse ke se ruta, mme ke ne ka solofela gore ba tlaa dumela gore di siame. **3** Mme ba ne ba dumela; ga ba ise ba ke ba rate le gore Tito yo o neng a mpatile a rupisiwe, ntswa e ne e le Modichaba. **4** Le potso eo tota e ka bo e sa bodiwa fa e se ka nthla ya bangwe ba go kabong gotwe ke "Bakeresete" teng koo, mme e le Bakeresete ba e seng bone—ba ba neng ba tletse go re tsaya dinopolo le go bona gore kgololesego e re neng re e e ja monate mo go Keresete Jesu e ne e le efe, jaaka gore a re ne re obamela melao ya Sejuta kgotsa nnyaa. Ba ne ba leka go re golegelela rotlhe mo melaong ya bone ya Sejuta, makgoba mo dikeetaneng. **5** Mme ga re a ka ra reetsa le fa e le ka lobakanyana, gonne re ne re sa batle go lo tlhakanya dithogo ka go akanya gore poloko e ka bonwa ka go rupisiwa le ka go obamela melao ya Sejuta. **6** Mme baeteledipele ba bagolo ba phuthego ba ba neng ba le teng koo ba tlhoka se ba neng ba ka tlatsa ka sone se ke neng ke se rera. (Legale go nna baeteledipele ba bagolo ga bone go ne go sa reye sepe mo go nna, gonne rotlhe re tshwana fela mo Modimong). **7** Tota erile Petoro le Jakobe le Johane, ba ba neng ba itsege e le dipinagare tsa phuthego, ba bona ka fa Modimo o ntlisiseng ka teng thata mo go gapeng Badichaba, fela jaaka Petoro a ne a segofaditswe thata mo go rereleng Bajuta, gonne Modimo o ne o neela mongwe le mongwe wa rona dino tsa bothokwa, ba ne ba re neela diatla, Barenabase le nna ba bo ba re kgothatsa gore re tswela ka tlhamalalo mo go rereleng Badichaba fa bone ba tswela ka thero ya bone mo Bajuteng. **10** Kgakololo fela e ba neng ba e ntsha e ne e le ya gore re tshwanetse go gakologelwa go thusa bahumanegi ka malatsi otlhe, mme le nna ke ne ke tlhwaafaletse gone go dira jalo. **11** Mme erile fa Petoro a tla mo Antioka ka tshwanelwa ke go mo ganetsa mo pontsheng, ke gatelela thata kgathanong le se a neng a se dira gonne se ne se sa siama gotlhelele. **12** Gonne erile fela lwa nthla fa a goroga a bo a ja le Bakeresete ba Badichaba (ba ba neng ba sa tshwenyega ke go rupa le melao e mengwe e mensi ya Sejuta). Mme erile moraganyana ga ditsala dingwe tsa ga Jakobe tsa Sejuta di tla, a seka a tlhola a a ja le Badichaba

gonne o ne a tshaba se badira melao ba ba Sejuta ba tlaa se buang, gonne ba ne ba sa khutlise go bua ba re, thupiso e bothokwa mo polokong; **13** mme Bakeresete botlhe ba Bajuta le Barenabase tota ba fetoga baitimokanyi, ba etsa Petoro, le fa tota ba ne ba tlhloganya botoka. **14** Erile fa ke bona se se diragalang le gore ba ne ba sa ikanyege kaga se tota ba neng ba se dumela, le gore ba ne ba sa sala morago boammaaruri jwa Mafoko a a Molemo, ka raya Petoro fa pele ga ba bangwe botlhe ka re, "Le fa wena o le Mojuta ka go tsalwa, ga o bolo go latlha melao ya Sejuta; jalo he, ke eng fa ka tshoganetso o leka gore badichaba ba, ba e obamela? **15** Wena le nna re Bajuta ka go tsalwa, e seng Badichaba fela ba baleofi, **16** mme rona Bakeresete ba Bajuta re santse re itse sentle gore ga re kake ra nna tshiamo mo Modimong ka go tshegetsatsa melao ya rona ya Sejuta, fa e se ka tumelo mo go Jesu Keresete go tlosa maleo a rona. Mme jalo he le rona, re ikantse Jesu Keresete, gore re tle re amogelwe ke Modimo ka nthla ya tumelo, eseng ka nthla ya gore re obametsa melao ya Sejuta. Gonne ga go ope yo o tlaa bolokwang ka nthla ya go e obamela." **17** Mme re tlaa reng fa re ikanya Keresete go re boloka mme re bo re iphithela re le molato, le gore ga re kake ra bolokwa kwa ntle ga go rupisiwa le go obamela melao e mengwe yotlhe ya Sejuta? A ga re na go tlhoka gore re re tumelo mo go Keresete e re ntshitse mo boammaruring e re koafaditse? Nnyaa, ga go a nna jalo, gonne Modimo ga o letlelele ope go nna pelokgale ka go akanya megopolo e e ntseng jalo kaga Morena wa rona. **18** Ka megopolo e e ntseng jalo, re baleofi fa re simolola gape go aga diilo tse dikgologolo tse ke ntseng ke di senya, tsa go leka go bolokwa ka go tshegetsatsa melao ya Sejuta, **19** gonne ke ka nthla ya go bala Dikwalo mo ke ileng ka lemoga gore go amogelwa ke Modimo go tla ka go dumela mo go Keresete. **20** Ke bapotswe le Keresete: mme jaanong ga ke sa tlhole ke tshela, mme Keresete o tshela mo go nna. Mme botshelo tota jo jaanong ke nang najo mo mmeleng o, ke ka nthla ya go ikanya Morwa Modimo, yo o nthatleng a bo a iintshetsa sethabelo. **21** Ga ke mongwe wa ba ba tsayang loso lwa ga Keresete e le lefela. Gonne fa e le gore re ne re ka bolokwa ke go tshegetsatsa melao ya Sejuta, jalo go ne go sa tlhokafale gore Keresete a swe.

3 Ao Bagalatia ba ba dieleele! Lo tseantswe ke moloi yo o ntsengjang a bo a lo tsenya mowa wa bohema? Gonne lo kile lwa bo lo bona sentle se loso lwa ga Keresete lo se rayang jaaka o ka re ke ne ke kile ka baya fa pele ga lona lomati lo lo nang le setshwantsho sa ga Keresete a a swa mo mokgorong. **2** Mmang ke lo botse potso e: "A lo amogetsa Mowa O O Boitshepo ka go leka go boloka melao ya Sejuta?" Nnyaa, ga go a nna jalo, gonne Mowa O O Boitshepo o tsile mo go lona fela lo sena go utlwa kaga Keresete lo bo lo mo ikanya go lo boloka. **3** Jalo he, a lo tsenwe ke botsenwa gothlelele? Gonne fa go leka go obamela melao ya Sejuta go ise go ke go bo go lo neye botshelo jwa semowa lwa nthla, ke eng fa jaanong lo akanya gore go leka go e obamela go tlaa lo dira Bakeresete ba ba itekanetseng? **4** Lo bogetse Mafoko a a Molemo thata. A jaanong lo tsile go a latlhela gongwe le gongwe fela? Ga ke dumele tota! **5** Ke lo botsa gape ka re, a Modimo o lo naya

nonofo ya Mowa O O Boitshepo o bo o dira dikgakgamatso mo go lona e le ka nthla ya go leka ga lona ga go obamela melao ya Sejuta? Nnyaa, tota ga go a nna jalo. Ke fa lo dumela mo go Keresete lo bo lo mo ikanya ka botlalo. **6** Aberahame o ne a na le one maitemogelo a, Modimo wa mo supa fa a le moitekaneledi go tsena mo legodimong fela ka gore o ne a dumela ditsholofetso tsa Modimo. **7** Lo ka bona mo go one maitemogelo a gore bana ba ga Aberahame tota ke batho botlhe ba tumelo ba ba ikanyang Modimo ka boammaaruri. **8** Mo godimo ga moo, se sengwe gape ke eng, Dikwalo di ne di solofetse lobaka lo lwa gore Modimo o boloke le badichaba ka tumelo ya bone. Modimo go o bolo go bolelela Aberahame bogologolo kaga sone selo se fa o re, "Ke tlaa segofatsa mo chabeng nngwe le nngwe ba ba ikanyang jaaka wena." Mme go ntse fela jalo: botlhe ba ba ikanyang Keresete ba na le seabe mo go lone lesego le Aberahame o le amogetseng. **10** Ee, mme ba ba ikaegileng mo melaong ya Sejuta go ba boloka ba mo phutsong ya Modimo, gonne Dikwalo di supa sentle thata di re, "Go hutsegile mongwe le mongwe yo ka nako nngwe a robang mongwe wa melao, e e kwadiiweng mo Lokwalong lwa Modimo lwa Molao." **11** Ka go rialo, go bonala sentle gore ga go na le fa e le ope yo o ka bonang botsalano le Modimo ka go leka go tshegetsatsa melao ya Sejuta, gonne Mo-dimo o rile tsela fela e ka yone re ka siamang mo ponong ya one ke ka tumelo. Jaaka moporofiti Habakuke a ne a bua a re, "Motho yo o bonang botshelo o tlaa bo bona fela ka go ikanya Modimo." **12** A pharologanyo e tona fa gare ga tsela e ya tumelo le tsela ya molao o o reng motho o bolokwa ke go obamela molao mongwe le mongwe wa Modimo, a sa sute le fa e le gangwe fela. **13** Mme Keresete o rekile ka fa tlase ga phutso eo ya tsela e e sa kgonegeng ka go tsaya phutso ya rona ka nthla ya ditiro tse di bosula a e baya mo magetleng a gagwe. Gonne go kwadiiwe mo Lokwalong gatwe, "Le fa e le mang yo o pegilweng mo sethahareng o hutsegile," (jaaka Jesu a ne a lepelediwa mo mokgorong wa logong). **14** Jaanong Modimo o ka segofatsa Badichaba le bone, ka lone lesego le o le solofeditseng Aberahame; mme rotlhe re le Bakeresete re ka nna le Mowa O O Boitshepo o re o solofeditsweng ka yone tumelo e. **15** Bagaetshepo ba ba rategang, le mo botsheleng jwa malatsi otlhe fa motho a direla yo mongwe tsholofetso, fa e kwadiiwe ya ba ya saenwa (tlannngwa) ga e kake ya fetolwa. Ga e kake ya re morago ga moo a fetoga a dira se sele. **16** Jaanong, Modimo o neetse Aberahame le Ngwana wa one ditsholofetso dingwe. Mme lemogang gore ga gotwe ditsholofetso di ne di neetswe bana ba gagwe, jaaka go ne go katwe, di tshwanetse bomorwae botlhe, ebong Bajuta botlhe ba go neng go buiwa kaga bone, mme tota go ne go buiwa kaga Morwae ebong Keresete. **17** Se ke lekgang go se bua ke se: Tsholofetso ya Modimo yo go boloka ka tumelo, le gore Modimo o kwadiile tsholofetso e, wa ba wa e saena (tlanya), e ne e sa kake ya dirololwa kgotsa ya fetolwa morago ga dingwaga di le makgolo a le mane le masome a le mararo fa Modimo o ntsha Melao e e Some. **18** Fa go obamela melao eo go ne go ka re boloka, mme go bonala sentle gore mo e ne e tlaa bo e le tsela e sele ya go nna botsalano le Modimo go na le tsela ya ga Aberahame, gonne go ne ga nna motlhofo mo go ene

go amogela tsholofetso ya Modimo. **19** Jalo he, melao e ne e direlwang? E ne ya okediwa tsholofetso e sena go dirwa, go supegets batho gore ba molato go le kae ka go roba melao ya Modimo. Mme tsela e ya molao e ne e tshwanetse go nna teng fela go fithelela Keresete a tla, ngwana yo tsholofetso ya Modimo e neng ya diragadiwa ka ene. (Mme go santse go na le pharologanyo nngwe. Modimo o ne wa neela baengele melao ya one go e neela Moshe, yo ene a neng a e neela batho; **20** mme erile fa Modimo o neela Aberahame tsholofetso ya one, o ne wa dira ka boone o le nosi, kwa ntle ga go roma baengele kgotsa Moshe). **21** Jalo he, a melao ya Modimo le ditsholofetso tsa one di a ganetsanya? Ga go a nna jalo! Fa re ne re ka bolokwa ka melao ya one, jalo Modimo o ka bo o sa re naya tsela e sele go tswa mo botshwarong jwa sebe, gonne Dikwalo di gatelela gore re magolegwa a sebe. Tsela fela e re ka falolang ka yone ke ka tumelo mo go Jesu Keresete; tsela ya go falola e bulegetse botlhe ba ba dumelang mo go ene. **23** Go fithelela Keresete a tla re ne re disitswe ke molao, re beilwe mo tisonngwe e e babalesegileng, go bua jalo ke gore, go fithelela re dumela mo Mmoloking yo o tiang. **24** Mmang ke tshalose ka tsela e nngwe. Melao ya Sejuta e ne e le moruti wa rona le mokaedi go fithelela Keresete a tla go re neela seemo se se nitameng mo Modimong ka tumelo ya rona. **25** Mme jaanong ka gore Keresete o tsile, ga re sa tlhohle re tlhoka melao eo go re disa le go re etelela pele e re isa kwa go one. **26** Gonne jaanong rotlhe re bana ba Modimo ka tumelo mo go Jesu Keresete, **27** ebile rona ba re kolobeditsweng go nna selo se le sengwe le Keresete, re mo apere. **28** Ga re sa tlhohle re le Bajuta kgotsa Bagerika kgotsa makgoba kgotsa batho ba ba golotsweng, kgotsa banna fela kgotsa basadi, mme re tshwana fela rotlhe, re Bakeresete; re bangwe fela mo go Keresete Jesu. **29** Mme jaanong ka gore re ba ga Keresete, re losika lwa ga Aberahame tota, mme ditsholofetso tsothe tse Modimo o di mo solofeditse ke tsa rona.

4 Mme gakologelwang se, gore fa rrabana a a swa a bo a tlogelela morwawe yo mmotlana khumo e ntsi, ngwana yoo ga a botoka ka gope go na le motlhanka go fithelela a gola le fa tota sengwe le sengwe se rraagwe a neng a na naso e le sa gagwe. **2** O tshwanetse go dira se bathokomedi ba gagwe le batlamedi ba mmolelelang gore a se dire, go fithelela a nna dingwaga tse rraagwe a di beileng. **3** Mme le mo go rona go ne go ntse fela jalo pele ga Keresete a tla. Re ne re le bathanka ba melao ya Sejuta le mekgwa ya Sejuta gonne re ne re ithaya re re di ka re boloka. **4** Mme erile fa nako e e tshwanetseng e sena go tla, nako e Modimo o neng o e beile, wa roma Morwaone, a tsetswe ke mosadi, a tsetswe e le Mojuta, **5** go re rekela kgololesego, rona ba re neng re le bathanka ba molao gore a tle a re goditse re le bana ba gagwe tota. **6** Mme e re ka re le bana ba one, Modimo o rometse Mowa wa Morwa-one mo dipelong tsa rona, gore re nne le tshiamelo ya go bua ka Modimo re re ke Rraa rona yo o rategang. **7** Jaanong ga re sa tlhohle re le bathanka, re bana ba Modimo tota. Mme ere ka re le bana ba one, sengwe le sengwe se o nang naso ke sa rona, gonne ke ka fa go rulagantsweng ke Modimo ka teng. **8** Pele ga lona Badichaba lo itse Modimo lo ne lo le bathanka ba

medimo e le gone e iseng e ke e be e nne mo tlhologong. **9** Mme jaanong ka lo bonye Modimo (kgotsa a ke re, ka Modimo o lo setse) go diragala jang gore lo batle go boela kwa morago gape go nna bathanka mo tumelong nngwe ya lehuma, e e bokoa, e e senang molemo, ya go leka go ya legodimong ka go obamela melao ya Modimo? **10** Lo leka go nna botsalano le Modimo ka se lo se dirang kgotsa se lo sa se direng mo malatsing mangwe kgotsa mo dikgweding kgotsa mo dipa-keng tsa ngwaga kgotsa mo dingwageng. **11** Ke a tshoga ka lona. Ke tshaba gore tiro ya me ya bonatla e ke e lo diretsweng e ne e le lefela mo go lona. **12** Bakaulengwe ba ba rategang, ke a lo kopa gore lo nne fela jaaka nna kaga dilo tse, gonne ke gololesegile mo dikeetaneng tse jaaka lo kile lwa bo lo ntse. Ga lo a ka lwa nnyatsa ka lobaka loo fa ke lo rerela lwa nthla, **13** ntswa ke ne ke lwala fa ke simolola go lo rerela Mafoko a a Molemo a ga Keresete. **14** Mme le fa bolwetse jwa me bo ne bo lo tena, ga lo a ka lwa nkgana lwa nteleka. Nnyaa, lo ne lwa nkamogela lwa ba lwa nthokomela jaaka ekete ke moengele yo o tswang kwa Modimong, kgotsa Jesu Keresete ka sebele. **15** Mowa ole wa boitumelo o re neng re na nao o kae jaanong? Gonne mo malatsing ao ke itse gore lo ka bo lo ne lwa ikgonya matho ka boitumelo lwa a nnaya mo boemong jwa a me fa mo go ne go ka nthusa. **17** Baruti bao ba tsietso ba ba ratang thata go lo gapa maikutlo ga ba dire jalo gore go lo solegele molemo. Se ba lekang go se dira ke go lo kgaoganya le nna gore lo tle lo beye maikutlo thata mo go bone. **18** Ke selo se se molemo fa batho ba go siametse ka maikaelelo a a molemo le dipelo tse di ikanyegang, segolo bogolo fa ba sa dire fela jalo fa ke na le lona. **19** Ao, bana ba me, kana lo nkutlwa-botlhoko thata jang! Ke sa ntse ke lo bogela gape ke le mo ditlha-bing tse di tshwanang le tsa mmangwana a letile ngwana wa gagwe go tsholwa, ke tlhologeletswe lobaka lo mo go lone e tlaa reng lwa bofelo lo bo lo tladitswe ka Keresete. **20** Ke eletsa thata jang ekete ke ka bo ke na le lona koo gone gompiano, ke sa akantshanyeng le lona jaana, gonne ka nthla ya go katologana mo ga rona, ga ke itse gore ke ka reng. **21** Ntheetsang, lona ditsala tse di gopolang gore lo tshwanetse go obamela melao ya Sejuta gore lo bolokwe: ke eng fa lo sa ballisise tota se se rerwang ke melao eo? **22** Gonne go kwadilwe gore Aberahame o ne a na le bana ba basimane ba le babedi, yo mongwe o ne a tsetswe ke mosadi wa gagwe wa lelata mme yo mongwe o ne a tshotswe ke mosadi wa gagwe yo e leng ngwana wa motse. **23** Go ne go sena sepe se se sa tiwaelesegang kaga go tsholwa ga losea lwa mosadi wa lelata. Mme losea lwa mosadi yo e leng ngwana wa motse lo ne lwa tsholwa fela morago ga Modimo o solofetsa tota gore lo tlaa tsholwa. **24** Jaanong polelo e e boammaaruri e, ke setshwantsho kaga ditsela tse pedi tsa Modimo tsa go thusa batho. Tsela e nngwe e ne e le go ba neela melao ya one gore ba e obamele. O dirile jaana mo Thabeng ya Senai, fa o neela Moshe Melao e e Some. Thaba ya Senai, kana tota, e bidiwa "Thaba ya Hagare" ka Searabia, **25** mme mo setshwantshong se ke se ntshitseng mosadi wa ga Aberahame Hagare, wa lelata, e emetse Jerusalem, mma-motse wa Bajuta, modi wa tsela ele ya go leka go itumedisa Modimo ka go leka go obamela Melao; mme Bajuta, ba ba lekang go sala morago tsela eo, ke bana ba

one ba bathanka. **26** Mme mma-felwa wa rona ke Jerusalema wa selegodimo, ebile ga se motlhanka wa melao ya Sejuta. **27** Ke sone se Isaia a neng a se raya fa a porofesa a re, "Jaanong o ka itumela, wena mosadi yo o senang le fa e le ngwana; o ka goelets a ka boitumelo le fa o ise o ke o nne le ngwana pele. Gonne ke ya go go naya bana le ba bantsi, ba le bantsi go gaisa ba mosadi wa lelata." **28** Nna le lona, bakaulengwe ba ba rategang, re bana ba Modimo o ba solofeditseng, fela jaaka Isake a ne a solofeditswe. **29** Jalo he, rona ba re tsetsweng ke Mowa O O Boitshepo re a bogisiwa jaanong ke ba ba batlang re tshegets melao ya Sejuta, fela jaaka Isake ngwana wa tsholofetso a ne a bogisiwa ke Ishemaele ngwana wa mosadi wa lelata. **30** Mme Dikwalo tsa re Modimo o ne wa raya Aberahame wa re a leleke mosadi wa gagwe wa lelata le morwawe, gonne ngwana wa mosadi wa lelata o ne a ka seka a rua boswa jwa ga Aberahame ebong legae le masimo mmogo le ngwana wa mosadi wa motse. **31** Bakaulengwe ba ba rategang, ga re bana ba bathanka, ba ba golegeletsweng mo melaong ya Sejuta, re bana ba mosadi yo e leng ngwana wa motse, re amogese ga kwa Modimong ka nthla ya tumelo.

5 Jalo he, Keresete o re golotse. Jaanong thomamisang gore lo nne lo golotswe mme lo seka lwa golegelwa lothe gape mo dikeetaneng tsa bothanka tsa melao le mediro ya Sejuta. **2** Ntheetsang ka tlhawaafalo, gonne se ga se dinyana: fa e le gore lo ikaegile mo go rupisiweng ebile lo tshegets melao ya Sejuta go lo siamisa mo Modimong, jalo Keresete ga a kake a lo boloka. **3** Ke ipoelatsa gape ka re: le fa e le mang yo o lekang go nna botsalano le Modimo ka go rupisiwa o tshwanetse go obamela molao mongwe le mongwe wa Sejuta malatsi othe e seng jalo a nyelele. **4** Keresete ga a na thuso epe mo go lona fa lo ganelela mo go phimoleng molato wa lona kwa Modimong ka go tshegets melao eo: lo lathegile mo tshogofatsong ya Modimo. **5** Mme rona ka thuso ya Mowa O O Boitshepo re ikaegile mo losong lwa ga Keresete go phimola dibe tsa rona le go re siamisa mo Modimong. **6** Le gone rona ba Keresete a re neetseng botshelo jo bo sa khutleng ga go tlhokege gore re tshwenyege ka gore a re rupisitse kgotsa nnyaa; kgotsa gore a re obamela mediro ya Sejuta kgotsa nnyaa; gonne gothe mo re go tlhokang ke tumelo e e dirang ka lorato. **7** Lo ne lo direla Modimo sentle thata. Yo o lo kgoreditseng a lo busetsa kwa morago mo go saleng boammaaruri morago ke mang? **8** Tota ga se Modimo o o dirileng jalo, gonne ke one o o lo bileditseng mo kgololeseong mo go Keresete. **9** Mme motho a le mongwe fela yo o sa siamang mo gare ga lona o siamolola ba bangwe bothle. **10** Ke ikanya Morena go lo busetsa mo go dumeleng jaaka ke dumela kaga dilo tse. Modimo o tlaa athola mosiamolodi yoo, le fa e ka ne e le mang, yo o ntseng a lo tshwenya ebile a lo tlhakatlhakanya dithogo. **11** Batho bangwe ba re Nna tota ke rera gore thupiso le melao ya Sejuta di tlhokega mo leanong la poloko. Jalo he, fa e le gore ke rerile jalo, ke ka bo ke sa thole ke bogisiwa, gonne molaetsa oo ga o kgopise ope. Lebaka le ke santseng ke bogisiwa ka lone, le supa gore ke santse ke rera poloko ka tumelo mo mokgorong wa ga Keresete a le nosi. **12** Ke elets a fela gore baruti ba, ba ba batlang gore lo ikgaole

ka go rupisiwa ba ikgaole mo go lona ba lo tllogele! **13** Gonne bakaulengwe, lo neetswe kgololesego: e seng kgololesego ya go dira bosula, mme e leng kgololesego ya go ratana le go direlana. **14** Gonne Molao othe o ka khutshwafalediwa mo taolong e e reng: "Rata ba bangwe jaaka o ithata." **15** Mme fa mo boemong jwa gore lo supe kgolagano ya lorato mo go lona, malatsi othe lo buana bosula lo rumolana, ithokomeleng! Itiseng mo go koafatsaneng. **16** Ke lo gakolola gore lo obamele ditaolo tsa Mowa O O Boitshepo fela. O tlaa lo bolelela gore lo ye kae le gore lo dire eng; jalo ga lo na go dira dilo tse di sa siamang malatsi othe tse tlhogo ya lona e e bosula e batlang lo di dira. **17** Gonne ka tlhogo re rata go dira dilo tse di bosula tse e leng gore ke dilo di sele fela mo dilong tse Mowa O O Boitshepo o re bolelelang gore re di dire; mme dilo tse di molemo tse re batlang go di dira fa Mowa O O Boitshepo o re kaela tselo ke dilo di sele mo dithatong tsa rona tsa tlhogo. Dinonono tse pedi tse, tse di mo go rona, di tswelutse ka go lwela go re laola, mme dikeletso tsa rona ga di a gololesega mo dikgatelelong tsa tsone. **18** Mme fa lo gogwa ke Mowa O O Boitshepo ga go sa tlhoge go tlhokega gore lo ipateletse go obamela melao ya Sejuta. **19** Mme fa lo sala morago dithato tsa lona tse di bosula, matshelo a lona a tlaa unywa maungo a a bosula a: megopolo e e leswe le keletso ya dithato tsa senama, **20** go rapela medimo ya disetwa, mewa e e maswe (ke gore go kgothatsa tiriso ya badimo), kilo le go lwa, lefufa le kgakalo, go ikgagapela, dingongorego le go buana bosula, maikutlo a gore mongwe le mongwe o phoso fa e se ba ba mo sethopheng sa gago fela, gape go tlaa nna thuto e e seng ya boammaaruri, **21** bopelotshetha, go bolaya, botagwa, bothapelwa le gotlhe fela moo. Mmang ke lo bolelele gape jaaka pele, gore le fa e le mang yo o tshelang botshelo jo bo ntseng jalo ga a kitla a rua bogosi jwa Modimo. **22** Mme fa Mowa O O Boitshepo o laola matshelo a rona o tlaa unywa loungo lwa mofuta o mo go rona: lorato, boitumelo, kagiso, bopelotelele, bopelonomi, bomolemo, boikanyego, **23** tshiamo le boitswaro; mme fa ga gona kgogakogano le melao ya Sejuta. **24** Ba e leng ba ga Keresete ba kokotetse dithato tse di bosula tsa bone tsa tlhogo mo mokgorong wa gagwe ba di bapala gone foo. **25** Fa e le gore jaanong re tshela ka nonono ya Mowa O O Boitshepo, a re gogweng ke Mowa O O Boitshepo mo tokololong nngwe le nngwe ya matshelo a rona. **26** Mme ga re na go tlhokana le go ipatlela tloto le go itsege mo go gogelang kwa lefufeng le mo go tsholaneng ka dipelo.

6 Bakaulengwe ba ba rategang, fa Mokeresete a fentswe ke sebe sengwe, lona ba ba boifang Modimo lo mo thuso ka tshiamo le boikokobetso go mmusetsetsa mo tseleng e e siameng, lo gakologelwa gore nako nngwe e ka ne e le mongwe wa lona yo o mo molatong. **2** Rwadisanyang matshwenyego le mathata, jalo lo obamele taolo ya Morena. **3** Fa mongwe a ithaya a re o mogolo thata go ka ingotela mafoko a, o a itsietsa. Tota ga a sepe. **4** A mongwe le mongwe a thomamise gore o leka bojotlhe jwa gagwe, gonne ka go dira jalo o tlaa ipelafatsa ka tiro e a e dirileng sentle, le gone ga a na go tlhokana le go itshwantshanya le ope. **5** Mongwe le mongwe wa rona o

tshwanetse go itshwaya diphoso le go ithwalela merwalo. Gonne ga go ope wa rona yo o itekanetseng. **6** Ba ba ru-twang lefoko la Modimo ba tshwanetse go thusa barutintshi ba bone ka go ba duela. **7** Se tsietsegeng, gakologelwang gore ga lo kake lwa ithokomolosa Modimo mme lwa fenyā: motho o tlaa roba seo fela se a se jalang! **8** Fa a jalela go itumedisa dithato tsa gagwe tse di sa siamang, o tlaa bo a jala dipeo tsa bosula mme ka go dira jalo ammaaruri o tlaa roba thobo ya mowa o o bodileng le loso; mme fa a jala dilo tse di molemo tsa semowa o tlaa roba botshelo jo bo sa khutleng jo Mowa O O Boitshepo o bo mo nayang. (*aiōnios g166*) **9** Mme a re se lapeng go dira se se siameng, gonne morago ga lobakanyana re tlaa roba thobo ya lethogonolo fa re sa kgobega marapo re bo re ithoboga. **10** Ke sone se e leng gore fa go kgonega re tshwanetse go nna pelonomi mo go mongwe le mongwe malatsi otlhe, segolo jang bakaulengwe ba rona ba Bakeresete: **11** Ke tlaa feletsa ka go kwala mafoko a ka seatla se e leng sa me. Bonang ka fa ke tlamegang go kwala ditlhaka tse dikgolo ka teng. **12** Baruti bao ba lona ba ba le kang go lo fenyā gore lo rupisiwe, ba dira jalo ka ntlha ya lebaka le le lengwe fela: gore ba itsege ba bo ba kganele pogiso e ba neng ba tlaa wela mo go yone fa ba ne ba ka dumela gore mokgoro wa ga Keresete o le nosi fela o ka boloka. **13** Mme le bone baruti bao ba ba ineelang mo thupisong ga ba leke go tshegetsā melao e mengwe ya Sejuta; mme ba batla gore lo rupisiwe gore ba tle ba ipelafatse ka gore lo barutwa ba bone. **14** Mme fa e le ka ga me, Modimo ga o ntetlelele gore ke ipelafatse ka sepe fa e se mokgoro wa Morena wa rona Jesu Keresete. Ka ntlha ya mokgoro oo, kgatlhego ya me mo dilong tsotlhe tse di gapang maikutlo tsa lefatshe ga e bolo go bolawa, le kgatlhego ya lefatshe mo go nna ga e bolo go swa. **15** Jaanong ga go a tota re fetoletswe mo go nneng batho ba basha ba ba pharologanyo. **16** A kutlwelo botlhoko ya Modimo le kagiso e nne le lona lotlhe ba lo tshelang ka tsela e, le mo go botlhe ba e leng ba Modimo tota gongwe le gongwe. **17** Go simologa gompiano tswē-tswē se ngangisanyeng le nna kaga dilo tse, gonne mo mmeleng wa me go tletse mabadi a dithupa le dintho tse di dirilweng ke baba ba ga Jesu tse di ntshupang gore ke motlhanka wa gagwe. **18** Bakaulengwe ba ba rategang, a tshegofatso ya Morena wa rona Jesu Keresete e nne le lona lotlhe. Ke nna wa lona ruri, Paulo

Baefesia

1 Ditsala tsa me tsa Bakeresete mo Efeso tse di rategang, tse ka malatsi otlhe di ikanyegang mo Moreneng; ke nna Paulo yo ke lo kwalelang, yo ke tlhophilweng ke Modimo go nna morongwa wa ga Jesu Keresete. **2** A masego a gagwe le kagiso a nne le lona, a lo a romeletsweng ke Modimo Rraetsho le Jesu Keresete Morena wa rona. **3** Mme re galaletsa Modimo thata jang, Ra-Morena wa rona ebong Jesu Keresete, yo o re segofaditseng ka lesego lengwe le lengwe mo legodimong ka gobo re le ba ga Keresete. **4** Erile bogologolo, le pele ga o dira lefatshe, Modimo o ne wa re ithophela go nna baone tota, ka se Keresete o neng a tlaa se re direla; o ne wa ikaelela go re itshepisa mo matlhong a One, re sena molato ope rona ba re emeng fa pele ga one re apere lorato lwa one. **5** Leano la one le le sa fetogeng e ntse ka malatsi otlhe e le go re dira ba lelwapa la One ka go roma Jesu Keresete go tla go re swela. Mme o ne o dira jaana ka gore o ne o batla go dira jalo! **6** Jaanong a pako yotlhe e nne go Modimo ka nthla ya bopelonomi jwa one jo bo hakgamatsang mo go rona, le botsalano jo o re bo neileng ka nthla ya go bo re le ba Morwaa One yo o rategang thata. **7** Jalo he, bopelonomi jwa One bo a penologa mo go rona gonne o ne wa tlosa dibe tsothle tsa rona ka madi a Morwaa One, yo re bolokwang ka ene; **8** gape o re neseditse khumo ya tshagofatso ya One, gonne o re tlhaloganya sentle thata ebile o itse se se re siametseng ka dinako tsothle. **9** Modimo o re boleletse lebaka la sephiri sa One sa go romela Keresete, leano la kutlwelobothoko le o sa bolong go le akanya; **10** mme maikaelelo a One e ne e le a: gore e re fa lobaka lo setse lo siame o re phuthe rotlhe gongwe le gongwe kwa re leng teng, mo legodimong kgotsa mo lefatsheng, go nna le one mo go Keresete, ka bosakhutleng. **11** Segolo jang ka nthla ya se Keresete a se dirileng, re ntile dimpho tsa Modimo tse o di utulelang, mme ka ele bontlhabongwe jwa leano la bogosi re sale re tlhophiwa go nna ba One go tswa tshimologong, mme diilo tsothle di diragala fela jaaka o sale o ikaeletse bogologolo. **12** Maikaelelo a Modimo mo go lone leano le, e ne e le gore re galaletse Modimo re bo re o neye kgalalelo ka nthla ya go re direla dilo tse dikgolo tse, rona ba re neng ra nna ba nthla go re direla dilo tse di kgolo tse, rona ba re neng ra nna ba nthla go ikanya Keresete. **13** Mme ka nthla ya se Keresete o se dirileng, le lona lotlhe ba bangwe, ba lo utlwileng Mafoka a a Molemo a ka fa lo ka bolokwang ka teng, lwa ba lwa ikanya Keresete, lo ne lwa tshwaiwa ke Mowa O O Boitshapo gore lo ba ga Keresete, o e rileng bogologolo ra o solofediwa rotlhe rona Bakeresete. **14** Go nna teng ga gagwe mo go rona ke tlhomamiso ya Modimo gore tota o tlaa re neela gotlhe mo o go re solofeditseng; mme sekano sa mowa O O Boitshapo mo go rona se raya gore Modimo o setse o re rekile, le gore o tlhomamisa go re busetsa kwa go one. Ke lone fela lebaka le lengwe le re tshwanetseng go galaletsa Modimo wa rona wa kgalalelo ka lone. **15** Ke gone ka mo e leng gore, fa e sale fela e re ke sena go utlwalela kaga tumelo ya lona e e nonofileng mo go Morena Jesu le kaga lorato lo lo nang nalo mo Bakereseteng

gongwe le gongwe, **16** ga ke ise ke ko ke khutle go leboga Modimo kaga lona. Ke lo rapelela gangwe le gape, ke kopa Modimo, Rara yo o galalelang wa Morena wa rona Jesu Keresete, go lo naya bothhale go bona sentle le go tlhaloganya tota gore Jesu ke mang le gotlhe mo o go lo diretseng. **18** Ke rapelela gore dipelo tsa lona di tlae lesedi gore lo tle lo bone sengwe sa malatsi a a saleng kwa pele se a se lo bileditseng go nna le seabe mo go sone. Ke batla gore lo lemoge gore Modimo o humile gonne rona ba re leng ba ga Keresete re ba one. **19** Ke rapelela gore lo simolole go tlhaloganya ka fa nonofo ya One e leng kgolo ka teng go thusa ba da dumelang mo go One. Mme e ntse ke yone fela nonofo e kgolo eo, **20** e e tsoitseng Keresete mo baswing ya mmaya mo lefelong la tloto ka fa le bogong le legolo la Modimo mo legodimong, **21** kwa godimo-dimo thata go feta kgosi le fa e ka ne e le efe kgotsa mmusi kgotsa molaodi yo o sa fetolweng kgotsa moeteledipele. Ee, tloto ya gagwe e galalela thata go feta le fa e le ya ga mang mo lefatsheng leno kgotsa mo lefatsheng le le tlang. (aiōn g165) **22** Mme Modimo o beile dilo tsothle ka fa tlase ga dinao tsa gagwe wa bo wa mo dira Tlhogo kgolo ya phuthego, **23** e e leng mmele wa gagwe, e e tladitsweng ka ene, Mothodi le Moabi wa dilo tsothle gongwe le gongwe.

2 Lo kile lwa bo lo hutsitse ke Modimo, lo athloetswe loso lwa bosakhutleng ka nthla ya dibe tsa lona. **2** Lo ne lo tsamaya le bontsintsi jwa batho mme lo ne lo tshwana fela le ba bangwe bothle, lo tietse bolelo, lo ikobela Satane, kgosana e kgolo ya nonofo ya loapi, e e dirang mo dipelong tsa ba ba kgalthanong le Morena gone jaanong. (aiōn g165) **3** Rotlhe re kile ra bo re ntse fela jaaka ba ntse, matshelo a rona a supa bosula jo bo mo go rona, re dira sengwe le sengwe sa boikepo se dikeletso tsa rona kgotsa megopolo ya rona e e bosula e neng e re gogela mo go sone. Re ne ra simolola ka bomaswe, re tsetse ka diitholego tse di bosula, ra bo ra nna mo bogaleng jwa Modimo fela jaaka mongwe le mongwe. **4** Mme Modimo o humile kutlwelo bothhoko thata; o re ratile thata, **5** mo e leng gore le fa re ne re sule mo moweng ebile re athloetswe loso lwa bosakhutleng ka nthla ya dibe tsa rona, o ne wa re busetsa matshelo a rona fa o tsosa Keresete mo baswing fela ka nthla ya kutlwelo bothhoko ya One e e neng e sa re tshwanela, re ne ra bolokelwa ruri, **6** wa bo wa re ntsha mo lebitleng wa re tsenya mo kgalalelong mmogo le Keresete, kwa re nnang teng le ene mo mannong a segosi a selegodimo ka nthla ya se Keresete Jesu a se dirileng. **7** Mme jaanong Modimo ka malatsi otlhe o ka re supegetsa e le dikai tsa ka fa bopelonomi jwa one jo bontle bo ntseng ka teng; jaaka go supiwa mo go tsothle tse o re di diretseng ka Jesu Keresete. (aiōn g165) **8** Ka nthla ya bopelonomi jwa one lo bolokilwe ka go ikanya Keresete. Mme le e leng go ikanya ga se ga lona ka bo lona; le gone ke mpho e e tswang kwa Modimong. **9** Poloko ga se tuelo ya tshiamo e re e dirileng, jalo he, ga gona ope wa rona yo o ka ipelafatsang ka yone. **10** Ke Modimo ka bo one o o re dirileng se re leng sone wa bo wa re naya matshelo a masha a a tswang kwa go Keresete Jesu; mme mo dingwageng tse dintsi tse di fetileng o ne wa loga leano la gore re tshwanetse go dirisa matshelo

go thusa ba bangwe. **11** Se lebaleng gore lo kile lwa bo lo le baheitane, le gore Bajuta ba ne ba lo bitsa batho ba ba senang Modimo, ba ba "leswe". (Mme le bone dipelo tsa bone di ne di santse di le leswe, le fa ba ne ba tsena mo dingwaong le mo medirong ya basiami, gonne ba ne ba ithupisa e le sesupo sa bomodimo). **12** Gakologelwang gore malatsing ao lo ne lo tshela kwa ntle ga ga Keresete; lo ne lo le baba ba bana ba Modimo mme o ne o sa lo solofetsa thuso epe. Lo ne lo lathegile, lo sena Modimo, lo sena tsholofelo. **13** Mme jaanong lo ba ga Keresete, mme le fa lo kile lwa ne lo le kgakala le Modimo, jaanong lo tlisiswe gaufi le one ka nthla ya se Keresete o se lo diretseng ka madi a gagwe. **14** Gonne Keresete ka sebele ke tsela ya rona ya kagiso. O dirile kagiso fa gare ga rona Bajuta le lona Badichaba ka go re dira bana ba lolwapa lo le longwe, a diga lorako lwa kilano e e tletseng lonyatso e e neng e re kgaoganyana. **15** Ka loso lwa gagwe o khutlisitse tsogologano le pifelano fa gare ga rona, e e neng e dirwa ke melao ya Sejuta e e neng e sireleditse Bajuta fela e kgetholola Badichaba, gonne o swetse gore a phimole tsela eo yothle ya melao ya Sejuta. Mme a tsaya dithlopha tse pedi tse di neng di sa utlwane a di dira ditokololo tsa gagwe; ka go dira jalo a re bopaganya go nna motho a le mongwe yo mosha, mme lwa bofelo ga nna kagiso. **16** Ka re le ditokololo tsa mmele wa gagwe, dikilano tsa rona di nyeletse, gonne rotlhe re letlantswe mo Modimong. Jalo he, lwa bofelo kgotlhang ya felela kwa mokgorong. **17** Mme o rile Mafoko a a Molemo, a, kagiso kwa go lona Badichaba ba lo neng lo le kgakala thata nae, le kwa go rona Bajuta ba re neng re le gaufi. **18** Jaanong rotlhe fela, Bajuta kgotsa Badichaba, re ka tla kwa Modimong Rara ka thuso ya Mowa O O Boitshepo ka nthla ya se Keresete o se re diretseng. **19** Jaanong ga lo sa tlhole lo le baeng mo Modimong le bajaki mo legodimong, mme lo ba lolwapa lwa Modimo tota, ebile lo ba ntlo ya one mmogo le Bakeresete botlhe. **20** A motheo o montle o lo emeng mo go one jaanong jaana: ebong baaposetoloi le baporofiti: Jesu Keresete ka sebele e leng lentswe la kago la kgokgotshwana. **21** Rona ba re dumelang re lomagantswe sentle le Keresete jaaka ditokololo tsa tempele e ntle ya Modimo e e goelang pele. **22** Mme le lona lo lomagantswe nae le ba bangwe ke Mowa, jalo lo tokololo ya ntlo e ya Modimo.

3 Nna Paulo, mothanka wa ga Keresete, ke fano mo kgogeleng ka nthla ya lona, ka go rera gore le lona Badichaba lo bontlha bongwe jwa ntlo ya Modimo. **2** Ga go baleasego lo setse lo itse gore Modimo o nneetse tiro e e faphegileng e ya go supa kutlwelo bothoko mo go lona Badichaba, jaaka ke buile pele ka bokhutshwane mo lokwalong longwe lwa dikwalo tsa me. Modimo ka sebele o nkaetse leano le la one la bosaisiweng la gore Badichaba le bone ba balelwa mo bopelonoming jwa one. **4** Ke bua jaana go lo tlhalosetsa ka fa ke itseng dilo tse ka teng. **5** Mo metheng ya bogologolo Modimo ga o ise o ke o tlhakanele leano le, le batho ba one, mme jaanong o le senoletse baaposetoloi le baporofiti ba one ka Mowa O O Boitshepo. **6** Mme bosaisiweng ke jo: gore Badichaba ba tlaa nna le seabe se se lekanang le sa Bajuta mo dikhumong tsothe tse di ruilweng ke barwa-

Modimo; botlhe ba lalediwa go nna ba phuthego ya one, mme gotlhe ga ditsholofetso tsa Modimo tsa mathogonolo a magolo ka Keresete ke ga bone botlhe fa ba amogela Mafoko a a Molemo kaga Keresete le se a se ba diretseng. **7** Modimo o nneetse tshwanele e e hakgamatsang e ya go bolelela mongwe le mongwe leano le la one; gape o nneetse nonofo ya one le bothale jo bo faphegileng go le tlhalosa ka fa tshwanelong. **8** A lo ko lo akanyeng! Le fa ke sa dira sepe se se dirang gore ke le tshwanele, gape le fa nna ke le Mokeresete yo e seng wa sepe bogolo go botlhe, le fa go ntse jalo ke nna yo ke neng ka thophelwa tiro e, e e itumedisang, e e faphegileng ya go bolelela Badichaba Mafoko a Boitumelo a mahumo a a sa feleng a ba ka a bonang ka Keresete; **9** le go tlhalosetsa mongwe le mongwe gore Modimo ke Mmoloki le wa Badichaba, fela jaaka ene yo o dirileng dilo tsothe a ne a rulaganya mo sephiring go tswa tshimologong. (aiōn g165) **10** Mme tota maikaelelo a one e ne e le eng? E ne e le go supegetsatsa batshwara-marapo botlhe ba legodimo ka fa Modimo o leng bothale ka teng fa botlhe ba lolwapa lwa One, Bajuta le Badichaba, ka go tshwana, ba lomagantswe mmogo mo phuthegong ya one, **11** fela jaaka o ne o sa bolo go rulaganya go dira ka Jesu Keresete Morena wa rona. (aiōn g165) **12** Jaanong re ka tla mo Modinong kwa ntle ga poifo, re tlhomamisa kamogelo ya one e e tletseng boitumelo fa re tla ka Keresete ebile re mo ikanya. **13** Ke gone tswee-tswee se lapisiweng dipelo ke se ba se ntirang kwano. Ke bogela lona mme lo tshwa-netse go ikutlwa e le tlotlo mo go lona lwa ba lwa tsenya marapo dinameng. **14** Fa ke akanya kaga bothale le megopolo ya leano la one ke khubama ka mangole ke rapela Rara wa ba ntlo e kgolo yothle ya Modimo, bangwe ba bone ba setse ba le kwa legodimong mme ba bangwe ba fano mo lefatsheng, **16** gore mo dikhumong tsa one tse di galalelang tse di senang selekanyo, o tlaa lo naya nonofo e kgolo e e ka fa teng ka Mowa wa One O O Boitshepo. **17** Mme ke rapela gore Keresete a nne ka kgololesego mo dipelong tsa lona, a nna mo go lona jaaka lo mo ikanya. A medi ya lona e tsenelele kwa teng mo loratong lwa Modimo lo lo hakgamatsang; **18** gape lo bo lo kgone go ikutlwela le go tlhaloganya, bana ba Modimo botlhe ba tshwanetse, kana lorato lwa gagwe lo bolelele bo kae, lo bophara bo kae, lo boteng bo le kae, le gone lo kwa godimo jang; mme gore lo itemogele lorato lo ka bo lona, le fa lo le bogolo go le kalo mo lo ka sekeng lwa bona bofelelo ja lone kgotsa go tlhaloganya ka bottlalo. Mme kwa bokhutlong lo tlaa tladiwa ka Modimo ka sebele. **20** Jaanong a kgalalele e nne go Modimo o ka nonofo ya one e kgolo e e dirang mo go rona, o kgonang go dira go le gotona go na le jaaka re ne re ka kopa kgotsa le go akanya ka ga gone go feta dithapelo tsa rona tse dikgolo thata mo go senang selekanyo, dikeletso tse di molemo, dikakanyo, kgotsa ditsholofelo. **21** A o newe kgalalelo ka bosakhutleng mo dingwangeng tse di sa khutleng ka nthla ya leina la Morena la poloko ya phuthego ka Jesu Keresete. (aiōn g165)

4 Ke a lo kopa, nna yo ke leng legolegwa mo kgogeleng ka nthla ya go direla Morena, gore lo tshela lo bo lo sepele ka fa tseleng e e tshwanetseng ba ba thophetsweng masego a mantle jaaka one a. **2** Nnang boikokobetso le bonolo. Nnang pelotelele yo mongwe mo go yo mongwe, lo leke go iphapaanya

ka lorato le diphoso tse lo ka di diralanang. **3** Lekang ka malatsi otlhe go gogwa ke Mowa O O Boitshepo, gore lo tle lo nne ka kagiso yo mongwe mo go yo mongwe. **4** Rotlhe ditokololo tsa mmele o le mongwe fela, re na le Mowa o o tshwanang, bile rotlhe re bileditswe tsholofelo e e tshwanang e e galalelang. **5** Morena wa rona o mongwe fela, tumelo e nngwe fela, kolobetso e nngwe fela, **6** gape rotlhe re na le Modimo o le mongwe fela le Rara yo o re okameng rotlhe ebile a le mo go rona rotlhe, a bile a tshela mo tokolong nngwe le nngwe ya rona. **7** Le fa go ntse jalo, Keresete o neile mongwe le mongwe wa rona dinonofo tsa bothokwa, sengwe le sengwe se a batlang gore re nne naso se tswa mo polokelong ya gagwe e e tletseng dimpho. **8** Mopesalema o re bolelela kaga sone se, gonne a re erile fa Keresete a boela kwa legodimong a tletse boitumelo jwa phenyo morago ga tsogo ya gagwe mo baswing le go fenya Satane, o ne a naya batho dimpho tsa kutlwelo bothoko. **9** Lemogang gore gatwe o ne a boela kwa legodimong. Mo go raya gore o simologile a tswa kwa legodimong, a fologela mo mafelong a a kwa tlase-tlase a lefatshe. **10** Ene yo o fologileng e ntse ke ene yo o tlhatlogetseng gape kwa legodimong, gore sengwe le sengwe se tlale ene gongwe le gongwe, go tswa mo go se se kwa tlase go ya kwa go se se kwa godimo. **11** Bangwe ba rona ba neetswe neo ya bothokwa go nna baaposetoloi; ba bangwe o ba neile neo ya go rera sentle; ba bangwe ba na le neo ya bothokwa ya go gapela batho mo go Keresete, ba ba thusa gore ba mo ikanye e le Mmoloki wa bone; mme ba bangwe ba na le neo ya go tlhokomela batho ba Modimo jaaka modisa a tlhokomela dinku tsa gagwe, a ba goga a bile a ba ruta ka ditsela tsa Modimo. **12** Ke eng fa a re naya dineo tsa bothokwa go dira dilo dingwe botoka? Ke ka nthla ya gore batho ba Modimo ba tlaa nonotshiwa go mo direla tiro ka botswerere, ba aga phuthego, ebong mmele wa ga Keresete, go nna mo maemong a nonofo le tlhologanyo e e tletseng, **13** go fithelela lwa bofelo rotlhe re dumela ka go tshwana kaga poloko ya rona le kaga Mmoloki wa rona, Morwa Modimo, rotlhe re bo re gola ka bottalo mo Moreneng, ee, go fithelela re le mo selekanyong sa go tlaa Keresete mo go senang pelaelo. **14** Mme ga re kitla re tlhola re nna bana, re nna re fetola megopolo ya rona kaga se re se dumelang fela ka gore mongwe o re boletse sengwe se se pharologanyo, kgotsa a re akeditse ka bothale a dirile gore maaka a utlwale jaaka boammaaruri. **15** Mo boemong jwa go fetola megopolo ya rona mo go se re se dumelang, re tlaa sala morago boammaaruri ka lorato ka dinako tsothe, re bua boammaaruri, re dira ka boammaaruri, re tshela ka boammaaruri, mo tseleng nngwe le nngwe re nna jaaka Keresete yo o leng Tlhogo ya mmele wa gagwe, ebong phuthego. **16** Ka fa ketelellong ya pele ya gagwe mmele otlhe o kitlanye sentle, mme tokololo nngwe le nngwe mo tirong ya yone ya bothokwa e thusa ditokololo tse dingwe gore mmele otlhe o itekanele o gole o bo a tlale lorato. **17** Mmang ke bue jaana, ka go bua jalo ke buelela Morena: se tlhologang lo tshela jaaka ba ba sa bolokwang ba tshela, gonne ba fufaditswe ebile ga ba sa tlhole ba itse se e leng boammaaruri. Dipelo tsa bone tse di tswetsweng di tletse ka lefifi; ba kgakala thata le botshelo jwa Modimo gonne ba o tswaletse megopolo ya

bone, mme ga ba kake ba tlhologanya ditsela tsa one. **19** Ga ba sa tlhole ba kgathala kaga tshiamo le bosula ebile ba ineetse mo ditseleng tse di makgapha. Ga ba tlogele sepe, ba dirisiwa ke megopolo ya bone e e bosula le dikeletso tsa bosutha. **20** Mme ga se ka fa Keresete a lo rutileng ka teng! **21** Fa e le gore tota lo utlwile lentswe la gagwe ebile lo ithutile mo go ene boammaaruri kaga gagwe, **22** ke gone lathang tlhologo ya lona e kgologolo e e bosula, popego ya lona ya bogologolo e e neng e le mopati wa lona mo ditseleng tsa lona tse di bosula, e e bodileng go ya goileng, e tletse dikeletso le tsetso. **23** Jaanong mekgwa le megopolo ya lona e tshwanetse go bo e fetogile botoka gangwe le gape. **24** Ee, o tshwanetse go bo o le motho yo moshwa yo o pharologanyo, o itshephile ebile o le molemo. Ikapese ka tlhologo e ncha e. **25** Khutlisang go akelana; buang boammaaruri, gonne mongwe le mongwe wa rona ke tokololo ya yo mongwe mme fa re akelana re ikutlwiswa bothoko. **26** Fa o kgopisegile, se dire sebe ka go boloka kutlo bothoko ya gago mo pelong. Se letle gore letsatsi le phirime o santse o kgopisegile gore o lebele ka bonako; **27** gonne fa o tenegile o neela diabolo maitsetsepelo a magolo. **28** Fa mongwe a utswa a a go bakele, a simolele go dirisa mabogo ao a gagwe mo tirong ya boikanyego, gore a tle a abele ba bangwe ba ba tlhokang. **29** Se bue matlhapa. Bua fela se se molemo ebile se na le thuso mo go ba o buang nabo, le se se tlaa ba segofatsang. **30** Se futsafatseng Mowa O O Boitshepo ka tsela e lo tshelang ka yone. Gakologelwang, ke one o o supang kaga lona mo letsatsing leo fa poloko go tswa mo sebeng e tlaa bong e feletse. **31** Khutlisang go nna bohula, pelo e e maswe le go nna bogale. Go omana, mafoko a kgakalo le kilano di se ka tsa nna mo matshelong a lona. **32** Mo boemong jwa moo ratanang, nnang pelonomi, lo itshwarelane, fela jaaka Modimo o lo itshwaretse gonne lo ba ga Keresete.

5 Ke gone etsang Modimo mo go sengwe le sengwe se lo se dirang fela jaaka ngwana yo o ratwang thata a etsa rraagwe. **2** Ratanang thata, lo etse Keresete yo o lo ratileng a bo a ineela Modimo go nna sethabelo se se tlosang dibe tsa lona. Mme Modimo o ne wa itumela, gonne lorato lo Keresete o lo ratileng ka lone, lo ne lo tshwana le setlolo se se nkgang monate mo go one. **3** A go se nne sebe sa boaka, boitshekologo kgotsa bohula mo go lona. A go se nne le ope yo o umakang dilo tse mo go lona. **4** Dipolelo tse di maswe, dikgang tse di leswfatsang, le dinyao tse di sa siamang, tse ga se tsa lona. Mo boemong jwa tsone, gakologelwang kaga bomolemo jwa Modimo lo bo lo leboqe. **5** Lokatthomamisa selose: Bogosi jwa ga Keresete le Modimo ga bo kitla bo tshwana le fa e le mang yo o itshekologileng kgotsa yo o bohula gonne motho yo o bohula ke moobamedi wa me-dimoya disetwa, o rata dilo tse dintle tsa lefatshe leno ebile o a di obamela go na le Modimo. **6** Se tsiediweg ke ba ba lekang go ithokomolosa dibe tse, gonne bogale jwa Modimo jo bo tukang bo mo go botlhe ba ba di dirang. **7** Lo seka lwa ba lwa nna le bokopano le batho bao. **8** Gonne le fa dipelo tsa lona di kile tsa ne di tletse lefifi, jaanong di tletse lesedi le le tswang kwa Moreneng, mme maitseo a lona a tshwanetse go le supa. **9** Mme ka nthla ya lesedi le, le le mo go lona, lo tshwanetse go dira fela se se molemo, se siame

ebile gape se le boammaaruri. 10 Ithuteng se se itumedisang Morena fa lo ntse lo tswelsetse. 11 Lo seka lwa nna le seabe mo thhape-ding tsa boleo le tsa leffii tse di sa thuseng ka sepe, mme mo boemongjwa go dira jalo, di kgalemeleng lo bo lo di senole. 12 Go ka tlhabela ditlhong go umaka fano dilo tseo tsa leffii tse ba ba sa boifeng Modimo ba di dirang. 13 Mme fa lo ba senola, lesedi le tlaa bonesa dibe tsa bone le bo le di baya mo pontsheng, mme fa ba bona tota ka fa ba leng molato ka teng, bangwe ba bone ba ka nna bana ba lesedi! 14 Ke sone se Modimo mo Dikwalong o reng, "Kubuga, wena morobadi, mme o tsoge mo baswing; mme Keresete o tlaa go naya lesedi." 15 Jalo he, elang thoko ka fa lo itsayang ka teng; malatsi a, ke a a bosula. Se nngeng dielelele; nngang bothale: dirisang lobaka longwe le longwe lo lo nang nalo go dira tshiamo. 17 Se direng sepe lo sa akanya, mme lekang go tlhothlomisa pele ke gone lo itse go dira le fa e le eng se Morena o batlang lo se dira. 18 Se nwegeng mofine o le montsi, gonne maleo a le mantsi a mo go yone tsela eo; mo boemong jwa moo, tlang ka Mowa O O Boitshepo, lo bo lo laolwe ke one. 19 Itlwaetseng thata go buisanya ka Morena, lo buisanya ka dipesalema le difela lo bo lo opela dipina tsa semowa, lo opelela Morena mo dipeleng tsa lona. 20 Malatsi otlhe lebogang Modimo Rraa rona mo go sengwe le sengwe ka leina la Morena wa rona Jesu Keresete. 21 Tlotlang Keresete ka go ikobelana. 22 Lona basadi ba lo nyetsweng, lo tshwanetse go ikobela go gogwa ke banna ba lona fela jaaka lo ikobela Morena. 23 Gonne monna ke mothokomedi wa mosadi wa gagwe fela jaaka Keresete e le mothokomedi wa mmele wa gagwe ebong phuthogo. (O ntshitse botsheloiwa gagwe setlhabelo go e tlhokomela le go nna Mmoloki wa yone). 24 Jalo lona basadi ba lo nyetsweng, lo tshwanetse go ikobela banna ba lona ka lorato mo go sengwe le sengwe, fela jaaka phuthogo e ikobela Keresete. 25 Mme lona banna ba lo nyetseng, supang lone lorato lo mo basading ba lona jaaka Keresete a lo supile mo phuthogong fa a e swela, 26 go e dira boitshepo le bophepa, e tlhatswitswe ka kolobetso le Lefoko la Modimo; 27 gore a tle a ineyeng phuthogo ka sebele e le phuthogo e e galalelang e e senang selabe kgotsa go sosobagana kgotsa bogole, e le boitshepo ebile e sena le fa e le phoso epe. 28 Ke yone tsela e banna ba ba nyetseng ba tshwanetseng go tshola basadi ba bone ka yone, ba ba rata jaaka ditokololo tsa mebele ya bone. Gonne ka monna le mosadi wa gagwe jaanong ba le motho a le mongwe fela, monna o iirela tlotlo ebile o a ithata fa a rata mosadi wa gagwe. 29 Ga go ope yo o ilang mmele wa gagwe mme o o tlhokomela ka lorato, fela jaaka Keresete a tlhokomela mmele wa gagwe ebong phuthogo, e re leng ditokololo tsa yone. 31 Boammaaruri jwa gore monna yo o nyetseng le mosadi wa gagwe ba mmele o le mongwe fela bo supiwa ke Lokwalo lo lo reng, "Monna o tshwanetse go tlogela rraagwe le mmaagwe fa a nyala, gore a tle a lomaganeng sentle le mosadi wa gagwe, mme bobedi jo e tlaa nna bongwe fela." 32 Ke itse gore se se thata go tlhalogangwa, mme ke setshwantsho sa ka fa re leng ditokololo tsa mmele wa ga Keresete ka teng. 33 Jalo gape ka re, monna o tshwanetse go rata mosadi wa gagwe jaaka tokololo ya gagwe; mme mosadi

o tshwanetse go bona tota gore o tlotla monna wa gagwe ka pelo yotho, a mo ikobela, a mo galaletsa ebile a mo tlotla.

6 Bana, utwang batsadi ba lona; se ke selo se se siameng go dirwa gonne Modimo o ba neile taolo ya go lo laola. 2 Tlotla rrago le mmaago. O ke molao wa ntsha wa Modimo wa melao o o felelang ka tsholofetso. 3 Mme tsholofetso ke e: Gore fa o tlotla rrago le mmaago; o tlaa nna le botshelo jo bo leele, jo bo tletseng masego. 4 Mme jaanong ke raya batsadi ba bana ke re: Se ntse lo kgadiepetsa bana ba lona lo ba omanyetsa ruri, lo ba galefisa lo ba kgopisa. Go na le go dira jalo, ba godiseng ka go ba tshola ka lorato lo Morena a lo dumelang, lo ba gakolola ka poifo Modimo. 5 Bathanka, ikobeleng beng ba lona; tlhwaafalelang go ba direla ka bonatla jotlhe jwa lona. Ba direleng fela jaaka lo ne lo ka direla Keresete. 6 Se direng thata fela fa Mongwa lona a lo lebeletse mme lwa nnela go tshameka fa a sa lo lebelela; dirang thata ka boitumelo nako yotho, jaaka lo ka bo lo direla Keresete, lo dira go rata ga Modimo ka dipelo tsa lona tsotho. 8 Gakologelwang gore, Morena o tlaa lo duelela go dira sengwe le sengwe se se molemo, a lo ka bo lo le bathanka kgotsa lo se bone. 9 Mme le lona beng ba bathanka lo tshwanetse go tshwara bathanka ba lona sentle, fela jaaka ke ba reile ka re ba lo ikobele. Se ntse lo ba bopela; gakologelwang gore lona ka bo lona lo bathanka mo go Keresete; lo na le Morena yo ba nang nae, mme ga a rate bape go gaisa ba bangwe. 10 Lwa bofelo, ke batla go lo gakolola gore nonofo ya lona e tshwanetse go tswa mo nonofong e kgolo ya Morena e e mo go lona. 11 Aparang diaparo tsa phemelo tsotho tsa Modimo gore lo tle lo kgone go iphemela mo maanong otlhe le boferere fela ja ga Satane. 12 Gonne ga re lwe le batho ba ba dirilweng ka nama le madi, mme re lwa le batho ba ba senang mebele, babusi ba ba bosula ba lefatsho le le sa bonweng ka matlho, diibopiwa tse di nonofileng tsa bo-Satane le magosana a magolo a a bosula a leffii a a busang lefatsho leno, le mewa e mentsi e e bosula mo lefatsheng le le sa itsegeng. (aiōn 165) 13 Jalo dirisang sengwe le sengwe sa seaparo sa Modimo sa phemelo go tlhabantsha mmaba fa a tlhasela, mme fa ntwa e sena go fela, lo tlaa bo lo santse lo eme. 14 Mme go dira jaana, lo tlaa tlhoka moitlamo wa lotheka o o thata wa boammaaruri le thebe ya sehuba ya tumelo ya Modimo. 15 Rwalang ditlhako tse di tlaa dirang gore lo dire ka bofelo fa lo rera Mafoko a a Molemo a kagiso le Modimo. 16 Mo ntweng nngwe le nngwe lo tlaa tlhoka tumelo go nna thebe ya lona go kganale metswi e e bogale e lo e lebagantsweng ke Satane. 17 Gape lo tlaa thoka thoro ya phemelo ya poloko le chaka ya Mowa e e leng Lefoko la Modimo. 18 Rapelang ka metha yotho. Kopang Modimo sengwe fela ka fa dikeletsong tsa Mowa O O Boitshepo. O kopeng, lo o gakolola ka se lo se tlhokang, mme lo bo lo nne lo rapelele Bakeresete botlhe gongwe le gongwe ka tlhwaafalo. 19 Nthapelelang le nna, lo bo lo kope Modimo go nnaya mafoko a a ntshwanetseng fa ke bolelela ba bangwe ka bopelokgale kaga Morena, le fa ke ba tlhalosetsa, gore poloko ya gagwe ke ya rona le Madichaba. 20 Jaanong ke golegilwe ka ntsha ya go rera molaietsa o o tswang kwa Modimong. Mme rapelang gore ke tle ke nne ke tswelole go o bulelela ka bopelokgale le mo kgolegelong, jaaka

ke tshwanetse. **21** Tukiko, yo e leng mokaulengwe yo a rategang thata a bile a le mothusi yo o ikanyegang mo tirong ya Morena, o tlaa lo bolelela gothe mabapi le ka fa ke tswelelang ka teng. **22** Ke mo roma kwa go lona ka maikaelelo a, go lo itsise ka fa re tsogileng ka teng le gore lo bo lo kgothadiwe ke molaetsa o a o lo leretseng. **23** A Modimo o lo neye kagiso, bakaulengwe ba me mo go Keresete, le lorato ka tumelo e e tswang kwa go Modimo Rara le Morena Jesu Keresete. **24** A tshegofatso le masego a Modimo a nne le botlhe ba ba ratang Morena wa rona Jesu Keresete ka boammaaruri.

Bafilipi

1 Lokwalo lo lo tswang kwa go: Paulo le Timotheo bathanka ba ga Jesu Keresete. Ba kwalela: Badisa ba diputhego le batiakone le Bakeresete botlhe mo Filipi. **2** A Modimo o lo segofatse lotlhe. Ee, ke rapela gore Modimo Rraetsho le Morena Jesu Keresete a neye mongwe le mongwe wa lona masego a magolo a gagwe, le kagiso ya gagwe mo dipelong tsa lona le mo matshelong a lona. **3** Go lo rapelela ga me gotlhe go tletse go baka Modimo! **4** Fa ke lo rapelela, pelo ya me e tlaa boitumelo, **5** Ka ntlha ya thuso ya lona e ntle mo go itsiseng Mafoko a a Molemo kaga Keresete go tloga nako e lo neng lo a utlwa ka yone go fitlha gompiano. **6** Mme ke tlhomamisa gore Modimo o o simolotseng tiro e e molemo mo go lona o tlaa lo thusa go gola mo tshogofatsang ya one go fitlhelela tiro e kgolo mo go lona e fela ka letsatsi la fa Jesu Keresete a boa. **7** Go ntshiametse jang go ikutlwa jaaka ke ikutlwa kaga lona, gonne lo na le bonno jo bo faphegileng mo pelong ya me. Re abelanye masego a Modimo rotlhe, fa ke le mo kgolegelong le fa ke dule, ke femela boammaaruri ebile ke bolelela ba bangwe kaga Keresete. **8** Ke Modimo fela o o itseng boteng jwa lorato lwa me le go lo tlhwaafalela, ka lorato lwa ga Jesu Keresete. **9** Thapelo ya me ka lona ke gore lorato lwa lona lo oketsegele ba bangwe, lo bo lo gole mo kitsong ya semowa le mo temogong. **10** Gonne ke batla gore ka nako tsothe lo bone sentle pharologanyo fa gare ga molemo le bosula, le gore lo bo lo nne phepa ka fa teng, go se ope yo o ka lo nyatsang go tloga jaanong go fitlhelela Morena wa rona a tla. **11** Tswelatang ka go dira tshiamo ka nako tsothe, dilo tse di molemo tse di supang gore lo bana ba Modimo gonne se se tlaa tliša pako e kgolo le kgalalelo mo Moreneng. **12** Mme ke rata gore lo itse se, bakaulengwe ba ba rategang: sengwe le sengwe se se ntiragaletseng kwano e ne e le botswelole pele jo bogolo mo go boleleng Mafoko a a Molemo kaga Keresete. **13** Gonne mongwe le mongwe kwano, le kwa masole otlhe a nnang teng ba itse gore ke mo dikgoleng fela ka ntlha ya gore ke Mokeresete. **14** Mme ka ntlha ya go tshwarwa ga me Bakeresete ba le bantsi kwano ba bonala ba tlogetse letshogo la bone la go tshwarwa! Ka tsela nngwe bobelotelele jwa me bo ba kgothatitse mme ba pelokgale thata mo go boleleleng ba bangwe kaga Keresete. **15** Ba bangwe, ee, ba rera Mafoko a a Molemo ka ntlha ya gore ba fufegela tsela e Modimo o ntirang ka yone. Ba batla go kaiwa e le bareri ba ba senang poifo! Mme ba bangwe ba na le maikaelelo a a phepa, **16** ba rera ka ntlha ya gore ba a nthata, gonne ba itse gore Modimo o ntlisitse kwano go ntlisa go femela boammaaruri mme bangwe ba rerela go ntira gore ke fufege, ba gopola gore go fenyga ga bone go tlaa ntsifatsa bohutsana jwa me mo kgolegelong! **18** Mme le fa maikaelelo a bone e ka ne e le eng, boammaaruri ke gore Mafoko a a Molemo kaga Keresete a a rerwa ebile ke a itumela. **19** Ke tlaa nna ke ntse ke itumela, gonne ke itse gore fa lo nthapelela, le Mowa O O Boitshupo o nthusa, mo gotlhe go tlaa fetoga polokego ya me. **20** Gonne ke tshela mo tebelelong ya tlhwaafalo le tsholofelo ya gore ga ke kitla ke dira sepe se se tlaa dirang gore ke ithabelwe ke diithong

mme ke tlaa nna ke ipaakanyeditse go bua kaga Keresete ka bopelokgale fa ke santse ke tswelotse mo ditekong tse kwano; fela jaaka ke ne ke ntse mo lobakeng lo lo fetileng; mme ke tlaa aga ke tlotlega mo go Keresete, e ka ne e le ka botshelo kgotsa ka loso. **21** Gonne mo go nna, go tshela go raya dipako tsa ga Keresete, mme go swa, go siame bogolo! **22** Mme fa go tshela go ka nnaya lobaka lo lo ntsi go gapela batho mo go Keresete, foo, tota ga ke itse gore go botoka eng, go tshela kgotsa go swa! **23** Ka dinako tse dingwe ke batla go tshela mme ka dinako tse dingwe ga ke batle, gonne ke tlhwaafalela go ya go nna le Keresete. Go ka nna boitumelo jang mo go nna go na le go nna kwano! **24** Mme boammaaruri ke gore ke ka nna le thuso thata mo go lona fa ke nna! **25** Ee, ke santse ke tlohega mo lefatsheng leno, mme jalo ke ikutlwa ke tlhomamisa gore ke tlaa nama ke le mo lefatsheng go se kae, go lo thusa go gola lo bo lo itumela mo tumelong ya lona. **26** Go nna kwano ga me go tlaa lo itumeditse go ba go lo naya mabaka a go galaletsa Keresete Jesu ka go mpabalela, fa ke lo etela gape. **27** Mme le fa e le eng se se ka ntiragalelang, gakologelwang ka nako tsothe go tshela jaaka Bakeresete ba tshwanetse go tshela, gore, fa ke ka lo bona gape kgotsa ke se kake ka lo bona, ke tlaa nna ke utlwa dipego tse di siameng gore lo eme ka maikaelelo a le mangwe fela a a nonofileng, go bolela Mafoko a a Molemo, **28** lo sa boife sepe, go sa re sepe gore baba ba lona ba ka dirang. Ba tlaa bona se e leng sesupo sa gore ba fentswe, mme mo go lona e tlaa nna sesupo se se bonalang sentle se se tswang kwa Modimong gore o na le lona, le gore o lo neile botshelo jo bo sa khutleng ka ene. **29** Gonne lona lo neilwe tshwanelo e seng ya go mo ikanya fela mme e leng go mmogela. **30** Re mo ntsweng e mmogo. Lo mponye ke mmogela mo lobakeng lo lo fetileng; mme le gompiano ke santse ke le fa gare ga ntwa e kgolo e e boitshegang, jaaka lo itse sentle.

2 A go na le sengwe se se tshwanang jaaka Bakeresete ba itumelelana? A lo nthata thata go batla go nthusa? A go raya sengwe mo go lona gore re bakaulengwe mo Moreneng, re tlhakanetse mowa o le mongwe fela? A tota dipelo tsa lona di bonolo le bopelotlhomogi? **2** Jalo he, dirang gore ke nne le boitumelo jo bogolo ka go ratana le go dumalana ka dipelo tsothe, lo dira mmogo ka pelo e le nngwe fela le mogopolo o le mongwe fela le ka maikaelelo a le mangwe fela. **3** Lo seka lwa nna pelotshethla, lo seka lwa dira ditiro tse di molemo gore lo tlotlomiadiwe. Ikokobetseng, lo tseye ba bangwe jaaka ekete ba botoka mo go lona. **4** Se akanyeng fela kaga dilo tse e leng tsa lona mme nnang le kgathhego le mo go ba bangwe, le mo go tse ba di dirang. **5** Maikutlo a lona a tshwanetse go nna a mofuta o re o supegeditsweng ke Jesu Keresete, **6** yo o rileng le fa e ne e le Modimo, a se ka a batla ditshwanelo tsa gagwe jaaka Modimo. **7** Mme a baya fa thoko nonofo ya gagwe e kgolo le kgalalelo, a tsaya setshwano sa motlhanka mme a nna jaaka batho. **8** Mme o ne a ikokobetsa go feta foo, mo e leng gore o ne a bo a swa loso lo lo tshwanang le lwa senokwane mo mokgorong. **9** Le fa go ntse jalo e ne e le ka ntlha ya gone mo, mo Modimo o neng wa mo tsholeletsa kwa legodimong mme wa mo naya leina le le fetang maina otlhe, **10** gore ka leina la ga Jesu mangole otlhe a tlaa khubama mo legodimong le

mo lefatshing le ka fa tlase ga lefatsho, **11** diteme tsothe di tlaa bolela fa Jesu Keresete e le Morena, go ya kgalalelong ya Modimo Rara. **12** Ditsala tse di rategang, erile fa ke na le lona koo, le ne lo tlhokomela ka nako tsothe go latela ditaolo tsa me. Mme jaanong ka ke seyo lo tshwanetse go tlhokomela thata go dira dilo tse di siameng tse di felelelang mo polokong, lo ikobela Modimo ka tshisimogo e kgolo, lo ikgape mo go tsothe tse di ka tlhokang go o itumedisa. **13** Gonne Modimo o a dira mo go lona, o lo thusa gore lo rate go o ikobela, ebile o lo thusa go dira se o se ratang. **14** Mo go sengwe le sengwe se lo se dirang, kgaoganang le go ngongorega le go ganetsanya, **15** gore ope a se ka a lo bona molato. Lo tshwanetse go tshela lo le phepa, matshelo a a phepa jaaka bana ba Modimo mo lefatshing le le lefifi le le tletseng batho ba ba kgopo le logwadi. Phatsimang mo go bone lo le masedi a lefatsho, **16** lo ba tsholetse Lefoko la Botshelo. Mme fa Keresete a boa, ke tlaa itumela jang gore tiro ya me mo go lona e ne e atlegile thata. **17** Mme fa madi a me a botshelo, go bua jalo ke raya gore a tshwanetse go tshelwa mo tumelong ya lona e ke e neelang Modimo e le sethabelo, mo go raya gore fa ke tshwanetse go swa ka nthla ya lona, le gone ke tlaa nna ke itumela, mme ke tlaa thakanela boitumelo jwa me le mongwe le mongwe wa lona. **18** Gonne lo tshwanetse go itumela le kaga se, mme lo ipeleng le nna ka nthla ya go nna le tshwanelo ya go lo swela. **19** Fa Modimo o rata, ke tlaa romela Timotheo go ya go lo bona ka bonako. Mme fa a bowa o ka intumedisa ka go mpoletela gotlhe kaga lona le gore lo dira jang; **20** ga go ope yo o tshwanang le Timotheo yo o nang le kgathego e kgolo mo go lona; **21** mongwe le mongwe o bonala a tshwenyega kaga dilo tse e leng tsa gagwe e seng tsa ga Jesu Keresete. **22** Mme lo itse Timotheo. O ntse fela jaaka morwaake mo go nthuseng go rera Mafoko a a Molemo. **23** Ke solofela gore ke tlaa mo romela kwa go lona ka bonako fa ke sena go bona gore ke tsile go diragalelwa ke eng kwano. **24** Ebile ke tshepa Morena gore ka bofelo nna ka sebele ke ka tla go lo bona. **25** Mme ka lobakanyana ka gopola gore ke tshwanetse go busetsa Epaforodito gape kwa go lona. Lo mo rometse go nthusa mo go tse ke di tlhokang; nna le ene re ntse re le bakaulengwe tota, re dira re bile re le batlhabani mmogo. **26** Jaanong ke mmusetsa gae gape, gonne o ntse a lo tlhwaafatsetse lotlhe ebile a hutsahetse thata ka nthla ya gore lo utlwile fa a lwala. **27** Mme ka boammaaruri o ne a lwala; tota le gone o batlile go swa. Mme Modimo o ne wa mo tlhomogela pelo mmogo le nna, wa se ka wa letla gore ke nne le bohutsana jo, mo godimo ga dilo tsothe. **28** Jalo ke rata thata go mmusetsa gape kwa go lona, gonne ke itse ka fa lo tlaa itumelang ka gone go mmona, mme seo se tlaa intumedisa se bo se fokotsa mahutsana ame. **29** Mo amogeleng mo Moreneng ka boitumelo jo bogolo, mme lo supe gore lo itumeletse go tla ga gagwe, **30** gonne o ne a tsenya botshelo jwa gagwe mo diphatseng ka nthla ya tiro ya ga Keresete mme o batlile go swa fa a santse a leka go ntirela dilo tse lo sa kakeng lwa di dira ka go bo lo ne lo le kgakala le nna.

3 Mme le fa go ka diregang, ditsala tse di rategang, itumeleng mo Moreneng. Ga nke ke lapisega go lo bolelela se, ebile go

lo siametse go se utlwa gangwe le gape. **2** Itlhokomeleng mo bathong ba ba bosula, bao, dintsa tse di diphatsa, ke ba bitsa jalo, ba ba reng lo tshwanetse go rupisiwa gore lo bolokwe. **3** Gonne ga se go segwa ga mebele ya rona mo go reirang bana ba Modimo; ke go mo obamela ka mewa ya rona. E ke yone "thupiso" ya boammaaruri. Rona Bakeresete re galalela mo go se Keresete Jesu a se re diretseng ebile re lemoga gore ga re kake ra ithusa go ipoloka. **4** Legale fa mongwe a ka bo a kile a nna le mabaka a gore o ka ipoloka, e ka bo e le nna. Fa ba bangwe ba ne ba ka bolokwa ke se ba leng sone, tota ke ka bo ke ipolokile. **5** Gonne ke rupisitswe mo thupisong ya Sejuta fa ke le malatsi a ferabobedi, ke tsaletse mo lelapeng la Sejuta tota mo lotsong lwa ga Benjamini. Jalo ke ne ke le Mojuta wa Bajuta tota! Mo gongwe ke eng? ke ne ke le leloko la Bafarasai ba ba neng ba le kutlo mo molaong mongwe le mongwe le ngwao ya Sejuta. **6** Mme a go boammaaruri? Ee, ke ne ke bogisa phuthogo thata; mme ke rata go ikobela molao mongwe le mongwe wa Sejuta go fithelela kwa bofelong. **7** Mme dilo tse tsothe tse ke kileng ka gopola gore di siame thata, jaanong ke di latlhile gore ke beye tshepo le tsholofelo ya me mo go Keresete a le esi. **8** Ee, sengwe le sengwe ga se na mosola fa se tshwantshangwa le poelo e e senang theko ya go itse Morena wa me Jesu Keresete. Ke beetse tsothe fa thoko, ke di bona e se sepe, gore ke tle ke nne le Keresete, **9** ke nne mongwe fela nae, ke sa tlhoke ke bona gore ke tshwanetse go bolokwa ka go siama thata kgotsa go obamela melao ya Modimo, fa e se fela ka go ikanya Keresete go mpoloka; gonne tselo ya Modimo ya go re dira gore re nne tshiamo nao e eme mo tumelong, re beile mo go Keresete a le nosi. **10** Mme jaanong ke tlogetse sengwe le sengwe, ke bonye e le yone fela tselo ya go itse Keresete le go lemoga nonofo e kgolo e me mo rudisitseng, le go bona gore go boga le go swa nae go rayang. **11** Gore e tle e re kgotsa ka mokgwa mongwe ke tle ke nne mo botshelong jo boshajwa ba ba tshedileng mo baswing. **12** Ga ke reye gore ke itekanetse. Ga ke ise ke ithute tsothe tse ke tshwanetseng go di ithuta, mme ke lekela pele go fithelela letsatsi le ke tlaa bong ke le se Keresete a se mpeloketseng le se o batlang ke nna sone. **13** Nnyaa, bakaulengwe ba ba rategang, ga ke ise ke nne gotlhe mo ke tshwanetseng go nna gone, mme ke leka ka natla yotlhe go tlhokomela selo se le sengwe fela se: go lebalala tse di kwa morago ke lebelela tse di kwa pele. **14** Ke gagamaletse go fitlha kwa bokhutlong jwa lobelo le go amogela sekgele se Modimo o se re biletsang kwa legodimong ka nthla ya se Jesu Keresete a se re diretseng. **15** Ke solofela gore lotlhe ba lo leng Bakeresete ba ba godileng mo tumelong lo tlaa nna maikutlo a le mangwe le nna mo mabakeng one a, mme fa re sa dumalane mo ntheng nngwe ke dumela gore Modimo o tlaa lo e tlhalosetsa sentle, **16** fa lo ikobela boammaaruri jo lo nang najo. **17** Bakaulengwe ba ba rategang, lo nne baetsi ba me mme lo eleng tlhoko ba ba tshelang ka fa sekaong sa me. **18** Gonne ke lo boleletse gantsi, mme ke bua gape jaanong ka dikededi mo matlhong a me, go na le ba le bantsi ba ba tsamayang mo tseleng ya Sekeresete mme tota e le baba ba mokgoro wa ga Keresete. **19** Bokamoso jwa bone ke tathago e e sa khutleng, gonne modimo wa bone ke mpa ya bone: ba ipelafatsa ka se se tshwanetseng go tlhabisa

dithlong; mme se ba akanyang kaga sone fela ke botshelo jwa lefatsho leno. **20** Mme legae la rona le kwa legodimong, kwa Mmoloki wa rona Morena Jesu Keresete a leng teng; mme ebile re lebeletse go boa ga gagwe a tswa teng koo. **21** E tlaa re fa a tla o tlaa tsaya mebele e e swang e ya rona, a e fetolele mo mebeleng e e galalelang jaaka wa gagwe, a dirisa nonofo e le nngwe fela e o tlaa e dirisang go tlabana le sengwe le sengwe gongwe le gongwe.

4 Bakaulengwe ba me ba ba rategang, ke a lorata ebile ke tlhwaafaleitse go lo bona, gonne lo boitumelo jwa me le tuelo ya ditiro tsa me. Ditsala tse di rategang, nnang boamaruri mo Moreneng. **2** Mme jaanong ke batla go kopa basadi ba babedi ba ba rategang bao, ebong Eodia le Sentuke. Tswée-tswée, ka thuso ya Morena, se tlholog lo omana, nnang ditsala gape. **3** Mme ke a go kopa, tsala ya me ya boammaaruri go thusa basadi ba, gonne ba dirile le nna mo go bolelelang bangwe Mafoko a a Molemo, ba dirile le Klement, le botlhe badiri ka nna botlhe ba maina a bone a kwadilweng mo Lokwalong lwa Botshelo. **4** Nnang lo itumetse mo Moreneng ka metlha yotlhe; ke ipoeletsa gape, ka re itumeleng! **5** A mongwe le mongwe a bone gore ga lo bohula gape lo bonolo mo go tsotlhe tse lo di dirang. Gakologelwang gore Morena o e tla ka bonako. **6** Lo se ka lwa tshwenyega kaga sepe; mo boemong jwa moo, rapelang kaga sengwe le sengwe. Bolelelang Modimo se lo se tlhokang mme lo se lebele go O lebogela dikarabo tsa one. **7** Fa lo dira jalo, lo tlaa itemogela kagiso ya Modimo, e e hakgamatsang thata go feta e mogopolo wa motho o ka e tlhologanyang. Kagiso ya gagwe e tlaa ritibatsa e bo e lapolosa dipelo tsa lona fa lo ikanya Jesu Keresete. **8** Mme jaanong, bakaulengwe, a e re ke tswala lokwalo lo, ke boelele gape selo se: tiisang megopolo ya lona mo boammaaruring le mo molemong le mo tshiamong. Akanyang kaga dilo tse di itshekileng le tse di ntle mme lo nne mo dilong tse di siameng, tse di molemo mo go ba bangwe. Akanyang kaga tsotlhe tse lo ka galaletsang Modimo ka tsone lo bo lo itumele kaga tsone. **9** Tsweleng lo dire tsotlhe tse lo di ithutileng mo go nna le tse lo bonyeng ke di dira, mme Modimo wa kagiso o tlaa nna le nna. **10** Ke itumela thata jang ebile ke galaletsa Morena jang ka go bo lo nthusa gape. Ke a itse gore ga lo bolo go tlhwaafalela go romela se lo ka se kgonang, mme ka lobakanyana lo ne lo se na ka fa lo ka dirang ka teng. **11** E seng ka nthla ya gore ke kile ka tlhoka, gonne ke itlwaaditse go itumela fa ke na le go le gontsi le go le gonnye. **12** Ke itse ka fa ke ka tshelang ka teng ke na le sengwe le ke sena sepe. Ke ithutile sephiri sa go kgotsofadiwa mo seemong sengwe le sengwe, le fa e le go kgora kgotsa go tshwarwa ke tlala go huma kgotsa go humanega; **13** gonne ke ka dira sengwe le sengwe se Modimo o batlang ke se dira ka thuso ya ga Keresete yo o nnayang thata le nonofo. **14** Mme le fa go ntse jalo, lo dirile sentle ka go nthusa mo mathateng a me. **15** Jaaka lo itse sentle, erile la nthla fa ke lo tlisetse Efangele, ke le mo tseleng ke tswa Masedonia, ke lona fela Bafilipi ba lo neng lwa nna bapati ba me mo go abeng le mo go amogeleng. Ga go na phuthego epe e e dirileng jalo. **16** Le jaaka ke ne ke le kwa Thesalonika lo ne lwa nthomelela thuso gabedi. **17** Mme le fa ke itumelela dimpho tsa lona, se se itumedisang

thata ke kamogelo e ntle ya tuelo e lo tlaa e bonang ka nthla ya tshiamo ya lona. **18** Ka lobaka lo ke na le tsotlhe tse ke di tlhokang, go feta tse ke di tlhokang! Ke na le mo go ntekanyeng ka dimpho tse lo di nthomeletseng ka Epaferodito fa a tla. Ke setlhabelo se se lonko lo monate se se itumedisang Modimo thata. **19** Mme ke ene yo o tlaa lo abelang tsotlhe tse lo di tlhokang mo dikhumong tsa gagwe tse di mo kgalalelong, ka nthla ya se Keresete a se re diretseng. **20** A kgalalelo e nne go Modimo Rraetsho ka metlha le metlha. Amen. (aiōn g165) **21** Ntumedisetseng Bakeresete botlhe koo; bakaulengwe ba ba nang le nna le bone ba a dumedisana. **22** Le Bakeresete botlhe ba ba kwano ba a lo gakologelwa, bogolo jang ba ba dirang mo tlong ya segosi ya ga Kaesara. **23** A tshogofatso ya Morena wa rona Jesu Keresete e nne le mewa ya lona. Ke nna, wa lona ruri, Paulo.

Bakolosa

1 Lokwalo lo lo tswa kwa go: Paulo yo o tlophihleng ke Modimo go nna morongwa wa ga Jesu Keresete, le kwa go mokaulengwe Timotheo. **2** Lo ya kwa: Bakaulengweng ba Bakeresete ba ba ikanyegang, batho ba Modimo, mo motseng wa Kolosa. A Modimo Rara wa rona o lo nesetse mathogonolo o bo o lo tlatse ka kagiso ya One e kgolo. **3** Nako nngwe le nngwe fa re lo rapelela re simolola ka go leboga Modimo Rraa Morena wa rona Jesu Keresete, **4** gonne re utlwile gore lo ikanya Modimo go le kae, le gore lo rata batho ba one go le kae. **5** Ebile lo solofetse go amogela dilo tse di itumedisang tsa legodimo, le gone ga lo bolo go nna lo di solofela go simolola ka nako e Mafoko a a Molemo a neng a simolola go rerwa ka yone mo go lona. **6** One Mafoko a a Molemo a, a a tsileng kwa go lona, a anamela mo lefatshegong lotlhe ebile a fetola matshelelo a batho gongwe le gongwe, fela jaaka a fetotse matshelelo a lona ka lone letsatsi le lo neng lo a utlwa ka lone lwa ba lwa thaloganya ka ga kutlwelo bothoko e kgolo ya Modimo mo baleofing. **7** Epafarase modiri ka rona yo o rategang thata ke ene yo o neng a lo leretse Mafoko a a Molemo a. Ke motlhanka yo o ikanyegang wa ga Jesu Keresete, go re thusa mo boemong jwa lona. **8** Gape ke ene yo o re boleletseng kaga lorato lo logolo mo go ba bangwe lo Mowa O O Boitshepo o lo lo neileng. **9** Jalo he, e sale e re fela re utlwa kaga lona re bo re tswelera re rapela re kopa Modimo go lo thusa go thaloganya se o batlang lo se dira, le go thaloganya dilo tsa semowa; **10** le go kopa gore tsela e lo tshelang ka yone e itumedise Morena ka metha yotlhe lo bo lo mo tlotle, gore lo age lo dira, dilo tse di molemo mo go ba bangwe, lo ntse lo tswelera go ithuta go itse Modimo botoka. **11** Re rapelela gape gore lo tiadiwe ka nonofo ya one e kgolo e e galalelang gore lo tie lo kgone go tswelera pele le go le mathata, lo tletse boitumelo jwa Morena ka metha yotlhe, **12** ebile lo leboga ka metha yotlhe Rara yo o re nonotshitseng go nna le seabe mo dilong tsothle tse dintle tse e leng tse ba ba nnang mo Bogosing jwa Lesedi. **13** Gonne o re falotshitse ka go re ntsha mo lefifing le mo phifalong ya bogosi jwa ga Satane mme wa re tsenya mo bogosing jwa Morwa One yo o rategang, **14** yo o rekileng kgololo ya rona ka madi a gagwe a bo a itshwarela dibe tsa rona tsothle. **15** Keresete ke setshwano tota sa Modimo o o sa bonweng ka matlho, O ne a le teng pele ga Modimo o tihola lobopo lotlhe, mme tota, **16** Keresete ka sebele ke mmopi yo o tlohdileng sengwe le sengwe mo legodimong le mo lefasheng, dilo tse re ka di bonang le tse re se ka keng ra di bona; lefatshe la semowa ka dikgosi tse lone le mebuso ya lone, babusi ba lone le maotlana a lone; gotlhe go dirilwe ke Keresete go dirisiwa ke ene mo kgalalelong ya gagwe. **17** O ne a le teng pele ga sengwe le sengwe se simologa, mme gape ke nonofo ya gagwe e e tshwaragantseng sengwe le sengwe. **18** Ke ene tlhogo ya mmele o o dirilweng ka batho ba gagwe, ke gore, phuthego ya gagwe e a e simolo-tseng; gape ke Moeteledipele wa bothle ba ba tsogang mo baswing, gore a nne wa nthla mo dilong tsothle; **19** gonne Modimo o ne o batla gore gotlhe mo e leng ga one go nne mo go Morwa One. **20** E

ne e le ka nthla ya se Morwa One a se dirileng, mo Modimo o neng wa betlela sengwe le sengwe tsela ya go tla kwa go one, dilo tsothle mo legodimong le mo lefatshegong, gonne loso lwa ga Keresete mo mokgorong lo diretse bothle kagiso mo Modimong ka madi a gagwe. **21** Mo go balelwa le lona ba lo kileng lwa ne lo le kgakala thata le Modimo. Lo ne lo le baba ba one, lo o ila ebile lo ne lo kgaogantswe le one ke megopolo ya lona e e bosula le ditiro tsa lona mme le fa go ntse jalo jaanong o lo buseditse mo go one go nna ditsala tsa one. **22** O dirile jaana ka nthla ya go swa ga mmele wa gagwe wa botho mo mokgorong, mme ka nthla ya go dira jalo Keresete o lo tlisitse fa pele ga Modimo ka sebele, mme lo eme foo fa pele ga gagwe go se na sepe se se setseng kgatthanong le lona, go se na sepe se se setseng se a neng a ka se lo omanyetsa; **23** se se batlwang fela mo go lona ke gore lo dumele Boammaaruri ka botlalo, lo eme mo go jone lo sa rekettle ebile lo nitame, lo nonofile mo Moreneng, lo dumela ka botlalo mo Mafokong a a Molemo gore Jesu o lo swetse, ebile lo sa sute mo go mo ikanyeng go lo boloka. Se mafoko a mantle a a hakgamatsang a a tsileng mo go mongwe le mongwe wa lona mme jaanong a aname le lefatshe lotlhe. Mme nna Paulo, ke na le boitumelo jwa go a bolelela ba bangwe. **24** Mme bontlha bongwe jwa tiro ya me ke go lo bogela; gape ke a itumela, gonne ke thusa go feleletsa masalela a dipogiso tsa mmele wa ga Keresete, ebong phuthego. **25** Modimo o nthomile go thusa phuthego ya one, le go lo bolelela lona Badichaba leano la one le le fithegileng. **26** Ga o bolo go fitlha bosaitsiweng jo mo dingwageng tse di makgolokgolo le mo diikokomaneng tse di fetileng, mme jaanong kwa bofelong go mo itumedisitse go bo bolelela ba ba o ratang ebile ba o tshelera, mme mahumo le kga-lalelo ya maikaelelo a one ke a lona le Badichaba. Mme bosaitsiweng joo ke jo: gore Keresete mo dipelong tsa lona ke ene fela tshlofelo ya lona ya kgalalelo. (aiōn g165) **28** Jalo gongwe le gongwe kwa re yang teng re bua kaga Keresete mo go bothle ba ba tlaa ree-tsang, re ba thagisa ebile re ba ruta ka fa re itseng ka teng ka nthla ya se Keresete a se diretseng mongwe le mongwe wa bone. **29** Ke yone tiro ya me e, mme ke ka e dira fela ka nthla ya gore nonofo e kgolo ya ga Keresete e dira mo go nna.

2 Ke eletsa fa lo ne lo ka itse ka fa ke lo kgarathetseng ka teng mo thapelong ke rapelela lona le phuthego e e kwa Laodikea, ebile ke rapelela le ditsala tsa me tse dingwe tse dintsi tse di iseng di ke di nkitse sefathogo. **2** Se ke se lo kope-tseng mo Modimong ke se: gore lo kgotladiwe lo bo lo lomaganngwe mmogo ka ditlamo tse di thata tsa lorato, le gore lo nne le boitemogelo jo bo tletseng le thaloganyo ya go itse Keresete ka botlalo. Gonne leano le la Modimo le le neng le sa itsiwe, jaanong le senotswe, ke lone Keresete ka sebele. **3** Mo go ene go na le mahumo othe a magolo a a fithegileng a a senang bolekanngo a bothale le kitso. **4** Ke bua jaana ka gore ke tshaba gore motho mongwe o ka lo fora ka puo ya gagwe e e borethe. **5** Gonne le fa ke le kgakala le lona, pelo ya me yone e na le lona, ke a itumela gonne lo tswelitse sentle thata, ke a itumela ka nthla ya tumelo ya lona e e nonofileng mo go Keresete. **6** Mme jaanong fela jaaka lo ne lwa ikanya

Keresete go lo boloka, mo ikanyeng, le mo matshwenyegong a letsatsi lengwe le lengwe; n nang mo kgoaganong ya bothokwa nae. 7 A medi ya lona e melele thata kwa teng ga gagwe mme e gope dikotla mo go ene. Elang tlhoko gore lo tswelele go gola mo Moreneng, le gore lo a nonofa ebile lo tlhomama mo boammaaruring jo lo bo rutilweng. A matshelo a lona a penologe ka boitumelo le malebogo mo go tsoithe tse a di dirileng. 8 Se letleleleng ba bangwe go senya tumelo ya lona le boitumelo ka bothalenyana jwa bone; le dikarabo tsa bone tse di sa tlang tse di tswang mo megopolong le mo ditlhaloganyong tsa batho, mo boemong jwa go dumela mo go se Keresete o se buileng. 9 Gonne mo go Keresete go na le BoModimo jotlhe mo mmeleng wa setho; 10 jalo lo na le sengwe le sengwe fa lo na le Keresete, gape lo tladiwa ka Modimo ka ntla ya kgoaganano ya lona le Keresete. Keresete ke Mmusi yo mogolo, o na le taolo mo nonofong e nngwe le e nngwe. 11 Erile fa lo tla kwa go Keresete, a lo golola mo dikeletsong tsa lona tse di bosula, eseng ka thupiso ya mmele e e dirwang ka diatla mme e leng ka thupiso ya semowa, kolobetso ya mewa ya lona. 12 Gonne mo kolobetsong lo bona ka fa tlhologo ya lona e kgoologo e e bosula e suleng nae ka teng le ka fa e neng ya fitlwa nae ka teng; mme jalo lo ne lwa tsoga mo losong nae lwa tsogela mo botshelong jo boshana gonne lo ne lo ikanya Lefoko la Modimo o mogolo o o tsotsiseng Keresete mo baswing. 13 Lo ne lo sule mo dibeng, mme dikeletso tsa lona tsa boleo di ne di ise di kgaolwe. Mme wa lo naya seabe mo go jone botshelo jwa ga Keresete, gonne o ne wa lo itshwarela dibe tsothe. 14 Wa bo wa phimola bosupi jwa melato yothle ya lona, jo bo mo lokwalong lwa melao ya one e lo sa e obamelang. O ne wa tsaya lokwalo lwa melato mme wa lo senya ka go lo kokotela mo sefapaanong sa ga Keresete. 15 Ka tsela e, Modimo o ne wa tlosa nonofo ya ga Satane ya go lo bona molato wa boleo, Modimo wa bo wa supa mo pepeneneng mo lefatsheng lotlhe phenyo ya ga Keresete mo mokgorong kwa dibe tsa lona di neng tsa tlosiwa tsothe teng. 16 Jalo se letleleleng ope go lo bona molato kaga se lo se jang kgotsa se lo se nwang, kgotsa ka go tlhoka go tshgetsatsi malatsi a boikhutso a Sejuta le mediro kgotsa meletlo ya kgwedi e e rogwang kgotsa bo-Sabata. 17 Gonne se e ne e le melao fela ya lobakanyana e e neng ya khutla fa Keresete a tla. E ne e le meriti fela ya selo sa boammaaruri, ebong Keresete ka sebele. 18 Se letleleleng ope go lo raya a re lo latlhegile fa lo gana go obamela baengele, jaaka ba re lo tlamega go ba obamela. Ba re ba bonye ponatshegelo, mme ba itse gore lo tshwanetse. Batho ba ba ikgogomosang ba, ba na le kakanyo ya bothale jo bogolo. 19 Mme ga ba a lomagana le Keresete, tlhogo e rotlhe ba re leng mmele wa gagwe re lomagantsweng mo go yone; gonne re lomagantswe nae ka mesifa ya gagwe e e nonofileng mme re gola fela fa re tsaya kotla le nonofo ya rona mo Modimong. 20 Mme e re ka o ka re lo sule le Keresete, ebile go swa mo go lo golotse mo go saleng morago ditlhaloganyo tsa lefatshes tsa ka fa lo ka bolokwang ka teng, ka go dira molemo le go obamela melao e mentsi e e farologanyeng, ke eng fa lo tswelala lo e sala morago ka tsela nngwe, lo santse lo bofilwe ke melao e e reng, 21 lo se ka lwa leka sepe ka legano, kgotsa le fa e le go ama dijo dingwe? 22 Melao e e ntseng jaana ke

dithuto tsa batho fela, gonne dijo di diretswe go jewa le go dirisiwa. 23 Melao e, e ka ne e bonala e siame, gonne melao ya mofuta o, e batla boineelo jo bo nonofileng mme e kgoalatsa mmele ebile e imela mmele, mme ga e na thuso epe fa go tliwa mo go fenyeng megopolo e e bosula le dikeletso tse di bosula tsa motho. E mo dira boikgodiso fela.

3 E re ka lo tshedile gape, go bua jalo ke gore, ka Keresete a tsogile mo baswing, jaanong tlhomang megopolo ya lona mo mahumong a a molemo le dilo tse di itumedisang tsa legodimo kwa Keresete o ntseng gone fa lo tlhakoring lwa Modimo mo lefelong la tlotlo le nonofo. 2 Tlhomang megopolo ya lona mo dilong tse di kwa godimo, eseng mo go tse di mo lefatsheng. 3 Lo se ka lwa ba lwa nna le fa e le keletso ya lefatshes leno, fela jaaka motho yo o suleng. Botshelo jwa lona tota bo kwa legodimong kwa go Keresete le Modimo. 4 Mme fa Keresete yo e leng botshelo jwa rona tota a tla gape, lo tlaa galalela nae lo bo lo nna le seabe mo kgalalelong yothle ya gagwe. 5 Ke gone kgaaganang le dilo tsa boleo tsa selefatshe; bolayang dithuto tse di bosula tse di iphitlhileng mo go lona; se tlhokaneng le sebe sa boaka, bomaswe, keletso e e bosula le dikeletso tse di tlhabisang diithong; se obameleng dilo tse di molemo tsa botshelo, gonne seo ke go obamela medimo ya disetwa. 6 Bogale jwa Modimo jo bo tukang bo wetse bone ba ba dirang dilo tse. 7 Lo ne lo e tle lo di dire fa botshelo jwa lona e santse e le tokololo ya lefatshes leno; 8 mme jaanong ke nako ya go apola le go latlha diaparo tse di bodileng tse tsa kgakalo, kilo, thogakano, le puo e e leswe. 9 Se akelaneng gonne botshelo jwa lona jo bogologolo le boikepo jwa jone ke jone jo bo neng bo dira selo se se ntseng jalo; jaanong bo sule bo nyeletse. 10 Lo tshela botshelo jo boshana gothelele jo bo tswelletseng bo ithuta thata kaga se se molemo ebile lo leka gangwe le gape go tshwana le Keresete yo o thodieng botshelo jo boshana jo mo go lona. 11 Mo botshelong jo boshana jo, bomorafe kgotsa lotso, kgotsa thutego ya motho, kgotsa maemo a o nang nao mo go tsa matshelo, dilo tse tsothe ga di bothokwa; ga di reye sepe. Se se tlhokegang ke gore a motho o na le Keresete, gonne Keresete o bonwa ke batho bothe fela ka go tshwana. 12 E re ka lo tlhophilwe ke Modimo o o lo neileng mofuta o wa botshelo jo boshana, gape le ka ntla ya lorato lwa one lo logolo le ka go lo tlhobaelela, lo dire kutlwelo-bothoko le lorato le bopelonomi mo go ba bangwe. Se tshwenyegeng kaga go dira mogopolo o o siameng mo go bone mme n nang lo ipaakanyeditse go boga ka tidimalo le ka bopelotelele. 13 Mme n nang pelonolo lo ikemiseditse go itshwarela; se tsholaneng ka dipelo. Gakologelwang gore Morena o lo itshwaretse, jalo lo tshwanetse go itshwarela ba bangwe. 14 Mme mo godimo ga dilo tsothetse, a lorato lo goge botshelo jwa lona gonne ka go dira jalo, phuthego e tlaa nna mmogo ka kutlwano e e boitekanelo. 15 A kagiso e e tswang kwa go Keresete e nne mo dipelong tsa lona le mo matshelong a lona ka malatsi othe, gonne mo ke tiro ya lona le tshwana-elo ya lona jaaka lo le ditokololo tsa mmele wa gagwe. Lo nne lo leboge Morena ka malatsi othe. 16 Gakologelwang se Keresete a se rutileng, lo bo lo letle mafoko a gagwe go nonotsha matshelo a lona a bo a lo

tlhalefise; rutanang ka ga one lo bo lo opele mo Dipesalemeng le mo difeleng le mo dipineng tsa semowa, lo opelela Morena ka dipelo tse di lebogang. 17 Mme le fa e le eng se lo se dirang kgotsa se lo se buang, a se nne jaaka moemedi wa Morena Jesu, lo bo lo leboge Modimo Rara ka ene. 18 Lona basadi ba ba nyetsweng, ineeleng mo banneng ba lona, gonne seo ke se Morena o se lo rulaganyeditseng. 19 Mme lona banna lo tshwanetse lwa nna le lorato le bopelonolo mo basading ba lona, lo lese bogalaka mo go bone le fa e le go ba galefela. 20 Mme lona bana lo tshwanetse go ikobela borraa lona le bommaa lona, gonne seo se itumedisa Morena. 21 Borra bana se kgadiepetseng bana ba lona mo e leng gore go ba nyemisa moko ba bo ba latlhelgelwe ke maiteko. 22 Lona batlhanka lo tshwanetse go ikobela beng ba lona ba lefatshe ka malatsi otlhe, lo sa leke go ba itumedisa fela fa ba lo lebeletse mme lo ba itumedisa ka metha yotlhe; ba ikobeleng ka boineelo ka ntla ya lorato lwa lona mo Moreneng le ka ntla ya gore lo batla go mo itumedisa. 23 Dirang thata le ka boitumelo mo go tsothe tse lo di dirang, fela jaaka o kare lo ne lo direla Morena eseng fela beng ba lona; 24 lo gakologelwe gore ke Morena Keresete yo o tlaa lo duelang, a lo neela seabe sa lona se se tletseng sa tsothe tse a nang natso. Ke ene yo tota lo mo direlang. 25 Mme fa lo sa mo direle ka bojotlhe jwa lona; o tlaa lo duela ka tsela e lo senang go e rata, gonne ga a na ba a ba ratang go gaisa ba bangwe, ba ba ka tsewelelang ba dira ka go itsemeletsa mo tirong.

4 Lona beng ba batlhanka lo tshwanetse gosiana ka tekatekanyo mo bathankeng ba lona botlhe. Gakologelwang ka malatsi otlhe gore le lona lo na le Mongwa lona kwa legodimong yo o lo etseng tlhoko thata. 2 Se lapisegeng mo thapelong; nnang mo go yone; lebelelang dikarabo tsa Modimo lo bo lo gakologelwe go leboga fa di tla. 3 Se lebaleng go re rapelela le rona, gore Modimo o re neye nako e ntsi go rera Mafoko a a Molemo a ga Keresete a ke leng fano mo kgolegolong ka ntla ya one. 4 Rapelang gore ke tle ke nne pelokgale go a bolela ke lokologile le ka bottlalo, le go a dira gore a tlhalogangwe, jaaka tota, ke tshwanetse. 5 Dirisang dinako tsa lona tse dintsi lo bolelela ba bangwe Mafoko a a Molemo. Nnang bothale mo go kopaneng ga lona le bone mo dilong tsothe. 6 A dikgang tsa lona di nne tse di nametsang le tse di utlwalang, gonne ka go dira jalo lo tlaa nna le karabo e e tshwanelang mongwe le mongwe. 7 Tukiko, mokaulengwe wa rona yo o rategang thata, o tlaa lo bolelela ka fa ke tsewelelang ka teng. Ke modiri yo o senatla ebile o direla Morena le nna. 8 Ke mo romile mo loetong lo lwa bothokwa go bona gore lo tsoga jang, go lo gomotsa le go lo kgothatsa. 9 Ke roma le Onesima, mokaulengwe yo o ikanyegang yo e bileng a ratega thata, mongwe wa ba ga lona. Ene le Tukiko ba tlaa lo naya dikgang tsothe tse di ncha. 10 Arisetareko, yo ke nang nae kwano jaaka legolegwa, o a lo dumedisa, le Mareko wa losika lwa ga Barenabase le ene o a lo dumedisa. Mme fela jaaka ke buile pele, amogelang Mareko ka kamogelo e e tletseng boitumelo fa a tla kwa go lona. 11 Le Jesu yo o bidiwang Juseto o a lo dumedisa. Ke bone fela Bakeresete ba Sejuta ba ba dirang le nna kwano, mme ba ntse ba le kgomotso thata

jang mo go nna! 12 Epaferase, yo o tswang mo motseng wa lona, mothanka wa ga Keresete Jesu, o a lo dumedisa. O lo rapelela ka tlhwaafalo malatsi otlhe, a kopa Modimo go lo nonotsha le go lo dira boitekanelo le go lo thusa go itse go rata ga One mo go sengwe le sengwe se lo se dirang. 13 Ke ka lo tlhomamisetse gore, lona le Bakeresete ba Laodikea le Hirapolise, o lo diretse ka bonatla jotlhe mo dithapelong tsa gagwe. 14 Ngaka Luke yo o rategang le Demase ba a lo dumedisa. 15 Tswee-tswee ntumedisetsang ditsala tsa Bakeresete kwa Laodikia. Lo ntumedisetse le Nimefase, le ba ba phuthegelang mo lwapeng lwa gagwe. 16 Mme fa lo sena go bala lokwalo lo, lo lo fetisetse kwa phuthegong e e kwa Laokikia. Lo bo lo bale le lokwalo lo ke lo ba kwaletseng. 17 Lo bo lo reye Arekipo lo re, "A tlhomamise gore a dire tsothe tse Morena o di mo laoletse go di dira." 18 Tumedisiso ya me e ke e kwadileng ka seatla same ke e: Nkgakologelwang kwano mo kgolegolong. A masego a Modimo a lo agelele. Ke nna wa lona ruri, Paulo.

Bathesalonia I

1 Lokwalo lo lo tswa kwa go: Paulo le Silase le Timotheo. Lo kwalelwa: Phuthego e e kwa Thesalonia, lona ba lo leng ba Modimo Rara le Morena Jesu Keresete: a tshogafatso le kagiso ya pelo e nne dinoe tsa lona tse di itekanetseng di tswa kwa Modimong Rraa rona, le kwa go Jesu Keresete Morena wa rona. **2** Ka malatsi othe re leboga Modimo ka lona re ntse re lo rapelela ka metlha yothle. **3** Ga re ke re lebala ditiro tsa lona tsa lorato fa re ntse re bua le Modimo wa rona le Rara kaga lona, le kaga tumelo ya lona e e nonoflieng le ka go lebelela ka tshisibalo go bonala ga Morena wa rona Jesu Keresete. **4** Re a itse gore Modimo o lo tlhophile, bakaulengwe ba ba rategang thata mo Modimong. **5** Gonne erile fa re lo leretse Mafoko a a molemo, e ne e se gore ke pu fela e e senang molemo mo go lona; nnyaa, lo ne lwa reetsa ka kgathego e kgolo. Se re se lo boleletseng se ne sa unywa loungo lo lo nonoflieng mo go lona, gonne Mowa O O Boitshepo o ne wa lo naya tlhomamiso e kgolo gore se re se buileng e ne e le boammaaruri. Ebile lo itse ka fa one matshelo a rona a neng a le sesupo mo go lona sa boammaaruri jwa molaetsa wa rona ka teng. **6** Jalo lwa nna balatedi ba rona le ba Morena; gonne lo amogetse molaetsa wa rona ka boitumelo jo bo tswang mo Moweng O O Boitshepo mo godimo ga meleko le dikutlo bothoko tse o di lo lerediteng. **7** Mme lona ka sebele lwa nna sekao mo Bakereseteng ba bangwe bothle mo Masedonia le mo Akaia. **8** Mme jaanong lefoko la Morena le dule mo go lona la anamela kwa ntle kwa go ba bangwe gongwe le gongwe, kgakala go feta melerwane ya Masedonia le Akaia, gonne gongwe le gonwe kwa re yang teng re fithela batho ba re bolelela kaga tumelo ya lona e e sa belaesegeng mo Modimong. Ga go tlhokege gore re ba bolelele ka yone, **9** gonne ba re bolelela gangwe le gape kaga kamogelo e e hakgamatsang e ntle e lo re amogetseng ka yone, le ka fa lo furaletseng medimo ya disetwa ka teng lo boela mo Modimong gore jaanong Modimo o o tshelang o o boammaaruri ke one Morena wa lona. **10** Gape ba bua ka fa lo lebeleletseng ka teng go bowa ga Morwa Modimo a tswa legodimong, ebong Jesu, yo Modimo o neng wa mo tsoa mo baswing, ebile ke ene fela Mmoloki wa rona mo bogaleng jwa Modimo jo bo boitshegang kgatthanong le sebe.

2 Lona ka sebele lo a itse, bakaulengwe ba ba rategang, gore loeto loo lo ne lwa nna lwa bothokwa jang. **2** Lo itse gore re ne ra sotlwa jang kwa Filipi pele ga re tla kwa go lona, le gore re bogile go le kae teng. Le fa go ntse jalo Modimo o ne wa re naya kgothatso go boelela molaetsa o mo go lona ka bopelokgale, le fa re ne re dikaganyeditse ke baba. **3** Jalo lo ka bona gore re ne re sa rere ka maikutlo ape a tsietso kgotsa maikaelelo ape a a bosula mo megopolong ya rona; re ne re tlhamaletse gape re le boammaaruri. **4** Gonne re bua re le barongwa ba ba tswang kwa Modimong, re ikantswe ke One go bolelela boammaaruri; ga re fetole molaetsa wa One ka gope go kgattha batho ba ba o utlwang; gonne re direla Modimo ka osi, o o tlhathobang dikakanyo tse di boteng tsa dipelo tsa rona. **5** Le fa e le gangwe fela ga re ise re ke re leke go lo gapa ka mafoko

a a borethe, jaaka lo itse sentle, le Modimo o itse gore re ne re na itire ditsala tsa lona gore lo tle lo re neye madi! **6** Fa e le kaga kgalaetso, ga re ise re ke re e kope mo go lona kgotsa mo go ope, legale ka re le baaposetoloi ba ga Keresete, re ne re na le tshwanelo ya gore lo re neye tlotlo. **7** Mme re ne re siame mo go lona jaaka mmabana a otlha bana ba gagwe ebile a ba tlhokomela. **8** Re ne ra lo rata thata thata, mo e leng gore ga re a ka ra lo naya molaetsa wa Modimo fela, mme re lo neile le one matshelo a rona tota. **9** A ga lo gakologelwe, bakaulengwe ba ba rategang, ka fa re dirileng ka teng ka bonatla mo go lona? Bosigo le motshegare re ne re fufulelo go bona se se lekaneng gore tshedisa gore ditshenyegelo tsa rona di se ka tsa nna mkgweleo mo go ope wa lona, jaaka re rerile Mafoko a a Molemo a Modimo mo go lona. **10** Lona ka sebele lo basupi ba rona, jaaka Modimo le one e le mosupi, gore re ntse re siame re ikanyega ebile re se na molato mo go mongwe le mongwe wa lona. **11** Re buile le lona jaaka rabana a buisanya le bana ba gagwe, a ga lo gakologelwe? Re lo kopa, re lo kgothatse ebile re batla **12** gore matshelo a lona a malatsi othe a seka a tlhabisa Modimo diithong, mme a lere boitumelo mo go One o lo laleditseng mo bogosing jwa One go nna le seabe mo kgalalelong ya One. **13** Mme ga re kitla re khutlisa go leboga Modimo kaga se: gore erile fa re lo rerela, ga lo ise lo ke lo tseye gore mafoko a re neng re a bua e ne e kane e le a rona fela, mme lo ne lwa amogela se re neng re se bua e le Lefoko la Modimo tota, le tota e neng e le lone, mme le ne la fetola matshelo a lona fa lo le dumela. **14** Mme jaanong, bakaulengwe ba ba rategang, lo bogile se diphuthego mo Judea di se bogileng, lo bogisiwa ke ba ga lona, fela jaaka ba ne ba bogisiwa ke ba ga bone ebong Bajuta. **15** Erile ba sena go bolaya baporofiti ba bone, ba ne ba bolaya le ene Morena Jesu; mme jaanong ba re bogisitse setlhogo thata ba bo ba re leleka. Ba kgatthanong le Modimo le bothle **16** ba leka go re kganela gore re seka ra rerela Badichaba. Ba tlhabana ka ntlha ya go boifa gore e ka re kgotsa bangwe ba bolokwa; mme jalo dibe tsa bone di tswelela ka go gola. Mme lwa bofelo bogale jwa Modimo bo tsile mo go bone. **17** Bakaulengwe ba ba rategang, fa re sena go kgaogana le lona lobakanyana ntswa dipelo tsa rona di ise di ke di lo tlogele, re ne ra leka thata go boela kwa go lona go lo bona gape. **18** Re ne re rata go tla, mme nna Paulo, ke lekile gangwe le gape, mme Satane a re kganela. **19** Gonne re tshelale eng, se se re nayang tsholofelo le boitumelo ebile e le tuelo le serwalo se re ikgantshang ka sone? Ke lona! Ee, lo tlaa re leretse boitumelo jo bogolo fa re ema mmogo fa pele ga Morena Jesu Keresete fa a tla gape. **20** Gonne lo kgalalelo ya rona le boitumelo.

3 Lwa bofelo, erile fa ke sa tlhoke ke ka kgona go itshoka, ke ne ka ikaelela go nna nosi mo Athena, **2** Ka roma Timotheo, mokaulengwe wa rona le modiri ka rona, morongwa wa Modimo, go lo letela go nonotsha tumelo ya lona, go lo kgothatse le go lo tshetsa e se re kgotsa lwa nyema moko ka ntlha ya mathata a lo neng lo feta mo go one. (Mme legale lo itse gore matshwenyego a a ntsengjalo ke bontlha-bongwe jwa leano la Modimo mo go rona Bakeresete. **4** Le re santse re na le lona re

ne ra lo thagisa pele ga nako gore pogiso e tlaa tloga e tla, mme e ne ya tla.) 5 Jaaka ke boletse, erile ke retelelwa ke go ithshoka, ka roma Timotheo go tla go bona gore a tumelo ya lona e santse e nonofile. Ke ne ke boifa gore kgotsa Satane o setse a lo raetse le gore tiro ya rona e setse e le lefela. 6 Mme jaanong Timotheo o setse a boile mme o tsile ka dikgang tse di monate tse di reng tumelo ya lona le lorato di santse di nonofile fela jaaka gale, le gore lo gakologelwa loeto lwa rona ka boitumelo le gore lo batla go re bona fela thata jaaka le rona re batla go lo bona. 7 Jalo re gomotsegile thata, bakaulengwe ba ba rategang, mo matshwenyegong othe a a re pitlaganyeditseng le mo pogisegong kwano, mme e re ka re itse gore lo eme ka boammaaruri mo Moreneng, 8 re ka itshokela sengwe le sengwe fela fa re itse gore lo eme ka nonofo mo go ene. 9 Re ka leboga Modimo thata jang kaga lona le kaga boitumelo le lorato lo lo re neileng ka ntsha ya go lo rapelela? 10 Gonne bosigo le motshegare re tswela ka go lo rapelela, re kopa Modimo gore o re kopanye le lona gape, go kaba diphatlha dingwe tse dinnye tse di ka neng di santse di le mo tumeleng ya lona. 11 A Modimo Rara wa rona ka sebele le Morena wa rona Jesu ba re rome gape kwa go lona. 12 Gape a Morena a dire lorato lwa lona gore lo gole lo bo lo penologele mo go mongwe le mongwe, fela jaaka lorato lwa rona lo penologela kwa go lona. 13 Mo go tlaa dira gore dipelo tsa lona di nonotshiwe, di thoke bolelo di bo di itshepisiwe ke Modimo Rara rona, gore lo tle lo eme fa pele ga one mo letsatsing leo lo sena molato fa Morena wa rona Jesu Keresete a bowa le botlhe bao ba e leng ba gagwe.

4 Mmang ke oketse ka se, bakaulengwe ba ba rategang: Lo setse lo itse go itumedisa Modimo mo botshelong jwa lona jwa malatsi othe, gonne lo itse melao e re e lo neetseng e tswa kwa go Morena Jesu ka sebele. Jaanong re a lo kopa, ee, re batla se mo go lona ka leina la Morena Jesu, gore lo tshela lo le gautshwane le one mogopolo oo. 3 Gonne Modimo o batla gore lo nne boitshepo le bophepa, le go ikgaptha mo sebeng sa boaka gore mongwe le mongwe wa lona a tle a nyale ka boitshepo le ka tlotlo, 5 e seng mo dikeletsong tsa nama jaaka baheitane ba dira, mo bosenakitsong jwa bone ka Modimo le ditsela tsa one. 6 Mme gape le mo ke go rata ga Modimo: gore o seka wa tsietsa mo selong se, ka go tsaya mosadi wa monna yo mongwe, gonne Morena o tlaa go otlhela go dira jalo ka kwatlhao e e bothoko, jaaka re lo boleletse pele ka tlhwaafalo. 7 Gonne Modimo go o a re biletsa go nna le megopolo e e maswe le go tlaa dikeletso tsa nama, mme o re bileditse go nna boitshepo le bophepa. 8 Fa mongwe a gana go tshela ka fa ditaolong tse, ga se gore o gana ditaolo tsa batho mme o gana tsa Modimo o o lo nayang Mowa O O Boitshepo. 9 Mme kaga lorato lwa sekaulengwe lo lo itse-kileng lo lo tshwanetseng go nna mo bathong ba Modimo, ga ke thoke go bua thata, ke a tlhomamisa! Gonne Modimo ka bo One o lo ruta go ratana. 10 Ke a tlhomamisa, fa lorato lwa lona lo setse lo nonofile go tswela kwa bakaulengwe botlhe ba Bakeresete mo chabeng yothle ya ga lona. Le fa go ntse jalo, ditsala tse di rategang, re lo kopa go ba rata segolo bogolo. 11 Se e tshwanetseng go nna

ketsetso ya lona ke se: go tshela botshelo jo bo ritibetseng, lo beile mogopolo mo go se se amang matshelo a lona lo dira tiro e e leng ya lona ka sebele, jaaka re lo boleletse pele. 12 Ka go dira jalo batho ba e seng Bakeresete ba tlaa lo ikanya ba bo ba lo tlotla, mme ga lo kitla lo tlhokana le go baya mo go ope gore a lo fe madi a a lekanyeng go duela melato ya lona. 13 Mme jaanong, bakaulengwe ba ba rategang, ke batla gore lo itse se se diragalang mo Mokereseteng fa aa swa gore e tle e re fa loso lo tla, lo seka lwa utlwa bothoko thata, jaaka ba ba se nang tsholofelo. 14 Gonne e re ka re dumela gore Jesu o ne a swa a bo a tsoga mo losong gape, re ka dumela gape gore fa Jesu a bowa gape, Modimo o tlaa mmusa le Bakeresete botlhe ba ba suleng. 15 Ke ka lo bolelela se, se tswa kwa Moreneng ka sebele: Gore rona ba re santseng re tshela, fa Morena a boa ga re kitla re thathoga go ya go mo kgaathantsha pele ga ba ba mo mabitleng a bone. 16 Gonne Morena ka sebele o tlaa fologa kwa legodimong ka loshalaba lo logolo le go gowa ga moengele mo go amang mowa le go galaotega ga torompeta ya Modimo. Mme Bakeresete ba ba suleng ba tlaa nna ba ntsha go thathoga ba ya go kgaathantsha Morena. 17 Mme rona ba re santseng re tshela re tlogetswe mo lefatsheng re tlaa tsholelediwa mmogo nabo mo marung go kgaathantsha Morena mo loaping le go nna nae ka bosenabokhutlo. 18 Ke gone gomotsanang lo kgothatsane ka mafoko a.

5 Mo gotlhe go tlaa diragala leng? Tota ga ke thoke go bua sepe kaga gone, bakaulengwe ba ba rategang, 2 gonne lo itse sentle gore ga go na ope yo o itseng. Letsatsi leo la Morena le tlaa tla go lebetswe jaaka legodu mo bosigong. 3 E tlaa re fa batho ba re, "Gotlhe go siame, sengwe le sengwe se ritibetse ebile go na le kagiso", jalo ka tshoganetso tshenyego e kgole e tlaa ba wela ka bofelo jaaka diithabi tsa pelegi tsa mosadi di simolola fa ngwana wa gagwe a tsholwa. Mme batho ba, ga ba kitla ba falola ka gope, ga go kitla go nna le lefelo la go iphitlha. 4 Mme bakaulengwe ba ba rategang, ga lo mo leffing ka diilo tse, ebile ga lo na go hakgamala jaaka legodu fa letsatsi leo la Morena le tla. 5 Gonne lotlhe lo bana ba lesedi le ba motshegare, mme ga lo ba leffii le ba bosigo. 6 Jalo tlhokomeleng, lo se robale jaaka ba bangwe. Lebelelang go bowa ga gagwe lo bo lo nne boitekanelo. 7 Bosigo ke nako ya go robala le nako e batho ba tagwang ka yone. 8 Mme a rona ba re nnang mo leseding re nne boitekanelo re sireleditswe ke thebe ya tumelo le lorato, mme re apare tsholofelo ya boitumelo ya poloko jaaka thoro ya itshireletso. 9 Gonne Modimo ga o a re tlhophela go tshololela bogale jwa One mo go rona, fa e se go re boloka ka Morena wa rona Jesu Keresete. 10 O re swetse gore re tle re nne nae ka malatsi othe, re sule le re tshela ka nako ya fa a bowa. 11 Ke gone kgothatsanang lo agane, fela jaaka lo setse lo dira. 12 Bakaulengwe ba ba rategang, tlotlang bagolwane ba phuthego ya lona ba ba dirang ka natla mo go lona ebile ba lo thagisa mo go tsothe tse di sa siamang. 13 Ba tlotleng thata lo bo lo ba neye lorato ka pelo yothle gonne ba leka thata go lo thusa. Mme gakologelwang se, go seka ga nna komano mo go lona. 14 Bakaulengwe ba ba rategang, tlhagisang ba ba ditshwakga; gomotsang ba ba tshogileng; pepetletsang ba ba bokoa; lo bo lo nne pelotelele

mo go mongwe le mongwe. 15 Lo bone gore ope a seka a busolosa bosula ka bosula, mme ka malatsi otlhe lo leke go diralana molemo. 16 Itumeleng ka metlha yotlhe. 17 Nnang lo rapele ka malatsi otlhe. 18 Lebogang ka malatsi otlhe go sa re sepe gore go diragala eng, gonne mo ke go rata ga Modimo mo go lona ba lo leng ba ga Keresete Jesu. 19 Se hupetseng Mowa O O Boitshupo. 20 Se tshengeng ka tshotlo ba ba porofitang, 21 mme sekasekang sengwe le sengwe se se buiwang gore lo tlhomamise gore se boammaaruri, mme fa se le boammaaruri, se amogeleng. 22 lthibeng mo mofuteng mongwe le mongwe wa bosula. 23 A Modimo wa kagiso ka sebele o lo ntlafatse gothelele; gape a mowa wa lona le pelo ya lona le mebele ya lona e nne e nonofile e sena molato go fithelela letsatsi leo le Morena wa rona Jesu Keresete a tlaa tlang ka lone gape. 24 Modimo o o go bileditseng go nna ngwana wa One, o tlaa go direla mo gotlhe, fela jaaka o solofeditse. 25 Bakaulengwe ba ba rategang, re rapeleleng. 26 Ntumedisetsang bakaulengwe botlhe koo ka seatla. 27 Ke lo laola mo leineng la Morena go balela Bakeresete botlhe lokwalo lo. 28 Mme a masego a a itekanetseng a a tswang kwa go Morena wa rona Jesu Keresete a nne le lona lotlhe. Ke nna wa lona ruri, Paulo.

Bathesalonia II

1 Lokwalo lo lo tswa kwa go: Paulo, Silase le Timotheo. Lo ya kwa: Phuthegong ya Thesalonia, e e babalesegileng mo Modimong Rraa rona le mo go Morena Jesu Keresete. **2** A Modimo Rraa le Morena Jesu Keresete ba lo neye masego a a itekanetseng le dipelo tse di tletseng kagiso le ditlhaloganyo. **3** Bakaulengwe ba ba rategang, go leboga Modimo kaga lona ke selo fela se se siameng go dirwa, mme ke tiro ya rona mo Modimong, ka ntlha ya tsela ya boammaaruri e ntle ya ka fa tumelo ya lona e godileng ka teng, le ka ntlha ya go gola ga go ratana ga lona. **4** Re itumelela go bolelela diputhego tse dingwe kaga bopelotelele jwa lona le tumelo ya lona e e tletseng mo Modimong, mo godimo ga matshwenyego le mathata a lo a raletseng. **5** Ke sone sesupo se fela sa tsela e e sa patikeng e e siameng e Modimo o dirang dilo ka yone, gonne o dirisa dipogiso tsa lona go lo baakanyetsa bogosi jwa One, **6** fa gape a baakanyetsa ba ba lo utlwisang bothoko katlholo le kwathao. **7** Ke gone ke rayang lona ba lo bogang ke re, Modimo o tlaa lo naya boikhutso mmogo le rona fa Morena Jesu a bonala ka tshoganetso a tswa kwa legodimong a le mo kgabong e e tukang ya molelo le baengele ba gagwe, **8** a lere katlholo mo go ba ba sa batleng go itse Modimo, le ba ba ganang go amogela leano la one go ba boloka ka Morena wa rona Jesu Keresete. **9** Ba tlaa othaiwa mo moleting wa bosakhu-tleng, ba kgaoganyeditswe ruri le sefathogo sa Morena, ba se kitla ba bona kgalalelo ya nonofo ya gagwe, (aiōnios g166) **10** fa a tla go amogela kgalalelo le tlotlo ka ntlha ya gotlhe mo a go diretseng batho ba gagwe, ebong baitshepi ba gagwe. Mme lo tlaa nna mo gare ga ba ba mmakang, gonne lo dumetse Lefoko la Modimo le re le lo neetseng. **11** Mme jalo re tswetsetse ka go lo rapelela gore Modimo wa rona o lo dire mofuta wa bana ba o batlang go nna nabo, o lo dire tshiamo fela ka fa lo eletsang go nna ka teng, o duela tumelo ya lona ka nonofo ya One. **12** Mme mongwe le mongwe o tlaa galaletsa leina la Morena Jesu Keresete ka ntlha ya maungo a ba a bonang mo go lona; mme kgalalelo ya lona e kgolo e tlaa bo e le gore lo ba gagwe. Kutlwelo bothoko ya Modimo wa rona le ya Morena Jesu e dirile gore mo gotlhe go kgonege mo go lona.

2 Mme jaanong, ga tweng kaga go tla ga Morena wa rona Jesu Keresete gape, le go phuthega ga rona go mo kgalantshatsha? Tswee-tswee se tshikinnngweng megopolo fela e le go fuduiwa, bakaulengwe ba ba rategang, ke puo e e reng letsatsi le la Morena le setse le bile le simologile. Fa lo utlwalela batho ba ba bonang diponatshegelo le melaetsa ya bothokwa e e tswang kwa Modimong kaga sone se, kgotsa dikwalo tse di kaiwang di tswa kwano go nna, se ba dumeleng. **3** Se gapegeng, se tsietsegeng le fa ba reng. Gonne letsatsi leo ga le kitla le tla fa e se dilo tse pedi di diragala: Sa ntlha go tlaa nna nako ya go tsuolola Modimo mo go golo, mme motsuolodi o tlaa tla, ebong morwa molete. **4** O tlaa nyatsa modimo mongwe le mongwe o o teng, o tlaa gagolaka sengwe le sengwe sa tlotlo le kobamelo. O tlaa tsena mo tempeleng ya Modimo a nna fa fatshe jaaka Modimo, a re ene ka sebele ke Modimo. **5** A ga lo gakologelwe

gore ke lo boleletse se mo nakong e ke neng ke na le lona ka yone? **6** Mme lo itse gore o kganetswe ke eng gore a bo a ise a tle; gonne o ka tla fela fa nako ya gagwe e setse e siame. **7** Tiro e monna yo wa tsogologelo le molete o tlaa e dirang, e setse e tswelala pele, mme ene ka sebele ga a na go tla go fitlhelela yo o mo kgane-tseng a mo sutela mo tseleng. **8** Jalo yo o bosula yo, o tlaa bonala yo Morena Jesu a tlaa mo tshubang ka mowa wa molomo wa gagwe a bo a mo nyeletsa fa pele ga gagwe fa a boa. **9** Monna yo wa bolelo, o tlaa tla e le sedirisiwa sa ga Satane, a tletse nonofo ya ga Satane, mme o tlaa tsietsa mongwe le mongwe ka ditshupo tse di sa tlwaelesengang, mme o tlaa dira dikgakgamatso tse dikgolo. **10** O tlaa tsietsa gothelele ba ba mo tseleng ya bone go ya moleting gonne ba ganne Boammaaruri, ba ganne go bo dumela le go bo rata, le go bo letla go ba boloka, **11** mme ka ntlha ya moo, Modimo o tlaa ba letla go dumela maaka ka dipelo tsa bone tsothe, **12** mme botlhe ba tlaa atholwa fela ka ntlha ya go dumela maaka, go gana Boammaaruri, le go natefelelwa ke dibe tsa bone. **13** Mme re tshwanetse ka metlha yotlhe go leboga Modimo kaga lona, bakaulengwe ba rona ba ba ratwang ke Morena, gonne Modimo o sale o tlhophla kwa tshimologong go lo naya poloko, go lo ntlafatsa ka tiro ya Mowa O O Boitshepo le ka go ikanya Boammaaruri ga lona. **14** Ka rona o lo boleletse Mafoko a a Molemo. Gape o lo bileditse go nna le seabe mo kgalalolong ya Morena wa rona Jesu Keresete ka rona. **15** Ka dilo tse tsothe di le mo mogopolong, bakaulengwe ba ba rategang, emang lo nitame lo bo lo ngaparele thata boammaaruri jo re lo bo rutileng mo dikwalong tsa rona le ka nako e re neng re na le lona ka yone. **16** A Morena wa rona Jesu Keresete ka sebele le Modimo Rraa rona, o o re ratileng wa bo wa re neela kgomotsa ya bosakhutleng le tsholofelo e e sa re tshwanelang, (aiōnios g166) **17** a gomotse dipelo tsa lona ka kgomotsa yotlhe, a lo thuse mo go sengwe le sengwe se lo se buang le se lo se dirang.

3 Sa bofelo, bakaulengwe ba ba rategang, jaaka ke tla mo pheletsong ya lokwalo lo, ke lo kopa go re rapelela. Rapelelang pele gore molaetsa wa Morena o aname ka bofelo o bo o fenyeng gongwe le gongwe kwa o anamelang teng, o gape basokologi gongwe le gongwe jaaka o ne wa dira fa o tla kwa go lona. **2** Rapelelang gape gore re gololwe mo diphapaanong tsa batho ba ba bosula, gonne ga se mongwe le mongwe yo o ratang Morena. **3** Mme Morena o a ikanyega; o tlaa lo nonotsha ebile o tlaa lo dibela mo dithaselong tsa mefuta le fa e ka nna efe ya ga Satane. **4** Mme re ikanya Morena ka gore lo ntse lo dira dilo tse re di lo rutileng, le gore lo tlaa aga lo di dira. **5** A Morena a lo gogele mo go thaloganyeng masaitsiweng a lorato lwa Modimo le kaga bopelotelele jo bo tswang kwa go Keresete. **6** Jaanong taolo ke e, bakaulengwe ba ba rategang, e ke lo e nayang mo leineng la Morena wa rona Jesu Keresete ka taolo ya gagwe: Ikgogeng mo Mokereseteng mongwe le mongwe yo o senyang nako ya gagwe mo botshwakgeng gape a sa latela mogopolo o re lo o neetseng wa go dira ka bonatla. **7** Gonne lo itse sentle gore lo tshwanetse go re etsa: ga lo ise lo ke lo bone re senya nako re sa dire sepe; **8** ga re ise re ke re dumele go tsaya dijo mo go ope re sa di reke; re ne

ra dira bosigo le motshegare ka natla yotlhe go nna le madi a re neng re a tlhoka go tshela ka one, gore re seka ra nna mokgweleo mo go ope wa lona. **9** E ne e se gore re ne re sena tshwanelo ya go lo kopa gore lo re otle, mme re ne re batla go lo supegetsa, lwa ntlha ka fa lo tshwanetseng go fufulela botshelojwa lona ka teng. **10** Le re santse re le koo re na le lona re lo neetse taolo e: "Yo o ganang go dira a se ka a ja." **11** Le fa go ntse jalo re utlwa gotwe bangwe ba lona ba tshelela mo botshwakgeng, ba gana go dira, ebile ba senya nako ya bone mo ditshebong. **12** Mo leineng la Morena Jesu Keresete re kopa batho ba ba ntseng jalo ra re ba didimale, ba tsene mo tirong, mme ba berekele matshelo a e leng a bone. **13** Mme mo go lona ka re bakaulengwe ba ba rategang, lo seka lwa bo lwa lapisega go dira bomolemo. **14** Fa mongwe a gana go ikobela se re se buang mo lokwalong lo, bonang gore ke mang mme lo ikgoge mo go ene, gore a tle a itlhabelwe ke ditlhong. **15** Se mo tseyeng e le mmaba, mme buisanyang nae jaaka lo ka buisanya le mokaulengwe yo o tlhokang go tlhagisiwa. **16** A Morena wa kagiso ka sebele a lo neye kagiso ya gagwe, go sa re sepe gore go diragala eng. Morena a nne le lona lotlhe. **17** Jaanong tumediso ya me ke e, e ke e kwalang ka seatla sa me, jaaka ke tluaetse go dira kwa bofelong jwa dikwalo tsa me tsotlhe, go nna bosupi jwa gore lo tswa kwa go nna tota. Se ke mokwalo wa me tota wa seatla. **18** A tshagofatso ya Morena wa rona Jesu Keresete e nne le lona lotlhe. Ke nna wa lona ruri, Paulo.

Timotheo I

1 Lokwalo lo lo tswang kwa go Paulo, morongwa wa ga Jesu Keresete, yo o rometsweng ke Mmoloki wa rona le Jesu Keresete Morena wa rona, yo e leng ene fela tsholofelo ya rona. **2** Lo ya kwa go! Timotheo. Timotheo o ntse jaaka morwaake mo dilong tsa Modimo. A Modimo Rraa rona le Jesu Keresete Morena wa rona a go bontshe tshiamo ya gagwe le kutlwebotlhoko mme a go neye kagiso e kgolo ya pelo le mogopolo. **3** Jaaka ke buile fa ke ya Masedonia, tswee-tswee nna koo mo Efeso o leke go kganela batho ba ba rutang thuto e e sa siamang. Khutlisa ditlhamane tsa bone, le dinaane tsa bone le mogopolo wa bone wa go bolokwa ka go bona kutlwele botlhoko ka tlhatlogano ya baengele go fitlha kwa Modimong, megopolo ya sephologolo e e tsosang dipotso le dikganetsanyo boemong jwa go thusa batho go amogela leano la Modimo la tumelo. **5** Se ke se tlhwaafaletseng ke gore Bakeresete bothe koo ba tlale lorato lo lo tswang mo dipelong tse di itshekileng, le gore megopolo ya bone e nne phepa le tumelo ya bone e nonofe. **6** Mme baruti ba, ba tlhokomologile mogopolo o otlhe, ba bo ba senya nako ya bone mo dikganetsanyong le go bua ka boeleele. **7** Ba batla go nna baruti ba melao ya ga Moshe ntswa ba sena mogopolo o o tlhomameng wa gore melao eo tota e re supegetseng eng. **8** Melao eo e siame fa e dirisiwa jaaka Modimo o ratile. **9** Mme ga e a direlwa rona, ba Modimo o re bolokileng; ke ya baleofi ba ba ilang Modimo, ba ba dipelo di tsuololang, ba ba hutsang ba tlhapatsa, ba tlhasela borraabo le bommaabo ba bo ba bolaya batho. **10** Ee, melao e e diretswe go supa baleofi bothe ba ba makgapha le ba ba itshekologileng! Ba ba robalanang le banna ba bangwe, bautswi ba batho, baaki le botlhe ba ba dirang dilo tse di kgatthanong le Mafoko a a Molemo a a galalelang a Modimo wa rona, o ke leng morongwa wa One. **12** Ke leboga Morena wa rona Keresete jang ka go nthopha mongwe wa barongwa ba gagwe, le go nnaya thata ya go nna boikanyo mo go ene, **13** le fa ke ne ke tie ke tlhapatse leina la ga Keresete. Ke ne ke tsoma batho ba gagwe, ke ba utlwise bothoko ka tsela nngwe le nngwe e ke neng ke ka e kgona. Mme Modimo wa nkutlwela bothoko gonne ke ne ke sa itse se ke neng ke se dira, gonne ke ne ke sa itse Keresete ka nako eo. **14** Oo! Morena wa rona o ne a le pelotlhomogi go le kae, gonne o ntshupegeditse gore ke ka mo ikanya jang le go nna lorato lo lo tletseng lwa ga Jesu Keresete. **15** Kana go boammaaruri jang, ebile ke tlhwaafalela jang gore mongwe le mongwe a bo a itse, gore Jesu Keresete o tletse mo lefatsheng go boloka baleofi, mme ke ne ke le mogolo mo go bone botlhe. **16** Mme Modimo o nkutlwetse bothoko gore Jesu Keresete a ntirise jaaka sekao go supegetseng mongwe le mongwe gore o pelotelele go le kae le e leng mo baleofing ba bagolo, gore ba bangwe ba tie ba lemoge gore, le bone, ba ka nna le botshelo jo bo sa khutleng. (aiōnios g166) **17** A kgalalelo le titlo di nne go Modimo ka metha le metha. Ke kgosi ya dingwagangwaga, e e sa bonweng, e e sa sweng; ene ka esi ke Modimo, ebile o tletse bothale Amen. (aiōn g165) **18** Jaanong Timotheo, morwaaka, se ke taolo ya me mo go wena: tlhabana sentle mo dintweng

tsa Morena, fela jaaka Morena a re boletsetse ka baporofiti ba gagwe gore o tlaa dira. **19** Ngaparella tumelo ya gago thata mo go Keresete mme ka nako tsotlhe a segakolodi sa gago se nne se le phepa, o dira se o itseng gore se siame. Gonne batho ba bangwe ba tlhokile kutlo mo digakoloding tsa bone, mme ba dira ka bomo tse ba itsileng gore ga di a siama. Ga go hakgamatse gore erile ka bofefo ba lathegelwa ke tumelo ya bone mo go Keresete ba sena go nyatsa Modimo jalo. **20** Humaio le Alekesenda ke dikai tse pedi tsa sone se, ke ne ka ba neela Satane go ba othaya go fitlhelela ba ithuta go sa tlhabiseng leina la ga Keresete ditlhong.

2 Mme dikgakololo tsa me ke tse: Rapele lang ba bangwe thata; ba kopeleng kutlwelo bothoko ya Modimo; lebogelang tsotlhe tse o tlaa di ba direlang. **2** Ka yone tsela e, rapelelang dikgosi le botlhe ba ba nang le taolo mo go rona kgotsa ba maemo a a kwa godimo, gore re tie re tshela ka kagiso le kutlwano, re dirisa nako ya rona mo botsheleng jwa Semodimo mme re akanya go le gontsi ka Morena. **3** Se, se molemo ebile se itumedisa Modimo Mmoloki wa rona, **4** gonne o eleletsa botlhe go bolokwa le go tlhaloganya boammaaruri jo: **5** gore Modimo o mo ntlheng e nngwe le batho botlhe ba ka fa ntlheng e nngwe, mme Jesu Keresete, yo e leng motho ka sebele, o mo gare ga bone go ba kopanya, **6** ka go naya batho botlhe botshelo jwa gagwe. Se ke molaetsa o Modimo o o neetseng lefatsho ka nako e e tshwanetseng. **7** Mme ke tlhophilwe jaaka moruti le morongwa wa Modimo, se ke boammaaruri, gore ke rute Badichaba boammaaruri jo, le go ba supegetseng leano la poloko la Modimo ka tumelo. **8** Jalo ke batla banna ngongwe le gongwe go rapela ka mabogo a a itshekileng a tsholeleditswe kwa Modimong, ba golotswe mo sebeng le mo bogaleng le mo kgannyeng. **9** Mme le basadi fela jalo, ba didimetse, ba le bothale ka go itshwara sentle le ka go apara. Bakeresete ba basadi ba tshwanetse go bonwa ka tshiamo le molemo, e seng ka mokgwa o ba iphorang moriri ka one kgotsa ka nthla ya dibaga tsa bone kgotsa diaparo tse di tlhathlwa kgolo. **11** Basadi ba tshwanetse go reetsa mme ba ithuta ka tidimalo le ka boikokobetso. **12** Ga ke ise ke ko ke letle basadi go ruta banna kgotsa go ba laola. A ba didimale mo dikopanong tsa diphuthego tsa lona. **13** Ka nthla ya eng? Ka nthla ya gore Modimo o dirile Adamo pele, mme morago wa dira Efa. **14** Mme ga se Adamo yo o neng a tsiediwa ke Satane, fa e se Efa, mme phelelo ya nna bolele. **15** Jalo Modimo wa romela kutlwebotlhoko le pogiso mo basading fa bana ba bone ba tsholwa, mme o tlaa boloka mewa ya bone fa ba mo ikanya, ba tshela ba didimetse, ba siame, ba na le matshelo a a itumedisang.

3 Mme ke boammaaruri gore fa motho a batla go nna modisa wa phuthego, o eletsa tiro e e molemo. **2** Gonne modisa wa phuthego (moruti) o tshwanetse ya bo e le motho yo botshelo jwa gagwe bo sa belatsetse. O tshwanetse go nna le mosadi a le mongwe fela, e le modiri yo o tlhaga, yo o dirisang tlhologanyo yo o matsetseleko a bile a le ditiro di ntle. O tshwanetse go itumelela go amogela baeng mo lapeng la gagwe a bile a kgona go ruta Lefoko la Modimo sentle. **3** Ga aa tshwanela go bo a le letagwa kgotsa moomani, mme o tshwanetse go nna bonolo le

bopelonomi, a sa rate madi. **4** Ba ntl o ya gagwe ba tshwanetse go nna le maitseo, e le bana ba ba utlwang ka bonako le ka tshisimogo. **5** Gonne fa monna a sa ka ke a aga maitseo a ba ntl o ya gagwe, o ka thusa phuthego yotlhe jang? **6** Moruti ga a a tshwanela go bo e le Mokeresete yo mosh a mo tumelong, gonne o ka tloga a ikgantsha ka go tlhophiwa ka bonako, mme maikgantsho a tla pele ga go wa. (Go wa ga ga Satane ke sekai). **7** Gape, o tshwanetse go kaiwa ka tshiamo ke batho ba ba kwa ntle ga phuthego, ba e seng Bakeresete, e se re kgotsa Satane a mo digela mo serung ka go mmaya melato e mentsi, mme a mo tlogele a sa gololesega go etelela phuthego ya gagwe pele. **8** Batiakoni le bone ba tshwanetse go nna le tshiamo e e ntseng fela jalo, e le banna ba ba iketileng jaaka baruti. Ga ba a tshwanela go bo e le matagwa le digagapa mo mading. **9** Ba tshwanetse go nna tlhwaafalo, balatedi ba ba pelo dingwe fela ba ga Keresete, yo e leng motswedi o o fithegileng wa tumelo ya bone. **10** Pele ga ba kopiwa go nna Batiakoni, ba tshwanetse go newa diitiro dingwe mo phuthegong e le go bona maitsholo (maitseo) a bone le nonofo, mme fa ba dira sentle, ke gone ba ka tlhophiwang go nna Batiakoni. **11** Basadi ba bone ba tshwanetse go nna masisi, e se matagwa, e se basebi, mme ba ikanyega mo dilong tsothe tse ba di dirang. **12** Motiakoni mongwe le mongwe o tshwanetse go nna le mosadi a le mongwe ebile o tshwanetse go nna le lolwapa lo lo itumedisang lo lo nang le kutlo. **13** Batiakoni ba ba dirang sentle ba tlaa duelwa ka tlotlo ke ba bangwe le go godisa boikanyo le bopelokgale jwa bone mo go ikanyeng Morena. **14** Ke lo kwalela dilo tse jaanong, le fa ke solofela go nna le lona ka bonako, **15** gore e re fa ke sa tle ka lobakanyana lo itse mofuta wa batho ba lo tshwanetseng go ba tlhoph a go nna badiredi ba phuthego ya Modimo o o tshelang, e e nang le boammaaruri jo bo tletseng jwa Modimo. **16** Go boammaaruri tota gore go tshelela Modimo ga go motlhofo. Mme karabo e mo go Keresete, yo o tsileng mo lefatsheng a le mo setshwanong sa motho, yo o supetileng a sena selabe a bile a itshekile mo Moweng wa gagwe, yo o diretswe ng ke baengele, a rerwa mo dichabeng, a amogelwa ke batho gongwe le gongwe mme a amogelwa gape mo kgalalelong ya gagwe kwa legodimong.

4 Mme Mowa O O Boitshupo o re bolelela sentle gore mo methheng ya bofelo bangwe mo phuthegong ba tlaa fularela Keresete mme ba nne balatedi ba baruti ba ba tlhothleditsweng megopolo e e bosula ke Satane. **2** Baruti ba ba tlaa bolela maaka ka difathogo tse di gagametseng ba bo ba go dira gantsi thata mo e leng gore digakolodi tsa bone ga di kitla di ba kgorelets a ka gope. **3** Ba tlaa re go nyal a ga go a siama le go ja nama, le fa Modimo o neetse Bakeresete ba ba rutilweng sentle dilo tse go di itumelela le go di lebogela, **4** gonne sengwe le sengwe se Modimo o se dirileng se siame, mme re ka se ja ka boitumelo fa re se itumelela, **5** le fa re kopa Modimo go se segofatsa, gonne se siamisiwa ke Lefoko la Modimo le thapelo. **6** Fa o tlhalosetsa ba bangwe selo se, o tlaa bo o dira tiro ya gago jaaka moruti yo o itekanetseng yo o otlilweng ka tumelo le ka thuto ya boammaaruri e o e setseng morago. **7** Se senye nako mo dikganetsanyong tsa megopolo ya bomatla

le dinaane tsa boeleele le ditlhamane. Dirisa nako ya gago le nonofo mo go itlwaetseng go nna o nitame mo moweng. **8** Katiso ya mmele e siame, mme katiso ya semowa e bothokwa thata ebile ke molemo mo go tsothe tse o di dirang. Jalo ikatise mo moweng o itlwaetse go nna Mokeresete yo o siameng, ka gore mo go tlaa go thusa e seng fela mo botshelong jono, mme le e leng le mo go jo bo tlang. **9** Se ke boammaaruri mme mongwe le mongwe o tshwanetse go bo amogela. Re dira thata re bile re boga thata gore batho ba tle ba bo dumele, gonne tsholofelo ya rona e mo Modimong o o tshelang o o re swetseng rotlhe, bogolo jang ba ba amogetseng poloko ya One. **11** Ruta dilo tse, o bo o tlhomamise gore mongwe le mongwe o di ithuta sentle. **12** Se letle gore ope a go nyatse ka go bo o le mmo tlana. Nna sekao sa bone, dira gore ba latele ka fa o ba rutang ka teng le ka fa o tshelang ka teng; nna sekao mo go bone ka lorato lwa gago; tumelo ya gago, le ka megopolo e e phepa. **13** Go fithelela ke tsena koo, bala o bo o tlhalosetse phuthego Dikwalo; rera Lefoko la Modimo. **14** Tlhomamisa go dirisa dinonofo tse Modimo o di go neileng ka baporofiti ba One fa bagolwane ba phuthego ba go baya diatla. **15** Dirisa dinonofo tse; dira tiro yotlhe ya gago ka botlalo gore batho botlhe ba tle ba lemoge tlhabologo ya gago le tswelelopele. **16** Lebelela ka kelothoko mo go tsothe tse o di dirang le tse o di akanyang. Nna boammaaruri mo go se se siameng mme Modimo o tlaa go segofatsa o bo o go dirisa go thusa ba bangwe.

5 O se ka wa gakalela motho yo o godileng, mme o mo kope ka maitseo fela jaaka fa e ka bo e le rrago. Buisa makau fela jaaka bo mogoloo ba o ba ratang thata. **2** O tseye basadi ba ba godileng jaaka bommago, le basetsana jaaka bokgaityadiyo, o akanye megopolo e e itshekieng fela ka bone. **3** Phuthego e tshwanetse go tlhokomela ka lorato basadi ba batlholagadi fa ba sena ope yo o ka ba thusang. **4** Mme fa ba na le bana kgotsa ditlogolwana, ba ke bone ba ba tshwanetseng go ba tlhokomela, gonne tshiamo e tshwanetse go simologa kwa lwapeng, go thusa batsadi ba ba tlhokang. Se ke selo se se itumedisang Modimo thata. **5** Phuthego e tshwanetse go tlhokomela batlholagadi ba ba humanegileng ba bile ba le bos i mo lefatsheng, fa ba lebeletse thuso mo Modimong, ba bile ba senya nako e ntsi mo thapelong; **6** mme e seng fa ba senya nako ya bone mo ditshe bong, ba batla dikgathego tsa senama, ba onatsa mewa ya bone. **7** Se e tshwanetse go nna molao wa phuthego ya gago gore Bakeresete ba tle ba itse ba bo ba dire se se molemo. **8** Mme mongwe le mongwe yo o se kitlang a tlhokomela ba gagabo fa ba tlhoka thuso, bogolo thata ba ntl o ya gagwe, ga a na tshwanelo ya go ipitsa Mokeresete. Motho yo o ntseng jalo o maswe go feta moheitane. **9** Motlholagadi yo o batlang go nna mongwe wa badiri ba phuthego ba ba faphegileng o tshwanetse bogolo a bo a na le dingwaga di le masome a marataro mme a kile a nyalwa gangwe fela. **10** O tshwanetse go kaiwa ka tshiamo ke mongwe le mongwe ka nth a ya tshiamo e o e dirileng. A o goditsitse bana ba gagwe sentle? A o ne a le tshiamo mo baeting le mo Bakereseteng ba bangwe? A o ipaakanyeditse go sup a tshiamo ya gagwe nako tsothe? **11** Mme batholagadi ba basha ga ba a tshwanela

go nna maloko a sethlopha se se faphegileng se, ka gore, morago ga lobakanyana ba ka tlhokomologa maikano a bone mo go Keresete mme ba nyalwa gape. **12** Mme ba tlaa bonwa molato ka nthla ya go senya maikano a bone a nthla. **13** Gape, ba ka nna ba nna diitshwakga ba senya nako ya bone mo go tsamayeng ba seba mo malwapeng ka go thalalogana, ba tsena mo ditirong tsa batho ba bangwe. **14** Jalo ke bona go le botoka gore bathologadi ba basha ba, ba nyalwe gape ba nne le bana, ba tlhokomele malwapa a bone; mme ga go ope yo o ka ba rayang sepe. **15** Gonne ke boifa gore bangwe ba bone ba setse ba kgelogile mo phuthegong mme ba timeditswe ke Satane. **16** Mmang ke lo gakolele gape gore ba ga gabo mothologadi ba tshwanetse go mo tlhokomela, a se ka a nna morwalo wa phuthego. Mme phuthego e ka dirisa madi a yone go tlhokomela bathologadi ba ba boshi ba ba senang kwa ba yang teng. **17** Baruti ba ba dirang tiro ya bone sentle ba tshwanetse go duelwa sentle ebile ba tshwanetse go itumelwa thata, bogolo thata ba ba dirang thata mo thorong le mo thutong. **18** Gonne Dikwalo tsa re, "O se bofe kgomo molomo fa e photha mabele, e lese e ja fa ents e tsamaya!" Mme mo gongwe tsa re, "Ba ba dirang ba tshwanelwa ke tuelo ya bone!" **19** O se reetse dingongorego kgathlanong le moruti fa e se go na le basupi ba le babedi kgotsa ba le bararo go mo sekisa. **20** Fa tota a leofile, ke gone o tshwanetseng go kgalemelwa fa pele ga phuthego yotlhe gore ope a seka a dira jaaka ene. **21** Ke go laya ka lhoafalo fa pele ga Modimo le Morena Jesu Keresete le baengele ba ba boitshepo gore o dire se le fa moruti e ka bo e le tsala ya gago e e faphegileng kgotsa nnyaa. Botlhe ba tshwanetse go tsholwa ka tekatekanyo. **22** O se ka wa ithaganelela go tlhophla moruti; e ka re kgotsa wa tlofisa dibe tsa gagwe matho mme ga lebege e ka re o a di dumelela. Tlhomamisana gore wena ka bowena o kgaogane le dibe. **23** (Mme mo ga go reye gore o tlogele go nwa mofine gothelele. O tshwanetse go nwa go le gonnye e le molemo wa mala a gago gonne o aga o lwala). **24** Mme gakologelwa gore banna bangwe, le e leng baruti tota, ba tshela botshelo jo bo leswe ebile mongwe le mongwe o itse ka gona. Mo mabakeng a a ntseng jaana o ka dira sengwe ka gone. Mme mo mabakeng a mangwe ke letsatsi la katlhoho fela le le tlaa senoleng boammaaruri jo bo boitshegang. **25** Fela jalo, batho ba itse gore baruti bangwe ba dira bomolemo go le kae, mme nako nngwe ditiro tsa bone tse dintle ga di itsiwe go fitlhelela morago ga lobaka lo lo leele.

6 Bathanka ba e leng Bakeresete ba tshwanetse go direla beng ba bone thata ba bo ba ba tlota; se direng gore gotwe batho ba ga Keresete ke badiri ba ba diitshwakga. Se letleng gore leina la Modimo kgotsa thuto ya One e nyadiwe ka nthla ya se. **2** Fa mong-wa bone e le Mokeresete, moo ga go reye gore ba itepeletse; bogolo ba tshwanetse go dira thata ka gore mokaulengwe mo tumelong o thusiwa ke maiteko a bone. O rute boammaaruri jo, mme o kgothatse botlhe go bo tshetsa. **3** Mme bangwe ba ka gana dilo tse, mme ke dithuto tse di nonofileng tse di tshedileng tsa Morena Jesu Keresete ebile ke motheo wa botshelo jwa Semodimo. **4** Le fa e le mang yo o buang sengwe se sele se se farologanyeng le se, o a ikgantsha ebile o seelelele. O tila se mafoko a ga Keresete a se rayang le

dikganetsanyo tse di felelang mo mafufeng le mo bosilong, tse di isang fela mo go bidiwang ka maina a e seng one, dipateletso le dipelaelo tse di bosula. **5** Baganetsi ba, ba dithaloganyo tsa bone di bo filweng ke sebe, ga ba itse go bolela boammaaruri; mo go bone go bolela Mafoko a a Molemo ke leano la go dira madi fela. Ikgapheng mo go bone. **6** A o batla go huma? O setse o humile fa o itumela ebile o siame. **7** Le gone ebile ga re a ka ra tla le madi fa re tla mo lefatsheng leno gape ga re kake ra tsaya le fa e le ledinyana le le lengwe fa ree swa. **8** Jalo re tshwanetse go itumela fela kwa ntle ga madi fa re na le dijo le diaparo tse di lekanyeng. **9** Mme batho ba ba eletsang go huma ka bonako ba simolola go dira mefuta yotlhe ya dilo tse di sa siamang gore ba bone madi, dilo tse di ba utlwisang bothoko di bile di sulafatsa dithaloganyo tsa bone mme kwa bofelong di ba ise kwa moleting. **10** Gonne go rata madi ke yone kgato ya nthla e e yang kwa mefuteng yotlhe ya boleo. Batho bangwe ebile ba setse ba kgelogile mo Modimong ka nthla ya go a rata, mme ka go dira jalo ba itsentse mo mathateng a mantsi. **11** Oo, Timotheo, o monna wa Modimo. Tshaba dilo tse tsotlhe tse di bosula mme mo boemong jwa mo, o dire se se molemo le se se siameng, o ithuta go mo ikanya le go rata ba bangwe, le go nna pelotelele le tshiamo. **12** Tlhabela Modimo thata. Tshwara thata botshelo jo bo sa khutleng jo Modimo o bo go neileng, jo o bo ipoleletseng ka boipolelo jo bogolo mo ponong ya basupi ba le bantsi. (*aiōnios g166*) **13** Ke go laya fa pele ga Modimo o o nayang botlhe botshelo, le fa pele ga ga Ponto Pilatwe, **14** gore o diragatse tsotlhe tse o di go boleletseng gore o di dire, gore ope a se ka a go bona molato go tloga fano go fitlhelela Morena wa rona Jesu Keresete a boa. **15** Gonne mo lobakeng lo lo tshwanetseng, Keresete o tlaa senolwa mo legodimong ke Modimo Mothatayotlhe, Kgosi ya dikgosi le Morena wa Barena, **16** yo ka esi a se ka keng a swa, yo o nngang mo leseding le legolo le go senang ope yo o ka mo atamelang. Ga go na ope yo o kileng a mmona, kgotsa yo o tlaa mmonang. Mo go ene a go nne tlotlo le nonofo e e sa feleng le puso ka metlha le metlha. Amen. (*aiōnios g166*) **17** Bolelela ba ba humileng gore ba se ka ba ikgantsha le go ikanya madi a bone, a a tlogang a nyelela ka bonako, mme boikgantsho jwa bone le boikanyo bo tshwanetse go nna mo Modimong o o tshelang o o re nayang tsotlhe tse re di tlhokang ka metlha yotlhe go di itumelela. (*aiōn g165*) **18** Ba bolelele gore ba dirise madi a bone go dira tshiamo. Ba tshwanetse go huma mo ditirong tse di molemo mme ba naya ka boitumelo ba ba tlhokang, ba aga ba ipaakanyeditse go abalana le ba bangwe sengwe le sengwe se Modimo o se ba neileng. **19** Ka go dira jalo ba tlaa bo ba ipolokela dikhumo kwa legodimong, ke yone fela polokelo ya bosakhutleng! Mme ba tlaa tshela botshelo jwa Sekeresete jo bo nang le maung mono lefatsheng le kwa legodimong. **20** Oo, Timotheo, o se ka wa tlhoka go dira dilo tse, tse Modimo o di go neetseng. Ikgaphe mo dikganetsanyong tsa boeleele le mo go ba ba ipelafatsang ka "kitso" ya bone mme seo se supa fa ba sena nayo. **21** Bangwe ba batho ba, ba latlhegetswe ke selo sa bothokwa mo botshelong, ga ba itse Modimo. A kutlwelo bothoko ya Modimo e nne mo go wena.

Timotheo II

1 Lokwalo lo lo tswang kwa go: Paulo, mo rongwa wa ga Jesu Keresete, yo o rometsweng ke Modimo go ya go bolelela banna le basadi gongwe le gongwe kaga botshelo jo bo sa khutleng jo o ba bo solofeditse go tumelo mo go Jesu Keresete. **2** Lo ya kwa go: Timotheo, morwaake yo o rategang. A Modimo Rara le Keresete Jesu Morena wa rona o go nosetse bopelonomi jwa one, kutlwelo-botlhoko le kagiso. **3** Ke leboga Modimo jang ka wena, Timotheo. Ke go rapelela malatsi otlhe, le ka nako tsothe mo masigong a maleele ke kopa Modimo wa me go go segofatsa mo go menaganyeng. Ke Modimo wa borre, le wa me, mme maikaelelo a me fela mo botshelong ke go o itumedisa. **4** Ke tlhwaafaleitse thata go go bona gape. Kana ke ka itumela thatajang, gonne ke gakogelwa selemo sa gago fa re kgaogana. **5** Ke itse gore o ikanya Morena go le kae, fela jaaka mmago Yunise le mmago-mogolo Loise ba mo ikanya; ebile ke tlhomamisa gore o santse o mo ikanya thata fela jaaka gale. **6** Ka nthla ya moo, ke batla go go gakolola gore o tlhotlheletse nonofo le bopelokgale jo bo mo teng ga gago, jo bo tsenyeng mo go wena ka nako e ke neng ke go baya diatla ka yone ke go segofatsa. **7** Gonne Mowa O O Boitshepo, neo ya Modimo, ga o rate gore wena o tshabe batho, mme e leng go nna bothale le nonofo, le go ba rata le go itumelela go nna le bone. **8** Fa o ka tlhotlheletsa nonofo e e mo teng ga gago ga o kitla o boifa go bolelela ba bangwe ka Morena, wa rona, Kgotsa go ba itsise gore ke tsala ya gago le fa ke le mo kgolegelong fano ka nthla ya ga Keresete. O tlaa ipaakanyetsa go boga le nna ka nthla ya Morena, gonne o tlaa go nonotsha mo dipogisong. **9** Ke ene yo o re bolokileng le yo o re tlhophetseng tiro ya gagwe e e boitshepo, e seng ka nthla ya gore e re tshwanetse mme e le ka nthla ya gore e ne e le leano la One la bogologolo pele ga lefatshe le simologa, go supa lorato lwa One mo go rona le bopelothomogi ka Jesu Keresete. (aiōnios g166) **10** Mme jaanong o dirile mo gothe gore go bonale mo go rona sentle ka go tla ga Mmoloki wa rona Jesu Keresete, yo o robileng nonofo ya loso a bo a re bontsha tsela ya botshelo jo bo safeleng ka go mo ikanya. **11** Mme Modimo o nthlophile go nna morongwa wa one, go rerela Badichaba le go ba ruta. **12** Ke ka moo ke bogang fano mo kgolegelong ebile ga go nthlhabise diithong, gonne ke itse yo ke mo ikanyang, ebile ke tlhomamisa gore o nonofile go tlhokomela tsothe tse ke di mo neileng go fithelela letsatsi la go bowa ga gagwe. **13** Tshagetisa thata sekao sa boammaaruri jo ke go bo rutileng, segolo thata jang tumelo le lorato lo Keresete Jesu a lo go neileng. **14** Tlhokomela thata, nonofo e o e amogetseng mo Modimong e le mpho e e tswang mo Moweng o o Boitshepo o o nnang mo teng ga gago. **15** Jaaka o itse, Bakeresete botlhe ba ba tsileng mono ba tswa kwa Asia ba mpatlalaleitse; le e leng Fugalo le Hegemogenese tota ba tsamaile. **16** A Morena a segofatse Onisiforo le botlhe ba ntlo ya gagwe, ka gore o ne a nketela a bo a nkgothatsa gantsi. Go nketela ga gagwe go ne ga ntsoseletsa jaaka mowa wa phefo e e monate, ebile go nna ga me mo kgolegelong ga go ise go mo thlhabise diithong. **17** Le gone erile a tla mo Roma o mpatlile

gongwe le gongwe, a leka go bona kwa ke teng, mme la bofelo a mpona. **18** A Modimo o mo nee lesego le le faphegileng mothang Keresete a bowang. Ebile o itse botoka go na le jaaka ke ka go bolelela ka fa o nthuisitseng ka teng kwa Efeso.

2 Oo, Timotheo, morwaaka, tia mo nonofong e Keresete Jesu o go e neileng. **2** Gonno o tshwanetse go ruta ba bangwe dilo tse wena le ba bangwe lo nkutwileng ke bua ka tsone. Ruta batho ba ba ikanyegang boammaaruri jo bogolo jo le bone ba tlaa bo rutang ba bangwe. **3** Tsaya seabe sa gago sa go boga jaaka lesole le le siameng la ga Jesu Keresete, fela jaaka ke dira, **4** mme jaaka lesole la ga Keresete o se ka wa tlhakatlhakanya le dilo tsa selefatshe, gonno ga o kake wa itumedisa ene yo o go kwadileng mo mophatong wa bathabani ba gagwe. **5** Latela melao ya Morena go dira tiro ya gagwe, felajaaka mosiani a ka latela melao kgotsa a bonwa molato mme a thoke go gapa sekege. **6** Dirat thata, jaaka molemi yo o duelwang sentle ka go roba thobo e kgolo. **7** Akanya ka ditshwantsho tse tharo tse, mme a Morena a go thuse go tlhologanya gore di amana jang le botshelo jwa gago. **8** O se ka wa lebala nthla ya bothokwa ya gore Jesu Keresete e ne e le Motho, wa lotso lwa ga Kgosi Dafide; le gore e ne e le Modimo, jaaka go supilwe ke boammaaruri jwa gore o tsofile gape mo baswing. **9** Ke ka nthla ya gore ke rerile boammaaruri jo bogolo jo, ke gone ka moo ke leng fano mo matshwenyegong ebile ke tsentswe mo kgolegelong jaaka serukhutlhi. Mme Lefoko la Modimo lone ga le a gologwa, le fa nna ke golegilwe. **10** Ke rata thata go boga, fa moo go ka tisa poloko le kgalalelo ya bosakhutleng ka Keresete Jesu mo go ba Modimo o ba tlhophileng. (aiōnios g166) **11** Ke gomoditswe ke boammaaruri jo, gore fa ke boga re bo re swela Keresete go raya gore re tlaa simolola go nna le ene kwa legodimong. **12** Mme fa re a kanya gore go mo direla ka nako eno go bokete, gakogelwang gore letsatsi lengwe re tlaa nna Nae re bo re busa Nae. Mme fa re lesa ka nthla ya go boga, re fularela Keresete, mme le ene o tshwanetse go re fularela. **13** Mme le fa re le bokoa thata mo re se kakeng ra salelwa ke tumelo epe, o nna a le boikanyego mo go rona ebile otlaa re thusa, gonno ga a kake a re itatola rona ba re leng bontlha bongwe jwa gagwe, mme o tlaa diragatsa ditsholofetso tsa gagwe mo go rona ka malatsi otlhe. **14** Gakolola batho ba gago dintlha tse dikgolo tse, mme ba lae mo leineng la Morena gore ba se ka ba ganetsanya mo dilong tse di a thokegeng. Dikganetsanyo tse di ntseng jalo di a timetsa ebile ga di na mosola, ebile di a bolaya. **15** Dirat thata gore Modimo o tle o go reye o re, "O dirile sentle." Nna modiri yo o siameng, yo o sa tlhokeng go tlhabiwa ke diithong fa Modimo o tlhatlhaba tiro ya gago. Itse se Lefoko la One le se buang le se le se rayang. **16** O tshabe dikgang tsa boeleele tse di gogelang batho mo sebeng sa go galefelana. **17** Dilo di tlaa buiwa tse di tukang di bile di utlwa ntho e e kekelang Humenao le Feleto, mo go rateng dikganetsanyo, ke batho ba ba ntseng jalo. **18** Ba tlogetse tsela ya boammaaruri, ba rera maaka a gore tsoyo ya baswi e setse e diragetse; ebile ba koafaditse tumelo ya bangwe ba ba dumelang. **19** Mme boammaaruri jwa Modimo bo nitame jaaka lefika je legolo, ebile ga go na sepe se se ka bo

tshikhinyang. Ke lefika la motheo le le nang le mafoko a mo go lone: "Morena o itse ba tota e leng ba gagwe," mme "motho yo o ipitsang Mokeresete ga aa tshwanela go dira dilo tse di sa siamang." 20 Mo lwapeng lwa mohumi go na le dijana tse di dirilweng ka gauta le selefera le tse dingwe di dirilwe ka logong le ka letsopa. Dijana tse di tlhathlwa kgolo di dirisediwa baeng, mme tse di tlhathlwa e potlana di dirisiwa mo tlung ya kapeelo kgotsa go tsenya matlakala. 21 Fa o fularela sebe o tlaa nna jaaka sengwe sa dijana tse di dirilweng ka gauta e e itshekileng, tse e leng tsone tse di siamang mo tlung, gore Keresete a tle a go dirisetse maikaelelo a gagwe a magolo. 22 Tshaba sengwe le sengwe se se ka go nayang dikgopolo tse di bosula tse makawana gantsi ba nang le tsone, mme o nne gaufi le sengwe le sengwe se se go dirang gore o batle go dira tshiamo. Nna le tumelo le lorato, mme o nne botsalano le ba ba ratang Morena ebile ba na le dipelo tse di itshekileng. 23 Gape ka re, o se ka wa tsena mo dikganatsanyong tsa boeleele tse di tsosang kgang mo bathong di bo di ba galefisa. 24 Batho ba Modimo ga ba a tshwanela go omana; ba tshwanetse go nna tshiamo, e le baruti ba ba pelotelele mo go ba ba molato. 25 Ikkobetse fa o leka go ruta ba ba akabalang mabapi le boammaaruri. Gonne fa o bua le bone ka bonolo le ka maitseo ka thuso ya Modimo, go ka diragala gore ba tlogele megopolo ya bone e e sa siamang mme ba dumele se e leng boammaaruri. 26 Mme ba tlaa itharabologelwa mme ba falole mo serung sa bothanka sa ga Satane sa go leofa, se o se dirisang go ba tshwara ka nako nngwe le nngwe e o e ratang, mme jalo ba ka simolola go dira go rata ga Modimo.

3 Mme Timotheo gape itse se, gore mo malatsing a bofelo go tlaa nna bokete thata go nna Mokeresete. 2 Gonne batho ba tlaa nna baithati le barati ba madi a bone; ba tlaa nna maikgantsho le mabela, ba sotla Modimo, ba sa utlwe batsadi ba bone, ba sa ba tlotle, ebile ba le bosula gotlhelele. 3 Ba tlaa nna diithongo di thata ebile ba sa ineele mo go ba bangwe; ba tlaa nna baaki ba gale le dirukhuthi ebile ba tlaa natefelwa ke mekgwa yotlhe e e bosula. Ba tlaa nna sethogo, mme ba tlaa sotla ba ba lelang go dira tshiamo. 4 Ba tlaa oka ditsala tsa bone; ba tlaa nna batenegi, baikgogomosi, e le barati ba dikgatlhego bogolo go go rata Modimo. 5 Ba tlaa ya kerekeng (phuthegong), ee, mme ga ba kitla ba dumela sepe se ba se utlwang. O se ka wa tsena mo bathong ba ba ntseng jalo. 6 Ke ba ba kukunelang mo malwapeng a batho ba bangwe mme ba tsalane le basadi ba dieleele ba ba imelwang ke dibe, ba ba rute ditluto tsa bone tse dintsha. 7 Basadi ba mofuta oo ba saletse ruri morago baruti ba ba makgapha mme ga ba tlhaloganye boammaaruri. 8 Mme baruti ba ba tlhabantsha boammaaruri fela jaaka Janese le Jamberese ba ne ba tlhabantsha Moshe. Ba na le megopolo e e leswe, e e sokameng ebile ba fapogile mo tumelong ya Sekeresete. 9 Mme ga ba kitla ba ya gope. Letsatsi lengwe tsietso ya bone e tlaa itsiwe sentle ke mongwe le mongwe jaaka bolelo jwa ga Janese le Jamberese. 10 Mme wena o nkitse sentle gore ga ke motho yo o ntseng jalo. O itse se ke se dumelang le ka fa ke tshelang ka teng le se ke se batlang. O itse tumelo ya me mo go Keresete le ka fa ke bogileng ka

teng. O itse lorato lwa me mo go wena, bobelotelele jwa me. 11 O itse matshwenyego a ke neng ka nna nao ka ntlha ya go rera Mafoko a a Molemo. O itse gotlhe mo go ntragaletseng fa ke etetse kwa Antioka, Ikonja le kwa Lusetera, mme Morena o ne a nkgolola. 12 Ee, pogiso e tlaa tlela botlhe ba ba ikaeletseng go tshela botshelo jwa Modimo go itumedisa Keresete Jesu, e tswa mo go ba ba mo ilang. 13 Ke boammaaruri, batho ba ba bosula ba tsietso ba tlaa dira go fetisisa, ba tsietsa ba le bantsi, bone ka bo bone ba tsieditswe ke Satane. 14 Mme o tshwanetse go tswelela go dumela dilo tse o di rutilweng. O a itse gore di boammaaruri gonne o itse gore o ka ikanya bangwe ba rona ba ba go rutileng. 15 O itse sentle, gore erile o sa le mmoatlana, o ne wa rutwa Dikwalo tse di boitshepo; mme ke tsone tse di go tlhalefetseng go amogela poloka ya Modimo ka go ikanya Jesu Keresete. 16 Baebele yotlhe re e neetswe ka tlhathletso ya Modimo gape e bothokwa go re ruta se e leng boammaaruri le go re lemotsha se se sa siamang mo matshelong a rona; e a re tlhamalatsa ebile e re thusa go dira tshiamo. 17 Ke tsela ya Modimo ya go re siamisa mo dilong tsothe, gore re felele mo go direleng batho botlhe tshiamo ka botlalo.

4 Mme jalo ke go kgothatsa ka tlhwaafalo fa pele ga Modimo le fa pele ga ga Jesu Keresete yo e tlaa reng letsatsi lengwe a bo a athhola batshedi le baswi fa a tla go tlhoma bogosi jwa gagwe, 2 go rera Lefoko la Modimo ka tlhwaafalo ka nako tsothe, go le lobaka le go se lobaka, fa go siame le go sa siama. Siamisa o bo o kgalemele batho ba gago fa ba tlhoka kgalemelo, ba kgothatse go dira tshiamo, mme ka nako tsothe o ba otlala ka Lefoko la Modimo ka bopelotelele. 3 Gonne go tlaa tla lobaka lo batho ba se kitlang ba reetsa boammaaruri, mme ba tlaa tsamaya ba batla baruti ba ba tlaa ba bolelelang fela se ba batlang go se utlwa. 4 Ga ba kitla ba reetsa se Baebele e se buang mme ba tlaa latela megopolo ya bone e e fofetseng. 5 Ema o tsepame, mme o se ka wa tshaba go bogela Morena. Tlisa ba bangwe kwa go Keresete. O se ka wa tlologa sepe se sa dirwa se o tshwanetseng go se dira. 6 Ke bua se ka gore ke tlaa bo ke seyo go go thusa ka lobaka lo lolelele. Lobaka lwa me lo setse lo fithile. E tlaa re ka bonako ke bo ke le mo tseleng ya me go ya legodimong. 7 Ga ke bolo go tlhabanela Morena thata ka lobaka lo lolelele, mme mo go tsone tsothe ke ntse ke le boammaaruri mo go ene. Mme jaanong lobaka lo fithile lwa gore ke khutlise ntwa ke itapolose. 8 Kwa legodimong serwalo se nkemetse se Morena, moatlhodi wa tshiamo, o tlaa se nnayang ka letsatsi le legolo la go bowa ga gagwe. Mme e seng nna fela, e leng botlhe ba matshelo a bone a supang gore ba lebeletse ka tlhwaafalo go tla ga gagwe gape. 9 Tswee-tswee tla ka bonako le ka bofelo jo o ka bo kgonang, 10 gonne Demase o ntlogetse. O ratile dilo tse dintle tsa lefatshe leno o ile Theselonika. Keresenese o ile Galalea, Tito o ile Dalamatia. (aiōn g165) 11 Ke Luke fela yo o nang le nna. Tla le Mareko fa o tla, gonne ke a mo tlhoka. 12 (Tukiko le ene o tsamaile, ke mo rometse kwa Efeso) 13 E re fa o tla, o se ka wa lebala go ntlela kobo e ke e tlogetseng kwa Teroase mo go mokaulengwe Karepo, le dikwalo, mme bogolo, thata tsa matlalo. 14 Alekesanta mothudi wa kgotlho o nkutlwisitse

bothoko thata. Morena o tlaa mo otlhaya, **15** mme o mo tshabe, gone o tlabana le sengwe le sengwe se re se boletseng. **16** Erile lwa ntlha fa ke tlisiwa fa pele ga moatlhodi go ne go sena ope fano go nthusa, Mongwe le mongwe o ne a siile. Ke solofela gore ga ba kitla ba bewa molato kaga gone. **17** Mme Morena o ne a ema le nna, a nnaya lobaka lwa go rera thero yotlhe ke sena poifo gore lefatshe le utlwe. Mme o ne a mpoloka gore ke se latlhele mo ditaung. **18** Ee, Morena o tlaa nna a nkgolola ka nako tsothe mo bosuleng jotlhe mme o tlaa ntlisa mo bogosing jwa gagwe jwa selegodimo. A kgalalelo e nne go Modimo ka metlha le metlha. Amen. **(aiōn g165)** **19** Tswee-tswée "ntumedisetsa" Peresila le Akwila le ba ba nnang le Onesiforo. **20** Eraseto o fetile a sala kwa Korintha, mme ke tlogetse Terofimose a lwala kwa Mileto. **21** Leka gore o bo o le kwano pele ga mariga. Eubulo o a go dumedisa le Padense, le Lino, le Kalaudia le ba bangwe botlhe. **22** A Morena Jesu Keresete a nne le mowa wa gago. Sala sentle, ke le, Paulo.

Tito

1 Lokwalo lo lo tswang kwa go: Paulo, mothanka wa Modimo le morongwa wa ga Jesu Keresete. **2** Ke romilwe go lere tumelo kwa go ba Modimo o ba tlhophileng le go ba ruta go itse boammaaruri jwa Modimo, boammaaruri jo bo fetolang matshelo a batho, gore ba nne le botshelo jo bo sa khutleng, jo Modimo o ba bo solofeditseng pele ga lefatshe le simologa, mme ga o kake wa bua maaka. (aiōnios g166) **3** Mme jaanong ka nako ya One e ntle, O senotse Mafoko a a Molemo a, mme o bile o ntlelelela go a bolelela mongwe le mongwe. Ka taolo ya Modimo Mmoloki wa rona, ke tlhomilwe go dira tiro e, ya One. **4** Lo ya kwa go: Tito, yo e leng morwaake tota mo ditirong tsa Morena. A Modimo Rara le Keresete Jesu Mmoloki wa rona O go nee masego a One le kagiso ya One. **5** Ke go tlogetse koo mo setlhakethakeng sa Kereta gore o dire sengwe le sengwe se se tlohegang go thusa go nonotsha phuthego nngwe le nngwe ya sone, mme ke ne ka go kopa go tlhoma baruti mo motseng mongwe le mongwe, ba ba tlaa salang morago ditaelo tse ke di go neetseng. **6** Banna ba o ba tlhophang, ba tshwanetse ba bo ba itsege ka mekgwa e mentle; mongwe le mongwe o tshwanetse a bo a na le mosadi a le mongwe le bana ba bone ba tshwanetse go rata Morena le gone ga ba a tshwanela go itsege ka bosula kgotsa ka go sa reetseng batsadi ba bone. **7** Baruti ba, ba tshwanetse ba bo ba le banna ba matshelo a a senang molato gonne ke badiredi ba Modimo. Ba se ka ba nna boikgodiso kgotsa pelo-dikhutshwane; ba se ka ba nna matagwa kgotsa batho ba ba ratang ntwaga kgotsa ba ba ratang madi. **8** Ba tshwanetse go itumelela go amogela baeng mo matlung a bone le go rata gothe mo go molemo. Ba tshwanetse go nna banna ba ba nang le ditlhaloganyo tse di itekanetseng, ebile ba sa patike. Ba tshwanetse go nna le megopolo e e lekalekanyeng e e phepha. **9** Go dumela ga bone mo boammaaruring jo ba bo rutilweng go nonofe go bo go nitame, gore ba tle ba kgone go ruta ba bangwe le go kaela ba ba sa dumalaneng nabo mo ba leng phoso teng. **10** Gonne go ba le bantsi ba ba ganang go reetsa; mo go boammaaruri tota mo go ba ba reng Bakeresete bothe ba tshwanetse go obamela melao ya Sejuta. Mme e ke puo ya boeleele; e fufatsa batho gore ba seka ba amogela boammaaruri, **11** mme selo se, se tshwanetse go fedisiwa. Malwapa othe a setse a bile a furaletse tshogofatso ya Modimo. Baruti ba ba ntseng jaana ba ipatlela madi a lona fela. **12** Mongwe wa bone, ebong moporofiti yo o tswang kwa Kereta, o buile jaana kaga bone a re, "Batho ba bothe ba Kereta ke baaki; ba tshwana le diphologolo tse di ditshwakga, tse di tshelalang dimpa tsa tsone fela." **13** Mme mo go boammaaruri. Jalo bua le Bakeresete koo, ka tlhwaafalo e e nang le kutlwelo bothoko ka fa go tlohegang ka teng go ba nonotsha mo tumelong, **14** le go ba kganela go thola ba nnetse go reetsa dinaane tsa Bajuta le ditaelo tsa batho ba ba furaletseng boammaaruri. **15** Motho yo o pelo e itshekileng o bona bomolemo le bophepa mo go sengwe le sengwe; mme motho yo pelo ya gagwe e bosula ebile e sa ikanyege o bona bosula mo go sengwe le sengwe, gonne mogopolo wa gagwe o o leswe le pelo ya gagwe e e

tsogologelang, di baya dilo tsothe tse a di bonang le tse a di utlwang mmala o e seng one. **16** Batho ba ba ntseng jalo gantsi ba re ba itse Modimo, mme ka go bona ka fa ba itsayang ka teng, ba lemogwa gore ga ba o itse. Ba bodile ebile ga ba laolesege, ba tshobosegile mo ba se kakeng ba dira tiro epe e e molemo.

2 Mme wena, bulela go tshela mo go tshwanetseng, mo go tsamaelanang le Bokeresete jwa boammaaruri. **2** Ruta banna bagolo go tlhwaafalela go nna boikgapo, ba tshwanetse go nna le ditlhaloganyo, ba itse, ba bile ba dumela boammaaruri, ba dira sengwe le sengwe ka lorato le bopelotelele. **3** Ruta basadi bagolo go nna maitseo le masisi mo go sengwe le sengwe se ba se dirang. Ba se ka ba tsamaya tsamaya ba bua bosula kaga ba bangwe le gone ba se ka ba nna matagwa, mme ba tshwanetse go nna baruti ba tshiamo. **4** Basadi bagolo ba ba tshwanetse go ruta basadi ba meroba go tshela ka tshisibalo mo mekgweng ya bone, go rata banna ba bone le bana ba bone, **5** le go nna le ditlhaloganyo le megopolo e e itshekileng, ba nna mo malwapeng a bone, ba le pelonomi ebile ba ikobela banna ba bone, gore tumelo ya Sekeresete e se ka ya tlhapadiwa ke ba ba ba itseng. **6** Fela jalo, kgothatsa makau go itshola sentle ka kelotlhoko, ba tsaya botshelo e le selo sa bothokwa se se tshwanetseng go somarelwa. **7** Mme wena ka bowena, o tshwanetse go nna sekao mo go bone ka ditiro tse di molemo tsa mofuta mongwe le mongwe. A sengwe le sengwe se o se dirang se supe lorato lwa gago gore o tlhwaafetse. **8** Dikgang tsa gago di tshwanetse go nna bothale le botsipa gore le fa e le mang yo o batlang go nganga nao a ithabelwe ke ditlhong gonne go tlaa bo go sena sepe se a ka nyatsang puo ya gago ka sone! **9** Kgothatsa bathanka go ikobela beng ba bone le go leka bojotlhe jwa bone go ba itumedisa. Ba se ka ba fetolana nabo, **10** le fa e le go utswa, mme ba tshwanetse go itshupa gore ba ikanyega ka botlalo. Ka go dira jaana, ba tlaa dira gore batho ba tle go dumela mo go Mmoloki le Modimo wa rona. **11** Gonne neo e e sa rekweng ya poloko ya bosakhutleng jaanong e neetswe mongwe le mongwe; **12** mme mo go yone neo e, go tla temogo ya gore Modimo o batla gore re furaletse botshelo jo bo senang Modimo le dithato tsa boleo, mme re tshela matshelo a a molemo, matshelo a a boifang Modimo ka letsatsi le letsatsi, (aiōn g165) **13** re lebeletse nako e ntle eo, e re ntseng re e lebeletse, e kgalalelo ya One e tlaa bonwang, kgalalelo ya Modimo wa rona o mogolo le Mmoloki Jesu Keresete. **14** Yo o suleng ka fa tlase ga tshokiso ya Modimo a swela dibe tsa rona, gore a tle a re falotshe mo go weleng gangwe le gape mo sebang le go re dira ba e leng ba gagwe tota, re na le dipelo tse di tlhatswitsweng le tlhwaafalo ya boammaaruri ka go direla ba bangwe dilo tse di molemo. **15** O tshwanetse go ruta bagaeno dilo tse wa bo wa ba kgothatsa go di dira, o ba laya fa go tlohega jaaka mongwe yo o nang le tshwanelo nngwe le nngwe go dira jalo. Se dire gore le fa e le mang a gopole gore se o se buang ga se bothokwa.

3 Gakolola bagaeno go ikobela mmuso le batsamaisi ba one, le gore ba nne kutlo ka malatsi othe le go ipakanyetsa tiro nngwe le nngwe e e molemo. **2** Ba se ka ba bua bosula ka ope,

le fa e le go omana, mme ba nne tshiamo le boikokobetso ka boammaaruri mo go botlhe. **3** Le rona re kile ra ne re le dielele ebile re sa reetsa ditaolo; re ne re ntshiwa mo tseleng ke ba bangwe mme ra nna batlhanka ba dilo tse di itumedisang tsa boleo di le dintsi le dithato tsa nama tsa boikepo. Matshelo a rona a ne a tletse lethoo le bopelotshettha. Re ne re ila ba bangwe mme le bone ba ne ba re ila. **4** Mme erile fa nako e goroga ya gore bopelonomi le lorato lwa Modimo Mmoloki wa rona di bonale, **5** mme o ne a re boloka, e seng ka ntlha ya gore re ne re siametse go bolokwa, mme e leng ka ntlha ya bopelonomi jwa gagwe le kutlwelo-botlhoko, ka go tlhatswa dibe tsa rona le go re naya boitumelo jo boshwa jwa Mowa O O Boitshupo o o nnang mo go rona, **6** o o goromeditseng mo go rona ka letlotlo le le hakgamatsang, le gotlhe ka ntlha ya se Jesu Keresete Mmoloki wa rona o se dirileng, **7** gore a tie a re supe re siame mo mathong a Modimo, gotlhe e le ka ntlha ya bopelonomi jwa one jo bogolo; jaanong re ka nna le seabe mo khumong ya botshelo jo bo sa khutleng jo o re bo nayang, mme re lebeletse ka tlhwaafalo go bo amogela. **(aiōnios g166)** **8** Dilo tse ke di go boleletseng tse di boammaaruri tsotlhe. Tswelala mo go tsona gore Bakeresete ba tie ba tlhokomele go dira ditiro tse di siameng ka metlha yotlhe, gonne mo ga se gore go siame fela mme go tlisa maungo. **9** Se itsenye mo dikganetsanyong tsa dipotso tse di sa arabesegeng le mo megopolong ya dikganetsanyo tse di thata tse di amanang le sedumedi; ikgaphe mo dikganetsanyong le mo dikgogakogonganong kaga go obamela melao ya Sejuta, gonne selo se se ntseng jaana ga se na thuso; se dira kutlo botlhoko fela. **10** Fa mongwe a dira dikgaogano mo go lona, o tshwanetse go tlhagisiwa lwa ntlha le lwa bobedi. Morago ga moo lo seka lwa tlhola lo dirisanya nae gape ka tsela epe, **11** gonne motho yo o ntseng jalo o itse sentle gore o a leofa. **12** Ke akanya go roma Aretemase kgotsa Tukiko kwa go lona. E re fela mongwe wa bone a goroga, tswee-tswee le kang go nkgathantsha kwa Nikopolisa ka bofelo jo lo ka bo kgonang, gonne ke ikaeletse go nna teng mariga otlhe. **13** Dira fela ka fa o ka kgonang ka teng go thusa Senase wa agente le Apolose mo loetong lwa bone; tlhomamisa gore ba newa sengwe le sengwe se ba se tlhokang. **14** Gonne batho ba ga rona ba tshwanetse go ithuta go thusa botlhe ba ba tlhokang thuso ya bone, gore matshelo a bone a tie a nne le loungo. **15** Mongwe le mongwe o a lo dumedisa. Tswweetswee ntumedisetsang ditsala tsotlhe tsa Bokeresete koo. A masego a Modimo a nne le lona lotlhe. Ke nna wa lona wa boammaaruri, Paulo.

Filimone

1 Lokwalo lo lo tswang kwa go: Paulo yo ke leng mo kgolegolong ka ntlha ya go rera Mafoko a a Molemo kaga Jesu Keresete le kwa go mokaulengwe Timotheo. **2** Ke lo kwalela wena: Filimone, modiri ka rona yo o rategang thata, le phuthego e e kopanelang mo tlung ya gago, le Apefia kgaitسادia rona, le Arekipo yo jaaka nna e leng lesole la mokgoro. **3** A Modimo Rraa rona le Morena Jesu Keresete a lo neye masego a gagwe le kagiso. **4** Ke leboga Modimo ka malatsi otlhe fa ke lo rapelela, Filimone yo o rategang, **5** gonne ke ntse ke utlwalela lorato lwa gago le ka fa o ikanyang Morena Jesu ka teng mmogo le batho ba gagwe. **6** Mme ke rapelela gore e re o ntse o abalana tumelo ya gago le ba bangwe le bone e gape matshelo a bone, ka ba bona khumo ya dilo tse di molemo mo go wena tse di tswang kwa go Keresete Jesu. **7** Nna ka sebele ke bonye boitumelo jo bogolo le kgomotso mo loratong lwa gago, mokaulengwe wa me, gonne bopelonomijwa gago ga bo bolo go nna bo nchafatsa dipelo tsa batho ba Modimo. **8** Jaanong ke batla go lo lopa gore lo ntirele sengwe. Ke ka se batla mo go lona ka leina la ga Keresete gonne ke selo se se lo siametseng go se dira, mme ke a lo rata ebile ke bona go tlhamaletse gore ke lo kope, nna Paulo, yo ke leng monnamogolo jaanong ke le kwano mo kgolegolong ka ntlha ya ga Jesu Keresete. **10** Kopo ya me ke gore lo supe bopelonomi mo go ngwanake Onesimo, yo ke mo gapetseng mo Moreneng fa ke santse ke le mo kgolegolong. **11** Onesimo (yo leina la gagwe le rayang "Thuso") o ne a se bothokwa thata mo go wena mo lobakeng lo lo fetileng, mme jaanong o tsile go nna bothokwa mo go rona rotlhe. **12** Ke mo romela gape kwa go wena, mme o tla ka pelo ya me yotlhe. **13** Mme tota ke ne ke ratile go mo tshegetsa kwano go nna fa ke santse ke le mo dikeetaneng ka ntlha ya go rera Mafoko a a Molemo, mme o ne o tlaa bo o ne o ntse o nthusa ka ene, **14** mme ke ne ke sa batle go dira jalo ke sa dumalana nao. Ke ne ke sa batle gore o nne pelonomi gonne o ne o tshwanetse go nna jalo mme ke ka gore o ne o batla go nna pelonomi. **15** Gongwe o ne o ka go akanya jaana: gore o siile kwa go wena ka lobakanyana gore jaanong a nne wa gago ka malatsi otlhe, (*aiōnios g166*) **16** e sa thole e le motlhanka fela, mme a le mongwe yo o botoka, mokaulengwe yo o rategang, segolo jang mo go nna. Jaanong le wena o tlaa go solegela molemo thata, gonne ga se motlhanka fela mme gape ke mokaulengwe wa gago mo go Keresete. **17** Fa ke le tsala ya gago tota, mo amogele ka boitumelo jo o neng o ka nkamogela ka jone fa e ne e le nna yo ke tlang. **18** Fa a go utlwisitse bothoko ka tsela nngwe kgotsa a go utsweditse sengwe, se nkatlholele. **19** Ke tlaa se busa (nna Paulo ka sebele, ke solofetsa go dira jaana ka go kwala jalo ka seatla se e leng sa me) mme ga ke na go go bolelela gore o nkolota bokae! Boammaaruri ke gore, o nkolota le one mowa wa gago tota! **20** Ee, mokaulengwe yo o rategang, intumedise ka yone tiro e e rategang e, mme pelo ya me e e lapileng e tlaa galaletsa Morena. **21** Ke go kwaletse lokwalo lo gonne ke tlhomamisa gore o tlaa dira se ke se kopang, ebile o tlaa se dira

go gaisa jaaka ke se batla! **22** Tswee-tswee mpaakanyetsa ntlo ya baeng, gonne ke solofela gore Modimo o tlaa araba dithapelo tsa lona o baa o ntletla go tla kwa go lona ka bofelo. **23** Epaferase legolegwa ka nna yo le ene a leng kwano ka ntlha ya go rera Keresete Jesu, o a lo dumedisa. **24** Mareko, Arisetareko, Demase le Luke, badiri ka nna le bone ba a lo dumedisa. **25** A masego a Morena wa rona Jesu Keresete a nne mo moweng wa lona.

Bahebera

1 Erile bogologolo Modimo wa bua le bo rraa rona ka baporofiti ka ditsela di le diinti tse di farologanyeng (ka diponatshegelo, le ditoro, le e leng ka difatlhogo di lebaganye), o ba bolelela bonnye ka bonnye ka leano la one. **2** Mme jaanong mo malatsing ano, o buile le rona ka Morwaa One yo o mo neileng sengwe le sengwe, yo gape ka ene o dirileng lefatshe le sengwe le sengwe se se leng teng. (aiōn g165) **3** Morwa Modimo o galalela ka kgalalelo ya Modimo, mme gotlhe mo Morwa Modimo a leng gone ebile a go dira, go mo supa fa e le Modimo tota. O tshededitse lobopo ka nonofo ya gagwe e kgolo ya taolo. Ke ene yo o suleng go re ntlafatsa le go phimola diibe tsa rona tsotlhe tse di neng di kwadilwe, mme morago ga moo a nna fa tatshe ka tlotlo e kgolo fa lothakoreng lwa Modimo o mogolo wa legodimo. **4** Jalo a nna mogolo thata mo baengeleng, jaaka go supiwa ke boammaaruri jo bo reng, leina la gagwe ke “Morwa Modimo,” le a neng a le rewa ke Rraagwe, le legolo thata mo maineng a baengele le maina a a supang maemo a bone. **5** Gonne Modimo ga o ise o ke o reye moengele ope o re, “O Morwaa.” Mme gape erile ka lobaka longwe, fa Morwaa one yo o tsetsweng pele a tla mo lefatsheng, Modimo o ne wa re, “A baengele ba botlhe ba Modimo ba mo obamele.” **7** Modimo o bua kaga baengele e le barongwa ba ba bofogo jaaka phefo le jaaka bathanka ba ba dirilweng ka dikgabo tsa molelo; **8** mme kaga Morwaa a re, “Bogosi jwa gago, Modimo, bo tlaa nna ka bosakhutleng; ditaolo tsa jone ka malatsi otlhe di siame ebile di boammaaruri. (aiōn g165) **9** O rata boammaaruri o ila bosula; jalo Modimo, le e leng Modimo wa gago, o goromeleditse boitumelo jo bogolo go feta motho le fa e le mang.” **10** Modimo gape o mmiditse “Morena” fa o re, “Morena, mo tshimologong o dirile lefatshe, le magodimo ke tiro ya diatla tsa gago. **11** Tsotlhe di tlaa nyelelela ruri, mme wena o tlaa tshela ruri. Di tlaa onala jaaka diparoro tse di kgologolo. **12** mme letsatsi lengwe o tlaa di phutha o bo o di emisetsa. Mme wena ka sebele ga o kitla o fetoga, le dingwaga tsa gago ga di kitla di khutla.” **13** A mme Modimo o kile wa raya moengele wa re, “Nna fa, fa thoko ga me ka tlotlo go fithelela ke ripitla baba ba gago botlhe ka fa tlase ga dinao tsa gago,” fela jaaka o raya Morwa One? **14** Nnyaa, gonne baengele ke mewa e e rongwang go thusa le go tlhokomela ba ba tshwanetseng go amogela poloko ya One.

2 Jalo re tshwanetse go reetsa sentle thata boammaaruri jo re bo utlwieng, e seng jalo re ka tloga ra tswa mo go jone. **2** Gonne ka melaetsa e e tswang kwa baengeleng e aga e le boammaaruri le batho ba ne ba aga ba othaelwa go tlhoka go e obamela, **3** se se re dirang gore re itheye re re ka falola ke eng fa re tlhokomologa poloko e kgolo e, e e anamisiwang ke Morena Jesu ka sebele, ebile e tsile mo go rona ka ba ba mo utlwieng a bua? **4** Modimo ka malatsi otlhe o ntse o re kaela gore melaetsa e, e boammaaruri ka ditshupo le dikgagamatso le ka ditiro tsa nonofo tse di farologanyeng le ka go naya ba ba dumelang dineo tsa bothokwaga tse di tswang mo Moweng O O Boitshepo; ee, Modimo o neetse mongwe le mongwe wa rona dineo tse di ntseng jalo. **5** Mme lefatshe le le tiang le re buang

ka lone ga le na go laolwa ke baengele. **6** Nnyaa, gonne mo lokwalong lwa Dipesalema Dafide o raya Modimo a re, “Kana motho e bo e le eng fa o tshwenyega thata ka ene? Le Morwa Motho yo o mo tlotlang thata ke mang? **7** “Gonne le fa o mo dirile go nna monnye mo baengeleng ka lobakanyana, jaanong o mo rwesitse kgalalelo le tlotlo. **8** Ebile o mo tlhomile go nna mothokomedi wa sengwe le sengwe se se leng teng. Ga gona sepe se se tlogetsweng”. Ga re ise re bo re bone gotlhe mo go diragala, **9** mme re bona ene Jesu, yo ka lobakanyana a neng a le kwa tlase ga baengele go le gonnye, jaanong a rweisiwa kgalalelo le tlotlo ke Modimo gonne o re bogetse ka loso. Ee, gonne ka kutwelobothoko ya Modimo e kgolo, Jesu o ne a utlwa loso ka nthla ya batho botlhe mo lefatsheng lotlhe. **10** Mme go ne go siame ebile go tlhamaletse gore Modimo o o tlhodileng sengwe le sengwe ka nthla ya kgalalelo ya one, o leseletse Jesu go boga, gonne ka go dira jaana o ne o lere bontsinti jo bogolo jwa batho ba Modimo kwa legodimong; gonne go boga ga gagwe go dirile Jesu moeteledipele yo o senang selabe, yo o nonofileng go ba lere mo polokong ya bone. **11** Rona ba re itshepisitsweng ke Jesu, jaanong re na le Rara a le mongwe nae. Ke sone se Jesu a sa thabiweng ke ditlhong go re bitsa barwaa-rraagwe. **12** Gonne mo lokwalong lwa Dipesalema a re, “Ke tlaa bua le barwa rre kaga Modimo Rara, mme re tlaa opela dipako tsa one mmogo.” **13** Ka lobaka longwe o ne a re, “Ke tlaa baya tshepo ya me mo Modimong ga mmogo le barwa re.” Mme gape ka lobaka longwe a bua a re, “Bonang, ke fano le bana ba Modimo o ba nneetseng.” **14** Ka rona bana ba Modimo, re le batho ba ba dirilweng ka nama le madi, le ene o ne a nna nama le madi ka go tsalwa mo setshwanong sa motho; gonne o ne a ka swa fela fa e le motho mme mo go sweng a fenyana nonofo ya ga diabololo yo o neng a na le nonofo ya loso. **15** Ke gone fela ka tsela eo, a neng a ka golola ba ka nthla ya poifo ya loso ba neng ba ntse ba tshela botshelo jwa bone jotlhe e le magolegwa mo letsho-gong le legolo le le tsewetseng pele. **16** Rotlhe re itse gore o ne a sa tla e le moengele mme e ne e le motho ee, Mojuta. **17** Mme go ne go thokega gore Jesu a nne jaaka rona, barwaa-rraagwe, gore a tle a nne Moperesiti yo Mogolo wa rona yo o kutlwelo-bothoko mo go rona ebile a ikanyega mo Modimong, go tlhabantsha diibe tsa batho. **18** Gonne e re ka ene ka sebele a bogile ebile a tsamaile mo thaelong, o itse gore go utlwa jang fa re bogisega ebile re raelwa, mme o nonofile thata go re thusa.

3 Jalo he, bakaulengwe ba Modimo o lo ithaletseng, lona ba lo thophetsweng legodimo, ke batla gore jaanong lo akanye ka Jesu yo, yo e leng Morongwa wa Modimo ebile e le Moperesiti yo Mogolo wa tumelo ya rona. **2** Gonne Jesu o ne a ikanyega mo Modimong o o mo tlhophileng go nna Moperesiti yo Mogolo, fela jaaka Moshe le ene a ne a dira mo tlung ya Modimo ka go ikanyega. **3** Mme Jesu o na le kgalalelo e kgolo go gaisa Moshe, fela jaaka motho yo o agang ntle e ntle a galalediwa thata go gaisa jaaka ntlo ya gagwe e galalediwa. **4** Le batho ba le bantsi ba ka aga matlo, mme Modimo ke One fela o o dirileng dilo tsotlhe. **5** Legale, Moshe o dirile tiro e ntle a dira mo tlung ya Modimo, mme o ne a le mothanka fela; le tiro ya gagwe e ne e le ya go supa thata le go

bolela dilo tse di neng di tlaa diragala kwa morago. **6** Mme Keresete, Morwa Modimo yo o ikanyegang, ke mothokomedi yo o feletseng tota wa ntlo ya Modimo. Mme rona Bakeresete re ntlo ya Modimo, o nna mo go rona! Fa re tshegetsa bopelokgale jwa rona go ya bokhutlong le boitumelo jwa rona le boikanyo mo Moreneng. **7** Mme ere ka Keresete a le mogolo thata, Mowa O O Boitshupo o re tlhagisa go mo reetsa, go ela thoko go utlwa lentsewa la gagwe gompieno, le go itsa dipelo tsa rona go nna kgatthanong nae, jaaka bana ba Iseraele ba ne ba dira. Ba ne ba ithatafatsa dipelo go nna kgatthanong le lorato lwa one ba bo ba o ngongoregela mo sekakeng a santse a ba leka. **9** Mme Modimo o ne wa nna pelotelele mo go bone ka dingwaga di le masome a le mane, le fa ba ne ba leka bopelotelele jwa one mo go utlwisang bothoko; o ne wa nna wa ba direla dikgakgamatso tse di kgolo gore ba bone. **10** Mme Modimo wa re, "Ke ne ke ba gakaletse thata, gonne dipelo tsa bone di ne di aga di lebile go sele mo boemong jwa gore di lebe kwa go nna, le gone ga ba ise ba ke ba bone ditsela tse ke neng ke batla ba tsamaya ka tsone." **11** Mme Modimo wa ba gakaleta, wa ikana gore ga o kitla o ba leseletsa go tla kwa lefelong la one la boikhutso. **12** Ke gone tlhokomelang dipelo tsa lona, bakaulengwe ba ba rategang, e se re kgotsa lwa fithela gore le tsone di bosula ebile ga di dumele di lo gogela kgakala le Modimo o o tshelang. **13** Buisa-nyang ka dilo tse malatsi otlhe nako e santse e lo atlegetse, gore le fa e le ope wa lona a seka a thatafalela Modimo, a fufaditswe ke tsietso ya sebe. **14** Gonne fa re ikanyega go ya bokhutlong, re ikanya Modimo fela jaaka re ne ra dira fa re simolola go nna Bakeresete, re tlaa nna le seabe mo go tsothe tse e leng tsa ga Keresete. **15** Mme jaanong ke nako. Lo seka lwa ba lwa lebala tlhagiso e e reng, "Fa lo utlwa lentsewa la Modimo gompieno le bua le lona, se o thatafaletseng dipelo tsa lona jaaka bana ba Iseraele ba ne ba dira fa ba o tsogologela mo sekakeng." **16** Mme e ne e le bomang batho ba ke buang ka bone, ba ba neng ba utlwa lentsewa la Modimo le bua le bone mme ba otsoologela? Ke ba ba neng ba tswa kwa Egepeto ba eteletse pele ke Moshe. **17** Mme e ne e le mang yo o neng a gakatsa Modimo mo dingwageng tsele tsothe tse di masome a le mane? E ne e le bone batho ba, ba ba neng ba leofa mme ka ntsha ya go leofa ba swela mo sekakeng. **18** Mme Modimo o ne o bua le mang fa o ikana o re ga ba kitla ba tsena mo lefatsheng le o le solofeditse batho ba one? O ne o bua le botho ba ba neng ba sa o utlwe. **19** Gape ke eng fa ba ne ba sa tsene? Ke ka ntsha ya gore ba ne ba sa o ikanye.

4 Le fa tsholofetso ya Modimo e ise e diragale, ebong tsholofetso ya One ya gore botho ba ka tsena mo lefelong la One la boikhutso, re tshwanetse go roroma ka letshogo gonne morago ga tsothe, bangwe ba lona ba ka nna mo seemong sa go tlhabela go goroga teng koo. **2** Gonne Mafoko a a Molemo a, ebong molaetsa wa gore Modimo o batla go re boloka, re o neetswe fela jaaka o ne wa neelwa ba ba neng ba tshela mo lobakeng lwa ga Moshe. Mme ga o a ka wa ba solegela molemo gonne ga ba a ka ba o dumela. Ga ba a ka ba o kopanya le tumelo. **3** Ke rona fela ba re dumelang Modimo re ka tsenang mo lefelong la One la boikhutso. O rile, "Ke ikanne mo bogaleng

jwa me gore ba ba sa ntumeleng ga ba kitla ba tsena," le fa tota o ne o ntse o ba ipaakanyeditse ebile o ntse o ba emetse go tswa tshimologong ya lefatsho. **4** Re itse fa o ipaakantse ebile o letile gonne go kwadilwe gatwe Modimo o ne wa ikhutsa ka letsatsi la bosupa la lobopo o sena go fetsa tsothe tse o neng o ikaeletse go di dira. **5** Le fa go ntse jalo ga ba a ka ba tsena, gonne lwa bofelo Modimo o ne wa re, "Ga ba kitla ba tsena mo boikhutso jwa me." **6** Le fa go ntse jalo, tsholofetso e ntse e ntse fela jalo, bangwe ba a tsena, mme eseng ba ba neng ba bona sebaka sa go rerelwa pele gonne ga ba a ka ba ikobela Modimo mme ka ntsha ya go dira jalo ba tlhabela go tsena. **7** Mme o beile nako e nngwe ya go tsena mo lefelong la boikhutso, mme nako eo ke jaanong jaana. O anamisitse polelo e ka Kgosi Dafide morago ga lobaka lo loleele lwa dingwaga motho a sena go palelwa ke go tsena mo felong ga boikhutso, o ne wa bua jaana ka mafoko a a setseng a boletswe, a a reng, "Gompieno fa lo mo utlwa a bitsa, se mo thatafaletseng dipelo tsa lona." **8** Lefelo le leshe la boikhutso le Modimo o buang ka lone ga se lefatsho la Iseraele le Joshua a neng a etelela pele Baiseraela a ba gorosa mo go lone. Fa e le gore Modimo o ne o raya lone, o ka bo o ne wa seka ya re morago ga lobaka lo lo leele wa bua ka "Gompieno" e le yone nako ya go tsena mo lefelong la boikhutso. **9** Jalo go na le boikhutso jo bo tletseng jo bo santseng bo letetse batho ba Modimo. **10** Keresete o setse a tsenyeng teng. O itapologisitse mo tirong ya gagwe, fela jaaka Modimo o ne wa itapolosa morago ga lobopo. **11** Mme le rona a re lekeng ka bojotlhe jwa rona go tsena mo lefelong leo la boikhutso, re iketse tlhoko, e se re kgotsa le rona ra tloga ra tlhoka kutlo mo Modimong jaaka bana ba Iseraela ba ne ba dira, mme ka go dira jalo ba tlhabela go tsena mo lefelong la boikhutso. **12** Gonne le fa e le eng se Modimo o se re bolelelang se tletse nonofo e e tshedileng: se bogale thata go gaisa chaka e e bogale jo bo feteletseng e tlhabela ka bofelo mo teng teng ga megopolo ya rona le dikeletso le gotlhe ga tsone, e re senolela se tota re leng sone. **13** O itse ka mongwe le mongwe gongwe le gongwe. Sengwe le sengwe ka rona se apogile ebile se bulegetse thata mathlo otlhe a a bonang a Modimo wa rona o o tshelang; ga go na sepe se Modimo o ka se fithelwang, One o re tshwanetseng go o tlhalosetsa tsothe tse re di dirileng. **14** Mme Jesu Morwa Modimo Ke Moperesiti wa rona yo Mogolo thata ene yo o ileng kwa legodimong go re thusa; jalo a re se khutliseng go mo ikanya. **15** Moperesiti yo Mogolo yo wa rona o tlhaloganya makoa a rona, gonne le ene o kile a nna mo dithaelong jaaka rona, le fa go ntse jalo ga a ise a ke a bo a neye dithaelo sebaka mme a leofa. **16** Jalo a re teng kwa setilong sa bogosi jwa Modimo ka bopelokgale re bo re nne teng koo go amogela kutlwelo bothoko ya One le go nna le tshogofatso go re thusa mo dinakong tsa rona tsa bothoki.

5 Moperesiti yo mogolo wa Sejuta ke motho fela jaaka mongwe le mongwe, mme o tlhophetswe go buelela batho botho le Modimo mo ditirong tsa bone. **2** O neela Modimo dimpho tsa bone ebile o o abela madi a diphologolo tse di ntshiwang sethlhabelo go bipa dipe tsa batho le tsa gagwe ka sebele. **3** Mme ka ntsha ya gore ke motho, o ka neneketsa batho ba

bangwe sentle, le fa ba le dielele ba sa itse sepe, gonne le ene o dikaganyeditse ke tsona dithaelo tseo ebile o tthaloganyana mathata a bone sentle thata. **4** Selo se sengwe se se tshwanetseng go gakologelwa ke se, ga go na motho ope yo o ka nnang moperesiti yo mogolo fela ka ntlha ya gore o batla go nna ene. O tshwanetse go bilelwa tiro e ke Modimo fela jaaka o ne wa bitsa Arone. **5** Ke gone ka moo Keresete a neng a seka a ithlopha go nna mo tlotlong ya go nna Moperesiti yo mogolo; nnyaa, o ne a tlhophiwa ke Modimo. Modimo o ne wa mo raya wa re, "Morwaaka, gompiano ke go tlottile." **6** Gape ka nako e nngwe o ne wa mo raya wa re, "O tlhophilwe go nna moperesiti ka bosakhutleng, o le mo maemong a le mangwe fela a boperesiti le Melekisedeke." (**aiōn g165**) **7** Mme le fa go ntse jalo, erile Keresete a sa le mo lefatsheng a kopa Modimo, a rapela ka dikedledi le mowa o o thubegileng, a rapela ene fela yo o tlaa mo gololang mo losong lo lo neng lo sa solofediwa. Mme Modimo o ne wa utlwa dithapelo tsa gagwe ka ntlha ya keletso ya gagwe e e nonofileng ya go eletsa go ikobela Modimo ka dinako tsothle. **8** Mme le fa Jesu a ne a le morwa Modimo, o ne a tshwanetse go ithuta ka ditiragale tse di neng di mo diragalela gore go ikoba go ne go utlwa jang, fa go ikoba go ne go raya go boga. **9** Erile a sena go itshupa fa a itekanetse mo maitemogelong a gagwe, Jesu a nna Moabi wa Poloko ya bosakhutleng mo go botlhe ba ba mo ikobelang. (**aiōnios g166**) **10** Gonne gakologelwang gore Modimo o mo tlhophile go nna Moperesiti yo Mogolo a lekana le Melekisedeke ka maemo. **11** Go na le dilo di le dintsi tse ke neng ke eletsa go di bua mo go one mabaka a, mme o ka re ga lo a reetsa, jalo go thata go lo dira gore lo tthaloganyane. **12** Ga lo bolo go nna Bakeresete ka lobaka lo lo leele jaanong, e bile lo tshwanetse lo ka bo lo ruta ba bangwe, mme mo boemong jwa moo lo boetse kwa morago kwa maemong a lo tlhokang mongwe go ipuseletsa go lo ruta gape metheo ya ntlha ka Lefoko la Modim. Lo tshwana le bananyana ba ba ka nwang mashi fela, ba sa gola mo go lekanyeng go ja dijo tse di loleng. **13** Mme fa motho a santse a tshela ka mashi fela go supa gore ga a ise a gatele pele thata mo botsheleng jwa Sekeresete, ebile ga a itse thata ka pharologanyo fa gare ga tshiamo le bosula. E santse e le Mokeresete yo mmatlana fela! **14** Ga lo kitla lo kgona go ja dijo tse di loleng tsa semowa lo bo lo tthaloganyana dilo tse di kwa teng-teng tsa Lefoko la Modimo go fithelela lo nna Bakeresete ba ba botoka lo bo lo ithuta go itse pharologanyo fa gare ga tshiamo le bosula ka go itlwaetsa go dira tshiamo.

6 A re khutliseng go tlhola re ntse re boelela selo se le sengwe fela gangwe le gape, ka malatsi othe re ruta dithuto tsele tsa pele kaga Keresete. Go na le moo, a re tsweleng pele mo dilong tse dingwe re bo re gole mo go tthaloganyeng ga rona, jaaka Bakeresete ba ba nonofileng ba tshwanetse go nna. Tota ga re tlhoke go tswelela re buela pele ka boelelele jwa go leka go bolokwa ka go nna tshiamo, kgotsa ka bothokwa jwa tumelo mo Modimong; **2** ga lo tlhoke go rutelwa pele ka kolobetso le dineo tsa semowa le tsogo ya baswi le tshakiso ya bosakhutleng. (**aiōnios g166**) **3** Mme fa Modimo o ka re leta, re tlaa tswelela pele mo dilong tse dingwe jaanong. **4** Ga go thusa sepe go leka

go lo busetsa mo Moreneng gape fa lo kile lwa tthaloganyana Mafoko a a Molemo lwa ba lwa lekeletsa dilo tse di molemo tsa legodimo lwa ba lwa nna le seabe mo Moweng O O Boitshepo, **5** lo bile lo itse ka fa Lefoko la Modimo le leng molemo ka teng, lwa ba lwa ikutlwa dinonofa tse dikgolo tsa lefatsho le le tlang, (**aiōn g165**) **6** mme jaanong lo tsogologetse Modimo. Ga lo kake lwa kgona go ikwathaya gape fa lo kokotetse Morwa Modimo mo mokgorong ka go mo gana, lo mo tsholeditse go sotlwa le go tlhabisiwa dithlong mo pepeneneng. **7** Fa tshimo e netswe ke dipula tse dintsi, mme dijalo tse dintle di tlhoga, lefatsho le ke bonye tshogofatso ya Modimo e wela mo go lone. **8** Mme fa le tswelela go mela mesetlho le mitlwa, go akanngwa gore ga le a siama ebile le emetse katholo le go nyelediwa ka molelo fela. **9** Ditsala tse di rategang, le fa ke bua jaana, ga ke dumele tota gore se ke se buang se raya lona. Ke tlhomamisa gore lo unywa maungo a mantle a a tsamaelanang le poloko ya lona. **10** Gonne Modimo ga o patike. O ka lebalala jang tiro ya lona e e bokete e lo e o direlang, kgotsa wa lebla tsela e lo neng lo tle lo supe ka yone ka fa lo o ratang ka teng, mme ebile lo sa ntse lo tshwere lo dira jalo ka go thusa bana ba one? **11** Re eletsa thata gore lo tle lo amogele tuelo ya lona e e itekanetseng. **12** Mme ka o itse se se lo emetseng mo malatsing a a kwa pele, ga o kitla o lapsiwa ke go nna Mokeresete, le fa e le go tshwakgafala go tshwana le ba ba amogelang tsothle tse Modimo o di ba solofeditse go ntlha ya tumelo ya bone e e nonofileng le bopelotelele. **13** Sekai ke se, go ne ga nna tshlofotso ya Modimo mo go Aberahame: Modimo o ne wa ikana ka leina la One, gonne go ne go se na ope yo mogolo yo Modimo o neng o ka ikana ka ene, **14** gore o tlaa segofatsa Aberahame gangwe le gape, o bo o mo fa ngwana wa mosimane, o bo o mo dira rara wa chaba e kgolo ya batho. **15** Jalo Aberahame a leta ka bopelotelele go fithelela lwa bofelo Modimo o mo naya ngwana wa mosimane, ebong Isake, fela jaaka o ne o solofeditse. **16** Fa motho a ikana, o a bo a bitsa mongwe yo o fa godimo ga gagwe ka maemo gore a mo pateletse go dira se a se solofeditse kgotsa go mo otlhaya fa a gana go se dira; maikano a fedisa manganga othe. **17** Modimo le One o ne wa itlama ka maikano, gore ba o ba solofeditse go ba thusa, ba tlhomamisa sentle thata le gone ba seka ba belaela gore a ruri Modimo o se nke o tloga o fetogela ditshlofotso tsa One. **18** O re neetse tshlofotso ya One le maikano, e le dilo tse pedi tse re ka di dumelang gothelele, gonne ga go kgonege gore Modimo o bua maaka. Jaanong botlhe ba ba tshabelang kwa go One go ba boloka ba ka gkothatsega sesha fa ba utlwa kaga ditshlofotso tse, tse di tswang kwa Modimong; ebile jaanong ba ka itse, kwa ntle ga go belaela, gore Modimo o tlaa ba neela poloko e o e ba solofeditse. **19** Tshlofotso e e tlhomamisegang e ya go bolokwa ke seitsesepelo se se nonofileng se se ikanyegang sa mewa ya rona, se re gokaganya le Modimo ka bo One ka fa morago ga sesiro sa boitshepo sa legodimo, **20** kwa Keresete a tsamaetseng kwa pele teng go re rapelela a le mo maemong a gagwe e le Moperesiti wa rona, a le mo tlotlong le mo maemong a a lekanang le a ga Melekisedeke. (**aiōn g165**)

7 Melekisedeke yo, e ne e le kgosi ya motse wa Salema, gape e ne e le moperesiti wa Modimo Mogodimodimo. E rife fa

Aberahame a boela kwa gae a sena go fenyha mo ntsweng e kgolo e a neng a thabana le dikgosi tse dintsi mo go yone, Melekisedeke a mo kgathantsha a bo a mo segofatsa; 2 mme Aberahame a ntsha tsa bosome mo go tsothle tse a di gapileng mo ntsweng mme a di neela Melekisedeke. Leina le le reng Melekisedeke le raya, "Tshiamo," jalo ke Kgosi ya Tshiamo; ebile gape ke Kgosi ya Kagiso ka nthla ya leina la motse wa gagwe, ebong Salema, leina le le rayang, "Kagiso" fa le tlhalosiwa. 3 Melekisedeke o ne a sena rraagwe le fa e le mmaagwe le gone ga go na sesupo sepe sa gore e ne e le wa losika lope. Ga a iselo a ke a bo a tsalwe le gone ga ise a ke a bo a swe, jalo botshelo jwa gagwe bo tshwana le jwa Morwa Modimo, moperesiti wa bosakhutleng. 4 Ke gone lemogang gore Melekisedeke yo o mogolo thata jang: Le e leng Aberahame tota, yo e leng motho wa nthla ebile a tlotlega thata go gaisa botlhe ba ba tlhophetsweng ke Modimo a neela Melekisedeke tsa bosome mo dilong tsothle tse a di gapileng mo dikgosing tse a neng a di lwantsa. 5 Mongwe o ne a ka tlhologanya gore Aberahame o ne a direla eng jaana fa Melekisedeke e ne e le moperesiti wa Sejuta, gonne erile kwa morago batho ba Modimo ba direlwa molao o o ba tlamang gore ba ntshe dineo go thusa baperesiti ba bone, gonne baperesiti e ne e le masika a bone. 6 Mme Melekisedeke e ne e se wa losika, mme le fa go ntse jalo Aberahame a mo duela. Melekisedeke o ne a naya Aberahame matlhogonolo, 7 mme fela jaaka mongwe le mongwe a itse, motho yo o nang le nonofo go segofatsa, ka gale o mogolo mo go yo o mo segofatsang. 8 Baperesiti ba Sejuta, le fa ba ne ba a swa, ba ne ba amogela tsa bosome; mme re bolelelwa gore Melekisedeke ene o a tshela. 9 Mongwe ebile o ne a ka re, le ene Lefi (tota ka sebele mogologolwane wa baperesiti botlhe ba Sejuta, wa botlhe ba ba amogelang tsa bosome), o ne a ntsha tsa bosome kwa go Melekisedeke a di romela ka Aberahame. 10 Gonne le fa Lefi a ne a ise a tsalwe, o ne a santse a le mo mankopeng (mo maleng) a ga Aberahame ka nako e Aberahame a neng a ntsha tsa bosome kwa go Melekisedeke ka yone. 11 Fa e le gore baperesiti ba Sejuta le melao ya bone ba ne ba na le nonofo ya go re boloka, ke eng jaanong fa Modimo o ne wa bona go tshwanetse gore o rome Keresete e le moperesiti yo o lekanang le Melekisedeke ka maemo, go na le gore o rome mongwe yo o lekanang le Arone ka maemo, a e leng gore baperesiti botlhe ba bangwe ba ne ba na nao? 12 Mme fa Modimo o roma mofuta o mongwe wa boperesiti, molao wa one o tshwanetse go fetolwa gore o dumalane le thomo ya jone. Jaaka rotlhe re itse, Keresete e ne e se wa lotso lwa ga Lefi lwa boperesiti, mme o dule mo lotsong lwa Juta, lo lo neng lo ise ke lo tlhophelwe boperesiti; Moshe o ne a ise a ke a ba neele tiro eo. 15 Jalo re ka bona sentle gore tsela e Modimo o tsamaisang dilo ka yone e ne ya fetoga, gonne Keresete, Moperesiti yo Mogolo yo moshwa yo o tsileng a le mo maemong a ga Melekisedeke, 16 ga a ka a nna moperesiti ka go diragatsa molao o mogologolo wa gore a nne wa lotso lwa ga Lefi, fa e se ka nthla ya motheo wa nonofo e e eeleng e tswa mo botshelong jo bo sa khutleng. 17 Ebile Mopesalema o supa selo se fa a bua kaga Keresete a re, "O moperesiti ka bosakhutleng o le mo maemong a a

lekanang le a ga Melekisedeke." (aiōn g165) 18 Ee, tsamaiso e kgologolo ya boperesiti e motheo wa yone e neng e le gore boperesiti e nne tshwanelo ya ba losika fela e ne ya tlosolosiwa gonne e ne e sena thuso epe. E ne e le bokoa ebile e sena molemo go boloka batho. 19 Ga e ise e ke e siamise ope mo Modimong. Mme jaanong re na le tsholofelo e kgolo thata, gonne Keresete o re dira gore re amogesele go Modimong, ebile jaanong re ka atamela kwa go one. 20 Modimo o ne wa ikana gore Keresete o tlaa nna moperesiti ka malatsi otlhe, 21 le fa go ntse jalo Modimo ga o ise o ke o bue jalo ka baperesiti ba bangwe. O reile Keresete a le nosi fela wa re, "Modimo o ikanne ebile ga o kitla o fetoga mo maikaelelong a one. O moperesiti ka bosakhutleng, o le mo maemong a a lekanang le a ga Melekisedeke." (aiōn g165) 22 Ka nthla ya maikano a Modimo, Keresete, o ka tlhomamisa ka kgolagano e ncha e, e e botoka. 23 Ka fa tsamaisong ya kgolagano e kgologolo go ne go tshwanetse go nna baperesiti ba le bantsi, gore e tle e re fa ba bagolo ba a swa, thulaganyo e tle e tswelele. 24 Mme Keresete ene o tshela ka bosakhutleng o bile o tswelletse go nna moperesiti gore go seka ga thola go thokoja yo mongwe gape. (aiōn g165) 25 O nonofile go bolokela ruri botlhe ba ba tlang kwa Modimong ka ene. Ka a tlaa tshela ruri, o tlaa nna teng ka malatsi otlhe go gakolola Modimo gore o dueletse dibe tsa bone ka madi a gagwe. 26 Jalo he, Jesu ke ene tota mofuta wa Moperesiti yo Mogolo yo re mo thokang; gonne o boitshepo ebile ga a na sepe sa boleo se a ka kaiwang ka sone, ga a ise a ke a leswafadiwe ke sebe, ga a na sepe sa boleo se a ka kaiwang ka sone, ga a ise a ke a leswafadiwe ke sebe, ga a a tladiwa leswe ke baleofi, ebile o neetswe bonno jwa tlotlega kwa legodimong. 27 Ga a ke a thoka madi a diphologolo tse di ntshiwang dithabelo, jaaka baperesiti ba bangwe ba ne ba dira, go bipa dibe tsa bone pele le tsa batho morago; gonne o khutlitsitse dithabelo tsothle gangwe fela, ka nako e a neng a intsha sethabelo mo mokgorong. 28 Ka fa tsamaisong e kgologolo, le baperesiti ba bagolo tota ba ne ba le bokoa e le baleofi ba ba neng ba ka seka ba kgaogana le go dira boleo, mme e rile morago Modimo wa thopha ka go ikanya Morwa One yo o itekanetseng ka bosakhutleng. (aiōn g165)

8 Se re se buang ke se: Keresete yo boperesiti jwa gagwe re setseng re tswa go bo tlhalosa, ke Moperesiti wa rona yo Mogolo, ebile o kwa legodimong kwa bonnong jwa tlotlo e kgolo thata gauifi le Modimo ka sebele. 2 O dira mo tempeleng e e kwa legodimong, lefelo la boammaaruri la kobamelo le le agilweng ke Morena e seng ke diatla tsa batho. 3 Mme ka moperesiti mongwe le mongwe yo mogolo a thophelwa go ntsha dineo le dithabelo, Keresete le ene o tshwanetse go ntsha sethabelo. 4 Sethabelo se a se ntshang se botoka thata go gaisa dithabelo tse di ntshiwang ke baperesiti ba lefatsheng. Mme le fa go ntse jalo, fa a ka bo a ne a le mo lefatsheng o ne a ka se ka a letlelelwa go nna moperesiti gonne mo lefatsheng baperesiti ba santse ba latela mokgwa wa bogologolo wa Sejuta wa dithabelo. 5 Tiro ya bone e ka fa tsamaisong ya motlaagana wa selefatshe o leng moriti wa motlaagana tota o kwa legodimong; gonne erile fa Moshe a ipaakanyetsa

go aga motlaagana Modimo o ne wa mo thagisa gore a dire motlaagana o o tshwanang le motlaagana wa legodimo jaaka a ne a bontshiwa kwa Thabeng ya Senai. **6** Mme Keresete, jaaka e le moperesiti kwa legodimong, o duetswe ka tiro e e bothokwa thata go gaisa ba ba dirang ka fa melaong e megologolo, gonne Kgolagano e ncha e a e fetiseditseng kwa go rona e tswa kwa Modimong e na le ditsholofetso tse di molemo thata. **7** Kgolagano e kgologolo ga e ise e ke e bo e nne le thuso epe. Fa e ka bo e ne e na le thuso, go ka bo go ne ga seka ga tlohega gore kgolagano e ncha e nne teng. **8** Mme Modimo ka sebele o ne wa bona phoso mo kgolaganong e kgologolo, gonne o ne wa re, "Letsatsi le tlaa tla la gore ke dire kgolagano e ncha le batho ba Iseraele le batho ba Juda. **9** Kgolagano e ncha e ga e kitla e tshwana le e kgologolo e ke neng ka e neela borraabo ka letsatsi le ke neng ka ba tshwara ka seatla go ba etelela pele ke ba ntsha mo lefatsheng la Egepeto; ga ba a ka ba thomama mo kgolaganong eo; jalo ka tshwanelwa ke go e tlosolosa. **10** Mme Morena a re, kgolagano e ke tlaa e dirang le batho ba Iseraele ke e: Ke tlaa kwala melao ya me mo megopolong ya bone gore ba tle ba itse se ke batlang ba se dira kwa ntle ga go ba bolelela, mme ke tlaa nna Modimo wa bone le bone ba tlaa nna batho ba me. **11** Mme ga go na ope yo o tlaa tlhokang go bua le tsala ya gagwe kgotsa molekane kgotsa morwa rraagwe, a re, 'Le wena o tshwanetse go itse Morena' gonne mongwe le mongwe, yo mogolo le yo monnye, ba tlaa bo ba setse ba nkitse. **12** Mme ke tlaa ba utlwela bothoko mo ditirong tsa bone tse di bosula, ebile ga ke na go tlhola ke gakologelwa diibe tsa bone". **13** Modimo o bua ka ditsholofetso tse di ncha tse, tsa kgolagano e ncha e, gore di tsaya maemo a kgolagano e kgologolo; gonne e beetswe kwa thoko ka bosakhutleng.

9 Mme jaana mo kgolaganong ya pele e e neng e le fa gare ga Modimo le batho ba One go ne go na le melao ya kobamelo ebile go ne go na le mo-tlaagana mo lefatsheng. Mo teng ga motlaagana o wa kobamelo go ne go na le matlwana a le mabedi. **2** Ntlwana ya ntsha e ne e na le sethomo sa lobone sa gauta le lomati lwa bojelo go na le dingwe tse di tshaphileng tsa tshupelo mo godimo ga lone; ntlwana e, e ne e bidiwa Felo ga Boitshepo. **3** Gape go ne go na le sesiro mme ka fa morago ga sesiro seo go ne go na le ntlwana e e bidiwang Boitshepo jwa Maitshupo. **4** Mo ntlwaneng eo go ne go na le leiswa na le go fisediwanng maswalo mo go lone le agilwe ka gouta, le bidiwa letlole la kgolagano, le manegilwe ka gouta gotlhelele ka ntsha tsothe. Mo teng ga letlole go ne go na le matlapana a kwadilweng Melao e e Some, le nkgwana e e bopilweng ka gouta e beile mana, le thobane ya ga Arone ya lothaka e e neng e tlhoga. **5** Mo godimo ga letlole la kgolagano go ne go na le ditshwantsho tse di bopilweng tsa baengele tse di neng di bidiwa dicheruba e le bathokomedi ba kgalalelo ya Modimo, diphuka tsa bone di ne di tsharologile di okame letlole le le agilweng ka gouta, le le neng le bidiwa senno sa kutlwelo bothoko. Mme go lekanye go bua kaga dilo tse. **6** Mme jaana, e ne e re fa gotlhe go setse go siame, baperesiti ba tsene ba bo ba tswela kwa ntle ga ntlwana ya ntsha ka fa ba batlang ka teng, ba dira tiro ya bone. **7** Mme moperesiti yo mogolo ke ene fela a neng a tsena

kwa ntlwaneng e e kwa teng, e e neng e bidiwa Boitshepo jwa Maitshupo, gangwe fela mo ngwageng, a le nosi fela, a tshotse madi a a neng a a kगतsha mo setilong sa kutlwelo bothoko e le mpho e a e nayang Modimo go bipa diphoso tsa gagwe le dibe tsa gagwe, le diphoso le dibe tsa batho bothe. **8** Mme Mowa O O Boitshepo o dirisa gothe mo go re supegetsa gore ka fa tsamaisong e kgologolo batho fela ba ne ba ka seka ba tsena mo Boitshepong jwa Maitshupo fela fa e le gore ntlwana e e ka kwa ntle le tsamaiso yotlhe e e e emetseng e santse e dirisiwa. **9** Tsamaiso e, e na le thuto ya bothokwa mo go rona gompieno. Gonne ka fa tsamaisong e kgologolo, dineo le ditlhabelo di ne di ntshiwa mme di ne tsa palelwa ke go ntlafatsa dipelo tsa batho ba ba neng ba di ntsha. **10** Gonne tsamaiso e kgologolo e ne e le melao ya senama fela, gore go tshwanetse ga jewa dijo tse di ntseng jang ga nowa dino tse di ntseng jang, melao ya go ilhaphisa, le melao kaga se le sele. Batho ba ne ba tshwanetse go tsegetsa melao e go fithelela Keresete a tla ka tsamaiso e ncha e e botoka ya Modimo. **11** Keresete o tsile e le Moperesiti yo Mogolo wa tsamaiso e e botoka e jaanong re nang nayo. O ile a tsena mo motlaaganeng o mogolwane o o iteka-netseng wa selegodimo o o sa agiwanng ka diatla tsa batho ebile e se wa tlhologo eno, **12** mme a tsaya madi gangwe fela e le la bofelo a tsena nao mo ntlwaneng e e kwa teng, ebong Boitshepo jwa Maitshupo, mme a a kगतsha mo setilong sa kutlwelo bothoko; mme e ne e se madi a dipodi kgotsa a dinamane. Nnyaa, o ne a tsaya madi a gagwe, mme ka sebele, a thomamisa poloko ya rona ya bosakhutleng. (aiōnios g166) **13** Mme fa e le gore ka fa tsamaisong e kgologolo madi a dipoo le a dipodi le melora ya dikgongwana a ne a ka tlhaphisa mebele ya batho dibe, **14** a o ko akanye gore madi a ga Keresete one a ne a ka fetola matshelo le dipelo tsa rona go le kae. Setlhabelo sa gagwe se re golola mo go tshwenyegeng go patelesega go obamela melao e megologolo, ebile se re dira gore re batle go direla Modimo o o tshelang. Gonne ka thuso ya Mowa O O Boitshepo wa bosakhutleng, Keresete o ne a inela mo Modimong ka go rata go swela dibe tsa rona, ene a le boitekanelo, a se na le fa e le sebe kgotsa molato. (aiōnios g166) **15** Keresete o tsile ka kgolagano e ncha e, gore botlhe ba ba lalediwanng ba ka nna ba tla gore ba tle ba bone dilo tsothe tse di molemo tse Modimo o di ba solofeditseng. Gonne Keresete o swetse gore a ba falotshe mo go othaelweng dibe tse ba di dirileng ba santse ba le ka fa tlase ga kgolagano e kgologolo. (aiōnios g166) **16** Jaanong, fa mongwe a a swa a tlogela lokwalo lwa go aba boswa e le sesupo sa dilo tsothe tse di tshwanetseng go neelwa batho bangwe fa a a swa, ga go na ope yo o neelwang sepe go fithelela go supuwa gore motho yo o kwadileng lokwalo lwa boswa o sule. **17** Lokwalo lwa go aba boswa lo simolola go dira fela morago ga loso lwa motho yo o lo kwadileng. Fa a santse a tshela ga go na ope yo o ka dirisang lokwalo lo go tsaya sengwe sa dilo tse a di ba solofeditseng. **18** Ke gone ka moo madi a neng a kगतshiwa (e le sesupo sa loso lwa ga Keresete) le pele ga Kgolagano e kgologolo e dirisiwa. **19** Gonne erile Moshe a sena go neela batho gothe ga melao ya Modimo, a tsaya madi a dinamane le dipodi, mmogo le metse mme a kगतsha lokwalo lwa Modimo lwa melao ka madi le

batho botlhe, a dirisa dikala tsa ditlhatshana tsa mosimama le boboa jo bohobidu go kgatsha ka tsone. 20 Mme a re, "Se ke madi a a supang tshimologo ya kgolagano ya lona le Modimo, kgolagano e Modimo o ntaotseng go e dira le lona." 21 Mme ka yone tsela e, a kgatsha madi mo motlaaganeng le mo go sengwe le sengwe se se neng se dirisiwa mo kobamelong. 22 Tota re ka re ka fa kgolaganong e kgologolo sengwe le sengwe se ne se ntlafadiwa ka go kgatshiwa ka madi, mme kwa ntle ga go tsholola madi gaga o na boitshwarelo jwa dibe. 23 Ke gone ka moo motlaagana o o mo lefatsheng, le sengwe le sengwe se se mo go one, tsotlhe di ne di tshwantsha dilo tse di kwa legodimong, tsotlhe di ne di tshwanelwa ke go ntlafadiwa ke Moshe ka tsela e, ka go kgatshiwa ka madi a diruiwa. Mme dilo tse e leng tsone tota kwa legodimong, tse e leng gore tse di mo lefatsheng ke ditshwantsho tsa tsone di ne tsa ntlafadiwa ka dineo tsa bothokwa. 24 Gonne Keresete o tsenye mo legodimong ka bo lone, go tla fa pele ga Modimo e le Tsala ya rona. Ga a a dira jaana mo felong ga kobamelo ya lefatsho, gonne moo e ne e le setshwantsho fela sa tempele ya boammaaruri e e kwa legodimong. 25 Le gone ga a ise a ke a intshe sethabelo gantsi, jaaka moperesiti yo mogolo mo lefatsheng a isa madi a diruiwa mo Boitshepong jwa Maitshapo ngwaga le ngwaga. 26 Fa e ne e le gore go dira jalo go ne go tlokega o ka bo a ne a tshwanelwa ke go swa gantsi, go tswa tshimologong ya lefatsho. Mme ga go a nna jalo! O ne a tla gangwe fela ebile e le lwa bofelo, kwa bokhutlong jwa metlha, go tlosa nonofo ya sebe ka bosakhutleng ka go re swela. (aiōn g165) 27 Mme fela jaaka go laotswe gore batho ba swe gangwe fela, mme morago ga moo go tle tshkiso, 28 fela jalo Keresete le ene o sule gangwe fela e le sethabelo sa dibe tsa batho ba le bantsi; mme o tlaa tla gape, mme legale a sa tlele go dirana le dibe tsa rona. Jaanong o tlaa tla a lerile poloko kwa go bothe ba ba mo letleng ka tlhwaafalo le bopelotelele.

10 Tsamaiso e kgologolo ya melao ya Sejuta e ne e supa fela moriti wa dilo tse di molemo tse Keresete a neng a tlaa re di direla. Ka fa tsamaisong e kgologolo ditlhabelo di ne di boelelwa gantsi, ngwaga le ngwaga, mme le fa go ntse jalo di ne tsa seka tsa boloka ba ba neng ba tshela ka fa tlase ga melao ya tsone. 2 Fa e ne e le gore di ne di ka kgona, sethabelo se le sosi fela se ka bo se ne sa lekana; baobamedidi ba ka bo ba ntlafaditswe gangwe fela, le go ithobaelela ga bone go ka bo go ne ga nyelela. 3 Mme go ne ga diragala ka tsela e sele: ditlhabelo tsele tsa ngwaga le ngwaga di ne tsa gakolola kaga go thoka thetso ga bone le molato wa bone mo boemong jwa go lapolosega ga mewa ya bone. 4 Gonne ga go kgonege ruri gore madi a dipoo le dipodi a tlose dibe. 5 Ke gone ka moo Keresete o rileng a tla mo lefatsheng a bua a re, "Modimo, madi a dipoo ga a kake a go itumedisa, jalo o mpaakanyeditse mmele o wame go o baya e le sethabelo mo sebesong sa gago. 6 Ga o a itumedisiwa ke ditlhabelo tsa diruiwa, tse di neng di bolawa di bo di fisiwa fa pele ga gago e le ditshupelo tsa bolelo. 7 Mme ka bua ka re, "Bona, ke tletse go dira thato ya gago, go ntsha botshelo jwa me sethabelo, fela jaaka Dikwalo di boletse gore ke tlaa dira jalo." 8 Erile Keresete a sena go bua jaana, ka

go thoka go itumedisiwa ke ditlhabelo tse di farologanyeng, le ditshupelo tse di batlwang ka fa tsamaisong e kgologolo, 9 a oketsa a bua a re, "Ke fano. Ke tletse go ntsha botshelo jwa me sethabelo." O tlosa tsamaiso ya pele ka go rata e e botoka e e itekanetseng. 10 Ka fa leanong le leshe le, re itshwaretswa ra bo ra ntlafadiwa ke Keresete ka go re swela gangwe fela. 11 Ka fa kgolaganong e kgologolo baperesiti ba ne ba ema fa pele ga sebeso malatsi otlhe ba ntsha ditlhabelo tse di neng di ka seka tsa phimola dibe tsa rona. 12 Mme Keresete o ne a ineela Modimo go tswa sethabelo sa dibe tsa rona e le sone sethabelo fela sa nako yotlhe, mme erile morago ga moo a nna fa fatshe mo lefelong la tlotlo e kgolo ka fa letsogong la Modimo le legolo, 13 a letile baba ba gagwe go bewa ka fa tlase ga dinao tsa gagwe. 14 Gonne ka sone sethabelo seo, o ne a dira botlhe boitekanelo fa pele ga Modimo, botlhe ba o ba itshepisang. 15 Mme Mowa O O Boitshepo o supa gore go ntse fela jalo, gonne o rile, "Se ke kgolagano e ke tlaa e dirang le batho ba Iseraela, le fa ba ne ba senya kgolagano ya pele: ke tlaa kwala melao ya me mo megopolong ya bone gore ba itse thata ya me ka gale, gape ke tlaa tsenya melao ya me mo dipelong tsa bone gore ba tle ba rate go e obamela." 17 Mme morago wa oketsa wa re, "Ga ke kitla ke tlhola ke gakologelwa dibe tsa bone le ditiro tsa bone tse di maswe." 18 Jaanong, fa dibe di itshwaretswa ruri ebile di lebetswe, ga go tlokege go ntsha ditlhabelo tse dingwe go di phimola. 19 Jalo ba gaetsho ba ba rategang, jaanong re ka tsena mo teng ga Boitshepo jwa Maitshapo kwa Modimo o leng teng, ka ntlha ya madi a ga Jesu. 20 Se ke tsela e e itekanetseng, e ncha, ya go fa botshelo, e Keresete a e re buletseng ka go gagola sesiro, ebong mmele wa gagwe wa setho, go re letla go tsena fa pele mo kgalalelong ya Modimo. 21 Mme ka Moperesiti yo mogolo yo wa rona a laola tsa ntlo ya Modimo, 22 a re tseneng mo teng, kwa Modimong tota ka dipelo tse di boammaaruri di mo ikanya gotlhelele go re amogela, ka ntlha ya gore re kgatshitswe ka madi a ga Jesu go re ntlafatsa, le ka ntlha ya gore mebele ya rona e tlhatswitswe ka metsi a a phepa. 23 Mme re ka solofela poloko e Modimo o e re solofeditse. Ga go tlhole go na le sebaka sa pelaelo, ebile re ka bolelela ba bangwe gore poloko ke ya rona, gonne ga gona pelaelo gore o tlaa dira se o se buang. 24 Mme mo go dumalaneng le tsotlhe tse a re di diretseng, a re tlhotlheletsanyeng mo go thusanyeng le mo go nneng bopelonomi yo mongwe mo go yo mongwe le mo go direng bomolemo. 25 A re se tlhokomologeng ditiro tsa phuthego le dikopano tsa rona, jaaka batho bangwe ba dira, mme a re kgothatsanyeng re bo re thagatsanyeng, segolo jang ka gore letsatsi la go bowa ga gagwe le a atamela. 26 Fa mongwe a leofa ka bomo ka go gana Mmoloki a sena go itse boammaaruri jwa boitshwarelo, sebe se se tlosiwe ke loso lwa ga Keresete; ga go na tsela e se ka tloswang ka yone. 27 Ga go na sepe se se ka solofelwang morago ga go dira jalo fa e se katlhole e e setlhogo ya bogale jo bo tshosang jwa Modimo jo bo tlaa nyeletsang baba botlhe ba One. 28 Motho yo o neng a gana go obamela melao e e neng e ntshiwa ke Moshe o ne a bolawa kwa ntle ga kutwelo bothoko fa go ne go na le basupi ba le babedi kgotsa ba le bararo ba supa molato wa gagwe. 29

A o ko o akanye gore kothhao e e setlhogo e tlaa wela go le kae ba ba gatakileng Morwa Modimo ka dinao, ba bo ba kaya madi a gagwe a a ntlafatsang jaaka ekete ke selonyana fela a bile a se boitshepo, ba bo ba tlhapatsha ba gakatsa Mowa O O Boitshepo o o lereng kutlwelo bothoko ya Modimo kwa bathong ba One. **30** Gonnye re a mo itse yo o rileng, "Pusoloso ke ya me; ke tlaa ba duela;" yo gape o rileng, "Morena ka sebele o tlaa athola batho ba gagwe". **31** Ke selo se se boitshegang go wela mo diatleng tsa Modimo o o tshelang. **32** Lo seka lwa ba lwa lebala malatsi ale a a molemo a lo neng lwa simolola go ithuta kaga Keresete mo go one. Gakologelwang ka fa lo neng lwa itseheletsana ka teng mo Moreneng le fa go ne go raya pogiso e e boitshegang. **33** Ka dinako tse dingwe lo ne lo tshewaga lo bo lo itewe, mme ka dinako tse dingwe lo ne lo tle lo lebelele lo bo lo utlwele ba bangwe bothoko ba boga jaaka lona. **34** Mme lo bogile le ba ba tlhathetsweng mo dikogelolong, ebile lo ne lwa itumela fa lo tseelwa tsothle tsa lona, lo itse gore dilo tse di botoka di lo letile kwa legodimong, dilo tse di tlaa nnelang tsa lona ruri. **35** Se letleng gore go ikanya Morena ka boitumelo mo, go swe, ga lo re sepe gore go diragalang. Gakologelwang tuelo ya lona! **36** Lo tlhoka go tswelela ka bopelotelele lo dira go rata ga Modimo fa e le gore lo batla gore o lo direle tsothle tse o di lo solofeditse. **37** Go tla ga gagwe ga go kitla go diega. **38** Mme ba tumelo ya bone e ba siamisitseng mo ponong ya Modimo ba tshwanetse go tshela ka tumelo, ba o ikanya mo dilong tsothle. E seng jalo, fa ba gonyela, Modimo ga o kitla o ba itumelela. **39** Mme ga re ise re ke re furalele Modimo ra bo ra thibela tshenyego ya rona. Nnyaa, tumelo ya rona mo go One e thomamisa poloko ya mewa ya rona.

11 Tumelo ke eng? Ke tsholofelo e e thomameng ya gore se re se batlang se tlaa diragala. Ke thomamiso ya gore se re se solofetseng se re letetse, le fa re sa se bone ka matho a senama. **2** Batho ba Modimo mo malatsing a bogologolo ba ne ba itsege ka ntsha ya tumelo ya bone. **3** Ka tumelo, ka go dumela Modimo, re itse gore lefatsheng le dinaledi, tota a ke re dilo tsothle, di dirilwe ka taolo ya Modimo; le gore di dirilwe ka dilo tse di sa bonweng. (*aiōn g165*) **4** E ne e le ka ntsha ya tumelo gore Abele a reetse Modimo a bo a ntsha sethabelo se se neng sa itumedisa Modimo go gaisa sa ga Kaene. Modimo o ne wa amogela Abele wa bo wa supa jalo ka go amogela mpho ya gagwe; mme le fa Abele a sa bolo go swa, re santse re ka ithuta diithu mo go ene ka go ikanya Modimo. **5** Enoke le ene o ne a ikanya Modimo, mme ka moo Modimo o ne wa mo tseela kwa legodimong a sa swa, ka tshoganetso o ne a tsamaya gonnye Modimo o ne wa mo tsaya. Pele ga tiragalo e, Modimo o ne o rile o itumetse thata jang ka Enoke. **6** Ga o kake wa itumdisa Modimo kwa ntle ga tumelo, kwa ntle ga go ikaega mo go One. Le fa e le mang yo o batlang go tla kwa Modimong o tshwanetse go dumela gore go na le Modimo le gore o duela ba ba o batlang ka boammaaruri. **7** Noa le ene e ne e le mongwe yo o neng a ikanya Modimo. Erile a utlwa tlhagiso ya Modimo ka malatsi a a tlang, Noa a o dumela le fa go ne go sena sekai sepe sa morwalela, mme kwa ntle ga go senya nako a aga araka (ntlo e e kokobalang) mme a boloka ba ntlo ya gagwe. Ka go dumela mo Modimong Noa o ne a supa bolelo jwa lefatsheng

le go sa dumeleng ga lone, le le ganneng go reetsa, mme ka ntsha ya tumelo ya gagwe o ne a nna mongwe wa ba Modimo o ba amogetseng. **8** Aberahame o ne a ikanya Modimo, mme erile Modimo o mo raya o re a huduge mo ga gabo a ye kgakala kwa lefatsheng le lengwe le o le mo solofeditse, Aberahame a dumela. A tsamaya, a sa itse tota le kwa a neng a ya teng. **9** Mme erile le a goroga kwa lefatsheng le Modimo o le mo solofeditse, a nna mo megoping (ditante) jaaka moeti fela, jaaka Isake le Jakobe ba le bone Modimo o ba solofeditse jaaka Aberahame. **10** Aberahame o ne a dira jaana gonnye o ne a letetse Modimo ka thomamiso go mo lere kwa lefelong le le nonofileng la selegodimo le modiri le moagi wa lone e leng Modimo. **11** Sara, le ene o ne a na le tumelo, mme ka ntsha ya yone tumelo e, o ne a bona nonofo ya go nna le ngwana ntswa a ne a tsofetse, gonnye o ne a lemoga gore Modimo o o mo solofeditse, o tlaa diragatsa tsholofetso ya one. **12** Ke gone ka moo chaba yotlhe e duleng mo go Aberahame, yo o neng a tsofetse thata go ka nna le e leng ngwana a le mongwe fela, tota chaba e e nang le didikadike tsa batho tse di senang palo, ba bontsi jwa bone bo lekaneng le dinaledi tsa legodimo le motllhaba wa lotshitsi lwa lewatle. **13** Batho ba ba tumelo ba ke ba umakileng, ba sule ba ise ba amogele gotlhe mo Modimo o neng o go ba solofeditse; mme ba ne ba go bona go ba letetse kwa pele mme ba itumela, gonnye ba ne ba dumela gore lefatsheng leno ga se legae la bone tota mme e le baeng fela mo go lone. **14** Mme go bonala fela sentle gore e ne e re fa ba bua jalo, ba bo ba solofetse legae la bone tota kwa legodimong. **15** Fa ba ne ba rata, ba ka bo ba ne ba boela kwa morago kwa dilong tse di molemo tsa lefatsheng leno. **16** Mme ga ba a ka ba dira jalo. Ba ne ba tshelela legodimo. Jaanong Modimo ga o thajwe ke diithong go bidiwa Modimo wa bone, gonnye o ba agetse motse wa selegodimo. **17** Erile o santse o mo leka, Aberahame o ne a nna a ikanya Modimo le ditsholofetso tsa one, mme ke gone a ntsha Isake morwawe tshupelo, a bo a ipaakanetsa go mmolaela mo sebesong sa ditshabelo; **18** ee, go bolaya le e leng Isake, yo ka ene Modimo o neng o solofeditse go naya Aberahame chaba yotlhe ya losika lwa gagwe! **19** O ne a dumela gore fa Isake a ka swa Modimo o tlaa mo tsosa mo losong; mme ke sone se tota se neng sa diragala seo, gonnye mo mogopolong wa ga Aberahame, Isake o ne a tshwanetse go swa, mme o ne a tsoga mo losong! **20** E ne e le ka tumelo mo Isake a neng a itse gore Modimo o tlaa naya bomorwawe ba babedi masego, ka lobaka lo lo tlang, ebong Jakobe le Esau. **21** Ka tumelo erile Jakobe a setse a tsofetse ebile a tloga a a swa, a segofatsa bomorwa Josefe boo-babedi fa a ema ka dinao a rapela, a itsehegeditse ka thobane ya gagwe. **22** Gape e ne e le ka tumelo mo Josefe erileng a tla a tloga a a swa, a bua ka thomamiso gore Modimo o tlaa ntsha batho ba Iseraele mo Egepeto; o ne a thomamisa kgololo ya bone mo e leng gore o ne a ba raya a re ba mo solofetse go tsaya marapo a gagwe fa ba tsamaya. **23** Batsadi ba ga Moshe le bone ba ne ba na le tumelo. Erile fa ba bona gore Modimo o ba file ngwana yo o sa tlwaelesegang, ba ikanya Modimo gore o tlaa mmoloka mo losong lo kgosi e lo laotseng, mme ba mo fitlha dikgwedi di le tharo, ebile ba sa boife. **24** E ne e le ka tumelo mo Moshe

erileng a gola, a gana go tsewa jaaka setlogolwana sa kgosi, mme a ithophela go boga le batho ba Modimo mo boemong jwa go ja monate wa dikgathego tsa boleo ka lobakanyana. 26 O ne a bona gore go botoka go bogela Keresete yo o solofetsweng go na le go rua mahumo otlhe a Egepeto, gonne o ne a solofetse tuelo e kgolo e Modimo o neng o tlaa e mo naya. 27 Gape e ne e le ka nthla ya gore o ne a ikanya Modimo mo a ileng a tswa mo lefatsheng la Egepeto a sa boife bogale jwa kgosi. Moshe o ne a nna a tsamaya; go ne go bonala ekele o bona Modimo o na le ene teng koo. 28 Gape e ne e le ka nthla ya gore o ne a dumela gore Modimo o tlaa boloka batho ba one jaaka a ba laotse go bolaya kwana, ka fa Modimo o neng o ba laotse go dira ka teng le go kgatsha madi mo mepakong ya dikgoro tsa matlo a bone, gore Moengele yo o boitshegang wa Loso wa Modimo a se ka a ama ngwana ope wa nthla wa mosimane mo malapeng ao, jaaka o ne wa dira mo Baegepetong. 29 Batho ba Iseraela ba ne ba ikanya Modimo ba bo ba ralala Lewatlle le Lehibidu jaaka o ka re ba tsamaya mo mmung o o omeletseng. Mme erile Baegepeto ba ba neng ba ba setse morago ba leka go le kgabaganya, ba nvela botlhe. 30 E ne e le tumelo e e neng ya ribegetsa dithako tsa Jeriko batho ba Iseraela ba sena go di dikologa malatsi a supa, jaaka Modimo o ne o ba laotse. 31 Ka tumelo Rahabe wa seaka o ne a seka a swa le botlhe ba bangwe mo motseng wa ga bone fa ba ne ba gana go reetsa Modimo, gonne o ne a dumela Modimo le thata ya One, gonne o ne a amogela dithola ka kagiso. 32 Mme he, ke santse ke tlhoka go bua go le kae? Go ka tsaya nako e telele thata go boeela dipolelo tsa tumelo ya ga Gideone le Baraka le Samesone le Jefethe le Dafide le Samuele le baporofiti botlhe. 33 Batho ba botlhe ba ne ba ikanya Modimo mme ka nthla ya go o ikanya ba fenywa dintwa, ba diga dipuso, ba busa batho ba bone sentle, mme ba amogela se Modimo o neng o se ba solofeditse; ba ne ba sireletsega mo go gagolakweng ke ditau mo mengobong; 34 le mo boubelong. Bangwe ka tumelo ya bone, ba falotse mo losong lwa chaka. Bangwe ba ne ba nonotshiwa gape morago ga bokoa jwa bone le bolwetse. Ba bangwe ba ne ba fiwa nonofo e kgolo mo ntweng; ba ne ba dira gore mephato ya ntw e sie e ba tshabe. 35 Mme basadi bangwe, ka tumelo, ba amogela ba ga bone ba ba rategang, ba ba neng ba sule. Le fa go ntse jalo, bangwe ba ikanya Modimo, mme ba betswa go fitlhelela ba a swa. Ba ithophela go swa go na le go furalela Modimo gore ba golelesege, ba tshepha gore ba tlaa tsogela botshelong jo bo botoka moragonyana. 36 Bangwe ba ne ba tshegwa, ba fatolwa mekwatla ka dithupa, mme ba bangwe ba ne ba golegetlwa ka dikeetane mo dikgolegelong. 37 Bangwe ba sule ka kgotlediwa ka maje ba bangwe ka go fatogangwa ka dishaga; ba bangwe ba ne ba solofediwa kgololo fa ba ne ba ka itatola tumelo ya bone, morago ga moo ba ne ba bolawa ka chaka. Bangwe ba ne ba tsamaya ba apere natlalo a dinku le dipodi, ba kgarakatshega mo dikakeng le mo dithabeng, ba iphitlha mo mengobong le mo dikgageng. Ba ne ba bolawa ke tlala, ba lwala, ba tshwerwe sethogo, e le batho ba lefatshhe le sa ba tshwanelang. 39 Mme batho ba ba tumelo, le fa ba ne ba ikanya Modimo ebile ba ne ba gapa maikutlo a One, ga go na ope wa bone yo o neng a amogela tsothe tse Modimo o neng o

di solofeditse; 40 gonne Modimo o ne o batla gore ba iketle gore le bone ba tle ba nne le seabe mo ditulong tse di botoka tse di sa fetogeng tse re di baakanyeditsweng.

12 Mme ka re na le batho ba ba ntseng jalo ba le bantsi ba tumelo ba ba re lebeletseng ba le kwa ditlong tse di kwa godimo, a re apoleng sengwe le sengwe se se diang kgotsa se se re busetsang kwa morago, mme bogolo thata jang dibe tse di tshophelelang thata mo maotong a rona di bo di re digela fa fatshe; mme a re sianeng ka bopelotelele lobelo lo Modimo o lo beileng fa pele ga rona. 2 Tlhomang matlho a lona mo go Jesu, moeteledipele le moruti wa rona. O ne a ineela go swa loso lo lo tlhabisang ditlong mo mokgorong ka nthla ya boitumelo jo a neng a itse fa bo mo letetse kwa morago; mme jaanong o nna mo lefelong la tlotlo gaufi le setilo sa bogosi sa Modimo. 3 Fa lo batla go kgaogana le go ngodiega le go lapisega, akanyang ka bopelotelele ja gagwe ka nako e baleofi ba neng ba mo dira dilo tse di sa siamang. 4 Mme le gone, ga lo ise lo ke lo kgarathisanye le sebe le thaelo go fitlhelela lo fufula marothodi a madi. 5 A lo lebetse gotlhelele mafoko a kgothatso a Modimo o a lo reileng, lona bana ba One? Modimo o ne wa re, "Morwaaka, se kgopisege fa Morena a go otlhaya. Se kgobege marapo fa a go kaela fa o molato teng. 6 Gonne fa a go otlhaya, go supa gore o a go rata. Fa a go betsa go supa gore o ngwana wa gagwe tota." 7 Letla Modimo go go ruta, gonne o dira se rre mongwe le mongwe yo o lorato a se direlang bana ba gagwe. Ke mang yo o kileng a utlwa ka ngwana yo o iseng a ke a bo a otlhaiwe? 8 Fa Modimo o sa go othlae fa go tlhokega jaaka borabana bangwe ba otlhaya bana ba bone, moo go raya gore ga o ngwana wa Modimo tota gotlhelele, go raya gore ga o wa ba lolwapa lwa One tota. 9 Ka re tlotla borraa rona mo lefatsheng, le fa ba re otlhaya, a ga re a tshwanela go ineela ka boitumelo mo go rutweng ke Modimo gore re tle re simolole go tshela tota. 10 Borraa rona ba lefatshhe ba re rutille mo dingwageng di se kae, ba re direla gotlhe ka fa ba neng ba itse ka teng, mme kotlhae ya Modimo e siame ka malatsi otlhe ebile e re siametse, gore re tle re nne le seabe mo boitshepong jwa One. 11 Go otlhaiwa ga go monate fa go sa ntse go diragala, go utlwisa bothoko! Mme kwa morago re ka bona madio a gone, go gola mo kagisong mo kutlwelo bothokong le mo bothong. 12 Ke gone ingapareleng thata ka diatla tsa lona tse di lapileng, emang lo nitame ka mangole a lona a a reketlang, 13 lo bo lo direle dinao tsa lona tselo e e tlhamaletseng e e borethe gore ba ba lo salang morago, le fa ba le bokoa ebile ba tlhotsa, ba seka ba wa ba ikgolafatsa, mme ba nonofe. 14 Lekang go tswa gotlhelele mo dikomanong mme lo batle go tshela botshelo jo bo phepa jo bo itshepileng, gonne yo o seng boitshepo ga a kitla a bona Morena. 15 Tlhokomelanang gore le fa e le ope wa lona a seka a palelwa ke go bona masego a Modimo. Ithokomeleng gore bogalaka bope bo seka jwa mela mo go lona, gonne fa bo mela bo dira matshwenyego a matona, bo leswafatsa batho ba le bantsi mo matshelong a bone a semowa. 16 Ithokomeleng gore le fa e le ope wa lona a seka a dira sebe sa boaka kgotsa a seka a nna kelotlhoko kaga Modimo jaaka Esau: o ne a rekisa botsalwa-

pele jwa gagwe ka sejonyana se se kgorwang gangwe fela. 17 Mme erile kwa morago, fa a batla ditshwanelo tseo gape, nako ya bo e setse e tsamaile, le fa tota a ne a lela dikeledi tse di bothoko tsa boikwathao. Ke gone gakologelwang, lo bo lo ikele tlhoko. 18 Ga lo ise lo ke lo lebagane le mathata a a tshosang, molelo o o dikgabo, kutlobothoko e e tlhakanyeng le go felelwa ke tsholofelo, lefifi le setsuatsue se se boitshegang, jaaka Baiseraela ba ne ba rakana le One kwa Thabeng ya Senai fa Modimo o ba neela melao ya One. 19 Gonne go ne ga nna tumo e e tshosang ya terompeta, le lentswe le le neng le na le molaetsa o o boitshegang, mo e leng gore batho ba ne ba kopa Modimo go khutlisa go bua. 20 Ba ne ba theethekelela kwa morago ka fa taolong ya Modimo e e reng, le phologolo fa e ka ama thaba, e tshwanetse go swa. 21 Moshe ka sebele erile fa a bona pono e e boitshegang eo a tshoga thata. 22 Mme lo tsile sentle mo Thabeng ya Siona, kwa motseng wa Modimo o o Tshelang, Jerusalema wa selegodimo, le kwa kokoanong ya baengele ba ba senang palo ba ba itumetseng; 23 le kwa phuthegong, e e dirilwang ka botlhe ba ba kwadilwang mo legodimong; le kwa Modimong o o leng mosekisi wa botlhe; le kwa meweng ya ba ba kwa legodimong ba ba golotsweng, ba ba setseng ba ntlafaditswe; 24 le kwa go Jesu ka sebele, yo o re lereditseng kgolagano e ncha ya gagwe e e hakgamatsang; le kwa mading a kगतsho a a itshwarelang ka kutlwelo bothoko mo boemong jwa go ipusolosetsa jaaka madi a ga Abele. 25 Ke gone bonang gore lo obamele ene yo o buang le lona. Gonne fa batho ba Iseraele ba ne ba se ka ba falola fa ba gana go reetsa Moshe yo o neng a ba tlhagisa a le mo lefatseng, re mo diphatseng tse di setlhogo thata jang fa re gana go reetsa Modimo o o buang le rona o le kwa legodimong! 26 Erile fa o bua o le kwa Thabeng ya Senai, lentswe la one la romomisa lefatshe, mme wa bua wa re, "Ka nako e e tlang ga ke kitla ke romomisa lefatshe fela, mme ke tlaa romomisa le magodimo." 27 Ka go bua jaana Modimo o ne o raya gore o tlaa tlosa sengwe le sengwe se se senang motheo o o tiileng, gore go sale tse di sa reketyleng fela. 28 Ka re na le bogosi jo bo ka sekeng jwa sennngwa ke sepe, a re itumediseng Modimo ka go o direla ka dipelo tse di lebogang, le ka poifo e e boitshapo le tshisimogo. 29 Gonne Modimo wa rona ke molelo o o lailang.

13 Tsweleng ka go ratana ka lorato lwa boammaaruri wa sekaulengwe. 2 Lo seka lwa lebala go nna pelonomi mo go ba eleng baeng, gonne bangwe ba ba kileng ba dira jaana ba ne ba tshogana ka ba tshotse baengele ba sa itse gore a ke bone. 3 Lo seka lwa lebala ba ba mo kgolegelong. Bogang le bone jaaka o ka re le lona lo mo kgolegelong nabo. Tlhakanelang kutlobothoko le ba ba sotlwang, gonne lo itse gore tshotlego e utlwala jang. 4 Tlotlang lenyalo la lona le maikano a lone, lo bo lo nne phepa; gonne ruri Modimo o tlaa otlhaya botlhe ba ba bosula kgotsa ba ba dirang boaka. 5 Ikgogeng mo go rateng madi; itumeleleng se lo nang naso. Gonne Modimo o rile, "Ga ke kitla, ke go tlogela le fa e le go go latlha." 6 Ke gone ka moo re ka buang kwa ntle ga pelaelo kgotsa poifo re re, "Morena ke mothusi wa me mme ga ke boife sepe se motho fela o ka se ntirang." 7 Gakologelwang baeteledipele ba lona ba ba

lo rutileng Lefoko la Modimo. Akanyang kaga bomolemo jotle jo bo duleng mo matshelong a bone, lo bo lo leke go ikanya Morena fela jaaka ba mo ikanya. 8 Jesu Keresete e ntse ke ene wa maabane, wa gompieno, le wa bosakhutleng. (aiōn g165) 9 Ke gone lo se ka lwa gapiwa mewa ke dithuto tse dintsha tsa seeng. Nonofa ya lona ya semowa e tla e le neo e e tswang kwa Modimong, ga e tswe mo melaong e e itiretsweng ya go ja dijo dingwe, tsamaiso e e sa thusang ka sepe ba ba neng ba e dirisa. 10 Re na le sebeso, mokgoro o Keresete o neng a ntshiwa sethabelo mo go one, kwa ba ba tsweleng ka go batla poloko ka go obamela melao ya Sejuta ba ka sekeng ba thusiwa teng. 11 Ka fa tsamaisong ya melao ya Sejuta moperesiti yo mogolo o ne a lere madi a diruiwa tse di bolailwang mo felong ga boitshapo e le sethabelo sa sebe, mme morago ga moo ditoto tsa diruiwa tseo di ne di fisediwa ka molelo ka kwa ntle ga metse. 12 Ke gone ka moo a neng a boga a ba a swela ka kwa ntle ga motse kwa madi a gagwe a neng a tlhatswa dibe tsa rona teng. 13 Ke gone a re tsweleng kwa go ene kwa ntle ga motse (ke gore, kwa ntle ga dikgatlhego tsa lefatshe leno, re ineele go nyadiwa) go boga nae teng koo, re rwele kgobo nae. 14 Gonne lefatshe leno ga se legae la rona; re lebeletse legae la rona la bosena-bokhutlo kwa legodimong. 15 Ka thuso ya ga Keresete re tlaa tswelela re ntshetsa Modimo sethabelo sa rona sa kgalaletso ka go bolelela ba bangwe kaga kgalalelo ya leina la gagwe. 16 Lo se ka lwa lebala go dira tshiamo le go abalana se lo nang naso le ba ba tlhokang, gonne dithabelo tse di ntseng jaana di itumedisa Modimo thata. 17 Ikobeleng baeteledipele ba lona ba semowa lo bo lo ineele go dira se ba se buang. Gonne tiro ya bone ke go tlhokomela mewa ya lona, mme Modimo o tlaa ba athola ka fa ba dirang tiro e ka teng. Dirang gore ba bolelele Morena ka lona ba itumetse mme e seng ka bohutsana, gonne le lona lo tlaa boga kaga dilo tseo. 18 Re rapeleleng, gonne segakolodi sa rona se siame mme re batla go tswelela fela jalo. 19 Nna tota ke tlhoka dithapelo tsa lona thata gone jaanong gore ke tle ke tle kwa go lona ka bofefo. 20 A jaanong Modimo wa kagiso, o o tsoiseng Morena wa rona Jesu mo losong, o lo neye tsothe tse lo di tlhokang go dira go rata ga One. A ene yo o Modisa yo mogolo wa dinku ka kgolagano e e sa khutleng fa gare kwa Modimo le lona, yo o kanetseng ka madi a gagwe, a ntsho mo go lona ka nonofa ya ga Keresete tsothe tse di mo itumedisang. A Kgalalelo e nne kwa go ene ka metha le metha Amen. (aiōn g165, aiōnios g166) 22 Bakaulengwe, tswee-tswee reetsang ka bopelotelele se ke se buileng mo lokwalong lo, gonne ke lokwalo lo lo khutshwane. 23 Ke batla gore lo itse gore Mokaulengwe Timotheo o dule mo kgolegelong; fa a tla kwano ka bofefo, ke tlaa tla le ene go lo bona. 24 Ntumedisatsang baeteledipele ba lona botlhe le badumedi ba bangwe koo. Bakeresete ba ba kwano ba ba tswang kwa Itale ba a lo dumedisa. A tshogofatso ya Modimo e nne le lona lotlhe. Salang sentle.

Jakobe

1 Lokwalo lo lo tswa kwa go nna: Jakobe, mothanka wa Modimo le Morena Jesu Keresete. **2** Lo ya kwa: Bajuteng ba ba rategang, Bakaulengwe a botshelo jwa lona bo mo mathateng le diithaelong? Ke gone he itumeleng, **3** gonne fa tsela e na le dikgopi, bopelotelele jwa lona bo nna le nako e ntle ya go gola. **4** Ke gone mmang bopelotelele jwa lona bo gole, le gone lo seka lwa leka go intsha mo mathateng a lona ka go iphethekanya. Gonne bopelotelele jwa lona bo setse bo godile, jalo lo tlaa bo lo ipaakanyeditse go lebagana le sengwe le sengwe, lo itekanetse mo mokgweng, lo tletse ebile lo feletse. **5** Fa lo batla go itse se Modimo o batlang lo se dira, o kopeng, mme o tlaa lo bolelela ka boitumelo, gonne o ipaakanyeditse ka malatsi otlhe go naya bothle ba ba o kopang bothale jo bogolo; o sa kgopege. **6** Mme fa lo o kopa, tlhomamisang ka botlalo gore lo lebeletse gore o tlaa lo bolelela, gonne tlhologanyo e e belaelang e tlaa etsaetsega fela jaaka lekhubu la lewatle le le kgwekgweediwang le phailakwa ke phefo; **7** jalo maikaelelo mangwe le mangwe a o a dirang a tlaa bo a sa tlhomama, ka ntsha ya gore o leba kwa le kwa. Fa o sa kgope ka tumelo, se solofele Morena go go naya karabo nngwe e e tlhomameng. **9** Mokeresete yo o lebelwang kwa tlase mo lefatsheng leno a itumele, gonne o mogolo mo matlhong a Morena. **10** Mme mohumi o tshwanetse go itumelela gore dikhumo tsa gagwe ga di reye sepe mo Moreneng, gonne o tlaa tloga a nyelela, jaaka sethunya se se lathegetsweng ke bontle jwa sone se bo se e swa se swabile, se bolailwe ke mogote wa letsatsi la selemo. Go ntse fela jalo mo bahuming. Ba tlaa tloga ba a swa ba bo ba tlogela ditiro tsa bone tse dintsi kwa morago. **12** Go sego motho yo o sa ineeleng mo go direng bolelo fa a lekwa, gonne e tlaa re kwa morago o tlaa amogela serwalo sa botshelo e le tuelo ya gagwe, serwalo se Modimo o se solofeditse ba ba o ratang. **13** Mme gakologelwang, fa mongwe a batla go dira bolelo ga se Modimo o mo raelang, gonne Modimo ga o ke o batla go dira bolelo le gone ga o ke o raela ope gore a bo dire. **14** Thaelo ke go gogwa ke dikakanyo tse di bosula tsa motho le dikeletso tsa gagwe. **15** Dikakanyo tse di bosula tse, di gogela mo ditirong tse di bosula mme morago go bo go nna katsholelo loso e tswa kwa Modimong. **16** Ke gone se tsietsegeng, bakaulengwe ba ba rategang. **17** Mme le fa e le eng se se molemo ebile se itekanetse se tla kwa go rona se tswa kwa Modimong Mothodi wa lesedi lotlhe, mme o phatshimela ruri ka bosakhutleng go sena phetogo epe kgotsa moriti. **18** Gape e ne e le letsatsi le le itumedisang mo go One fa o re naya matshelo a masha, ka boammaaruri jwa Lefoko la one, mme re ne ra nna jaaka ekete re bana ba One ba ntsha mo go ba ntlo ya One e ncha. **19** Bakaulengwe, se lebaleng gore go botoka go reetsa thata, le go bua go le gonnye mme o sa tlae bogale; **20** gonne bogale ga bo re siamise, jaaka Modimo o batla re siama. **21** Ke gone latlheng goitlhe mo go sa siamang mo botshelong jwa lona, ke gore ka fa teng ga gago le ka fa ntle, mme ka boingotlo itumelelang molaetsa o montle o re o amogetseng, gonne o nonofile go boloka mewa ya rona jaaka e le One o o tshwereng

dipelo tsa lona. **22** Gape gakologelwang gore molaetsa o, o tshwanetse go obamelwa, eseng go reediwa fela. Ke gone se itsietseng. **23** Gonne fa motho a reetsa fela a sa o obamele o tshwana le motho yo o itebileng sefathogo mo seiponeng; **24** gonne fela jaaka a tsamaya, ga a tlhole a ipona, gape ga a sa tlhole a gakologelwa gore o lebega jang. **25** Mme fa mongwe a tswela ka go lebela pele mo molaong wa Modimo wa batho ba ba gololesegileng, ga a kitla a o gakologelwa fela, mme o tlaa dira se o se buang, mme Modimo o tlaa mo segofatsa thata mo go sengwe le sengwe se o se dirang. **26** Lefa e le mang yo o reng ke Mokeresete mme a sa laole lomele lwa gagwe lo lo bogale, o itsietsa fela, le tumelo ya gagwe ga e na molemo ope. **27** Mokeresete yo o phepa a bile a sena molato, ka fa ponong ya Modimo ke yo o tlhokomelang masiela le batholagadi, le yo mowa wa gagwe o emeng ka boammaaruri mo Moreneng, a sa marwa gope ke dibe tsa lefatsho.

2 Bakaulengwe ba ba rategang, lo ka re lo ba Morena Jesu Keresete Morena wa kgalalelo jang, fa lo supa kgethololo ka go ja le bahumi fela lo lebela bahumanegi kwa tlase? **2** Fa motho a tsena mo tlung ya lona ya kobamelo a apere diaparotse di tlhathlwa kgolo a bile a rwele mehitshana ya gouta e e tlhathlwa kgolo mo menwaneng ya gagwe, mme e re fela ka nako eo go bo go tla motho yo mongwe yo o humanegileng a apere makgasa, **3** mme lo bo lo amogela mohumi ka matseseleko a magolo lo mo naya setilo se se ntle ka tlotlo mme lo bo lo raya mohumanegi lo re, "O ka ema fale fa o rata kgotsa wa nna fa fatshe mo bodilong," jalo he, **4** go leba motho ka khumo ya gagwe go supa gore lo tlhotlhelediwa ke megopolo e e bosula. **5** Ntheetsang, bakaulengwe ba ba rategang: Modimo o tlhophile bahumanegi go huma mo tumelong le Bogosi jwa Legodimo ke jwa bone, gonne eo ke mpho e Modimo o e solofeditseng bothle ba ba o ratang. **6** Mme le fa go ntse jalo, mo batsamaing ba babedi, lo nyaditse wa mohumanegi. A ga lo lemoge gore bahumi ke bone ba ba tieng ba lo gogele kwa tshekong? **7** Gape gantsi thata ke bone ba ba tshegang Jesu Keresete; yo leina la gagwe le le tlotlegang lo bidiwang ka lone. **8** Ee ruri, go molemo fa o obamela taolo ya Morena wa rona, e e reng, "O tshwanetse go rata le go thusa bangwe ka wena fela jaaka o ithata ebile o ithokomela." **9** Mme lo tloa molao o wa Morena wa rona fa lo rekegela bahumi fela ebile lo ba ipelela; ke bolelo go dira jalo. **10** Mme motho yo o tshegetsang molao mongwe le mongwe wa Modimo, mme a relela go le gonnye, o molato fela jaaka motho yo o todileng molao mongwe le mongwe o o leng teng, **11** gonne Modimo o o rileng o seka wa nyala mosadi yo o setseng a na le monna, ke one o o rileng o seka wa bolaya, jalo le fa o sa tloa melao ya lonyalo ka go dira boaka, mme o bolaila mongwe, o robile melao ya Modimo gothelele, mme ka go dira jalo o molato fa pele ga One. **12** O tlaa atholwa le fa o dira kgotsa o sa dire se Keresete o rileng o se dire. Ke gone ela tlhoko se o se dirang le se o se akanyang; **13** gonne ga go kitla go nna le kutlwelo bothoko mo go ba ba iseng ba ke ba supe kutlwelo bothoko. Mme fa e le gore o ntse o le kutlwelo bothoko, jalo kutlwelo bothoko ya Modimo e e yang kwa go wena e tlaa fenyaa katsholelo ya gago e e tswang kwa go One. **14** Bakaulengwe ba ba rategang, go

thusang gore lo re lo na le tumelo ebile lo Bakeresete fa lo sa go supe ka go thusa ba bangwe? A tumelo e e ntseng jalo e ka boloka mongwe? **15** Fa o na le tsala e e tlhokang dijo le diaparo, **16** o bo o e raya o re, "Go siame, tsamaya sentle Modimo o go segofatse; o thuthafalelwe o bo o kgore," mme o bo o sa mo fe diaparo kgotsa dijo, moo go thusang? **17** Jalo a o a bona, ga go a lekana fela go nna le tumelo. O tshwanetse gape go dira molemo go supa gore o na le yone tumelo. Tumelo e e sa itshupeng ka ditiro tse di molemo ga se tumelo gothelele, e sule ebile ga e na mosola. **18** Mme kgotsa mongwe o ka nganga a re, "Wa re tsela e e yang kwa Modimong ke ka tumelo e le yosi, e sa okediwe ka sepe; go siame, nna ka re ditiro tse di molemo le tsone di bothokwa gonne kwa ntle ga ditiro tse di molemo ga o kake wa supa gore a o na le tumelo kgotsa nnyaa; mme le fa e le mang o ka bona gore ke na le tumelo ka tsela e ke itsayang ka yone." **19** A go santse go na le bangwe mo go lona ba ba reng, "Go dumela fela?" go lekanye? Go dumela mo Modimong o le mongwe fela? Ee, gakologelwang gore le mewa e e maswe e dumela selo se thata, mo e leng gore e roroma ka letshogo! **20** Motho ke wena wa seelele? O tlaa ithuta leng gore "Go dumela" ga gona mosola kwa ntle ga go dira se Modimo o batlang o se dira? Tumelo e e sa ungweng ditiro tse di molemo ga se tumelo ya boammaaruri. **21** A ga o gakologelwe gore le rraa rona Aberahame o ne a supiwa a le molemo ka nthla ya se a se dirileng, jaaka a ne a ineela go obamela Modimo, le fa go ne go raya gore a ntshe morwawe Isake sethabelo go swa mo sebesong? **22** O a bona, o ne a ikanya Modimo mo e leng gore o ne a batla go dira le fa e le eng se Modimo o neng o se mmolelela; tumelo ya gagwe e ne ya felelediwa ke se a neng a se dira, ke ditiro tsa gagwe, ditiro tse di molemo. **23** Mme jalo ga diragala fela jaaka Dikwalo di bua, gore Aberahame o ne a ikanya Modimo, mme Morena a mo supa a le molemo mo ponong ya Modimo, le gone o ne a ba a tla a bidiwa "tsala ya Modimo." **24** Jalo lo a bona, gore motho o bolokwa ka se a se dirang, le se a se dumelang. **25** Rahabe, mosadi wa seaka ke sengwe sa dikai tsa se se buiwang. O ne a bolokwa ka nthla ya se a neng a se dira ka nako e o neng a fitlha barongwa a bo a ba ngwegisa ka tsela e sele ba bolokesebile. **26** Fela jaaka mmele o sule fa go sena mowa mo go one, tumelo le yone e ntse fela jalo e sule fa e le gore ke mofuta o o sa ungweng ditiro tse di molemo.

3 Bakaulengwe ba ba rategang, se gakaleleleng go bolelela ba bangwe diposo tsa bone, gonne rotlhe re dira diposo; mme fa rona baru, ba re tshwanetseng go itse botoka, re dira diposo, go othaiwa ga rona go tlaa nna gogolo go na le ga ba bangwe. **2** Fa motho le fa e le mang a ka kgona go laola loleme lwa gagwe, go supa gore o na le thata ya go ikgapa ka ditsela tsotlhe. **3** Re ka dira gore pitse e tona e retologele kwa re batlang e ya teng ka tomonyana e e mo molomong wa yone. **4** Le lomatsanyana (seterebonyana) lo dira gore sekepe se se tona se retologele gongwe le gongwe kwa mokgweetsi a batlang se ya teng, le fa diphefo di tsubutla. **5** Fela jalo loleme le lone ke selo se sennyenyane, mme lo ka dira tshenyeno e kgolo thata. Sekgwa se se tona se ka tshujwa ke thasenyana.

6 Mme loleme ke kgabo ya molelo. Lo tletse tshiamololo ebile lo leswafatsa tokololo nngwe le nngwe ya mmele. Mme loleme lo tlhosediswa ke molete ka sebele, jalo lo ka fetolela matsshelo a rona otlhe mo kgabong e e lakaselang ya tshenyeno e kgolo. (**Geenna g1067**) **7** Batho ba katisitse, kgotsa ba ka katisa, mofuta mongwe le mongwe wa phologolo kgotsa nonyane e e tshelang le mofuta mongwe le mongwe wa segagabi le dithlapi, **8** mme ga go na ope yo o ka katisang loleme. Ka malatsi otlhe lo ipaakanyeditse go tsholola bothole jwa lone jo bo bolayang. **9** Nako e nngwe lo galaetse Rara wa rona wa legodimo, mme ka nako e nngwe lo hutsa batho ba ba bopilweng mo setshwanong sa Modimo. **10** Fela jalo, tshogofatso le phutso di tuntologa mo go one molomo. Bakaulengwe ba ba rategang, tota se ga se a siama. **11** A motswedi wa metse o tlo o pumpunyege metse a a siameng lwa nthla mme e re morago o tswe metse a a bothoko? **12** A o ka hula lotlhwere mo setlhareng sa mofeige, kgotsa difeige mo setlharing sa mofine? Nnyaa, gape ga o kake wa ga metse a a monate mo sedibeng se se letswai. **13** Fa o le bothale, tshela botshelo jo bo molemo jo bo thomameng gore ditiro tse di molemo di tle di tote, mme fa o sa ikgantse ka tsone, o tlaa nna bothale ka boammaaruri! **14** Mme kaga dilo tsotlhe, o seka wa ikgantsha kaga go nna bothale le go nna molemo fa o le bogalaka le lefufa ebile o ipona botoka; seo ke maaka a a maswe thata. **15** Gonne lefufa le go ipona botoka ga se bothale jo bo tswang kwa Modimong. Dilo tse di ntseng jaana ke tsa lefatshe ga se tsa semowa, di tlhotlhediswa ke Satane. **16** Gonne kwa go nang le lefufa teng kgotsa keletso ya go ipona botoka, go tlaa nna tobekano le mofuta mongwe le mongwe wa bosula. **17** Mme bothale jo bo tswang kwa legodimong, bo simologa bo le phepa ebile bo le bonolo. Jalo bo rata kagiso le boikobo. Bo letlelela dipuisano ebile bo rata go ineela mo go ba bangwe; bo tletse kutlwelo-bothoko le ditiro tse di molemo. Bo itekanetse, bo tlhamaletse ebile bo a ikanyega. **18** Mme ba e leng badira kagiso ba tlaa jala dipeo tsa kagiso ba bo ba roba thobo ya bomolemo.

4 Se se dirang dikomano le dintwa mo gare ga lona ke eng? A ga se ka nthla ya dikeletso tse di bosula tse di lwang mo ditokololong tsa lona. **2** Lo batla se lo senang naso, jalo lo a bolaya go nna naso. Lo eletsa se ba bangwe ba nang naso, mme ga lo kgone go nna naso, jalo lo simolola ntwaga go se tsaya mo go bone. Mme le fa go ntse jalo lebaka la gore lo seka lwa nna le se lo se batlang ke ka nthla ya gore ga lo se kope mo Modimong. **3** Mme le fa lo kopa ga lo se fiwe gonne maikaelelo otlhe a lona ga a siama, lo batla fela se se tlaa lo nayang boitumelo. **4** Lo tshwana le mosadi yo o nyetsweng yo o sa ikanyeng yo o ratang baba ba monna wa gagwe. A ga lo lemoge gore go nna botsalano le baba ba Modimo, ebong dithato tse di bosula tsa lefatshe leno, go lo dira baba ba Modimo? Ke bua gape ka re fa maikaelelo a lona e le go itumela mo dithatong tse di bosula tsa lefatshe leno, le le sa bolokwang, ga lo kake gape lwa nna ditsala tsa Modimo. **5** Kgotsa lo akanya gore lokwalo lo raya eng fa lo re Mowa O O Boitshepo, o Modimo o o agisitseng mo go rona, o re disitse ka lefufa le le bonolo. **6** Mme o re naya nonofo yo go thabana

le dikeletso tsotlhe tse di bosula tse di ntseng jaana. Jaaka Lokwalo lo re, Modimo o naya ba ba ingotlang nonofo, mme o kgathanong le ba ba ikgodisang le ba ba mabela. 7 Ke gone ineeleng mo Modimong ka boingotlo. Tlhabanang le diabolo mme o tlaa lo tshaba. 8 Mme fa lo atamela mo Modimong, le One o tlaa lo atamela. Tlhapang diatla tsa lona, baleofi ke lona lo bo lo letle dipelo tsa lona di tlae ka Modimo fela go di ntlafatsa le gore di ikanyege mo go One. 9 Hutsafalang lo lele ka ntlha ya dilo tse di sa siamang tse lo di dirileng. A go nne boikotlhae le bohutsana jwa boammaaruri. A go nne bohutsana mo boemong jwa setshego, le go sa itumeleng mo boemong jwa boitumelo. 10 Ke gone e tlaa reng fa lo ikutlwa lo se ba sepe fa pele ga Morena, o tlaa lo tsholeletsa kwa godimo a lo kgothatsa a bo a lo thusa. 11 Se tshwaaneng diphoso lwa ba lwa buana bosula bakaulengwe ba ba rategang. Fa lo dira jalo, lo tlaa bo lo tlhabana le molao wa Modimo o o reng lo ratane, lo o supa o sa siama. Mme tiro ya lona ga se go akanya gore a molao o o siame kgotsa ga o a siama, fa e se go o obamela fela. 12 Yo o dirileng molao ke ene fela a ka atholang sentle mo gare ka rona. Ke ene fela o ka atholang go re boloka kgotsa go re nyeletsa. Jalo lo na le tshwanele efe go sekisa kgotsa go bona ba bangwe diphoso? 13 Bonang, lona batho ba lo reng, "Gompieno kgotsa ka moso re tlaa ya kwa motsing wa bolebe, re nna teng koo ngwaga, mme re simolole teng madirelo a papadi." 14 Lo itse jang se se tlaa lo diragalelang ka moso? Gonnye bolelele jwa matshele a lona ga bo thomamisege fela jaaka mouwane wa mo mosong, o bonala jaanong jaana; mme e re ka lobakanyana o bo o nyeletse. 15 Se lo tshwanetseng go se bua ke se, "Fa Morena a rata, re tlaa tshela re bo re dira se kgotsa sele." 16 E seng jalo lo tlaa bo lo ikgantsha ka maano a e leng a lona, mme go itshepa mo go ntseng jaana ga go itumedise Modimo. 17 Gakologelwang gape gore, go itse se se molemo se se tshwanetseng go dirwa, mme se bo se sa dirwe, ke bolele.

5 Bonang, lona bahumi, jaanong ke nako ya go lela le go bokolela ka bohutsana jo bogolo ka ntlha ya go bona matshwenyego otlhe a a boitshengang a a kwa pele ga lona. 2 Gonnye khumo ya lona e setse jaanong e bola, le diaparo tsa lona tse dintle di fetoga magkasa a a jelweng ke motoutwane. 3 Tlhwatlhwa ya gouta le selefera ya lona e wela kwa tlase ka bofefo, go ntse jalo e tlaa nna e le bosupi jo bo lo tlhabantshang, e bo e e ja nama ya lona jaaka molelo. Ke sone se lo se ipeetseng go se amogela mo letsatsing leo la tshekiso. 4 Mme reetsang! Reetsang selelo sa badiri ba ba dirang mo masimong a lona ba lo ba tsieditseng ka tuelo ya bone. Selelo sa bone se tsenye mo ditsebeng tsa Morena wa Masomosomo. 5 Lo dirisitse dingwaga tsa lona mo lefatsheng lo le mo letlepong, lo itumedisa dikeletso tsotlhe tsa dipelo tsa lona, mme jaanong dipelo tsa lona tse di nonneng di siametse polao. 6 Lo athotshe ebile lo bolaila batho ba ba molemo ba ba neng ba sena nonofo go itshireletsa mo go lona. 7 Ke lona bagaetsho, bakaulengwe ba ba rategang, ba lo letetseng go bowa ga Morena, nnang pelotelele, jaaka molemi yo o letelang go fithelela letlhabula fa thobo ya gagwe ya bothokwa e butswa. 8 Ee nnang, pelotelele. Lo bo lo kgothale, gonnye go tla ga Morena go gaufi.

9 Lo se ka lwa ngongoregela bakaulengwe. A lona ka bolona lo setse lo fetile go nyadiwa? Gonnye bonang! Moatthodi yo mogolo o e tla. O setse a le gaufi mo leseng e nne ene yo o tshwayang diphoso tsotlhe tse di tshwanetseng go supuwa. 10 Mo dikaing tsa bopelotelele mo dipogisegong, tsayang malebela mo baporofiting ba Morena. 11 Re itse ka fa ba itumelang ka teng jaanong gonnye ba ne ba le boammaaruri mo go ene ka nako eo, le fa ba ne ba go bogela thata. Jobe ke sesupo sa motho yo o neng a tswelitse a ikanya Morena mo matshwenyegong; mo maitemogelong a gagwe re bona ka fa leano la Modimo le neng la felela ka bomolemo ka teng, gonnye Morena o tletse bopelothomogi le kutlwelo-bothoko. 12 Mme mo godimo ga dilo tsotlhe, bakaulengwe ba ba rategang, se ikaneng ka legodimo kgotsa ka lefatsho kgotsa le fa e le ka eng; lo re "ee" kgotsa "nyaa" fela, gore lo seka lwa leofa lwa tloga lwa welwa ke phutso ya Modimo. 13 A mongwe mo go lona o tlhokofetse? A nne a tswelile a rapele ka gone. Mme ba ba nang le lobaka lwa go leboga ba tshwanetse go tswelilela ba opelela Morena dipako. 14 A mongwe o a lwala? O tshwanetse go bitsa bagolwane ba phuthego mme ba mo rapelele ba bo ba mo tshole lookwane ba kope Morena go mo fodisa. 15 Mme thapelo ya bone, fa e dirwa ka tumelo, e tlaa mo fodisa, gonnye o tlaa mo kakatlolola mme fa e le gore bolwetse jwa gagwe bo ne bo dirwa ke sebe sengwe, Morena o tlaa mo itshwarela. 16 Ipoletaneng ditlolo mme lo rapelelane gore lo tle lo fodisiwe. Thapelo ya mosiami e e thomameng e na le nonofo e kgolo le maungo a mantle. 17 Elija e ne e le motho fela jaaka rona, mme le fa go ntse jalo e ne ya re a rapela ka tlhoafalo gore pula e seka ya na ya se ka ya na mo dingwageng tse tharo le dikgwedi tse thataro tse di latelang! 18 Mme a rapela gape, gore jaanong e ne, mme ya simolola go na mme bojang jwa nna botala le masingwana a simolola go ungwa gape. 19 Bagaetsho, ha mongwe mo go lona a timeletse ke boammaaruri, mme mongwe a mo sokolola; 20 a a itse ha yo o sokololang moleofi mo timelong ya tsela ya gagwe, a tlaa golola mowa mo losong, mme a ba a bipa bontsi jwa dibe.

Petere I

1 Lokwalo lo lo tswang kwa go: Petere, mo rongwa wa ga Jesu Keresete. A kwalela: Bakeresete ba Bajuta ba ba lelekilweng mo Jerusalema mme ba falalela mo Pontose, Galalea, Kapadosia, Ausia, le Bethania. 2 Ditsala tse di rategang, Modimo Rara o lo thophile bogologolo e bile o itsile gore lo tlaa nna bana ba one. Mme Mowa o o Boitshepo o ntse o dira mo dipelong tsa lona, o lo tlhatswa ka madi a ga Jesu Keresete go lo dira gore lo mo itumedise. A Modimo o lo segofatse thata mme o lo okeletse kgololesego mo tlaelolong yotlhe le poifo. 3 A tlotlo yotlhe e nne mo Modimong, Modimo Rara wa Morena wa rona Jesu Keresete: gonne ke kutlwelo-bothoko ya gagwe ya kgololesego e e re neileng tshwanelo e e faphegileng ya go tsalwa sesha; gore jaanong re bo re le maloko mo lwapeng lwa Modimo. Jaanong re tshela mo tsholofelong ya botshelo jo bo sa khutleng ka ntlha ya gore Keresete o tsogile gape mo baswing. 4 Mme Modimo o beetse bana ba one mpho e e sa rekweng ya botshelo jo bo sa khutleng; lo e beetse kwa legodimong, mpho e e itshekileng ebile e sa leswafala, e e sa fetogeng ebile e sa bole. 5 Mme Modimo, mo nonofong ya one e kgolo, o tlaa tlhomamisa gore lo tsene koo lo babalesegile go e amogela, ka gonne lo a o ikanya. E tlaa nna ya lona mo letsatsing leo la bofelo gore lo e bone lotlhe. 6 Jalo itumeleng ka boammaaruri! Go na le boitumelo jo bogolo kwa pele, le fa go tsamaya go sa itumedise ka lobakanyana fano. 7 Diteko tse ke go leka tumelo ya lona fela, go bona gore a e nonofile ebile e itshekile kgotsa nnyaa. E lekwa jaaka molelo o leka gauta o bo o e tlhatswa, mme tumelo ya lona e bothokwa thata mo Modimong go gaisa gauta; jalo fa tumelo ya lona e sala e nonofile e sena go lekwa ka molelo, e tlaa lo tlisetisa pako le kgalalelo le tlotlo mo letsatsing la go bowa go gagwe. 8 Lo a mo rata ntswa lo ise lo ke lo mmone; le fa lo sa mmone, lo a mo ikanya; mme jaanong lo itumela ka boitumelo jo bo bonalang bo tswa legodimong ka bo lone. 9 Mme tuelo ya lona ya go mo ikanya e tlaa nna poloko ya mewa ya lona. 10 Poloko e, e ne e le sengwe se baporofiti ba neng ba sa se thaloganye ka bottalo. Le fa ba kwadile ka yone, ba ne ba nna le dipotso tse di ntsi gore e ka ne e ne e raya eng? 11 Ba ne ba hakgamala gore Mowa wa ga Keresete o o mo teng ga bone o ne o bua kaga eng, gonne o ba reile wa re ba kwale ditiragalo, tse di setseng di diragaletse Keresete go tloga ka lobaka loo: ebong go boga ga gagwe, le kgalalelo ya gagwe e kgolo e e ileng ya diragala kwa morago. Mme ba hakgamala gore mo gotlhe go tlaa diragala leng ebile go diragalela mang. 12 Ba ne ba bolelelwa kwa morago gore dilo tse ga di kitla di diragala mo lobakeng lwa botshelo jwa bone, mme e leng morago ga dingwaga tse di tlang, mo lobakeng lwa lona. Mme jaanong kwa bofelong Mafoko a a Molemo a, re a boleletse sentle rotlhe. Re a reretswe ka nonofo ya Mowa o o Boitshepo o o buileng le bone; mme ga go a tiwaelesega ebile ga a hakgamatsa gore le e leng bone baengene kwa legodimong ba tlaa dira thata go itse kaga gone. 13 Jaanong lo ka belebela ka lthoafalo le tlhalefo ya tshiamo ya Modimo fa Keresete Jesu a bowa. 14 Utwang

Modimo gonne lo bana ba One; se boeleng gape mo mekgweng ya lona ya bogologolo, lo dira bosula ka go bo lo ne lo sa itse tshiamo. 15 Mme nnang boitshepo jaanong mo go sengwe le sengwe se lo se dirang, fela jaaka Morena yo o lo bileditseng go nna bana ba gagwe a le Boitshepo. 16 Ene ka boene o rile, "Lo tshwanetse go nna Boitshepo, gonne ke Boitshepo." 17 Mme gakologelwang gore Rraeno yo o kwa legodimong yo lo mo rapelang ga a na ba o ba ratang thata go gaisa ba bangwe fa a athola. O tlaa lo athola ka katlhoho e e siametseng sengwe le sengwe se lo se dirang; jalo dirang ka poifo e e masisi mo go ene go tloga gompiano go fithlelela lo tsena kwa legodimong. 18 Modimo o duetse thekololo go lo boloka mo tseleng e e thata go ya legodimong e borraeno ba lekileng go e tsaya, mme thekololo e o e duetseng e ne e se gauta kgotsa selefera, jaaka lo itse sentle. 19 Mme o lo duetse ka madi a bothokwa a botshelo a ga Keresete, yo o senang bolelo, Kwana ya Modimo e e senang selabe. 20 Modimo o mo tlhophile ka maikaelelo a bogologolo pele ga tshimologo ya lefatsho, mme o senotswe mo lobakanyaneng lo lo fetileng, mo malatsing ano a bofelo, e le tshogofatso mo go lona. 21 Ka ntlha ya se, go ikanya ga lona go ka nna mo Modimong o o tsoiseng Keresete mo baswing wa bo wa mo naya kgalalelo e kgolo. Jaanong tumelo ya lona le tshogofatso di ka nna mo go ene a le nosi. 22 Jaanong lo ka nna le lorato mo go mongwe le mongwe ka ntlha ya gore mewa ya lona e tlhatswitswe bohula le kilo fa lo ikanya Keresete go lo boloka; jalo ratanang thata, ka dipelo tsa lona tsoithe. 23 Gonne lo na le botshelo jo boshia. Ga lo a bo newa ke batsadi ba lona, gonne botshelo jo ba neng ba lo bo neile bo tlaa nyelela. Jo boshia jo bo tlaa nna ka bosakhutleng. (aiōn g165) 24 Ee, botshelo jwa rona jwa tlhologo bo tlaa nyelela jaaka bojang fa bo nna bosetlha bo omelela. Bogolo jwa rona jotlhe bo tshwana le sethunya se se kgolegang se bo se wela fa fatshe; 25 mme Lefoko la Morena le tlaa nna ka bosakhutleng. Le molaetsa wa gagwe ke Mafoko a a Molemo a lo a reretsweng. (aiōn g165)

2 Ke gone tlogelang maikutlo a lona a kilo. Se itirengjaaka e ka re lo siame! Latlhang go tontlololana le mafufa le ditshebo. 2 Fa lo ikutlwetse bomolemo jwa Modimo le tshiamo ya One, lelelang gore lo okelediwe, jaaka losea lo lelela mashi. Jang lefoko la Modimo le baleng, akanyang kaga lone mme lo gole ka nonofo mo Moreneng lo bo lo bolokwe. 4 Tlang mo go Keresete, yo e leng ene motheo wa Lefika le le tshedileng le Modimo o agang mo go lone le fa batho ba mo ganne o bothokwa thata mo Modimong o o mo tlhophileng mo godimo ga bothle. 5 Mme jaanong lo fetogile maje a kago aa tshelang go dirisiwa ke Modimo mo go ageng ntlgo ya One. Se sengwe se segolo, lo baperesiti ba One ba ba boitshepo; jalo tlang kwa go One. (Lona ba lo amogelesegang mo go One ka ntlha ya ga Jesu Keresete), mme lo abele Modimo dilo tse di O itumedisang. 6 Jaaka Dikwalo di gatelela di re, "Bonang ke romela Keresete go nna mokgethegi yo o tlhophileng ka kelothoko, Lentswe la bothokwa la kgokgotsho la phuthogo ya me, ebile ga ke kitla ke tlhabisa bape ditlhong ba ba mo ikanyang." 7 Ee, o bothokwa thata mo go lona ba lo dumelang; le mo go ba ba mo ganang, ee, "Lone lentswe la kgokgotsho, le le gannweng ke baagi ke lone le e leng lentswe la kgokgotsho, le le tlotlwang thata ebile

e le bontlha bongwe jwa kago." 8 Gape Dikwalo tsa re, "Ke lentsewe le bangwe ba tlaa kgotswang mo go lone, ebile ke le le tlaa ba digang." 9 Mme ga lo a nna jalo, gonne lo tlhophilwe ke Modimo ka bo One, lo baperesiti ba Kgosi, lo boitshepo ebile lo a galalela, lo ba Modimo tota, tse tsothe e le gore lo tle lo supegetse ba bangwe ka fa Modimo o lo biditseng ka teng go lo ntsha mo leffing go tseno mo leseding la one le le ntle. 10 Lo kile lwa bo lo se ba sepe; mme jaanong lo ba Modimo. Lo kile lwa bo lo itse go le gonnye ka tshiamo ya Modimo; mme jaanong matshelo a lona a fetotsewe ke gone. 11 Bakaulengwe ba ba rategang, lo baeti fela mono. E re ka legae la lona tota le le kwa legodimong ke lo kopa gore lo ikgaphe mo dithapelong tse di bosula tsa lefatshe leno; ga se tsa lona, gonne di thabana le mewa ya lona. 12 Nnang kelothoko ka fa lo itshwarang ka teng mo go bangwe ka lona ba ba sa bolokwang; gonne le fa ba lo belaela ba bua kaga lona ba tlaa fetsa ba baka Modimo ka ntsha ya ditiro tsa lona tse di molemo fa Keresete a bowa. 13 Ka ntsha ya Morena, utlwang molao mongwe le mongwe wa puso ya lona: molao wa kgosi jaaka e le thogo ya morafe, 14 le ya bagolwane ba kgosi, gonne o ba rometse go othaya ba ba dirang molato, le go tlotla ba ba dirang tshiamo. 15 Ke go rata ga Modimo gore matshelo a lona a a siameng a didimatse dielele tse di nyatsang Efangele ba sena kitso ya gore e ka ba direla eng, ba ise ba ke ba lemoge nonofo ya yone. 16 Lo golotswe mo molaong, mme mo ga go reye gore lo gololesegile go dira molato. Tshelang jaaka ba ba golotsweng go dira go rata ga Modimo fela ka nako tsothe. 17 Tlotlang mongwe le mongwe. Ratang Bakeresete gongwe le gongwe. Boifang Modimo lo tlotle puso. 18 Bathanka, lo tshwanetse go tlotla beng ba lona lo bo lo dire sengwe le sengwe se ba reng lo se dire, e seng fela fa ba siame ebile ba le bonolo, mme le fa ba le dithlogo-di-thata ebile ba le sethlogo. 19 Bakang Morena fa lo othaelwa go dira tshiamo! 20 Le fa go ntse jalo, ga lo newe tlotlo epe ka go nna pelotelele fa lo iteelwa melato ya lona; mme fa lo dira tshiamo lo bo lo e bogela, ebile lo le pelotelele mo dititeong, Modimo o itumela segolo bogolo. 21 Dipogo tse ke bontlha bongwe jwa tiro e Modimo o e lo neetseng. Keresete yo o lo bogetseng, ke sekao sa lona. Latelang dikgato tsa gagwe: 22 ga a ise a ke a leofe, ga a ise a ke a bue maaka, 23 ga a ise a ke a busolose fa a tlhapiwa; erile fa a boga ga a ise a ke a leke go ipusolotse; o ne a tlogela tshoko ya gagwe mo mabogong a Modimo o o atholang ka tshiamo ka nako tsothe 24 O tshotse morwalo wa maleo a rona ka mmele wa gagwe fa a a swa mo mokgorong, gore re tle re fetse le sebe mme re tshela botshelo jo bo siameng go tloga gompiano. Gonne dintho tsa gagwe di fodisitse tsa rona! 25 Jaaka dinku lo ne lo dule mo Modimong, mme jaanong lo boetse mo modiseng wa lona, mothokomedi wa mewa ya lona yo o lo babalelang mo dithaselang tsothe.

3 Basadi ba lo nyetsweng, kopanelang dithulagaganyo le banna ba lona; gonne fa ba gana go reetsa fa lo bua le bone kaga Morena, ba tlaa fengwa ke maitseo a lona, le matshelo a a itshekileng. 2 Matshelo a lona a BoModimo a tlaa bua le bone botoka go gaisa mafoko a lona. 3 Se kgathweng ke bontle jo bo ka fa ntle jo bo mo mekgabong ya gauta, kgotsa

diaparo tse di maphatsi-phatsi, kgotsa go itoga moriri. 4 Nnang bantle mo teng, mo teng ga dipelo tsa lona, ka bontle jo bo sa feleng jo bo siameng le ka mowa o o didimetseng o o leng bothokwa thata mo Modimong. 5 Bontle joo, jo bo mo teng, bo bonywe mo basading ba baitshepi ba bogologolo, ba ba neng ba ikanya Modimo ebile ba dirisanya sentle le banna ba bone mo dithulaganyong. 6 Jaaka Sara, a ne a utlwa monna wa gagwe Aberahame, a mo tlotla jaaka tlhogo ya lolwapa. Mme fa lo dira jalo lo tlaabo lo latela dikgato tsa gagwe jaaka barwadie ba ba siameng ebile ba dira se se molemo; jalo ga lo kitla lo boifa gore e ka re kgotsa lwa kgopisa banna ba lona. 7 Lona banna ba lo nyetseng, lo tshwanetse go nna kelothoko mo basading ba lona, lo itse se basadi ba lona ba se thokang, lo bo lo ba tlotle jaaka tokololo e e bokoa. Gakologelwang gore lona le basadi ba lona lo barui mmogo mo go amogeleng tshogafatso ya Modimo, mme fa lo sa ba direle jaaka lo tshwanetse dithapelo tsa lona ga di kitla di arabiwa. 8 Mme jaanong se ke lefoko la lona lotlhe: Lo tshwanetse go nna jaaka lolwapa lo lo itumelang; lo tletse kutlwelo bothoko mo go ba bangwe, lo ratana ka dipelo tse di bonolo le dikakanyo tse di kokobetseng. 9 Se dueleng bosula ka jo bo bongwe. Se ipusolotse mo go ba ba buang bosula ka lona. Mo boemong jwa moo, rapelelang gore Modimo o ba thuse, gonne re tshwanetse ra nna tshiamo mo go ba bangwe, mme Modimo o tlaa re go segofaletsa. 10 Fa o batla botshelo jo bo itumedisang, jo bo siameng, laola loleme lwa gago, o bo o tlhokomele dipounama tsa gago mo go bueng maaka. 11 Fapoga mo bosuleng mme o dire tshiamo. Leka go tshela mo kagisong le fa o tshwanetse go e latela go fitlelela o e bona! 12 Gonne Morena o lebetsetse baba ba gagwe, o reeditse dithapelo tsa bone; mme sefathlogo sa gagwe se kgathlanong thata le ba ba dirang bosula. 13 Mme ka metlha yotlhe ga go na ope yo o tlaa lo utlwisang bothoko go batla gore lo dire tshiamo. 14 Mme le fa ba tshwanetse, lo tshwanetse go fufegelwa, gonne Modimo o tlaa go lo duelela. 15 O ikanye Keresete Morena wa gago mme fa mongwe a botsa gore ke eng fa o dumela ka tsela e o dumelang ka yone e, ipaakanyetse go mmolelela, mme o mmolelele ka tshiamo le maitseo. 16 Dirang tshiamo; mme fa batho ba bua ka lona, ba lo raya maina a a sa siamang, ba tlaa tlhajwa ke dithlong ka ntsha ya go lo akela fa lo ne lo dira tshiamo fela. 17 Gakologelwang gore, fa Modimo o batla gore lo boge, go molemo go bogela tshiamo go na le go bogela se se sa siamang! 18 Keresete le ene o ile a boga. O swetse dibe tsa rona rotlhe baleofi gangwe fela, le fa ene a ne a sena sebe, gore a tle a re ise gae kwa Modimong re babalesegile. Mme le fa mmele wa gagwe o ne wa a swa, mowa wa gagwe o ne wa tswelwa wa tshela, 19 mme e ne e le mo moeng fa a etela mewa e e mo kgolegelong, a e rerela, 20 mewa ya ba ba neng ba gana go reetsa Modimo, bogologolo pele ga malatsi a ga Noa, ba ganne go reetsa Modimo, le fa o ne wa ba letela ka bopoletelele fa Noa a ntse a aga araka (ntllo e e kokobalang). Le fa go ntse jalo e ne e le batho ba ferabobedi fela ba ba neng ba bolokwa mo go nweleng mo morwaleleng o o boitshegang oo. 21 (Seo, ke se kolobetsa e se re supegetsang: Mo kolobetsong re supa gore re bolokilwe mo losong le mo tshakisong ka tsogo ya ga Keresete; e seng gore mebele ya rona e tlhatswiwe ka

metse fela, mme eleng gore mo go kolobediweng, re boela mo Modimong re o kopa go tlhatswa dipelo tsa rona mo sebang). 22 Mme jaanong Keresete o kwa legodimong, o ntse mo felong ga tlotlego go bapa le Modimo Rara, baengele bothe le dinonofa di a mo obamela, di a mo utlwa.

4 E re ka Keresete a bogile a bile a utlwisitswe bothoko, le lona lo tshwanetse go boga fela jaaka a bogile; lo tshwanetse go ipaakanyetsa go boga, le lona. Mme ke gone gakologelwang gore fa mebele ya lona e boga, sebe se lathegelwa ke nonofo ya sone. 2 Mme ga lo kitla lo senya lobaka lwa lona ka go tsamaya mo dithatong tse di bosula, mme lo tlaa tlhwaafela go dira go rata ga Modimo. 3 Ka lobaka lo lo fetileng lo dirile dilo tse di bosula tse batho ba ba sa itseng Modimo ba di itumelelang ebong, boaka, diithato tsa nama, go nwa bojalwa, mediro ya boitaolo, bothapelwa, le kobamelwa ya medimo ya disetwa, le dibe tse dingwe tse di maswe. 4 Ee, ditsala tsa lona tsa pele di tlaa hakgamala thata fa lo sa tlhole lo tlhakana le bone mo dilong tse di bosula tse ba di dirang, mme ba tlaa lo tshaga ka tshotlo ba bo ba lo nyatsa. 5 Mme gakologelwang gore, ba tshwanetse go lebagana le moathodi wa bothe, batshedi le baswi; ba tlaa otlaelwa tsela e ba tshedileng ka yone. 6 Ke gone ka moo Mafoko a a Molemo a reretsweng le e leng bone ba ba suleng, ba ba bolailweng ke morwalela, gore le fa mebele ya bone e otlhailwe ka loso, ba bo ba ka nna ba tshela mo mewing ya bone jaaka Modimo o tshela. 7 Bokhutlo jwa lefatshe bo e tla ka bonako. Jalo nnang batho ba ba tlhwaafetseng ba ba rapelang. 8 Mo godimo ga tsona tsothe, tsweleng mo go supeng lorato lo logolo mo go ba bangwe, gonne lorato lo bipa melato e mentsi ya lona. 9 Itumelelang go nna mo malapeng a lona le ba ba tlhokang dijo kgotsa marobalo. 10 Modimo o neile mongwe le mongwe wa lona dinonofa tse di faphegileng; tlhomamisang go di dirisa go thusa ba bangwe, lo bolelela ba bangwe masego a Modimo a mantsi. 11 A o bileditswe go rera? Jalo rera fela jaaka ekete Modimo o ne a bua ka wena. A o bileditswe go thusa ba bangwe? Go dire ka thata yotlhe le nonofo e Modimo o e go nayang, gore Modimo o tle o galalediwe ka Jesu Keresete; a go nne kgalalelo kwa go ene ka metlha le metlha, Amen. (aiōn g165) 12 Ditsala tse di rategang, lo se etsaetsege, kgotsa lwa hakgamala fa lo tsena mo ditekong tse di molelo tse di kwa pele, gonne mo ga se mo go sa itsiweng, selo se se sa tlwaelesegang se, se tlaa lo diragalela. 13 Mo boemong jwa mo, itumeleng, gonne diteko tse di tlaa lo dira bapata ba ga Keresete mo pogisong ya gagwe, mme morago lo tlaa nna le boipelo jo bo hakgamatsang jwa go tlhakanela kgalalelo ya gagwe mo letsatsing le le tlang fa le bonadiwa. 14 Itumele fa o hutsiwa o bo o tlhapiwa ka nthla ya go nna Mokeresete, gonne fa moo go diragala, Mowa wa Modimo o tlaa tla mo go wena ka kgalalelo e kgolo. 15 A ke se ka ka utlwa ka go boga ga gago ka nthla ya go bolaya kgotsa go utswa kgotsa go dira matshwenyego kgotsa go nna molothanyi kgotsa go tsena mo dilong tsa batho ba bangwe. 16 Mme ga go tlhabeise dithong go bogela go nna Mokeresete. Baka Modimo ka nthla ya tshwanelo ya go nna mo baneng ba ga Keresete, o bo o bidiwa ka leina la gagwe le lentle! 17 Gonne lobaka lwa katlholo lo tsile, mme lo tshwanetse go simologa pele mo baneng ba e leng ba Modimo.

Mme fa rona ba re leng Bakeresete re tshwanetse go atholwa, ke bokhutlo jo bo maswe jang jo bo letleng ba ba iseng ba ke ba dumele mo Modimong. 18 Fa basiami ba sa bolokwe ka mothofo, ba e seng ba Modimo bone ba ka nna le letshoba lefe la go bolokwa? 19 Jalo fa lo boga ka fa go rateng ga Modimo, tsweleng lo dire tshiamo lo ikanye Modimo o o lo bopileng, gonne ga o kake wa lo tlhabisa dithong.

5 Mme jaanong, ke laya lona bagolwane ba phuthego. Le nna, ke mogolwane; ka matlho a me ke bonye Keresete a a swa mo mokgorong; le nna, ke tlaa tlhakanela kgalalelo le Tlotlo ya gagwe fa a bowa. Bagolwane ka nna, se ke kopo ya me mo go lona: 2 otlang letsomane la Modimo; le tlhokomeleng, e seng ka go patika; e seng ka tsholofelo ya go tsaya sepe mo go lone, mme e leng ka nthla ya gore lo tlhagaletse go direla Morena. 3 Lo se nne badipa, mme lo ba goge ka go nna sekao se se siameng. 4 Mme e tlaa re fa Modisa yo Mogolo a tla, tuelo ya lona e tlaa nna seabe se se senang bokhutlo mo kgalalelong le mo tlotlong ya gagwe. 5 Lona makawana, lo nne kutlo mo go ba bagolwane. Mme lotlhe lo direlane ka mewa e e kokobetseng, gonne Modimo o naya ba ba ikokobetsang masego a a faphegileng, mme o tlhabana le ba ba ikogomolang. 6 Fa lo ikokobetsa fa tlase ga seatla se segolo sa Modimo, mo lobakeng lwa One lo lo siameng o tlaa lo tsholetsa. 7 Mo letleng go tsaya dingongorego tsothe tsa lona le dipalebale, gonne o lo akanyetsa ka metlha yotlhe o bile o lebeleitse sengwe le sengwe se se lo amang. 8 Itlhokomeleng, lo lebelelelang dithaselo tse di tswang kwa go Satane, mmaba, wa lona yo mogolo. O potologa jaaka tau e e dumang e e bolailweng ke tlaa, o batla mongwe go mo gagolaka. 9 Nitamang fa a tlhasela. Ikanyeng Morena; lo bo lo gakologelwe gore Bakeresete ba bangwe mo tikologong ya lefatshe le bone ba raletse dipogiso tse. 10 Fa lo sena go boga ka lobakanyana, Modimo wa rona yo o tletseng bopelotlhomogi ka Keresete, o tlaa lo naya kgalalelo ya One e e sa khlutleng. One ka boone o tlaa lo tsholetsa, mme o lo tlise, o lo thatafatse go gaisa ka metlha. (aiōnios g166) 11 Mo go One a go nne nonofo mo dilong tsothe, ka metlha. Amen. (aiōn g165) 12 Ke lo romelela lokwalo lo lo khutshwane lo ka bopelonomi jwa ga Silefano yo, mo mogopolong wa me, e leng mokaulengwe yo o ikanyegang thata. Ke solofela gore ke lo kgothatitse ka lokwalo lo gonne ke lo neile bosupi jwa boammaaruri ka fa Modimo o segofatsang ka teng. Se ke se lo boleletseng fa se tshwanetse go lo thusa go nitama mo loratong lwa One. 13 Phuthego e e mono Roma, ke mokaulengwe wa lona mo Moreneng, e a lo dumedisa; le morwaake Mareko. 14 Dumedisang ka mabogo go supa lorato lwa Sekeresete. A kagiso e nne le lona lotlhe ba lo mo go Keresete. Ke nna, Petere

Petere II

1 Lokwalo lo lo tswang kwa go: Simone Petere, motlhanka le morongwa wa ga Jesu Keresete. Lo ya kwa go: botlhe ba ba nang le tumelo e e tshwanang le ya rona. Tumelo e ke buang ka yone ke ya mofuta o Jesu Keresete Modimo le Mmoloki wa rona o re nayang. E ntle jang e bile o tshiamo jang go naya mongwe le mongwe wa rona tumelo e, e e tshwanang. **2** A o batla boutlwelo-bothoko jwa Modimo thata le kagiso? Jalo ithute go mo itse botoka thata. **3** Gonne fa o mo itse thata, o tlaa go naya ka nonofo ya gagwe, sengwe le sengwe se o se batlang go tshela botshelo jwa boammaaruri: O tlhakanela le rona le eleng kgalalelo le tshiamo ya gagwe. **4** Mme ka yone fela nonofo e kgolo eo, o re neile khumo le masego a a hakgamatsang a o a solofeditse, jaaka tsholofetso ya go re boloka mo dikeletsong le mo boleong jo bo re dikaganyeditseng, le go re naya mokgwa wa gagwe. **5** Mme go nna le dimpho tse, lo tlhoka mo gogolo go feta tumelo; lo tshwanetse gape go dira thata go nna tshiamo, le fa go sa lekana. Gonne lo tshwanetse go ithuta go itse Modimo thata le go bona se o batlang lo se dira. **6** Gape, ithuteng go beela dikeletso tsa lona fa thoko gore lo tle lo nne pelotelele le tshiamo, ka boitumelo lo letla Modimo go tsamaya le lona. **7** Se se tlaa dira gore kgato e e latelang e kgonege, e e leng ya lona go itumelela batho ba bangwe le go ba rata, mme morago lo tlaa gola mo go ba rateng thata. **8** Fa lo ntse lo tswelotse sentle mo tseleng e, lo tlaa nonofo mo moweng lo bo lo nna le maungo le tiriso mo go Morena wa rona Jesu Keresete. **9** Mme mongwe yo o palelwang ke go sala mekgwa e ya tumelo morago, ke sefofu, ebile ga a bone sentle, mme o lebetse gore Modimo o mo golotse mo botshelong jo bogologolo jwa sebe le gore jaanong o ka tshela botshelo jo bo tiileng, botshelo jo bo siametseng Morena. **10** Jalo bakaulengwe ba ba rategang, dirang thata go supa tota gore lommogo le ba Modimo o ba biditseng le ba o ba tlhophileng, mme ga lo kitla lo kgotswa kgotsa lo wa. **11** Mme Modimo o tlaa lo bulela dikgoro tsa legodimo go tsena mo Bogosing jo bo sa khutleng jwa Morena le mmoloki wa rona Jesu Keresete. **(aiōnios g166)** **12** Ke rulaganyetsa go nna ke lo gakolola dilo tse ka metlha le fa lo setse lo di itse ebile tota lo tsamaya sentle! **13** Mme Morena Jesu Keresete o mponentshitse gore malatsi a me mo lefatsheng a badilwe, ke gaufi le go swa. **14** Fela fa ke santse ke le fa ke ikaelela go nna ke lo romelela dikgakolole tse, **15** ke solofela go di gatelela sentle mo go lona gore lo tle lo di gakologelwe ka lobaka lo lolelele fa ke sena go tloga. **16** Gonne re ne re sa lo bolelele dinaane fa re lo tlhalosetsa nonofo ya Morena wa rona Jesu Keresete le go tla ga gagwe gape. Ka matlho a me ke bonye phatsimo e kgolo le kgalalelo ya gagwe! **17** Ke ne ke le gone mo thabeng e e boitshepo fa a phatshima ka tlotlo e o e neilweng ke Modimo Rraagwe; **18** ke utlwile lentswe leo le le galalelang la Bogosi le le neng le tswa legodimong, le re, "Yo ke Morwaake yo o rategang thata; ke itumela thata ka ene." **19** Jalo re bonye ebile re thomamisitse gore se Baporofiti ba se buileng se diragetse. Lo tlaa bo lo dira sentle go tlhokomela sengwe le sengwe se ba se kwadileng, gonne jaaka lesedi le phatshima

mo felong fa go lefifi, mafoko a bone a re thusa go tlhaloganyana dilo di le dintsi tse gongwe di ka bong di fiftsetse ebile di le thata. Mme fa lo ela tlhoko boammaaruri jo bo hakgamatsang jwa mafoko a baporofiti, jalo lesedi le tlaa phatsima mo meweng ya lona mme Keresete Naledi ya moso o tlaa phatsima mo dipelong tsa lona. **20** Gonne ga go na polelelo-pele epe e e kwadilweng mo Lokwalong e e ikaganyeditseng ke moporofiti ka bo ene. E ne e le ka Mowa O O Boitshepo o o neng o le mo bathong ba ba ratang Modimo o o ba neetseng molaetsa wa boammaruri o o tswang kwa Modimong.

2 Mme go ne go na le baporofiti ba tsietso mo malatsing ao, fela jaaka go tlaa nna le baruti ba tsietso mo go lona. Mme ka botlhale jwa bone ba tlaa bolela maaka kaga Modimo, ba fularela le e leng Morena wa bone yo o ba rekileng; mme ga bone e tlaa nna bokhutlo jo bo bofelo jo bo boitshegang. **2** Ba le bantsi ba tlaa latela thuto ya bone e e bosula ya gore boaka ga bo molato. Mme ka nthla ya bone Keresete le diitsetse tsa gagwe di tlaa sotlwa. **3** Baruti ba, ka nthla ya bohathla jwa bone, ba tlaa lo bolelela sengwe fela gore ba tseye madi a lona. Mme Modimo o ba athotse bogologolo mme tshenyego ya bone e mo tseleng e a tla. **4** Gonne Modimo ga o a ka wa rekegela le e leng baengele ba ba neng ba leofa, mme o ne wa ba latlhela mo moleteng, ba gokeletswe mo dikgageng tse di lefifi go fithelela letsatsi la katlholo. **(Tartaroō g5020)** **5** Mme ga o a ka wa rekegela batho ba bogologolo mo morwaleleng fa e se Noa fela, motho yo o esi yo o neng a bulela Modimo le ba ntlo ya gagwe ba supa. Mo lobakeng loo, Modimo o ne wa nyeletsa lefatsheng lotlhe le batho ba ba sa boifeng Modimo ka morwalela o mogolo. **6** Kwa morago wa fetola metse ya Sodoma le Gomora dithotobolo tsa melora wa bo wa e tlosa mo ponong ya lefatsheng, wa ba dira sekao sa botlhe ba ba sa boifeng Modimo gore ba lebe kwa morago mme ba boife. **7** Go ntse go ntse jalo Modimo wa falotsha Lote mo Sodoma ka nthla ya gore e ne e le mosiami, a utlwiswa bothoko ke bosula jo bo maswe jo a neng a bo bona gongwe le gongwe mo dikologong ya gagwe malatsi ka go tlhatlogana. **9** Jalo Modimo o ka falotsha nna le wena mo dithaelong tse di re dikaganyeditseng, mme wa tswelela ka go otlhaya ba ba sa o boifeng go fithelela letsatsi la bofelo la katlholo le tla. **10** O sethogo bogolo mo go ba ba tsamayang mo bosulengjwa bone, le mo dikakanyong tsa dithato tsa bone, le ba ba ikgogomosang ebile ba le bodipa, ba sa boife go nyatsa Bagalaledi, le fa e le go ga sisimoga, **11** le fa baengele ba ba kwa legodimong ba ba emang fa pele ga Morena, ebile ba nonofile thata go gaisa baruti ba ba tsietso, ba se ke ba bua ka lonyatso mabapi le ba ba bosula ba. **12** Mme baruti ba tsietso ba dielelele, ga ba botoka bope go na le dipologolo. Ba dira sengwe le sengwe se ba ikutlwang ba se rata; ba tsaletse go tshwarwa fela le go bolawa, ba nyatsa nonofo e e boitshegang ya bobipo e ba itseng go le gonye fela ka yone; mme ba tlaa nyelediwa mmogo le mewa e e maswe yotlhe le dinonofo tsa molete. **13** Eo ke yone tuelo e baruti ba ba tlaa e bonang ka nthla ya dibe tsa bone. Gonne ba nna mo bothapelweng jo bo maswe ja letsatsi le letsatsi. Ba tlhabisa dithong ebile ba leswe mo go lona, ba lo tsietsa ka go

tshela mo sebeng ka ntlha e nngwe ba tlhakana le lona mo medirong jaaka ekete ke batho ba ikanyegang. **14** Ga go na mosadi ope yo o ka falolang tebo ya bone ya boleo, mme ka boaka gone, ga ba ke ba kgotsofala. Ba hepisa basadi ba ba sa tiang mo tumelong, ba ithutile go nna bohula; mme ba atlhotswe ebile ba hutsitswe. **15** Ba dule mo tseleng mme ba latlhegile jaaka Balame, morwa Beore, yo o neng a ratile madi a o neng a ka a bona ka go dira tshiamololo. **16** Balame o ne a emisiwa mo tseleng ya gagwe ya boelele fa tonki ya gagwe e bua nae ka lentse wa the setho, e mo omanya e mo kgalemela. **17** Batho ba ga ba na mosola ba tshwana fela le metswedi ya metse e e kgadileng, ba solofetsa go le go ntsi mme ba sa tlise sepe; ga ba a nitama fela jaaka leru le le kgwegkweediwang ke matsubutsubu a diphefo. Ba sekisitswe go ya meleteng ya lefifi la bosakhutleng. (questioned) **18** Ba ipelafatsa ka maleo a bone le pheny. Mme ba dirisa dithata tsa bone jaaka seru sa bone ba hepisetsa; ba ba falotseng botshelo jo bo maswe joo mo sebeng gape. **19** Ba ba raya ba re, "Ga lo a bolokwa ka go nna tshiamo; lo ka nna lwa bolokwa ka go tlhoka tshiamo. Dirang se lo se ratang, lo gololesege." Mme bone baruti ba ba ba nayang "kgololesego" e e mo molaong ke bone batlhanka ba boleo le tshenyego. Gonne motho ke motlhanka wa se se mo laolang. **20** Mme fa motho a falotse mekgwa e e bosula ya lefatshe ka go ithuta ka ga Morena le Mmoloki wa rona Jesu Keresete, mme a bo a ithatheletsa ka sebe a bo a nna motlhanka wa sone gape, o maswe bogolo go gaisa jaaka a ne a ntse pele. **21** Go ne go ka nna botoka fa a ne a ise a ke a itse ka Keresete gothelele go na le go ithuta ka ga gagwe mme morago ga moo a bo a fapoga melao e e boitshepo e o e neetsweng. **22** Mogologolo a re, "Ntisa e boela mo mathatseng a yone, mme kolobe e tlhaphisediwa fela go bowa e bidikama mo morageng gape." Go ntse fela jalo le mo go ba ba boelang mo dibeng tsa bone gape.

3 Lo ke lokwalo lwa me lwa bobedi, bakaulengwe ba ba rategang, mme mo go tsona tsoopedi ke lekile go lo gakolola, fa lo ntella kaga boammaaruri jo lo setseng lo bo itse: **2** boammaaruri jo lo bo ithutileng mo baporofiting ba ba boitshepo le mo go rona Baaposetoloi ba re lo tliseditseng mafoko a Morena le Mmoloki wa rona. **3** Sa ntlha, ke batla go lo gakolola gore mo malatsing a bofelo, go tlaa tla basotli ba ba tlaa dirang bosula bongwe le bongwe jo ba bo akanyang, mme ba sotla boammaaruri. **4** Se e tlaa nna tsela ya bone ya kganetsanyo: "Kana Keresete o solofeditse go tla gape, a mme o tsile? Jaanong o kae? Ga a kitla a tla! Ka ntlha ya eng, fela jaaka mongwe le mongwe a ka gakologelwa, sengwe le sengwe se ntse fela jaaka mo letsatsing la ntlha la lobopo." **5** Ba itebatsa ka bomo boammaaruri jo: Gore Modimo o ne wa senya lefatshe ka morwalela o o boitshegang bogologolo o sena go dira magodimo ka lefoko la taolo ya One, mme wa dirisa metse go dira lefatshe le go le dikaganyetsa. **7** Mme Modimo o ne wa laola lefatshe le magodimo go bolokelwa molelo ka letsatsi la katlholo, fa bothe ba ba senang boModimo ba tlaa nyelediwa. **8** Mme se lebaleng se, ditsala tse di rategang, gore letsatsi kgotsa dingwaga tse di sekete go simologa gompiano mo Moreneng di tshwana fela le ka moso. **9** Tota ga o bonya kaga tsholofetso ya One ya go bowa, ntswa ka nako tse dingwe go tle go bonale go ntse jalo.

Mme o letile, ka mabaka a a utlwalang gore ga o batle ope a nyelela, mme o naya baleofi lobaka lwa go ikwathaya. **10** Ruri letsatsi la Morena le e tla, le tla jaaka legodu, mme magodimo a tlaa feta ka modumo o mogolo le mebele ya selegodimo e tlaa nyelela mo molelong, mme lefatshe le sengwe le sengwe se se mo go lone se tlaa tshujwa ka molelo. **11** Mme jalo ere ka sengwe le sengwe se se re dikaganyeditseng se tlaa nyerologa, re tshwanetse ra bo re tshela botshelo jo bo boitshepo jo bo nang le boModimo jo bo ntseng jang? Re tlaa tshwanelwa ke go tshela botshelo jo bo boitshepo jwa Bo-Modimo. **12** Lo tshwanetse go lebelela letsatsi leo lwa ba lwa le ipaakanyetsa, letsatsi le Modimo o tlaa tshubang magodimo ka molelo, mme mebele ya selegodimo e tlaa nyerologa e nyelela mo dikgabong. **13** Mme re lebeletse tsholofetso ya Modimo ya magodimo a masha le lefatshe le lesa morago ga lobaka, kwa go tlaa bong go le tshiamo fela. **14** Ditsala tse di rategang, e re fa lo ntse lo lebeletse dilo tse go diragala le go tla ga gagwe, le kang thata go tshela lo sa leofe; lo bo lo nne kagiso mo go mongwe le mongwe gore a tle a lo itumelele motlhang a bowang. **15** Mme gakologelwang gore ke eng fa a diegile go tla. O re naya nako ya gore re tseye molaetsa wa gagwe wa poloko re o ise kwa go ba bangwe. **16** Mokaulengwe yo o bothale yo o rategang Paulo o buile ka dilo tse mo dikwalong tse dintsi tsa gagwe. Dikakgelo dingwe tsa gagwe ga di motlhofo go thalogannwa, mme go na le batho ba ba dielelele ka bomo, ba ba agang ba batla dithanolo, ditlhaloso tse di sa tlwaelesegang, ba pitikolotse dikwalo tsa gagwe gore di reye sengwe se se pharologanyo thata le se a neng a se raya, fela jaaka ba dira mo dintlheng tse dingwe tsa dikwalo tse di boitshepo mme phelelo ya bone ke tshenyego. **17** Ke lo tlhagisa pele ga nako, bakaulengwe ba ba rategang, gore lo tle lo ithokomele lo se ka lwa tsewa ke diphoso tsa batho ba ba bosula ba, e se re kgotsa lwa etsaetsega lwa tlhakana nabo. **18** Mme golang mo nonofong ya semowa lo itsanye sentle le Morena le Mmoloki wa rona Jesu Keresete. A mo go ene go nne kgalalelo yo tlhe le boitumelo jwa tlotlo, go tloga fano le ka bosakhutleng. Salang sentle. Ke nna, Petere. (aiōn g165)

Johane I

1 Keresete o ne a ntse a le teng fa lefatshe le simologa, le gone nna ke mmonye ka matlho a me ka bo ka mo reetsa a bua. Ke mo amile ka diatla tsa me. Ene ka sebele ke molaetsa wa Botshelo wa Modimo. **2** Ene yo, yo e leng Botshelo jo bo tswang kwa Modimong re ne ra mmontshiwa, jalo re supa gore re mmonye: ke bua kaga Keresete, yo e leng Botshelo jo bo sa khutleng. O ne a na le Rara mme ra mmontshiwa. (aiōnios g166) **3** Gape ka re, re lo bolelela ka se rona re se bonyeng tota ra bo ra se utlwa, gore lo tle lo nne le seabe mo bolekaneng le mo boitumelong jo re nang najo mo Modimong le mo go Jesu Keresete MorwaOne. **4** Mme fa lo dira jaaka ke bua mo lokwalong lo, le lona lo tlaa tlaa boitumelo, mme le rona re tlaa itumela. **5** O ke molaetsa o Modimo o o re neetseng go o lo bolelela: gore Modimo ke lesedi mme mo go One ga go na lefifi gothelele. **6** Jalo fa re re re ditsala tsa one, mme re tswela re nna mo leffing la semowa le mo sebeng, re bua maaka. **7** Mme fa re nna mo leseding la Modimo, fela jaaka Keresete a dira, hong re na le bolekaneng jo bo hakgamatsang le boitumelo yo mongwe mo go yo mongwe, mme madi a ga Jesu Morwa One a re thapisa mo boleong bongwe le bongwe. **8** Fa re re ga re na bolelo, re a itsietsa, ebile re gana go amogela boammaaruri. **9** Mme fa re ipolela dibe tsa rona mo go One, o ka ikangwa go re itshwarela le go re thapisa mo tshiamololong nngwe le nngwe. (Ebile go tshwanetse Modimo sentle thata go re direla jaana gonne Keresete o swetse go tlosa dibe tsa rona). **10** Fa re re ga re a leofa, re bua maaka ebile re bitsa Modimo moaki, gonne wa re re leofile.

2 Bananyana ba me, ke lo bolelela selo se gore lo tle lo ikgaphe mo boleong. Mme fa lo leofa, go na le mongwe go lo rapelela mo go Rara. Leina la gagwe ke Jesu Keresete, ene yo e leng mosiami ebile a itumedisa Modimo ka bottlalo. **2** Ke ene yo o rweleng bogale jwa Modimo ka ntsha ya dibe tsa rona go re golola mo bogaleng jwa Modimo, a bo a re lere mo bolekaneng le Modimo, ebile ke boitshwarelo jwa dibe tsa rona, le gale e seng tsa rona fela, ebong tsa lefatshe lotlhe. **3** Mme re ka tlhomamisa jang gore re ba gagwe? Re ka tlhomamisa ka go sekaseka bokafateng jwa rona ra re: a tota re leka go dira se a batlang re se dira? **4** Mongwe o ka re, "Ke Mokeresete; ke mo tseleng ya me go ya legodimong; ke wa ga Keresete." Mme fa a sa dire se Keresete a mo rayang a re a se dire, ke moaki. **5** Mme ba ba dirang se Keresete a se ba rayang gore ba se dire, ba tlaa nna ba rata Modimo thata. Ke yone tsela ya go itse gore a o Mokeresete kgotsa nnyaa. **6** Le fa e le mang yo a reng ke Mokeresete a tshela fela jaaka Keresete a ne a tshela. **7** Bakaulengwe ba ba rategang, ga ke lo kwalele taolo e ncha gore lo e obamela, gonne ke taolo e kgologolo e lo ntseng lo na nayo ka malatsi otlhe go tswa tshimologong. Lotlhe lo sale lo e utlwile pele. **8** Le fa go ntse jalo e ncha ka malatsi otlhe ebile e lo direla fela jaaka e ne e direla Keresete; mme fa re obamela taolo e, ebong go ratana, lefifi le a nyelela mo matshelong a rona, mme mo go rona go pha-tsime lesedi le lesa la botshelo la ga Keresete. **9** Le fa e le mang yo o reng o

tsamaya mo leseding la ga Keresete mme a ila Mokeresete ka ene o santse a le mo leffing. **10** Mme le fa e le mang yo o ratang Mokeresete ka ene o "tsamaya mo leseding" ebile o ka bona tsela ya gagwe a sa kgopiwe mo leffing le mo boleong. **11** Gonne yo o ilang Mokeresete ka ene otsamaya mo leffing la semowa ebile ga a itse kwa a yang teng, gonne lefifi le mo foufaditse gore a seka a bona tsela. **12** Ke lo kwalela dilo tse lotlhe, bananyana ba me, gonne lo itshwaretse dibe mo leineng la ga Jesu Mmoloki wa rona. **13** Ke lo kwalela dilo tse lona ba lo godileng gonne ruri lo itse Keresete, ene yo o ntseng a tshedile go tswa tshimologong. Mme lona makau, ke bua le lona gonne lo fentse ntwa ya ga Satane. Gape ke kwalela lona basimanyana le lona basetsanyana gonne le lona lo ithutile go itse Modimo Rraa-rona. **14** Mme lona borabana ba lo itseng Modimo wa bosakhutleng, le lona makawana a a nonofileng, ka Lefoko la Modimo mo dipelong tsa lona, ebile lo fentse ntwa ya ga Satane, ke lo raya ke re: **15** khutlisang go rata lefatshe leno le le bosula, le gotlhe mo le go lo neelang, gonne fa lo rata dilo tse, lo supa tota gore ammaaruri ga lo rate Modimo; **16** gonne dilo tse tsothle tsa lefatshe, dikeletso tse di bosula tse, dikeletso tsa boaka, kgathelgo ya go reka sengwe le sengwe se se gapang maikutlo a gagwe, le boikgodiso jo bo dirwang ke khumo le go tlotlega, dilo tse ga di tswa kwa Modimong. Ditswa mo lefatsheng leno le le bosula. **17** Mme lefatshe leno le a fela, mme dilo tse di bosula tse di idiwang tse di tlaa fela le lone, mme le fa e le mang yo o tsweleng a dira go rata ga Modimo o tlaa tshela ruri. (aiōn g165) **18** Bana ba me ba ba rategang, nako ya bofelo ya lefatshe leno e setse e tsile. Lo utlwile ka Moganetsa Keresete yo o tlang, ene yo o thabantsang Keresete, le gompiono batho ba le bantsi ba ba ntseng jaana ba setse ba tsile. Tiragalo e, e re dira gore re tlhomamisa tota gore bokhutlo jwa lefatshe bo atametse. **19** Batho ba ba thabantsang Keresete ba, e kile ya ne e le maloko a diphuthego tsa rona, mme tota e ne e se ba rona, gonne fa go ne go ntse jalo ba ka bo ba sa lomologa mo go rona. E rile ba lomologa mo go rona, ga supa sentle gore e ne e se ba rona gothelele. **20** Mme lona ga lo a nna jalo, gonne Mowa O O Boitshepo o tsile mo go lona, ebile lo itse boammaaruri. **21** Jalo ga ke lo kwalele jaaka ekete ke kwalela batho ba ba thokang go itse boammaaruri, mme ke lo kgalemela lo le ba lo itseng go lemoga pharologanyo fa gare ga boammaaruri le mmaaka. **22** Ana moaki yo mogolo ke mang? Ke yo o reng Jesu ga se Keresete. Motho yo o ntseng jalo ke moganetsa-Keresete, gonne ga a dumele mo go Modimo Rara le mo go Morwaone. **23** Gonne motho yo o sa dumeleng mo go Keresete, Morwa Modimo, ga a kake a dumela le mo Modimong. Mme yo o nang le Keresete Morwa Modimo, o na le One Modimo Rara. **24** Jalo nngang lo dumele se lo se rutilweng go tswa tshimologong. Fa lo dira jalo, lo tlaa aga lo le mo bolekaneng jo bo nitameng thata le Modimo Rara le Morwaone. **25** Mme ene ka sebele o re solofeditse se: botshelo ja bosakhutleng. (aiōnios g166) **26** Dilo tse ke di buang tse ka moganetsa-Keresete di raya fela ba ba tlaa ratang go lo dira difofu ba bo ba lo timetsa. **27** Mme lo amogetse Mowa O O Boitshepo ebile o nna mo go lona, mo dipelong tsa lona, gore lo seka lwa thokana le ope go lo ruta se

se siameng. Gonno o lo ruta dilo tsothle, ebile o Boammaaruri, ga se moaki; mme fela jaaka a buile, lo tshwanetse go nna mo go Keresete, lo sa kgaogane nae. **28** Mme jaanong bananyana ba me, nnang mo bolekaneng jwa boitumelo le Morena gore e re fa a tla lo bo lo tlhomamisa gore gotlhe go siame, mme ga re na go tlhaja ke dithong re bo re boela kwa morago fa re tshwanetse go mo kgathantsha. **29** E re ka re itse gore Modimo o siame ka malatsi otlhe o bile o dira fela se se siameng, re ka tseela fela gore botlhe ba ba dirang tshiamo ke bana ba One.

3 Bonang ka fa Rraarona wa legodimo a re ratang ka teng, gonno o re letla go bidiwa bana ba gagwe, akanyang ka gone, re bana ba gagwe tota! Mme ka batho ba le bantsi ba sa itse Modimo, ka tlhologo ga ba thaloganye gore re bana ba One. **2** Ee, ditsala tse di rategang, re setse re le bana ba Modimo gone jaanong jaana, ebile ga re kake ra akanyetsa gore go tlaa nna jang kwa morago. Mme re itse se, gore fa a tla re tshwana nae, gonno re tlaa mmona fela jaaka a ntse. **3** Mme mongwe le mongwe yo o dumelang se, ka botlalo, o tlaa leka go nna phepa gonno Keresete o phepa. **4** Mme ba ba tsweleng ka go leofa ba kgatthanong le Modimo, gonno sebe sengwe le sengwe se dirwa kgatthanong le keletso ya Modimo. **5** Ebile lo itse gore o ne a nna motho gore a tle a tlose diibe tsa rona, le gore ga gona bolelo mo go ene, thato ya Modimo ga e ke e tlhokafala mo go ene. **6** Mme jalo fa re nna mo go ene re mo obamela, re tlaa bo re sa leofe ka tsela epe; mme kaga ba ba tsweleng ba leofa, ba tshwanetse go lemoga se: gore ba leofa ka nthla ya gore ga ba ise ba ke ba bo ba mo itse kgotsa ba nne ba gagwe. **7** Ao bana ba me ba ba rategang, se letleng ope go lo tsetsa kaga se: fa lo dira se se molemo ka malatsi otlhe, ke ka nthla ya gore lo molemo, fela jaaka a ntse. **8** Mme fa lo tswelela lo leofa, go supa gore lo ba ga Satane, yo o saleng e re a simolola go leofa a bo a nna fela mo boleong. Mme Morwa Modimo o tletse go senya tsone ditiro tse tsa ga diabolo. **9** Motho yo o tsaletsweng mo go ba ntlo ya Modimo ga a leofe, gonno jaanong botshelo jwa Modimo mo bo mo go ene: jalo ga a kake a nna a tswelela ka go leofa, gonno botshelo jo boshaba tsetswe mo go ene ebile bo a mo laola, o tsetswe sesha. **10** Jaanong re ka bolela gore ngwana wa Modimo ke ofe le gore yo e leng wa ga Satane ke ofe. Le fa e le mang yo o tshelang botshelo jwa sebe ebile a sa rate mogagabo o supa gore ga se wa ba ntlo ya Modimo; **11** gonno molaetsa o o tsiling mo go rona go tswa tshimologong wa re re ratane. **12** Ga re a tshwanela go nna jaaka Kaene, yo a neng a nna wa ga Satane a bo a bolaya monnawe? O mmolaetsa eng? Ke ka nthla ya gore Kaene o ne a ntse a dira bosula ebile a itse sentle gore botshelo jwa ga monnawe bo botoka go na le jwa gagwe. **13** Ke gone se hakgamaleng ditsala tse di rategang fa lefatshle le lo ila. **14** Fa re rata Bakeresete ba bangwe, go supa gore re golotswe mo moleteng re filwe botshelo ja bo sa khutleng. Mme motho yo o senang lorato mo go ba bangwe o emetswe ke loso lo lo kwa pele. **15** Le fa e le mang yo o ilang Mokeresete ka ene ke mmolai tota mo pelong; mme lo itse gore ga go na mmolai ope yo botshelo ja bosakhutleng bo leng mo go ene. (aiōnios g166) **16** Re itse

gore lorato lwa boammaaruri ke eng ka go tsaya malebela mo go re sweleng ga ga Keresete e le sesupo. Mme le rona re tshwanetse go nshetsa ba ga rona ba Bakeresete matshelo a rona sethabelo. **17** Mme fa mongwe yo o tshwanetseng go bo e le Mokeresete tota a na le madi a le lekanyeng gore a mo tshedise sentle, go bo go diragala gore a bone mogagabo yo o tlhokang, mme a bo a sa mo thuse, lorato lwa Modimo lo ka nna jang mo go ene. **18** Bananyana, re khutliseng go nna re bua puo ya molomo fela re re rata batho; a re ba rateng ka boammaaruri, re bo re go supe ka ditiro tsa rona. **19** Hong re tlaa itse tota ka ditiro tsa rona gore re ka fa lothakoreng lwa Modimo, le matswalo a rona a tlaa sedimosega, le fa re ema fa pele ga Morena. **20** Mme fa re na le matswalo a a sa siamang re bo re ikutlwa gore re dirile molato, Morena o tlaa ikutlwa fela jalo ka rona gonno o itse sengwe le sengwe se re se dirang. **21** Mme ditsala tse di rategang, fa matswalo a rona a siame, re ka tla kwa Moreneng ka go tlhomamisa le go ikanya. **22** Gore re amogele sengwe le sengwe se re se lopang gonno re a mo obamela ebile re dira dilo tse di mo itumedising. **23** Mme se ke sone se Modimo o reng re se dire: re dumele mo leineng la Morwaone Jesu Keresete, re bo re ratane. **24** Ba ba dirang se Modimo o se buang, ba nna le Modimo mme le One o nna nabo, re itse gore se ke boammaaruri gonno Mowa O O Boitshepo o o re neileng o re bolelela jalo.

4 Ditsala tse di rategang, se dumeleng sengwe le sengwe se lo se utlwang fela ka gore mongwe a re ke molaetsa o o tswang kwa Modimong. O sekasekeng go bona gore a ke one tota. Gonno go setse go na le baruti ba le bantsi ba e seng ba boammaaruri, **2** mme tsela ya go bona gore a molaetsa wa bone o tswa mo Moweng O O Boitshepo ke go botsa potso e e reng, "A go dumelesega tota gore Jesu Keresete, Morwa Modimo, o ne a nna motho a le mo mmeleng wa setho fela jaaka rona?" Fa e le gore go ntse jalo, mme molaetsa o tswa kwa Modimong. **3** Fa e le gore ga go a nna jalo, molaetsa ga o tswa kwa Modimong, o tswa kwa go yo o tlhabantshang Keresete, jaaka "Moganetsa-Keresete" yo lo utlwileng ka ga gagwe yo o tlaa tlang mme mokgwa wa gagwe wa bobaba o o tlhabantshang ba ba kgatthanong le Keresete, **4** gonno go na le mongwe mo dipelong tsa lona yo o nonofileng go gaisa moruti mongwe le mongwe yo o bosula mo lefatsheng leno la boikepo. **5** Batho ba ke ba lefatshle leno, jalo ka tlhologo ba beile megopolo fela mo dilong tsa lefatshle ebile lefatshle le a ba reetsa. **6** Mme rona re bana ba Modimo; ke sone se e leng gore ba ba tsamayang le Modimo ba bo ba bua le One ke bone fela ba ba tlaa re reetsang. Ba bangwe ga ba kitla ba re reetsa, ke yone tsela e nngwe ya go itse gore a molaetsa o tswa kwa Modimong tota; gonno fa e le gore go ntse jalo, lefatshle ga le na go o reetsa. **7** Ditsala tse di rategang, a re itlwaetseng go ratana, gonno lorato lo tswa kwa Modimong mme ba ba ratang ebile ba le pelonomi ba supa gore ke bana ba Modimo, le gore ba simolola go o tlhaloganya botoka. **8** Mme fa motho a sena lorato le bopelonomi, go supa gore ga a itse Modimo, gonno Modimo ke lorato. **9** Modimo o supile ka fa o re ratang ka teng ka go roma Morwaone yo o tsetseng a le esi mo lefatsheng leno la boikepo go re leretse botshelo ja bosakhutleng ka loso

lwa gagwe. 10 Ka tiro e, re bona gore lorato lwa boammaaruri ke eng: ga se ka fa re ratang Modimo ka teng, mme ke lorato lwa One mo go rona go simolola ka nako e o neng o roma Morwaone go tla go nna sethabelo se se ntsheditsweng dibe tsa rona. 11 Ditsala tse di rategang, ere ka Modimo o re ratile mo go kalo, re tshwanetse go ratana le rona. 12 Gonne le fa re ise re ke re bone Modimo, fa re ratana Modimo o nna mo go rona, le lorato lwa One mo go rona lo a nonofa. 13 Ebile o tsentse Mowa wa One O O Boitshepo mo dipelong tsa rona e le sesupo mo go rona gore re nna le One mme le One o nna le rona. 14 Ebile gape, re bonye ka matlho a rona mme jaanong re bolelela lefatshe lothe gore Modimo o romile Morwaone go nna Mmoloki wa bone. 15 Le fa e le mang yo o dumelang gore Jesu ke Modimo, Modimo o nna mo go ene le ene mo go One. 16 Re itse gore Modimo o re rata go le kae gonne re ikutlwetse lorato lwa one, ebile re a o dumela fa o re bolelela gore o re rata thata. Modimo ke lorato, mme le fa e le mang yo o nnetseng ruri mo loratong o nnetse ruri mo Modimong le Modimo o nnetse ruri mo go ene. 17 Mme ka re nna le Keresete, lorato lwa rona lo gola sentle thata ka boitekanelo; jalo he ga re na go tlhajwa ke ditlhong re bo re swaba ka letsatsi la tshkiso, mme re tlaa lebagana nae ka tshupo le ka boitumelo, gonne o a re rata mme le rona re a mo rata. 18 Ga re a tshwana go boifa motho yo o re ratang ka lorato lo lo itekanetseng, lorato lwa gagwe lwa boammaaruri lo nyeletsa pelaelo yotlhe ka bosula jo re bo mo gopolelang go bo dira mo go rona, mme mo go supa gore ga re dumele ka bottlalo gore o re rata e le ruri. 19 Jalo a lo lemoga gore go mo rata ga rona go dirwa ke go bo a re ratile pele. 20 Fa mongwe a re, "Ke rata Modimo," mme a tswela ka go ila mogagabo ke moaki; gonne fa a sa rate mogagabo yo o mmonang ka matlho, o ka rata jang Modimo o a iseng a ke a o bone? 21 Mme Modimo ka sebele o rile motho a seka a rata Modimo fela, mme a rate le mogagabo.

5 Fa o dumela gore Jesu ke Keresete, gore ke Morwa Modimo le gore ke Mmoloki wa gago, jalo o ngwana wa Modimo. Mme botlhe ba ba ratang Rara ba rata le bana ba gagwe. 2 Jalo o ka ipatlisisa gore o rata bana ba Modimo go le kae, barwarago le bokgaisadio mo Moreneng, ka gore o rata Modimo go le kae. 3 Go rata Modimo go dira se Modimo o re bolelelang gore re se dire, mme go bua boammaaruri, go dira jalo ga go thata gotlhelele; 4 gonne ngwana mongwe le mongwe wa Modimo o ka o obamela, a feny a sebe le dikgatlhego tse di bosula ka go ikanya Keresete go mo thusa. 5 Mme ke mang yo o ka kgonang go lwa a bo a feny ntw a fa e se ka go dumela gore Jesu ka boammaaruri ke Morwa Modimo? 6 Mme re itse gore ke Morwa Modimo, gonne Modimo o buile jalo ka lentswe le le tswang kwa legodimong fa Jesu a kolobediwa, le jaaka a ne a lebaganye le loso, ee, eseng fela ka nako ya kolobetso ya gagwe mme e leng le ka nako e a neng a lebaganye le loso ka yone. Le Mowa O O Boitshepo, o o leng boammaaruri ka bosenabokhutlo o bua jalo. 7 Jalo re na le basupi ba le bararo ebong lentswe la Mowa O O Boitshepo mo dipelong tsa rona, lentswe le le neng la tswa kwa legodimong ka nako e Jesu a neng a kolobediwa ka yone, le lentswe le le neng la utlwala

pele ga a a swa. 8 Mme botlhe fela basupi ba, ba bua selo se le sengwe: gore Jesu Keresete ke Morwa Modimo. 9 Re dumela batho ba ba ntshang bosupi mo dikgotleng tsa rona tsa di tshoko, jalo re tlaa dumela ka boammaaruri sengwe le sengwe se Modimo o se re bolelelang. Mme Modimo o supa gore Jesu ke Morwaone. 10 Botlhe ba ba dumelang se ke se buang se, ba itse mo dipelong tsa bone gore ke boammaaruri. Fa motho le fa e le mang a sa dumele se, o dira Modimo moaki, ka gore ga a dumele se Mo-dimo o se buileng ka ga Morwaone. 11 Mme se tota Modimo o se buileng ke eng? Ke gore o re file botshelo jo bo sa khutleng, le gore jone botshelo jo bo sa khutleng jo, bo mo go Morwaone. (aiōnios g166) 12 Ke gone le fa e le mang yo o nang le Morwa Modimo o na le botshelo; le fa e le mang yo o senang Morwa One, ga a na botshelo. 13 Ke lo kwaletse se, lona ba lo dumelang mo go Morwa Modimo gore lo itse gore lo na le botshelo jo bo sa khutleng. (aiōnios g166) 14 Ebile re tthomamisa se, gore o tlaa re reetsa nako le nako fa re kopa sengwe fela mo go ene ka fa go rateng ga gagwe. 15 Mme fa re itse gore o a re reetsa fa re bua le ene le fa re isa dikopo tsa rona, mme re ka tthomamisa gore o tlaa re araba. 16 Fa o bona Mokeresete a leofa ka mokgwa o o sa iseng losong, o kope Modimo go mo itshwarela mme Modimo o tlaa mo naya botshelo, fa e se a dirile bolelo jo bo isang losong. Mme go na le bolelo jo bo felelang ka loso mme fa a bo dirile, ga go thuse sepe gore o mo rapelele. 17 Ee, tshiamololo nngwe le nngwe ke sebe. Ga ke bue ka dibe tse di tswaelesegileng tse; ke bua ka tshiamololo ele e e isang losong. 18 Ga go na ope yo e reng e le wa ba ntlo ya Modimo a bo a santse a leofa, gonne Keresete Morwa Modimo, o mo tshageditse mme diabol o ga a kake a mo leofisa. 19 Re itse gore re bana ba Modimo le gore lefatshe lothe mo tikologong ya rona le ka fa tlase ga nonofo le taolo ya ga Satane. 20 Ebile re itse gore Keresete, Morwa Modimo, o tletse go re thusa go tlhologanya le go itse Modimo wa boammaaruri. Mme jaanong re mo Modimong gonne re mo go Jesu Keresete Morwaone yo e leng Modimo wa boammaaruri a le nosi; ebile e le Botshelo jo bo sa khutleng. (aiōnios g166) 21 Bana bame ba ba rategang, ikogeng mo go sengwe le sengwe se se ka tsayang maemo a Modimo mo dipelong tsa lona. Amen. Wa lona ruri, Johane.

Johane II

1 Lokwalo lo lo tswa kwa go: Nna Johane Mogolwane wa phuthego. Ke lo kwalela: Siria mosadi yo o rategang, mongwe wa ba e leng ba Modimo tota, le bana ba gagwe ba ke ba ratang thata, jaaka mongwe le mongwe a ba rata mo phuthegong. **2** Ere ka boammaaruri bo le mo dipelong tsa rona ka bosakhutleng, (aiōn g165) **3** Modimo Rara le Jesu Keresete Morwaone ba tlaa re segofatsa ka kutlwelo bothoko e kgolo le kagiso, le ka boammaaruri le lorato. **4** Ke itumela thata jang go bona bangwe ba bana ba gago fano, le go ba bona ba tshela jaaka ba tshwanetse, ba setse boammaaruri morago, ba obamela taolo ya Modimo. **5** Mme jaanong ke batla go lo gakolola ka bofefo ditsala tse di rategang, ka molao o mogologolo o Modimo o saleng o o re naya go tswa tshimologong, gore Bakeresete ba tshwanetse go ratana. **6** Fa re rata Modimo, re tlaa dira sengwe le sengwe se o se re bolelelang. Mme o sale o re bolelela go tswa tshimologong gore re ratane. **7** Itlhokomeleng mo baeteledingpele ba e seng ba boammaaruri, mme go na le ba le bantsi ba bone mo tikologong, ba ba sa dumeleng gore Jesu Keresete o tsile mo lefatsheng e le motho a na le mmele o o tshwanang le wa rona. Batho ba ba ntseng jalo ba kgatlhanong le boammaaruri le Keresete. **8** Itlhokomeleng mo go nneng jaaka bone, lo bo lo lathegelwa ke sekgele se lona le nna re ntseng re fufulela go se tsaya. Tlhomamisang gore lo amogela tuelo ya lona e e tletseng e e tswang kwa Moreneng. **9** Gonne fa lo tlolela kwa pele go feta thuto ya ga Keresete, lo tlaa tlogela Modimo kwa morago; mme fa lo ikanyega mo dithutong tsa ga Keresete, lo tlaa nna le Modimo. Mme lo tlaa nna le Rara le Morwa. **10** Fa mongwe a tla go lo ruta, mme a sa dumele se Keresete a se rutileng, lo se ka lwa bo lwa mo laletsa kwa malapeng a lona. Lo se ka lwa mo kgothatsa ka gope. **11** Fa lo ka mo laletsa kgotsa lwa mo kgothatsa lo tlaa bo lo tlhakanetse nae boikepo jwa gagwe. **12** Ke ne ke eletsa go bua tse dingwe, mme ga ke batle go di bua mo lokwalong lo, gonne ke solofela go tla go lo bona ka bofefo mme ke gone re tlaa buisanyang ka tsone re bo re nna le nako ya boitumelo. **13** Bana ba ga kgaitradio ba a go dumedisa, yo e leng mongwe wa ba ba itshenketsweng ke Modimo. Wa lona ruri, Johane.

Johane III

1 Lokwalo lo lo tswa kwa go: Nna Johane, mogolwane wa phuthego. Ke lo kwalela: Gaeyo yo ke mo ratang ka boammaaruri. **2** Tsala e e rategang, ke rapelela gore o segofale mo dlong tsothe le gore mmele wa gago o itekanele fela jaaka ke itse ka fa mowa wa gago o itekanetseng ka teng. **3** Bangwe ba bakaulengwe ba ba kileng ba tla kwano ba intumedisitse thata ka go mpolelela gore botshelo jwa gago bo phepa ebile bo boammaaruri ka nako tsothe, le gore o tshela kafa Mafokong a a Molemo. **4** Go ne go se na boitumelo bope jo ke neng ka nna najo go gaisa go utlwa dikgang tse di ntseng jalo ka bongwanake. **5** Tsala e e rategang, o direla Modimo tiro e e molemo ka go tlhokomela baruti ba e leng batsamai le bareri ba ba fetang. **6** Ba boleetse phuthego kwano ka botsalano jwa lona le ditiro tsa gago tsa lorato. Ke itumela fa e a re ba tsamaya o ba fe dimpho ka bopelotshweu. **7** Gonne ba tsamaela Morena, mme ga ba tseye dijo, diaparo, mogope (tante) le fa e le madi mo go ba e seng Bakeresete, le fa tota ba ba reretse. **8** Jalo rona ka sebele re tshwanetse ra ba tlhokomela gore re tle re nne badiri le bone mo tirong ya Morena. **9** Ke romeletse phuthego lokwalo lo lo khutshwane ka selo se, mme Dioterefese wa moikgantshi, yo o ratang go itshusumeletsa kwa pele go nna moeteledipele wa Bakeresete teng koo, ga a batle ke mo laola ebile o gana go ntheetsa. **10** E tlaa re ke tsena koo ke tlaa go bolelela dingwe tsa dilo tse a di dirang le ka dilo tse di sa siamang tse a buang kaga me le ka puo e e tlhapatsang. Ga a gane fela go amogela batsamaisi ba Lefoko la Modimo, mme o raya ba bangwe a re ba seka ba ba amogela, mme fa ba dira jalo o leka go ba kgaola mo phuthegong. **11** Tsala e e rategang, o seka wa letla seka se se maswe se go go tlhotlheletsa. Sala morago fela se se molemo. Gakologelwa gore ba ba dirang tshiamo ba supa gore ke bana ba Modimo; mme ba ba tswelelang ba dira bosula ba supa gore ba kgakala le Modimo. **12** Mme batho botlhe, le Boammaaruri tota ba bua ka Demeterio. Le nna ka sebele ke ka bua jalo kaga gagwe, mme oa itse gore ke bua boammaaruri. **13** Ke na le go le gontsi mo ke ka go buang mme ga ke batle go go kwala, **14** gonne ke solofela go go bona mo bogautshwaneng mme ke gone re tlaa buang go le gontsi re le mmogo. Ke gone salang sentle. Ditsala kwano di a lo dumedisa, mme tswée-tswée o ntumedisetse mongwe le mongwe koo. Wa lona ruri, Johane.

Juda

1 Lokwalo lo lo tswang kwa go: Juda motlhanka wa ga Jesu Keresete mogoloa Jakobe. Go: Bakeresete gongwe le gongwe, barategi ba ba tlhophilweng ke One. **2** A kutlwelo bothoko ya Modimo, lorato le kagiso di lo oketsegele. **3** Ditsala tse di rategang, ke ne ke ikaletse go lo kwalela ka megopolo mengwe mabapi le poloko e Modimo o e re neileng, mme jaanong ke bona gore mo boemong jwa moo ke tshwanetse go lo kwalela ka sengwe se sele, ke lopa gore lo femele ka lhoafalo boammaaruri jo Modimo o bo neileng batho ba One gangwe fela mo dingwageng tsothe ba sa fetoge. **4** Mme ke bua ka nthla ya gore Baruti bangwe ba ba senang bo-Modimo ba setse ba itshukunyeditse mo gare ga lona, ba re, fa re sena go nna Bakeresete re ka itirela go rata re sa boife kwathhao ya Modimo. Tshenyego ya batho ba ba ntseng jalo e kwadilwe bogologolo gonne ba furaletse Mmusi yo e leng ene fela ka nosi Morena wa rona Jesu Keresete. **5** Mme karabo ya me mo go bone ke e: gakologelwang boammaaruri jo, jo lo setseng lo bo itse, gore Jehofa o bolokile chaba yotlhe go tswa mo lefatsheng la Egepeto, mme a nyeletsa botlhe ba ba neng ba sa mo ikanye le go mo reetsa. **6** Mme ke lo gakolola ka Baengele ba ba kileng ba bo ba le boitshepo, mme ba boela mo sebeng. Jaanong Modimo o ba golegetse mo kgolegelong ya lefifi ba letetse letsatsi la katholo. (aiōnios g126) **7** Gakologelwang ka metse ya Sodoma le Gomora le metse e e neng e bapile nayo, yotlhe e ne e tletse mefutafuta ya dibe, le banna ba ba leswe ba ba eletsang banna ba bangwe. Metse eo e ne ya nyelediwa ka molelo go nna thagiso mo go rona gore re itse gore go na le dihele kwa baleofi ba yang go othaiwang teng. (aiōnios g166) **8** Mme le fa go ntse jalo, baruti ba, ba tsietso, ba ntse ba tswelsetse go tshela botshelo jwa bone jo bo leswe jwa boleo, ba tlontlolola mebele ya bone ebile ba nyatsa le e leng bone babusi ba bone, gape ba kgala le bagalaledi. **9** Le ene Mikaele, mongwe wa Baengele ba bagolo thata ka nako ya fa ba tatalalana le Satane ka setopo sa ga Moshe, gaa a ka a leka go pega Satane molato, le fa e le go mo gobolola, fela a mo raya a re, "A Morena a go kgalemele." **10** Mme batho ba, ba kgala ba bile ba sotla sengwe le sengwe se ba sa se thaloganyeng, ba tshwana le diphologolo, ba dira sengwe le sengwe se ba se ratang, jalo he, ba senye mewa ya bone. **11** A bo go latlhega bone, gonne ba latela sekao sa ga Kaene yo o neng a bolaya monnawe, fela jaaka Balaame, ba tlaa dira le fa e le eng ka nthla ya go rata madi, le jaaka Kora, ga ba a ka ba reetsa Modimo, mme ba tlaa swela mo phutsong ya One. **12** Mme fa banna ba ba ikopanya le lona mo meketeng ya lorato ya phuthego ke dilabe tse di maswe mo gare ga lona, ba a tshega ba tswelsetse pele, ba bohula ba ikatela dijo ba sa akanyetse ba bangwe ba tshwana le maru a a kgokgoediwang ke phefo mo lefatsheng je le omeletseng a sena pula, ba solofetsa go le gontsi mme go se na sepe. Ba tshwana le ditlhare tsa maungo tse di senang sepe ka nako ya thobo, ga ba a swa fela, ba sule mo go menaganyeng, gonne ba epolotswe gotlhe ka medi go fisiwa. **13** Mo go salang sefularong sa bone ke matlhabisa ditlhong le maswabi jaaka mahulo a

a leswe a a tlogetsweng ke diphefo tsa makhubu a metsi a molapo mo lotshitshing, ba kaila gongwe le gongwe ba lebeba ba phatsima jaaka dinaledi. Mme kwa pele ga bonwa go na le lefifi le le ntsho la bosakhutleng le ba le baakanyeditsweng ke Modimo. (aiōn g165) **14** Enoke wa bogologolo yo o neng a tshela morago ga ga Adamo, o ne a itse kaga batho ba, a bo a bua ka bone a re: "Bonang, Morena o e tla le didikadike tsa baitshepi ba gagwe. **15** O tlaa lere batho botlhe ba lefatshe fa pele ga gagwe mo katlholong, go amogela kwathhao e e ba tshwanetseng, gore e nne bosupi jwa ditiro tse di boitshegang tse ba di dirileng ka go tsuolola Modimo, o tlaa senola gotlhe mo ba go buileng kaga gagwe." **16** Batho ba ke bangongoregi ba metlha yotlhe, ga ba ke ba thethebala dipelo, ba dira bosula bongwe le bongwe jo ba bo eletsang, ba boikantsho ba goletse ganong ke "baipegi" ba rata go itshupa. Mme fa ba tlolla ba bangwe, ba direla fela gore le bone ba tle ba ba thusa. **17** Ditsala tse di rategang, gakologelwang se baaposetoloi ba Morena wa rona Jesu Keresete ba se lo boleletseng, **18** gore mo metheng ya bofelo go tlaa tla basotli ba, ba maikaelelo a bone a botshelo e leng go itumela ka bosula bongwe le bongwe jo ba bo akanyang. **19** Mme ba tsosa dikganetsanyo; ba rata dilo tse di bosula tsa lefatshe, ga ba na Mowa O O Boitshepo mo go bone. **20** Mme lona, ditsala tse di rategang, lo tshwanetse go aga matshelo a lona ka tlhomamo gape a nitame mo mothaong wa tumelo ya rona e e boitshepo, lo ithuta go rapela ka nonofo le ka tlhothletso ya Mowa O O Boitshepo. **21** Lo nne mo kagelelong ya lorato lwa Modimo gore o kgone go lo segofatsa. Lo letele ka pelotelele botshelo jo bosakhutleng jo Morena wa rona Jesu Keresete o tlaa lo bo nayang ka kutlwelo bothoko ya gagwe. (aiōnios g166) **22** Mme lekang go thusa ba ba ganetsanyang le lona. Lo nne kutlwelo bothoko mo go ba ba belaelang. **23** Bolokang bangwe jaaka ekete lo ba swatola mo molelong wa dihele. Mme ba bangwe bone, ba thuseng gore ba itse Morena mme lo ntse lo ithokometse e se re kgotsa ba lo gogela mo dibeng tsa bone. Lo ile makgapha othe a maikepo a bone lo ntse lo le kutlwelo bothoko nabo jaaka baleofi. **24** Mme jaanong, a kgalalelo yotlhe e nne go One Modimo o o nosi, o o re bolokang ka Jesu Keresete Morena wa rona; Ee, boren le puso, le thata yotlhe le taolo ke tsa gagwe go tswa tshimologong: Gotlhe ke ga gagwe, gape e tlaa nna ga gagwe ka metlha le ka metlha. Mme gape o nonofile go lo tshegetsatsa gore lo se ka lwa relela lwa wa, le go lo tiisa lo sena selabe sa boleo, lo itekanetse mo kgalalelong ya gagwe, ka meduuetso e megolo ya boitumelo jo bo sa feleng. Ke nna, Juda. (aiōn g165)

Tshenolo

1 Lokwalo lo lo senola ditiro dingwe tse di tlaa akofang di diragala ka lobaka lo lo tiang mo botshelong jwa ga Jesu Keresete. Modimo o mo letile go senolela motlhanka wa gagwe Johane dilo tse mo ponatshelong; mme moengele a romelwa a tswa legodimong go thalosa gore ponatshelogo e raya eng. **2** Johane a kwala gotlhe mo, ebong Mafoko a Modimo le a ga Jesu Keresete le sengwe se a se utlwieng le se a se bonyeng. **3** Fa o balela phuthago polelo pele e, o tlaa amogela lesego le le faphegileng le le tswang mo Moreneng. Ba ba e reetsang fa e balwa ba bo ba dira se e se boelang, le bone ba tlaa segofala. Gonne lobaka lo atametse lo dilo tse di tlaa diragalang ka lone. **4** Lo ke lokwalo lo lo tswang kwa go: Johane A kwalela: Diphuthago tse supa mo Asia. Ditsala tse di rategang: A tshogofatso le kagiso tse di tswang mo Modimong di nne le lona. Yo o leng teng, le yo o neng a le teng le yoo tiang! Le mo meweng e e supang e e fa pele ga setilo sa gagwe sa Bogosi; **5** le mo go Jesu Keresete yo ka go ikanyega a re senolelang boammaaruri jotho. Ke ene wa nthla go tsoga mo baswing, le go sa tlhologang a a swa. O mogolo go feta kgosi nngwe le nngwe mo lefatsheng lothe. A a bakwe yo o re ratang ka metlha yotho le yo o re gololang mo dibeng tsa rona ka go re tshololela madi a gagwe a botshelo. **6** O re phuthetse mo Bogosing jwa gagwe a bo a re dira baperesiti ba Modimo Rraagwe. Mo neeng kgalalelo ka go sa feleng! o busa ka bosakhutleng! Amen. (aiōn g165) **7** Bonang! O e tla, a dikaganyeditswe ke maru; mme matlho othe a tlaa mmona, ee, le ba ba mo thabileng. Le dichaba di tlaa lela ka khutsafalo le ka poifo fa a tla, Ee! Amen! **8** "Ke nna Alefa le Omeka, Tshimologo le Bokhutlo jwa dilo tsothe," go bua jalo Modimo, yo e leng Morena, yo e leng Mothatayotho yo o leng teng, le yo o neng a le teng le yo o tiang gape! **9** Ke nna, mokaulengwe wa lona Johane, yo ke tlhakanetseng pitlagano le lona, yo ke lo kwalelang lokwalo lo. Le nna ke abalana le lona bopelotelele jo Jesu o re bo nayang, ebile re tlaa tlhakanela Bogosi jwa gagwe! Ke ne ke le mo setlhakethakeng sa Patemosa, ke kobetswe teng ka nthla ya go rera Lefoko la Modimo, le go bolela se ke se itseng kaga Jesu Keresete. **10** E ne e le ka letsatsi la Morena mme ebile ke ne ke obama, fa ka tshoganetso ke utlwa lentswe le le tsholetsegileng fa morago ga me, lentswe le le neng le utlwa jaaka tumo ya torompeta. **11** Le re, "Ke nna Alefa le Omega, Tshimologo le Bokhutlo!" Mme ka mo utlwa a re, "Kwala sengwe le sengwe se o se bonang, mme o romele lokwalo lwa gago mo diphuthagong di supa tse di mo Asia: mo phuthagong e e mo Efeso, e e mo Semerena, tse di mo Peregamosa, Thiatira, Seredisa, Filadelfia mo Laodisia." **12** Erile fa ke retologa bona yo o neng a bua le nna, teng fa morago ga me ga bo go le dipone di supa tsa gauta. **13** Mme mo gare ga tsone ga bo go eme mongwe yo o neng a tshwana le Jesu yo o neng a ipitsa Morwa Motho, a apere kobo e telele a itlamilae ka moitlamo wa gauta go kgabaganya sehuba sa gagwe. **14** Moriri wa gagwe o ne o le mosweu jaaka bobowa kgotsa kapoko, le matho a gagwe a ntse jaaka kgabo ya molelo. **15** Dinao tsa gagwe di ne di phatsima jaaka kgotho

e e ntlafaditsweng mo leubelong le lentswe la gagwe la gagwe le Suma jaaka makhubu a lewatle a itaaka lotshitshi. **16** O ne a tshotse dinaledi di supa mo seatleng sa gagwe se segolo le chaka e e lootsegileng e e nthla pedi mo molomong wa gagwe, le sefatlhago sa gagwe se phatshima jaaka nonofo ya letsatsi mo go senang maru. **17** Erile ke mmona, ka wela fa dinaoang tsa gagwe jaaka ekete ke sule; mme a baya seatla sa gagwe se segolo mo go nna a re, "Se boife! Le fa ke le wa Ntlha le wa Bofelo, **18** yo o tshelang yo o neng a swa, yo jaanong o tshelang ka bosakhutleng, yo o tshotseng dilotelele tsa molete le loso, se boife! (aiōn g165, Hadēs g86) **19** "Kwala se o ntseng o se bona, le se o tlaa tlogang o se supegediwa. **20** Se ke tlhaloso ya dinaledi tse di supang tse o di bonyeng mo seatleng sa me se segolo, le dipone tse di supang tsa gauta: dinaledi tse di supang ke baeteledipele ba diphuthago di supa, mme dithomo tse di supang ke diphuthago ka bo tsone.

2 "Kwalela moeteledipele wa phuthago e e kwa Efeso lokwalo o mmoletse se: ke kwala ke go itsise molaetsa o o tswang mo go yo o tsamayang mo gare ga diphuthago a tsholetsa baeteledipele ba tsone ka seatla sa gagwe se segolo. O go raya a re: **2** ke itse dilo tse di molemo tse o di dirang. Ke bonye tiro ya gago e e bokete e e o dirileng le bopelotelele jwa gago, ke a itse gore ga o itshokele bolemo mo malokong a phuthago ya gago, ebile o sekasekile ka kelotloko ba ba ipitsang baaposetoloi mme e se bone. O bonye ka fa ba akang ka teng. **3** O mpogetse ka bopelotelele o sa lape. **4** "Le fa go ntse jalo go na le sengwe se se sa siamang; ga o nthate jaaka lwa nthla! **5** A ko o akanye ka dipaka tsa lorato lwa gago lwa nthla (gore go pharologanyo jang gompieno)! Mme o boele gape kwa go nna o dire jaaka pele; kgotsa e seng jalo ke tlaa tla mme ke tlose setlhomu sa lobone lwa gago mo mannong a sone mo gare ga diphuthago. **6** "Mme go na le selo sengwe ka ga gago se se molemo: o ila ditiro tse di makgapha tsa Banikolaitane, fela jaaka ke di ila. **7** "A molaetsa o o thothomele mo ditsebeng tsa mongwe le mongwe yo o utlwaneng se Mowa o se buang le diphuthago: mongwe le mongwe yo o fenyang, ke tlaa mo naya loungo lo lo tswang mo setharing sa Botshelo mo Paradaiseng ya Modimo. **8** "Kwalela Moeteledipele wa phuthago e e mo Semerena lokwalo lo o re: molaetsa o o tswa mo go ene yo e leng Tshimologo le Bokhutlo, yo o neng a sule mme a rula. **9** "Ke itse ka fa o bogelang Morena ka teng, e bile ke itse gothe ka khumanego ya gago (mme o na le dikhumu tsa selegodimo)! Ke itse kgobololo ya ba ba go ganetsang, ba ba reng ke Bajuta, bana ba Modimo, mme e se bone, gonne ba eme nokeng maikaelelo a ga Satane. **10** Lesa go boifa se o tlaa tlogang o se bogela, gonne Satane o tlaa akofa a latlhela bangwe ba lona mo kgolegelong go lo leka. O tlaa lo bogisa selekanyo sa 'malatsi a le lesome' Ikanyege le fa o lebaganye le loso, mme ke tlaa go naya serwalo sa botshelo, bokamoso jo bo galalelang jo bo sa khutleng. **11** A mongwe le mongwe yo o utlwaneng, a reetse se Mowa o se buang le diphuthago: yo o fenyang ga a kitla a tlhokofadiwa ke loso lwa bobedi. **12** "Kwalela Moeteledipele wa phuthago e e kwa Perefamosa lokwalo lo o re: molaetsa o tswa kwa go Ene yo o tshotseng chaka e e lootsegileng nthla tsoopedi. **13** Ke itse ka botlalo

gore o nna mo motsing o setilo sa ga Satane sa Bogosi se leng mo go one, kwa bogareng jwa kobamelo ya ga Satane; mme le fa go ntse jalo o ntse o ikanyega mo go nna, wa ba wa gana go intatola, le motlhang Antipase, mosupi wa me yo o ikanyegang, a neng a bolaelwa tumelo mo go lona ke balatedi ba ga Satane. **14** "Mme le fa go ntse jalo ke na le dilo di se kae tse ke kgatlhanong nao ka tstone. O dumalana le bangwe mo go lona ba ba dirang jaaka Balame a ne a dira fa a ruta Balake go senya batho ba Iseraele ka go ba tsenya mo boakang a bo a ba kgothatsa go ya medirong ya medimo ya disetwa. **15** Ee, o na le bangwe wa balatedi ba ga Balame! **16** "Fetola mogopolo wa gago le maikutlo, e seng jalo ke tlaa tla kwa go wena ka tshoganetso ke ba tlhabantsha ka chaka ya molomo wa me. **17** "A mongwe le mongwe yo o utlwang a reetse se mowa o se buang le diphuthago. Mongwe le mongwe yo o fenyang o tlaa ja ga mana a a fithilweng, kotla e e sa itseweng e e tswang legodimong; mme e tlaa naya mongwe le mongwe leje le lesweu, mme mo lejeng go tlaa kwalwa leina le lesha le motho ope a sa le itseng fa e se fela yo o le amogelang. **18** "Kwalela Moeteledipele wa Phuthago e e kwa Thiatira Lokwalo lo o re: o ke molaetsa o o tswang kwa go Morwa Modimo, yo matlho a gagwe a ntseng jaaka dikgabo tsa molelo, yo dinao tsa gagwe di ntseng jaaka kgotlho e e phatshimang. **19** Ke itse ditiro tsothe tsa gago tse di molemo, tshiamo ya gago mo bahumaneging, dimpho tsa gago le go ba direla, gape ke itse lorato lwa gago le tumelo le bopelotelele, e bile ke bona boiteko jwa gago jo bo tswelletseng pele mo dilong tsothe tse. **20** "Le fa go ntse jalo ke na le selo sengwe kgatlhanong le wena: o letlelela Jesebele, yo o ipitsang moporofiti wa sesadi, go ruta bathlanka ba me gore boaka ga se bolele jwa sepe; o ba kgothatsa go dira boaka le go ja nama e e tlhabetsweng medimo ya disetwa. **21** Ke mo neetse lobaka go fetola mogopolo wa gagwe le maikhutlo, mme o ganne. **22** Mme ela-tlhoko se ke se go bolelelang: ke tlaa mo robatsa mo bolaong, ka bolwetse jwa tlhokofatso e kgolo mmogo le balatedi ba gagwe ba ba itshekologileng, fa ba sa boele gape mo go nna, ba ikwatlhaela dibe tsa bone le ene; **23** mme ke tlaa bolaya bana ba gagwe. Mme diphuthago tsothe di tlaa itse gore ke nna yo ke sekasekang boteng jwa dipelo tsa batho, le megopolo; ke tlaa naya mongwe le mongwe wa lona se se mo tshwanetseng. **24** "Lona ba lo setseng mo Thiatira ba lo sa latelang dithuto tse tsa tsietso ('boammaaruri jo bo kwa teng' jaaka ba bo bitsa, boammaaruri jwa ga Satane, tota) ga ke kitla ke tlhola ke lo kopa sepe, tshegetsang thata fela se lo nang naso go filhelela ke tla. **26** "Go mongwe le mongwe yo o fenyang, yo kwa bofelong a ntseng a tswelletse go dira dilo tse di intumedisang, ke tlaa mo naya nonofo mo merafeng. **27** O tlaa e busa ka thobane ya tshipi fela jaaka Rre a nneile taolo ya go ba busa; ba tlaa thubagangwa jaaka pitsana ya letsopa e thubegile go nna dikapetlana. **28** Mme ke tlaa lo naya Naledi ya Moso! **29** "A bothe ba ba utlwang, ba reetse se Mowa o se buang le diphuthago.

3 "Kwalela Moeteledipele wa Phuthago e e mo Sadisa lokwalo lo o re: molaetsa o, o romelwa ke yo o nang le mewa e supa ya Modimo le dinaledi di supa. Ke itse tumo ya gago jaaka

phuthago e e tlhaga e e tshelang, mme o sule. **2** "Mme jaanong tso! Nonotsha bonnye jo bo setseng, gonne le jone bonnye jo bo setseng bo tlaa tloga bo o swa. Ditiro tsa gago di kgakala le tshiamo mo matlhang a Modimo. **3** "Boela kwa go se o se utlwileng wa bo wa se dumela lwa nthla; se tshegetse thata mme o boele mo go nna gape. Fa o sa dire jalo, ke tlaa tla ka tshoganetso mo go wena, jaaka legodu, mme ke go otlhae. **4** "Le fa go ntse jalo mo Sadisa bangwe ga ba ise ba ke ba suputse diaparot tsa bone ka leswe la lefatsho; ba tlaa tsamaya le nna ba apere bosweu, gonne ba tshwanetse. **5** "Mongwe le mongwe yo o fenyang o tlaa apara bosweu, mme ga nkutla ke phimola leina la gagwe mo lokwalong lwa botshelo, mme ke tlaa bolela fa pele ga ga Rre le baengele gore ke wa me. **6** "A bothe ba ba utlwang, ba reetse se Mowa o se buang le diphuthago." **7** "Kwalela Moeteledipele wa phuthago e e mo Filadelfia lokwalo lo o re: molaetsa o lo o romelletswe ke yo o boitshepo le boammaaruri, ebile a na le dilotlote tsa ga Dafide tsa go bula se ope a se ka keng a se tswala le go tswala se ope a se ka keng a se bula. **8** "Ke go itse sentle: ga o a nonofo, mme o lekile go nkutlwa e bile ga o a itatola leina la me. Jalo ke go buletse kgoro e ope a se ka keng a e tswala. **9** Tlhokomela se: ke tlaa pateletsa ba ba emeng nokeng maikaelelo a ga Satane, ntswa ba ipitsa ba me (mme e se bone, ba aka) go wela fa dinaong tsa gago gore ba tle ba itse fa ke go ratile. **10** "Ka nthla ya gore o nkutlwile ka bopelotelele le fa go ne go na le dipogiso, jalo ke tlaa go sireletsa mo lobakeng lwa pitlagano e kgolo le thaelo, e e tlaa tlang mo lefatsheng go leka mongwe le mongwe yo o tshelang. **11** Bona, Ke e tla ka bonako! Tshegetsata thata nonofonyana e o nang nayo, gore ope a se go tseele serwalo. **12** "Mme ene yo o fenyang, ke tlaa mo dira pinagare mo tempeleng ya Modimo wa me; o tlaa babalesaga, mme ga a kitla a tlhola a tswela kwa ntle; mme ke tlaa kwalwa leina la Modimo wa me mo go ene, mme o tlaa nna monni wa motse wa Modimo wa me, Jerusalem ya moshana, yo o fologang kwa legodimong a tswa kwa Modimong wa me, le leina la me le lesa le tlaa kwalwa mo go ene. **13** "A bothe ba ba utlwang, ba reetse se Mowa o se buang le diphuthago." **14** "Kwalela moeteledipele wa phuthago e e mo Laodisia lokwalo lo o re: molaetsa o o tswa kwa go ene yo o emeng a nitame, Mosupi yo o ikanyegang wa boammaaruri. (Wa gone gotlho mo go teng kgotsa mo go neng go le teng, kgotsa mo go tlaa nnang teng ka metha). **15** "Ke go itse sentle, ga o molelo e bile ga o tsididi; ke eletsa o ka bo o ne o le molelo kgotsa o le tsididi. **16** Mme e re ka o le moltha fela, ke tlaa go thatsa mo molomong wa me! **17** "O ithaya o re, 'Ke humile, ka sengwe le sengwe se ke se batlang; ga ke tlhoke sepe!' Mme ga o lemogeng gore mo semoweng o lathegile, o tlhomola pelo, o mohumanegi, o sefoku ebile ga o a ikatega. **18** "Kgakololo ya me mo go wena ke gore o reke gauta e e itshakileng mo go nna, e e itshakisitsweng ka molelo, ke gone o tlaa bong o humile ka boammaaruri. Le gore o reke mo go nna diaparot tse di tshweu tse di phepa tse di itshakileng, gore o se ka wa bonala o sa ikatega le fa e le go tlhaja ke dithong; le go tsaya molemo mo go nna go alafa matlho a gago gore o boelwe ke pono ya gago gape. **19** "Ke tswelletse ka go laya ke bo ke otlhaya mongwe le mongwe yo ke

mo ratang; jalo ke tshwanetse go go otlhaya, fa o sa sokologe mo bothokomolosong jwa gago mme wa nna le ke-letso ya kgathhego mo dilong tsa Modimo. 20 "Bona! Ke eme fa kgorong ga ke khutlise go kokota. Fa mongwe a nkutlwa ke mmita a bo a bula kgoro, ke tlaa tsena ke tsalana nae le ene a tsalana le nna. 21 Ke tlaa letla mongwe le mongwe yo o fenyang gore a nne go bapa le nna mo setilong sa me sa Bogosi, fela jaaka le nna ke tshotse bonno go bapa le Rre mo setilong sa gagwe sa Bogosi, fa ke se na go fenya. 22 A ba ba nang le kutlo, ba reetse se Mowa o se buang le diphuthego."

4 Mme ya re ke leba, ka bona kgoro e butswa kwa legodimong, mme lentswe le ke neng ka le utlwa na ntla, le le neng le utlwala jaaka tumo e kgolo ya lonaka, la bua le nna la re, "Tla kwano mme ke tlaa go supegetsa se se tlaa diragalang mo lobakeng lo lo tlang." 2 Mme ya re gone fela foo ka bo ke le kwa legodimong ke le mo moweng, ka bona kgalalelo ya lone! Setilo sa Bogosi le mongwe a ntse mo go sone! 3 Phatsimo e kgolo ya lesedi ya phatsima fa pele ga gagwe jaaka ekete e tswa mo teemaneng e e galalelang, kgotsa mo lentsweng la bothokwa le le bohobidu jo bo tsabakelang, le mola wa godimo o phatsima, o phatshima jaaka leje la bothokwa le le tala le dikaganyeditse setilo sa gagwe sa bogosi. 4 Ditilo tse di masome a mabedi le bone di dikaganyeditse sa gagwe, le bagolwane ba le masome a mabedi le bone ba ntse mo go tsone; bothle ba ne ba apere bosweu, ba rwele dirwalo tsa gauta mo ditlhogong tsa bone. 5 Ga tswa logadima le tumo ya maru mo setilong sa bogosi, mme ga bo go na le mantswa mo tumong ya maru. Fa pele ga setilo sa gagwe sa bogosi go ne go na le dipone di supa tse di tshubilweng di emetse Mewa e supa ya Modimo. 6 Fa pele ga sone ga bo go le lewatle la leje le le phatshimang jaaka legakwa le lesweu. Ditshedi tse nne, di takilwe ka matlho kwa pele le kwa morago, di ne di eme mo ditlhakoreng tse nne tsa setilo sa bogosi. 7 Setshedi sa ntla mo go tse nne tse, se ne se tshwana le tau; sa bobedi se tshwana le pholo; sa boraro se na le sefathego se se tshwanang le sa motho; sa bone se tshwana le ntsu, a phutholotse diphuka jaaka e ka re o a fofa. 8 Setshedi sengwe le sengwe sa ditshedi tse nne sa bo se na le diphuka di le thataro, mme bogare jwa diphuka tsa tsone jwa bo bo tletse matlho. Bosigo le motshegare di goa di re, "O Boitshepo, O Boitshepo, Morena Modimo Mothatayotlhe, ene yo o neng a le teng le yo o leng teng, e bile e le yo o tlaa tlang." 9 Mme ya re fa ditshedi di galaletsa di tlotla e bile di leboga yo o ntseng mo setilong sa bogosi, yo o tshelang ka metlha le metlha, (aiōn g165) 10 bagolwane ba ba masome a mabedi le bone ba wela fa pele ga gagwe ba mo obamela, yo o tshelang ka bosakhutleng, mme ba lathela dirwalo tsa bone fa pele ga setilo sa bogosi ba opela ba re, (aiōn g165) 11 "Oo Morena, O tshwanetse go amogela kgalalelo le tlotlo le nonofo, gonno o dirile tsothle. Di thodilwe tsa bo tsa bidiwa ditshedi ka thato ya gago."

5 Mme ka bona lokwalo lo lo mennweng mo let sogong je legolo la yo o neng a ntse mo setilong sa bogosi, lokwalo lo kwadilwe mo teng le ka fa morago, e bile lo kaneletswe ka dikano di supa. 2 Moengele yo o nonofileng a goa ka lentswe le legolo a botsa potso e, a re, "Ke mang yo o nonofileng go ka

kanolola dikano tse di mo lokwalong lo, le go lo menolola?" 3 Mme go ne go se ope mo legodimong lothe, kgotsa mo lefatsheng kgotsa mo baswing yo o neng a letleletswe go lo bula le go lo bala. 4 Hong ka lela ka maswabi a magolo gonno go ne go se ope gope yo o neng a na le tshwanelo; go ne go sena ope yo o ka re bolelelang se lo se buang. 5 Mme mongwe wa bagolwane ba ba masome a mabedi le bone a nthaya a re, "Lesa go lela, gonno bona! Tau ya lotso lwa Juda, Modi wa ga Dafide, o fentse, ebile o itshupile a nonofile go bula lokwalo le go kanolola dikano tsa lone tse supa!" 6 Ka leba mme ka bona Kwana e eme foo fa pele ga bagolwane ba ba masome a mabedi le bone, fa pele ga setilo sa bogosi le fa pele ga ditshedi, mo go Kwana go ne go na le dintho tse di kileng tsa dira loso lwa gagwe. O ne a na le dinaka di supa le matlho a supa, tse di emetseng Mewa e supa ya Modimo e e rometsweng mo ntsheng tsothle tsa lefatshu. 7 A sutelela kwa pele a tsaya lokwalo lo lo mennweng mo letsogong je legolo la yo o ntseng mo setilong sa bogosi. 8 Mme ya re a tsaya lokwalo, bagolwane ba ba masome a mabedi le bone ba obama fa pele ga Kwana, mongwe le mongwe ka harepa le ka mabotlolo a gauta a tletse maswalo, dithapelo tsa batho ba Modimo! 9 Ba ne ba mo opelela sefela se sesha ka mafoko a. "O nonofile go tsaya lokwalo o lo kanolola o bo o lo bula; gonno o ne wa tlhajwa, mme madi a gago a rekile batho mo morafeng mongwe le mongwe e le dimpho tsa Modimo. 10 Mme o ba phuthetse mo bogosing mme wa ba dira baperesiti ba Modimo wa rona; ba tlaa busa lefatshu." 11 Hong mo ponatshelong ya me ka utlwa moopelo wa didikadike tsa baengele ba dikaganyeditse setilo sa bogosi le ditshedi le bagolwane: 12 Ba opelela kwa godimo ba re, "Kwana e nonofile, Kwana e e neng e tlhabilwe. E tshwanetswe ke go amogela nonofo, le mahumo le bothale, le thata, le tlotlego, le kgalalelo, le tshogofatso." 13 Mme foo ka utlwa mongwe le mongwe mo legodimong le mo lefatshing, le mo baswing ka fa tlase ga lefatshu mo teng ga lewatle, ba goa ba re, "Tshogofatso le tlotlo le kgalalelo le nonofo ke tsa yo o ntseng mo setilong sa bogosi, le kwa go Kwana ka metlha le metlha." (aiōn g165) 14 Mme ditshedi tse nne tsa tswela di ntse di re, "Amen!" Mme bagolwane ba ba masome a mabedi le bone ba wela fa fatshe ba mo obamela.

6 Erile fa ke leba, ka bona Kwana e kanolola sekano sa ntla mme ya simolola go menolola lokwalo. Hong sengwe sa Ditshedi tse nne, sa goa ka lentswe le le dumang jaaka tumo ya maru, sa re "Tla!" 2 Ka leba, mme kwa pele ga me ga bo go le pitse e tshweu. Mopalami wa yone a tshotse bora, mme serwalo sa bo se beilwe mo godimo ga tlhogo ya gagwe; a bolola go ya go fenya mo ditlhabanong di le di ntse le go fenya ntwa. 3 Hong a menolola lokwalo go ya sekanong sa bobedi. Mme ka utlwa Setshedi sa bobedi se re, "Tla!" 4 Ka nako e, ga tswa pitse e khunou. Mopalami wa yone o ne a neetswe chaka e telele le taolo ya go tlosa kagiso le go tiisa pheretlhego mo lefatsheng; ntwa le polaano ya tswa gongwe le gongwe. 5 Ya re a sena go kanolola sekano sa boraro, ka utlwa Setshedi sa boraro se re "Tla!" Mme ka bona pitse e ntsho, le mopalami wa yone a tshotse dilekanyo tse pedi mo letsogong la gagwe. 6 Mme

lentswe la tswa mo Ditsheding tse nne la re, "Senkgwe se ja ledi le le lengwe selekanyo sa bopi jwa korong, mme ga go na lookwane kgotsa mofine." 7 Mme e rile sekano sa bone se sena go kanololwa, ka utlwa setshedi sa bone se re "Tla!" 8 Mme jaanong ka bona pitse e tshethla, mme leina la mopalami wa yone ene e le Loso. Mme ya salwa morago ke pitse e nngwe e leina la mopalami wa yone e neng e le Molete. Ba ne ba neelwa taolo mo karolong ya bone ya lefatshe, go bolaya lefatshe ka ntwa le ka leuba le ka bolwetse le ka dibatana tsa naga. (Hades 986) 9 Mme ya re a kanolola sekano sa botlhano, ka bona aletara, mme ka fa tlase ga yone ga bo go le mewa yothle ya ba ba bolaetsweng go rera Lefoko la Modimo le go ikanyega mo bosuping jwa bone. 10 Ba goela kwa Moreneng ba re, "Morena yo mogolo, yo o boitshupo le boammaururi, go tlaa nna goleele go le kae pele ga o athhola batho ba lefatshe kaga se ba se re diretseng? O tlaa busolosetsa leng madi a rona mo go ba ba tshelang mo lefatshe?" 11 Mme ba newa dikobo tse di tshweu tse di kgogothang, mme ba laelwa gore ba name ba sa ntse ba itapolositse go fithelela bakaulengwe ba bangwe ba bone, batlhanka ka bone ba ga Jesu ba bolaelwa tumelo mo lefatsheing ba bo ba kopana nabo. 12 Ka lebelela fa a kanolola sekano sa borataro, mme ga bo go le thoromo e kgolo ya lefatshe; mme letsatsi la fifala jaaka letsela le le ntsho, le ngwedi a bo a le mohibidu jaaka madi. 13 Hong dinaledi tsa legodimo tsa bonala ekete di wela mo lefatsheing, jaaka loungo lo lo tala lo lo wang mo dithareng tsa mofeige lo thothorwa ke pheto e e bokete. 14 Mme magodimo a a tsabakelang ka dinaledi a nyelela jaaka e ka re go phuthilwe momeno mme a tloswa; mme thaba nngwe le nngwe le setlhakethake tsa tshikinyega tsa bo tsa suta. 15 Dikgosi tsa lefatshe, le baeteledipele ba lefatshe le bahumi, le batho botlhe ba bagolo ba sesole, batho botlhe, bagolo le banye, ditshwarwa, le ba ba golotsweng ba iphitlha mo dikgageng le mo mafikeng a dithaba, 16 mme ba lelela mo dithabeng gore di ba wele. Ba kopa ba re, "Re weleng godimo! Lo re fithele sefathogo sa yo o ntseng mo setilong sa bogosi, le mo bogaleng jwa Kwana, 17 ka gore letsatsi le legolo la bogale jwa bone le tsile, mme e mang yo o ka bo falolang?"

7 Mme ka bona baengele ba le bane ba eme mo dikhutlong tse nne tsa lefatshe, ba tshwere diphefo tse nne gore di seka tsa foka, gore lekakaba lepe le se ka la nna le mokgwasa mo dithareng, mme lewatle la nna borethe jaaka galase. 2 Mme ka bona moengele yo mongwe a tswa kwa botlhaba, a tshotse sekano se segolo sa Modimo o o tshelang. Mme a goa baengele ba bane ba ba neng ba neetswe nonofo go tlhokofatsa lefatshe le lewatle, "iketleng! 3 Namang lo ise lo dire sepe, se tlhokofatseng lefatse kgotsa lewatle kgotsa dithare, go fithelela re se na go baya sekano sa Modimo mo diphatleng tsa batlhanka ba one." 4 Ke ba le kae ba ba neetsweng lotshwao lo? Ke ne ka utlwa gotwe palo ya bone ke dikete di le legolo le masome a masome a mane le bone, mo ditsong tsothle tsa Iseraele tse di lesome le bobedi, jaaka di rulagantswe fa: Juda 12,000 Rubene 12,000, Gade 12,000, Ashe 12,000, Nafetali 12,000, Manasa 12,000, Simeone 12,000, Lefi 12,000, Isekare 12,000, Sebulane 12,000, Josefa 12,000, Benjamin 12,000. 9 Morago ga mo ka bona bontsintsi jo bogolo jwa batho, bo le

bogolo thata mo bo neng bo se ka ke jwa balwa, go tswa mo merafeng yothle le mo mafatshing le dipuo (diteme), bo eme fa pele ga setilo sa bogosi le fa pele ga Kwana, bo apere bosweu bo tshotse dikala tsa mokolane ka diatla. 10 Mme ba ne ba goa mo go boitshegang ba re, "Poloko e tswa mo Modimong wa rona o o ntseng mo setilong sa bogosi, le mo go Kwana." 11 Mme jaanong baengele botlhe ba bo ba dikaganyeditse setilo sa bogosi le bagolwane le ditshedi tse nne, ba digile difathogo fa pele ga setilo sa bogosi ba obamela Modimo. 12 Ba re, "Amen! Pako, le kgalalele, le bothhale, le malebogo, le tloto, le nonofo, le thata di nne go Modimo wa rona ka bosakhutleng. Amen!" (aiōn 9165) 13 Hong mongwe wa bagolwane ba ba masome a mabedi le bone a mpotsa a re, "A o itse gore ba ke bo mang ba ba apereng bosweu le gore ba tswa kae?" 14 Ka re, "Nnyaa, Morena, tswee-tswee mpolelela." A re, "Ba ke ba ba tswang mo pitlaganong e kgolo, ba tlhatswitse dikobo tsa bone, ba di sweufaditse ka madi a Kwana. 15 Ke gone ka moo ba leng fano fa pele ga setilo sa bogosi sa Modimo, ba mo direla bosigo le motshegare mo tempeleng ya gagwe. Yo o ntseng mo setilong sa bogosi o tlaa ba sireletsa; 16 ga ba kitla ba tlhola ba tshwarwa ke tlaa gape, kgotsa lenyora, mme ba tlaa sirelediwa ka bottalo mo mogoteng o o fisang wa letsatsi. 17 Gonne Kwana yo o emeng fa pele ga setilo sa bogosi o tlaa nna modisa wa bone a bo a ba etelela pele a ba isa kwa metswedding ya metse a Botshelo. Mme Modimo o tlaa phimola dikeledi tsa bone."

8 Eri le fa Kwana e sena go kanolola sekano sa bosupa, ga nna tidimalo mo legodimong lotlhe e ka nna selekanyo sa oura. 2 Mme ka bona baengele ba supa ba ba emang fa pele ga Modimo, mme ba neelwa ditorompeta di supa. 3 Mme moengele yo mongwe a tshotse leiswana la gauta a tla a ema fa sebesong; mme a neelwa maswalo a mantisi go a tlhakanya le dithapelo tsa batho ba Modimo, gore a a bee mo sebesong sa gauta e le setlhabelo fa pele ga setilo sa Bogosi. 4 Mme lonko lwa maswalo lo lo tlhakaneng le dithapelo lwa tlhatlogela kwa Modimong lo tswa mo sebesong mo moengele a neng a a tshetse teng. 5 Mme moengele a tlatsa leiswana ka molelo o o tswang mo sebesong mme a le latlhela mo lefatsheing; mme tumo ya maru ya thulana ya duma, logadima lwa phatsima, mme ga nna le thoromo e e maswe ya lefatshe. 6 Mme baengele basupa ba ba tshotseng ditorompeta ba ipaakanyetsa go di letsa. 7 Moengele wa ntliha a letsa torompeta ya gagwe, mme sefako le molelo di tlhakane le madi tsa latlhelwa mo lefatsheing. Karolo ya boraro ya lefatshe ya fisiwa gore karolo ya boraro ya dithhare e bo e lailwe ke molelo, le bojang jothle jo bo tala. 8 Mme moengele wa bobedi a letsa torompeta ya gagwe, mme se se neng se bonala ekete thaba e kgolo e e tukang ya latlhelwa mo lewatleng, ya senya karolo ya boraro ya dikepe; mme karolo ya lewatle ya fetoga bohobidu jaaka madi; le karolo ya boraro ya dithhapi ya bolawa. 10 Moengele wa boraro a letsa torompeta mme naledi e kgolo e e tukang ya wa kwa legodimong ya wela mo karolong ya boraro ya melapo le metswedi. 11 Naledi e e ne e bidiwa "Bogalaka" gonne e ne ya fetola karolo ya boraro ya metse otlhe mo lefatsheing, mme batho ba le bantsi ba a swa. 12 Moengele wa bone a letsa torompeta ya gagwe mme ka bofelo

karolo ya boraro ya letsatsi ya senngwa ya ba ya fifadiwa, le karolo ya boraro ya ngwedi le dinaledi, mo phatsimo ya letsatsi e neng ya fifadiwa selekanyo sa karolo ya boraro mme ga nna lefifi le le boitshegang. 13 Ya re ke lebelela, ka bona ntsu a le esi a fofa go kgabaganya magodimo a lelela kwa godimo, a re, "Ija, Ija, Ija, a bo go lathega batho ba lefatshe ka ntlha ya dilo tse di maswe tse di tlaa tlogang di direga fa baengele ba bararo ba ba setseng ba letsa ditompeta tsa bone."

9 Mme moengele wa bothlano a letsa torompeta ya gagwe mme ka bona mongwe yo o wetseng mo lefatsheng a tswa kwa legodimong, mme ene a bo a neetswe dikopololo tsa molete o o se nang bolekanng. (Abyssos g12) 2 Ya re a o bula, mosi wa tswa jaaka ekete o tswa mo leisong la boubelo jo bogolo. Mme letsatsi le phefo tsa fifadiwa ke mosi. (Abyssos g12) 3 Mme tsie ya tswa mo mosing ya fologela mo lefatsheng mme ya newa nonofo ya go loma jaaka diphepeng. 4 E ne ya laelwa gore e se ka ya tlhokofatsa bojang kgotsa dijalo kgotsa dithare mme e thasele batho ba ba senang lotshwao lwa Modimo mo diphatlheng tsa bone. 5 E se ka ya ba bolaya, fa e se go ba tlhokofatsa selekanyo sa dikgwedi tse thano ka tlhokofatsa e e tshwanang le go loma ga phepeng. 6 Mo malatsing ao batho ba tlaa leka go ipolaya mme ga ba kitla ba kgona, loso ga lo kitla lo tla. Ba tlaa eletsa go swa, mme loso lo tlaa sia! 7 Tsie e ne e lebeba jaaka dipitse tse di baakanyeditsweng ntw. E ne e na le sengwe se lebeba jaaka dirwalo tsa gauta mo ditlhogong tsa yone, mme difathlho tsa yone di ntse jaaka batho. 8 Moriri wa yone o le mo leele jaaka wa basadi, le meno a yone a tshwana le a ditau. 9 E ne e apere diiphemelo tsa sehuba tse di ntseng jaaka tsa tshipi, le diphuka tsa yone di suma jaaka mophato wa dipitse tse di siamelang ntsweng. 10 E ne e na le megatla e e lomang jaaka diphepeng, mme nonofo ya yone ya go tlhokofatsa, e e neetsweng selekanyo sa dikgwedi tse thano, e ne e le mo megatleng ya yone. 11 Kgosi ya yone ke kgosana ya molete o o senang bolekanng e leina la yone e leng Abadone, ka Sehebera, mme ka Segerika ke Apolione (mme e ne e bidiwa Mosenyi ka Setswana). (Abyssos g12) 12 Therego ya ntlha jaanong e a fela, mme go na le tse pedi tse di tlang! 13 Moengele wa borataro a letsa torompeta ya gagwe mme ka utlwa lentse le bua mo dinakeng tse nne tsa sebeso sa gauta se se leng fa pele ga setilo sa Bogosi, 14 le raya moengele wa borataro le re, "Golola baengele ba le bane ba ba boitshegang ba ba golegilyeng fa nokeng e kgolo ya Yuferatase." 15 Ba ne ba baakanyeditswe yone ngwaga eo le kgwedi le letsatsi le oura eo, mme jaanong ba ne ba gololwa go bolaya karolo ya boraro ya batho bothle. 16 Mme ka utlwa kitsiso ya palo ya one, mophato wa ntw wa didikadike tse di makgolo a mabedi, mme ka utlwa kitsiso ya palo ya one. 17 Ka bona dipitse tsa bone di bewa fa pele ga me mo ponatshegolong ya me; bapalami ba tsone ba ne ba apere diiphemelo tsa sehuba tse di khibidu, e tswa dingwe di ne di le botala jwa legodimo, tse dingwe di le di tshetlha. Ditlhogo tsa dipitse di ne di tshwana le tsa ditau, mme mosi le molelo le selefera e e tukang di tswa mo melomong ya tsone, di bolaya karolo ya boraro ya batho bothle. 19 Nonofo ya tsone ya loso e ne e se mo melomong ya tsone fela, le mo megatleng e ne e le

teng, gonne megatla ya tsone e ne e tshwana le ya ditlhogo tsa dinoga tse di lomang go ntsha dintho tse di bothlako. 20 Mme batho ba ba neng ba setse, morago ga dipetso tse, ba bo ba ntse ba gana go obamela Modimo! Ba se ka ba bakela go obamela mewa e e maswe, le medimo ya bone ya disetwa e e dirilweng ka gauta le selefera, kgotlho, leje le logong, e e sa boneng e e sa utlweng le fa e le go tsamaya! 21 Le gone ga ba a ka ba fetola megopolo ya bone le maikutlo, dipolao tsa bone tsothe le boloi, boitshekologo jwa bone le bogodu.

10 Hong ka bona moengele yo mongwe yo mogolo a fologa kwa legodimong, a dikaganyeditswe ke leru, mme motshe wa godimo wa bo o le mo tlhogong ya gagwe; sefathlho go sa gagwe se phatshima jaaka letsatsi le dinao tsa gagwe di gadima jaaka molelo. 2 Mme a tsholetsa lokwalonyana ka seatla lo menolotswa. A tlhoma lonao lwa gagwe lo logolo mo lewatleng mme lwa molema a lo tlhoma mo lefatsheng, 3 mme a goa thata, mme go goa ga gagwe go ne go utlwala jaaka go duma ga tau, mme ditumo di supa tsa araba. 4 Ke ne ke tloga ke kwala se ditumo tsa maru di neng di se raya fa lentse le le neng le tswa legodimong le mpitsa le re, "O se ka wa dira jalo. Mafoko a tsone ga a tshwana go senolwa." 5 Hong moengele yo mogolo yo o emeng mo lewatleng le mo lefatsheng a tsholeletsa letsogo la gagwe le legolo kwa legodimong, 6 mme a ikana ka ene yo o tshelang ka bosakhutleng, yo o dirileng legodimo le sengwe le sengwe se se mo go lone le lefatshe le tsothe tse di leng mo go lone le lewatle le tse di nngang mo go lone, gore go se ka ga nna le tiego epe, (aiōn g165) 7 mme e tlaa re moengele wa bosupa a letsa torompeta ya gagwe, hong leano la Modimo le le sa leng le siregile ka dingwaga-ngwaga go simologa ka nako e le neng le bolelwa ke batlhanka ba one ebong baporofiti, le tlaa diragadiwa. 8 Hong lentse le le tswang legodimong la bua le nna gape la re, "Tsamaya o ye go tsaya lokwalo lo lo sa menololwang mo moengeleng yo mogolo yo o emeng mo lewatleng le mo lefatsheng." 9 Jalo ka mo atamela ka mo kopa go nneela lokwalo. Mme a nthaya a re, "Ee," lo je, "lwa ntlha lo tlaa utlwala jaaka dinotsho, mme fa o lo metsa, lo tlaa dira mpa ya gago bogalaka!" 10 Jalo ka lo tsaya mo letsogong la gagwe ka lo ja! Mme fela jaaka a buile lo ne lwa nna monate mo ganong la me lwa ntshegisa mala fa ke lo metsa. 11 Mme a nthaya a re, "O tshwanetse go porofeta thata batho kaga batho ba le bantsi, merafe, le dikgosi."

11 Jaanong ka neelwa thobane e e lekan yang mme ka laelwa go ya go lekanya Tempele ya Modimo, mmogo le ntl e e mo teng e sebeso se leng mo go yone, le go bala palo ya baobamedi. 2 Mme ka tewa gatwe, "O se ka wa lekanya ntl e e kwa ntle, gonne e neetswe dichaba. Ba tlaa gataka motse o o Boitshupo selekanyo sa kgwedi tse di masome mane. 3 Mme ke tlaa neela basupi ba me ba babedi nonofo ya go porofesa selekanyo sa malatsi a le sekete le makgolo a mabedi le masome a maratato ba apere letsela la kgetse." 4 Baporofiti ba babedi ba ke dithare tse pedi tsa matlhware, le ditlhommo tse pedi tse di emeng fa pele ga Modimo wa lefatsho lotlhe. 5 Le fa e le mang yo o lekanng go di tlhokofatsa o tlaa bolawa ka molelo o o tswang mo maganong a bone. 6 Ba na le nonofo go tswala

magodimo gore pula e se ka ya na mo dingwageng tse tharo le sephatlo tse ba porofesang ka tsona, le go fetola melapo le mawatle madi, le go romela mofuta mongwe le mongwe wa petso mo lefatsheng kgapetsakgapetsa ka fa ba eletsang ka teng. **7** E tlaa re fa ba sena go fetsa dingwaga tse tharo le sephatlo tsa bosupi jwa bone, modipa yo o tswang mo moleteng o o senang bolekanngo o tlaa lwa le bone a ba fenywa a bo a ba bolaya; (Abyssos g12) **8** mme mo malatsing a mararo le sephatlo mebele ya bone e tlaa bewa mo pepeneneng mo mebileng ya Jerusalema (motse o o bolelwang sentle jaaka "Sodoma" kgotsa "Egepeto"), lefelo tota le Morena wa bone o bapoletsweng mo go lone. Ga go na ope yo o tlaa letlelelwang go ba filtha, mme batho ba ba tswang mo merafeng e le mensi ba tlaa phuthaga go tla go ba bona. **10** Mme go tlaa nna le letsatsi la boikhutso la lefatsho lotlhe, batho gongwe le gongwe le gongwe ba tlaa ipela ba bo ba abalana dimpho, ba dira mediro go itumelela loso lwa baporofiti ba babedi ba ba ba tlhokofaditseng mo go kalo. **11** Mme morago ga malatsi a le mararo le sephatlo, mowa wa botshelo o o tswang kwa Modimong o tlaa tsena mo go bone mme ba tlaa ema ka dinao! Mme poifo e kgolo e tlaa wela mongwe le mongwe. **12** Hong lentswe le legolo le tlaa goa le tswa kwa legodimong le re, "Thatlogelang kwano!" Mme ba tlaa tlhatlogela kwa legodimong ba le mo lerung baba ba bone ba ba lebeletse. **13** Ka yone oura eo go tlaa nna le thoro mo e e maswe ya lefatsho e e digang karolo ya lesome ya motse, e bolaya batho ba le dikete di supa. Mme bothe ba ba setseng ba tlaa galaletsa Modimo wa legodimo ka poifo. **14** Tatlhego ya bobedi e fetile, mme ya boraro e latela ka bofelo: **15** Gone foo moengele wa bosupa a letsa torompeta ya gagwe, mme ga bo go le mantswe a magolo a goa a tswa kwa legodimong a re, "Bogosi jwa lefatsho leno jaanong ke jwa Morena wa rona, le Keresete wa gagwe; mme o tlaa busa ka methla le methla." (aiōn g165) **16** Mme bagolwane ba ba masome a mabedi le bone ba ba ntseng mo ditlong tsa bone tsa Segosi fa pele ga Modimo ba itathela fa fatshe ba obama, ba re, **17** "Re a leboga, Morena Modimo Mothatayotlhe, yo o leng teng le yo o neng a le teng, gonne jaanong o tshotse nonofo ya gago e kgolo o simolotse go busa. **18** "Dichaba di ne di go galefetse, mme jaanong ke nako ya gago gore o ba galefela. Ke nako ya go athola baswi, le go duela batlhanka ba gago, baporofiti le batho ka go tshwana, bothe ba ba boifang leina la gago, bagolo le bannye, le go nyeletsa ba ba dirileng tshenyho mo lefatsheng". **19** Mme mo legodimong, tempele ya Modimo ya bo e butswa mme letlole la kgoлагano ya one la bo le bonala mo teng. Go ne ga nna dikgadima, ga nna loratla lwa tumo ya maru, mme ga nna le matsubutsubu a sefako mme lefatsho la tshikinngwa ke thoro mo e kgolo ya lone.

12 Mme ga bonala sesupo se segolo mo legodimong, se supa dilo tse di tlaa tlang, ka bona mosadi a apere letsatsi, go na le ngwedi ka fa tlase ga dinao tsa gagwe, le serwalo sa dinaledi di le lesome le bobedi mo tlhologong ya gagwe. **2** O ne a le moimana mme a lediwa ke ditlhabi tsa pelegi ya gagwe, a letetse go belega. **3** Ka tshoganetso ga bonala kgogela e khibidu, e na le ditlho go di supa le dinaka di le lesome, le

dirwalo di supa mo tlhologong ya bone. **4** Mogatla wa yone o ne o goga karolo ya boraro ya dinaledi, tse e neng ya di latlhela mo lefatsheng. Ya ema fa pele ga mosadi jaaka a ne a tloga a belega, e ipaakanyeditse go kometsa losea fa lo tsholwa. **5** Mme a tshola ngwana wa mosimane yo o neng a tshwanetse go busa dichaba tsothe ka letsogo le le bokete, mme a phamolelwa kwa Modimong le kwa setilong sa one sa bogosi. **6** Mosadi a siela mo sekakeng, kwa Modimo o neng o mmaakanyeditse bonno teng, go mo tlhokomela selekanyo sa malatsi a le sekete le magolo a mabedi le borataro. **7** Mme ga nna ntwam legodimong; Mikaele le baengele ba gagwe ba lwantsha kgogela le baengele ba yone ba ba neng ba digelwa mo lefatsheng. **8** Mme kgogela ya fenngwa ya lelekwa kwa legodimong. **9** Kgogela e kgolo e, ebong noga ya bogologolo e e bidiwang diabololo, kgotsa Satane, ene yo o tsietsang lefatsho lotlhe, o ne a latlhela mo lefatsheng le mophato wa gagwe othe. **10** Mme ka utlwa lentswe le goela kwa godimo le kgabaganya magodimo le re, "Go diragetse kwa bofelong! Poloko ya Modimo le nonofo le puso, le taolo ya ga Keresete Morwa one gompiono di tsile; gonne mopateletsi wa bakaulengwe ba rona o latlhetswe kwa lefatsheng a tswa mo legodimong, yo o ntseng a ba pateletsa bosigo le motshagare fa pele ga Modimo wa rona. **11** Ba mo fentse ka madi a Kwana, le ka bosupi jwa bone; gonne ga ba a ka ba rata matshelo a bone mme ba a itatola ka ntlha ya gagwe. **12** Ke gone ipeleng, magodimo! Lona banni ba legodimo, ipeleng! Itumeleng! Mme a bo go latlhega lona batho ba lefatsho, gonne diabololo o tsile mo go lona ka bogale jo bogolo, a itse gore o na le nako e nnye." **13** Mme erile fa kgogela e bona e latlhetswe mo lefatsheng, ya bogisa mosadi yo o tshotseng ngwana wa mosimane. **14** Mme mosadi a bo a neilwe diphuka tse pedi tse di tshwanang le tsa ntsu yo mo tona, go fofela kwa sekakeng kwa lefelong le a le baakanyeditsweng kwa o neng a tlhokomelwa teng a bo a sirelediwa mo nogeng, ebong kgogela, selekanyo sa dingwaga tse tharo le sephatlo. **15** Mme mo leganong la noga metse a mantsi a hulegela kwa mosading e le go leka go mo tsaya; **16** mme lefatsho la mo thusa ka go athamologa la metsa metse othe a tswang mo kgogeleng. **17** Hong kgogela e e gaketseng ya bolola go ya go tlhasela bana ba mosadi ba ba setseng, bothe ba ba neng ba tshageditse ditaolo tsa Modimo le go ipolela gore ke ba ga Jesu. Ya ema e letile mo moshaweng wa lewatle.

13 Mme aanong mo ponatshagelong ya me, ka bona sebatana se se sa tswaelesegang se tlhatloga mo lewatleng. Se ne se na le ditlho go di supa le dinaka di le some, gape se na le dirwalo di le some mo dinakeng tsa sone. Mme mo tlhologong nngwe le nngwe go kwadilwe maina a tshapatso, a kgoba ebile a nyenyefatsa Modimo. **2** Sebatana se, se ne se tshwana le lengau mme se na le maroo a tshwanang le a bera le molomo o tshwana le lengau mme se na le moroo a tshwanang le a bera le molomo o tshwana le wa tau! Mme kgogela ya se naya nonofo ya yone le setilo sa bogosi le taolo e kgolo. **3** Mme ka bona tlhogo nngwe ya sone ekete e bolaisegile mo e neng ekete ga e kake ya tlhola e fola, mme ntho e e maswe thata eo ya fola! Mme batho ba lefatsho ba gagamaalela kgakgamatso e

mme ba sala sebatana se morago ka thero. 4 Ba obamela kgogela ka go se naya nonofo e e kalo, mme ba obamela sebatana se se sa tlwaelesegang. Ba goa ba re, "Ke kae kwa go nang le mongwe yo mogolo jaaka sone? Ke mang yo o ka kgonang go se tlhabantsha?" 5 Mme kgogela ya tlhohleletsa sebatana go tlhapatsha Morena; mme ya se naya taolo go laola lefatshe selekanyo sa dikgwedi di le masome a mane le bobedi. 6 Ka nako eo yothse sa tlhapatsha leina la tempele ya gagwe le botlhe ba ba nnang kwa legodimong. 7 Mme kgogela ya se naya nonofo go tlhabantsha batho ba Modimo le go ba fenyela, se naya dichaba tsotlhe le dipuo mo lefatsheng lothe. 8 Le batho botlhe ba maina a bone a neng a sa kwalwa pele ga tshimologo ya lefatshe mo lokwalong lwa Botshelo lwa Kwana e e tlhahlileng, ba obamela sebatana se se bosula. 9 A mongwe yo o nang le ditsebe, a reetse ka kelotlhoko. 10 Batho ba Modimo ba ba laoletsweng kgolegelo ba tlaa tshwarwa mme ba tsewe; ba ba laoletsweng loso ba tlaa bolawa. Mme lo se ka lwa kgobega marapo, gonne lo ke lobaka lwa go itshoka le go ikanyega. 11 Mme ka bona sebatana se sengwe se se sa tlwaelesegang se sone se neng se tswa mo lefatsheng, se na le dinaka tse di potlana di le pedi jaaka tsa Kwana mme se na le lentswe le le boifisang jaaka la kgogela. 12 Se ne sa dirisa nonofo yothse ya sebatana se ntho ya sone e e maswe e fodileng, se se neng sa batla gore batho ba lefatshe botlhe ba se obamele. 13 Mme sa dira dikgakgamatso tse motho ope a neng a se ka ke a di dumela jaaka go folosetsa molelo mo lefatsheng o tswa kwa legodimong, mongwe le mongwe a lebile. 14 Ka go dira dikgakgamatso tse, sa tsietsa batho gongwe le gongwe, se ne se dira dikgakgamatso tse fela fa sebatana sa nthla se le teng go se lebelela. Mme sa laela batho ba lefatshe go dira setshwantsho sa leje se segolo sa sebatana sa nthla, se se neng se bolaisegile thata, mme sa tloga sa rula. 15 Se ne sa letlelelwa go naya setshwano se sa leje mowa le go dira gore se bu! Hong setshwantsho se sa leje sa laela gore mongwe le mongwe yo o ganang go se obamela o tshwanetse go swal. 16 Mme sa pateletsa mongwe le mongwe, bagolo le bannye, bahumi le bahumanegi, magolegwa le ba ba golotsweng, go tshwaiwa ka lotshwao longwe mo letsogong le legolo kgotsa mo phatleng. 17 Mme ga bo go se ope yo o ka bonang tiro kgotsa le fa e le go reka mo marekelong kwa nthle ga gore a bo a na le lotshwao loo, lo e neng e le leina la sebatana kgotsa palo ya leina la sone. 18 Jaanong malepa ke a, a tlhokang kelotlhoko go rarabololwa. A ba ba kgonang, ba ranole palo e: dipalo tse mo leineng la gagwe di dira makgolo a maratato le masome a maratato le boratato!

14 Mme ka bona Kwana a eme mo Thabeng ya Sione mo Jerusalema, mme a bo a na le batho ba le dikete di le lekgolo le masome a mane le bone ba ba neng ba na le leina la gagwe le leina la ga Rraagwe le kwadiilwe mo diphatleng tsa bone. 2 Mme ka utlwa lentswe le tswa kwa legodimong ekete mosumo wa metse a magolo kgotsa tumo e kgolo ya maru. E ne e le moopelo wa batho ba letsa diharepa. 3 Mme baopedi ba ba diitwerere ba, ba ba neng ba le sekete le masome a mane le bone, ba opela sefela se se monate se sesha fa pele ga setilo sa bogosi sa Modimo le fa pele ga ditshedi tse nne le bagolwane

ba ba masome a mabedi le bone; mme go ne go se na ope yo o ka opelang sefela se fa e se ba ba sekete le masome a mane le bone, ba ba neng ba golotswa mo lefatsheng. 4 Gonng ga ba a leswafadiwa ke sepe mo meweng, ba itshekile jaaka makgarebane, ba sala Kwana morago gongwe le gongwe kwa o ya teng. Ba ne ba rekilwe mo gare ga batho ba ba mo lefatsheng e le ba ba tshwaetsweng Modimo. 5 Ga go na maaka a ba ka bewang molato ka one, ga ba na selabe sepe. 6 Mme ka bona moengele yo mongwe a fofa mo magodimong a tshotse Mafoko a a Molemo a bosakhutleng go rerela ba ba mo lefatsheng, ebong dichaba tsotlhe, ditso, dipuo le batho. (aiōnios g166) 7 A goela kwa godimo a re, "Boifang Modimo, lo bo lo bake bogolo jwa one. Gonng lobaka lo tsile lo o tlaa nnang moathodi ka lone. Obamelang ene yo o dirileng legodimo le lefatshhe, lewatle le metswedi yothse ya lona." 8 Mme moengele yo mongwe a mo latela mo legodimong, a re, "Babelone o ole, o ole, ebong motse o mogolo ole, ka nthla ya gore o tsieditse dichaba tsa lefatshe a di raya a re di tlhakanele mofine wa gagwe wa boitshekologo le bolelo." 9 Mme moengele wa boraro a ba latela a goa a re, "Mongwe le mongwe yo o obamelang sebatana se se tswang mo lewatleng le setshwantsho sa sone sa leje a bo a amogela lotshwao lwa sone mo phatleng kgotsa mo seatleng, 10 o tshwanetse go nwa mofine wa bogale jwa Modimo o sa timolwa. Mme ba tlaa tlhokofadiwa ka molelo le ka sebaole mo ponong ya baengele ba ba boitshepo le Kwana. 11 Mosi wa tlhokofatso ya bone o tlhatloga ka bosakhutleng, mme ga ba kitla ba nna le setshwantsho sa sone sa leje, mme gape ba tshwailwe palo ya leina la one. (aiōn g165) 12 "A se se kgothatse batho ba Modimo go itshokela teko nngwe le nngwe le pogiso ka bopelotelele, gonng baitshepi ba gagwe ba ba nnang ba nitame go ya kwa bofelong ba reetsa ditaolo tsa gagwe ebile ba ikanya Jesu." 13 Mme ka utlwa lentswe le tswa mo magodimong le re, "Kwala se: kwa bofelong lobaka lo fitlhile lwa gore baswela-tumelo ba tsene mo tuelong ya bone e e tlletseng. Ee, go bua Mowa wa re, ba sego thata, gonng jaanong ba tlaa ikhutsa mo matsapeng a bone le diteko, gonng ditiro tsa bone tse di molemo di ba sala morago go ya legodimong!" 14 Mme ponatshago ya fetoga mme ka bona leru le lesweu, le mongwe a ntse mo go lone yo o neng a tshwana le Jesu, yo o neng a bidiwa "Morwa Motho," a rwele serwalo sa gauta mo tlhoking ya gagwe le thipa e e bogale mo seatleng sa gagwe. 15 Mme moengele a tswa mo tempeleng mme a mo tlhaleletsa, a re, "Simolola go dirisa thipa, gonng lobaka lo go tlletse gore o robe; thobo e budule mo lefatsheng." 16 Hong ene yo o ntse mo lerung a akgisa thipa ya gagwe mo godimo ga lefatshe, mme thobo ya kokoangwa. 17 Morago ga moo moengele yo mongwe a tswa mo tempeleng e e kwa legodimong, le ene a bo a tshotse thipa e e bogale. 18 Gone fela foo moengele yo o nang le nonofo ya go nyeletsa lefatshe ka molelo, a tlhaleletsa moengele yo o neng a tshotse thipa a re, "Dirisa thipa jaanong go kgaola masitlha a mofine wa lefatshe, gonng a budule sentle go sekisiwa." 19 Jalo moengele a akgisa thipa ya gagwe mo godimo ga lefatshe mme a olela masitlha a mofine mo segatelong se segolo sa bogale jwa Modimo. 20 Mme masitlha a mofine a gatakwa mo segatelong kwa nthle ga motse, mme madi a elela mo molatswaneng o o bolelele jwa

dimmaele di le maggolo a mabedi ebile o le kwa godimo jaaka ditomo tsa pitse.

15 Mme mo legodimong ka bona sesupo se se boitshegang sa dilo tse di tlaa tlogang di tla; baengele ba supa ba ne ba abelwa go tliša dipetso tsa bofelo di supa mo lefatsheng, mme kwa bofelong bogale jwa Modimo bo tlaa fela. **2** Mme fa pele ga me ga bo go phatlaladitswe sengwe eketle lewatle la molelo le galase, mme mo go lone ga bo go eme botlhe ba ba neng ba fentse sebatana se se bosula le setshwantsho le lotshwao le palo ya sone. Botlhe ba ne ba tshotse diharepa tsa Modimo, **3** mme ba ne ba opela sefela sa ga Moshe, motlhanka wa Modimo le sefela sa Kwana ba re: "Ditiro tsa gago di dikgolo di a gakgamatsa, Morena Modimo Mothatayotlhe, Ditsela tsa gago di siame ebile di boammaaruri, Wena Kgosi ya dingwaganwaga. **4** Ke mang yo o se kitlang a boifa, Morena. A bo a galaletsa leina la gago? Gonne ke wena fela yo o boitshepo. Mme dichaba tsothe di tlaa tla di go obamela, Gonne tshiamo ya ditiro tsa gago e senotswe." **5** Mme ka leba mme ka bona gore Boitshepo jwa Maitshapo jwa Tempele mo legodimong bo butswa. **6** Baengele ba supa ba ba neng ba abetswe tiro ya go tsholola dipetso di supa; ba tswa mo tempeleng, ba apere matsela a masweu, le meitlamo ya gauta go kgabaganya dihuba tsa bone. **7** Mme sengwe sa ditshedi tse nne sa naya mongwe le mongwe wa bone lebotlolo la gauta le tletse bogale jo bo maswe jwa Modimo o o tshelang ka bosakhutleng. (aiōn 9:165) **8** Tempele ya tlaa mosi o o tswang mo kgalalelong ya Modimo le mo thateng ya one; mme ga bo go se ope yo o nonofileng go ka tsena go fithelela baengele ba supa ba sena go fetša go tsholola dipetso di supa.

16 Mme ka utlwa lentswe le legolo le tlhaeletsa baengele ba supa le tswa mo tempeleng le re, "Jaanong tsamayang lo tshololele megotswana e supa ya bogale jwa Modimo mo lefatsheng." **2** Jalo moengele wa ntšha a tsamaya a tshololela mogotswana wa gagwe mo lefatsheng mme dintho tse di maswe tsa tswa mongwe le mongwe yo o neng a na le lotshwao lwa sebatana e bile a obamela setshwantsho sa sone sa leje. **3** Moengele wa bobedi a tshololela mogotswana wa gagwe mo mawatleng, mme a nna jaaka madi a a metse a motho yo o suleng; mme sengwe le sengwe mo mawatleng othe sa a swa. **4** Moengele wa boraro a tshololela mogotswana wa gagwe mo dinokeng le mo metsweding ya metse mme tsa fetoga madi. **5** Mme ka utlwa moengele yo wa metse a re, "O siame ka go lere katlhoho e, wena yo o boitshepo, yo o leng teng le yo o neng a le teng, **6** gonne baitshepi ba gago le baporofiti ba ne ba bolawa mme madi a bone a tshelwa mo lefatshing; mme mo go ipusolotseng o tshotse madi a ba ba neng ba ba bolaile, ke tuelo ya bone e e ba tshwanetseng." **7** Mme utlwa moengele wa sebeso a re, "Ee, Morena Mothatayotlhe, dikotlhao tsa gago di siame e bile di boammaaruri." **8** Mme moengele wa bone a tshololela mogotswana wa gagwe mo letsatsi, a dira gore le fise batho botlhe ka molelo wa lone. **9** Mongwe le mongwe o ne a fisiwa ke mogote o mogolo, mme ba hutsa leina la Modimo o o neng o rometse dipetso, ba se ka ba fetola megopolo ya bone le maikutlo go o galaletsa. **10** Mme moengele wa bothano a

tshololela mogotswana wa gagwe mo setilong sa bogosi sa sebatana se se tswang mo lewatleng, mme bogosi jwa sone jwa fifadiwa. Mme bathanka ba sone ba itshotlha ditene ka ntšha ya bothoko, **11** mme ba hutsa Modimo wa legodimo ka ntšha ya dintho tsa bone le kutlobothoko, mme ba gana go ikwatlhaele ditiro tsothe tsa bone tse di bosula. **12** Moengele wa borataro a tshololela mogotswana wa gagwe mo nokeng e kgolo ya Uferatase mme ya kgala gore dikgosi tse di tswang bothabatsatsi le masole a tsona di tle di kgone go kgabaganyetsa kwa bophirima-tsatsi go sena sekgoreletsu sepe. **13** Mme ka bona mewa e le meraro e e bosula e e itirileng jaaka digwaga e tswa mo molomong wa Kgogeta, Sebatana, le Moporofiti wa sone wa Tsietso. **14** Mme mewa e e maswe e e neng e dira dikgagamato, ya buisanya le babusi botlhe ba lefatšhe go ba phutha go tlhabana le Morena ka Letsatsi le legolo la Katlhoho le le tlang. **15** "Bona, Ke tlaa tla ka tshoganetso jaaka legodu! Go sego botlhe ba ba ntetetseng, ba ba bolokang dikobo tsa bone di siame gore ba seka ba tlhokana le go tsamaya ba sa ikatega le go tlhabetšwa diithong." **16** Mme ba phuthela mephato yotlhe ya ntwa ya lefatšhe gaufi le felo fa go bidiwang, Amaketone ka Sehebera, ebong Thaba ya Megita. **17** Mme moengele wa bosupa a tshololela mogotswana wa gagwe mo phefong; mme lentswe le le nonofileng la tswa mo setilong sa bogosi sa tempele mo legodimong la re, "Go fedile!" **18** Mme ga nna tumo e kgolo ya maru logadima lwa phatšhima; mme ga nna le thoro mo e kgolo ya lefatšhe e e iseng e ke e nne teng mo tlhologong ya setho. **19** Motse o mogolo wa "Babelone" wa kgaogana dikarolo di le tharo, le metse mo tikologong ya lefatšhe ya gosomana ya fetoga matlotla; jalo Modimo wa gakologelwa bolelelotlhe jwa "Babelone," mme a othaiva go fithelela kwa lerothodong la bofelo la bogale jo bo mo senwelong sa mofine sa bogale jwa one jo bo tshabegang. **20** Diithakethake tsa nyelele, le diithaba tsa kokobela, **21** mme ga wa sefako se segolo kwa legodimong; maje a sone a le bokete jwa diponto di le lekgolo a wa kwa legodimong a wela batho mo lefatšheng, mme ba hutsa Modimo ka ntšha ya sefako se se boitshegang seo.

17 Mme mongwe wa baengele ba ba su pang ba ba neng ba tshololelwe dipetso mo lefatšheng a tla a bua le nna. A re, "Ntšhala morago, ke tlaa go supegetsa se se tlaa diragalelang seaka se se tumileng; se se ntseng mo godimo ga metse a mantši a lefatšhe. **2** Dikgosi tsa lefatšhe di ne tsa akafala naso, le batho ba tagisitswe ke mofine wa boaka jwa sone." **3** Jalo moengele a ntšaya ke le mo moweng a nkisa kwa sekakeng. Teng koo ka bona mosadi a palame sebatana se se hibidu se se neng se na le ditlhogo di supa le dinaka di le lesome, se kwadilwe matlhapa gongwe le gongwe ka mafoko a a tlhapatšang Modimo. **4** Mosadi yo o ne a apere diaparotse di borokwa le bohobidu le manyena a mantše a a dirilweng ka gauta le majana a bothokwa le ditlamo, mme a bo a tshotse phafana ya gauta e tletse tse di makgapha, ebong dilo tse di maswe tsa kgokafalo ya gagwe. **5** Mme ga bo go kwadilwe mo phatleng ya gagwe sesupo se se gakgamatsang se re, "Babelone yo Mogolo, Mmadiaka le wa Kobamelu ya Disetwa, gongwe le gongwe mo tikologong ya lefatšhe." **6** Ke ne ka bona gore o

ne a tlhapetswe, a tlhapetswe ke madi a baswela tumelo ba ga Jesu ba a ba bolaileng. Ka mo thoma mathlo ke tshogile thata. 7 Mme moengele a botsa a re, "Ke eng fa o gakgametse jaana? Ke tlaa go bolelela gore mosadi yoo ke mang le gore sebatana se o se palamang se raya eng. 8 Sebatana se se ne se tshela mme jaanong ga se thole se tshela. Le fa go ntse jalo se tlaa tloga se tswa mo moleting o o senang bolekanng se ya kwa tatlhegong ya bosakhutleng; mme batho ba lefatshe, ba maina a bone a sa kwalwang mo Lokwalong lwa Botshelo pele ga tshimologo ya lefatshe, ba tlaa akabadiwa ke go tla ga sone, morago ga se sena go swa. (Abyssos g12) 9 "Mme jaanong akanya thata: dithlogo tsa sone tse supa di emetse motse mongwe o o agilweng mo dithabeng di supa kwa mosadi yo o nnang teng. 10 Gape di emetse dikgosi di supa. Tse tlhano di setse di ole, jaanong go busa ya borataro, mme ya bosupa e e tla, mme puso ya yone e tlaa nna ka lobakanyana. 11 Sebatana se sehibidu se se suleng, ke kgosi ya boferabobedi, e e kileng ya busa pele e le nngwe ya tse di supang; morago ga puso ya sone ya bobedi, le sone se tlaa ya tatlhegong. 12 Dinaka tsa sone tse some ke dikgosi tse some tse di iseng di amogele bogosi; di tlaa bewa mo bogosing jwa tsone ka lobaka lo lo khutshwane, go busa le sone sebatana. 13 Tsothe di tlaa kwala tumalano ya go neela sebatana nonofo ya tsone le taolo. 14 Tsothe di tlaa tlhabantsha Kwana, mme e tlaa di fenywa, gonne ke Morena wa barena botlhe, le Kgosi ya dikgosi, mme batho ba gagwe ke ba ba biditsweng, ba ba thophilweng, e bile ke ba ba ikanyegang. 15 "Mawatlhe, macha le melapo e mosadi o ntseng mo go yone e emetse boidiidi jwa batho jwa merafe yotlhe. 16 "Mme sebatana se se hibidu le dinaka tsa sone tse some, tse di emetse dikgosi tse some tse di tlaa busang naso, tsothe di tlaa ila mosadi, mme di tlaa mo thasela di mo tlogele a sa ikatega a bo a fisiwe ka molelo. 17 Gonne Modimo o tlaa tsenya mo diithaloganyong tsa bone, leano le le tlaa tsewedisang maikaelelo a one: ba tlaa dumalana ka bongwe jwa pelo go naya sebatana se sehibidu taolo, gore mafoko a Modimo a tle a diragadiwe. 18 Mosadi yo o mmonyeng mo ponatshagelong ya gago o emetse motse o mogolo o o busang dikgosi tsa lefatshe."

18 Mme morago ga mo gotlhe ka bona moengele yo mongwe a fologa kwa legodimong ka taolo e kgolo, mme lefatshe la phatsimisiwa ke kgalalelo ya gagwe. 2 A goa a re, "Babelone yo Mogolo o ole, o ole; o fetogile boago jwa mewa e e maswe, le mefuta yotlhe ya mewa e e bosula. 3 Gonne dichaba tsothe di nole mofine o o bolayang wa boaka jwa gagwe jo bo feleletseng. Babusi ba lefatshe ba akafetse nae, le babapatsi mo lefatsheng lotlhe ba humisitse ke botshelo jwa gagwe jwa letlepu." 4 Mme ka utlwa lentswe le lengwe le bitsa le tswa kwa legodimong le re, "Mo tlogeleng, batho ba me; se tlhakaneleng dibe nae, e seng jalo lo tlaa otlhaiwa nae. 5 Gonne dibe tsa gagwe di thatlhagane selekanyo sa go fitlha kwa legodimong mme Modimo o ipaakanyeditse go mo atholela melato ya gagwe. 6 Mo direleng jaaka a lo diretse, le go feta foo, mo thatlhaganyetseng petso ya ditiro tsa gagwe tse di bosula. O diretse batho ba le bantsi dinwelo tsa tatlhego, mo direleng fela jalo go menagane.

7 O tshetse mo letlepong le mo bothapelweng, tshwantshanyang matshelo a gagwe le khutsafalo le kutlobothoko, o ikgantsha a re, 'Ke mohumagadi mo setilong sa me sa bogosi. Ga ke mothologadi yo o se ka keng a itirela sepe. Ga nkita ke nna le kutlobothoko'. 8 Mme ke gone ka moo kutlobothoko ya loso le selelo le mmopamo di tlaa mo tlela ka letsatsi le le lengwe, mme o tlaa nyelediwa ka molelo; gonne Morena yo o mo atholang o mogolo." 9 Mme baetelelepele ba lefatshe, ba ba tlhakanseng ditiro tse di maswe tsa boaka nae, ebile ba itumelela go ratwa ke ene, ba tlaa mo hutsafalela fa ba bona mosi wa setopo sa gagwe. 10 Ba tlaa emela kgakala, ba roroma ka poifo ebile ba lelela kwa godimo ba re, "Ijoo, Babelone, motse o mogolo! Tshetse ya gagwe e tsile ka nako e khutshwane." 11 Mme barekisi ba lefatshe ba tlaa mo lelela ka khutsafalo, gonne ga go ope yo o tlaa tholang a reka dithoto tsa bone. 12 Gonne e ne e le moreki wa bone yo mogolo wa gauta le selefera majana a bothokwa, diperela, matsela a a boleta, sei e e bohobidu jo bo borokwa le bohobidu jo bo lethololo le mofuta mongwe le mongwe wa diithare tsa dinkgisa monate, dithoto tsa dinkgisa monate, dithoto tsa naka lwa tlou le dijana tsa logong tse di tlhathlwa kgolo le kgotho le tshipi le mmabole; 13 le ditswaiso tsa dijo, dinkgisa monate, le maswalo, setlolo le lebano, mofine, lookwane lwa motlhwane, bopi jo bo boleta; korong, dikgomo, dinku, dipitse dikara le batlhanka, le mewa ya batho tota. 14 Ba lela ba re, "Dilo tsothe tse o neng a di rata thata di fedile, dijo tse di metsegang le tse di kgorwang tse o ntseng o di rekisa ka tlhathlwa e kgolo ga di kila di nna tsa gago gope. Di feletse ruri." 15 Mme jaanong barekisi ba ba humisitsweng ke go mo rekisetsa dilo tse, ba tlaa emela kgakala, ba boifa thokofatso, ba lela, ba re, 16 "Ijoo, motse o mogolo o montle jaaka mosadi yo o apereng leloba le le boleta le bohobidu jo bo borokwa le bohobidu jo bo lethololo, o o kgabisitsweng ka gauta le majana a bothokwa le diperela. 17 Ka motsotso o le mongwe, dikhumo tsothe tsa motse di fedile!" Le beng ba dikepe botlhe le balaodi ba dikepe tsa barekisi le badiri mo dikepeng ba tlaa emela kgakala, 18 ba lela fa ba bona mosi o tlhatloga, ba re, "Ke fa kae mo lefatsheng lotlhe mo go nang le motse o o ntseng jaaka o?" 19 Mme ba tlaa itshela lorole mo dithlogong ka kutlobothoko ba re, "Ijoo, Ijoo, a motse o mogolo! O o re humisitseng rotlhe ka dikhumo tsa one. Mme jaanong ka oura e le nngwe gotlhe go fedile..." 20 Mme wena, legodimo, itumelele go wa ga gagwe; le lona bana ba Modimo, baporofiti le baaposetoloi! Gonne kwa bofelong Modimo o lo mo atholelsetse. 21 Mme moengele yo mogolo a tsholetsa lefika le le tshwanang le lolwala a le latlhela mo lewatileng mme a goa a re, "Babelone, motse o mogolo, o tlaa latlwa jaaka ke latlhile leje le mme o tlaa nyelela ka bosakhutleng. 22 Ga go kila go thloga go nna le moopelo gona, ga go kila go thloga go nna le dipiano, diletso le ditorompeta. Ga go kila go thloga go nna madirelo a mofuta ope teng, e bile ga go kila go thloga go nna le tshilo ya mabele. 23 Go tla nna lefifi le legolo thata mo go ene; ga go kila go thloga go bonala lesedi la lobone mo fensetereng. Ga go kila go thloga go nna le meduuetso ya lonyalo le boitumelo jwa banyadi le banyadwi. Barekisi ba gagwe ba ne ba itsego mo tikologong ya lefatshe lotlhe mme o tsieditse dichaba tsothe ka boloi jwa gagwe.

24 Mme ke ene yo o neng a na le maikarabelo mo mading a baporofiti botlhe ba ba bolaetsweng tumelo le baitshepi."

19 Mme morago ga mo ka utlwa loshalaba lologolo lwa batho mo legodimong ba re, "Halleluja! Go bakwe Morena! Poloko e tswa mo Modimong wa rona. Tlotlo le taolo ke tsa one o le esi; 2 gonne dikathloho tsa one di siame ebile di boammaaruri. O othlaile seaka se segolo se se bodisitseng polao ya bathlanka ba one." **3** Ba bua gangwe le gape, ba re, "A go bakwe Morena! Mme mosi wa go fisiwa ga gagwe o ne wa thatloga ka bosakhutleng!" (aiōn g165) **4** Mme bagolwane ba ba masome a mabedi le bone le ditshedi tse nne ba wela fa fatshe ba obamela Modimo, o o neng o ntse mo setilong sa bogosi, ba re, "Amen! Halleluja! Go bakwe Morena!" **5** Mme mo setilong sa bogosi ga tswa lentswe le le reng, "Bakang Modimo wa rona, lona lotlhe bathanka ba One, bannye le bagolo, ba ba o boifang." **6** Mme ka utlwa gape se se neng se utlwala jaaka loshalaba lwa batho ba bantsi kgotsa jaaka makhubu a lewatle a le leggolo a phachegela mo lotshitshing kgotsa jaaka tumo e kgolo ya maru, ba re, "Go bakwe Morena. Gonne Morena Modimo wa rona, Mothatayotlhe, o a busa. **7** A re itumeleng re bo re ipele re mo tlotle; gonne lobaka lo fitlhile lwa modiro wa lonyalo lwa Kwana, mme monyadi wa gagwe o ipaakantse. **8** O letleletswe go apara matsela a a phepa a masweu a a borethe." (Letsela le le borethe le raya ditiro tse di molemo tse di dirilweng ke batho ba Modimo). **9** Mme moengele a nthaya mafoko a: "Go sego ba ba laleditsweng modiro wa nyalwa ya Kwana." Mme a tlatsa a re, "Modimo ka boone o buile se." **10** Mme ka wela fa dinaong tsa gagwe go mo obamela, mme a re, "Nnyaa! o se ka wa nkobamela! Gonne ke motlhanka wa Modimo fela jaaka wena, le jaaka bakaulengwe ba gago ba ntse mo Moreneng, ba ba supang ka tumelo ya bone mo go Jesu. Maikaelelo a seporofeso sotlhe le a gotlhe mo ke go go supegeditseng ke go bolela kaga Jesu." **11** Mme ka bona legodimo le bulegile mme pitse e tshweu e eme gone; Mme leina la yo o neng a palame pitse e ne e le "Boikanyego le Boammaaruri", ene yo o athlolang a bo a dira ntwa ka tshiamo. **12** Matlho a gagwe a ne a tshwana le dikgabo tsa molelo, mme mo tlhogong ya gagwe ga bo go le dirwalo tse dintsi. Leina le ne le kwadilwe mo phatleng ya gagwe, mme ya bo e le ene fela yo o itseng tlhaloso ya lone. **13** O ne a apere diaparo tse di innweng mo mading, mme leina la gagwe e ne e le "Lefoko la Modimo." **14** Mme dintwa tsa legodimo, di apere letsela le le borethe, le le phepa le le sweu, tsa mo sala morago di palame dipitse tse di tshweu. **15** Mo molomong wa gagwe a bo a tshotse chaka e e bogale go kgemetha dichaba; o ne a di busa ka thobane ya tshipi; mme a gataka segatsetso sa mofine sa bogale jwa Modimo Mothatayotlhe. **16** Mo kobong ya gagwe le mo seruping ga bo go kwadilwe mokwalo o: "KGOSI YA DIKGOSI LE MORENA WA BARENA." **17** Mme ka bona moengele a eme mo letsatsing, mme a kua dinonyane ka lentswe le legolo a re, "Tlang! Phuthaganelang selalelo sa Modimo o mogolo! **18** Tlang lo jeng nama ya dikgosi, le balaodi; le banna ba ba thata; ya dipitse le bapalami; le batho botlhe, ba bannye le bagolo, bathanka le ba ba golotsweng." **19** Mme ka bona sebatana se

se bosula se phuthile mebuso ya lefatshe le masole a yone go thabantsha yo o palameng pitse le masole a gagwe. **20** Mme sebatana se se bosula sa tshwarwa, mmogo le Moporofiti wa tsietso, yo o neng a dira dikgagamato tse dikgolo fela fa sebatana se se bosula se ne se le teng, dikgagamato tse di tsieditseng botlhe ba ba amogetseng lotshwao lwa sebatana, le ba ba obametseng setshwantsho sa sone sa leje. Ka bobedi jwa bone, Sebatana le Moporofiti wa tsietso, ba ne ba lathelwa mo lecheng la molelo le le tukang ka sebaole. (Limnē Pyr g3041 g4442) **21** Mme mophato otlhe wa masole wa bolawa ka chaka e e bogale e e neng e le mo molomong wa yo o palameng pitse e tshweu, le dinonyane tsothe tsa loapi tsa kgora nama ya bone.

20 Mme ka bona moengele a fologa kwa legodimong a tshotse dilotlole tsa molete o o senang bolekanngo le keetane e e bokete mo letsogong la gagwe. (Abyssos g12) **2** Mme a tshwara kgogela noga ya bogologolo, Satane, a mo golega selekanyo sa dingwaga di le sekete. **3** Mme a mo latlhela mo moleteng o o senang bolekanngo, o jaanong a neng a o tswala a bo a o lotlela, gore e se ka ya tlhola e tsietsa dichaba gape go fitlhelela dingwaga tse di sekete di fela. Morago ga moo e tlaa gololwa gape ka lobakanyana. (Abyssos g12) **4** Mme ka bona ditilo tsa bogosi, mme ba ba neng ba ntse mo go tsona e ne e le ba ba neng ba neetswe taolo ya go athlola. Mme ka bona mewa ya ba ba neng ba kgaotse dithlogo ka nthla ya go supa ka Jesu, le go bolela Lefoko la Modimo, le ba ba neng ba se ka ba obamela sebatana le setshwantsho sa sone sa leje, kgotsa go amogela lotshwao lwa sone mo diphatleng tsa bone kgotsa mo diatleng. Ba ne ba rudile mme jaanong ba busa le Keresete selekanyo sa dingwaga di le sekete. **5** E ke tsogo ya nthla ya baswi. (Mme ba ba setseng botlhe ba se ka ba rula go fitlhelela dingwaga tse di sekete di fela). **6** Go sego ebile go boitshepo ba ba nang le kabelo mo tsogong ya nthla. Gonne mo go bone loso lwa bobedi ga lo na thata, gonne ba tlaa nna baperesiti ba Modimo le ba ga Keresete... **7** E tlaa re fa dingwaga tse di sekete di fela, Satane o tlaa gololwa mo kgolelong. **8** O tlaa tswa a ya go tsietsa dichaba tsa lefatshe a bo a di phutha, ga mmogo le Gogo le Magogo, go ya ntweng, ebong lesomo le legolo, le le senang palo jaaka motlhaba o o mo lotshitshing. **9** Ba tlaa thatloga ba kgabaganya kwa godimo ga bophara jwa lefatshe go dikaganyetsa batho ba Modimo le motse o o rategang wa Jerusalema mo ntheng tsothe. Mme molelo wa Modimo o o tswang legodimong o tlaa fologela mo mephatong ya bathhasedi o bo o e laila. **10** Mme Diabolo yo o ba tsieditseng o tlaa latlhela mo lecheng la molelo o o tukang ka sebaole mo sebatana le moporofiti wa tsietso ba leng teng, mme ba tlaa tlhokofadiwa bosigo le motshegare ka bosakhutleng. (aiōn g165, Limnē Pyr g3041 g4442) **11** Mme ka bona setilo sa bogosi se segolo se se sweu le yo o se ntseng, yo lefatshe le legodimo di neng tsa tshaba sefathlogo sa gagwe, mme tsa tlhoka fa di iphithang teng. **12** Mme ka bona baswi, ba bannye le bagolo, ba eme fa pele ga Modimo mme dikwalo tsa bo di butswa, mmogo le Lokwalo lwa Botshelo. Mme baswi ba ne ba atholwa ka fa dilong tse di neng di kwadilwe dikwalong, mongwe le mongwe ka fa ditirong tse o di dirileng. **13** Mme mawatle a ntsha baswi

ba ba mo go one; mme lefatshe le bobipo tsa ntsha baswi ba ba neng ba le mo go tsona. Mongwe le mongwe a atholwa ka fa dithrong tsa gagwe. (Hadēs g86) 14 Mme loso le moete tsa latlhelwa mo lecheng la molelo. Se ke loso lwa bobedi, ebong lecha la molelo. (Hadēs g86, Limnē Pyr g3041 g4442) 15 Mme fa leina la mongwe le ne le sa fithelwe le kwadilwe mo Lokwalong lwa Botshelo, o ne a latlhelwa mo lecheng la molelo. (Limnē Pyr g3041 g4442)

21 Mme ka bona lefatshe le lesa (go sena mawatlē!) le legodimo le lesa, gone lefatshe le legodimo la pele di ne di nyeletse. 2 Mme nna, Johane ka bona motse o o Boitshepo, Jerusalema yo moshā, a fologa kwa legodimong a tswa kwa Modimong. E ne e le pono e e galalelang a le montle jaaka monyadiwa kwa lonyalong lwa gagwe. 3 Mme ka utlwa lentsewe le thaeletsā le tswa kwa setilong sa Bogosi le re, "Bonang bonno jwa Modimo jaanong bo mo bathong, mme o tlaa nna le bone mme ba tlaa nna batho ba One; ee, Modimo ka bo one o tlaa nna mo go bone. 4 O tlaa phimola dikeledi tsothe mo matlhong a bone, mme ga go kitla go thola go nna le loso, kgotsa bohutsana kgotsa seelo kgotsa kutlobothoko. Tsothe di nyeletse ruri." 5 Mme yo o ntseng mo setilong sa bogosi a re, "Bona, ke shafatsa dilo tsothe!" Mme a nthaya a re, "Kwala se, gone se ke se go bolelelang se boikanyo le boammaaruri! 6 Go fedie! Ke nna Alefa le Omega, Tshimologo le Bokhutlo. Ke tlaa naya ba ba nyorilweng metswedi ya metse a botshelo, e le mpho! 7 Mongwe le mongwe yo o fenyang o tlaa rua masego a othe, mme ke tlaa nna Modimo wa gagwe le ene o tlaa nna morwaake. 8 Mme magatlapa a a mphuralelang, le ba ba sa ikanyegeng mo go nna le ba ba bodileng, ke babolai, baitshekologi, ba ba buang le mewa e e maswe, le baobamedi ba medimo ya disetswa le baaki bothe, tatlhego ya bone e mo lecheng le le tukang ka molelo le sebabole. Se ke loso lwa bobedi." (Limnē Pyr g3041 g4442) 9 Mme mongwe wa baengele ba ba supang, ba ba neng ba tsholola megotswana e e neng e na le dipetso tsa bofelo, a tla mme a nthaya a re, "Ntshala morago mme ke tlaa go supegetsā monyadiwa, mosadi wa ga Kwana." 10 Mo ponatshagelong a ntseela kwa setlhoweng sa thaba e e goletseng kwa godimo mme ya re ke le mo go yone ka lebelela motse oo wa Jerusalema yo o Boitshepo, o fologa kwa legodimong o tswa kwa Modimong. 11 O ne o tletse kgalalelo ya Modimo mme o phatsima jaaka lentsewe le le bothokwa, legakwa le le phepa jaaka jasepara. 12 Dipota tsa one di ne di athame di goletsē kwa godimo di na le dikgoro di le lesome le bobedi di disitswe ke baengele ba le lesome le bobedi. Mme maina a ditso di le lesome le bobedi tsa merafe ya Iseraele a bo a kwadilwe mo dikgorong. 13 Go ne go na le dikgoro di le tharo mo ntheng nngwe le nngwe, bokone, borwa, bothaba le bophirimatsatsi. 14 Dipota di ne di na le maje a motheo a le lesome le bobedi, mme mo go one ga bo go kwadilwe maina a baaposetoloi ba ba lesome le bobedi ba ga Kwana. 15 Mme moengele a bo a tshotse selekanyo sa gauta go lekanya motse le dikgoro tsa one le dipota. 16 Mme e rile a lekanya, a fithela o lekalekana; tota bolelele jwa one bo ne bo lekana le boathamo, gone go tsholetsega ga one go ne go lekana le bolelele le bophara jwa one, e le dimaele di

le sekete le makgolo a matlhano. 17 A lekanya bokima jwa dipota mme a fithela di le selekanyo sa dikgato di le makgolo a mabedi le lesome le borataro, go kgabaganya, (mme moengele a mpiletsa dilekanyo tse, a dirisa molao wa go lekanya dilo). 18 Motse ka bo one o ne o itshekile o galalela jaaka galase ya gauta! Dipota di ne di dirilwe ka jasepera, mme di agilwe mo dithakong tse di lesome le bobedi tsa maje a motheo o o neng o kgabisitswe ka majana a bothokwa. Mme motheo wa nthā e ne e le jasepera; wa bothano e le Saredonukese; 20 wa borataro e le Saredise; wa bosupa e le Kerusoletse; wa bofera bobedi e le berile; boferabongwe e le topase; wa lesome e le Kerusaperase; wa lesome le bongwe e le Yakinithē; wa lesome le bobedi e le Amethusetā. 21 Dikgoro tse di lesome le bobedi di ne di dirilwe ka diperela, kgoro nngwe le nngwe e dirilwe ka perela e le nngwe! Mme mmila o mo tona o ne o dirilwe ka gauta e e galalelang, jaaka galase. 22 Go ne go sena tempele epe e e bonalang mo motsing, gone Morena Modimo Mothatayothē le Kwana ke bone tempele ya motse oo. 23 Mme motse ga o thoke letsatsi kgotsa ngwedi go o bonessa gone kgalalelo ya Modimo le ya ga Kwana di a o bonessa. 24 Lesedi la one le tlaa bonessa dichaba tsa lefatshe, mme babusi ba lefatshe ba tlaa tla ba o leretse kgalalelo. 25 Dikgoro tsa one ga di ke di tswalwa di nna di butswa letsatsi lotlhe, ebile ga go na bosigo! 26 Mme kgalalelo le tlotlo ya dichaba tsothe di tlaa tliisiwa mo go one. 27 Ga go na sepe se se bosula se se tlaa letlelelwang mo go one, ke raya le fa e le yo o boitshekologo kgotsa yo o sa ikanyegeng, mme fa e se fela ba maina a bone a kwadilweng mo Lokwalong lwa Botshelo lwa ga Kwana.

22 Mme a ntshupegetsā noka ya metse a a itshekileng a Botshelo, a le phepa jaaka legakwa, a elela a tswa mo setilong sa Bogosi sa Modimo le sa Kwana, 2 a fologela ka mmila o mo tona. Mo ntheng e nngwe le e nngwe ya noka ga bo go thogile dithare tsa Botshelo di na le dikungo di le lesome le bobedi, di ungwa dikungo tse di itekanetseng kgwedi le kgwedi; matlhare a tsona a ne a dirisiwa e le molemo go alafa dichaba. 3 Ga go kitla go nna le sepe mo motseng se se bosula; gone setilo sa bogosi sa Modimo le sa ga Kwana di tlaa bo di le gone, mme bathanka ba gagwe ba tlaa mo obamela. 4 Mme ba tlaa bona sefatlhago sa gagwe; mme leina la gagwe le tlaa kwalwa mo dipatleng tsa bone. 5 Mme ga go kitla go nna bosigo gone, ga go thokege dipone kgotsa letsatsi, gone Morena Modimo o tlaa nna lesedi la bone; mme ba tlaa busa ka bosakhutleng. (aiōn g165) 6 Mme moengele a nthaya a re, "Mafoko a a Boikanyo le Boammaaruri; 'Ke e tla ka bonako!' Modimo, o o bolelelang baporofiti ba one se se diragalang mo lobakeng lo lo tlang, o rometse moengele wa one go go bolelela se se tlaa tlogang se diragala. Go sego ba ba se dumelang le botlhe ba ba kwadilweng mo lokwalong lo lo mennweng." 8 Nna, Johane ke bonye, e bile ke utwile dilo tse tsothe, mme ke ne ka wela fa fatshe go obamela moengele yo o neng a di mpontsha; 9 mme a nthaya gape a re, "Nnyaa, se dire sepe se se ntseng jalo. Le nna ke motlhanka wa ga Jesu jaaka wena, le jaaka bomorwa rrago ba ntse, le botlhe ba ba bolokileng boammaaruri jo bo kwadilweng mo lokwalong lo.

Ba obamela Modimo o le osi." 10 Mme a ntaela a re, "O se ka wa tswalela se o se kwadileng, gonne nako ya tiragatso e atametse. 11 Mme e tlaa re fa lobaka loo lo tla, botlhe ba ba dirang bosula ba tlaa bo dira go fetisisa; yo o leswe o tlaa nna leswe thata, batho ba ba siameng ba tla siama thata; ba ba boitshepo ba tlaa tswelela mo boitshepong jo bogola." 12 "Bonang, ke e tla ka bonako, mme ke tshotse tuelo ya me, go duela mongwe le mongwe ka fa ditirong tse a di dirileng. 13 "Ke nna, Alefa le Omega, Tshimologo le Bokhutlo, wa Ntlha le wa Bofelo. 14 Go sego botlhe ba ba tlhatswitseng dikobo tsa bone, go nna le tshwanelo ya go tsena ka dikgoro tsa motse, le go ja loungo lwa setlhare sa Botshelo. 15 "Kwa ntle ga motse go na le ba ba ikgogonneng mo Modimong, le baloi le diaka le babolai le baobamedi ba medimo ya disetwa, le botlhe ba ba ratang, maaka, le go a bua. 16 Nna Jesu, ke rometse moengele wa me kwa go lona go bolelela diphuthago dilo tse tsotlhe. Ke nna modi wa ga Dafide le wa lotso lwa gagwe. Ke Naledi ya Moso e e phatsimang." 17 Mme mowa le monyadiwa ba re, "Tla" A mongwe le mongwe wa lona yo o ba utlwanng le ene a re, "Tla" A yo o nyorilweng a tle, mongwe le mongwe yo o batlang go tla; a a tle, a tle go nwa metse a botshelo kwa ntle ga theko. 18 Mme ke bolelela mongwe le mongwe ka tlhwaafalo yo o balang lokwalo lo: go re, fa mongwe a oketsa mo go se se kwadilweng fa, Modimo o tlaa mo okeletsa dipetso tse di boletsweng mo lokwalong lo. 19 Mme fa mongwe a fokotsa bontlha bongwe jwa diporofeso tse, Modimo o tlaa tlosa seabe sa gagwe mo setlhareng sa Botshelo, le mo motseng o o Boitshepo jaaka go boletswe. 20 Ene yo o buileng dilo tse tsotlhe a re, "Ee, ke e tla ka bonako!" Amen! Tla, Morena Jesu! 21 A tshegofatso ya Morena Jesu Keresete e nne le lona lotlhe. Amen!



Mme nna, Johane ka bona motse o o Boitshepo, Jerusalema yo moshana, a fologa kwa legodimong a tswa kwa Modimong. E ne e le pono e e galalelang a le montle jaaka monyadiwa kwa lonyalong lwa gagwe. Mme ka utlwa lentswe le tlhaeletsana le tswa kwa setilong sa Bogosi le re, "Bonang bonno jwa Modimo jaanong bo mo bathong, mme o tlaa nna le bone mme ba tlaa nna batho ba One; ee, Modimo ka bo one o tlaa nna mo go bone.

Tshenolo 21:2-3

Reader's Guide

Setswana at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Setswana at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Setswana---Open-Tswana-Living/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

Luke 8:31
Baroma 10:7
Tshenolo 9:1
Tshenolo 9:2
Tshenolo 9:11
Tshenolo 11:7
Tshenolo 17:8
Tshenolo 20:1
Tshenolo 20:3

aidios

Baroma 1:20
Juda 1:6

aiōn

Mathaio 12:32
Mathaio 13:22
Mathaio 13:39
Mathaio 13:40
Mathaio 13:49
Mathaio 21:19
Mathaio 24:3
Mathaio 28:20
Mareko 3:29
Mareko 4:19
Mareko 10:30
Mareko 11:14
Luke 1:33
Luke 1:55
Luke 1:70
Luke 16:8
Luke 18:30
Luke 20:34
Luke 20:35
Johane 4:14
Johane 6:51
Johane 6:58
Johane 8:35
Johane 8:51
Johane 8:52
Johane 9:32
Johane 10:28
Johane 11:26
Johane 12:34
Johane 13:8
Johane 14:16

Ditiro 3:21
Ditiro 15:18
Baroma 1:25
Baroma 9:5
Baroma 11:36
Baroma 12:2
Baroma 16:27
Bakorintha I 1:20
Bakorintha I 2:6
Bakorintha I 2:7
Bakorintha I 2:8
Bakorintha I 3:18
Bakorintha I 8:13
Bakorintha I 10:11
Bakorintha II 4:4
Bakorintha II 9:9
Bakorintha II 11:31
Bagalatia 1:4
Bagalatia 1:5
Baefesia 1:21
Baefesia 2:2
Baefesia 2:7
Baefesia 3:9
Baefesia 3:11
Baefesia 3:21
Baefesia 6:12
Bafilipi 4:20
Bakolosa 1:26
Timotheo I 1:17
Timotheo I 6:17
Timotheo II 4:10
Timotheo II 4:18
Tito 2:12
Bahebera 1:2
Bahebera 1:8
Bahebera 5:6
Bahebera 6:5
Bahebera 6:20
Bahebera 7:17
Bahebera 7:21
Bahebera 7:24
Bahebera 7:28
Bahebera 9:26
Bahebera 11:3
Bahebera 13:8
Bahebera 13:21
Petere I 1:23

Petere I 1:25
Petere I 4:11
Petere I 5:11
Petere II 3:18
Johane I 2:17
Johane II 1:2
Juda 1:13
Juda 1:25
Tshenolo 1:6
Tshenolo 1:18
Tshenolo 4:9
Tshenolo 4:10
Tshenolo 5:13
Tshenolo 7:12
Tshenolo 10:6
Tshenolo 11:15
Tshenolo 14:11
Tshenolo 15:7
Tshenolo 19:3
Tshenolo 20:10
Tshenolo 22:5

aiōnios

Mathaio 18:8
Mathaio 19:16
Mathaio 19:29
Mathaio 25:41
Mathaio 25:46
Mareko 3:29
Mareko 10:17
Mareko 10:30
Luke 10:25
Luke 16:9
Luke 18:18
Luke 18:30
Johane 3:15
Johane 3:16
Johane 3:36
Johane 4:14
Johane 4:36
Johane 5:24
Johane 5:39
Johane 6:27
Johane 6:40
Johane 6:47
Johane 6:54
Johane 6:68

Johane 10:28
Johane 12:25
Johane 12:50
Johane 17:2
Johane 17:3
Ditiro 13:46
Ditiro 13:48
Baroma 2:7
Baroma 5:21
Baroma 6:22
Baroma 6:23
Baroma 16:25
Baroma 16:26
Bakorintha II 4:17
Bakorintha II 4:18
Bakorintha II 5:1
Bagalattia 6:8
Bathesalonia II 1:9
Bathesalonia II 2:16
Timotheo I 1:16
Timotheo I 6:12
Timotheo I 6:16
Timotheo II 1:9
Timotheo II 2:10
Tito 1:2
Tito 3:7
Filimone 1:15
Bahebera 5:9
Bahebera 6:2
Bahebera 9:12
Bahebera 9:14
Bahebera 9:15
Bahebera 13:20
Petere I 5:10
Petere II 1:11
Johane I 1:2
Johane I 2:25
Johane I 3:15
Johane I 5:11
Johane I 5:13
Johane I 5:20
Juda 1:7
Juda 1:21
Tshenolo 14:6

eleēsē

Baroma 11:32

Geenna

Mathaio 5:22
Mathaio 5:29
Mathaio 5:30
Mathaio 10:28
Mathaio 18:9
Mathaio 23:15
Mathaio 23:33
Mareko 9:43

Mareko 9:45
Mareko 9:47
Luke 12:5
Jakobe 3:6

Hadēs

Mathaio 11:23
Mathaio 16:18
Luke 10:15
Luke 16:23
Ditiro 2:27
Ditiro 2:31
Bakorintha I 15:55
Tshenolo 1:18
Tshenolo 6:8
Tshenolo 20:13
Tshenolo 20:14

Limnē Pyr

Tshenolo 19:20
Tshenolo 20:10
Tshenolo 20:14
Tshenolo 20:15
Tshenolo 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48

Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

Petere II 2:4


Questioned

Petere II 2:17




*Aberahame o ne a ikanya Modimo, mme erile Modimo o mo raya o re a huduge mo ga gabo a ye kgakala kwa lefatsheng le lengwe le o le mo solofeditseng, Aberahame a dumela.
A tsamaya, a sa itse tota le kwa a neng a ya teng. - Bahebera 11:8*

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Comme le nna tota, Mesia, ga ke fano go tla go direlwa fa e se go thusa ba bangwe, le go nisha botshelo jwa me gore e nne thekololo ya batho ba le banisi. - Mareko 10:45



Ditsala tse di rategang mo Roma, Lokwalo lo lo tswa kwa go Paulo, motlhanka wa ga Jesu Keresete, yo o tlhophilweng go nna morongwa, ebile a romilwe go rera Mafoko a Modimo a a Molemo. - Baroma 1:1

Creation 4004 B.C.

| | |
|-----------------------------------|------|
| Adam and Eve created | 4004 |
| Tubal-cain forges metal | 3300 |
| Enoch walks with God | 3017 |
| Methuselah dies at age 969 | 2349 |
| God floods the Earth | 2349 |
| Tower of Babel thwarted | 2247 |
| Abraham sojourns to Canaan | 1922 |
| Jacob moves to Egypt | 1706 |
| Moses leads Exodus from Egypt | 1491 |
| Gideon judges Israel | 1245 |
| Ruth embraces the God of Israel | 1168 |
| David installed as King | 1055 |
| King Solomon builds the Temple | 1018 |
| Elijah defeats Baal's prophets | 896 |
| Jonah preaches to Nineveh | 800 |
| Assyrians conquer Israelites | 721 |
| King Josiah reforms Judah | 630 |
| Babylonians capture Judah | 605 |
| Persians conquer Babylonians | 539 |
| Cyrus frees Jews, rebuilds Temple | 537 |
| Nehemiah rebuilds the wall | 454 |
| Malachi prophecies the Messiah | 416 |
| Greeks conquer Persians | 331 |
| Seleucids conquer Greeks | 312 |
| Hebrew Bible translated to Greek | 250 |
| Maccabees defeat Seleucids | 165 |
| Romans subject Judea | 63 |
| Herod the Great rules Judea | 37 |

(The Annals of the World, James Uusher)

Jesus Christ born 4 B.C.

New Heavens and Earth

| | |
|------|--|
| 1956 | Christ returns for his people |
| 1830 | Jim Elliot martyrd in Ecuador |
| 1731 | John Williams reaches Polynesia |
| 1614 | Zinzendorf leads Moravian mission |
| 1572 | Japanese kill 40,000 Christians |
| 1517 | Jesuits reach Mexico |
| 1455 | Martin Luther leads Reformation |
| 1323 | Gutenberg prints first Bible |
| 1276 | Franciscans reach Sumatra |
| 1100 | Ramon Llull trains missionaries |
| 1054 | Crusades tarnish the church |
| 997 | The Great Schism |
| 864 | Adalbert martyrd in Prussia |
| 716 | Bulgarian Prince Boris converts |
| 635 | Boniface reaches Germany |
| 569 | Alopen reaches China |
| 432 | Longinus reaches Alodia / Sudan |
| 397 | Saint Patrick reaches Ireland |
| 341 | Carthage ratifies Bible Canon |
| 325 | Ulfilas reaches Goth / Romania |
| 250 | Niceae proclaims God is Trinity |
| 197 | Denis reaches Paris, France |
| 70 | Tertullian writes Christian literature |
| 61 | Titus destroys the Jewish Temple |
| 52 | Paul imprisoned in Rome, Italy |
| 39 | Thomas reaches Malabar, India |
| 33 | Peter reaches Gentile Cornelius |
| | Holy Spirit empowers the Church |

(Wikipedia, Timeline of Christian missions)

Resurrected 33 A.D.

| | | | | | | | | | |
|-----------------------------|--------------------------|---|---|--|--|--|---|------------------------|-----------------------|
| What are we? ▶ | | | Genesis 1:26 - 2:3 | | Mankind is created in God's image, male and female He created us | | | | |
| How are we sinful? ▶ | | | Romans 5:12-19 | | Sin entered the world through Adam and then death through sin | | | | |
| Where are we? ▶ | | | When are we? ▼ | | | | | | |
| | | | Innocence | | Fallen | | | Glory | |
| ▶ | | | Eternity Past | Creation 4004 B.C. | Fall to sin No Law | Moses' Law 1500 B.C. | Christ 33 A.D. | Church Age Kingdom Age | New Heavens and Earth |
| | | | God | Father | John 10:30 | Genesis 1:31 God's perfect fellowship with Adam in The Garden of Eden | 1 Timothy 6:16 Living in unapproachable light | | |
| Son | God's perfect fellowship | John 8:58 Pre-incarnate | | John 1:14 Incarnate | Luke 23:43 Paradise | | | | |
| Holy Spirit | | Psalm 139:7 Everywhere | | John 14:17 Living in believers | | | | | |
| Mankind | Living | Genesis 1:1 No Creation No people | Genesis 1:31 No Fall No unholy Angels | Ephesians 2:1-5 Serving the Savior or Satan on Earth | | | Matthew 25:41 Revelation 20:10 Lake of Fire prepared for the Devil and his Angels | | |
| | Deceased believing | | | Luke 16:22 Blessed in Paradise | | | | | |
| | Deceased unbelieving | | | Luke 16:23, Revelation 20:5,13 Punished in Hades until the final judgment | | | | | |
| Angels | Holy | Genesis 1:1 No Creation No people | Genesis 1:31 No Fall No unholy Angels | Hebrews 1:14 Serving mankind at God's command | | | Revelation 20:13 Thalaasa Revelation 19:20 Lake of Fire Revelation 20:2 Abbyss | | |
| | Imprisoned | | | 2 Peter 2:4, Jude 6 Imprisoned in Tartarus | | | | | |
| | Fugitive | | | 1 Peter 5:8, Revelation 12:10 | | | | | |
| | First Beast | | | Rebelling against Christ Accusing mankind | | | | | |
| | False Prophet | | | | | | | | |
| | Satan | | | | | | | | |
| Who are we? ▶ | | | Romans 11:25-36, Ephesian 2:7 | | For God has bound all over to disobedience in order to show mercy to all | | | | |
| Why are we? ▶ | | | Romans 11:25-36, Ephesian 2:7 | | For God has bound all over to disobedience in order to show mercy to all | | | | |

Destiny

Setswana at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



Ke gone tsamayang mme lo dire barutwa mo merafeng yotlhe, lo ba kolobetse mo ineng la ga Rara le la Morwa le la Mowa o o Boitshepo. - Mathaio 28:19